

Holy Bible

Aionian Edition®

भटियाली नोआ नियम
Bhattiyali Bible

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ©

भट्टियाली नोआ नियम
Bhattiyali Bible

CC Attribution ShareAlike 4.0, 2018-2024

Source text: eBible.org

Source version: 2/21/2024

Source copyright: CC Attribution ShareAlike 4.0
The Love Fellowship, 2022

Formatted by Speedata Publisher 4.19.2 (Pro) on 5/2/2024

100% Free to Copy and Print

TOR Anonymously

<https://AionianBible.org>

Published by Nainoia Inc

<https://Nainoia-Inc.signedon.net>

We pray for a modern public domain translation in every language

Report content and format concerns to Nainoia Inc

Volunteer help is welcome and appreciated!

Celebrate Jesus Christ's victory of grace!

Preface

भटियाली at AionianBible.org/Preface

The *Holy Bible Aionian Edition* © is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Take the time to understand these eleven words. The original translation is unaltered and a note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by-nd/4.0, allowing 100% freedom to copy and print, if respecting source copyrights. Check the Reader's Guide and read online at AionianBible.org, with Android, and TOR network. Why purple? King Jesus' Word is royal... and purple is the color of royalty!

Table of Contents

NEW TESTAMENT

मन्ती	11
मरकुस	29
लूका	42
यूहन्ना	61
प्रेरितां दे कम्म	75
रोमियो	94
1 कुरिन्थियों	103
2 कुरिन्थियों	113
गलातियों	119
इफिसियों	123
फिलिप्पियों	126
कुलस्सियों	128
1 थिस्सलुनीकियों	130
2 थिस्सलुनीकियों	132
1 तीमुथियुस	133
2 तीमुथियुस	136
तीतुस	138
फिलेमोन	140
इब्रानिया	141
याकूब	148
1 पतरस	150
2 पतरस	153
1 यूहन्ना	155
2 यूहन्ना	158
3 यूहन्ना	159
यहूदा	160
प्रकाशितवाक्य	161

APPENDIX

Reader's Guide


Glossary

Maps

Destiny

Illustrations, Doré

NEW TESTAMENT



तालू यीशुऐ बोलया, “हे पिता, इना जो माफ कर, क्योंकि ऐ जाणदे नी न की ऐ क्या करा दे न?” कने उना पर्चियां पाई करी उदे कपडे बंडी ले।
लुका 23:34

मत्ती

1 ऐ यीशु मसीह दे पूर्वजां दे ना दी सूची है, सै राजा दाऊद दा बंशज था, जडा अब्राहम दा बंशज था। 2 अब्राहम ला इसहाक पैदा होया, इसहाक ला याकूब पैदा होया, कने याकूब ला यहूदा कने उडे भाई पैदा होये। 3 यहूदा कने तामार ला पेरस कने जेरह पैदा होया, कने पेरस ला हिमोन पैदा होया, कने हिमोन ला एराम पैदा होया। 4 एराम ला अम्मीनादाब पैदा होया, कने अम्मीनादाब ला नहशोन, कने नहशोन ला सलमोन पैदा होया। 5 सलमोन कने राहब ला बोअज पैदा होया, कने बोअज कने स्त ला ओबेद पैदा होया, कने ओबेद ला यिशै पैदा होया। 6 कने यिशै ला दाऊद राजा पैदा होया। कने दाऊदे ला सुलेमान, सै उसा जानानिया ला पैदा होया जडी पेहले ऊरिय्याह दी घरे बाली थी। 7 सुलेमान ला रहबाम पैदा होया, कने रहबाम ला अबिय्याह पैदा होया, कने अबिय्याह ला आसा पैदा होया। 8 आसा ला यहोशाफात पैदा होया, कने यहोशाफात ला योराम पैदा होया, कने योराम ला उज्जियाह पैदा होया। 9 उज्जियाह ला योताम पैदा होया, योताम ला आहाज पैदा होया, कने आहाज ला हिजकियाह पैदा होया। 10 हिजकियाह ला मनशशे पैदा होया, मनशशे ला आमोन पैदा होया, कने आमोने ला योशियाह पैदा होया। 11 योशियाह ला यकून्याह, कने उडे भाई पैदा होये। यकून्याह कने उडे भाई इस्त्राएलियां जो कैदी बणाई करी बाबेल देशे जो लेई जाणे ला पेहले पैदा होये थे। 12 कैदी होईकरी बाबेल पुजाणे बाद यकून्याह ला शालतियल पैदा होया, कने शालतियल ला जर्बूबाबेल पैदा होया। 13 जर्बूबाबेल ला अबीहद पैदा होया, अबीहद ला एलयाकीम पैदा होया, एलयाकीम ला अजोर पैदा होया। 14 अजोर ला सादोक पैदा होया, सादोके ला अखीम पैदा होया, कने अखीम ला एलीहद पैदा होया। 15 एलीहद ला एलीआजर पैदा होया, एलीआजर ला मत्तान पैदा होया, कने मत्ताने ला याकूब पैदा होया। 16 याकूब ला यूसुफ पैदा होया, जडा मरियम दा घरेबाला था, कने मरियम ला यीशु पैदा होया जिसयो मसीह बोलेंदे ना। 17 अब्राहम ला लेईकरी दाऊदे दीकर सारियां चौदा पीढियां होईयां, राजा दाऊदे ला बेबीलोन जो कैदी बणाई करी पुजाणे दीकर चौदा पीढियां, कने कैदी बणी करी बाबेल पुजाणे दे बकते ला लेईकरी मसीह दीकर चौदा पीढियां होईयां। 18 यीशु मसीह दा जन्म होणे ला पेहले इयां होया, कि जालू उडी माता मरियम दी मंगणी यूसुफे सोगी होई गई, तां उना दा बियाह होणे ला पेहले ही सै पबित्र आत्मा दिया शक्तिया ला गर्भवती होई गई। 19 उसा दा होणेबाला घरेबाला यूसुफ बडा ही धर्मी था, कने उसा जो बदनाम नी करणा चांदा था, इस तांई उनी उसा जो डोल करी छडी देणे दे बारे च मने च सोचया। 20 जालू सै इना गल्लां दे बारे च सोचा दा था, तालू प्रभु दे स्वर्गदूते उडे उपने च आई करी बोलया, “हे यूसुफ! राजा दाऊदे दे बंशज, तू मरियम जो अपनी घरे बाली बणाणे ला मत डर क्योकि जडा उसा दे पेटे च है, सै पबित्र आत्मा दिया शक्तिया ने है। 21 कने उना इक जागत जमणा है, कने तू उदा ना यीशु रखयां, क्योकि उनी अपने लोकां जो उना दे पापां ला छुटकारा देणा है।” 22 ऐ सारा कुछ इस तांई होया कि जडा बचन परमेख्वरे दा संदेश देणेबाले यशायाह बोलया था, सै पूरा होऐ, 23 “दिख, इकी कुआरिया गर्भवती होणा कने उना इक जागत जमणा है, कने उदा ना इमामनुएल रखणा है,” जिसदा मतलब ऐ है, की परमेख्वर साडे सोगी है। 24 तालू यूसुफ निद्रा ला उठया, कने जियां स्वर्गदूते उसयो बोलया था, उनी मरियम ने बियाह किता, कने उसा जो अपने घरे लेई आया। 25 जालू दीकर उना पुत्र नी जमया तालू दीकर उनी उसा ने कोई वैवाहिक संबंध नी रखया: कने यूसुफे उदा ना यीशु रखया।

2 जालू राजा हेरोदेस यहूदिया प्रदेश च शासन करा दा था, तालू यीशु दा जन्म उसा प्रदेश दे बैतलहम शेहरे च होया। तालू तारयां दा ज्ञान रखणेबाले केई ज्योतिषी पूर्व दिशा ला यरूशलेम शेहरे च आई करी पूछणा लग्गे, 2 “कि सै बच्चा कुथु है? जडा यहूदियां दा राजा बणने तांई पैदा होया है। क्योकि असां पूर्व दिशा च उडे जन्म दे बारे च दसणे बाला तारा दिखया है, कने उसयो नमस्ते करणा आयो ना।” 3 हेरोदेस राजा यहूदियां दे राजे दे जन्म दे बारे च सुणीकरी डरी गया। कने मते सारे यरूशलेम शेहरे दे बासी भी डरी गे। 4 कने तालू उनी लोकां दे सारे बड़े याजकां कने व्यवस्था जो सिखाणे बालयां जो सदया कने उना ला पुछया, कि मसीह दा जन्म कुथु होणा है? 5 उना राजा हेरोदेस जो बोलया, कि मसीह दा जन्म यहूदिया प्रदेश दे बैतलहम शेहरे च होणा है। क्योकि परमेख्वरे दा संदेश देणेबालयां

इयां ही लिखया है: 6 “हे यहूदिया प्रदेश दे बैतलहम शेहरे दे लोको, तू कुसी भी तरीके ला यहूदा दे अधिकारियां चे सबते छोटा नी है; क्योकि तिजो चे इक माणु निकलना है, जिनी मेरी प्रजा इस्त्राएले दी रखबाली करणी है।” 7 तालू राजा हेरोदेसे ज्योतिषियां जो डोल करी सदीकरी उना ला पुछया, कि तारा कुस बेले दिखया था, क्योकि राजा उस बच्चे दी उम्र जाणना चांदा था। 8 कने उनी उना जो ऐ बोली करी बैतलहम शेहरे च भेजया, “जा” कने उस बच्चे दे बारे च ठीक ढंगे ने पता करा, कने जालू सै मिली जांगा तां मिजो खबर भेजणयो ताकि मै भी उसयो नमस्ते करे। 9 सै राजे दी गल्ल सुणीकरी चली गे, कने जडा तारा उना पूर्व दिशा च दिखया था, सै तारा उना दे अग्गे-अग्गे चलयया, कने उस घरे उपर स्की गया, जिथु सै बच्चा था। 10 कने सै उस तारे जो दिखीकरी बडे खुश होये। 11 कने उस घरे जाई करी उस बच्चे जो कने उदिया माता मरियम जो सोगी दिखया, कने झुकी करी बच्चे जो नमस्ते किता, कने अण्णा-अण्णा थैला खोली करी उसयो सोना, कने लोबान, कने गंधरस दी भेंट चढाई। 12 कने उना जो सुपने च परमेख्वरे ला चेतावनी मिलली कि राजा हेरोदेस बाल मुडी करी मत जांदे, कने ज्योतिषियां हेरोदेस जो खबर नी दिती कने होर रस्ते ला होईकरी अपने देशे जो चली गे। 13 उना दे जाणे बाद दिखा, प्रभु दे इकी स्वर्गदूते यूसुफ दे सुपने च आई करी बोलया, “उठ! कने उस बच्चे जो कने उदिया माता जो लेईकरी मिस्र देशे जो चली जा; कने जालू दिकर मै तिजो नी बोलगा तालू दीकर ओथु ही रियां, क्योकि राजा हेरोदेस इस बच्चे जो तोपा दा है, ताकि उसयो मारी दे।” 14 कने सै तालू ही राती उठी करी बच्चे जो कने उदिया माता जो लेईकरी मिस्र देशे जो चली गया। 15 कने राजा हेरोदेस दे मरणे दीकर सै ओथु ही रिया। इस तांई कि सै बचन पूरा हो जडा परमेख्वरे दा संदेश देणेबाले होशे बडा पहले बोलया था: “कि मै अपने पुत्रे जो मिस्र देश ला सदया।” 16 जालू हेरोदेस जो पता लग्गा कि ज्योतिषियां मिजो धोखा दिता है। तालू उसयो बडा गुस्सा आया, कने उनी सिपाइयां जो भेजी करी ज्योतिषियां दे ठीक-ठीक दसयो बकते दे मुताबिक बैतलहम शेहरे च कने उस दे अखे-बखे दे सारे बचयां जो जडे दो सालां दे या उसला भी लोके थे, सै सारे मारवाई दिते। 17 तालू जडा बचन परमेख्वरे दा संदेश देणेबाले यिर्याह दे जरिये बोलया गया था, सै पूरा होई गया 18 “रामाह शेहरे च लोकां जो कुसकी दी बडे जोरे ला रोणे दी अबाज सुणया दी थी, राहल अपने बचयां तांई रोआ दी थी; कने चुनु नी होणा चांही थी, क्योकि सै हुण मरी गियो थे।” 19 यूसुफ मरियम कने बच्चा यीशु हल्ले दीकर मिस्र देशे च ही थे। राजा हेरोदेस दे मरणे बाद तां प्रभु दे स्वर्गदूते यूसुफे दे सुपने च आई करी बोलया, 20 “उठ, कने बच्चे कने उदिया माता मरियम जो लेईकरी इस्त्राएल देशे जो चली जा, क्योकि राजा हेरोदेस कने सै लोक जडे बच्चे जो मारणा चांहे थे, सै सब मरी गियो ना।” 21 सै उठया, कने बच्चे कने उदिया माता जो लेईकरी मिस्र देशे ला इस्त्राएल देशे जो बापिस आई गया। 22 पर जालू यूसुफे ऐ सुणया कि अरखिलास अपने पिता राजा हेरोदेस दिया जगा पर यहूदिया प्रदेश च राज करे दा है, तां सै ओथु जाणे ला डरया, कने उसयो परमेख्वरे सुपने च चेतावनी दिती, कने सै गलील प्रदेशे जो चली गया। 23 कने यूसुफ नासरत नापे दे इक गांऐ च जाई बसया, ताकि सै बचन पूरा हो, जडा परमेख्वरे दा संदेश देणेबालयां यीशु दे बारे च बोलया था: “कि यीशु मसीह जडा नासरत ला है कने इसी नापे ने जाणया जाणा।”

3 उना दिना च यहूना बपतिस्मा देणेबाला यहूदिया प्रदेश दी इक सुनसान जगा च आई करी ये प्रचार करादा था कि: 2 अपने पापां जो मनी लिया कने गलत कम्मा जो छडी दिया, क्योकि स्वर्ग दा राज्य नेडे ओआ दा है। 3 ऐ सै ही है, जिदी चर्चा परमेख्वरे दा संदेश देणेबाले यशायाह किती थी, “सुनसान जगा ला इक हक्का पाणे बाले दी अबाज सुणाआ दी है, परमेख्वरे ओणे तांई, अपने आपे जो तैयार करा, कने अपने मने दी सोच समझा जो खरा रखा, उनी ओणा है।” 4 यहूना ऊंटे दे बालां दे बणयो कपडे पांदा था, कने अपने लके च चमडे दा पटा बनदा था, कने टिट्टे कने मखिर खांदा था। 5 तालू यरूशलेम शहरे दे कने सारे यहूदिया प्रदेशे दे, कने यरदन खड्डा दे अखे-बखे दे सारे इलाके दे लोक उडे बाल आये। 6 कने उना लोकां अपने पापां जो मनया, कने यहूना उना सारयां जो यरदन खड्डा च बपतिस्मा दिता। 7 कने जालू उनी मते फरीसियां कने सदकियां जो बपतिस्मा लेंगे तांई अपने बाल ओंदा दिखया, तां उनी उना जो बोलया, तुसां लोक जहरीले सापा सांई बुरे न, तुहाडा ऐ सोचणा गलत है, कि सिर्फ तुसां बपतिस्मा लेंगे

ने अपने पापां दी सजा ला बची जाणा जड़ी परमेश्वरे तुसां जो देणी है। 8 इस तांई अपने पापां जो मन्नी करी बुरे कम्मा जो छडी करी अपने पश्चाताप जो साबित करा। 9 कने अपने-अपणे मना च ऐ मत सोचा, कि साडा पिता अब्राहम है; क्योंकि मैं तुहांजो बोला दा है, कि परमेश्वर इना पथरां ला भी अब्राहमे तांई ओलाद पैदा करी सकदा है। 10 कने हुण कुहाडी स्वां दिया जडा च रखियो है, इस तांई की जडा-जडा सख खरा फल नी दिगा, सै बडी करी अग्गी च फूकी देणा है। 11 “तुसां पापां दा पश्चाताप करिके मन बदला, इस तांई मैं तुहांजो पाणियो ने बपतिस्मा दिन्दा है, पर जडा मेरे बाद ओणे बाला है, सै मिंजो ला भी शक्तिशाली है; मैं तां उदे जुते चुकणे जोगा भी नी है, उनी तुहांजो पबित्र आत्मा कने अग्गी ने बपतिस्मा देणा है। 12 उदा सूप उदे हथे च है, कने उनी अपणी कणक गाणे बाली जगा ढंगे ने साफ करणी, कने कणक पेडुआं च गटेरी रखणी, पर भूरे जो उसा अग्गी च फुकणा जडी कदी बुझदी ही नी।” 13 उस बेले यीशु गलील प्रदेशे दिया यरदन खड्डा कंडे पर यहूना बाल उसला बपतिस्मा लेणे तांई आया। 14 पर यहूना उसयो ऐ बोली करी रोकणा लग्गा, कि मिंजो तां तेरे हथे ला बपतिस्मा लेणे दी जरूरत है, कने तू मेरे बाल आया है? 15 यीशुऐ उसयो ऐ जबाब दिता, “हुण तां इयां ही होणा दे, क्योंकि सांझो इस तरीके ने सै सब कुछ करणा चाईदा जडा परमेश्वर चांदा है।” तां यहूना उदी गल्ल मनी लेई। 16 कने यीशु बपतिस्मा लेईकरी झट पाणिए ला बाहर आया, कने दिखया, उदे तांई अम्बर खुली गया, कने उनी परमेश्वरे दिया आत्मा जो कबतुरे सांई उतरदे कने अपने उपर ओदे दिखया। 17 कने दिखा, स्वर्ग ला ऐ अबाज सुणोई की, “ऐ मेरा प्यारा पुत्र है, कने तिजो ला मैं खुश है।”

4 तालू पबित्र आत्मा यीशुऐ जो सुनसान जगा च लेई गेई ताकि शैतान उसयो लालच देई सके। 2 यीशु चाली दिन, कने चाली रात, बिना कुछ खादयो ओथु रिया, कने जालू उसयो भूख लग्गी। 3 तालू शैताने उदे बखे आई करी उसयो बोलया, “अगर तू परमेश्वरे दा पुत्र है, तां बोल, कि ऐ पथर रोटियां बणी जान, ताकि तू इना जो खाई सके।” 4 यीशुऐ जबाब दिता, “कि पबित्र शाश्व च लिखया है, कि माणू सिर्फ रोटियां ला ही नी, पर परमेश्वरे दे बोलयो बचना जो मन्नी करी जिन्दा रेंदा है।” 5 तालू शैतान यीशुऐ जो पबित्र यरशल्लेम शहर च लेई गया कने परमेश्वरे दे मंरे दिया चुंडिया पर खेडी दिता। 6 कने उसयो बोलया, अगर तू परमेश्वरे दा पुत्र है, तां ऐथू ला छाल मारी करी दस कने तिजो कुथी भी चोट नी लगणी है; क्योंकि पबित्र शाश्व च लिखया है, कि उनी स्वर्गदां जो हुकम देणा; कने उना तिजो हथो हथ सभाली लेणा है; कुथी इयां ना होए कि तेरे पैरां च पथरे ला चोट लग्गी जा। 7 यीशुऐ उसयो बोलया, “कि पबित्र शाश्व च ऐ भी लिखया है, कि लोकां जो अपने प्रभु परमेश्वरे जो नी परखणा चाईदा।” 8 फिरी शैतान उसयो इक बडे उच्चे पहाडे पर लेई गया, कने सारे संसारे दे राज्य कने उना दी धन दौलत दस्सी करी, 9 उनी बोलया, कि अगर तू मेरे पैरां पेईकरी मिंजो नमस्ते करगा, तां मैं ऐ सब कुछ तिजो देई दिगा। 10 तालू यीशुऐ उसयो बोलया, शैतान दूर होई जा, क्योंकि पबित्र शाश्व च लिखया है: “तू सिर्फ अपने प्रभु परमेश्वरे जो नमस्ते कने सिर्फ उदी ही भक्ति कर।” 11 तालू शैतान उदे बखे ला चली गया, कने स्वर्गदूत आई करी यीशुऐ दी सेबा करणा लग्गे। 12 जालू उनी ऐ सुणाया कि यहूना जो पकडी करी जेला च बन्द करी लिया है, तां सै यहदिया प्रदेश जो छडी करी गलील प्रदेशे जो चली गिया। 13 कने सै नासरते जो छडी करी कफनहम शहरे च जडा गलील झिला दे कंडे था, जिथू जबूलन कने नमाली दे गोत्र रेंदे थे, ओथू जाई करी रेणा लग्गा। 14 ताकि जडा परमेश्वरे दा संदेश देणेबाले यशायाह बोलया था, सै पूरा हो। 15 “तुसां लोक जडे जबूलन कने नमाली गोत्र दे इलाके च रेंदे न, ऐ इलाके उस रस्ते पर न जडे गलील दरियाये दे बखे कने यरदन खड्डा दे पूर्वी कंडे पर है, ऐ गलील प्रदेशे दे ऐसे इलाके न जिथू होर जातियां दे लोक रेंदे न।” 16 परमेश्वरे जो जाणयो बिना नेहरे च रेणेबाले लोकां इक बडी ज्योति दिखणी; इना ज्योतिया उना लोकां जो मुक्ति दा रस्ता दसणा, जडे परमेश्वरे जो जाणयो बिना जिन्दगी जिं दे कने हमेशा दिया मौता दे रस्ते पर चलयो न। 17 उस बेले ला यीशुऐ प्रचार करणा कने ऐ बोलणा शुरू किता, “कि मन बदला क्योंकि स्वर्ग दा राज्य बखे आई रिया है।” 18 इक दिन जालू यीशु गलील झिला दे बखे-बखे चलया था, तां दो मछवारे भाईयां जो झिला च जाल पांटे दिखया, उना च इक शमौन था जिसयो पतरस बोलदे न कने उदा भाई अन्दियास था। 19 यीशुऐ उना जो बोलया, “ओआ कने मेरे चले बणा; मैं

तुहांजो सिखांगा कि लोकां जो मेरे बाल कियां लोणा कने कियां मेरे चले बणाणा है।” 20 उना झट जाल छडया कने उदे पिच्छे चली पै। 21 जालू यीशु थोडा अग्रे चलया, उनी होर दो भाईयां जो दिखया जिना दे ना याकूब कने यहूना थे, कने सै जव्दी दे पुत्र थे, सै किस्तिा पर जाले जो ठीक करा दे थे, कने यीशुऐ उना जो भी सदया। 22 सै झट किस्तिा कने अपने पिता जो छडी करी उदे पीच्छे चली पै। 23 यीशु सारे गलील प्रदेशे च गुमदा रेंदा कने उना दे यहूदी जंज परां च उपदेशे दिन्दा कने राज्य दा शुभसमाचार दा प्रचार, कने लोकां दियां सारियां बिमारियां कने कमजोरियां जो ठीक करदा जांदा था। 24 कने सारे सीरिया प्रदेशे च यीशुऐ दे बिमारी दी खबर फैली गेई कने लोक सारे बिमारां च, जिना जो केई किस्मा दियां बिमारियां कने दुखां जकडया था, कने जिना जो बुरियां आत्मा थियां, कने मिर्गिया दे दौरे बाले, कने लकवे दे रोगियां जो उस बाल लेईकरी आणे कने यीशुऐ उना सारयां जो ठीक करी दिता। 25 कने गलील प्रदेशे कने दिकापुलिस शहरे कने यरशल्लेम शहर कने यहदिया प्रदेशे ला कने यरदन खड्डा दे पारे ला भिडा दी भीड उदे पिच्छे चली पैई।

5 यीशु भिडा जो दिखीकरी, पाहडे पर थोडा उपर चली गिया, कने उना जो शिक्षा देणे तांई ओथु बेई गिया तां उदे चले उदे बाल आये। 2 कने उना जो शिक्षा देणी शुरू किती: 3 “धन्य न सै लोक, जडे मने दे दीन न जिना जो परमेश्वर दी जरूरत दा ऐहसास है, क्योंकि स्वर्ग दा राज्य उना दा ही है। 4 धन्य न सै लोक, जडे शोक करदे न, क्योंकि परमेश्वरे उना जो शांती देणी। 5 धन्य न सै लोक, जडे नग्न न, क्योंकि धरती उना दी होणी है। 6 धन्य न सै लोक, जडे धार्मिकता ने जिन्दगी जिणे दी सच्ची भूख प्यास रखदे न, क्योंकि परमेश्वरे उना जो रजाणा है। 7 धन्य न सै लोक जडे दयालु न, क्योंकि परमेश्वरे उना पर दया करणी। 8 धन्य न सै लोक, जिना दे मन साफ न, क्योंकि उना परमेश्वरे जो दिखणा। 9 धन्य न सै लोक, जडे इकी दुज्जे दा मेल कराणे बाले न, क्योंकि उना जो परमेश्वरे दा पुत्र बोलया जाणा। 10 धन्य न सै लोक, जडे धर्म दे कम्म करणे दिया बजा ने सताऐ जांटे न, क्योंकि स्वर्ग दा राज्य उना दा ही है। 11 धन्य न तुसां, जालू माणुऐ मेरिया बजा ने तुहाडी निन्दा करणी कने तुसां जो सताणा क्योंकि तुसां मेरे चले न कने झट बोली-बोली करी तुहाडे खिलाफ हर तरां दियां बुरियां गल्लां बोलगे। 12 तालू तुसां खुश कने मगन होनयो क्योंकि तुहाडे तांई स्वर्ग च बडा इनाम है। इस तांई कि जडे बडे बकते पहले परमेश्वरे दा संदेश देणेबाले थे उना जो भी इयां ही सताया था। 13 तुसां धरतिया पर लोकां तांई लूणै सांई न; पर अगर लूणै दा स्वाद बिगडी जा, तां फिरी सै कुसा चिजा ने लूणैका करणा? फिरी सै कुसी कम्मे दा नी है, सिर्फ इसी तांई कि इसयो बार सुटी दिया ताकि माणुआं दे पैरा हेठ ओए। 14 तुसां पुरे संसारे तांई ज्योति न। जडा शहर पाहडे पर बस्या है, सै कदी छुपी नी सकदा। 15 कने लोक दिट्या बाली करी टोकसुरे हेठ नी रखदे न, पर उसयो उपर धारिया पर रखदे न, ताकि घरे दे सारे लोकां जो लौ होऐ। 16 तियां ही तुहाडी लौ भी माणुआं सामणे चमके तां सै तुहाडे भले कम्मा जो दिखीकरी तुहाडे पिता दी बडाई करन, जडा स्वर्ग च है। 17 ऐ मत समझा कि, मैं मूसा दी व्यवस्था या परमेश्वरे दा संदेश देणेबालयां दिया गल्लां जो खत्म करणा आया है, मैं उना जो खत्म करणा नी, पर उना जो पूरा करणा आया है। 18 क्योंकि मैं तुसां ने सच्च बोलदा है, कि अम्बर कने धरती खत्म होई जांगे, पर परमेश्वरे दिया व्यवस्था ला कुछ भी, ऐथू दीकर इक बिंदू या मात्रा भी पूरा होयो बिना नी टलनी है। व्यवस्था दियां सारियां भविष्यवाणियां पुरियां होणियां न। 19 इस तांई जडा कोई छोट्टे ला छोट्टे हुकम के कुसकी इकी जो भी नी मनाणा, कने तियां ही लोकां जो सिखांगा, तां उदयो स्वर्ग दे राज्य च सारयां ला छोट्टा बोलणा, पर जडा कोई उना दा पालन करणा कने उना जो सिखांगा, सिर्फ उसयो ही स्वर्ग च महान बोलणा है। 20 मैं तुसां ने बोलदा है, कि अगर तुसां च कोई स्वर्ग दे राज्य च जाणा चांदा है, तां तुसां जो व्यवस्था जो सिखाणे बाले कने फरीसियां ला बदीकरी परमेश्वरे दी व्यवस्था दा पालन करणा चाईदा। 21 तुसां सुणया होणा, व्यवस्था जो सिखाणे बालयां साडे पूर्वजां जो दसया कि ‘हत्या मत करदे’, कने जडा कोई हत्या करणा उसयो यहूदी सभा च सजा मिलणी है। 22 पर मैं तुसां जो ऐ बोलदा है, कि जडा कोई अपने भाईऐ पर गुस्सा करणा, उसयो यहूदी सभा च सजा मिलणी: कने जडा कोई अपने भाईऐ जो नकम्मा बोलणा उसयो महासभा च परमेश्वरे सजा देणी, जडा कोई अपने भाईऐ जो निकम्मा कने

मूर्ख बोले; उसयो नरके दी अग्नी दी सजा मिलणी। (Geenna g1067) 23 इस ताँद अगार तू अपणी भेंट चढ़ाणे ताँदें मंदरे जो लोणे, कने ओथु तिजो याद ओणे, कि मेरे भाईए दे मने च मेरे ताँदें कोई शिकायत है, 24 तां अपणी भेंट ओथु ही मंदरे दे सामणे छडी दे, कने पेहले जाई करी अपणे भाईये ने मेल मिलाप कर, तां फिरी आई करी अपणी भेंट चढ़ा। 25 कचेरी जाँदे बकते रस्ते च ही तू अपणे बिरोधी ने राजीनमा करी ले, ताकि तेरा बिरोधी तिजो न्याय करणे बाले दे हथे ना देई दे, कने न्याय करणे बाला तिजो जेला च पाई दे। 26 मैं तुसां ने सच्च बोलदा है जालू दीकर तू इक-इक पैसा नी भरी दिगा तालू दीकर तू जेलखाने ला नी छुटी सकदा है।” 27 तुसां सुणी बैठयो न कि परमेश्वरे हुकम दितया था, कि व्यभिचार मत करदे। 28 पर मैं तुसां ने दे बोलदा है, जडा कोई कुसा जनानिया जो बुरिया नजरा ने दिखे तां से अपणे मने च उसा ने व्यभिचार करी बना है। 29 अगार तेरी सजी हख तेरे पाप दी बजा बणे, तां उसा जो कडी करी सूटी दे; क्योंकि तेरे ताँदें ऐ ही खरा है कि तेरे अंगा चे इकी दा नाश होई जाऐ ताकि तेरा बाकी शरीर नरक जाणे ला बची जा। (Geenna g1067) 30 कने अगार तेरा सज्जा हथ तेरे पाप करणे दी बजा बणे, तां तू उसयो बडी करी सूटी दे, क्योंकि तेरे ताँदें ऐ ही खरा है कि तेरे अंगा चे इक हिंसा नाश होई जा, ताकि तेरा बाकी शरीर नरक जाणे ला बची जा। (Geenna g1067) 31 मूसा दिया व्यवस्था च ऐ भी बोलया था, कि जडा कोई अपणिया घरे बालिया जो तलाक देणा चांदा है, तां उसा जो तलाकनामा दे। 32 पर मैं तुसां जो ऐ बोलदा है, कि जडा कोई अपणिया घरे बालिया जो व्यभिचार दे सिवा कुसी होरसी बजा ने छडी दे, तां से उसा ला व्यभिचार कवांदा है; कने जडा उसा छडिया ने बियाह करे, सै व्यभिचार करदा है। 33 फिरी तुसां सुणी बैठयो न, कि व्यवस्था जो सिखाणे बालयां साडे पूर्वजां बोलया था, झुठियां कसमां मत खांदे, पर परमेश्वरे दे सामणे खादियां अपणियां कसमां जो पुरियां करनयो। 34 पर मैं तुसां ने ऐ बोलदा है, कि कदी कसम मत खांदे; ना ही स्वर्गे दी, क्योंकि स्वर्ग परमेश्वरे दा सिंहासन है। 35 ना ही धरतिया दी, क्योंकि सै उदे पैरां दी चौकी है; कने ना ही यरूशलेम शहर दी क्योंकि सै महान राजा परमेश्वरे दा शहर है। 36 कने अपणे सरे दी भी कसम मत खांदा क्योंकि तू अपणे इक बाले जो भी ना चिट्टा, कने ना काला करी सकदा है। 37 पर तुहाडी गल्ल हां दी हां, कने ना दी ना हो; क्योंकि जडा कुछ इसला जादा होंदा है, सै शैतान ला होंदा है। 38 फिरी तुसां सुणी बैठयो न कि मूसा दिया व्यवस्था च लिखया है, कि अगार कोई तेरी हखी जो फोडी दे तां तुमी उदे बदले च उदी हख फोडी दे, कने इयां ही दंद दे बदले दंद तोडी दिया। 39 पर मैं तुसां ने ऐ बोलदा है, कि तुसां बदला मत लेंदे; पर जडा तेरिया सजिया खाडिया पर थपड मारे, तां उदे सामणे दुई खाडी भी करी दिया। 40 कने अगार कोई तिजो पर मुकद्दमा करी के जबरदस्ती तेरा कुरता लेणा चांदा है, तां उसयो अपणिया धोतिया भी लेणा दिया। 41 कने कोई रोमी सिपाई तिजो जबरदस्ती ही इक मील भर लेई जांदा है, तां उदे सोगी दो मील चली जा। 42 कने जडा कोई तिजो ला कुछ मंगे, तां उसयो देई दे; कने जडा तिजो ला उधार लेणा चांदा है, उसयो मना मत करदे। 43 तुसां सुणी बैठयो न कि व्यवस्था च लिखया है; कि अपणे पडोसियां ने प्यार रखा, कने दुश्मणा ने दुश्मणी रखा। 44 पर मैं तुसां ने ऐ बोलदा है, कि अपणे दुश्मणा ने प्यार रखा, कने जडा तुसां जो सतादां है उस ताँदें प्रार्थना करा। 45 जिसने तुसां अपणे स्वर्गीय पिता दी ओलाद बणना है, क्योंकि सै खरे लोकां कने बुरे लोकां दोना उपर अपणा सूरज निकालदा है, कने धर्मियां कने अधर्मियां दोनो पर बरखा बरसांदा है। 46 क्योंकि अगार तुसां अपणे चाहणे बालयां ने ही प्यार रखन, तां परमेश्वरे तुसां जो फल नी देणा, क्योंकि चुंगी लेंणे बाले भी इयां ही करदे न? 47 कने अगार तुसां सिर्फ अपणे मसीह भाईयां जो ही नमस्ते करदे न, तां तुसां दुज्जे लोकां दे बदले कोई बडा कम्म नी करदे ना। क्योंकि होर जातियां जडियां परमेश्वरे दे हुकमा दा पालन नी करदियां न, सै भी तां इयां ही करदे न? 48 इस ताँदें तुहांजो उना जो प्यार करणा चाईदा जडे तुहांजो प्यार नी करदे इस तरीके ने तुसां सिद्ध बणा, जियां तुहाडा स्वर्गीय पिता सिद्ध है।

6 ध्यान रखा तुसां माणुआं जो दसणे ताँदें अपणे भले कम्म मत करा, नी तां तुहांजो अपणे स्वर्गीय पिता परमेश्वरे ला कोई इनाम नी मिलणा। 2 इस ताँदें जालू तू दान करे, तां इदा दिखावा मत करदा, जियां डोंगी लोक यहूदी जंज घरे च कने गलियां च करदे न, ताकि लोक उना दी बडाई करन, मैं तुसां ने सच्च बोलदा है, कि उना जो लोकां ला अपणा इनाम मिली गिया है। 3 पर जालू तू दान करे, तां

तेरा दान गुप्त हो जडा लोकां च कुसी जो भी पता ना चले। 4 ताकि तेरा दान गुप्त रे, कने तालू तेरा पिता परमेश्वरे जडा गुप्त च दिखदा है, उनी तिजो उदा इनाम देणा। 5 जालू तू प्रार्थना करे, तां कपटियां साँदें मत करदा क्योंकि सै लोकां जो दसणे ताँदें यहूदी जंज घरे च कने सडकां दे मोडा पर खडोई करी प्रार्थना करदे न, सै इस ताँदें करदे न ताकि लोक उना जो दीखन कने प्रशंसा करन। मैं तुसां ने सच्च बोलदा है, कि उना जो अपणा इनाम मिली गिया है। 6 पर जालू तू प्रार्थना करणा, तां अपणे कमेरे अंदर जा, कने दरबाजा बंद करिके अपणे पिता परमेश्वरे ने प्रार्थना कर जिसयो कुनी नी दिखया है, तालू तेरे पिता परमेश्वरे जडा गुप्त च दिखदा है, उनी तिजो इदा इनाम देणा। 7 पर प्रार्थना करदे बेले होर जातियां साँदें बेकार च बडबडा मत करा, क्योंकि सै समझदे न कि उना दे बडबडाणे ने परमेश्वरे उना दी सुणी लेणी है। 8 इस ताँदें तुसां उना साँदें मत बणा, क्योंकि तुहाडा पिता परमेश्वरे तुहाडे मंगणे ला पैहले ही जाणदा है, कि तुहाडियां क्या-क्या सुकरतां ना। 9 इस ताँदें तुसां जो इस तरीके ने प्रार्थना करणा चाईदी की: है साडे पिता परमेश्वर, जडा तू स्वर्गे च है; तुहाडा ना पबित्र मनया जाये। 10 सारे माणुआं पर तू राज्य करे। जियां तेरी इच्छा स्वर्गे च पुरी होंदी है, तियां ही धरतिया च भी पूरी होऐ। 11 सांझो हर रोज सै खाणा दे जडा सांझो उस दिने ताँदें चाईदा है। 12 कने जियां असां अपणे गुनागारां जो माफ कितया है, तियां ही तू भी साडे पापां जो माफ कर। 13 कने साडी परख ना ले, पर सांझो शैताने ला बचा। क्योंकि राज्य कने पराक्रम कने महिमा सदा तेरी है। आमीन। 14 इस ताँदें अगार तुसां माणुआं दे गुनहां जो माफ करणे जडे उना तुहाडे खिलाफ कितयो, तां तुहाडे स्वर्गीय पिता परमेश्वरे भी तुहाडे गुनहां माफ करणो। 15 कने अगार तुसां माणुआं दे गुनहां जो माफ नी करणे, तां तुहाडे पिता परमेश्वरे तुहाडे गुनाहां भी माफ नी करणे। 16 जालू तुसां बरत रखन, तां कपटियां साँदें तुहाडे मुऐ पर उदासी नी होणा चाईदी क्योंकि सै अपणा मु उदास बणाई रखदे न, ताकि लोकां जो पता लगे कि उना बरत रखया है। मैं तुसां ने सच्च बोलदा है, कि उना जो अपणा इनाम मिली गिया है। 17 पर जालू तू बरत रखे तां अपणे सिरे पर तेल मल कने मुऐ जो धोई ले। 18 ताकि लोकां जो नी, पर तेरे पिता परमेश्वरे जो पता लगे जिसयो कुनी नी दिखया है, उनी तिजो इदा इनाम देणा। 19 अपणे ताँदें धरतिया च धन दौलत मत गठेरा, जिथू कीडा कने भुथ्थी खराब करदी है, कने जिथू चोर नजर रखदे न कने ताले तोडी करी चोरी लेई जांते ना। 20 पर भलाई करी के अपणे ताँदें स्वर्गे च धन दौलत गठेरा, जिथू ना तां कीडा लगदा है, ना भुथ्थी खराब करदी है, कने जिथू ना कोई नजर रखदा कने ना कोई चोरदा है। 21 क्योंकि तेरा मन हमेशा ओथु लगगी रेणा जिथू तेरी धन दौलत है। 22 हखी शरीर ताँदें इक दिरये साँदें न, इस ताँदें अगार तेरियां हखी साफ न, तां तेरे सारे शरीर च भी लौ होणी। 23 पर अगार तेरियां हखी बुरियां न, तां तेरा सारा शरीर भी नेहरे च होणा; इसा बजा ने जडी लौ तिजो च है, अगार सै नेहरा होए तां सै नेहरा कितणा जादा होणा! 24 कोई माणु इक ही बकते दो मालकां दी सेबा नी करी सकदा, क्योंकि उनी इकी ने दुश्मनी कने दुरे ने प्यार रखणा, या इकी ने मिली के रेणा कने दुरे जो घटिया समझणा। तुसां परमेश्वर कने धन दौलत दोनो दी सेबा नी करी सकदे। 25 इस ताँदें मैं तुसां ने बोलदा है, कि अपणी रोजे दी जिन्दगी जिणे ताँदें ऐ चिंता मत करदे असां क्या खाणा, कने क्या पिणा, कने ना अपणे शरीर ताँदें कि क्या पेनणा, क्या अपणे प्राण खाणे ला कने शरीर कपडे ला बदीकरी नी हे? 26 अम्बरे दे पंछियां जो दिखा। सै ना कुछ रांदे न, ना बडदे न, ना खेतरां च बटोलंदे न, तमी तुहाडा स्वर्गीय पिता परमेश्वर उना जो खुआंदा है। तुसां क्या इना पंछियां ला जादा कीमती नी न? 27 तुसां चे ऐसा कुण है, जडा चिंता करणे ने अपणिया जिन्दगिया च इक घडी भी बधाई सकदा है? 28 कने कपडयां ताँदें कजो चिंता करदे न? जंगली फुलां पासे ध्यान दिया, कि सै कियां बडुदें न, सै ना तां मेहनत करदे न, कने ना ही कपडे बणादे ना। 29 तमी मैं तुसां ने बोलदा है, कि जालू राजा सुलेमान बाल बडा भरी धन दौलत थी, तालू भी उनी उना चे कुसी साँदें भी कपडे नी पायो थे। 30 इस ताँदें अगार परमेश्वर दे घाए जो, जडा अज है, कने कल अग्गी च फुकया जाणा, तमी परमेश्वर घाए जो इतणी सुन्दरता दिन्दना है, तां हे अल्पबिश्वासियां, तां उनी पक्का तुसां दी देखभाल करणी है, पर परमेश्वरे पर तुहाडा भरोसा इतणा घट कजो है? 31 इस ताँदें तुसां चिंता करिके ऐ मत बोलंदे, कि असां क्या खांगे, या क्या पींगे, या क्या पेनंगे? 32 क्योंकि होर जातियां इना सारियां चीजा दियां तोपा च रेंदियां न, कने तुहाडा स्वर्गीय पिता परमेश्वर जाणदा है, कि तुसां जो ऐ सारियां चीजा चाईदियां न, इना

दी चिंता मत करा। 33 इस ताँई पहले तुसां परमेश्वरे दे राज्य कने धार्मिकता दी जिन्दगी जिणे दी कोशिश करा, तां तुसां जो ऐ सारियां चिजा मिली जाणियां। 34 इस ताँई कल्ले ताँई चिंता मत करा, क्योंकि कल दा दिन अपनी चिंता अपु करी लेंदा है; अज्जे ताँई अज्जे दा दुख ही बतेहरा है।

7 दुजयाँ पर दोष मत ला, ताकि परमेश्वर तुहांजो पर भी कोई दोष ना लाये।
 2 क्योंकि जियां तुसां कुसी पर दोष लांदे न, तियां ही परमेश्वरे तुहांजो पर भी दोष लागणा; कने जियां तुसां दुजयां ने व्यवहार करंदे न, तियां ही परमेश्वरे तुहाडे सोगी करणा। 3 तू कजो अपने विश्वासी भाईऐ दियां छोटियां-छोटियां गलतियां जो दिखदा है, जडियां उदिया हखी च पियो छोटे दे कखे साँई न, अगर तेरिया जिन्दगिया च मते पाप न, जडा तेरिया अपनी हखी च इक लटे साँई है, तां सै तिजो कनी नी मिलदा? 4 जालू तैरे अंदर ही मते पाप न, तां तू खुद ला घट पाप बाले कुसी भाईये दी मदद किया करी सकदा है। 5 कपटियाँ, पहले तां अपने आपे दे पापां जो सुधारी ले, तां तू अपने भाईये दिया हखी दे कखे जो हंगे ने दिखी करी कडी सकदा है, कने तां दुजयां जो उना दे छोटे पापां जो सुधारणे च मदद करी सकणा। 6 उना लोकां जो परमेश्वरे दा संदेश मत सुणा जडे बचना जो सुपना नी चाँडे। अगर तुसां ऐसा करंदे न, तां ऐ ऐसा होणा जियां पहिले चिजां जो कुतयां अगो फेंकी देणा, या जियां सुआं दे अगो हीरो मोती फेंकणा, उना तां सै पैरां हेठ गरेचणे कने फिरी करी तुसां पर ही हमला करणा। 7 तुसां जो जडा चाईदा सै परमेश्वरे ला मंगा कने उनी तुसां जो देणा; अगर तुसां तोपणे, तां तुसां जो मिलणा; अगर खटखटाणे, तां तुहाडे ताँई खुलणा। 8 क्योंकि जडा कोई मंगदा है, उसयो मिलदा है; जडा तोपदा है, उसयो मिलदा है; कने जडा दरबाजा खटखटादा है, उदे ताँई खोलया जाणा। 9 तुसां च कोई भी ऐसा माणू नी है, जडा अपने पुत्रे दे रोटी मंगणे पर उसयो पथर दिन्दा है। 10 इयां ही अगर तुहाडा जागत तुसां ला खाणे जो मछी मंगे तां क्या तुसां उसयो जरिला सप्प दिन्दे न? 11 जालू तुसां बुरे होईकरी, अपने बचयां जो खरियाँ चिजा देणा जाणदे न, तां तुहाडे स्वर्गीय पिता परमेश्वरे अपने मंगणे बालयां जो खरियाँ चिजा कनी दिणा? 12 इसा बजा ने जडा कुछ तुसां चाँदे न, कि माणू तुहाडे सोगी करे, तां तुसां तियां ही उना सोगी करा; क्योंकि मूसा दी व्यवस्था कने परमेश्वरे दा संदेश देणेवाले दी शिक्षा दा मतलब ऐई है। 13 तुसां सिर्फ सुंगडे फाटक ला परमेश्वरे दे राज्य अंदर जा, क्योंकि जडा फाटक चौडा कने अमान रस्ता है, सै बरबादिया पास लेई जाँदा है; कने मते भरी लोक न जडे इस रस्ते ला जाँदे न। 14 क्योंकि सुंगडा सै फाटक है, कने औखा है सै रस्ता जडा अनन्त जिन्दगी बाल पुजांदा है, सै लोक थोडे ही न जिना जो ऐ रस्ता मिलदा है। 15 असां परमेश्वरे दे संदेश देणेवाले लोक न, ऐसा अपने आपे जो बोलणे बाले झूठे लोकां ला चौकने रिया। सै उना भेडियां देणा न जिना अपने आपे जो भेडा दियां खल्ली ने दबक्या है, लोकां जो यकीन दिलाणे ताँई कि सै सच्ची च भेडां न, पर सै असल च भेडिये न जडे लोकां पर हमले करंदे न। 16 उना दे कम्मा ने तुसां उना जो पछेणी लेणा है। लोक क्या झिल्लां ला अंगूर, या कंडे बाले झिल्लां ला अंजीर तोडदे न? 17 इयां ही इक खरा सख खरा फल दिन्दा है, कने बेकार सख बुरा फल दिन्दा है। 18 खरा सख बुरा फल नी देई सकदा, कने ना बेकार सख बुरा फल देई सकदा है। 19 जडा-जडा सख खरा फल नी दिन्दा है, सै बडी देणा है, असां परमेश्वरे दे संदेश देणेवाले लोक न ऐसा अपने आपे जो बोलणे बाले झूठे लोकां जो ऐई सजा मिलणी है। 20 तुसां उना दे कम्मा ने जडे सै करंदे न उना जो पछेणी लेणा है। 21 जडा मिंजो ने, हे प्रभु, हे प्रभु बोलदा है, उना सारयां ही स्वर्ग दे राज्य च प्रवेश नी करणा है, सिर्फ उना ही जडे मेरे स्वर्गीय पिता परमेश्वरे दिया मरजिया पर चलंदे न। 22 न्याये दे रोजे मतयां लोकां मिंजो ने बोलणा; प्रभु जी, प्रभु जी, क्या असां तरे नाऐ दी भविष्यवाणी नी किती, कने तरे नाऐ ने बुरियां आत्मा जो नी कडया, कने तरे नाऐ ने कितणे ही चमत्कारी कम्म नी किते? 23 तालू मै उना ने खुली करी बोली देणा है, कि मै तां तुसां जो जाणदा ही नी, बुरे कम्म करणे बाले लोको, ऐथू ला चली जा। 24 इस ताँई जडा कोई मेरियां गल्लां सुणीकरी उना जो मनदा है, सै उस अकला बाले माणूऐ साँई है, जिनी अपना घर चटान पर बणाया है। 25 कने अम्बर बरया कने बाढ आई, कने तूफान चलया, कने सै उस घरे ने टकराया, पर सै मर नी डेथा, क्योंकि उस दी नीच चटाना पर बणईयो थी। 26 पर जडा कोई मेरियां इना गल्लां जो सुणदा है, कने उना पर नी चत्तदा है, सै उस मुर्ख माणूऐ साँई है जिनी अपना घर रेटा पर बणाया

है। 27 कने अम्बर बरया, कने बाढ आई, तूफान चले, कने उस घरे ने टकराये कने सै घर डेई करी सारा भजी टूटी गिया। 28 जालू यीशु ऐ गल्लां बोली बैदा, तां इयां होया कि सारी भीड उस दे उपदेशे ने हेरान होई। 29 क्योंकि सै उना जो व्यवस्था जो सिखाणे बालयां साँई नी, पर अधिकारियां साँई उना जो उपदेश दिन्दा था।

8 जालू यीशु उस पाहडे ला थल्ले उतरया, तां इक बडी बडी भीड उदे पिच्छे चली पेई। 2 इकी कोढिये यीशुऐ बाल आई करी उसयो नमस्ते किते कने बोलया, “कि प्रभु जी अगर तू चाआं, तां मिंजो ठीक करी सकदा है।” 3 यीशुऐ हथ अगो करी के उसयो छुता, कने बोलया, “मै चाँदा है कि तू ठीक होई जा” कने तालू ही उस कोढिये दा कोढ ठीक होई गिया। 4 यीशुऐ उसयो बोलया, “दिख, कुसी ने कुछ मत बोलदा, पर जाई करी अपने आपे जो याजकां ने दस, कि तू खरा होईया कने परमेश्वरे जो भेंट चढा जिदे बारे च मूसा व्यवस्था च लिखया है, ताकि लोक जाणी सकन कि तू खरा होई गिया।” 5 यीशु जालू कफरनहम शहर च आया तां इकी रोमी सुबेदारे उस बाल आई करी बिन्ती किती, 6 “प्रभु जी, मेरे नोकरे जो लकवे दी बिमारी होई गियो है, कने सै हिली-जुली नी सकदा है, कने बडा दुखी है।” 7 यीशुऐ उसयो बोलया, “मै आई करी उसयो ठीक करणा।” 8 सुबेदारे जबाब दिता, कि प्रभु जी, मै इस लाइक नी है कि, कि तू मेरे घरे ओऐ, पर तू सिर्फ हुकम करी दे, तां ही मेरे नोकरे ठीक होई जाणा। 9 मै ऐ समझदा है क्योंकि मै भी अधिकारियां दे थल्ले कम्म करणे बाला माणू है। कने मेरे अधीन सपाई कम्म करंदे न, कने जालू इकी सपाईऐ जो बोलदा है कि, तू जा, तां सै चली जाँदा है, कने दूऐ जो बोलदा है कि, तू ऐथू आ, तां सै आई जाँदा है, कने जालू मै अपने नोकरे जो बोलदा, कि ऐ कर, तां सै करी दिन्दा है। 10 ऐ सुणीकरी यीशुऐ हेरानी होई, कने जडे उदे पिच्छे ओआ दे थे उना ने बोलया, “मै तुसां ने सच बोलदा है, कि मै इझाएल देशे च इक भी ऐसा माणू नी दिखया, जडा इस गैर-यहूदी माणूऐ साँई मिंजो पर भरोसा करदा है। 11 कने मै तुसां ने बोलदा है, कि मतयां होर जाति दे लोकां पूर्व कने पशकमें ला आई करी अब्राहम कने इसहाक कने याकूबे सोगी स्वर्ग राज्य दे भोज च शामिल होणा है। 12 पर इझाएलियां जो बाहर नेहरे च पाई देणा है, ओथू उना रोणा कने दंद पीणे न।” 13 कने यीशुऐ सुबेदारे जो बोलया, “घरे जा, जदेया तेरा भरोसा है, तदेया ही तरे ताँई हो। कने उदा सेवक तालू ही ठीक होई गिया।” 14 कने यीशु जालू पतरसे दे घरे पुज्या, तां उनी उदिया ससू जो बिस्तरे च पिया दिखया कने उसा जो बुखार चढया था। 15 कने उनी उसा दा हथ छुता कने उसा दा बुखार उतरी गिया, कने सै उठी करी उदी सेबा करणा लगी पेई। 16 कने जालू संज होई तालू सै यीशुऐ बाल मत सारे लोकां जो लेईकरी आये जिना च बुरियां आत्मा थियां, कने उनी उना आत्मा जो अपने बचने ने कडी दिता, कने सारे मरिजां जो ठीक करी दिता। 17 ताकि जडा बचन यशायाह परमेश्वरे दा संदेश देणेवाले बोलया था, सै पूरा हो: उनी अपु साडियां कम्मजोरियां लेई लियां, कने साडियां बिमारियाँ जो हटाई दिता। 18 यीशुऐ जालू अपने चारो पासे मती भरी भीड दिखीकरी, यीशुऐ अपने चेलयां जो बोलया, तां “ओआ असां गलील झीला दे पारले पासे चलंदे।” 19 कने जियां ही सै जाणे जो तैयार होऐ, तां इकी व्यवस्था जो सिखाणे बाले उस बखे आई करी बोलया, “गुरू जी, मै तुहाडा चेला बणने ताँई जिथू कुथी तू जांगा, मै भी तरे पिच्छे-पिच्छे चली पोणा है।” 20 यीशुऐ उसयो बोलया, “लोमाडियां जो रेहणे ताँई कुडी न, कने अम्बरे दे पडियां दे आले होंदे न; पर मिंजो, माणूऐ दे पुत्रे बाल इक भी घर नहीं है, जिथू मै सोई सकें।” 21 इक होर चले उसने बोलया, “प्रभु जी, मिंजो पहले घर बापस जाणा दे। मेरे पिता दे मरणे बाद, मै उसयो दफनाणा, कने तां फिरी मै आई करी तेरा चेला बणाणा।” 22 यीशुऐ उसयो बोलया, “मेरा चेला बणने ताँई मेरे पिच्छे आई जा; कने जडे लोक आत्मिक स्पे ने मरयो न, उना जो मुर्दयां जो दफनाणा दे।” 23 जालू सै किस्तिया पर चढया, तां उदे चले उदे पिच्छे चली आए। 24 कने इकदम झीला च तूफान चलणा लगी पिया कने किस्ति लैहरां ने डूबणा लगी पेई, कने यीशु सुतया था। 25 तालू चेलयां बखे आई करी उसयो जगाया, कने बोलया, “प्रभु जी, सांझो बचाई ले, असां डूबी करी मरणे बाले न।” 26 यीशुऐ उना जो बोलया, “हे अल्पविश्वासियो, कजो डरा दे न?” तालू उनी उठी करी पाणिए कने तुफाने जो झिडकया, कने सब कुछ शान्त होई गिया। 27 कने सै सारे हेरान होऐ कने बोलणा लगे, “कि ऐ कतिया माणू है? ऐथू दीकर कि तूफान कने लैहरां भी इदा हुकम मंदे न।” 28 जालू सै उस पार गदोनियों जगा च

पुज्जे, तां उसयो दो माणु मिल्ले जिना च बुरियां आत्मा थियां, सै कन्निरस्तान ला निकलते बेले यीशुए मिल्ले, सै आत्मा बडियां खतरनाख थियां, कि कोई भी उस रस्ते ला नी जाई सकदा था। 29 कने दिखा, उना जौरे ने बोलया, “परमेस्वरे दे पुत्र, साडा तिजो ने क्या कम्म है? तु क्या बकते ला पेहले ही सांझो दुख देणा आया है?” 30 उना ला थोडी दूर इक सुअरां दा झुण्ड चुग्गा दा था। 31 बुरियां आत्मा उमने ऐ बोली करी बिनती किन्ती, अगर तु सांझो कडणा है, तां इना सुअरां बिच भेजी दे। 32 यीशुए उना जो बोलया, “जा” सै निकली करी सुअरां च चली गियां, कने सारे सुअर भेटी ला रीडकी करी पाणिए च जाई पे कने डुबी करी मरी गे। 33 उना दे रखबाले नठी करी शेर च ऐ खबर सुणाई, कने जीना च बुरियां आत्मा थियां उना दे बारे च भी दसया। 34 तालू जडे लोक दिखणा आयो थे, सै यीशुए ने बिनती करिके बोल्णा लग्ये, कि साडे इलाके ला चली जा।

9 फिरी सै किस्तिआ पर चढी करी पारले पासे गिया, कने अपने शेर कफरनहम जो आया। 2 कने कुछ लोक इकी धरगे दे मरीजे जो मझे पर रवीकरी उस दे बाल लेई आये। यीशुए उना दा भरोसा दिखीकरी, उस लकवे दे मरिजे ने बोलया, “हे पुत्र, हौसला रख; तरे पाप माफ होइ गे।” 3 कने, इसा गल्ला पर केई व्यवस्था जो सिखाणे बालया ऐ सोचया, कि ऐ तां परमेस्वरे दी निंदा करा दा है। 4 यीशुए उना दे मने दी गल्ल जाणी करी बोलया, “तुसां अपने-अपने मने च बुरा बिचार कजो करे दा न?” 5 असान क्या है, ऐ बोल्णा कि, तरे पाप माफ होये, या ऐ बोल्णा कि उठ कने चल फिर। 6 पर इस तां कि तुसां जाणी सकन कि मिंजो माणुए दे पुत्रे जो धरतिया पर पाप माफ करणे दा हक है। तालू उनी धरगे दे मरीजे जो बोलया: उठ, कने अपने मझे जो चुक, कने अपने घरे जो चली जा। 7 कने सै उठी करी अपने घरे जो चली गिया। 8 लोक ऐ दिखीकरी हेरान होई गे कने परमेस्वरे दी महिमा करणा लग्ये, जिनी आदमियां जो ऐदिया हक दितया है। 9 ओथु ला अग्ये जाई करी यीशुए मती नाए दे इक माणुए जो कर लेणे दिया चौकिया पर बैठयो दिखया, कने उसयो बोलया, “मेरे चले बणा।” सै उठी करी उस दे पिच्छे चली पिया। 10 कने जालू यीशु घरे रोटियां खाणा बैठा, तां मते चुंगी लेणेबाले कने पापी आई करी उस दे चेलयां सोगी रोटी खाणा बैठे। 11 ऐ दिखीकरी फरीसियां उठे चेलयां ने बोलया, “तुहाडा गुरु चुंगी लेंगे बाले कने पापियां सोगी कजो खांदा है?” 12 जालू यीशुए ऐ सुणया तां उना जो बोलया, “जडे लोक खरे न उना जो वैधे दी जरूरत नी होदी है, पर जडे बिमार न उना जो है। 13 इस तां तुसां जाई करी इदा मतलब सीखी लिया, कि मैं बलिदान नी पर दया चांदा है, क्योंकि मैं धर्मियां जो नी पर पापियां जो सदणा आया है।” 14 तालू यहून्ना दे चेलयां उस बाल आई करी बोलया, “क्या बजा है कि असां कने फरीसी बरत रखते न, पर तरे चले तां बरत नी रखते?” 15 यीशुए उना ने बोलया, “क्या बराती, जालू दीकर लाडा उना सोगी है, दुखी होई सकने न? पर सै दिन ओणे न जालू लाडे उना ला बख कितया जाणा, उस बेले उना बरत रखणा। 16 लोक नोए कपडे दा रफु पराणे कपडयां च कोई नी लांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। 17 नोए अंगरा दे रसे जो पराणिया खलडिया च कोई नी भरदा है नी तां नोआ अंगर रस खलडिया जो फाडी दिन्दा है, कने अंगरा दा रस निकली जांदा ऐ, तां तां नोआ अंगर रस नोईयां खलडिया च भरते न।” 18 सै उना ने ऐ गल्लां बोला दा ही था, इकी यहूदी जंज घर दे सरदारे आई करी उसयो नमस्ते किते कने बोलया, “मेरी कुडी हणी मरी है, पर ओथु आई करी उसा पर हथ रख, तां उना जिंदिया होई जाणा।” 19 यीशु उठी करी अपने चेलयां समेत उठे पिच्छे चली पिया। 20 कने इक जनानी थी जिसा जो बाहरां सालां ला खून निकलने दी बिमारी थी, उना पिच्छे ला आई करी यीशुए दे कपडयां जो छुई लिया। 21 क्योंकि सै अपने मने च बोला दी थी कि, अगर मैं उस दे कपडे जो छुई लेंगी तां मैं ठीक होई जांण। 22 यीशुए फिरी करी उसा जो दिखया कने बोलया, “पुत्री हौसला रख; तेरा भरोसा जडा मिजो पर था उनी भरोसे तिजो खरा कितया है।” कने सै जनानी उसी बेले ठीक होई गई। 23 यीशु जालू उस सरदारे दे घरे पुज्जा, कने बंसरी बजाणे बाले कने भिडा जो रौंदे दिखया, 24 तालू बोलया, “हटी जा, कुडी मरियो नी है, पर सुतियो है”, इसा गल्ला पर सारे हंसणा लग्ये। 25 पर जालू भीड कडी दिती, तां उनी अंदर जाई करी कुडिया दा हथ पकडया, कने सै जिन्दी होई पेई। 26 कने इसा गल्ला दी चर्चा सारे देशे च फेली गई। 27 जालू यीशु ओथु ला थोडा अग्ये

गिया, तां दो अन्ने उठे पिच्छे ऐ बोल्दे आये, कि हे दाऊदे दे बंशज, सांझो पर दया कर। 28 जालू सै घरे च पुज्जा, तां सै अन्ने उस बाल आये, कने यीशुए उना जो बोलया, “क्या तुहांजो भरोसा है कि मैं ऐ करी सकदा है?” उना उसने बोलया, “हां प्रभु!” 29 तालू यीशुए उना दियां हखी जो छुई करी बोलया, “तुहाडे भरोसे दे अनुसार तुहाडे तां होई जा।” 30 कने उना जो मिलणा लग्यी पिया, कने यीशुए उना जो समझाई करी बोलया, “ध्यान रे, तुसां कुस्यो भी मत दसदे, कि मैं तुहाडे तां क्या कितया है।” 31 पर उना निकली करी सारे देशे च उठी खबर फैलाई दिता। 32 जालू सै दो अन्ने माणु बाहर जा दे थे, तां कुछ लोक इकी माणुये जो यीशुए बाल लेई आये कने सै बोली नी सकदा था, क्योंकि उठे च बुरी आत्मा थी। 33 जालू यीशुए बुरिया आत्मा जो उस माणुये ला कडी दिता, तां सै बोल्णा लग्यी पिया। कने भीड हेरान होई गई कने बोल्णा लग्यी, कि इस्राएल देशे च ऐसा कदी नी दिखया। 34 पर फरीसियां बोलया, बुरियां आत्मा दा सरदार उसयो शक्ति दिन्दा है कने बुरियां आत्मा जो कडदा है। 35 यीशु कने उठे चले गलील प्रदेश दे केई शहरां कने गां च होईकरी गे, कने यीशु यहूदी जंज घरां च उपदेश दिन्दा, कने परमेस्वरे दे राज्य दा शुभसमाचार प्रचार करदा, कने हर तरा दियां बिमारियां कने कमजोरियां जो ठीक करदा गिया। 36 यीशु किस्तिआ ला उतरया कने उनी मती भरी भीड दिखी, कने उसयो उना पर तरस आया, क्योंकि उना दा कोई अगुवा नी था जडा उना दी रखबाली करी सके, जियां भेडां बिना ग्वाले होदियां न, सै बेचेन कने भटकयो होयो थे। 37 तालू उनी अपने चेलयां ने बोलया, “जियां खेतरां च मती फसल होदी है, तियां ही मते भरी लोक न जडे परमेस्वरे दा संदेश सुणने तां तैयार न, पर परमेस्वरे दे राज्य दे बारे च दसणे तांई लोक घट न। 38 इस तां फसला दे मालिके ने प्राथना करा कि सै फसला तांई होर मजदूर भेजे।”

10 फिरी उनी अपने बाहरां चेलयां जो अपने बाल सदया, कने उना जो बुरियां आत्मा पर हक दिता, कि उना जो कडन कने हर तरा दियां बिमारियां कने, हर तरा दियां कमजोरियां जो दूर करन। 2 इना बाहरां प्रेरितां दे ना ऐ न: पेहला शमोन, जिसयो पतरस बोल्ते न, कने उदा भाई अन्दियस; जब्दी दा पुत्र याकूब, कने उदा भाई यहून्ना; 3 फिलिप्पस कने बरतुल्मै, थोमा, कने चुंगी लेंगे बाला मती, हलफई दा पुत्र याकूब कने तै। 4 शमोन कनानी, कने यहूदा इस्करीयोती, जिनी यीशुए जो पकडाई भी दिता। 5 इना बाहरां चेलयां जो यीशुए ऐ हुकम देईकरी भेजया, “कि होर जातियां बाल मत जांदे, कने सामरियां दे कुसी भी शेहरे दे अंदर मत जांदे। 6 इस्राएले दे लोकां बाल जा, जडे परमेस्वरे ला दूर होई गियो न, जियां भेडां गवाची करी अपने रखबाले ला दूर चली जांदितां न। 7 कने चलदे-चलदे ऐ प्रचार करा कि, स्वर्गे दा राज्य नेडे आई रिया है। 8 बिमारां जो ठीक करा: मरयां जो जिन्दा करा, कने कोढियां जो शुद्ध करा: बुरियां आत्मा जो निकाला: तुसां लोकां दी मदद करणे दा कुछ भी मत लेंदे, क्योंकि परमेस्वर भी तुहाडी मदद करणे दा कुछ नी लेंदा है। 9 कने अपने थेलयां च सोना, चांदी, कने तांवे दे सिक्के मत गठेरदे। 10 रस्ते तांई ना कोई थेली रखा, ना दो कुरते, ना जुते, ना सोठी लेंगी, क्योंकि मजदूरे जो खाणा कने रेणे दी जगा मिलणी चाईदी। 11 जिस कुसी शेहरे या गांरे जांगे तां ओथु पता करा कि कुण काबील माणु है कने जालू दीकर गांरे ला नी निकलगे, तालू दीकर उठे घरे ही रिया। 12 घरे अंदर जांदे बेले उस घरे जो आशीष दिनयो। 13 अगर उस घरे दे लोक काबील होंगे, तां तुहाडी शांति उना बाल पूजणी, पर अगर सै तुहाडा स्वागत नी करगे तां तुहाडी शांति तुहाडे बाल बापस आई जांणी। 14 जिसा जगा दे लोक तुहांजो अपनांगे नी कने तुहाडे उपदेश नी सुणगे, ओथु ला जांदे बेले अपने पैरां दी धुड जांई दिनयो, इयां करणे ने तुसां उना जो चेतानबनी दिन्ने न कि, परमेस्वरे तुसां जो सजा देणी क्योंकि तुसां उपदेश नी मनया। 15 मैं तुसां ने सचच बोलदा है, कि न्याय बाले रोजे सै शेहरे जिथू दे लोक परमेस्वर दा बचन नी मंदे, उना दी हालत सदोम कने अमोरा शहरां दे लोकां दी हालत ला भी जादा भयानक होणी है।” 16 दिखा, मैं तुहांजो भेडां सांई भेडियां बिच भेजदा है। तुसां सप्यां सांई चलाक बणा, कने कबुतरां सांई भोले बणा। 17 “पर तुसां लोकां ला हमेशा चौकने रेणा। क्योंकि लोकां तुहांजो कैदी बणाणा कने यहूदी जंज घरे च पेश करणा कने तुहांजो कोडे मारणे, कने मेरिया बजा ने तुहांजो हाकिमा कने राजयां दे सामणे न्याय तांई महासभा च पेश करणा। 18 तुसां मेरे तांई हाकिमा कने राजयां दे सामणे उना पर, कने होर जातियां पर गबाह बणने तांई पेश किते जाणे न। 19 जालू सै तुहांजो

पकड़ागों तां चिंता मत करदे, कि असां क्रियां; कने क्या बोलणा है: क्योंकि जडा कुछ तसां बोलणा है सै तहाजो उसी बेले पता लगणी जाणा। 20 क्योंकि बोलणे बाले तसां नी न, पर तुहाडे पिता परमेस्वरे दी पबित्र आत्मा तसां च बोलदी है। 21 उसी बेले, जडे लोक मिजों पर भरोसा नी करदे न, उना अपने भाईयां जो अधिकारियां दे हथे मारणे तांई देई देणा, क्योंकि सै मिंजो पर भरोसा करदे न। पिता अपने बचयां सोगी इयां ही करणा है कने बचयां माता-पिता दे खिलाफ होईकरी उना जो मारी देणा है। 22 क्योंकि तसां मेरे चले न उदिया बजा ने सारे लोकां तसां ने बैर करणा है, पर जडा आखरी दीकर सबर रखगा उदा ही उद्धार होणा। 23 जालू सै तुहांजो इकी शेहरे च तंग करणे, तां तसां दूरे शेहरे जो चली जानयो। 24 तसां ने सच्च बोलदा है, तुहाडी इझाएले देशे दे इकी शेहरे ला दुज्जे शेहरे दी यात्रा पूरी भी नी होणी है, कने मै, माणुए दे पूरे आई जाणा है। 24 चेला अपने गुप्से ला, कने नौकर अपने मालिके ला बडा नी होंदा है। 25 काफ़ी है कि चले दा गुप्से दे बराबर, कने नौकरे दा मालिके दे बराबर होणा; अगर सै मिंजो घरे दे मालिके जो शैतान बोलदे न, तां उना मेरे घरे दे लोकां जो कितणे बुरे ना ने बोलणा है। 26 पर उना लोकां ला मत डरदे जडे तसां जो धमकादे न, क्योंकि सै बकर ओणे बाला है जालू जडा कुछ भी दकया है, सै खोलया जाणा है; कने सै सारा कुछ जडा छुपया है, सै लोकां दे सामणे ओणा है। 27 जडा कुछ मै तसां ने नेहरे च बोलदा है, उसयो चले सारे सामणे बिना कुसी डरे दे बोली सकदे न, कने जडा तसां बल्ले-बल्ले सुणदे न, उसयो छती पर चडी करी प्रचार करा। 28 सै जडे शरीर जो मारी सकदे न, पर सै आत्मा जो नी मारी सकदे न, उना ला डरदे मत, पर परमेस्वर ला डरा, जडा आत्मा कने शरीर दोनो जो नरके च मारी सकदा है। (Geenna g1067) 29 क्या बडी घट कीमता च दो चिडियाँ नी बिकदियां? तमी तुहाडे पिता परमेस्वरे दिया मरजिया बिना उना चे इक भी मरी करी धरतिया पर नी पेई सकदी। 30 परमेस्वर तुहाडी जिन्दगिया दी हर गल्ला दी परवाह करदा है। सै ऐ भी जाणदा है कि तुहाडे सिरे पर कितणे बाल न। 31 इस तांई डरा मत, क्योंकि तसां चिडियाँ ला भी जाता किमती न। 32 जडा कोई लोकां दे सामणे मिंजो परमेस्वर मन्नी लेंगा, उसयो मै भी अपने स्वर्गीय पिता दे सामणे अपने चले मन्नी लेंगा। 33 पर अगर सै दूज्यां दे सामणे ऐ बोलणे ला डरदे न, कि असां यीशुए दे चले न, तां मै अपने पिता परमेस्वरे जो जडा स्वर्ग च, डरी देणा कि, सै मेरे चले न। 34 ऐ मत सोचा कि मै धरतिया पर लोकां बिच शांती लोणे तांई आया है; मै तां लोकां च लडाई करवाणा आया है। 35 मै तां इस तांई आया है, ताकि माणुए जो उस दे पिता परमेस्वरे ला, कने कुडिया जो उसा दिया माता ला, कने नुंआ जो उसा दिया ससु दे खिलाफ भडकाणा है। 36 माणुए दे दुश्मन उस दे घरे दे ही लोक होणे न। 37 जडा अपने माता पिता जो मिंजो ला जाता प्यार करदा है, सै मेरा चेला बणने दे लायक नी है, कने जडा कुडिया या जागते जो मिंजो ला जाता प्यार करदा है, सै भी मेरा चेला बणने लायक नी। 38 जडा मेरिया बजा ने दुख सेहन कने मरणे तांई तैयार नी है, सै मेरा चेला बणने दे लायक नी है। 39 कोई माणु ऐसा नी करगा कने अपने प्राणा जो बचाणा चांहगा, उनी परमेस्वरे सोगी आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे शुभसमाचार दिया बजा ने मरगा उस माणुए जो परमेस्वरे सोगी सदा तांई दी जिन्दगी मिलणी। 40 जडा तुहांजो अपनांदा है, सै मिंजो भी अपनांदा है; कने जडा मिंजो अपनांदा है, सै मेरे भेजणे बालयां जो अपनांदा है। 41 जडा परमेस्वरे दा संदेश देणेबालयां जो परमेस्वरे दा संदेश देणेबाला समझीकरी अपनाए, उसयो परमेस्वरे दा संदेश देणेबालयां सांई इनाम मिलणा; कने जडा धर्मी माणुए जो धर्मी माणु समझीकरी अपनाए, उसयो धर्मिये सांई इनाम मिलणा है। 42 जडा कोई इना लोकयां चे इकी जो भी मेरा चेला समझीकरी सिर्फ इक कठोरा ठंडे पांणिए दा पिया, उसयो पक्का ही इनाम मिलणा है।

11 जालू यीशु अपने बाहरां चेलयां जो हुकम देई बैठा, तां सै उना दे गलील जिले दे नगरां च उपदेश कने प्रचार करणे तांई ओथु ला चली गया। 2 यहन्ने जेला च मसीह दे कम्मा दी खबर सुणीकरी, अपने चेलयां जो उसला ऐ पूछणे जो भेजया। 3 “क्या तू ही मसीह है जिसयो भेजणे दा बायदा परमेस्वरे कितया था, या असां कुसी दुजे दी नियाल रखन?” 4 यीशुए जबाब दिता, “जडा कुछ तसां दिखदे कने सुणदे न, सै सारा कुछ जाई करी यहन्ना ने बोली दिया। 5 कि अनन्यां जो मिलदा है, कने लंगडे चलदे न, कोदियां दा कोढ ठीक होआ दा,

कने टोणे सुणदे न, मुर्द जिंदे किते जांदे न, कने गरीबां जो शुभसमाचार जानिया जांदा है। 6 कने धन्य न सै, जडे मिंजो पर शक नी करदे।” 7 यहन्ना दे चले जालू ओथु ला चली गे, तां यीशु यहन्ना दे बारे च लोकां जो बोलणा लग्गा, “तसां सुनसान जगा च क्या दिखणा गियो थे? क्या होआ ने हिलदे होऐ सरकंडे जो? इदा मतलब ऐ है कि जडा बडी असांनी ने अपने बिचार बदली दे, सै ऐसा माणु है जडा डरदा है कि दुज्जे लोक उदे बारे च क्या सोचणे कने बोलणे। 8 तां फिरी तसां क्या दिखणा गियो थे? क्या इक माणुये जो जिनी बडे मेहणे कपडे पायो थे? दिखा जडे लोक मेणे कपडे पादे न सै मेहलां च रंटे न। 9 तां फिरी कजो गियो थे? कि क्या कुसी परमेस्वरे दा संदेश देणेबाले जो दिखणे तांई? हाँ, मै तसां ने बोलदा है, कि परमेस्वरे ला भी बड़े जो? 10 यहन्ना सैई माणु है जिदे बारे च पबित्र शाब्द च दसया, कि दिख, मै अपने संदेश देणेबाले दूजे जो तैरे अग्रे भेजदा है, जिनी तैरे ओणे तांई लोकां जो तैयार करणा है। 11 मै तसां ने सच्च बोलदा है, कि जडे लोक जनानिया ला पैदा होयो न, उना चे यहन्ना बपतिस्मा देणेबाले ला बडा कोई नी होया; पर स्वर्ग दे राज्य च जडा सारयां ला छोटा है, सै उसला बडा है। 12 जालू ला यहन्ना बपतिस्मा देणेबाले प्रचार करणा शुरू कितया है, उस बकते ला लेईकरी हुणे दीकर स्वर्ग दा राज्य जबरदस्ती ने अग्रे बदा दा है, कने हिसक लोक उस हमला करा दे न। 13 क्योंकि सारे परमेस्वरे दा संदेश देणेबालयां दियां कताबां च कने मूसा दिया व्यवस्था च यहन्ना बपतिस्मा देणेबाले दे ओणे दीकर परमेस्वर दे राज्य दे बारे च लिखया है। 14 कने तसां मेरी गल्ल मनणा चांदे न, कि एलियाह जिदे ओणे दी भविष्यवाणी कितयो थी, सै एलियाह ही है। 15 जिस बाल सुणने दा मन हो, सै ध्यान देईकरी इना गल्लां जो सुणे, कने समझी लो।” 16 मै इस युगे दे लोकां दी तुलना कुसने दे? सै उना जागतां सांई न, जडे बजारां च बेईकरी इकी दुजे जो पुकारी करी बोलदे न। 17 “कि असां तुहाडे तांई खुशिया दे गाणे गाए, कने तसां नचे नी; असां शोक दे गीत भी गाए, फिरी भी तसां रोए नी।” 18 क्योंकि यहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 19 पर मै माणुए दा पुत्र खांदा पिंदा है, कने सै बोलदे न, “कि पेट कने शराबी माणु है, कने चुंगी लेणे बाले कने पापियां दा मित्र है। पर इक माणुए दे कम्मा ऐ साबित करणा कि अकला बाला कुण है।” 20 तालू यीशुए उना शेहरां च रेणेबाले लोकां जो फटकार लगाई, जिथु उनी बडे भरी चमत्कार दे कम्म कितयो थे; क्योंकि उना अपने पापां दा पश्चाताप नी कितया था। 21 हाय, खुराजीन शेहर दे कने बैतसैदा शेहर दे लोको! जडे चमत्कारी कम्म तुहाडे शेहर च कितयो न, अगर सै कम्म सूर कने सैदा च कितयो होंदे, तां ओथु दे लोक बडे पेहेले टाट ओढी लेंदे, कने धुड अपने उपर छिडकी लेंदे ऐ दसणे तांई कि उना अपने पापां ला पश्चाताप करी लिया है। 22 पर मै तसां ने बोलदा है, कि न्याय दे रोज जडी सजा सूर कने सैदा जो देणी है, सै सजा तुहाडिया सजा ला बडी घट होणी है। 23 हे कफरनहम शेहर दे लोको, तसां क्या स्वर्ग दीकर उच्चे करणे न? तसां तां पताले दीकर थले करणे न; जडे अनोखे कम्म तुहाडे च कितयो न, अगर सै सदोम शेहर च होंदे, तां उनी आजे दीकर बर्णी रेणा था। (HadEs g86) 24 पर मै तसां ने बोलदा है, कि न्याय दे रोज जडी सजा सदोम शेहर दे लोकां जो देणी है, सै सजा तुहाडिया सजा ला बडी घट होंणी है। 25 तिसरी बेले यीशुए बोलया, “हे पिता, स्वर्ग कने धरतिया दे प्रभु, मै तेरा धन्याबाद करदा है, तू इना गल्लां जो जानियां कने समझदारां लोकां ला लुकाई रखया, कने लोक बचयां सांई न उना पर प्रगत किता है। 26 हाँ, पिता जी, क्योंकि तिजो ऐ ही ठीक लग्गा।” 27 मेरे पिंते मिंजो सब कुछ दितया है, कने पिता दे बिना कोई पुत्रे जो नी जाणदा है, कने ना ही कोई पिता जो जाणदा है सिर्फ पुत्र ही है जडा पिता जो जाणदा है। कने जिना लोकां जो पुत्र चुणदा है उना लोकां ही पिता जो जाणना है। 28 “सारे मेहनत करणे बालयो कने भोझ हेठ दबयो लोको, मेरे बाल ओआ; मै तुहांजो अराम देणा। 29 मेरा जुआ अपने उपर चुकी लिया; कने मिंजो ला सिखा; क्योंकि मै मने ला नरम कने दयालू है; कने तसां जो अपने मने च अराम मिलणा। 30 क्योंकि जडा करणे दा हुकम मै तुहांजो दिन्दा है, सै करणा मुशकिल नी है।”

12 उस बेले यीशु सब्ते दे रोजे खेतारां चे होईकरी चलयया था, कने उस दे चेलयां जो भूख लग्गी, कने सै बेलां तोडी-तोडी करी खापां लग्गी पे। 2 फरीसियां ऐ दिखीकरी उसयो बोलया, “दिख, तैरे चले सै कम्म करा दे न, जडा सब्ते दे रोज करणा ठीक नी।” 3 यीशुए उना जो बोलया, “क्या तसां परमेस्वरे दे बचन च कदी नी पढया, कि राजा दाऊदे तालू क्या किता, जालू उसयो कने उस दे

मित्रां जो भूख लम्गी थी? 4 सै कियॉ परमेश्वरे दे घरे च गिया, कने परमेश्वर जो चढाईयां रोटीयां खादियां, जिना जो खाणां ना उस ताई कने ना उदे मित्रां ताई व्यवस्था दे अनुसार ठीक था, पर सिर्फ याजकां ताई ठीक था? 5 या कया तुसां मूसा दी व्यवस्था च नी पडया है, कि याजक सब्ते दे रोज मंदरे च सब्ते दे रोजे दिया विधिया जो तोडने पर भी निर्दोष होदे न?" 6 पर मै तुसां जो बोलदा है, इदा मतलब है, कि मै तुहाडे बाल आया है कने मै मंदरे ला भी जादा बहुमूल्य है। 7 अगर तुसां जाणदे न कि पबित्र शाब्द च इना अखरां दा मतलब कया है, मेरे ताई बलियां चढाणे दी बजाए, तुसां दुजयां ताई दयालु बणा कने मेरे इना निर्दोष चेलयां दी निंदा नी करदे। 8 "मै माणुए दा पुत्र ऐ बोलणे दा हक रखदा है, कि लोकां जो सब्ते बाले लोके जो कया करणे दी अनुमति है।" 9 ओथु ला चलीकरी करी सै यहूदी जंज घर च आया। 10 ओथु इक माणु था जिदा इक हथ सुक्की कने बेकार होई गिया था, कने फरीसियां यीशुए पर दोष लाणे ताई उसला पुछया, कि कया सब्ते दे रोज चंगा करणा ठीक गल्ल है? 11 यीशुए उना जो बोलया, "मन्नी लिया कि तुसां के कुसकी दी इक ही भेड है। कने सै सब्ते दे रोजे खूहे च पेई जा, कने सै उसा जो पकडी करी खूहे ला नी कडे? 12 भला, माणुए दी कीमत भेडां ला कितणी जादा बढीकरी है। इस ताई सब्ते दे रोजे लोकां जो खरा करणा ठीक गल्ल।" 13 कने यीशुए उस माणुए जो बोलया, "अपणा हथ कर रूआं।" उनी अपणा हथ किता, कने उदा हथ दूरे हथे साईं ठीक होई गिया। 14 तालु फरीसी झट बाहर आई करी कुछ लोकां कने मिलिकरी यीशुए दे खिलाफ सलाह करणा लागे, कि उसयो कियां मारणा है। 15 ऐ जांणी करी यीशु ओथु ला चली गिया। कने मते सारे लोक उदे पिच्छे चलीं पै, कने उनी सारांयो जो ठीक किता। 16 कने यीशुए चेतावनी देईकरी उना जो हुकम दिता, "कि मेरे बारे च कुसी ने भी मत दसदे कि मै परमेश्वर दा पुत्र है।" 17 ताकि जडा बचन यशायाह परमेश्वरे दा संदेश देणेबाले बोलया था सै पूरा हो: 18 "दिखा, ऐ मेरा सेवक है, जिसयो मै चूंघया है, मेरा प्यारा, जिसते मेरा मन खुश है, मै अपणी आत्मा उस पर पांणी है, कने उनी होरनी जातियां जो न्याय दा संदेश देणा। 19 ना उनी कोई लडाईं करणी, कने ना उनी कोई हल्ला पाणा, कने ना ही सै लोकां बिच घमडीं साईं जारे ने कोई भाषण नी देणा। 20 उनी कुसदा भी नुकसान नी करणा जडा भजयो टटयो सरकडे साईं कमजोर न, कने जिसयो भी कोई समस्या है सै सुलगाती बतियां साईं न, उनी इसा जो कोई नुकसान नी करणा, पर उनी पक्का करणा कि न्याय किता जाऐ। 21 कने होरनी जातियां उदे नाए पर आस रखणी है।" 22 तालु लोक इक अन्ने कने गुंगे जो जिदे च बुरी आत्मा थी, उसयो उदे बाल लेईं आये, कने उनी उसयो ठीक किता कने सै गुंगा बोलणा कने उसयो मिलणा लगी पिया। 23 इसा गल्ला पर सारे लोक हेरान होए, कने बोलणा लागे, "कया ऐ माणु मसीहा होई सकदा है, जडा राजा दाऊदे दे बंशे ला है, जिसयो असां नियाला दे ना।" 24 पर फरीसियां ऐ गल्ल सुणीकरी बोलया, ऐ तां बुरियां आत्मा दे सरदार शैताने दिया सहायता लेईकरी बुरियां आत्मा जो कडदा है। 25 उनी उना दे मने दी गल्ल सुणीकरी उना ने बोलया, "अगर कुसी राज्य च लोक अपु च ही लडदे रेगे तां सै राज्य बडे बकते तक नी टिकी सकदा।" कने अगर कुसी घरे दे माणु अपु च ही लडीं पोगे तां सै घर नी बणी सकदा।" 26 अगर शैतान ही शैताने जो कहे, तां उनी अपणा ही बैरी होई जाणा, तां उनी अपणा ही नाश करी लेणा है, तां फिरी उस दा राज्य कियां बढी सकदा है, 27 अगर मै शैताने दिया मददा ने बुरियां आत्मा जो कडदा है, तां तुहाडे चले कुसदिया मददा ने बुरियां आत्मा जो कडदे न? इस ताई उना ही तुहाडा न्याय करणा है। 28 पर अगर मै परमेश्वरे दिया आत्मा दिया सहायता ने बुरियां आत्मा जो कडदा है, तां परमेश्वरे दा राज्य तुहाडे बाल आई पुज्जा है। 29 जालु दीकर तुसां जारे बाले माणुए जो नी बनगे, तां तुसां उदे घरे च नी बडी सकदे कने उदियां चीजां जो नी चोरी सकदे ना। 30 "जडा मेरे सोगी नी है, सै मेरे खिलाफ है, कने जडा मेरे सोगी नी बटोलदा है, सै खलाफदा है। 31 इस ताई तां मै तुसां ने बोलदा है, कि माणुए दी ओलादी दे सारे पाप कने निंदा जडा सै परमेश्वर या कुसी दे खिलाफ करदे न, परमेश्वरे उना दे पाप माफ करी देणे न, पर जडा कोई पबित्र आत्मा दे खिलाफ निंदा करणा, तां सै परमेश्वरे कदी भी माफ नी करणा है। 32 पर जडा कोई माणुए दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदी ऐ गलती ना तां इस लोक च ना ही ओणे बाले युग च माफ होणी।" (aion g165) 33 "अगर सख खरा है, तां उदे फले जो भी खरा होणा, अगर सख बेकार है, तां उदे फल भी

बेकार होणे न, क्योकि सख फले ने ही पछेणया जांदा है।" 34 "तुसां जरहीले सपां दे बकयां साईं न, तुसां बुरे होईकरी कियां खरियां गल्लां बोली सकदे न? क्योकि जडा मने च भरया है सै ही मुए च ओंदा है। 35 इक भला माणु मने दे भले भंडारे ला भलियां गल्लां कडदा है, कने इक बुरा माणु मने दे बुरे भंडारे ला बुरियां गल्लां कडदा है। 36 कने मै तुसां ने बोलदा है, कि जडियां-जडियां बेकार गल्लां माणुए बोलणियां न, उना सारियां गल्लां दा लेखा न्याय दे रोजे देणा है। 37 क्योकि परमेश्वरे न्याय करणा है कने हर इक माणुए जो उदियां बोलियां गल्लां दिया बजा ने दोषी या निर्दोषी ठहरया जाणा है।" 38 इसा गल्ला पर मते व्यवस्था जो सिखाणे बालयां कने फरीसियां उसयो बोलया, "गुरू जी, असां तिजो ला इक स्वर्ग दा कोई चमत्कार दिखणा चांदे न, जिसने पता लगे कि तिजो परमेश्वरे भेजया है।" 39 पर यीशुए उना जो जबाब दिता, तुसां चमत्कार इस ताई मंगदे न क्योकि तुसां बुरे लोक न कने भरसा नी करदे न, पर परमेश्वरे दा संदेश देणेबाले योना ने जडा होया उस जो छडी करी होर कोई तुसां जो चमत्कार नी मिलणा है। 40 योना तिन्न रात दिन पाणिए दे इकी बडी बडिया मच्छिया दे पेटे च रिया, तियां ही, मै माणुए दे पुत्रे भी तिन्न रात दिन धरतिया दे अंदर रेणा। 41 नीनवे शेहरे दे लोकां न्याय दे रोजे इस युगे दे लोकां सोगी उठी करी उना जो दोषी ठेहरणा, क्योकि उना योना दा प्रचार सुणीकरी मन बदलया, पर तुसां तां पछाताप करणे मना करदे न; कने दिखा, ऐथु तां सै है जडा योना ला भी बडा है। 42 दक्षिणे दिया राणिया न्याय दे रोजे इस युगे दे लोकां सोगी उठी करी उना जो दोषी ठेहरणा, क्योकि सै सुलेमान दा ज्ञान सुणने ताई बडी दुरे ला आयियो थी; कने दिखा, ऐथु सै है जडा सुलेमाने ला भी बडा है, पर तुसां पछाताप करणे मना करदे ना। 43 "जालु बुरी आत्मा माणुए ला निकली जांती है, तां सै सकियां जगा च अराम तोपदी फिरदी है, पर उसा जो अराम नी मिलदा है। 44 तां सै अपने आपे ने बोलदी है, कि जिस माणुए ला मै आई है उसी माणुए दे अंदर चली जां कने बापस आई करी उस माणुए जो उस खाली घरे सां पांदा है, जिसयो छेल करी साफ कने सजाया हो।" 45 तालु बुरी आत्मा जाई करी अपने ला होर बुरियां सत आत्मा जो अपने सोगी लेईं ओदी है, कने सै उस माणुए दे अंदर जाई करी रेणा लगदी है, कने उस माणुए दी हालत पहले ला भी बुरी होई जांती है। इस युगे दे बुरे लोकां ने भी इसां ही होणा है। 46 जालु सै भिडां ने गल्लां करा दा ही था, तां उस दी माता कने भाई बाहर खडुतयो थे, कने उसने गल्लां करणा चांदे थे। 47 कुत्की उसने बोलया, "दिख, तेरी माता कने तेरे भाई बाहर खडुतयो न, कने तिजो ने गल्लां करणा चांदे ना।" 48 ऐ सुणीकरी उनी बोलणे बाले जो जबाब दिता, "कुण है मेरी माता? कने कुण न मेरे भाई?" 49 कने अपने चेलयां पासे हथ करिके बोलया, दिखा, "मेरी मां कने मेरे भाई ऐ न। 50 क्योकि जडा कोई मेरे स्वर्गीय पिता दिया मरजिया पर चले, सै ही मेरा भाई, कने बेहन, कने माता है।"

13 तिस्सी रोजे यीशु घरे ला निकली करी दरियाये दे बखे जाई बैठा। 2 कने उस बाल मती भरी भीड गिटी होई गई, कने सै किस्तिया पर चढी गिया, कने सारी भीड दरियाये दे बखे खडोई रेई। 3 कने उनी उना ने कहाणियां च मतियां सारियां गल्लां बोलियां, "दिखा, इक बी रांणे बाला बी रांणा निकलया। 4 रांटे बेले थोडे बी रस्ते दे बखे पेईं गे कने सै तां पंछियां आई करी चुगी ले। 5 कने थोडे बी पथरलिया जमिना पर पे जिथु उसयो जादा मिटी नी मिली, कने जादा मिटी नी होणे दिया बजा ला तौली लूंगी पै। 6 कने जालु खडी धूप पेई, तां सै फकईं गे, क्योकि उना दिया जडा दुगियां नी थियां तां सै सुकी ले। 7 कने थोडे बी शिल्लां च पै, कने जालु शिल्ल बडुये तां उना से बी डकी ले। 8 पर थोडे बी खरिया जमिना पर पे, कने सै बी लूंगे, कने मते सारे फले देणेबाले होए; केईयां सो गुणा, केईयां सठ गुणा, केईयां ती गुणा।" 9 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 10 कने चेलयां यीशुए बखे आई करी पुछया, "तू उना ने कहाणिया च कजो गल्लां करदा है?" 11 उनी जबाब दिता, "तुहांजो स्वर्ग दे राज्य दे भेदां जो समझणे दी समझ दितियो है, पर उना जो नी। 12 जिस कुसी बाल सै समझणे दी इच्छा है, जडा परमेश्वर सिखांदा है, उसयो होर देणा, पर जडा समझणे दी इच्छा नी रखदा, कि मै कया सिखांदा, तां सै जडा समझया है, परमेश्वरे से भी उसला लेईं लेणा।" 13 मै उना ने कहाणिया च गल्लां इस ताई करदा है, कि सै दिखदे होए भी, नी दिखदे; कने सुणदे होए भी, नी सुणदे न; कने ना समझदे ना। 14 कने उना दे बारे च यशायाह दी

ऐ भविष्यवाणी पूरी होदी है, “तुसां कन्ना ला सुणना तां है, पर समझणा नी है; कने हखी ला दिखणा ता है, पर कुछ मिलणा नी है।” 15 “क्योंकि इना लोकां दा मन कठोर होई गया है, कने सै कन्ना ला उच्चा सुणदे न, कने उना अपणिया हखी बंद करी लियां न; कुथी इयां ना हो कि सै हखी ला दिखन, कने कना ला सुणन कने मने ला समझन, कने अपने पापां दा पन्नाताप करणे, कने मै उना जो ठीक करे।” 16 “पर धन्य न त्हाडियां हखी, क्योंकि सै दिखदियां न; कने त्हाडे कन्न, कि सै सुणदे ना। 17 क्योंकि मै तुसां ने सच्च बोलदा है, कि मते परमेस्वरे दा संदेश देणेबाले कने धर्मी चांदे थे कि जडियां गल्लां तुसां दिखदे न, दिखन, पर दिखियां नी; कने जडियां गल्लां तुसां सुणदे न, सुणन, पर सुणियां नी।” 18 हण तुसां बी राणे बाले दी कहाणिया च मालब सुणा: 19 “जडा कोई राज्य दा बचन सुणीकरी नी समझदा, उदे मने च जडा कुछ राया था, उसयो शैतान झट पट जादां कने उना दे मने ला बचन कडी दिन्दा है जडा उना सुणया था; ऐ सै ही बी है, जडा रस्ते दे बखे राया था। 20 कने जडा पथरिलिया जमिना च राया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। 21 पर परमेस्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला कलेश या परेशानी होदी है, तां सै बचना ला पिच्छे हट्टी जांदे न। 22 जडे बी झिल्लां च पियो न, ऐ सै माणु न जिना बचन सुणया, पर सै संसारे दियां चिता जो लेईकरी दूखी, कने संसारिक चिजा दा लालच उना दे मने च रेंदा है, ऐ सब परमेस्वर दे बचन च स्कावट पांदा है। कने सै बचन उना ताई फायदेमंद नी होई। (aiōn g165) 23 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई सौ गुणा, कोई सठ गुणा, कने कोई ती गुणा।” 24 यीशुऐ उना जो इक होर कहाणी सुणाई, “स्वर्ग दा राज्य उस माणुऐ साई है जिनी अपने खेते च खरा भी राया। 25 पर जालू लोक सोआ दे थे तां उना दे दुशमण आई करी कणका बिच जंगली भी राई करी चली गे। 26 जालू लूंगा निकलियां कने बेलां लगियां, तां जंगली दांणयां दियां लूंगा भी मिलणा लगियां।” 27 इस गल्ला पर घरे दे नौकरां आई करी उसला बोलया, हे मालिक, तू क्या अपने खेतरां च खरा भी नी लाया था? फिरी खेते च जंगली दांणे दे बूटे कुथु ला आऐ? 28 उनी उना जो बोलया, ऐ कुसी दुशमणे दा कम्म है। नोकरां उसला बोलया, तेरी क्या मजी है, कि असां आई करी जंगली बूटयां जो जडा ला पुटी देन? 29 उनी बोलया, नी, ऐसा मत करा इयां ना होऐ कि जंगली दांणे दे बूटयां जो जडा ला पुटदे बेले उना सोगी कणका दे बूटे भी पुटई जान। 30 बढणे दीकर दोनो जो बडणा दिया, कने बढणे दे बेले मै बढणे बालयां ने बोलणा है, कि पहले जंगली दांणे दे बूटयां जो बटोली करी फूकणे तांई गडियां बननी लियां, कने कणका जो भरे खेते च गटेरा। 31 उनी उना जो इक होर कहाणी सुणाई, “स्वर्ग दा राज्य इक राई दे दांणे सांई है, जिसयो कुनी माणुऐ लेईकरी अपने खेतरां च राई दिता। 32 सै सारे बियां ला छोटा होदा है, पर जालू सै बडा होई जांदा है तालू सै सारे साग पतयां ला भी बडा होदा है; कने ऐसा सख बणी जांदा है, कि अम्बरे दे पंछी आई करी उदिया डालियां पर घोंसले बणादे।” 33 उनी इक होर कहाणी उना जो सुणाई, “स्वर्ग दा राज्य खमिरे (तराक) सांई है, जिसयो कुनी जनानिया लेईकरी तीन पसेरी आटे च मलाई दिता कने होंदे-होंदे सै सारा खमीर बणी गया।” 34 ऐ सारियां गल्लां यीशुऐ कहाणिया दे जरिये लोकां ने बोलियां, कने जडा कुछ सै सिखांदा, सै कहाणिया ने ही सिखांदा था। 35 कि जडा बचन परमेस्वरे दा संदेश देणेबाले बोलया था, सै पूरा होऐ: “मै कहाणी बोलणे तांई अपना मु खोलणा है; मै उना गल्लां जो जडियां संसारे दे शुरू होणे ला गुप्त न उना जो सामणे लोंगा।” 36 तालू यीशु भिडा जो छडी करी घरे च आया, कने उदे चेलयां उदे बाल आई करी बोलया, “खते दे जंगली दांणे दी कहाणी समझाई दे।” 37 उनी उना जो जबाब दिता, “खरे भी राणे बाला मै माणुऐ दा पुत्र है।” 38 खेत संसारे दे लोक न, खरा बी राज्य दे लोक न, कने जंगली भी शैतान दे लोक न। 39 जिनी दुशमणे उना जो राया सै शैतान है; बढणा संसारे दा खात्मा हे: कने बढणे बाला स्वर्गदूत है। (aiōn g165) 40 जियां जंगली दांणे दे बीऐ दे बूटे फूकणे तांई गठेरदे न, तियां ही संसारे दे खात्मे च होणा है। (aiōn g165) 41 मै माणुऐ दे पुत्रे अपने स्वर्गदूते जो भेजणा, कने उना उदे राज्य च सारियां पाप दियां बजा जो, कने बुरे कम्म करणे बालयां जो उखाडी देणा है। 42 कने स्वर्गदूतां उना जो अग्नी दे कुण्डे च पांणा, कने उना ओथु रोंणा कने दंद पीणे न। 43 उस बेले धर्मियां अपने पिता दे राज्य च सूरजे सांई चमकणा है। जिस बाल

सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले। 44 “स्वर्ग दा राज्य खेते च लुकयो खजने सांई है, जडा कुसी माणुऐ जो मिलया है, कने उनी लुकाई रखया, खुशिया दे मारयो जाई करी उनी अपना सारा कुछ बेची करी, कने उस खेते जो खरदी लिया।” 45 “फिरी स्वर्ग दा राज्य इक व्यपारिये सांई है, जडा खरे मोतियां दिया तोपा च था। 46 जालू उसयो इक बडा भरी मेहंगा मोती मिला, तां उनी अपना सारा कुछ बेची दिता, कने सै मोती खरीदी लिया।” 47 “फिरी स्वर्ग दा राज्य उस मच्छियां पकडने बाले बूहे जाल्ले सांई है, जिसयो समुद्रे च पाया, कने सै हर तरा दियां मच्छियां जो बटोली लेई आया। 48 कने जालू जाल्ल भईं गिया, तां मखवारे जाल्ले जो खिज्जी करी किनारे जो लेई आये, कने बेईकरी खरियाँ-खरियाँ मच्छियां जो भंडायां च पाया कने बेकार-बेकार सुटी दितियां। 49 संसारे दे अंत च इयां ही होणा है; स्वर्गदूते आई कने बुरे लोकां कने धर्मियां जो लंग करणा, (aiōn g165) 50 कने बुरे लोकां जो अग्नी दे कुण्डे च पांणा। ओथु उना रोंणा कने दंद पीणे न।” 51 “तुसां क्या ऐ सारियां गल्लां समझी गे?” उना उसला बोलया, “हौं।” 52 उनी उना ने बोलया, “तांई तां हर इक व्यवस्था जो सिखाणे बाला जडा स्वर्ग दे राज्य दा चेला बंणया है, उस गृहस्थ दे सांई है जडा अपनां पाराणियां कने नोइयां चिजां जो अपने भंडारे ला कडदा है जिथु सै दुजयां दिया मदद करणे तांई उना जो गठेरदा।” 53 जालू यीशु सारी कहाणी बोली बैठा, तां ओथु ला चली गिया। 54 कने अपने देशे च आई करी उना दे यहूदी जंज घर च उना जो ऐसा उपदेश देणा लगा; कने सै हेरान होईकरी बोलणा लगे, “कि इसयो ऐ अकल कने चमत्कारी कम्म करणे दी शक्ति कुथु ला मिली? 55 क्या ऐ तरखाणे दा जागत नी है? कने क्या इदिया माता दा ना मरियम कने इदे भाईयां दे ना याकूब कने यूसुफ कने शमीन कने यहूदा नी न? 56 कने क्या इदियां सारियां बेहणा साडे बिच नी रेंदिया न? फिरी इनी ऐ सारा कुछ कुथु ला सिखाये?” 57 इयां उना उदिया बजा ला ठोकर खादी, पर यीशुऐ उना जो बोलया, “परमेस्वरे दा संदेश देणेबालयां दा अपने ग्रां कने भरे छडी करी, उसयो हर कुथी इज्जत मिलदी है।” 58 कने उनी ओथु उना दे भरोसा नी करणे दिया बजा ला जादा अनोखे कम्म नी किते।

14 कने हण राजा हेरोदेसे यीशुऐ दे कम्मा दी चर्चा सुणी जडे यीशु करा दा था। 2 कने अपने सेवकां ने बोलया, “ऐ सेई यहूना बपतिस्मा देणेबाला यहूना है! सै मरयां च जिन्दा होई गिया है, ये ही बजा है कि उदे बाल इना चमत्कारां जो करणे तांई परमेस्वर दी शक्ति है!” 3 क्योंकि हेरोदेसे अपने भाई फिलिपस दी भरे बाली हेरोदियास दिया बजा ला, यहूना जो पकडी करी बन्या, कने जेला च पाई दिता था। 4 क्योंकि यहूने उसयो बोलया था, कि इसा जो रखणा तिजो तांई ठीक नी है। 5 कने सै उसयो मारी देणा चांदा था, पर सै लोकां ला डरदा था, क्योंकि सै उसयो परमेस्वरे दा संदेश देणेबाला मंदे था। 6 पर जालू हेरोदेस दा जन्म दिन आया, तां हेरोदियास दिया कुडिया त्योहारो च नची करी हेरोदेसे जो खुश कित। 7 इसा गल्ला पर उनी कसम खाई करी बचन दिता, कि जडा कुछ तू मंगगी, सै मै तिजो दिंगा। 8 उना अपणिया माता दे बहकावे च आई करी बोलया, “यहूना बपतिस्मा देणेबाले दा सिर थालिया च रखीकरी मिजो ऐथू मंगवाई दे।” 9 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ने, हुकम दिता, कि यहूना दा सर इसा जो देई दिया। 10 राजे इक सिपाइऐ जो हुकम दिता, कि जेला च जा, कने यहूना दा मुंड बड्डी करी उदे बाल लेईकर आ। 11 सिपाइऐ जेला च जाई करी उदा सिर कटया, कने इक थालिया च रखीकरी लेई आया कने उना कुडिया जो देई दिता, कने कुडिया अपणिया माता जो देई दिता। 12 तालू यहूना दे चेलयां उदियां लाशा जो ले जाई करी दबाई दिता, कने जाई करी यीशुऐ जो खबर दिती। 13 जालू यीशुऐ ऐ सुंणा, तां किस्तिया च चडी करी ओथु ला कुसी सुनसान जगा जो, एकांत च चली गिया; कने लोक ऐ सुणीकरी शेहरे-शेहरे ला पैदल चली करी उदे पिच्छे चली गे। 14 उनी निकली करी मते भरे लोकां दी भीड दिखी, कने उना पर तरस खादा, कने उनी उना च जडे मरीजां जो ठीक कित। 15 जालू संज होई, तां उदे चेलयां उदे बाल आई करी बोलया, “ऐ तां सुनसान जगा है, कने देर होआ दी है; कने लोकां जो भेजी दिया ताकि सै ग्रां च जाई करी अपने तांई खाणा खरीदी लेना।” 16 पर यीशुऐ उना जो बोलया, “उना दा जाणा जस्सी नी है। तुसां ही इना जो खाणे जो दिया।” 17 उना उसला बोलया, “साडे बाल ऐथू पंज रोटियां कने दो मछियां जो छडी करी होर कुछ नी

है।” 18 उनी बोलया, “उना जो ऐथू मेरे बाल लेई ओआ।” 19 तालू उनी लोकां जो घापे पर बोणे जो बोलया, कने उनी से पंज रोटियां कने दो मछियां लियां; कने स्वर्गो पासे दिखीकरी धन्याबाद किता, कने रोटियां तोडी-तोडी करी चेलयां जो दितियां, कने चेलयां लोकां जो। 20 सारे खाई करी रजी गे। कने जालू रोटी खायी बैठे तालू चेलयां बाकी बचियाँ रोटियां कने मछियां गिठेइयां कने उसला बाहरा टोकरीयाँ भस्ई गियां। 21 कने खाणे बाले के जनानिया कने बचयां जो छडी करी लाभगा पंज हजार मर्द थे। 22 कने उनी तोले-तोले अपने चेलयां जो किस्तिया पर चढ़ने ताई बोलया, ताकि से उसला पेहले पार पुज्जी जान, तालू दीकर कि मै लोकां जो भेजी करे। 23 सारे लोकां जो भेजणे बाद, यीशु पहाडे पर प्राथना करणे ताई गिया; संज्ञा जो से ओथु किल्ला था। 24 उस बेले किस्ति झिल्ला बिच लेहरां ने डामगा दी थी, क्योकि होआ सामणे ला ओआ दी थी। 25 कने तां भयागा तडके यीशु झिल्ला पर चली करी उना बाल आया। 26 पर जालू चेलयां उसयो झिला पर चलदे दिखया, तां से घबराई गे, कने बोलणा लगे कि, “भुत है ऐ!” 27 पर यीशुए उना ने झट गल्लां कितियां कने बोलया, “हिम्मत रखा, डरा मत, मै यीशु है।” 28 पतरसे उसयो जबाब दिता, “हे प्रभु, अगर तू है, तां तू मिजो अपने बाल पाणिणे पर चली करी ओणे दा हुकम दे।” 29 उनी बोलया, “आ।” तालू पतरस किस्तिया ला उतरी करी यीशुए पासे चलणा लग्गा। 30 पर होआ जो महसूस करी डरी गिया, कने जालू डबणा लगा तां चिलाई करी बोलया, “हे प्रभु, मिजो बचा।” 31 यीशुए झट हथ गां करी के उसयो थमी लिया, कने उसला बोलया, “हे घटबिचवासियो, तू कजो शक किता?” 32 जालू से किस्तिया पर चडी गिया, तां होआ भी स्फी गेई। 33 इसा गल्ला पर जडे किस्तिया पर थे, उना उसयो झुकी करी नमस्ते करी के बोलया, “सच्चि, तू परमेश्वरे दा पुत्र है।” 34 से पार उतरी करी गन्नेसरत प्रदेश दे कन्डे पुज्जे। 35 कने ओथु दे लोकां उसयो पछेणी लिया कने अखे-बखे दे सारे देशे च बोली भेजया, कने सारे बिमारां जो उदे बाल लेई आये। 36 कने उसने बिनती करणा लगे कि से सिर्फ अपने कपडयां जो छुणा दे, कने जितणे भी छुंटे थे, से सारे ठीक होई जांटे थे।

15 तालू यरुशलम ला कुछ फरीसी कने व्यवस्था जो सिखाणे बाले यीशुए बाल आई करी बोलणा लगे, 2 “तेरे चले पूर्वजां दे रीती रिबाजां जो कजो टालंदे न, कि बिना हथ धोतयो रोटी खांदे न?” 3 यीशुए उना जो जबाब दिता, “तुसां अपने बणायो नियमा दिया बजा ला कजो परमेश्वरे दे हुकमे जो टालंदे न?” 4 क्योकि परमेश्वरे बोलया है, “कि अपने माता पिता दा आदर करा, कने जडा कोई अपने माता पिता जो श्राप दिगा, से पक्का मारी देणा।” 5 “पर तुसां लोकां जो इजाजत दिन्दे न की, अपने माता-पिता जो ऐ बोली दिया कि जडा कुछ मै तुहांजो देणा था, से मै परमेश्वर जो देणे दी कसम सुणीकरी थियो है।” 6 तां से अपने पिता दा आदर नी करदा है, इयां ही तुसां नी अपने रीती रिबाजा दिया बजा ला परमेश्वरे दा हुकम तोडी दितया है। 7 यशायाह तुहाडे बारे च ठीक बोलया था, जिनी पबित्र शास्त्र च तुसां कपटियां दे बारे च लिखया है, 8 “कि ऐसे लोक गल्लां ने तां मेरा आदर करंदे न, पर इना दे मन मिजो ला बडे दूर न। 9 कने ऐ बेकार ही मेरी भक्ति करंदे न, क्योकि माणुए दे तरीकियां जो धर्म उपदेश बणाई करी सिखांदे न।” 10 कने यीशुए लोकां जो अपने बाल सदीकरी उना ने बोलया, “सूणा, कने समझ। 11 जडा मुए च जांदा है, से माणुए जो अशुद्ध नी करदा है, पर जडा मुए ला निकलदा है, से माणुए जो अशुद्ध करदा है।” 12 तालू चेलयां आई करी बोलया, “क्या तिजो ऐ पता है कि फरीसियां ऐ बचन सुणीकरी ठोकर खांदी?” 13 उनी जबाब दिता, “हर इक बूटा जडा मेरे स्वर्गीय पिता नी लाया है, से पुटुई जाणा है।” 14 “उना जो जाणा दिया; से रस्ता दसणे बाले अन्ने न, कने अगर अन्ना अन्ने जो रस्ता दसे, तां दोनो खड़े च पोणा है।” 15 ऐ सुणीकरी पतरसे उसला बोलया, “ऐ कहानी सांझो समझाई दे।” 16 उनी बोलया, “क्या तुसां भी हले दीकर नी समझे?” 17 “क्या तुहांजो पता नी है, कि जडा कुछ मुए च जांदा है से पेटे च पौदा है, कने संडास ने बाहर निकली जांदा है? 18 पर जडा कुछ मुए ला निकलदा है, से मैने ला निकलदा है, से ही माणुए जो अशुद्ध करदा है। 19 क्योकि बुरे बिचार, मारणा, परझीगमन, व्यभिचार, चोरी, झूठी गवाई कने निंदा मैने ला ही निकलंदे न। 20 ऐ ही है जडे माणुए जो अशुद्ध करंदे न, पर बिना हथ धोतयो खाणां खाणां माणुए जो अशुद्ध नी करदा है।” 21 यीशु ओथु ला निकली करी, सूर कने सैदा दे देशां जो चली गिया। 22 उस देशे ला इक कनानी जनानी आई, कने जौरे-जौरे ने बोलणा लगी, “है प्रभु। दाऊदे दी ओलाद, मिजो

पर दया कर, मेरिया कुडिया जो बुरी आत्मा बडी भरी सतांदी है।” 23 पर उनी उसा जो कोई जबाब नी दिता, कने उदे चेलयां आई करी उसने बिनती करिके बोलया, “इसा जो भेजी दे; क्योकि से साडे पिच्छे डडडी ओआ दी है।” 24 यीशुए जबाब दिता, “इसाएले दे घराने दियां गवाचियां भेडां जो छडी करी मिजो होर कुसी बाल नी भेजया है।” 25 पर से आई, कने उसयो नमस्ते करिके बोलणा लगी, “है प्रभु, मेरी मदद कर।” 26 उनी जबाब दिता, “बचयां दी रोटी लेईकरी कुतयां दे अग्रे पाणा ठीक नी है।” 27 उनी बोलया, “सच्च है प्रभु; पर कुते भी से ही टुकडे खांदे न, जडा उना दे मालिकां दे मजे ला हेठ पोंदे न।” 28 इसा गल्लां पर यीशुए उसा जो जबाब दिता, “हे जनानी, तेरा भरसा बडा है; जियां तू चांदी है, तेरे तांई तियां ही हो।” कने उसा दी कुडी उसी बेले ठीक होई गेई। 29 यीशु ओथु ला गलील झिला बखे आया, कने पाहडे पर चडी करी ओथु बेई गिया। 30 तालू भिडा दी भीड उदे बखे आई। कने अपने सोगी केई लंगडे, अन्ने, जल्ले, टुंडे, कने होर मते सारयां जो लेईकरी उदे बाल आये; कने उना जो उदे पैरा च रखी दिता, कने उनी उना सारयां जो ठीक किता। 31 जालू लोकां दिखया कि, जल्ले बोलणा, कने टुंडे ठीक होणा, कने लट्टे चलंदे, कने अन्नयां जो मिलदा है, तां हेरान होऐ कने इसाएले दे परमेश्वरे दी बडाई करणा लगे। 32 यीशुए अपने चेलयां जो सदीकरी बोलया, “ऐ लोक मिजो सोगी तिन्ना रोजां ला रे दे न उना बाल खाणे तांई कुछ नी है कने मिजो इसा गल्ला पर तरस ओआ दा है; कने मै इना जो भूखा नी भेजणा चांदा है; कुधी इयां ना हो कि से रस्ते च थकी करी रेई ना जान।” 33 चेलयां उसयो बोलया, “सांझो ऐथु सुससान जगा च कुथु ला इतणियां रोटियां मिलगियां कि असां इतणियां बडिया भिडा जो खुआन?” 34 यीशुए उना ला पूछया, “कि तुहाडे बाल कितणियां रोटियां न?” उना बोलया, “सत रोटियां कने थोडियां दियां छोटियां मछियां न।” 35 तालू यीशुए लोकां जो धरतिया पर बोणे दा हुकम दिता कने से बेई गे, 36 कने उदे बाद उनी से सत रोटियां कने मछियां लियां, कने परमेश्वरे दा धन्यवाद करिके तोडियां, कने अपने चेलयां जो रोटीयां तोडी करी दिन्दा गिया ताकि से उना जो लोकां च बंडी देन। 37 फिरा बादे च सारे लोक खाई करी रजी गे कने उदे बाद चेलयां बाकी बचयो टुकडयां जो सत टोकरीयां च भरी लिया। 38 कने खाणे बालयां के जनानिया कने बचयां जो छडी करी चार हजार मर्द थे। 39 तालू से भिडा जो भेजी करी किस्तिया पर चढया, कने मगदन देशे दिया सीमा पर आया।

16 फरीसियां कने सदीकियां यीशुए बाल आई करी उसयो परखणे तांई बोलया, “कि सांझो स्वर्गो दा कोई चमत्कार दस।” 2 उनी उना जो जबाब दिता, “संज्ञा जो तुसां बोलंदे न, कि मौसम खरा रौण है, क्योकि अम्बर लाल है।” 3 कने ब्यागा जो बोलंदे न, कि अज तफान ओणा क्योकि अम्बर लाल कने धूधला है तुसां अम्बरे दे लछण दिखीकरी फरक दर्सी सकंदे न, पर बकते दे निशाणा दा फरक कनी दर्सी सकंदे न? 4 “इस युगे दे बुरे कने व्यभिचारी लोक निशाण तोपंदे न, पर योना दे निशाणे जो छडी करी उना जो कोई होर निशाण नी मिलणा।” कने से उना जो छडी करी चली गिया। 5 कने चले झीला दे पार जांदे बेले रोटियां लेणा भूली गियो थे। 6 कने यीशुए उना जो चेतावनी दिती कि, “फरीसियां कने सदीकियां दे खमिरे ला बचणे तांई चौकने रनेयो।” 7 से अपु चे बिचार करिके बोलणा लगे, कि यीशुए ऐ इस तांई बोलया क्योकि “असां रोटियां नी लोंदियां।” 8 ऐ जाणी करी, यीशुए उना ने बोलया, “हे घटबिचवासियो, तुसां कजो अपु चे बिचार करा दे कि साडे बाल रोटी नी न?” 9 तुसां क्या हले दीकर नी समझे? कने उना पंजा हजारां दियां पंज रोटिया याद नी न, कने ना ही ऐ कि कितणियां टोकरीयां चुकियां थिया? 10 कने ना ही चार च हजार दियां थियां सत रोटियां, कने ना ही ऐ कि तुसां कितणियां टोकरीयां चुकियां थियां? 11 “तुसां कनी समझदे कि मै तुसां ने रोटियां दे बारे च नी बोलया? पर फरीसियां कने सदीकियां दे बचना ला चौकने रेणे दे बारे च बोलया है।” 12 तालू उना जो समझ आया, कि उनी रोटिया दे खमिरे तांई नी, पर फरीसियां कने सदीकियां दिया शिक्षा ला चौकने रेणे तांई बोलया था। 13 यीशु कैसरिया फिलिप्पी दे प्रदेशे च आया कने उनी अपने चेलयां ला पूछया, “लोक मिजो, माणुए दे पुत्रे जो क्या बोलंदे न?” 14 चेलयां जबाब दिता कुछ लोक बोलंदे न कि तुसां यहूना बपतिस्मादाता न; पर कोई-कोई एलियाह, कने कोई-कोई बोलंदे न कि पुराणे जमाने दे परमेश्वरे दा संदेश सुनाणे बालयां चे कोई इक है। 15 यीशुए उना जो बोलया, “पर तुसां मिजो क्या बोलंदे

न?" 16 शमीन पतरसे जबाब दिता, "तू जिंदे परमेश्वरे दा पुत्र मसीह है।" 17 यीशुए उसयो जबाब दिता, "हे शमीन, योना दे पुत्र, तू धन्य है, क्योंकि मासे या खने नी, पर मेरा पिता परमेश्वर जडा स्वर्ग च है, उनी ऐ गल्ल तिजो पर प्रगट कितियो है। 18 कने मैं भी तिजो ने बोलदा है, कि तू पतरस है, कने मैं इसी पथरे पर अपनी कलीसिया बणाणी, कने अधोलोक दे फाटक उदे पर प्रबल नी होणे।" (Hades 986) 19 "मैं तिजो स्वर्ग दे राज्य दियां चाबियां दिगा: कने जडा कुछ तू धरतिया पर बणागा; सै स्वर्ग च भी बाना, कने जडा कुछ तू धरतिया पर खोलगा, सै स्वर्ग पर भी खुलगा।" 20 तालू उनी चेलयां जो समझया कि, "कुसी ने भी मत बोलदे कि, मैं मसीह है।" 21 उस बेले यीशु चेलयां जो दसणा लगा, "मिजो जरूरी है कि मैं यरूशलेम जां, कने यहदी अगवे, बड़े याजकां, कने यहदी व्यवस्था जो सिखाणे बालयां दे हथां ला मते दुख होलें, कने से मिजो मारी देन, कने फिरी मैं तिन्ना रोजां बाद मरयां चे जिन्दा होई जां।" 22 पतरस यीशुए जो बखिया लेई गिया कने इसा गल्ला पर झिडकणा लगा, "है प्रभु, परमेश्वर ना करे। कि तिजो पर कदी ऐसा होऐ।" 23 उनी मुडी करी पतरसे जो बोलया, "शैताने साई कम्म करणा बंद कर! मेरे सामणे ला दू होई जा! क्योंकि तू परमेश्वरे साई नी, पर तू माणुए साई सोचा दा है।" 24 यीशुए भिडा जो अपने चेलयां समेत अपने बाल सदीकरी बोलया, "जडा कोई मेरा चेला बनणा चांदा है, उसयो अपणिया शरिरे दियां इच्छां कने जडियां तरकिबां बणाईयां मिजो जो छडी करी! मिजों तांई मरणे जो तैयार रेणा पोणा, सेरे मेरा चेला बणी करी मिजों पिच्छे चली सकदा है।" 25 कोई माणु ऐसा नी करगा कने अपने प्राणा जो बचाणा चांदा, उनी परमेश्वर सोगी आत्मिक जिन्दगी जिणे दा मोका गबाई देणा है। पर जडा माणु मिजों पर भरोसा करगा कने मेरे शरभसमाचार दिया बजा ने मरगा उस माणुए जो परमेश्वरे सोगी सदा तांई दी जिन्दगी मिलणी। 26 अगर तुसां संसारे दा सब कुछ पाई लेगे कने परमेश्वरे सोगी सदा दी जिन्दगी जिणे दा मोका गबाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी सदा दी जिन्दगी खरिदणा? कुछ नी! 27 मैं, माणुए दे पुत्रे अपने स्वर्गदूते सोगी अपने पिता दिया महिमा च ओणा है, कने उस बेले उनी हर इकी जो उदे कम्मा दे अनुसार उसयो फल देणा है। 28 मैं तुसां ने सच्च बोलदा है, "कि जडे ऐशु खडोतयो न, उना चे केई ऐसे न, कि जालू दीकर मिजो, माणुए दे पुत्रे जो उदे राज्य च ओदे नी दिखी लेन, तालू दीकर मौता दा स्वाद नी चखणा है।"

17 छे रोजां बाद यीशुए पतरस कने याकूब कने उदे भाई यहन्ना जो सोगी लिया, कने उना जो एकांत च कुसकी उच्चे पहाडे पर लेई गिया। 2 कने उना दे सामणे यीशुए दा रूप बदलई गिया। कने उदे कपडे चमकदार सफेद होई गे, 3 तालू उना तिन्ना चेलयां, परमेश्वरे दा संदेश देणेबाले मूसा कने एलियाहा जो, जडे बडे पेहले जिन्दा थे उना यीशुए सोगी गल्लां कने देरियया। 4 इसा गल्ला पर पतरसे यीशुए जो बोलया, "प्रभु जी, सांदा ऐशु रेणा ठीक है, इस तांई असां ऐशु तीन तम्बू बणां दे न, इक तरे तांई, इक मूसा तांई, इक एलियाहा तांई।" 5 पतरस बोला दा ही था, तालू इक चमकीला बदल आया कने उना जो अपनी छाया ने ढकी लिया, बदले च परमेश्वरे जो बोलदे सुणया, "कि ऐ मेरा प्यारा पुत्र है, कने मैं इसला खुश है, कने जडा ऐ बोलदा है उसयो ध्यान ले साणु।" 6 चले ऐ सुणी के मुए भार पेई गे, कने बडे डरी गे। 7 यीशुए उना जो बखे आई करी छुता, कने बोलया, "उठा कने डरा मत।" 8 तालू उना अपने चारो पासे नजर मारी, तां मूसा कने एलियाहा ओशु नी थे, कने उना जो सिर्फ यीशु ही मिल्ला। 9 जालू यीशु कने उदे तिन्ने चले पहाडे ला उतरा दे थे, तालू यीशुए ने जो हुकम दिता कि, "कुसी जो भी मत दसदे कि तुसां क्या दिखया जालू दीकर मैं, माणुए दा पुत्र मरयां चे जिन्दा ना होई जा।" 10 कने चेलयां उसला पुछया, "मूसा दी व्यवस्था जो सिखाणे बाले यहदी गुरू कजो बोलदे थे मसीहा ला पेहले एलियाहा ओणा था? अगर ओणा था, तां हाली दिकर कजो नी आया सै?" 11 यीशुए उना जो जबाब दिता, "ऐ तां सच्च है कि एलियाहा पेहले आई करी सब कुछ सुधारणा है।" 12 पर मैं तुसां ने बोलदा है, "एलियाहा तां पेहले ही आई चुकया था, कने लोकां उसयो नी पछेणया; पर जियां सै करणा चांदे थे तियां ही उदे सोगी किता। इसी तरीके ने ही माणुए दे पुत्रे जो भी उना दे हथे ला दुख होणे न।" 13 तालू चेलयां समझया कि उनी सांझो ने यहन्ना बपतिस्मा देणेबाले दे बारे च बोलया है। 14 जालू सै भिडा बखे पुज्जे, तां इक माणु उना बाल आया, कने गोडे भार बेईकरी

बोलणा लगा। 15 "प्रभु जी, मेरे पुत्रे पर दया कर। क्योंकि उसयो मिगी दे दौरि पोंदे न, उसयो बडी तकलीफ होटी है, कने बार-बार अग्गी च, कने बार-बार पाणिए च पेई जांदा है। 16 कने मैं उसयो तरे चेलयां बाल लांदा था, पर सै उसयो ठीक नी करी सके।" 17 ऐ सुणीकरी यीशुए उना जो जबाब दिता, "हे अविश्वासी लोकों, मैं कालू दीकर तुहाडे सोगी रेंगा, कने कालू दीकर तुहाडे अविश्वास जो सेहन करगा? उसी जागते जो मेरे बाल लोआ।" 18 तालू यीशुए उसयो झिडकया, कने बुरी आत्मा उसला निकली गई; कने जागता उसी बेले ठीक होई गिया। 19 जालू यीशु किला था, तां उदे चले उस बाल आए कने उसयो पुछया कि, "असां उसा बुरी आत्मा जो कजो नी कडी सके?" 20 यीशुए उना ने बोलया, "अपणे भरोसे दिया कमिया दिया बजा ला। क्योंकि मैं तुसां ने सच्च बोलदा है, अगर तुहाडा भरोसा राईया दे दांणे बराबर भी होदा, तां इसी पाहडे ने बोली सकदे न, कि ऐशु ला खिसकी करी ओशु चली जा, तां उनी चली जाणा; कने कोई भी गल्ल तुहाडे तांई मुशकिल नी होणी। 21 (पर ऐ जात बिना प्राथना कने बिना बरते दे नी निकलदी।)" 22 जालू चले गलील प्रदेशे च थे, तां यीशुए उना ने बोलया, "मैं, माणुए दा पुत्र माणुआं दे हथे पकडया जाणा है। 23 कने उना मिजो मारी देणा, कने मैं तीजे रोजे मरयां चे जिंदा होई जाणा।" इना गल्लां जो सुणीकरी चले बडे उदास होए। 24 जालू सै कफरनहम शेहरे च पुज्जे, तां मंदरे दा कर लेणे बालयां, पतरसे बाल आई करी पुछया, कि क्या तुहाडा गुरू मंदरे दा कर नी दिन्दा है? 25 उनी बोलया, "हाँ, दिन्दा है।" जालू सै घरे आया, तां यीशुए पतरसे दे पूछणे ला पेहले ही उसयो बोलया, "हे शमीन तू क्या समझदा है? धरतिया दे राजे महसूल या कर कुसला लेंदे न? अपने पुत्रां ला कि परयां ला?" 26 पतरसे उना ने बोलया, "परयां ला।" यीशुए उसला बोलया, "तां पुत्र बची गे।" 27 तमी असां उना जो ठोकर ना खुआन, तू झिला दे बखे जाई करी बीडी पा, कने जडी मछी पेहले निकलगी, उसा जो पकडयां; उसा दा मुउ खोलणे पर इक सिक्का मिलणा है, उसयो लेईकरी मेरे कने अपने बदले उना जो कर देई दियां।

18 उस बेले चले यीशुए बाल आई करी पूछणा लगे, "स्वर्ग दे राज्य च बडा कुण है?" 2 इस गल्लां पर उनी इक जागते जो अपने बाल सदीकरी उना बिच खरेडया, 3 कने बोलया, "मैं तुसां ने सच्च बोलदा है, कि तुसां अपना मन बदला, कने बचयां सांई बणा, तां तुसां स्वर्ग दे राज्य च जाई सकदे न। 4 जडा कोई अपने आपयो बचयां सांई छोटा करगा, उनी स्वर्ग दे राज्य च बडा होणा। 5 कने जडा कोई मेरे नापे ला इक ऐसे बच्चे जो अपनांदा है सै मिजो भी अपनांदा है।" 6 पर जडा कोई इना छोटयां चे कुसी इकी जो भी भरोसे ला भटकंदा है या उना दे पाप करणे दी बजा बणदा है, उदे तांई तां खरा होदा, कि उदे गले च बड़े घरटे दा पथर लटकजा करी उसयो दुगे समुद्रे च डोबी दिन्ने। 7 "ठोकरां दियां बजा ने संसारे पर हाथ ठोकर लगया जरूरी है; पर हाथ उस माणुए पर जिंदे जरिये ठोकर लगदी है।" 8 "अगर तेरा हाथ पैर तेरे पापां दी बजा बणा दा, तां उना जो बडी करी फेकी दे; तेरे तांई ऐ ही ठीक है कि तू टंडा या लंगडा होईकरी हमेशा दिया जिन्दगिया च प्रवेश करे, कि दो हथ पैर होंदे होए भी तू कदी नी बुझणे बालिया अग्गी च जां। (aiōnios g166) 9 अगर तेरी हथ तेरे पाप दी बजा बणे, तां उसा जो कडी करी फेकी दे। तेरे तांई ऐ ही ठीक है कि काणा होईकरी हमेशा दिया जिन्दगिया च प्रवेश करे, कि दो हथी दे होंदे होए भी तू कदी नी बुझणे बालिया नरके दिया अग्गी च जां।" (Geenna g1067) 10 "दिखा, तुसां इना छोटयां चे कुसयो भी घटिया मत समझदे; क्योंकि मैं तुसां ने बोलदा है कि स्वर्ग च उना दे स्वर्गदूत हमेशा मेरे स्वर्गीय पिता दे सोगी रेंद न।" 11 (क्योंकि मैं, माणुए दा पुत्र गवाचयां जो बचाणा आया है।) 12 "तुसां क्या सोचदे न? अगर कुसी माणुए दियां सौ भेडां न, कने उना चे इक गवाची जा, तां क्या सै उना निन्यानबे जो बाकी रखबालयां बाल छडी करी, पाहडे पर जाई करी, उसा गवाचिया जो नी तोपगा?" 13 "कने अगर ऐसा हो कि सै भेड उसयो मिली जाऐ, तां मैं तुसां ने सच्च बोलदा है, कि उनी निन्यानबे भेडां तांई इतणा खुश नी होणा, जितणा कि इसा भेडां तांई होणा। 14 तियां ही तुहाडा पिता जडा स्वर्ग च है उदी इच्छा नी है, कि इना छोटयां चे इक भी खत्म होऐ।" 15 "अगर तेरा मसीह भाई तिजो ने कोई जुल्म करे, तां जा कने उसा सोगी किल्ले च गल्ल बात करिके समझा; अगर सै तेरी सुणे ले कने अपनी गलती मन्नी ले, तां तू अपने मसीह भाईऐ जो बापिस पाई लिया।" 16 कने अगर सै नी सुणे, तां इक दो जणे होर लेई

जा सोगी, क्योंकि मूसा दिया व्यवस्था दे अनुसार, “हर इक अरूप जो दो या उसला जादा गबाह ला सही साबित करणा चाईदा।” 17 अगर सै उना दी भी नी मनने, तां तू कलीसिया ने बोली दे, पर अगर सै कलीसिया ने भी नी मनने, तां तू उसयो जियां तुसां होर जातियां सोगी व्यवहार करदे न, तियां ही उसयो कलीसिया ला कड़ी दिया। 18 “मैं तुसां ने सच्च बोलदा है, जडा कुछ तुसां धरतिया पर बणाणा है, उनी सै स्वर्ग च भी बणाणा है कने जडा कुछ तुसां धरतिया पर खोलणा है, सै स्वर्ग च भी खोलणा है।” 19 मैं तुसां ने फिरी बोलदा है, अगर धरतिया पर तुसां चे दो जणे कुसा गल्लां ताई इक मन होईकरी मंगगे, तां सै उना ताई मेरे पिता दिया तरफा ला जडा स्वर्ग च है होई जाणी। 20 “क्योंकि जिथु दो या तीन मेरे नापे ने गिठे होंदे न ओथु मै उना बिच होंदा है।” 21 ताल परतसे बखे आई करी, उसयो बोलया, “प्रभु जी, अगर मेरा मसीह भाई जुल्म करदे रे, तां मैं उसयो कितणी बरी माफ करे, क्या सत बरी दीकर?” 22 यीशुए उसयो बोलया, “मैं तिजो ने ऐ नी बोलदा, कि सत बरी नी, पर तिजो उसयो माफ करी देणा चाईदा।” 23 “इस ताई स्वर्ग दे राज्य उस राजे साईं न, जडा अपने सेवकां ला लेखा लेणा चांदा था। 24 जालू सै लेखा लेणा लंगा, तां इकी बंदे जो उदे सामणे लांदा से दस हजार सोने दे सिकयां दे बोरे दा कजंदार था। 25 कने उदे बाल बापस करणे ताई कुछ भी नी था, तां उदे मालिके बोलया, कि ऐ कने इदी घरे बाली कने बाल-बच्चे कने जडा कुछ भी इदा है सै सब कुछ बेची दिया, कने कर्ज चुकाई दिया। 26 इसा गल्ला पर उनी सेवके पैरां च पेईकरी नमस्ते किते, कने बोलया, हे मालिक, सब रख, मैं सारा कुछ भरी दिगा। 27 तालू उदे मालिके उस पर तरस खाई करी उसयो छडी दिता, कने उदा कर्ज भी माफ करी दिता। 28 पर जालू सै सेवक बाहर निकलया, तां उसयो इक सोगी कम्म करणे बाला साथी मिला, जिनी उसला सो दीनारां (सो दीनारः सो चांदी दे सिकके) दा कर्ज लिया था; उनी उदा गला पकड़ी करी उसयो बोलया, जडा कुछ तेरे पर कर्ज है उसयो भरी दे। 29 उदे साथी सेवके उदे पैरां पेईकरी, उसने बिनती करणा लगा; कि सब रख मैं सारा भरी दिगा। 30 पर सै नी मनया, कने उनी जाई करी उसयो जेला च पाई दिता, ताकि जालू दीकर सै कर्ज नी भरगा, तालू दीकर ओथु ही रे। 31 कने उदे साथी सेवक ऐ दिखीकरी बडे उदास होए, कने जाई करी ऐ सारा हाल अपने मालिके ने सुणाई दिता।” 32 तालू उदे मालिके उसयो सदीकरी बोलया, “हे दुष्ट सेवक, तू जडी मिजो ने बिनती कीती थी, तां मैं तेरा सारा कर्ज माफ करी दिता। 33 इस ताई जियां मैं तिजो पर दया किती थी, तियां ही तिजो भी अपने साथी सेवके दा कर्ज माफ करी देणा चाईदा था?” 34 कने उदे मालिके गुरसे च आई करी उसयो सजा देणे बाले दे हथे देई दिता, ताकि जालू दीकर सै सारा कर्ज नी भरगा, तालू दीकर उना दे हवालै रे। 35 “इयां ही अगर तुसां चे हर कोई अपने मसीह भाई जो मेने ला माफ नी करणा, तां मेरा पिता जडा स्वर्ग च है, उनी तुसां जो भी माफ नी करणा।”

19 जालू यीशु ऐ गल्लां बोली बैठा, तां गलील प्रदेशे ला चली गया; सै यहूदिया प्रदेशे ला निकले कने यरदन खड्वा दे दुज्जे पासे चली गे। 2 कने मते भरी लोक उदे पिच्छे चली पे, कने ओथु यीशुए उना सारयां जो ठीक किता। 3 तालू फरीसी उदे बाल आऐ कने उसयो पररणे ताई उसला पुछया, “क्या हर इक छोटिया बजा ला अपणिया घरे बाली जो छडी देणा ठीक है?” 4 उनी जबाब दिता, “तुसां क्या पढया नी है, कि जिनी उना जो बणाया है, उनी शरू ला ही नर कने नारी बणाई करी, बोलया। 5 इस बजा ला माणुऐ अपने माता-पिता ला लग होईकरी अपणिया घरे बालिया सोगी रेणा, कने इना दोनो इक तन होणा? 6 कने सै दोनो हण इक तन न, क्योंकि हण सै दो जणे नी, पर इक माणुऐ साईं न। इस ताई उसा जनानिया कने मर्दे जो बख नी करणा चाईदा जिना जो परमेख्वरे बियाह दे बंधना च बनया है।” 7 उना यीशुए ने बोलया, “फिरी मूसा ऐ कजो बणाया, कि उसा जो तलाक देईकरी छडी दिया?” 8 यीशुए उना ने बोलया, “मूसा तुहाडे मने दिया कठोरता दिया बजा ला तुहांजो अपणिया घरे बालिया जो छडी देणे दा हुकम दिता, पर शरू च ऐसा नी था। 9 मैं तुसां ने बोलदा है, कि जडा कोई व्यभिचार जो छडी करी कुसा होरसी बजा ने अपणिया घरे बालिया जो छडी करी दुईया ने बियाह करे, तां सै व्यभिचार करदा है।” 10 चेलयां उसने बोलया, “अगर मरदे दा जनानिया सोगी ऐसा रिश्ता है, तां बियाह नी करणा ही ठीक है।” 11 उनी उना ने बोलया, “सारे ऐ बचन ग्रहण नी करी सकदे, सिर्फ सै ही जिना जो परमेख्वरे इश

तरीके ने जिन्दगी जिणे दी शक्ति दितयो है। 12 क्योंकि कुछ नपुंसक ऐसे न जडे माऊ दे पेटे ला ही ऐसे न; कने कुछ नपुंसक ऐसे न, जिना जो माणुआं नपुंसक बणाया है: कने कुछ नपुंसक ऐसे न, जिना अपने आपे जो स्वर्ग दे राज्य ताई नपुंसक बणाया है, जडे इसयो समझी सकदे न, सै समझी लिया।” 13 तालू लोक बचयां जो उदे बाल लेईकरी आऐ, ताकि सै उना पर हथ रखे कने प्राथना करे; पर चेलयां उना जो झिडकां दीतियां। 14 यीशुए बोलया, “बचयां जो मना मत करा कने इना जो मेरे बाल ओणा दिया, जडे इना बचयां साईं भरोसेमंद न उना स्वर्ग दे राज्य च रेणा।” 15 कने सै उना पर हथ रखीकरी, ओथु ला चली गया। 16 इक माणुऐ यीशुए बाल आई करी बोलया, “गुरू जी, मैं कुण दिया भला कम्म करे, ताकि मिजो हमेशा दी जिन्दगी मिल्ले?” (aiōnios g166) 17 यीशुए उसयो बोलया, “तू मिजो ला भलाईया दे बारे च कजो पूछा ला है? भला ता इक ही है; पर अगर तू हमेशा दिया जिन्दगिया च प्रवेश करणा चांदा है, तां तू हुकमा जो मना कर।” 18 उनी उसला पुछया, “कुण दे हुकम?” यीशुए बोलया, “ऐ कि हत्या नी करणी, व्यभिचार नी करणा, चोरी नी करणी, झूठी गबाई नी देणी; 19 अपने माता पिता दी इज्जत करणी, कने अपने पड़ोसियां सोगी अपनयां साईं प्यार रखणा।” 20 उनी मुंडे यीशुए जो बोलया, “इना सारियां गल्लां जो तां मैं मना है, हण मिजो च कुसा गल्लां दी कमी है?” 21 यीशुए उसयो बोलया, “अगर तू सिद्ध होणा चांदा है, तां जा कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिगा।” 22 पर ऐ गल्ल सुणीकरी उस जवान मुंडे दे चेहे पर उदासीं छाई गेई, कने सै टूट्टी होई करी चली गया, क्योंकि सै बडा भरी अमीर था। 23 तालू यीशुए अपने चेलयां जो बोलया, “मैं तुसां ने सच्च बोलदा है, कि अमीरां दा स्वर्ग दे राज्य च जाणा बडा मुशकिल है। 24 ऊंटे दा सुइया दे नके चे निकलना असान है, पर अमीरां दा परमेख्वरे दे राज्य च जाणा बडा भरी मुशकिल है। 25 ऐ सुणीकरी चले बडे हेरान होईकरी बोलया, तां कुण अपने पापां दी सजा मिलणे ला बची सकदा है?” 26 यीशुए उना दे पासे दिखीकरी बोलया, “जडा माणु नी करी सकदे, पर परमेख्वरे सब कुछ करी सकदा है।” 27 तालू परतसे यीशुए जो बोलया, “दिख, असां तां सारा कुछ छडी करी तरे पिच्छे आयो न: तां सांझो क्या मिलणा है?” 28 यीशुए उना जो बोलया, “मैं तुसां ने सच्च बोलदा है, कि नोपे संसारे च जालू माणुऐ दे पुजे अपणिया महिमा दे सिंहासने पर बाँणा है, तां तुसां भी जडे मेरे पिच्छे आयो न, बाहरां सिंहासना पर बेईकरी इस्पाएले दे बाहरां गोत्रां दा नयाय करणा है।” 29 “कने जिनी घरां जो या भाई, बेहणा जो या माता-पिता जो या बाल-बचयां जो या खेतारां जो मेरे नापे ताई छडी दितया है, उसयो सो गुणा मिलणा, कने सै हमेशा दिया जिन्दगिया दा अधिकारी होणा। (aiōnios g166) 30 पर मते लोक जडे हण महान कने अणे न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।”

20 स्वर्ग दा राज्य इसा कहाणिया साईं है, इक जर्मीदार था, सै ब्यागा निकलया, ताकि अपने अंगरा दे बागे च कम्म करणे ताई मजदुरां जो लगां। 2 कने उनी मजदुरां ने इक रोज कम्म करणे ताई इक मजदुरी रखी, अपने अंगरा दे बागे च कम्म करणे ताई भेजया। 3 फिरी कोई नै कि बजे ब्यागा निकली करी, होर लोकां जो बजारे च बेकार खडुतयो दिखया, 4 कने उना जो बोलया, “तुसां भी अंगरा दे बागे च जा, कने जडा ठीक है, सै तुहांजो दिगा।” तां सै भी कम्म करणे ताई गे। 5 फिरी उनी दोपहर कने संझा तिन्न बजे भी निकली करी तियां ही किता। 6 कने लगभग पंज कि बजे निकली करी होरां जो खडोटया दिखया, कने उना जो बोलया, “तुसां कजो ऐथु दिन भर बेकार खडोई रदे?” उना उसया बोलया, “इस ताई, कि कुनी भी सांझो मजदुरीया च नी लाया।” 7 उनी उना जो बोलया, “तुसां भी अंगरा दे बागे च कम्म करणा जा।” 8 संझा जो अंगरा दे बागे दे मालिके अपने भण्डारिये जो बोलया, “मजदुरां जो सदीकरी जडे सारयां ला आखिर च आयो उना ला लेईकरी जडे सारयां ला पेहले कम्म करणा आयो मजदुरां जो उना दी मजदुरी देई दे।” 9 जालू सै आऐ जडे पंज बजे कम्मे पर लगयो थे, तां उना जो इक दिने दी दिहाडी इक दीनार मिली। 10 जडे पेहले आयो थे उना ऐ समझया, कि सांझो जादा मिलणा पर उना जो भी इक दिने दी दिहाडी इक दीनार ही मिली। 11 जालू उना जो इक दीनार मिला, तां सै घरे दे मालिके उपर बुडबुडाणे लागे। 12 कि जडे संझा दे पंज बजे आये कने इक ही घंटा कम्म किता, तू उना जो भी उतनी ही दिहाडी दिती जितनी तू सांझो दिती, असां दिन भर

भार चुक्या कने धुप खादी? 13 तालू बगीचे दे मालिके उना चे इकी जो जबाब दिता, “कि हे मित्र, मै तिजो ने कोई गलत नी करा दा। क्या मै तिजो पुरे दिन कम्म करणे दा इक दीनार नी बोल्या था? 14 जडी दिहाडी तेरी है, सै ले कने चली जा; मेरी मर्जी ऐ है कि जितणा मै तिजो दें, उतणा ही इस इक घंटा कम्म करणे बाले जो भी दें। 15 मिंजो हक है कि मै अपने पैसे जो अपणिया मरजिया ने खचीं सके। तिजो जलन नी होणा चाईदी कि मै दुजयां ताई दयालू है। 16 पर मते लोक जडे हृण महान कने अग्ने न, उसी बकते सै पीच्छे होणे, कने जडे पीच्छे न, सै उसी बकते पेहले होणे न।” 17 यीशु यस्शलेम शहरे जो जांटे बेले बाहरां चेलयां जो एकांत च लेई गया, कने रस्ते च कने ने बोल्या लगा। 18 “दिखा, धयाने ने सुणा, असां यस्शलेम चलयो न, कने मै माणुए दा पुत्र बहू याजकां कने यहूदी व्यवस्था जो सिखाणे बालयां दे हथे पकडया जाणा है, कने उना मिंजो मीत दी सजा देणी है। 19 कने होर जातियां दे हथे देई देणा है। कने उना मेरा मजाक उडाणा है, मिंजो पर थुकणा, कने मिंजो कोडे मारणे, कने मिंजो सुली पर चढाई करी मारी देणा है, कने मै तिजे दिने मरयां चे जिंदे होई जाणा है।” 20 तालू जव्दी दे पुत्रां दिया माऊ अपने बचयां सोगी उदे बाल आई करी उसयो नमस्ते किते, कने उसला कुछ मंगणा लग्गी। 21 यीशुए उसा जो बोल्या, “तू क्या चाहंती है?” उना उसयो बोल्या, “ऐ बचन दे, कि मेरे ऐ दोनो पुत्र तैरे राज्य च, इक तैरे सजे पासे कने इक खबे पासे बेई सकन।” 22 यीशुए जबाब दिता, “तुसां जो नी पता कि तुसां क्या मंगा दे? हण जडे दुख मै सेहणे न, क्या तुसां उना दुखां जो सेहन करी सकंदे न?” उना उसने बोल्या, “हॉं करी सकंदे न।” 23 यीशुए उना जो बोल्या, “तुसां भी सारे दुख सेहणे न, जियां मै सेहणे। पर अपने सजे कने खबे पासे बडैतलना मेरा कम्म नी है, पर जिना ताई मेरे पिता दिया तरफा ला तैयार कितया है, उना ताई ही न।” 24 ऐ सुणीकरी बाकी दसो चेले याकूब कने यहून्ना पर गुस्सा करणा लग्गे। 25 तां यीशुए उना जो अपने बाल सदीकरी बोल्या, “तुहांजो पता है ना, कि जडे लोक ध्यान मने जाईं थे, सै अपने अधिकारां दा इस्तेमाल अपने अर्धीन लोकां दे उपर हक जमाणे ताई करंदे न। उना दे अणुवे लोक अपणी गल्ल मनाणे ताई हक जतांदे न। 26 तुसां चे जडा महान बगना चांदा है, उसयो बाकियां दी सेवा करणी चाईदी। 27 कने जडा कोई तुसां चे प्रधान बणना चांदा हो, सै सारायां दा नौकर बणे। 28 मै ऐ इस ताई बोलादा है क्योकि मै माणुए दा पुत्र, इस संसारे च सारायां दी सेवा करणे ताई आया है, मै इस ताई नी आया कि लोकां ला अपणी सेवा बांटे। मै तां लोकां जो पापां ला छुटकारा करणे ताई अपने प्राण कीमत च देणा आया है।” 29 जालू सै यरीहो शहरे ला निकला दे थे, तां इक बडी बडी भीड उदे पिच्छे चली पेई। 30 दो अन्ने, जडे सडका बखे बैठयो थे, ऐ सुणीकरी कि यीशु जा दा है, पुकारी करी बोल्या लग्गे, “हे प्रभु, दाऊदे दे बंशज, सांझो पर दया कर।” 31 लोकां उना जो झिडकां दितियां, कि चुप रिया, पर सै होर भी जौरे ने चीलाई करी बोल्या लग्गे, “हे प्रभु, दाऊदे दी ओलाद, सांझो पर दया कर।” 32 तालू यीशुए खडोई करी, उना जो सदया, कने बोल्या, “तुसां क्या चांदे न कि मै तुहाडे ताई करे?” 33 उना उसने बोल्या, “प्रभु जी, ऐ कि साडियां हखी खुलीं जान।” 34 यीशुए तरस खाई करी उना दियां हखी छूतियां, कने उना जो झट मिलणा लग्गी पिया, कने सै उदे पिच्छे चली पै।

21 जालू सै यस्शलेम दे बखे पुज्जे कने जैतून रखां दे पाहडे पर बैतफगे जगा च आणे, तां यीशुए दो चेलयां जो ऐ बोली करी भेजया, 2 “अपणे सामणे बाले ग्रां च जा, ओथु पुज्जे ही इक गधी बनियो होणी कने सोगी उसा दा बच्चा भी बनया होणा। उना जो खोली करी मेरे बाल लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जस्सत है, कने उनी माणुए तुसां जो लेई जाणा देणा है।” 4 ऐ इस ताई होया, कि जडा बचन परमेश्वरे दा संदेश देणेबाले बोल्या था, सै पूरा हो: 5 “सियोन दिया कुडिया ने बोला, दिख, तेरा राजा तैरे बाल ओआ दा है; सै नम्र है, कने गधे पर बैठया है; मतलब कि लादुए दे बच्चे पर बेईकरी ओआ दा है।” 6 चेलयां जाई करी, तियां ही कित्ता, जियां यीशुए उना ने बोल्या था। 7 गधी कने उसा दा बच्चा लांदा कने उना पर अपने कपडे बछाई दिते, कने यीशु उस पर बेई गिया। 8 कने मते लोकां अपने कपडे रस्ते च बछाए, कने केई लोकां सखा जो छांगी करी डालियां रस्ते च बछाईयां। 9 कने थोडे लोक यीशु दे अग्गे-अग्गे चलयो थे, कने थोडे लोक पिच्छे चलयो थे, सै सारे खुशिया ने बोला दे थे, “दाऊदे दे बंशज दी होशाना; धन्य सै जडा प्रभु दे नाणे ने ओदा है, स्वर्ग च होशाना।” 10 जालू यीशु यस्शलेम

शहरे च पुज्जा, तां सारे नगरे च हिल पेई गेई, कने लोक बोल्या लग्गे, “ऐ कुण है?” 11 लोकां बोल्या, “ऐ गलीले प्रदेश दे नास्रते ग्रां दा परमेश्वरे दा संदेश देणेबाला यीशु है।” 12 यीशुए परमेश्वरे दे मंदरे च जाई करी व्यपारी लोकां जो मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। कने पेसे बदलने बाले साहकारां दे मेज पलटी दिते, कने कबूतरां जो बेचणे बालयां दियां चौकियां जो बाहर सुटी दिता। 13 कने यीशुए उना जो बोल्या, पबित्र शाश्व ऐ बोलादा है कि, “लोक मेरे घरे जो प्राथना दा पर बोलेद न, जिथु सारे लोक प्राथना ताई ओदे न? पर तुसां तां इसयो डाकुआं ने भरस्यो गुफा साई बणाई दितया है।” 14 तालू अन्ने कने लंगडे, मंदरे च उदे बाल आये, कने यीशुए उना जो खरा करी दिता। 15 पर जालू बहू याजकां कने व्यवस्था जो सिखाणे बालयां इना अनोखे कम्मा जो दिखया, जडे यीशुए किते कने मंदरे च जागातां जो दाऊदे दे बंशजे जो होशाना बोलेद सुणया, तां सै गुस्सा होई गे, 16 कने उसयो बोल्या लग्गे, “तू क्या सुणा दा है कि ऐ क्या बोला दे न?” यीशुए उना ने बोल्या, “हॉं; तुसां क्या ऐ कदी नी पढया की: जागातां कने दूध पिंदे बचयां दे मुए ला तू स्तुति कराई?” 17 तालू सै उना जो छडी करी नगरे दे बाहर बैतनिय्याह ग्रां जो गिया, कने ओथु रात बिताई। 18 बग्याण जालू सै नगरे जो बापस ओआ दा था, तालू यीशुए जो भूख लग्गी। 19 सडका बखे अंजीर दा इक सख दिखया, कने सै उस बाल गिया, कने उस सखे च पतयां जो छडी करी होर कुछ नी था, उनी उसयो बोल्या, “हण तिजो पर कदी फल नी लगणे न।” कने अंजीर दा सख झट सुकी गिया। (aiōn g165) 20 ऐ दिखीकरी चेले बडे हेरान होए, कने बोल्या लग्गे, “ऐ अंजीर दा सख झट कियां सुकी गिया?” 21 यीशुए उना जो जबाब दिता, “मै तुसां ने सच्च बोलादा है; अगर तुसां भरोसा रखन, कने शक नी करन; तां सिर्फ तुसां ऐ नी करणा जडा इस अंजीर दे सखे ने कित्ता है, अगर तुसां इस पाहडे जो भी बोलगे कि ऐथू ला पुटुई जा, कने समुद्रे च जाई पो, तां ऐ होई जाणा।” 22 “कने जडे कुछ तुसां प्राथना च भरोसे ने मंगणे सै सारा कुछ तुसां जो मिलणा।” 23 सै मंदरे च जाई करी उपदेश करा दा था, तां बहू याजकां कने यहूदी व्यवस्था जो सिखाणे बालयां कने यहूदी अणुवे उदे बाल आये कने उसयो पुछणा लग्गे, “तू ऐ कम्म कुसदे अधिकारे ला करदा है? कने तिजो ऐ हक कुनी दितया है?” 24 यीशुए उना जो जबाब दिता, “मै भी तुहांजो ला इक गल्ल पछदा है, अगर तुसां मिंजो जबाब दिणे, तां मै दसणा कि ऐ कम्म मै कुसी हके ने करदा है। 25 यहून्ना जो लोकां जो बपतिस्मा देणे ताई कुनी भेजया था? क्या सै परमेश्वरे भेजया था या माणुए? मिंजो दसा।” तालू सै अपु च बोल्या लग्गे कि अगर असां बोल्या कि, “परमेश्वर जडा स्वर्गे च है उनी भेजया है, तां यीशुए सांझो ला पुछणा, कि तुसां यहून्ना पर भरोसा कन्नी कित्ता?” 26 कने अगर बोलन माणुए दिया तरफा ला तां सांझो भीडा दा डर है, क्योकि सै उना लोकां ला डरदे थे, जडे यहून्ना जो परमेश्वर दे पासे ला आया इक सच्चा परमेश्वरे दा संदेश देणेबाला मंदे थे। 27 उना यीशुए जो जबाब दिता, “असां नी जाणदे।” यीशुए भी उना जो बोल्या, “तां मै भी तुहांजो नी दसणा, कि ऐ कम्म मै कुस हके ने करदा है।” 28 “तुसां इसा कहाणिया ला क्या सोचंदे कने समझंदे न? कुसी माणुए दे दो जागत थे; उनी पेहले बाल जाई करी बोल्या, अज अंगरा दे बागे च जाई करी कम्म कर।” 29 उनी जबाब दिता, मै नी जाणा, पर बांदे च उसयो पछताबा होया कने फिरी चली गिया। 30 फिरी दुज्जे बाल जाई करी इयां ही बोल्या, उनी जबाब दिता, जी हॉं मै जांदा है, पर सै गिया नी। 31 इना दोना चे कुनी परमेश्वरे दी इच्छा पुरी कित्ती है? उना बोल्या, “पेहले बाले।” यीशुए उना ने बोल्या, “मै तुसां ने सच्च बोलादा है, कि कर लेणेबाले कने वेश्यां तुहांजो ला पेहले परमेश्वरे दे राज्य च प्रवेश करणा है। 32 मै ऐ इस ताई बोल्या क्योकि जालू यहून्ना बपतिस्मा देणेबाले तुहांजो दसया कि कियां सही तरीके ने जीणा है, कने तुसां उदा भरोसा नी कित्ता। पर कर लेणे बालयां कने वेश्यां अपने पापां जो छडी दिता कने उदा भरोसा कित्ता: कने तुसां ऐ दिखीकरी बांदे च भी नी पछताय कि उदा भरोसा करी लेंदे।” 33 “इक होर कहाणी सुणा: इक माणुए बागे च अंगूर लाये। उनी बागे दे चारों पासे बाड लगवाया, कने इक जगा अंगूरा दे रसे जो निचोडने ताई बणाई, कने निगरानी रखणे ताई इक उचिया जगा पर कम्मा बणाया। फिरी उनी बागे जो कुछ किसाना जो ठेके पर देई दिता, कने परदेस जो चली गिया। 34 फिरी जालू अंगूर पकवी गे, तां उनी अपने नोकरां जो ठेकेदारे बाल अपना अंगूरा दे बागे दा हिस्सा लोणे ताई भेजया। 35 पर ठेकेदारां उदे नोकरां जो पकडी करी, कोई कृतया, कोई मारी दिता; कने केईयां

जो पथरा ने मारया। 36 फिरि उनी पहेले ला भी जादा होर नोकरां जो भेजया, कने उना ठेकेदारां उना सोगी भी तियां ही किता। 37 आखरी च उनी अपने पुत्रे जो उना बाल ऐ सोची करी भेजया, कि उना मेरे पुत्रे दी इज्जत करणी। 38 पर ठेकेदारां पुत्रे जो दिखीकरी अपु चे बोलया कि, ऐ तां वारिस है, ओआ असां इसयो मारी दिन्दे न, कने इदी सारी जगा जमीन साडी होई जाणी। 39 कने उना उसयो पकड़या कने अंगूरा दे बागे ला बार कडी करी मारी दिता। 40 इस तांई कि जालू अंगूरा दे बागे दा मालिक ओगा तां, तां सै ठेकेदारां सोगी क्या कराग?" 41 उना उसने बोलया, "उनी उना बुरे लोकां जो बुरे तरीके ने खत्म करी देणा; कने अंगूरा दे बागे दा ठेका होर किसाना जो देई देणा, जडे उसयो बकते पर फल दिंगे।" 42 यीशुऐ उना ने बोलया, "तुसां क्या कदी पबित्र शाखां च ऐ नी पढया: जिस पथरे जो राजमिन्त्रियां बेकार बोलया था, सै ही पथर कुंघे च सिरे दा पथर बनया? ऐ प्रभु दिया तरफा ला होया, पर साडिया नजरा च अनोखा है।" 43 इस तांई मैं तुसां ने बोलदा है, कि परमेश्वरे दा राज्य तुहांजो ला लेई लेंगा है, कने ऐसे लोकां जो देई देणा है जडे सै ही करगे जडा परमेश्वर चादां है। 44 "जडा इस पथरे पर पोंगा, उदा चूर भूर होई जाणा; जिदे पर सै पथर पोंगा, उसयो पि सडना उनी।" 45 बड़े याजकां कने फरीसी उदिया इसा कहाणिया जो सुणीकरी समझी गे, कि सै साडे बारे च बोला दा है। 46 कने सै उसयो पकडना चांदे थे पर लोकां ला डरी गे क्योकि सै उसयो परमेश्वरे दा संदेश देणेबाला मंदे थे।

22 यीशुऐ फिरि उना जो कहाणी सुणाई, 2 "स्वर्गें दा राज्य इक कहाणिया सांई है, इक राजा था जिनी अपने पुत्रे दा बियाह किता।" 3 उनी अपने नोकरां जो भेजया कि जिना जो नियुंढ दितियो उना लोकां जो बियाह दिया धामा च सदा; पर सै कोई ओणा नी चांदे थे। 4 "फिरि उनी होर नोकरां जो ऐ बोली करी भेजया, कि नियुंढ दितियो लोकां ने बोला: दिखा मैं धाम तैयार करी दितियो है, कने सारा कुछ तैयार है; कने तुसां बियाये दिया धामा च ओआ। 5 पर सै बहाना लाइ करी चली गे: कोई अपने खेतरां जो, कोई अपने कम्म धंधे जो। 6 बाकी लोक जडे बचा थे उना नोकरां जो पकडी करी उना दा अनादर किता कने मारी दिता। 7 जालू राजे ऐ सुणया तालू राजे जो गुस्सा आया, कने उनी अपणी सेना भेजी करी उना हत्यारां जो मरवाया, कने उना दे शेहरे जो फुकी दिता। 8 तालू उनी अपने नोकरां ने बोलया, बियाये दी धाम तां तैयार है, पर सदयो लोक खाणे जोगे नी न। 9 इस तांई तुसां हर जगा जा, कने जितणे भी लोक तुसां जो मिलन, सबना जो बियाये दिया धामा तांई सदी लोआ। 10 उना नोकरां हर जगा पर जाई करी क्या बुरे, क्या भले, जितणे भी मिल्ले, सब गठरे; कने बियाये बाला पर परोणया ने भरई गिया। 11 जालू राजा परोणया जो दिखणे तांई अंदर आया, तां उनी ओथु इक माणुऐ जो दिखया, जिनी बियाये तांई खरे कपडे नी पायो थे। 12 राजे उस्ता पुछया, है मित्र, तू बिना बियाये दे नोऐ कपडे पाई करी ऐथु कजो आया? कने सै चुप होई गिया। 13 तालू राजे नोकरां ने बोलया, इदे हथ-पैर बन्नी करी इसयो काल कोठडी च पाई दिया, ओथु उनी रोणा कने, दंद पीणे। 14 क्योकि परमेश्वरे मते लोकां जो अपने बाल सदया है पर थोडे ही न जडे चुंगयो न।" 15 तालू फरीसियां जाई करी अपु चे बिचार किता, कि उसयो कुस तरीके ने गल्लां च फसान। 16 उना अपने चेलयां जो हेरोदियां सोगी उदे बाल ऐ बोलणे जो भेजया, "गुरू जी, असां जो पता है कि तुसां हमेशा सच्च बोलंदे न, कने परमेश्वरे दा रस्ता सच्चाईया ने दसदा है, कने कुदी भी परवाह नी करंदे न, क्योकि तू माणुऐ दा मूरे दिखीकरी गल्ल नी करदा है। 17 इस तांई सांझे दस कि तू क्या सोचदा है? महाराजा जो कर देणा ठीक है, कि गलत है।" 18 यीशुऐ उना दी बुराई जाणी करी बोलया, "है कपटियों, मिंजो कजो परखंदे न?" 19 करे दा सिक्का मिंजो दसा। "तालू सै उदे बाल इक दीनार लेई आये।" 20 उनी, उना ला पुछया, "ऐ आकृति कने ना कुसदा है?" 21 उना उसने बोलया, महाराजा दा। तालू उनी उना जो बोलया, "जडा महाराजा दा है, सै महाराजा जो, कने जडा परमेश्वरे दा है, सै परमेश्वरे जो दिया।" 22 ऐ सुणीकरी सै हेरान होये, कने उसयो छडी करी चली गे। 23 उसी रोजे सदकी जडे बोलंदे थे कि मरयां दा जिन्दा होणा है ही नी सै यीशुऐ बाल आए, कने उस्ता पुछया, "गुरू जी, मूसा बोलया था, कि अगर कोई बिना ओलादी मरी जा, तां उदा भाई उदिया परे बालिया ने बियाह करी के अपने भाई तांई बंश पैदा करे। 25 हुण साडे ऐथु सभे भाई थें; पहेला भाई बियाह करिके मरी गिया; कने ओलाद नी होणे दिया बजा ने अपणिया घरे बालिया जो अपने भाईऐ तांई छडी गिया। 26 तां दुऐ भाईऐ उसा ने ही बियाह करी लिया

कने से भी बिना ओलादी मरी गिया, कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 27 सबना दे बाद सै जनानी भी मरी गई। 28 हुण, सांझे दस सतां भाईयां उसा जनानिया ने बियाह कितया था, जालू सै मरणे दे बाद फिरि जिन्दे होंगे, तां सै जनानी कुदी घरे बाली होणी?" 29 यीशुऐ उना जो बोलया, "तुसां दो बजा ने गलत न, तुसां पबित्र शाख जो नी जाणंदे ने जडा मरणे दे बाद लोकां जो जिन्दा रणे दे बारे च दसदा है। तुसां ऐ नी जाणंदे कि परमेश्वर बाल मरे होये लोकां जो जिन्दा करणे दी शक्ति है।" 30 क्योकि जालू उना मरयां च जिन्दा होणा, तां उना लोकां दे बियाह नी होणे; जियां स्वर्गें च रेणेबाले स्वर्गदूत बियाह नी करे। 31 "मरयां च जिन्दा होणे दे बारे तुसां क्या मूसा दिया कताबां च नी पढया जडा परमेश्वरे तुसां जो बोलया: 32 मैं अब्राहम दा परमेश्वर, कने इसहाक दा परमेश्वर, कने याकूब दा परमेश्वर है? सै मरयां दा नी, पर जिन्दाया दा परमेश्वर है।" 33 ऐ सुणीकरी लोक उदे उपदेशे ला हेरान होए। 34 जालू फरीसियां सुणया कि यीशुऐ सदकियां दा मु बंद करी दितया है, तां सै गिठे होए। 35 उना चे इकी यहदी मूसा दी व्यवस्था जो सिखाणे बाले परखणे तांई, यीशुऐ ला पुछया, 36 "गुरू जी, परमेश्वरे जडे भी हुकम दितयो न, उना सारयां चे सारयां ला बडा हुकम कुण दिया है?" 37 उनी उना जो बोलया, "तू अपने प्रभु परमेश्वर ने अपने सारे तन मन कने सारे प्राण कने अपणिया सारिया अकला सोगी प्यार कर।" 38 सारयां ला बडा कने मुख्य हुकम तां ऐ ही है। 39 कने उस सांई ऐ दूजा हुकम भी है, कि तू अपने पडोसियां सोगी अपने सांई प्यार कर। 40 "इना दो हुकमा पर ही सारी व्यवस्था कने भविष्यवाणियां अधारित न।" 41 जालू फरीसी गिठे थे, तां यीशुऐ उना ला पुछया, 42 "मसीह दे बारे च तुसां क्या सोचंदे न? सै कुदा पुत्र है?" उना यीशुऐ ने बोलया, "दाऊदे दा बंशज।" 43 यीशुऐ उना ला पुछया, "तां दाऊद आत्मा च होईकरी उसयो प्रभु कजो बोलदा है?" 44 "प्रभुऐ, मेरे प्रभु ने बोलया, मेर सजे पासे बो, जालू दीकर मैं तेरे दुशमणा जो तेरे पैरां हेठ नी करी दें।" 45 "भला, जालू दाऊद ही उसयो प्रभु बोलदा है, तां सै उदा पुत्र कियां होया?" 46 उदे जबाबे च कोई भी कुछ नी बोली सकया। पर उस रोजे ला कुसयो भी फिरि उस्ता पुछणे दी हिम्मत नी होई।

23 तालू यीशुऐ भिडा कने अपने चेलयां जो बोलया, 2 "फरीसियां कने व्यवस्था जो सिखाणे बालयां जो मूसा दिया व्यवस्था दी व्याख्या करणे दा हक है।" 3 इस तांई सै तुसां ने जडा कुछ बोलणे सै तुसां करणा कने मनणा, पर जडा सै करंदे न सै मत करंदे; क्योकि सै उपदेश दा दिन्दे न पर उना दा पालन नी करंदे। 4 सै अपु अपणी व्यवस्था दा पालन करणे दी कोशिश भी नी करंदे। कने ऐसे नियम बणादे न जिना दा पालन करणा बडा मुशकिल है। 5 सै अपने सारे कम्म लोकां जो दसणे तांई करंदे न: सै अपणिया बांई कने मथे पर पटियां बन्दे न जिना च पबित्र शाख दे बचन लिखयो होंदे न, कने अपने कपडयां दियां झालारां बदोदे न। 6 धामा च समानित जगा च बोणा चांदे न, कने यहदी जंज घर च भी खास-खास आसना पर बोणा पंसद करंदे न, 7 बजारां च सारे लोक उना जो नमस्ते कने सारे उना जो गुरू जी बोलन सै उना जो खरा लगदा है। 8 पर तुसां गुरू मत बणंदे, क्योकि तुहाडा इक ही गुरू है: कने तुसां सारे भाई-बेहणा सांई न। 9 कने अपने पिता जो छडी करी कुसयो भी धरतिया पर अपने पिता परमेश्वरे दा आदर मत दिन्दे क्योकि तुहाडा इक ही पिता है, जडा स्वर्ग च है। 10 कने कुसी दे गुरू भी मत बणंदे, क्योकि तुहाडा इक ही गुरू है, मतलब कि यीशु मसीह। 11 जडा तुसां च बडा है, सै तुहाडा सेवक बणे। 12 जडा कोई अपने आपे जो बडा बणांगा, सै नम्र करी देणा: कने जडा कोई अपने आपे जो छोटा बणांगा, सै बडा करी देणा। 13 "है कपटी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तुसां लोकां जो स्वर्गें दे राज्य च जाणे दी इजाजत नी दिन्दे, ना तां अपु स्वर्गें च जाणा, कने ना तां स्वर्गें जाणे बालयां जो जाणा दिन्दे न।" 14 "है कपटी व्यवस्था जो सिखाणे बालयो कने फरीसियां, तुहांजो तांई बडा बुरा होणा है। तुसां धोखे कने वेईमानिया ने विधवां दे घरां दी चिजां पर कब्जा करी लेंदे है। कने लोकां जो दसणे तांई बडी देरा दीकर प्रार्थना करंदे न, परमेश्वरे इना जो बडी बुरी सजा देणी है।" 15 "है कपटी यहदी व्यवस्था जो सिखाणे बाले कने फरीसियां, तुहांजो तांई बडा बुरा होणा है। तुसां इक जणे जो अपने भरोसे च लोणे तांई सारियां जगा च दुरे-दुरे दीकर गुमदे फिरंदे रेंदे न, कने जालू सै भरोसे च आई जांदा है, तां उसयो अपने ला दुगणा नरक जाणे जोगा बणाई दिन्दे न।" (Geenna

g1067) 16 हे अन्ने अगुवाई करणे बालयो, तुहांजो ताई बडा बुरा होणा है, कि तुसां सिखावे न कि अगर कोई मंदरे दी कसम खा तां कोई फरक नी है, पर अगर कोई मंदरे दे सोने दी कसम खा तां उदे ताई कसम पूरी करणा जरूरी होई जांदा है। 17 हे मूर्खा, कने अन्नयो कुण बडा है, मंदरे दा सोना या सै मंदर जिसला सै सोना पबित्र होंदा है? 18 कने फिरी तुसां ऐ भी सिखावे न कि अगर कोई वेदी दी कसम खा तां कुछ फर्क नी है, पर जडी भेट उस पर चढाई है, अगर कोई उसा दी कसम खा तां फर्क पोंदा है। 19 हे अन्नयो, कुण बडा है, भेट या वेदी जिसने भेट पबित्र होंदा है? 20 इस ताई जडा वेदी दी कसम खांदा है, सै उदी कने जडा कुछ उसा पर है, उदी भी कसम खांदा है। 21 कने जडा मंदरे दी कसम खांदा है, सै उदी कने उदे च रेणेबाले परमेश्वरे दी भी कसम खांदा है। 22 कने जडा स्वर्ण दी कसम खांदा है, सै परमेश्वरे दे सिहासने दी भी कने उस पर बोणे बाले दी भी कसम खांदा है। 23 यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां पुदीने, कने सौफ, कने जरि, दा तां दसमां हिंसा दिन्दे न, पर तुसां व्यवस्था दियां जरूरी गल्लां जो मतलब कि न्याय, कने दया, कने इमानदार होणा छडी दिता है; तुहांजो दशमांश तां दिन्दे रेणा चाईदा था, पर इना गल्लां जो भी नी छडणा चाईदा था। 24 हे अन्ने यहूदी अगुवो, (अगुवाई करणे बाले) तुसां जडे नियम जरूरी नी न उना जो तां बडिया साबधानिया ने मंदे न, जियां कि पिंदे बेले माखियाँ जो दूर करदे पर परमेश्वरे दी जरूरी गल्लां जो मंदे नी न! ऐ ऊंटे जो निगलने साई है। 25 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां ऐसे कटोरे कने भांडे साईं न जडे तां उपरे-उपरे ला तां सांफ न, पर अंदरे ला अणे भी गंदे न। सै ऐ कि, तुसां अपने आपे जो भले लोकां साईं दसदे न, पर तुहाडे मन लालची कने मतलबी न।” 26 हे अन्ने फरीसी, पहले तुसां जो लालची कने मतलबी होणा रोकी देणा चाईदा तां तुसां से ही करी सकणा जडा धर्म है। 27 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुसां तां उना सफेदी कितियां कबरां साईं न जडियां उपरे ला तां छेल मिलदियाँ न, पर अंदर मुर्दयां दियां हडियाँ कने हर तरा दियां गंदगिया ने भरइयां न।” 28 इना कबरां साईं तुसां भी उपरे ला तां माणुऐ जो धर्मी लगदे न, पर तुसां अंदरे ला कपट कने पापां ने भरयो न। 29 “यहूदी व्यवस्था जो सिखाणे बाले कने फरीसियों, तुहांजो ताई बडा बुरा होणा है। तुहाडे पूर्वजां जिना परमेश्वरे दा संदेश देणेबालयां जो मारया था उना दियां कबरां जो सजां न कने धर्मी लोकां दियां कबरां जो सम्मानित करदे न।” 30 कने बोलदे न कि, अगर असां अपने बाप दादयां दे बकते च होंदे तां असां परमेश्वरे दा संदेश देणेबालयां दिया हत्या च हिस्सेदार नी होंदे। 31 इसला तां तुसां अपु ही साबित करदे न कि तुसां उना लोकां दे बंशज न जिना परमेश्वरे दा संदेश देणेबालयां दी हत्या कितियो। 32 तुसां उस बुराईया जो पूरा करणे बाले न जिसयो तुहाडे पूर्वजां शुरू कितया था। 33 हे जहरिले सपां दे बचयां साईं लोको कने कैरतो दे बच्चयों, तुसां नरके दिया सजा ला नी बचणा है। (Geenna g1067) 34 इस ताईं मैं तुहाडे बाल परमेश्वरे दा संदेश देणेबालयां जो भेजदा है। कने, बुद्धिमान, कने व्यवस्था जो सिखाणे बालयां जो भेजदा है; तुसां इना चे थोड्यां जो मारी देणा है, कने केईयां जो सूली पर चढाना कने केईयां जो अपने यहूदी जंज घर च कोडे मारणे, कने इकी शेहरे ला दुजे शेहरे जो नठाणे न। 35 धर्मी हाबिल ला लेईकरी बिरिक्याह दे पुत्रे जकर्याह दीकर, जिसयो तुसां मंदरे कने वेदिया दे बिच मारया था, जितणया धर्मियां दी हत्या इसा धरतिया च होईयो है, उना सारयां ताईं तुसां जो दोषी बोलणा। 36 “मैं तुसां ने सच्च बोलदां है, इना सारियां हत्या दी सजा इस बकते दे लोकां पर आई पोणी है।” 37 “यश्शलेम शेहरे दे लोको, हे यश्शलेम दे लोको! तुसां जडे परमेश्वरे दा संदेश देणेबालयां जो मारी दिन्दे न, कने जीना जो तुहांजो बाल भेजदे न, उना जो पथरा ने मारदे न, कितणी बरी मैं चाया कि जियां मुर्गी अपने बचयां जो बचाणे ताईं फना डेड गिठे करी लेंदी है, तियां ही मैं भी तुसां जो गिठे करी लेणा, पर तुसां नी चांदे कि ऐसा हो।” 38 दिखा, तुहाडा मंदर तुहांडे ताईं उजाडी छडया है। 39 “क्योंकि मैं तुसां ने बोलदा है, हणी ला जालू दीकर तुसां नी बोलगे, कि धन्य है सै, जडा प्रभु दे अधिकारे ने ओंदा है, तालू दीकर तुसां मिजो फिरी कदी नी दिखणा है।”

24 जालू यीशु मंदरे ला निकली करी जा दा था, तां उदे चेले उसयो मंदरे दी बनाबजा जो दसणे ताईं उदे बाल आये। 2 उनी उना जो बोलया, “क्या

तुसां ऐ सारा कुछ दिखा दे न। मैं तुसां ने सच्च बोलदा है, ऐथू इक भी पथरे पर पथर नी रेणा है, जडा ढाया नी जाणा है।” 3 जालू सै जैतून स्यां दे पाहडे पर बैठया था, तां चेलयां उदे बाल आई करी उसला पुछया, “सांझो दस ऐ सब कुछ कालू होणा है? कने जालू ऐ सब कुछ पूरा होणेबाला होणा तां उदा क्या निशाण होणा है?” (aiōn g165) 4 यीशुऐ उना जो जबाब दिता, “ध्यान रखयो कि तुहांजो कोई भटकाई न दे।” 5 क्योंकि मते सारे लोकां भरे नाए ने दाबा करिके ओणा है। उना बोलणा है, मैं मर्सीहा हूँ कने उना मतयां लोकां जो भटकाणा है। 6 जालू तुसां लडाईयां, कने लडाईयां दियां गल्लां सुणगे तां उरदे मत; क्योंकि इना दा होणा जरूरी है, पर तालू संसारे दा खाल्मा नी होणा है। 7 क्योंकि जातियां ने जातियां कने राज्य ने राज्यां ने इक दुजे ने लडाईयां करणियां न। कने हर कुथी हिलण होणे न कने अकाल पोणे न। 8 ऐ तकलीफ कने दुख इयां होणा जियां इक माँ जो बच्चे दे जन्म देणे दिया शुरूआत च होंदा है। 9 “तालू सै लोक जडे तुहाडे खिलाफ न, उना तुहांजो दुख देणे ताईं पकडाई देणा है, कने तुहांजो मारी देणा है, कने सारियां जातियां दे लोकां तुसां ने दुशमणी रखणी है क्योंकि तुसां मिजो पर भरोसा रखदे न।” 10 तालू मतयां मिजो पर भरोसा करणा बंद करी देणा, कने इक दुज्जे जो पकडाणा कने इक दुजे ने दुशमणी रखणी। 11 मतयां परमेश्वरे दे संदेश देणेबालयां झूठे लोकां ओणा है, कने उना मतयां जो भटकाणा। 12 पाप बदणे दिया बजा ने मतयां इक दुज्जे ला प्यार करणा बंद करी देणा है। 13 पर जडा जिंदगी दे अंत दीकर मिजो पर भरोसा रखणा सै ही बचया जाणा है। 14 कने स्वर्ण दे राज्य दा ऐ शुभसमाचार दा प्रचार सारे संसारे च करणा है, ताकि सारे देशां दियां सारियां जातियां जो इसयो मनाणे दा मोका मिल्ले, तालू अंत होई जाणा है। 15 “इस ताईं जालू तुसां इक उजाडने बाली बडी बुरी चिजा जो यश्शलेम मंदिर च खडोतयो दिखणे, जिदी चर्चा परमेश्वरे दा संदेश देणेबाले दानियेले किती थी, (जडे पढन, सै समझन!)” 16 तालू यहूदिया प्रदेशे दे लोकां जो जान बचाणे ताईं पहाडा जो नसणा पोणा। 17 जडे छती पर होणे, सै अपने घरे चे समान लेणे ताईं धले मत उतरदे। 18 कने जडे खेतारां च होणे, सै अपने कपडे लेंगे ताईं बापस मत जांदे। 19 उना रोजां च उना जनानिया ताईं बडा बुरा बकत होणा जडियां लैरथियां होणियां न, कने उना जनानियां ताईं जडियां नियाणे जो दूध पियादियां होंगियां। 20 इस ताईं प्राथना करा कि ऐ बुरा बकत सदियां दे दिना च या सक्ते दे दिना ना हो, जालू सफर करणा मुशकिल हो। 21 क्योंकि उना दिना लोकां जो बडे दुख होणे न, जदिया संसार दे शुरू ला हणे दीकर कदी नी होया कने ना कदी होणा। 22 “अगर परमेश्वरे उसी बुरे बकते जो नी घटांदा, तां कोई भी माणु नी बचदा। पर उना चुणयो होए लोकां दिया बजा ला, जिना जो परमेश्वरे चुणया है, बकत घटना है।” 23 “उस बेले तुसां जो कोई बोले, कि दिखा, मर्सीह ऐथू है। या ओथु है। तां भरोसा मत करदे।” 24 क्योंकि झूठे मर्सीह कने परमेश्वरे दा संदेश देणेबाले झूठे लोकां मतयां ओणा है, कने उना बडे चमत्कार कने अनोखे कम्म दसणे न, ताकि होई सके तां जडे चुणयो न उना जो भटकाई देंन। 25 मैं पहले ला ही तुसां ने ऐ सब कुछ बोली दिता है। 26 इस ताईं अगर सै तुसां ने बोलन, कि दिखा, सै सुनसान जगा च है, तां बाहर मत निकलदे; दिखा, सै कोठडियां च है, तां भरोसा मत करदे। 27 क्योंकि जियां बिजली पूर्व ला निकली करी पश्चिम दीकर चमकदी जांदी है, तियां ही माणुऐ दे पुत्रे भी ओणा है। 28 “जिथू लाश होऐ, ओथु ही इल्लां गिठियां होणा है।” 29 “उना दिना च, बुरा कने दुखे बाल बकत मुकी जाणे दे बाद, सूजे च अधेरा होई जाणा, कने चद्रमं रैशनी नी देणी। अम्बरे ला तारयां पेई जाणा, कने अम्बरे दियां शक्तियां हिलाईयां जाणियां।” 30 “तालू मैं, माणुऐ दे पुत्रे दा निशाण अम्बरे च मिलणा, तालू धरतिया दे सारे कुलां दे लोकां छाती पिटणी, कने माणुऐ दे पुत्रे जो बडे सामर्थ्य कने महिमा सोगी बदलां पर ओंदे दिखणा।” 31 “उनी तरही दी जोरे दिया अबाजा ने अपने स्वर्गदूतां जो भेजणा है, ताकि सै उना सारे लोकां जो गटेरी करी, जिना जो मैं चुणयां है कने उना संसारे दे चारों पासयां ला लोकां जो गटेणा है।” 32 “अजरी दे सखे दिया कहाणिया ला ऐ सिखा: जालू उदिया डालियां नरम होई जादियां न कने पते निकलना लगदे न, तां तुहांजो पता लगी जांदा है कि गर्मियां ओणे बालियां न। 33 इयां ही जालू तुसां इना सारियां गल्लां जो होंदे दिखदे न, तां समझी जा कि मैं, माणुऐ दे पुत्रे दा ओणा नेडे ही है, मतलब कि दरबाजे पर ही है।” 34 मैं तुसां ने सच्च बोलदा है, कि जालू दीकर ऐ सारियां गल्लां पुरियां नी होई जादियां न, तालू दीकर इसा पीडिया दा अंत नी होणा है। 35 अम्बर कने धरती खत्म होई जाणे, पर मेरियां बोलियां गल्लां कदी

नी टलनिया न, से हमेशा रेंगियां न। 36 ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मै माणुऐ दा पुत्र, पर सिर्फ पिता ही उसी रोजे कने घडिया जो जाणदा है। 37 “जियां नूह दे रोज थे, तियां ही माणुऐ दे पुत्रे दा ओण भी होणा है।” 38 क्योकि जियां जल-प्रलय ला पेहले दे दिना च, जिस रोजे दीकर नूह जहाजे पर नी चढया था, तालू दीकर लोक खांदे पिंदे थे, कने उना चे बियाह होंदे थे। 39 कने जालू दीकर जल-प्रलय आई करी उना जो स्टाई नी लेई गेई, तालू दीकर उना जो कुछ भी पता नी था, तियां ही मै माणुऐ दे पुत्रे भी ओणा है। 40 उस बेले दो जणे खेते च होणे न, इक लेई लेंणा है कने दूजा छडी जाणा है। 41 दो जनानिया चक्की पिसा दियां होणिया, इक लेई जाणी, कने दूई छडी देंणी है। 42 “इस तांई जागदे रिया, क्योकि तुहांजो नी पता है कि तुहाडे प्रभुये कसे रोजे ओणा है।” 43 पर ऐ जाणी लिया कि अगर घरे दे मालिके जो पता होंदा कि चोरे कालू ओणा है, तां से जागदा रेंदा, कने अपने घरे चोरी नी होणा दिन्दा। 44 इस तांई तुसां भी तैयार रिया, क्योकि जिसा घडिया दे बारे च सोचदे भी नी न, उसा घडिया माणुऐ दे पुत्रे आई जाणा है। 45 से भरोसे जोगा कने अकला बाला नोकर कुण है, जिसयो मालिके अपने नोकरां चाकरां दा सरदार बणाया है, ताकि बकते पर उना जो खाणा खाणे दे? 46 धन्य है सै दास, जिसयो उदा मालिक आई करी उसयो ऐदिया करदा दिखे। 47 मै तुसां ने सच्च बोलदा है; सै उसयो अपणिया सारिया संपतिया दा अधिकारी बणाणा है। 48 “पर अगर सै बुरा नोकर सोचना लग्गे, कि मेरे मालिके जो ओणे जो देर है।” 49 कने अपने सोगी नोकरां जो कूटणा लग्गे, कने शराबियां सोगी खा पिऐ। 50 तां उस नोकरे दे मालिके ऐसे रोजे बापस ओणा है, जिस रोजे सै उदी राह नी दिखा दा हो, कने ऐसी घडी कि उसयो पता ना हो, 51 कने उसयो सकत सजा देईकरी, उदा हिस्सा कपटियां सोगी जोडे, तालू उनी रेंणा कने दंद पिणे।

25 फिरी यीशुऐ अपने चेलयां ने बोलया, जालू मै, माणुऐ दे पुत्रे बापस ओणा है, तालू स्वर्ग दा राज्य ऐसा होणा है: दसा कुआरियां अपणिया मशालां लेईकरी लाडे जो मिलने तांई उदे बियाये जो जाणा। 2 उना चे पंज जणियां मुख कने पंज समझदार थियां। 3 उना मुख कुआरियां अपणिया मशालां तां लियां, पर अपने सोगी जादा तेल नी लांदा। 4 पर समझदार कुआरियां अपणियां मशालां सोगी अपणिया-अपणिया कुपियां च तेल भी भरी लांदा। 5 जालू लाडे जो ओणे च देर होई, तां से बोर होणा लगियां, कने सै सोई गियां। 6 पर अधिया राती रोल्ला पिया, कि दिखा, लाडा ओआ दा है, उसला मिलणे तांई चला। 7 तालू सै सारियां कुंवारियां उठी करी अपणिया-अपणिया मशालां ठीक करणा लगियां। 8 कने मुखी समझदारां ने बोलया, अपने तले च थोडा सांझो भी दिया, क्योकि साडियां मशालां बुझी जा दियां न। 9 पर समझदारां जबाब दिता, कि ऐ साडे कने तुहाडे तांई कदी पूरा नी होणा; ठीक तां ऐ है, कि तुसां बेचणे बाले बाल जाई करी अपने तांई खरदी लिया। 10 जालू सै खरीदणा जा दियां थियां, तां लाडा आई रिया, कने जडियां तैयार थियां, सै उदे सोगी बियाह बाले घरे जो चली गियां कने घरे दा दरबाजा बंद करी दिता। 11 “इंदे बाद सै दुईयां कुआरियां भी वापिस आई करी रोंदे होऐ लाडे जो सदणा लगियां, है स्वामी, है स्वामी, साडे तांई दरबाजा खोली दिया।” 12 “उनी जबाब दिता, कि मै तुसां ने सच्च बोलदा है कि, मै तुहांजो नी जाणदा है।” 13 “इस तांई जागदे रिया, क्योकि तुसां नी जाणदे मेरे बापस ओणा दा रोज, कने सेह बकत कालू ओणा है।” 14 “फिर यीशु ने इक होर कहाणी दर्सी कि मै जालू बापस ओणा है, तालू स्वर्ग दा राज्य ऐसा होणा: इक माणु था जिनी परदेस जांदे बेले अपने नोकरां जो सदीकरी अपनी सारी अर्पना जयादात उना जो देई दिती।” 15 उनी इकी जो पंज तोडे, दुज्जे जो दो, कने तरिये जो इक, हर इकी जो उदिया शक्तिया दे अनुसार दिता, कने फिरी परदेस चली गिया। 16 तालू जिसयो पंज तोडे मिलयो थे, उनी झट जाई करी उना ने लैन-दैन किता, कने पंज तोडे होर कमाई ले। 17 इसी तरीके ने जिसयो दो मिलयो थे, उनी भी दो होर कमाई ले। 18 पर जिसयो इक ही तोडा मिलया था, उनी जाई करी मिटी खणी, कने अपने मालिके दे पेसे लुकाई दिते। 19 मते रोजां बाद मालिके आई करी उना नोकरां जो गिठे सदया कि उना उदरे पैसायां ने क्या किता। 20 जिसयो पंज तोडे मिलयो थे, उनी पंज तोडे होर आंणी करी बोलया, है मालिक, तू मिजो पंज तोडे दिते थे, दिख मै पंज तोडे होर कमायो न। 21 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोडे पैसायां जो सम्भालने कने भरोसे

दे लाइक रिया है; मै तिजो होर मतियां चिजा दा अधिकारी बणाणा है। अपने मालिके सोगी खुश हो। 22 कने जिसयो दो तोडे मिलयो थे, उनी भी आई करी बोलया, है मालिक तू मिजो दो तोडे दिते थे, दिख, मै दो तोडे होर कमायो न। 23 उदे मालिके उसयो बोलया, धन्य, तू खरा कने भरोसे दे लाइक नोकर है, तू थोडे पैसायां जो सम्भालने कने भरोसे दे लाइक रिया, मै तिजो मतियां चिजा दा अधिकारी बणांगा। अपने मालिके सोगी खुश हो। 24 तालू जिसयो इक तोडा मिलया था, उनी आई करी बोलया, है मालिक, मै तिजो जाणदा था कि तू बडा सकत माणु है: तू दुजे लोका दे कम्मे ला फायदा कमाणे दी आस रखदा है, कने जियू तू नी खलारदा है ओथू तू बटोलदा है। 25 तांई तां मै डरी गिया कि अगर मै तेरा पैसा गवाई दिता तां तू मिजो सजा देणी, इस तांई जाई करी मै तेरा तोडा मिटिया च लुकाई दिता; दिख, जडा तेरा है, से ऐ है। 26 उदे मालिके उसयो जबाब दिता, हे दुज्जे कने आल्सी नोकर; तिजो पता था कि, मै दुजे लोका दे कम्मे ला फायदा कमाणे दी आस रखदा है। 27 तां तिजो ऐसा करणा चाईदा था कि, मेरा पैसा सर्राफों जो देई दिन्दा, फिरी मै आई करी अपना पैसा उना ला ब्याजे समेत लेई लेंदा। 28 तालू मालिके बाकी नोकरां जो बोलया, “तोडे जो इसला लेई लिया, कने जिदे बाल दस तोडे न, उसयो देई दिया। 29 जिना बाल समझणे दी इच्छा है जडा परमेस्वर सिखांदा है, उसयो परमेस्वरे होर समझ देणी, पर जडा समझणे दी इच्छा नी रखदा, कि मै क्या सिखांदां, तां से जडा समझया है, परमेस्वरे सै भी उसला लेई लेणा।” 30 कने इस नकमे नोकरे जो मेरे च पाई दिया, जियू उनी रेंणा कने दंद पिणे। 31 “जालू मै, माणुऐ दे पुत्रे अपणिया महिमा च ओणा है, कने स्वर्गदूते उदे सोगी ओणा, तालू लोकां दा न्याय करणे तांई उनी अपने महिमा दे सिहांसने पर विराजमान होणा।” 32 कने सारियां जातियां मेरे सामणे गिठियां करणियां न; जियां पुहाल भेडां जो बकरियां ला लग करी दिन्दा है, तियां ही उनी भी उना जो इक दुजे ला लग करणा है। 33 कने मै धर्मी लोका जो अपने सजे पासे कने अर्धमियां लोका जो खबे पासे खेडना है। 34 “तालू मै राजे अपने सजे पासे बोणे बालयां ने बोलणा कि, हे मेरे पिता दे धन्य लोको, ओआ, कने उस राज्य दे अधिकारी बणी जा, जडा संसारे दे शुरू होणे ला तुहाडे तांई तैयार कितया है।” 35 क्योकि मै जालू भूखा था, तां तुसां मिजो खाणे जो खाणा दिता, जालू मै प्यासा था, तां तुसां मिजो पाणी पियाया, मै इक परदेसी था, तुसां मिजो अपने घरे रियाया। 36 जालू मै नंगा था, तुसां मिजो कपडे दिते, मै बिमार था, तुसां मेरा हाल चाल पुछया, मै जेला च था, तां तुसां मिजो ने मिलणा आये। 37 “तालू धर्मियां उसयो जबाब देणा, कि प्रभु जी, असां कालू तिजो भूखा दिखया कने खुआया? या प्यासा दिखया, कने पांणी पियाया?” 38 असां कालू तिजो परदेसी दिखया कने अपने घरे रियाया या नंगा दिखया, कने कपडे दिते? 39 असां तिजो कालू बिमार कने जेला च दिखया, कने तिजो ने मिलणा आये? 40 “तालू मै राजे उना जो जबाब देणा, मै तुसां ने सच्च बोलदा है, कि जडा तुसां मेरे इना छोटे ला छोटे चले के कुसी इकी दे सोगी कितया है, सै ही मेरे सोगी कितया है।” 41 “तालू उनी खबे पासे बालयां ने बोलणा है, हे श्रापित लोको मेरे सामणे ला इसा कदी नी बुझणे बालिया अर्पणी च चली जा, जडी जैताने कने उदे दूतां तांई परमेस्वरे तैयार कितया है।” (aiōnios g166) 42 क्योकि मै भूखा था, तुसां मिजो खाणे जो नी दिता, मै प्यासा था, कने तुसां मिजो पाणी नी पियाया; 43 मै परदेसी था, कने तुसां मिजो अपने घरे नी रियाया; मै नंगा था, कने तुसां मिजो कपडे नी दिते; कने मै बिमार कने जेला च था, तां तुसां मेरा हाल चाल नी पुछया। 44 “तालू उना जबाब देणा, कि प्रभु जी, असां तिजो कालू भूखा, या प्यासा, या परदेसी, या नंगा, या बिमार, या जेला च दिखया, कने तेरी सेवा या टहल नी किती?” 45 “तालू मै उना जो जबाब देणा, मै तुसां ने सच्च बोलदा है कि तुसां जडा इना छोटे ला छोटे चले के कुसी इकी दे सोगी नी कितया है, से मेरे सोगी भी नी किता है।” 46 कने सै जडे खबे पासे न इना जो हमेशा दी सजा मिलणी है पर धर्मी लोका हमेशा दिया जिन्दगिया च प्रवेश करणा है। (aiōnios g166)

26 जालू यीशु ऐ सारियां गल्लां बोली बैठा, तां अपने चेलयां ने बोलणा लग्गा। 2 “तुहांजो पता है, कि दो दिना बाद फसह दा त्योहार होणेबाला है, कने माणुऐ दा पुत्र सूली पर चढाणे तांई पकडया जाणा है।” 3 तालू बड़े याजक कने प्रजा दे यहूदी अणुवे कैफा नापे दे महायाजक दे अंगणे च गिठे होए, 4 कने अणु चे बिचार करणा लग्गे कि यीशुऐ जो धोखे ने पकडी करी मारी दें। 5

पर सै बोलदे थे, कि त्योहारे दे बकत नी, कुथी इयां ना होए कि लोकां च रोल्ला पेई जा। 6 जालू सै बैनिग्याह ग्रां च शमोन कोडी दे परे था, किसयो यीशुए ठीक कितया था। 7 जालू यीशु खाणा खाणे तांई बैठया था तां इक जनानी संगमरमेरे दे भांडे च बडा मेंगा इन्न लेईकरी उदे बाल आई कने, तां उना सै इन्न उदे सिरे पर नियोरी दिता। 8 ऐ दिखीकरी उदे चले हेरान होए कने बोलणा लगे, “इस इतणे मेणे इन्ने जो सत्यानाश नी करणा चाईदा? 9 इसयो तां खरे दामे च बेची करी कंगालां जो बंडी सकदे थे।” 10 ऐ जाणी करी यीशुए उना ने बोलया, जानानिया जो कजो तंग करा दे न? उना मिंजो ने खरा किता है। 11 कंगालां तां तुहाडे सोगी हमेशा रणा है, पर मैं तुहाडे सोगी हमेशा नी रणा है। 12 इना जडा इन्न मेरे शरिर पर नियोरया है, सै इना मिंजो मरणे ला पहले ही दफनणे दी तैयारी किती है। 13 “मैं तुसां ने सच्च बोलदा है, कि सारे संसार च जिथू कुथु भी ऐ शुभसमाचार सुणया जांगा, ओथु इसा दे इस कम्मे दी चर्चा भी इसा दिया याद च होणी।” 14 यहदा इस्कुरियोती, जडा बाहरां चेलयां च इक था, उनी बड़े याजकां बाल जाई करी बोलया, 15 अगर मैं उसयो तुहाडे हथे पकडाई दे, “तां मिंजो क्या दिगे? उना उसयो ती चांदिये दे सिक्के तोली करी देई दिते।” 16 कने सै तालू ला ही उसयो पकडने दा मोका तोपणा लगी पिया। 17 अखमीरी रोटिया दे त्योहारे दे पहले रोजे, चेले यीशुए बाल जाई करी पछणा लगे, “तू कुथु फसह खाणा चांदा है, ओथु असां जाई करी तैरे तांई फसह खाणे दी तैयारी करन?” 18 उनी बोलया, “शेहे च बाक कने अमुक नाए दे माणुए बाल जाई करी बोलो, कि गुरू बोला दा है, कि मेरा बजक नेडे है, कने मैं अहणे चेलयां सोगी तैरे ऐथु फसह दा त्योहारे मनाणा है।” 19 चेलयां यीशुए दा हुकम मनया, कने फसह तैयार किता। 20 जालू संज होई तां सै चेलयां सोगी खाणा खाणे तांई बैठा। 21 कने जालू सै रोटी खाणा बैठयो थे, तां यीशुए बोलया, “मैं तुसां ने सच्च बोला दा है, कि तुसां च इकी जणे मिंजो पकडणा है।” 22 इसा गल्ला पर सै बडे उदास होई गे, कने सारे उसयो पछणा लगे, “हे गुरू, क्या सै मैं है?” 23 उनी जबाब दिता, “जिनी मिंजो सोगी थालिया च हथ पाया है, उनी ही मिंजो पकडणा है।” 24 “माणुए दे पुत्रे मरी जाणा है, क्योकि ऐ सब कुछ पबित्र शाखां च लिखया है, पर उस माणुए जो बडी बुरी सजा होणी है जडा मिंजो धोखा दिन्दा है जिनी मिंजो पकडवाणे च सहायता करती है। अगर उस माणुए दा जन्म ही नी होया होंदा तां ही उदे तांई खरा होंदा।” 25 तालू उसयो पकडणे बाले यहदे बोलया, “गुरू जी, क्या सै मैं है?” उनी उसयो बोलया, “तू बोली बैठा।” 26 जालू सै खा दे थे तां यीशुए रोटी लेई, कने परमेश्वरे दा धन्यवाद करी के तोडी, कने चेलयां जो दिती कने बोलया, “लिया, खाई लिया; ऐ मेरा शरीर है।” 27 फिरी उनी दाखरस दे कटोरे जो चुकी करी परमेश्वरे दा धन्यवाद किता, कने चेलयां जो दिता कने बोलया, “तुसां सारे इस कटोरे चे पिया, 28 क्योकि ऐ बाचा दा मेरा सै खन है, जडा मतयां लोकां दिया भलाईया तांई बहाया जाणा है।” 29 “मैं तुहांजो ने सच्च बोलदा है, मैं दाखा दा ऐ रस उस दिने दीकर नी पीणा, जालू दीकर पिता दे राज्य च नोआ दाखरस नी पी लेगा।” 30 फिरी यीशुए कने उदे चेलयां फसह दे त्योहारे दे भजन गाई करी यस्शलेम शहरे दे बाहर जैतन सखां दे पाहडे पर चली गे। 31 तालू यीशुए उना ने बोलया, “तुसां सारयां ही अज राती अपने भरोसे ला भटकी जाणा है; क्योकि पबित्र शाख च लिखया है कि मैं पुहाल मारी देणा है; कने झूडे दियां भेडां तितर-बितर होई जाणा।” 32 पर मैं मरी के जिन्दा होणे ला बाद तुहांजो ला पहले गलील प्रदेश च पूजणा है। 33 पर पतरसे यीशुए जो बोलया, “चाहे सारे छडी करी नसी जागे पर मैं नी नरगा।” 34 यीशुए उसयो बोलया, “मैं तिजो ने सच्च बोलदा है, कि अज ही इसा राती मुर्गो जो दो बार बांग देणे ला पहले तू मिंजो तीन बरी बोलणा है, कि मिंजो नी जाणदा है।” 35 पतरसे यीशुए ने बोलया, अगर मिंजो तैरे सोगी मरणा भी पौगा, तमी मैं तिजो ला कदी नी मना करगा। कने इयां ही सारयां चेलयां भी बोलया। 36 तालू यीशुए अपने चेलयां सोगी गैसमीनी नाए दिया इक जगा च आया कने अपने चेलयां ने बोलणा लग्या, “ऐथु बई रिया, जालू दीकर मैं प्राथना करे।” 37 सै पतरस कने जब्दी दे दोनो पुत्रां जो सोगी लेई गिया, कने उदास कने रोणा लग्या। 38 तालू उनी उना जो बोलया, “मेरा मन बडा उदास है, ऐथु दीकर कि मेरे प्राण निकली चलयो न। तुसां ऐथु ही स्का, कने मेरे सोगी जागदे रिया।” 39 फिरी यीशु थोडा अगे गिया, कने गोडे भार पेई गया कने मुह धरतिया पर करी प्राथना करणा लग्या, “हे मेरे पिता, अगर होई सके तां ऐ कटोरा मिंजो ला टली जाए, तमि जियां मैं चांदा है तियां नी हो, पर जियां तू चांदा है, तियां ही हो।” 40

फिरि जालू यीशु बापस आया कने उना चेलयां जो सुतया दिखीकरी उनी पतरसे जो बोलया, “हे शमोन, तू सुतया है? तुसां इक घंटा भी मेरे सोगी जाणदे नी देई सके? 41 जागदे कने प्राथना करदे रिया ताकि मिंजो पर भरोसा रखणा नी छडन। आत्मा तां खरा करणा चांहीदी है पर शरिर च जोरे दी कमी है।” 42 फिरी उनी दुजी बरी जाई करी ऐ प्राथना किती कि, “हे मेरे पिता, अगर ऐ मेरे पित्यो बिना नी हटी सकदा है, तां तैरी इच्छा पूरी होए।” 43 तालू उनी आई करी उना जो फिरी सुतया दिखया, क्योकि उना दियां हखी मिंद्रा ने भरुइयां थियां। 44 उना जो छडी करी सै फिरी चली गिया, कने सेई गल्ल देवारा बोली करी, तिजी बरी प्राथना किती। 45 तालू उनी चेलयां बाल आई करी उना जो बोलया, हुण सोंदे रिया कने अगर काम दिख, सै घडी आई गेई है, कने माणुए दा पुत्र पापियां दे हथे पकडया जाणा है। 46 “उठा कने चला। दिखा, जिनी माणुए मिंजो पकडवाणा है सै बखे आई रिया है।” 47 जालू यीशुए ऐ बोला दा ही था, यहदा जडा बाहरां चेलयां च इक था, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड़े याजकां, यहदी व्यवस्था दे गुरूआं कने यहदी अगुवां भेजयो थे। 48 उनी यीशुए जो पकडणने बालयां जो ऐ बोलया था कि: “जिदी मैं चूर्मी लेगा, सै ही यीशु है, उसयो तुसां पकडी लेनयो।” 49 उनी झट यीशुए बाल आई करी बोलया, “गुरू जी, नमस्ते!” कने उदी चूर्मी लेई। 50 यीशुए उसयो बोलया, “हे मित्र, जिनी कम्मो तांई तू आया है, उसयो करी ले।” तालू उना बखे आई करी यीशुए जो पकडी लिया। 51 यीशुए दे साथियां चे इकी अणुणी तलवार कडी कने महायाजके दे इकी नोकरे पर चलाई करी उदा कन बडी दिता। 52 तालू यीशुए उसला बोलया, अपणिया तलवारा मयाना च रख क्योकि जडे तलवारां चलादें न सै तलवारा ने ही खत्म करणे न। 53 तिजो क्या पता नी है कि मैं अपने पिता ने विनती करी सकदा है, कने उनी स्वर्गादूते दियां बाहरां पलटना ला भी जादा स्वर्गादूत मेरे बाल हुण हाजिर करी देणे? 54 “पर पबित्र शाखां दियां सै गल्लां कि इयां ही होणा जरूरी है कियां पुरियां होणियां?” 55 यीशुए उना जो बोलया, तुसां क्या तलवारां कने डांगा लेईकरी मिंजो डाकुआं सांई पकडना आयो न? पर मैं जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकडया। 56 “पर ऐ इस तांई होया कि पबित्र शाखां दियां गल्लां पुरियां होन।” जालू ऐ होया तां उदे सारे चेले उसयो छडी करी नसी गे। 57 तालू यीशुए जो पकडने बाले उसयो कैफा नाए दे महायाजक बाल लेई आए, जिथु यहदी व्यवस्था जो सिखाणे कने यहदी अगुवे गिठे होयो थे। 58 कने पतरस दूरे-दूरे ला उना दे पिच्छे-पिच्छे महायाजक दे अंगणे दीकर गिया, कने अंत दिखणे तांई अंदर जाई करी पयादयां बखे बेई गिया। 59 बड़े याजक कने यहदी महासभा दे सदस्य यीशुए जो मारी देणे तांई उदे खिलाफ च गबाई तोपा दे थे, 60 पर मते झूठे गबाह ओणे पर उना जो कोई गबाई नी मिली आखरी च दो जणे आए, 61 कने बोलया, “कि इनी बोलया था कि मैं परमेश्वरे दे मंदरे जो ढाई सकदा है, कने फिरी उसयो तिन्ना रोजां च बणाई सकदा है।” 62 तालू महायाजके बिच खडोई करी यीशुए जो बोलया, “तू क्या कोई जबाब नी देणा? ऐ लोक तैरे खिलाफ क्या गबाई देद न?” 63 पर यीशु चुप ही रिया। तालू महायाजके उसयो बोलया “मैं तिजो जिंदे परमेश्वरे दी कसम दिन्दा है, कि अगर तू परमेश्वरे दा पुत्र मसीह है, तां सांझो ने बोली दे।” 64 यीशुए उसयो बोलया, “उनी अपु मुन्नी लिया; कने मैं, माणुए दा पुत्र तुसां ने ऐ भी बोलदा है, कि हुण तुसां माणुए दे पुत्रे जो सर्वशक्तिमान दे सजे पासे बैठया, कने अम्बरे दे बदला पर ओदे दिखणा है।” 65 जालू महायाजके यीशुए जो ऐ बोलदे सुणया तां उनी गुरसे च अपने कपडे फाडी दिते, कने बोलया, “हुण सांझो कुसी गबाह दी जरूरत नी है। तुसां परमेश्वर दी निंदा करदे सुणया, तुहाडी क्या सलाह है इसा गल्ला पर?” उना सारायां फेसला किता कि यीशुए परमेश्वरे दी निंदा किती है। 66 तुसां क्या सोचदे न? उना जबाब दिता, ऐ तां मारी दैणे जोगा है। 67 तालू उना उदे मुए पर थूक्या कने उसयो मुक्के मारे, कने बाकियां थप्पड मारी करी बोलया, 68 है मसीह, अगर तू परमेश्वरे दा संदेश देणेबाला है! तां सांझो दस कुनी तिजो मारया, 69 पतरस बाहर अंगणे च बैठया था तां इकी दासिया उदे बाल आई करी बोलया, “तू भी तां यीशु गलीली सोगी था।” 70 उनी सारयां दे सामणे ऐ बोली करी मना किता कि, “मैं नी जाणदा कि तू क्या बोला दी है।” 71 जालू सै बाहर डेखतिया पर गिया, तां दुईया नोकराणिया उसयो दिखीकरी उना ने बोलया जडे ओथु बैठयो थे कि, “ऐ भी तां यीशु नासरिये सोगी था।” 72 उनी कसम खाई करी फिरी मना किता, “मैं

इस माण्डे जो नी जाणदा है।” 73 थोडिया देरा बाद जडे लोक ओथु खुदतयो थे, उना पतरसे बाल आई करी उसयो बोलया, “सचचू तू भी इना चे इक है; क्योकि तेरी बोली तेरा सचच दसा दी है।” 74 पतरस अपु जो कोसणा लग्गा, कसम खाणा लग्गा, मैं इस माण्डे जो नी जाणदा। कने झट मुर्गे बांग देई दिती। 75 तालू पतरसे जो यीशेरे दियां बोलियां गल्लां याद आइयां, मुर्गे दिया बांगा देणे ला पेहेले तू मिंजो तिन्ना बरी मना करणा है। कने सै बाहर जाई करी जारे-जारे ने रोणा लग्गा।

27 कने ब्यागा तडके होंदे ही झट उना बड़े याजकां, कने यहदी अगुवां, कने व्यवस्था जो सिखाणे बालयां कने महासाभा दे सारे लोकां यीशेरे जो मारी देणे दी सलाह किति। 2 कने उना यीशेरे जो बनन्या, कने न्याय करणे तांई यहदिया प्रदेश दे राज्यपाल पिलातुस दे हबाले करी दिता। 3 जालू यीशेरे जो पकडणे बाले यहदा जो पता चला कि सै मरवाणे तांई दोषी ठेहराया गया है तां सै बडा पछताया कने उना ती चांदिये दे सिक्कयां जो बड़े याजकां कने यहदी अगुवां जो बापस देई आया। 4 कने बोलया, मैं बैकेसूर जो मारणे तांई पकडणे दा पाप किता है, उना बोलया, “सांझो क्या है? इस तांई तू ही जिम्मेवार है।” 5 तालू सै उना सिक्कां जो मंदरे दे अंगणे च फेंकी करी बाहर चली गिया, कने जाई करी उनी अपु फा लेई लिया। 6 बड़े याजकां उना सिक्कां जो लेईकरी बोलया, “साडे नियम दे हिसाबे ने इना पैसया जो मंदिर दे भंडारे च रखणा ठीकरणा है, क्योकि ऐ इक माण्डे जो मरवाणे तांई दितया दाम है।” 7 उना सलाह करिके उना सिक्कां ने परदेशियां जो दबाणे तांई कुम्हारे ला खेतर खरीदी लिया। 8 इसा बजा ने उस खेतरे जो अजे दीकर खूने दा खेतर बोलते न। 9 तालू जडा बचन यिर्मयाह परमेख्वरे दा संदेश देणेबाले बोलया था सै पूरा होया: “उना सै ती सिक्के जडे इस्राएल दे लोकां यहदा जो दितयो थे लेई ले। 10 कने जियां प्रभुऐ मिंजो हुकम दितया था थियां ही उना जो कुम्हारे दे खेतरे दे दामे च देई दिता।” 11 जालू यीशु राज्यपाले दे सामणे खडोतया था, तां हाकिमे उसयो पुछया, तू क्या यहदियां दा राजा है? यीशेरे उसयो बोलया, “तू अपु ही बोला दा है।” 12 जालू बड़े याजक कने यहदी अगुवे अपु पर दोष ला दे थे, तां उनी कोई जबाब नी दिता। 13 इस पर पिलातुसे उसयो बोलया, “तू क्या सुणा दा नी है कि, ऐ तेरे खिलाफ च कितारियां गवाईयां देद न?” 14 पर उनी उसयो इकी भी गल्ला दा जबाब नी दिता, ऐथु दीकर कि राज्यपाल जो बडी हेरानी होई। 15 हर साले फसह दे त्योहारे च, राज्यपाल पिलातुस इक केदिये जो छडी दिन्दा था, जिसयो लोक चांदे थे कि सै छूटे। 16 उस बेले बरअब्बा नापे दा इक मनया नामी कैदी था। 17 जालू सै पिटे होए तां पिलातुसे उना जो बोलया, “तुसां कुस्यो छुडणा चांदे न, ताकि मैं तुहाडे तांई उसयो छडी दें? बरअब्बे जो या यीशेरे जो जिसयो मसीह बोलते न?” 18 क्योकि सै जाणदा था कि उना उसयो जलनिया ने पकडाया है। 19 जालू सै न्याय दिया कुसिया पर बैठया था तां उदिया घरे बालिया उसयो कोळी भेजया था कि, “तू उस धर्मिये दे मामले च हथ मत पांदा; क्योकि मिंजो अज राती सुपने च उदिया बजा ने बडा दुख होया है।” 20 पर बड़े याजकां लोकां दिया भिडा जो भडकाया, कि पिलातुस ला यीशेरे जो छडणे दी बजाये बरअब्बा जो छडणे दी मांग करा, कने यीशेरे जो मारणे तांई बोला। 21 राज्यपाले उना ला पुछया, इना दोना चे कुस्यो चांदे न, ताकि मैं तुहाडे तांई छडी दें? उना बोलया, “बरअब्बा” जो। 22 पिलातुसे उना ला पुछया, फिरी यीशेरे दा क्या करणा, जिसयो मसीह बोलते न? “सबना बोलया, इसयो सूली पर चढाई दिया।” 23 पिलातुसे उना जो बोलया, “कजो इनी क्या बुरा कितया है?” पर भीड होर भी जारे ने चिलाणा लमी कि, “इसयो सूली पर चढाई करी मारी दिया।” 24 जालू पिलातुसे दिखया, कि कुछ नी बणा दा है कने उट्टा होर जादा रोलेला होदा जादा है, तां उनी पाणी लेईकरी भिडा दे सामणे अपने हथ धोते कने बोलया, “मैं इस धर्मिये दे खने ला निर्दोष है; हण तुसां ही जाणा।” 25 सबना लोकां जबाब दिता, “इदे खूने दा इल्जाम सांझो पर कने साडिया ओलादी पर होऐ।” 26 बरअब्बा जो उना तांई छडी दिता, कने यीशेरे जो कोडे लगाई करी सूली पर चढाणे तांई रोमी सिपाइयां दे हबाले देई दिता। 27 तालू राज्यपाले दे सिपाइयां यीशेरे जो किले च लेईजाई करी उदे चोरो पासे सारी पलटन खरेडी दिती। 28 उदे सारे कपडे उतारी करी उसयो बैगणी रंगे दे कपडे पेहनाइ दिते, 29 कने कंडयां दा मुकुट बनाई करी उदे सिरे पर रख्या; कने उदे सजे हथे च सरकंडा दिता। कने यीशेरे दे सामणे झुकी करी उदा मजाक उडणा लग्गे कने बोलया, “हे यहदियां दे राजा नमस्ते।” 30

कने उस पर थकया कने सेई सरकंडा लेईकरी उदे सिरे च मारणा लग्गे। 31 जालू सै उदा मजाक उडाई बैठे, तां उना सै कपडे उतारी करी उदे अपने कपडे उसयो पेहनाए, फिरी उसयो सूली पर चढाणे तांई शेहरे ला बाहर लेई गे। 32 बाहर जांदे बेले उना जो शमोन नापे दा इक कुरेनी माणु मिल्ला, उना उसयो बेकार च ही पकडया ताकि सै उदिया सूलिया जो चुकी करी लेई चले। 33 कने उसयो गुल्गुता नापे दिया जगा च मतलब जिसयो खोपडी दी जगा बोलते न, ओथु पुज्जी करी, 34 उना उसयो कोडा रस मिलाई करी दाखस पीणे जो दिता, पर उनी चखी करी नी पिता। 35 तालू उना उसयो सूली पर चढाया, कने चिठियां पाई करी उदे कपडे बंडी ले। 36 कने ओथु बेईकरी उदा पेहरा देणा लग्गे। 37 कने उदा दोष उदे सिरे पर लाई दिता कि “ऐ यहदियां दा राजा यीशु है।” 38 तालू उदे सोमी दो डाकू इक सजे पासे कने इक खबे पासे सूली पर चढाए। 39 कने ओणे-जाणे बाले लोक सिरे हिलाई-हिलाई करी उदी निंदा करते थे। 40 कने बोलते थे कि, “ओ मंदरे जो दांणे बाल्या कने उसयो तिन्ना रोजां च बणाणे बाल्या, अपने आपे जो तां बचा। अगर तू परमेख्वरे दा पुत्र है, तां सूली ला उतरी आ।” 41 इसी तरीके ने ही बड़े याजक, व्यवस्था जो सिखाणे बाले कने यहदी अगुवे समेत सारे उदा मजाक उडाई करी बोला दे थे कि, 42 इनी होरना जो तां बचाया पर अपने आपे जो नी बचाई सकदा है। ऐ तां इस्राएल दा राजा है। अगर तू हण सूली ला उतरी ओए, तां असां तिजो पर भरोसा करणा। 43 इनी परमेख्वरे पर भरोसा रखया है, अगर सै इसयो चांदा है, तां हण इसयो छुडाई ले, क्योकि इनी बोलया था कि, मैं परमेख्वरे दा पुत्र है। 44 इयां ही सै डाकू भी उदी बुराई करते थे जडे उदे सोगी सूली पर चढायो थे। 45 उस रोजे दोपेरा ला लेईकरी तिजे पहर दीकर सारे देशे च नेहेरा होई गिया। 46 तिजे पहर दे बखे यीशेरे बडे जारे ने पुकारी बोलया, “एली, एली, लमा शबक्तनी?” मतलब “है मेरे परमेख्वरे, तू मिंजो कजो छडी दिता?” 47 जडे ओथु थे, उना चे कितारियां ऐ सुणीकरी बोलया, “सै तां एलियाह जो पुकारा दा है।” 48 उना चे इक बन्दा झट दोडया, कने उनी स्पंज लेईकरी सिक्के च डुबोई, कने सरकंडे पर रखीकरी उसयो चुसाया। 49 होरनी बोलया, “स्की जा, दिखदे न कि, एलियाह इसयो बचाणा ओदा है कि नी।” 50 तालू यीशेरे फिरी बडे जारे ने चिलाई करी अपने प्राण छडी दिते। 51 कने दिखा, मंदरे दा परदा उपरे ला लेईकरी थले दीकर फटी करी उदे दो टुकडे होई गे, कने धरती कमी पेई कने पथर तिडकी गे। 52 कने कबरां खुली गियां, कने मेरे हथ मते पबित्र लोकां दे शव जिन्दा होई गे, 53 कने जिन्दा होणे बाद सै कबरां ला निकली करी पबित्र शेहरां च गे, कने मत्यां जणया उना जो दिखया। 54 तालू सुबेदार कने जडे उदे सोगी यीशेरे दा पेहरा देदे थे, सै भुक्कम कने जडा कुछ ओथु होया था, उसयो दिखीकरी बड़े भरी डरी गे, कने बोलणा लग्गे, “ऐ तां सचची ही परमेख्वरे दा पुत्र था।” 55 ओथु मतियां जनानिया जडियां गलील प्रदेशे ला ही यीशेरे दी सेवा करदियां उदे सोगी आईयां थियां, सै दूरे ला ही दिखा दियां थियां। 56 उना चे मरियम मागदलीनी, कने याकूब कने योसेस दी माता मरियम कने जब्दीये दे पुत्रां दी माता भी थी। 57 जालू संज होई तां यूसुफ नापे दा अरिमतिया शेहरे दा इक अमीर माणु जडा अपु भी यीशेरे दा चेला था, ओथु आया। 58 उनी पिलातुस बाल जाई करी यीशेरे दी लाश मंगी। कने पिलातुसे देणे दा हुकम देई दिता। 59 यूसुफे लाश लेई कने उसयो चीटिया चादरा च लपेटया, 60 कने उसयो अपणिया नोईया कबरां च रख्या, जडी उनी चटाना च बंगबाइयो थी, कने कबरां दे दरबाजे पर बडा पथर रखीकरी चली गिया। 61 कने मरियम मागदलीनी कने दुई मरियम ओथु कबरां दे सामणे बैठियां थियां। 62 दूरे रोजे जडा तैयारिया दे रोजे ला आला दिन था, उस रोजे बड़े याजकां कने फरीसियां पिलातुसे बाल गिटे होईकरी बोलया, 63 “हे महाराजा, सांझो याद है, कि उनी भटकाणे बाले जालू जिंदे बेले बोलया था कि, मैं उना रोजां बाद फिरी जिन्दा होई जाणा है। 64 हुकम दे कि तिन्ना रोजां दीकर सिपाई कबरां दी रखवाली करन, कुथी इयां ना हो कि उदे चेले आई करी उसयो कडी नी लेई जान, कने लोकां जो बोलन कि सै मरयां चे जिन्दा होई गिया है। तालू पिछला धोखा पेहेले ला भी बुरा होणा है।” 65 पिलातुसे उना जो बोलया, “तुहाडे बाल सिपाई तां हेन जा कने अपणिया समझा दे अनुसार रखवाली करा।” 66 इस तांई उना जाई करी कबरा पर अपने निशाणे सोगी प्रवेश दरबाजे जो बंद करिरी सुरक्षित बनाई दिता ताकि कोई इसयो अपणिया जगा ला नी हटाए।

28 सब्ते दे रोजे बाद हफ्ते दे पहले रोजे पौ फटदे ही मरियम मगदलीनी कने दुई मरियम कबरां जो दिखणा आईयां। 2 कने दिखा इक बडा हिलण होया, क्योकि प्रभुऐ दा इक स्वर्गदूत स्वर्गे ला उतरया था, कने बखे आई करी उनी पथरे जो हटाई दिता, कने उस पर बेई गया। 3 उदा रूप बिजा साईं था कने उदे कपडे बर्फा साईं चिट्टे थे। 4 उदे डरे ने पेहरेदार कम्मी पे, कने मुर्दयाँ साईं होई गे। 5 स्वर्गदूते जनानिया जो बोलया, “डरा मत, मिजो पता है कि तुसां यीशुऐ जो तोपा दिया न जिसयो सूली पर चढाया था। 6 सै ऐथू नी है, सै तां अपने बचने दे अनुसार जिन्दा होई गया है। ओआ इसा जगा जो दिखा जिथू प्रभु रखया था, 7 झट जाई करी उदे चेलयां ने बोला कि, सै मरयां चे जिन्दा होई गया है; सै तुसां ला पहले गलील प्रदेश जाई रिया है, ओथु तुहांजो उदे दर्शन होणे! दिखा, मै तुसां ने बोली दिता है।” 8 कने सै डर कने बडिया खुशिया ने कबरा ला बापस जाई करी उदे चेलयां जो खबर देणे तांई दोडी गियां। 9 तालू यीशु उना जो मिला। कने बोलया, “नमस्ते।” कने उना बखे आई करी उदे पैरां जो पकडी करी उसयो दण्डवत किता। 10 तालू यीशुऐ उना ने बोलया, “डरा मत; मेरे चेलयां जो जाई करी बोला, कि गलील प्रदेशे जो चली जा ओथु मिजो दिखणा है।” 11 सै जनानियां चेलयां जो ऐे खबर देणा ही चलियां थियां कि, सिपाइयां जडे कबरा दी रखबाली करा दे थे उना शेहरे च आई करी सारा हाल बडे याजकां जो सुणाया। 12 तालू बडे याजकां, यहदी अगुवे सोगी गिठे होईकरी सलाह बणाई। उना सिपाइयां जो रिशवत दे रूप च मता सारा धन देणे दा फेसला किता, कने उना जो बोलया। 13 तुसां सारे लोकां ने ऐे बोलनयो कि राती जालू असां सुतयो थे, तां उदे चेले आई करी उसयो चोरी लेई गे। 14 कने अगर ऐे गल्ल राज्यपाले दे कना दीकर पुजगी कि तुसां रखबाली दे बकते सोई गियो थे, तां असां उसयो समझाई लेंगे कने तुसां जो चिंता करणे दी जरूरत नी है असां बचाई लेंगे। 15 उना पेसा लेईकरी जियां उना जो सिखया था, तियां ही किता। ऐे गल्ल अजे दीकर यहदियां च प्रचलित है। 16 कने गयारा चेले गलील प्रदेशे दे उस पाहडे पर गे, जडा यीशुऐ उना जो दसया था। 17 कने उना उदे दर्शन पाई करी उसयो नमस्ते किते, पर कुसी-कुसी जो शक होया की यीशु जिन्दा होया है। 18 यीशुऐ उना बाल आई करी बोलया, स्वर्ग कने धरतिया दा सारा हक मिजो दितया है। 19 इस तांई तुसां जाई करी सारियां जातियां दे लोकां जो चेले बणा; कने उना जो पिता, पुत्र, कने पबित्र आत्मा दे नाऐे ने बपतिस्मा दीया। 20 “कने उना जो सारियां गल्लां जिना दा मै तुहांजो हुकम दितया है, उना जो मणणा सिखा: कने दिखा, मै संसारे दे अंत दीकर हमेशा तुहाडे सोगी है।” (aiōn g165)

मरकुस

1 परमेश्वरे दे पुत्र यीशु मसीह दा शुभसमाचार इयां शुरू होया। 2 जियां परमेश्वरे दा संदेश देणेवाले यशायाह दिया कताबा च लिखया है: परमेश्वरे अपने पुत्र, मसीह जो बोलया, "दिख, मैं अपने संदेश देणेवाले दूते जो तेरे अग्रे भेजदा हूँ, जिनी तेरे ताँई रस्ता ठीक करणा है। 3 उसा सुनसान जगा च अबाज सुणुआ दी है कि परमेश्वर दे ओणे ताँई, अपने आपे जो तैयार करा, कने अपने मने दी सोच समझा जो खरा रखा उनी ओणा है।" 4 यहून्ना जडा संदेश देणा आया था, सै सुनसान जगा च रेंदा था कने ऐ प्रचार करता था की, अपने पापां जो मन्नी लिया कने गलत कम्मा जो छडी दिया तां तूहांजो परमेश्वरे माफ करणा कने बपतिस्मा लिया। 5 मते सारे यहूदिया प्रदेश दे लोक, कने यरूशलेम शेर दे रेणेवाले लोक निकली करी उदे बाल आये, कने अपने पापां जो मन्नी लिया कने यहून्ने उना लोकां जो यरदने खडा च बपतिस्मा दिता। 6 यहून्ना ऊंटे दे बालां दे बणयो कपडे पांदा था, कने अपने लके च चमडे दा पट्टा बनी रखदा था कने टिड्डे कने मखिर खांदा था। 7 जालू यहून्ना ऐ प्रचार करता था की, "जडा मेरे बाद ओणे बाला है, सै मिंजो ला भी शक्तिशाली है, मै तां उदे जूतयां दे तस्मे खोलणे दे काबील भी नी है। 8 मै तां तूहांजो पांणिए ने बपतिस्मा दिता है, पर उनी तूहांजो पबित्र आत्मा ने बपतिस्मा देणा है।" 9 उना दिना जालू यहून्ना बपतिस्मा दिन्दा था तालू यीशु नासरत गांरे ला गलील प्रदेशे च आया, जिथू यरदने खडा च यीशुऐ यहून्ना ला बपतिस्मा लिया। 10 जालू यीशु पाणिये ला निकली करी बाहर आया तां यहून्ने स्वर्ग जो खुलदे दिखया कने स्वर्ग ला इक पबित्र आत्मा जो कबूतरे दे स्पे च अपने उपर ओंदे दिखया। 11 कने परमेश्वरे स्वर्ग ला ऐ आकाशवाणी कित्ती, "की तू मेरा प्यारा पुत्र है, कने तिजो ला मैं खुश है।" 12 यीशुऐ दे बपतिस्मा लेणे बाद पबित्र आत्मा उसयो झट सुनसान जगा पास भेजी दिता। 13 यीशु उसा सुनसान जगा च चालियां रोजां दीकर रिया, अणू शैताने उदी परख लेई। सै बणे दे जानवरां सोगी रिया, कने स्वर्गदूत यीशुऐ दी सेवा करते थे। 14 कुछ बकत बीतणे बाद राजा हेरोदेसे यहून्ना जो पकडी लिया कने उसयो जेला च पाई दिता, तालू यीशु गलील प्रदेशे च गया कने उना लोकां जो परमेश्वरे दे राज्य दा शुभसमाचार सुणाया। 15 कने बोलया, "परमेश्वरे जडा बकत दसया था सै आई गया है, स्वर्ग दा राज्य बखे आई रिया है, अपना मन बदला कने अपने पापां ला पश्चाताप करा, कने परमेश्वर दे शुभसमाचारे पर भरोसा करा।" 16 इक दिन जालू यीशु गलील झिला दे बखे चलया था, तां उनी शमौन कने उदे छोट्टे भाई अन्दियास जो झिला च जाल पांदे दिखया: कयोकि सै मच्छियां पकणने दा काम करते थे। 17 यीशुऐ उना जो बोलया, "ओआ कने मेरे चले बणा; मैं तूहांजो सिखाणा कि लोकां जो मेरे बाल कियां लोणा कने कियां मेरे चले बणणा है।" 18 उना झट जाल छडया कने उदे पिच्छे चली पे। 19 जालू यीशु थोडा अग्रे चलया, उनी होर दो भाईयां जो दिखया जिना दे ना याकूब कने यहून्ना थे, कने सै जब्दी दे पुत्र थे, सै किस्तिया पर जाले जो ठीक करा दे थे। 20 यीशुऐ उना जो दिखया कने उना जो बोलया मेरे सोगी चला कने मेरे चले बणा; कने सै अपने पिता जब्दी कने मजदूर जो किस्तिया पर छडी करी, उदे चले वणने ताँई उदे पीच्छे चली पे। 21 यीशु कने उदे चले कफरनहम शेर च आये, कने सै सब्ब दे रोजे यहूदी जंज घरे च जाई करी उपदेश करणा लग्गा। 22 कने लोक उदे उपदेश सुणीकरी बडे हेरान होए; कयोकि सै उना जो यहूदी व्यवस्था जो सिखाणे बालयां साँई नी, पर अधिकारे ने उपदेश दिन्दा था। 23 जालू यीशु उपदेश दे दा था, तालू यहूदी जंज घर च इक माणु था, जिदे बिच इक बुरी आत्मा थी। 24 उनी जोरे ने बोलया, "हे नासरत दे यीशु मसीह, तू सांझो कजो तंग करता है? तू क्या सांझो खत्म करणा आया है? मिंजो पता है की, तू कुण है? तू ही परमेश्वर दा पबित्र पुत्र मसिहा है, जडा परमेश्वरे ला आया है।" 25 यीशुऐ बुरिया आत्मा जो झिडकया कने बोलया, "चुप रे; कने इस माणुऐ ला निकली जा।" 26 तालू सै बुरी आत्मा उसयो मरोडी करी, कने जोरे ला चिलाई करी उदे च निकली गई। 27 यहूदी जंज घरे च आयो सारे लोक हेरान होइ गे, कने इसा गल्ला जो इकी दुजे ला पुछणा लग्गे, "ऐ कदिया उपदेश है? असा कदी भी इतणे हके ला उपदेश दिन्दे नी सुणया है!" कने बुरी आत्मा इदियां गल्लां जो मदिंयां भी हेन। 28 कने उदे बाद यीशुऐ जडा भी किता, उदे बारे च लोक इकी दुज्जे जो दसदे रे कने झट सारे गलील प्रदेशे दे लोकां ने यीशुऐ दे

बारे च सुणी लिया। 29 जियां ही यीशु कने उदे चले यहूदी जंज घर ला निकले, तां सै शमौन कने अन्दियास दे घरे जो गे कने याकूब कने यहून्ना उदे सोगी थे। 30 उस बकत शमौने दिया ससु जो बडा भरी बुखार था कने सै बिस्तरे च पियो थी, जालू यीशु घरे पुज्जा तालू उसयो कुनकी चले दसया कि शमौने दिया ससु जो बुखार है। 31 तालू यीशुऐ उसा दे बखे जाई करी उसा दा हथ पकडी करी उसा जो जगाया, कने उसा दा बुखार खरा होई गया, कने सै उना दी सेवा करणा लगी पेई। 32 उसी रोजे सझा दे बकते जालू सब्बे दा दिन मुक्ती गया, उदे नगरे च मते लोक बिमार थे कने जिना च बुरियां आत्मा थियां, उना सारयां जो यीशुऐ बाल लेई आये। 33 मते सारे लोक घरे दे दरबाजे सामणे गिठे होई गये। 34 उनी मतायां जो जिना जो बडे प्रकार दियां बिमारियां थियां, उना जो ठीक किता, कने मतिंयां बुरियां आत्मा कडी दितिंयां, कने बुरियां आत्मा जानादिंया थियां की ऐ परमेश्वर दा पुत्र है, उना जो बोलणे दा हुकम नी था। 35 ब्यागा ध्याडा निकलने ला पेहले, यीशु उठया कने निकली करी इक सुनसान जगा पर जाई करी ओथु प्राथना करणा लग्गा। 36 तालू शमौन कने उदे सोगियां जो पता लग्गा, की सै चली गया, तां सै उसयो तोपणा गे। 37 जालू सै मिल्ला, तां उना उसयो दसया, "की मते सारे लोक तिजो तोपा दे थे।" 38 यीशुऐ उना जो बोलया, "चला; असां अखे बखे दे गांरे च चलदे न ताकि ओथु भी परमेश्वर दे संदेश दा प्रचार करी सकन, कयोकि मै इसी ताँई इसी संसारे च आया है।" 39 कने यीशु सारे गलील प्रदेशे दे यहूदी जंज घरां च जाई-जाई करी उपदेश दिन्दा, कने बुरियां आत्मा जो कडदा था। 40 इक कोडी माणु था, सै यीशुऐ बाल आया, कने उदे सामणे गोडे भार बेईकरी, उसयो बिनती किती कने बोलया, "मै जाणदा है कि तू चाआं तां मिंजो ठीक करी सकदा है।" 41 यीशुऐ उस पर तरस खाई करी अपना हथ गां किता जिसयो कोड था, कने उसयो छूता कने बोलया, "मै चांदा है की तू ठीक होई जा।" 42 कने झट उदा कोड ठीक होणा लगी पिया, कने सै ठीक होई गया। 43 तालू यीशुऐ उसी माणुऐ जो सकत चेतानवी देईकरी भेजया, 44 कने उसयो बोलया, "दिख, कुसी ने कुछ मत बोलदा, पर जाई करी अपने आपे जो याजकां ने दस, की तू खरा होईया कने परमेश्वरे जो भेंट चढा जिदे बारे च मूसा बडी पेहले लिखया था, ताकि लोक जाणी सकन की तू खरा होई गया।" 45 पर सै बाहर जाई करी इसा गल्ला दा बडा भरी प्रचार करणा लग्गा कने उनी ऐ ऐथु दीकर फेलाई दिता, कि यीशुऐ उसयो खरा करी दिता कने यीशु शेरआम बाहर शेर च नी जाई सकदा था, फिरी सै बाहर सुनसान जगा च रिया; कने चारो पासे दे लोक उदे बाल ओंदे रे।

2 मतायां रोजां बाद जालू यीशु कफरनहम शेर च मुडी करी आया कने तां ओथु दे लोकां जो पता चली गया कि सै घरे आया है। 2 फिरी मते सारे लोक गिठे होए, उस बजा ने घरे मती भीड होई गई, ऐथु दिकर की दरबाजे बाल भी जगा नी रेई, कने सै उना जो परमेश्वर दे बचने च प्रचार करा दा था। 3 कने इक धरंग होयो मरीजे जो चार माणु मंझे पर चुकी करी उदे बाल लेई आये। 4 पर जालू सै भीडा दिया बजा ला यीशुऐ बखे नी जाई सके, तां उसा छती जो जिसा हेठ सै बैठया था, उना से पुटी करी रस्ता बणाई दिता, कने जालू सै पुटी बैठे, तां उना उसयो मंझे समेत छती ला थले लटकई दिता। 5 यीशुऐ उना दा भरोसा अपने उपर दिखीकरी, उस धरंग होयो मरीजे जो बोलया, हे पुत्र, "मै तेरे पापां जो माफ किता।" 6 तालू केई यहूदी व्यवस्था जो सिखाणे बाले ओथु बैठयो थे, सै अपने-अपने मने च सोचना लग्गे, "ऐ माणु ऐसियां गल्लां कजो बोला दा है? ऐ तां परमेश्वरे दी निदा करा दा है, परमेश्वरे की छडी करी होर कुण पापां जो माफ करी सकदा है?" 8 यीशुऐ अपनी आत्मा जो झट जाणी लिया, की सै अपने मने च ऐसा सोचा दे न, कने उनी यहूदी गुरूआं जो बोलया, "तुसां ऐसा कजो सोचा दे न। 9 क्या धरंग होयो मरीजे जो ऐ बोलणा सोखा है, की तेरे पाप माफ होये, या ऐ बोलणा की, उठ अपने मंजे जो चुकी करी हंड फिर? 10 पर मै तूहांजो दसणा चांदा है की मै, माणुऐ दा पुत्र जिसयो धरतिथा पर पाप माफ करणे दा हक है।" कने उस धरंग होयो मरीजे जो बोलया, 11 "मै तिजो बोलदा है की, उठ, कने अपने मंझे जो चुक कने अपने घरे जो चली जा।" 12 सै झट उठया कने मंझा चुकया कने चली गया, सारे लोक जडे दिखा दे थे सै हेरान होए, कने सारे लोक परमेश्वर दी बडाई करिके बोलणा लग्गे, "असां इयोदिया कदी नी दिखया।" 13 इक बरी फिरी यीशु निकली करी झिला बखे गया, कने मते सारे लोक उदे बाल आये, कने सै उना जो परमेश्वर दे बचना दा उपदेश देणा लग्गा। 14

यीशु जियां ही अग्रे निकलत्या, तालू उनी लेवी नाये दे कर लेणेबाले माणुए जो दिख्या, जिदा दुज्या ना मनी था। उदे पिता दा ना हलफइस था। जडा अपणिया चौकियां पर बैठया था, जिथु से कर लेंदा था। कने यीशुए उसयो बोलया, “मेरे चले बणा।” कने सै उठी करी सारा कम्म कार छडी करी यीशु पिच्छे चली पिया, कने उदा चेला बणी गया। 15 उदे बाद यीशु कने उदे चले लेवी दे घरे राती रोटीयां खाणा बैठयो थे। तालू मते भरी चुंगी लेणेबाले कने पापी भी चेलयां सोगी रोटीयां खाणे ताई बैठयो थे। सै मते भरी थे जडे यीशुए पिच्छे चलयो थे। 16 मसा दिया व्यवस्था जो सिखाणे बाले कने फरीसियां जालू ऐ दिख्या, की जिना जो लोक पापी बोलदे थे, सै उना सोगी रोटीयां खा दा है, तां उना लोका यीशुए दे चेलयां जो बोलया, “ऐ तां चुंगी लेणेबाले कने पापियां सोगी खांदा पिदा है।” 17 जालू यीशुए ऐ सुणया तां उना बोलया, “जडे लोक खरे न उना जो वैधे दी जरूरत नी होदी है, पर जडे बिमार न उना जो है। मै उना लोकां जो सदणे जो नी आया जडे अपने आपे जो धर्मी मंदे न, पर की जडे लोक अपने आपे जो पापी मंदे न, मै उना ताई आया है।” 18 यहून्ना दे चले, कने फरीसी बरत रखदे थे सै बिना कुछ खादयो रेंदे थे; इक दिन उना चे कुछ चले यीशुए बाल आये कने पुछया की, “यहून्ना दे चले कने फरीसियां दे चले बरत कजो रखदे न, पर तैरे चले तां बरत रखदे नी न?” 19 यीशुए उना जो बोलया, “मेरे चले कने मै, लाडा कने उदे मित्रां साईं न। क्या लाडे दे मित्र तालू दीकर बरत रखी सकदे ने जालू दिकर पुरे बियाये च उदे सोगी न? जालू दीकर लाडा उना सोगी है तालू दीकर सै बरत नी की सकदे न। 20 पर सै दिन ओणे न, जालू लाडा उना ला लग कितया जाणा है, तालू इना बरत रखणे न। 21 लोक नोएे कपडे दा रफु पराणे कपडयां च कोई नी पांदा है, नी तां उनी रफुये धोणे ने सुकडी जाणा, कने पुराणा कपडा होर जादा फटी जाणा। मेरियां गल्लां भी पुराणे रिती रिबाजां सोगी जोडगे तां इसी कपडे साईं सै भी बेकार होई जाणियां। 22 नोएे अंगरा दे रसे जो पराणिया खलडिया दे झोले च कोई नी रखदा है, नी तां नोआ अंगर रस खलडिया जो फाडी दिन्दा है, कने अंगर रस खलडिया जो खत्म करी दिन्दा है; तां तां नोआ अंगर रस नोईयां खलडिया च नी रखदे न।” 23 इयां होया की यीशु कने उदे चले सब्दे दे रोजे खेतरां च होई करी जा दे थे; कने उदे चले चलदे-चलदे बेलां जो तोडी करी खाणा लगगी पे। 24 तालू फरीसियां बोलया, “की तैरे चले इयोदे कम्म कजो करदे न जडे नियमा दे अनुसार सब्दे दे दिने करणा ठीक नी होदे न?” 25 यीशुए उना जो बोलया, “तुसां क्या कदी नी पढया की जालू साडे महान राजा दाऊदे जो जरूरत पेई, कने जालू सै कने उदे साथी भूखे थे तां उनी क्या कितया था? 26 कि इक अबियातार नाएे दा महायाजक था, जालू दाऊद कने उदे सोगी मित्र भूखे थे, तालू उना परमेस्वर दे तम्बू च जाई करी रोटीयां खादियां जडियां परमेस्वरे जो चढाईयां थियां, कने अपने सोगियां जो भी खुआईयां, इना रोटीयां जो खाणे दा हक याजकां जो छडी करी होर कुसयो नी था।” 27 तालू यीशुए उना जो बोलया, “परमेस्वरे लोकां दिया भलाईया वासते सब्दे दा रोज बणाया है, उनी सब्दे बाले रोजे उना उपर भार पाणे ताई नी बणाया है। 28 मै, माणुएे दा पुत्र ऐ बोलणे दा हक रखदा है कि लोकां जो सब्दे बाले रोजे जो क्या करणे दी अनुमति है।”

3 इक होर सब्दे बाले रोजे यीशु यहूदी जंज घर च आया; ओथु इक माणु था, जिदा इक हथ सुक्की कने बेकार होई गया था। 2 कने फरीसी यीशुए उपर कोई दोष लाणे ताई बहाना तोपा दे थे, तालू कुछ माणु यीशुए जो बडिया गोराने दिखणा लग्गे, की यीशु उसया सब्दे बाले रोजे खरा करणा की नी। 3 यीशुए उस सुक्यो हथे बाले जो बोलया, “सारयां लोका दे बिच खडोई जा।” 4 कने उना ने बोलया, “क्या परमेस्वर सांझो सब्दे दे रोजे लोकां जो खरा कम्म करणे दा हुकम दिन्दा है, कि नीच कम्म करणे दा? क्या सांझो सै कुसी माणुएे दे प्राण बचाणे दा हुकम दिन्दा कि मारणे दा?” पर सै सारे चुप रे। 5 यीशुए जो जालू गुस्सा आया तालू उनी उना लोकां दे चारों पासे दिखया। कने यीशु बडा उदास होया की सै बडे कठोर कने जिद्दी माणु न। कने उस माणुएे जो बोलया, “अण्णा हथ कर र्सां।” उनी कित्या, कने उदा हथ खरा होई गया। 6 तालू फरीसी झट बाहर आई करी राजा हेरोदियां दे गिरोह दे कुछ लोकां कने मिली करी उदे खिलाफ सलाह करणा लग्गे, की उसयो कित्यां मारणा है। 7 कने उदे बाद यीशु अपने चेलयां सोगी झिल्ला दे पासे चली गिया: कने गलील प्रदेशे ला बडी भीड उदे पिच्छे चली पेई। 8 कने यहूदिया जिले, कने यरूशलेम शहर कने इदूमिया जिले ला, कने

यरदने खड्डा दे पांदा था, कने सूर कने सैदा शेहरे दे अखे बखे लोक ऐ सुणीकरी यीशु वालीं आये, कि यीशु बडे हेरान कने चकित करणे बाले कम्म करदा है। 9 यीशुए अपने चेलयां जो बोलया, “मिजों बोणे ताई इक छोटी किस्ती लेई करी ओआ, ताकि लोक मिजो वाली भीड नी लगाई सकना।” 10 उनी उसी रोजे मतयां जो ठीक कित्या। उदिया बजा ला, मते सारे लोक जडे बिमार थे, सै यीशुए जो छुणे दी कोशिश करा दे थे। 11 कने बुरियां आत्मा ला जकडयो लोक, जालू यीशुए जो दिखदे थे, तां यीशुए जो इज्जत देणे ताई उदे पैरां अग्रे डेई पांदे थे, कने जोरे-जोरे ने बकदे थे, “की तू परमेस्वर दा पुत्र है।” 12 कने यीशुए चेतावनी देई करी बुरी आत्मां जो बोलया, “कि मेरे बारे च कुसी ने भी मत दसदे कि मै परमेस्वर दा पुत्र है।” 13 उदे बाद यीशु इक धारा पर चढी गिया, कने उना जो अपने बाल सदया जिना जो सै चांदा ला, कने सै उदे बाल आये। 14 तालू उनी बाहरां माणुएे जो चुणयां। जडे उदे खास चले बणे, उनी उना जो प्रेरित दा ना दिता, कने सै चांदा की सै उदे सोगी-सोगी रेंन, कने यीशु उना जो भेजे की सै प्रचार करन, 15 कने बुरियां आत्मा जो कडणे दा हक दिता। 16 ऐ सै बाहरा चले न, जिना जो यीशुए चुणया था: शमौन जिदा ना उनी पतरस रखया; 17 ऐ दो भाई जिना दा ना याकूब कने यहून्ना है, सै जब्दी दे पुत्र थे, जिसयो यीशु ने बुअनरगिस बोलया, कने उदा मतलव गडकने बाले माणु। 18 कने अन्डियास, कने फिलिप्पस, कने बरतल्लै, कने मती, कने थोमा, कने हलफइये दा पुत्र याकूब, कने तै, कने शमौन कनानी जडे क्रांति लयोणे बाले थे, 19 कने यहूदा इस्कुरियोती, जिनी उसयो दुशमणा दे हथे पकडाई भी दिता था। 20 कने दित्या पांटे दे कुसी घरे च आया, कने ओथु इतणी भीड गिठी होई गेई, की उसयो रोटी खाणे दा भी बकत नी मिला। 21 जालू उदे रिशतेदारां ऐ सुणया, तां सै उसयो घरे जो लेई जाणे ताई आये, क्योकि सै बोलदे थे, की इदे होस ठीक होणे च नी है। 22 कने सै जडे मसा दी व्यवस्था जो सिखाणे बाले थे, सै यरूशलेम शेहरे ला आयो थे, सै भी ऐ बोलदे थे की, “इदे च शैतान है,” कने “सै बुरियां आत्मा दा सरदार है, कने शैताने दित्या मददा ने बुरियां आत्मा जो कडदा है।” 23 इस ताई सै उना जो बखे सदीकरी, उना जो कहाणिया च बोलणा लग्गा, “क्या शैतान अपणी ही बुरी आत्मां जो लोकां ला बार कडणे ताई जोर पांगा? नी, जरा भी नी।” 24 अगर कुसी राज्य च लोक अपु च ही लडदे रेंगे तां सै राज्य बडे बकते तक नी टिकी सकदा है। 25 कने अगर कुसी घरे दे माणु अपु च ही लडी पांगे तां सै घर नी चली सकदा। 26 अगर शैतान अपणा ही बैरी बणिया कने अपु ने ही लडगा, तां उनी अपना ही नाश करी लेणा है। 27 कोई भी माणु जोरे बाले माणुएे दे घरे जो नी लुटी सकदा, जालू दीकर सै पेहले, उस माणुएे जो बन्नी नी ले; तां जाई करी सै उदे घरे जो लुटी सकदा है। 28 “मै तुसां ने सच्च बोलदा है, की माणुएे दी ओलादी दे सारे पाप कने निंदा जडा सै परमेस्वर या कुसी दे खिलाफ करदे न, परमेस्वरे उना दे पाप माफ करी देणे न; 29 पर जडा कोई पबित्र आत्मा दे खिलाफ निंदा करगा, तां सै परमेस्वरे कदी भी माफ नी करणा है। कने परमेस्वर इसी पापे ताई उस माणुएे जो हमेशा ताई दोषी मनणा है।” (aiōn g165, aiōnios g166) 30 यीशुए ऐ इस ताई बोलया क्योकि सै ऐ बोलदे थे, की उसयो बुरिया आत्मा जकडया है। 31 तालू यीशु दी मां कने उदे भाई आये, कने उना बाहर खडोई करी उसयो बुलाबा भेजया। 32 भीड उदे अखे बखे बैठयो थी, कने उना उसला बोलया, “दिख, तेरी माता कने तैरे भाई तिजो तोपा दे न।” 33 यीशुए उना जो जबाब दिता, “मेरी माता कने मेरे भाई कुण न?” 34 कने उनी उना पासे नजर दिती जडे उदे अखे बखे बैठयो थे कने बोलया, “दिखा, मेरी माता कने मेरे भाई न। 35 सै सेई ही करदे न जडा परमेस्वर चांदा है, सै ही मेरे भाई, बेहण कने माता पिता न।”

4 यीशु फिरी गलील झिला दे बखे उपदेश देणा लग्गा, कने ओथु इतणी भीरी भीड गिठी होई गेई, की सै झिला च इक किलिया पर चढी करी बेई गिया, कने सारे लोक झिला दे बखे खडोई रे। 2 कने सै उना जो कहाणीं सुणाणा लग्गा, कने अपने उपदेश च उना ने बोलया, 3 “सुणा इक किसान अपने खेतेरे च बी रांगे ताई गिया। 4 रांटे बेले थोडे बी रस्ते दे बखे पेई गे कने सै तां पछियां आई करी चुगी ले। 5 कने थोडे बी पशरलिया जमिना पर पे जिथु उसयो जादा मिटी नी मिली, कने जादा मिटी नी होणे दित्या बजा ने तौली लुंगी पै। 6 कने जालू खडी धुप पेई, तां सै फकुई गे, क्योकि उना दियां जडा दुगियां नी थियां तां सै सुकी गे। 7 कने थोडे बी झिल्लां च पे, कने जालू झिल्ल बदे तां उना सै बी डकी ले, कने उना फल नी दिता। 8 पर थोडे बी खरिया जमिना पर पे, कने सै बी लुंगे, कने मते

सारे फल देणेवाले होए; केईयां ती गुणा, केईयां सठ गुणा, केईयां सौ गुणा।” 9 तालू उनी बोलया, “जिस बाल सुणने ताई कन्न न सै ध्यान लाईकरी गल्लां जो सुणे, कने इसा गल्ला जो समझी ले।” 10 जालू यीशू किरल्ला रेई गया, तां बाहरा चले कने जडे सोगी थे सै उसला इसा कहाणिया दा मतलब पुछणा लग्गे। 11 उनी उना जो बोलया, “तुसां तां परमेश्वरे दे राज्य दियां छुपियां होईयां सच्चियां गल्लां दसियां न, पर ऐ कहाणी बाहरे बाले लोकां ताई थी, सै जडे मिजों पर भरोसा नी रखदे। 12 जियां कि पवित्रशास्त्र च लिखया है, सै तिनां जो मिलदे होए भी नी मिलदा कन्ना ने सुणदे होए भी सै नी सुणदे कने समझदे, इयां नी होऐ की सै अपने बुरे कम्मा जो छडी देन, कने उना जो माफ करणा पोऐ।” 13 फिरी यीशूए उना जो बोलया, “तुसां इना गल्लां जो नी समझगे, तां फिरी तुसां होरा कहाणियां जो कियां समझगे। 14 इसा कहाणिया दा ऐ मतलब है, बी राणे बाला इयोदिया है जियां कोई परमेश्वरे दे बचना दा प्रचार लोकां च करता है। 15 जडा बी रसते च पिया उदी तुलना उना लोकां ने कितियो है, जडा परमेश्वर दे बचन सुणदे न। पर शैतान झट पट जादां कने उना दे मने ला बचन कडी दिन्दा है जडा उना सुणया था। 16 कने थोडे लोक उस पथरे वालिया जमिना सांई न जिथू बी पिया था, ऐ सै माणु न, जडे बचना जो सुणीकरी उना जो झट खुशिया ने ग्रहण करी लेते न। 17 पर परमेश्वर दे बचना जो मने दिया गहराईया च बदणा नी दिन्दे, उदे बाद जालू बचने दिया बजा ने उना पर कला क्लेश या परेशानी होंदी है, तां सै बचना ला पिच्छे हटी जांदे न। 18 जडे बी झिल्लां च पियो न, ऐ सै माणु न जिना बचन सुणया, 19 पर सै संसारे दियां चिंता जो लेईकरी लुखी, कने संसारिक चिंजा दिया मोहमाया च फसी जांदे न, ऐ सब कुछ परमेश्वरे दे बचन च स्क्रावट पांदा है। कने सै बचन उना तांई फायदेमंद नी होंदा। (aiōn g165) 20 कने जडे बी खरिया जमिना पर रायो थे, ऐ सै माणु न, जडे बचन सुणीकरी ग्रहण करदे न, कने फल दिन्दे न, कोई ती गुणा, कोई सठ गुणा, कने कोई सौ गुणा।” 21 यीशूए उना जो बोलया, “क्या कोई दित्ये जो जल्लाई करी उसयो इक टोकरू या मंजोलिया दे जिक इस तांई रखदा है की उदिया लौई जो लुकाई सके? ना जरा भी नी। दित्ये जो ताके उपर रखदे न, जिथू ला उदी लोअ चमकी सके।” 22 क्योंकि जडा कुछ भी लुकया है, सै सामणे करणा; कने हर इक गुण गल्ल सामणे आई जाणी है। 23 “जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 24 यीशूए उना जो बोलया, “ध्यान रखा, की जितणा तुसां ध्याने ने बचना जो सुणगे, तुसां जो उतणा ही जादा समझ ओणा है, उदे साबे ने परमेश्वरे तुहांजो देणा है। जिस नापे ने तुसां नापदे न उसी नापे ने तुहाडे तांई नापया जाणा है, कने तुसां जो जादा दितया जाणा है। 25 जिना बाल जडा परमेश्वर सिखांदा हे उसयो समझणे दी इच्छा है, उना जो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदा, तां सै जडा समझया है, परमेश्वरे उसला सै भी लेई लेणा।” 26 यीशूए उना जो बोलया, “परमेश्वरे दा राज्य ऐसा है, जियां कोई किसान खेते च बी रांदा है, 27 जालू उनी बी राई दिते उनी फिरी दुबारा मुडी करी बी नी दिखया कने अपने रोजाने बाले कम्मा करता रिया। पर जडा उनी बी राऐ थे, सै बी लुंगे कने बड्डे होए, कने सै जाणदा भी नी करी ऐ कियां होया। 28 धरती अपु ही फल दिन्दी है, पहले लुंगा, फिरी सिल्ले, फिरी सिल्ल्यां च तैयार दांणा। 29 पर जालू सै दाणे पकी जांदे न, तालू सै किसान ओंदा कने दराटिया ने बडणा लगदा, क्योंकि बडणे दा बकत आई गया था।” 30 फिरी यीशूए कहाणी सुणई, “असां परमेश्वरे दे राज्य दी तुलना इयां करी सकदे न, जियां तुसां जो मै कहाणी दसदा। 31 कने परमेश्वर दा राज्य धरती दे सारे बियां ला सबला छोटे बी राईए दे बियां सांई है। 32 पर जालू जमिना च रादे न, तां सै उणी करी सारे साग पतरां ला बडा होई जांदा है, कने उदियां इतणियां बडियां डालियां निकलदियां न की अम्बरे दे पंछी ही उदिया छोआं च रेहणे तांई डालियां च घोंसले बणाई सकदे न।” 33 कने सै लोकां जो परमेश्वरे दे राज्य दे बारे च दसणे जानां हरबरी कहाणिया दा इस्तेमाल करता था, जडियां उना जो समझ आई जाण। 34 कने सै हमेशा परमेश्वरे दे राज्य दियां गल्लां कहाणिया च बोलदा था, पर जालू सै किरल्ला होंदा था, तां सै अपने चेलयां जो सारियां गल्लां दसदा था। 35 उसी दिने सझां दे बेले, उनी अपने चेलयां ने बोलया, “ओआ, असां गलील झीला दे पार चलंदे न।” 36 कने चले भी भिडा जो छडी करी उना किस्तिया पर चढी गे, जिसा पर यीशू बैठया था। कने सै यीशूए जो अपने कने लेई गे। ओथु उना सोगी होर भी किस्तियां थियां। 37 तालू सै झीला जो पार करा दे थे, तां बडा भरी तुफान आया

कने लेहरां किस्ती ने बजियां, किस्तिया च पाणी भरईया कने किस्ती दुबणे वाली थी। 38 कने यीशू पिछले हिस्से च सुतया था, तालू उना उसयो जगाई करी बोलया, “गुरू जी, तिजो क्या साडी कोई फिकर नी है, की असां मरणे बाले न?” 39 तालू उनी उठी करी तुफाने जो डांटया, कने लेरां जो बोलया, “शांत रिया, स्की जा।” कने हवा स्की गेई कने झील शांत होई गेई। 40 कने उनी तालू चेलयां ला पुछया, “तुसां कजो डरदे न? क्या तुहांजो हले दीकर मिजो पर भरोसा नी है?” 41 सै बडे भरी डरी गे कने अपु चे बोलाणा लग्गे, “ऐ कदिया माणु है? ऐथू तक की तुफान कने लैहरां भी इदा हुकम मदे न।”

5 यीशू कने उदे चले गलील झिला दे पार गिरासे दे लोकां दिया जगा च पुज्जे, 2 जालू यीशू किस्तिया ला थले उतरया तालू इक माणु जिसयो बुरिया आत्मा जकडया था, सै कब्रिस्तान ला निकलया कने यीशूए बाल आया। 3 सै कब्रिस्तान च रेंदा था कने लोक उसयो बन्नी करी नी रखी पांटे थे, ऐथू दिकर की लोहे दे सुंगला ने भी नी। 4 क्योंकि उसयो बडी बरी बेडियां कने सुंगला ने बनया था, पर सै उना सुंगला जो तोछी दिन्दा, कने बेडियां दे टोटे-टोटे करी दिन्दा था, कने उसयो कोई भी काबू च नी करी सकदा था। 5 सै रात दिन कब्रिस्तान कने पाहडा च जारे-जारे बकदा रेंदा, कने अपने आपे जो पथरा ने जखमी करता रेंदा था। 6 सै यीशूए जो दूरे ला ही दिखीकरी दोडया, कने यीशूए जो इज्जत देणे तांई उदे पैरां अगो डेई पिया। 7 उनी जारे ने चिलाई करी बोलया, “यीशू जी, परमपिता परमेश्वरे दे पुत्र, तु मिजो कजो साता दा है? तु परमेश्वरे दे ना लेईकर कसम खा की तु मिजो नी सातांगा।” 8 उनी ऐ बोलया क्योंकि यीशूए उसयो पहले ही हुकम देई दितया था, “हे बुरी आत्मा, इस माणुए ला तु निकली जा।” 9 यीशूए उसा बुरिया आत्मा जो पुछया, “तेरा क्या ना है?” उनी बोलया, “मेरा ना सेना है, क्योंकि असां मते सारे न।” 10 कने उना बुरियां आत्मा उसला बडी बिनती किती, “की सांझो गिरासे दे इलाके ला बाहर मत भेजा।” 11 ओथु धारा पर इक सूअरां दा झुण्ड चुग्गा दा था। 12 कने बुरियां आत्मा यीशूए ने बिनती करिके बोलया, “की सांझो इना सूअरां च भेजी दे ताकि असां इना दे अंदर जाई सकन।” 13 यीशूए उना जो हुकम दिता कने सै बुरियां आत्मा उसी माणु ला निकली करी सूअरां दे अंदर समाई गियां, कने उसी झुण्डे च कोई दू हजार सूअर थे, कने खडे डडे पासे दौडे कने रिडकी करी झिला च जाई पे कने डुबी करी मरी गे। 14 उना दे पुहालां नटी करी शेर कने गांऐ च ऐ खबर सुणई, कने जडा होया था लोक उसयो दिखणा आये। 15 यीशूए बाल आई करी, उना उसयो दिखया जिदे च बुरियां आत्मा थियां, उसयो कपडे पाई करी कने खरा बैठया दिखीकरी सै डरी गे। 16 दिखणे बालयां उदा जिदे बिच बुरियां आत्मा थियां, कने सूअरां दा पार हाल, बाकियां जो दसया। 17 तालू जडे लोक दिखणा आयो थे, सै यीशूए ने बिनती करिके बोलाणा लग्गे, कि साडे इलाके ला चली जा। 18 जालू यीशू किस्तिया पर जाणे तांई चढया, तां सै जिदे च पहले बुरियां आत्मा थियां, सै यीशूए ने बिनती करणा लग्गा, “की मिजो भी अपु सोगी रेंणा दे जियां बाहरा चले उदे सोगी रेंदे थे।” 19 पर यीशूए उसयो अपने सोगी चलणे तांई मना करी दिता, कने उसयो बोलया, “अपणे घरे जाई करी अपने लोकां जो दस, की प्रभुए तिजो पर दया करिके तेरे तांई कदया कम्म दिता है।” 20 तालू सै माणु अपने घरे दे इलाके च चली गया। फिरी उनी सारे दिकापुलिस जिदा मतलब “दस शेर” च ऐ प्रचार करणा शरू कित्ता, कि यीशूए मेरे तांई बडा कुछ कितया है, कने उसयो सुणनेवाले सारे लोक हेरान होऐ। 21 जालू यीशू दोबारा किस्तिया च गलील झिला पारे जो गया, कने बडे भरी लोक उस बाल गिठे होई गे। सै झिला बखे ही था, 22 यहदी जंज घरे दे सरदारां चे इक याईर नाये दा सरदार आया, सै यीशूए दी इज्जत मान तांई यीशूए दे पैरां अगो डेई पिया, 23 कने उनी ऐ बोली करी बडी बिनती किती, “की मेरी लोकी कुडी मरणा लगियो है, कने तू साडे घरे आई करी उसा जो छु, ताकि सै ठीक होई जा कने मरणे ला बची जा।” 24 तालू ही यीशू उस सोगी चली पिया, कने मते भरे लोक उदे पिच्छे चली पे, सै यीशूए दे उपर डेई पांटे थे। 25 भिडा च इक जनानी थी जिसा जो बाहरां सालां ला खून निकलने दी बिमारी थी। 26 उना मते वेघां धयां ला दुख झेलया था कने अपने सारे पेसे खर्चणे बाद भी सै खरी नी होई। कने उसा दा हाल बडा बुरा होई गया था। 27 जालू उना सुणया यीशूए लोकां जो खरा कितया है, तां उना सोचया, “कि मै उदे कपडयां जो छुई लें, तां मै खरिया होई जाणा।” तां तां उना भिडा च यीशू दे पिच्छे आईके उदे कपडयां जो छुता। 28 क्योंकि सै बोलती थी, “अगर मै उदे कपडयां जो भी छुई

लेगी, तां ही मैं ठीक होई जाणा।” 29 कने झट उसा दा खून चलणा बंद होई गिया, उना अपने शरीर ला मेहसूस करी लिया की मैं इसा बिमारिया ला ठीक होई गियो है। 30 यीशु भिड़ा च पिच्छे मुडया कने पुछया, “भरे कपडयां जो कुनी छुता?” उनी ऐसा इस तांई पुछया क्योकि उसयो पता लगी गिया की उदे चे सामर्थ्य निकली, कने कोई माणु खरा होया है। 31 उदे चेलयां उसयो बोलया, “तू दिखा दा है, की तैरे अखे बखे इतणी भरी भीड है, कने तू पुछदा है, की कुनी मिजो छुता?” 32 तालू यीशुए उसी माणुए जो दिखणे तांई जिनी ऐ कम्म कितया था, चारो पासे नजर दौड़ाई। 33 तालू सै जनानी जाणी गिया की मैं खरी होई गियो, तालू सै आई कने यीशुए दे पैरां च पेईं गेई कने पैर बदे। कने यीशुए जो दसया की मैं तिजो छुतया था। उना सोचया कि उनी उसा पर गुस्सा होणा उसा गल्ला दिया वजा ला सै डरी कने कम्मी पियो थी। 34 यीशुए उसा जो बोलया, “कुडिये, तेरा भरोसा जडा मिजों पर था उनी भरोसे तिजो खरा कितया है, शांति ने चली जा, हण तू अपणिया इसा बिमारिया ला बची करी रियां।” 35 यीशु हले उसा ने गल्ल कर दा ही था, यहदी जंज घरे दे सरदारे दे घरे ला कुछ लोकां आई करी बोलया, “की तेरी कुडी तां मरी गेई है” हण गुस्से जो कजो तकलीफ दे दा है? 36 जडी गल्ल सै बोला दे थे, उसा गल्ला जो यीशुए अणुणुणी करिके यहदी जंज घरे दे सरदारे जो बोलया, “डर मत, सिर्फ मिजों पर भरोसा रख।” 37 तालू यीशुए सिर्फ पतरस, याकूब कने याकूब दे भाईं यहून्ना कने याईर जो ही अपने कने ओणा दा हुकम दिता, होर कुसयो भी अपने सोगी ओणा नी दिता। 38 कने यहदी जंज घरे दे सरदारे दे घरे च पुज्जी करी, उनी लोकां जो रोदे कने डडदे दिखया। 39 तालू यीशुए कमेर अंदर जाई करी उना जो बोलया, “तुसां इयां डडा कने रोआ मत? कुडी मरियो नी है पर सुतियो है।” 40 सै सुणीकरी, सारे लोक यीशुए पर हसणा लग्गे, तालू उनी सारयां जो बाहर कडी दिता। कने कुडिया दे माता पिता कने अपने चेलयां जो सोगी लेईकरी कमेर अंदर गिया जिथू कुडी पियो थी। 41 कने यीशुए कुडिया दा हथ पकडी करी उसा जो बोलया, “तलिता कूमी,” जिसदा मतलब है की, “हे छोटी कुडिये, मैं तिजो बोलदा है, उठ।” 42 कने कुडी झट उठी करी हंडणा लग्गी पेईं, सै बाहरां सालां दी थी। जालू इयां होया तां सारे लोक कुडिया जो दिखीकरी हेरान होई गे। 43 फिरी यीशुए उसा दे माता पिता जो समझाई करी हुकम दिता की इसा गल्ला दा कुसयो पता नी लग्गे की उनी मरियो कुडियो जो जिन्दा कितया है। कने इसा कुडिया जो खाणे जो दिया कुछ।

6 तालू यीशु कफरनहम शेहरे ला चली गिया, सै अपने गां नासरत जो आया, कने उदे चले भी उदे सोगी आये। 2 यीशु सब्ते बाले रोजे यहदी जंज घर च परमेश्वरे दे बचना दा उपदेश देणा लग्गा, कने मते लोक सुणीकरी हेरान होई गे कने बोलणा लग्गे, “इनी माणुए ऐ गल्लां कुछ ला सिखियां न? कने इसयो ऐ सारा ज्ञान कने चमत्कार करणे दी शक्तियां कुनी दितियां? कने सामर्थ्य दे कम्म कियां इदे ला होंदे न? 3 ऐ सिर्फ तरखाणे दा पुत्र है, जडा मरियम दा पुत्र, कने याकूब, योसेस, यहदा कने शमीन दा भाई है। कने इदिया बेहणा भी ऐथू साडे सोगी न” कने उना यीशुए पर भरोसा करणे जो मना करी दिता। 4 यीशुए उना जो बोलया, की परमेश्वरे दे संदेश देणेबालयां दा अपने गां कने अपने रिशतेदारां अपने घरे छडी करी, हर कुथी उदी इज्जत मान होंदा है। 5 कने ओथु उसी पर कुनी भरोसा नी कित्ता, इसा बजा ला उनी ओथु थोडे बिमारां पर हथ रखीकरी खरा कित्ता उदे अलावा ओथु होर कोई चमत्कार नी करी सकया। 6 कने यीशु उदे अकिन्वास ने बडा हेरान होया कने उदे बाद यीशु अखे बखे दे गांए च गिया कने परमेश्वर दे बचना दा उपदेश दिता। 7 थोडे बकते बाद यीशुए बाहरां चेलयां जो अपने बाल सदाया कने उना जो बुरी आत्मा कडणे दा हक दिता। उना जो दो-दो करिके लग्ग गांए भेजणा लग्गा, कने उना जो बुरियां आत्मा जो लोकां चे कडणे दा हक दिता। 8 कने यीशुए उना जो हुकम दिता, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, 9 पर जुते पाई लेनयो कने होर कोई कपडे पाणे तांई मत लेंदे। 10 यीशुए उना जो बोलया, “की कोई तुहांजो अपने घरे रेहणे तांई सदगा, जालू दीकर तुसां जगी गांए च रेंगे, तालू दीकर उसी दे घरे च परोणे बणी करी रिया। 11 जिसा उना दे लोक तुहांजो अपणयो नी कने त्हाडीं सुणणे नी, ओथु ला जादे बाले अपने पैरां दी धूड जाडी दिनयो, ताकि उना लोकां जो पता लग्गे की परमेश्वरे दिया तरफा ला मिलणे वाली

सजा दे सै अपु ही जिम्मेवार न।” 12 तालू चेलयां जाई करी घोषणा कित्ती की अपना मन बदला कने अपने पापां दा पन्नाताप करा, कने परमेश्वरे दे शुभसमाचार पर भरोसा करा, कने परमेश्वरे पासे मुडा। 13 कने उना मतियां बुरियां आत्मा जो कडया, कने मतयां बिमारां जो जैतुन दा तेल मली करी खरा कित्ता। 14 कने हण राजा हेरोदेसे यीशु दे कम्मा दी चर्चा सुणी जडे यीशु करा दा था, क्योकि मते सारे लोक यीशुए जो जाणदे थे कने उदे बारे च चर्चा करा दे थे। कने बोला दे थे की ऐ सेईं यहून्ना बपतिस्मा देणे वाला है, सै मरयां चे जिन्दा होई गिया है, ऐईं बजा है कि उदे बाल ऐ चमत्कार करणे तांई परमेश्वरे दी शक्ति है। 15 कने होरनी लोकां बोलया है, “परमेश्वरे दा संदेश दे बाला एलिय्याह है। कने बाकियां बोलया, ऐ सै परमेश्वरे दा संदेश देणेबाला है, जडे बडे जमाने पहेले रेंदे थे।” 16 हेरोदेसे ऐ सुणीकरी बोलया, “सै यहून्ना बपतिस्मा देणेबाला है, मैं अपु उदा मुंड बडबया था, पर सै मरी करी फिरी जिन्दा होई गिया है।” 17 हेरोदेस थोडे बकते पहेले अपने भाई फिलिप्पस दी घरे बाली हेरोदियास ने बियाह करी लिया था। 18 तालू यहून्ना उसयो बोलया, “ऐ तू खरा नी कित्ता तू अपने भाईये दी लाडी लेई ली।” तांई तां हेरोदियास जो खुश करणे तांई, हेरोदेसे यहून्ना जो पकडी करी उसयो जेला च पाई दिता। 19 तांई तां हेरोदियास यहून्ना ने दुशमणी रखदी थी कने सै चांही थी, की उसयो मरवाई दे, पर ऐसा होई नी सकया, 20 हरबरी जालू हेरोदेस यहून्ना जो बोलदे सुणदा था, तां सै डरदा था, क्योकि यहून्ना इक पबित्र कने धर्मी माणु था, पर तमी सै उसयो सुणा पसंद करदा था। कने सिपाहियां जो उदी खबाबाली करणे तांई रखया, हेरोदेस उदियां गल्लां सुणीकरी डरी जांदा था, पर सै खुशिया ने सुणदा था। 21 थोडे बकते बाद, हेरोदेसे अपना जन्म दिन मनाया, उनी अपने बड़े प्रधान अधिकारियां, सेना दे बड़े खास अगुवां कने गलील प्रदेशे दे अगुवां जो धामा च सदया। इसा धामा च हेरोदियास जो यहून्ना जो मरवाणे दा मोका मिली गिया। 22 कने हेरोदियास दी कुडी अंदर आई, कने नची करी हेरोदेस कने उदे सोगी धाम खाणा आये परोणयां जो खुश कित्ता, तालू राजे कुडिया जो बोलया, “तू जडा मर्जी मिजो ला मंग, मैं तिजो दिगा।” 23 कने हेरोदेसे उसा ला ऐ बायदा कित्ता, “की मेरे अंधे राज्य दीकर जडा कुछ तू मिजो ला मंगगी सै मैं तिजो दिगा।” 24 उना बाहर जाई करी अपणिया माता ला पुछया, की मैं क्या मंगे? माता बोलया, “असयो बोल की सै यहून्ना बपतिस्मा देणेबाले दा मुंड बढी करी मिजो दे।” 25 कने सै झट अंदर राजे बाल आई, कने उसने बिन्ती कित्ती की, “मैं चांही है, की तू हणी यहून्ना बपतिस्मा देणेबाले दा मुंड बढी करी मिजो इक थालिया च दे।” 26 ऐ सुणीकरी राजा बडा उदास होया, पर अपणिया कसमां, कने सोगी बोणे बालयां दिया बजा ला उसा दिया गल्ला जो टालना नी चांदा था। 27 राजे इक सिपाइए जो हुकम दिता, कि जेला च जा, कने यहून्ना दा मुंड बढी करी उदे बाल लेकेकर आ। 28 सिपाइए जेला च जाई करी उदा सिर कडया, कने इक थालिया च रखीकरी लेई आया कने उसा कुडिया जो देईं दिता, कने कुडिया अपणिया माता जो देईं दिता। 29 जालू यहून्ना दे चेलयां जो पता चला की उसयो मारी दितया है, यहून्ना दे चले आये, कने उना उदिया लाजा जो चुकी करी कबरा च रखी आये। 30 जालू सै प्रेरित जिना जो यीशुए भेजया था, सै यीशु बाल बापस आये कने उदे चारों बखे खडोइ गे, कने जडा कुछ उना कित्ता, कने सिखया था, सारा कुछ उसयो दसया। 31 मते सारे लोक ओदे जांते थे कने इसा बजा ला यीशु कने उदे चेलयां जो रोटियां खाणे दा बकत नी मिलदा था। तालू यीशुए चेलयां जो बोलया, “असां कुथी सुनसान जगा चलदे जिथू किल्ले रेईं सकन कने थोडा बकत आराम करी सकन।” 32 इस तांई सै किल्लिया च बेईकरी सुनसान जगा च चलीं गे। 33 कने मतयां लोकां उना जो जांते दिखया कने पछेणी लिया की सै कुछ जाणा लगयो न। कने अखे बखे दे नगरां दे लोक गिठे होईकरी यीशु कने उदे चेलयां ला पहेले ओथु पैदल दौडी करी पुज्जी गे। 34 यीशु किल्लिया ला उतरया कने उनी मती भरी भीड दिखी, कने उना पर तरस खादा, क्योकि उना दा कोई अगुवा नी था, जडा उना दी खबाबाली करी सके, जियां बिना गवाले भेडां होंदियां न, “फिरी सै उना जो परमेश्वर दे राज्य दियां मतियां गल्लां सिखाणा लग्गा।” 35 जालू संज होंणा लग्गी, तां उदे चले उदे बखे आई करी बोलणा लग्गे, “ऐ सुनसान जगा है, कने दिन बडा ढली गिया है। 36 इना जो भेजी दे, ताकि ऐ अखे बखे दे गां कने बासियां च जाई करी, अपने तांई कुछ खाणे जो खरीदी लेना।” 37 यीशुए उना जो जबाब दिता, “तुसां ही इना जो खाणे जो दिया।” उना यीशुए जो बोलया, “की तू चांदा की कौं असां जान कने दो सौ दिना दी मजदूरिया बराबर दियां रोटीयां

खरदी करी इना जो खुआन?" 38 यीशुए उना जो बोलया, "जाई करी दिखा त्हाडे बाल कितणियां रोटियां न?" उना पता करी के बोलया, "पंज रोटियां कने दो मछियां भी हेन।" 39 तालु यीशुए उना जो हुकम दिता की, सबना जो सेले घाए पर बैठआई दिया। 40 सै सौ-सौ करिके कने पंजा-पंजा करिके झण्डा च बेई गे। 41 कने यीशुए सै पंज रोटियां कने दो मछियां लियां, कने स्वर्ग पासे दिखीकरी परमेस्वर दा धन्यवाद किता, कने रोटियां तोड़ी करी दो टोटे किन्ते कने चेलयां जो दिन्दा गिया, ताकि सै लोकां जो परोसन, कने सै दो मछियां भी उना च बंडी दितियां। 42 सारे खाई करी रजी गे। 43 कने जालु रोटी खायी बैठे तालु चेलयां बाकी बचियां रोटियां कने मछियां गिठेरेंइयां कने उसला बाहरा टोकरीयाँ भरई गिया। 44 जिना रोटियां खादियां सै पंज हजार सिर्फ मर्द थे, उना बच्चे कने जणसा जो गिणया नी था। 45 तालु यीशुए झट पट अपने चेलयां जो बोलया की सै किस्तिया पर चढी जा कने झिला दे पारले पासे बैतसैदा शेहरे जो चली जा, जालु दीकर की सै सारे लोकां जो भेजी नी ले। 46 सारे लोका जो भेजणे बाद, यीशु पहाडे पर प्राथना करणे ताई गिया। 47 कने जालु संज होई, तालु किस्ति गलील झिला दे बिच थी, कने यीशु किला झिला बखे था। 48 जालु उनी दिखया की सै बडे गबराई गियो न, क्योंकि हवा उना दे खिलाफ चलियो थी, तां ब्यागा तडके यीशु झिला पर चली करी उना बाल आया, कने सै उना ला बखे ला निकलना चांदा था। 49 पर जालु उना उसयो झिला पर चलदे दिखया, तां से डडणा लग्गी पै, उना जो लगया की सै भुत है, तां सै दिखीकरी डरी गे, 50 क्योंकि सारे उसयो दिखीकरी गबराई गियो थे। पर यीशुए उना से झट गल्लां कितियां कने बोलया, "हिमत रखा, डरा मत, मै यीशु है।" 51 तालु सै उना बाल आया कने किस्तिया पर चढी गिया, कने हवा स्की गई, कने सै बडे हेरान होणा लग्गे। 52 हाली उना दिखया भी था की पिछलिया धियाडिया यीशुए पंज रोटीयां ने पंज हजार ला जादा लोकां जो खाणा खुआया था, सै हाली भी उसयो नी समझयो थे, की यीशु कुण है। क्योंकि उना दे मन कठोर थे। 53 जालु यीशु कने उदे चेले इक किस्तिया च गलील दिया झिल्ला च गन्नेसरत प्रदेशे दे बखे पुज्जे, कने किस्ति घाटे पर बन्नी दीती। 54 कने जालु सै किस्तिया ला उतरे, तां लोकां उसयो झट पछेणी लिया, 55 सै झट पट ही सारे इलाके च गे, कने बिमारां जो मंझयां पर चुकी करी लेई गे जिथु उना जो खबर मिली की यीशु ओथु है। 56 कने जिथु कुर्थी सै यां, शेहरां या बस्तियां च जांदा था, तां लोक बिमारां जो बजारां च रखीकरी उसला बिनती करदे थे, की सै सिर्फ अपने कपडयां जो छुणा दे, कने जितणे भी छुंदे थे, सै सारे ठीक होई जांदे थे।

7 तालु इक रोज फरीसी कने केई यहूदी व्यवस्था जो सिखाणे बाले जडे यस्जलेम शेहरे च आयो थे, उसयो सुणने ताई गिठे होए, 2 कने उना दिखया की उदे चेले बिना हथ धोते रोटी खा दे थे, जडा की यहूदी रिवाजे अनुसार अपबिन्न था। 3 फरीसी कने सारे यहूदी खाणा खणे ला पहले अपने बज्जां दे रीती रिवाजे पर चलदे थे कने जालु दीकर सै होणे ने हथ नी धोई लेन खाणां नी खांदे थे, 4 कने बजारे ला ओणे दे बाद, जालु दीकर से अपने रीती रिवाजा दे अनुसार नोई नी लेन, साफ नी होंदे तालु दीकर खाणां नी खांदे, कने उना दे वज्जां दे होर भी बतरे रिवाज थे, जिना जो सै मंदे थे, जियां की कटोरे, लोटे, कने तांबे दे भांडयां जो धोणा कने मांजणा। 5 ताई तां उना फरीसियां कने व्यवस्था जो सिखाणे बालयां उसयो पछुया, "की तरे चेले साडे सियाणे दियां रिवाजा जो नी मंदे?" सै तां बिना हथ धोयो रोटी खांदे न? 6 यीशुए उना जो जबाब दिता, "यशयाहे ठीक था, जिनी पबिन्न शात्र च त्हाडे साई कपटियां दे बारे च लिखया है, की ऐसे लोक गल्लां ने तां मेरा आदर करदे न, पर इना दे मन मिंजो ला बडे दूर न। 7 इना दी कितियो भक्ति मेरे ताई बेकार है, क्योंकि ऐ लोकां जो माणुए दियां दसियां गल्लां जो परमेस्वर दियां गल्लां दर्सई करी मनणे ताई बोलंदे न। 8 क्योंकि तुसां परमेस्वरे दे हुकमा जो मनणा बंद करी दितया है, कने माणुए दे रिवाजा जो मंदा दे न।" 9 कने यीशुए उना ने बोलया, "तुसां अपने बणायो नियमा जो मनणे ताई चलाकिया ने परमेस्वरे दे हुकम जो टाली दिन्दे न। 10 उदाहरण ताई, मूसा ने बोलया है, की अपने माता पिता दा आदर करा, कने जडा कोई अपने माता पिता जो श्राप दिंगा, सै पक्का मारी देणा। 11 पर तुसां लोकां जो ऐ दसदे न की, अपने माता पिता दी मदद नी करणा कने उना दे हिस्से दियां चिंजा उना जो छडी करी परमेस्वर जो देणा ठीक है। कने तुसां लोकां जो इजाजत दिन्दे अपने माता पिता जो ऐ बोलणे दी की जडा कुछ मै तुहांजो देणा था, सै मै परमेस्वर जो देणे दी कसम

खादियो है, कने मै हण तुसां दी मदद नी करी सकदा, इसला तुसां लोकां जो ऐ बोलंदे की हणे ला तुसां जो माता पिता दी सेबा करणे दी कोई जरूरत नहीं है। 13 इयां बोली करी, जिना रीती रिवाजां जो तुसां लोकां दीकर पुजाया है, सै परमेस्वरे दियां बोलियां गल्लां जो बेकार होणे दी बजा बणी जांदा है।" 14 तालु यीशुए लोकां जो अपने बाल सदीकरी उना जो बोलया, "तुसां सारे मेरी सुणा, कने समझा। 15 ऐसी कोई चीज नी ऐ जडी माणुए च बाहर ला आई करी उसयो अशुद्ध करदी है, पर माणुए जो अशुद्ध सै करदा है जडा उदे अंदरे ला निकलदा है। 16 जिस बाल सुणने ताई कन्न न सै ध्यान लाईकरी गल्ला जो सुणे, कने इसा गल्ला जो समझी ले।" 17 जालु सै भीडा दे बखे ला घरे दे अंदर गिया, तां उदे चेलयां यीशुए जडा बोलया था, उसा कहाणिया दा मतलब पछुया। 18 यीशुए उना ने बोलया, "क्या तुसां भी ऐसे ना समझन? क्या तुहांजो नी पता, की जडा भी खाणा माणु खांदा है, सै उसयो अशुद्ध नी करी सकदा। 19 क्योंकि सै उदे मने च नी, पर उदे पेटे च जांदी है, कने संडास च निकली जांदी है," यीशुए दा बोलणे दा मतलब ऐ था, की सारियां खाणे बालियां चीजा ठीक न। 20 लोक जडा बुरा सोचदे न, "सै ही बोलंदे न कने करदे, सै ही उना जो परमेस्वर दे सामणे अशुद्ध करदा है। 21 क्योंकि अंदर ला, मतलब की माणुए दा मन ही बुरियां चिजा दी जड है। बुरे-बुरे बिचार, व्यभिचार, चोरी, हत्या, परस्त्रीगमन, 22 लालच, बुराई, धोखा, लुचपान, बुरी नजर, निंदा, घमंड, कने मुखता निकलदी है। 23 ऐ सारियां गल्लां मने ला निकलदियां न कने माणुए जो अशुद्ध करदियां न।" 24 इदे बाद यीशु कने उदे चेले ओथु ला उटी करी सूर कने सैदा दे शेहरे दे अखे बखे बालिया जगा जो चली गे। ओथु सै इकी घरे च गिया, कने सै चांदा था, की उसयो कोई नी जाणी सके की सै ओथु स्कया है। पर लोकां जो बडा तोला पता लग्गी गिया था कि सै ओथु स्कया है। 25 कने इक जनानी उदी चर्चा सुणीकरी आई, जिसा दिया छोटिया कुडिया जो बुरिया आत्मा जकडया था, सै झट उदे पैरां च पेई गई। 26 सै जनानी यहूदी नी थी। सै सीरिया ग्राए दे सुफ्रिफिकी नाये दे इलाके च जमियो थी। कने उना उसला बिनती किती, की मेरिया कुडिया च बुरिया आत्मा जो कडी दे। 27 यीशुए उसा जो बोलया, "पहेले बचयां जो रजणा दे, क्योंकि बचयां ला रोटियां लेईकरी कुतयां दे अग्रे पाणा ठीक नी है।" 28 उना जबाब दिता, प्रभु ऐ सचच है, पर कुते भी तां बचयां दे मेजे हेठ रोटिया दे चूरे चारे जो खाई लेंदे न। 29 यीशुए उसा जो बोलया, "इसा गल्ला दा जबाब भरोसे ने दिता, उदिया बजा ने बुरी आत्मा तेरिया कुडिया च निकली गियो है कने तु हण घरे चली जा।" 30 कने उना अपने घरे आई करी दिखया कुडी मंजे पर पियो है, कने बुरी आत्मा कुडिया ला निकली गियो है। 31 फिरी यीशु कने उदे चेले अखे बखे दे इलाके जो छडी करी सिदेन शेहरे जो निकली गे। फिरी सै दिकापुलिस "दस शेहर" चे होईकरी गलील झिला बालिया जगा च पुज्जा। 32 कने लोक इक टोणे जो जडा थथलान्दा भी था, उसयो उस बाल लेईकरी आये कने बिनती किती की, इसयो खरा करी दे। 33 तालु सै उसयो भिडा ला लग लेई गिया, कने अपणियां उगलियां उदे कना च पाईयां, कने अपना थुक अपणियां उगलियां च लगाया कने उसी माणुए दी जीभा जो छूता। 34 कने स्वर्ग पासे दिखीकरी लम्बा साह लिया। फिरी उसी माणुए जो बोलया, "इफतह।" मतलब की "खुली जा" 35 कने इकदम ही सै साफ-साफ सुणना लग्गी पिया, कने बिना कुसी तंगिया ने सै साफ-साफ बोलणा लग्गी पिया। 36 तालु यीशुए उना जो समझाया की कुसी ने मत बोलंदे, पर उनी जितना उना जो समझाया उतणा ही सै बोलणा लग्गी पिया। 37 सै बडे ही हेरान होईकरी बोलणा लग्गे, "यीशुए जडा कुछ किता सै सब कुछ खरा ही कितया है," यीशु टोणयां जो सुणने दी, कने गुंगयां जो बोलणे दी शक्ति दिन्दा है।

8 उसी बकते दी गल्ल है जालु मते सारे लोक दिकापुलिस च यीशुए बाल गिठे होए, कने उना बाल खाणे ताई कुछ नी था, तां यीशुए अपने चेलयां जो सदीकरी उना जो बोलया, 2 ऐ लोक मिजों सोगी तिन्ना रोजां ला रह दे न। उना बाल खाणे ताई कुछ नी है कने मिजो इसा गल्ला पर तरस ओआ दा है। 3 कने इना च थोडे लोक बडे दुरे ला आयो थे। अगर मै इना जो भूखा घरे भेजी दें, तां इना रस्ते च थकी जाणा कने बेहोश होई जाणा। 4 उदे चेलयां उसयो जबाब दिता की, ऐथु सुनसान जगा च इतणी रोटियां कुनी कतां ला लोणियां, की ऐ सारे जणे रजी जान? 5 यीशुए उना जो पछुया, "त्हाडे बाल कितणियां रोटियां न?" उना बोलया, "साडे वाली सत रोटियां न।" 6 तालु यीशुए लोकां जो धरतिया पर बोणे दा हुकम दिता कने सै बेई गे, कने उदे बाद सै सत रोटियां लियां, कने

परमेश्वरे दा धन्यवाद करिके तोड़ियां, कने अपने चेलयां जो रोटीयां दे टुकड़े दिन्दा गिया ताकि से उना जो लोकां च बंडी देन। 7 उना बाल थोड़ियां छोड़ियां मछियां भी थियां, कने यीशू परमेश्वरे दा धन्यवाद करिके से अपने चेलयां जो दितियां, कने लोकां जो परोसणे दा हुकम देई दिता। 8 फिरी सारे लोक खाई करी रजी गे कने उदे बाद चेलयां बाकी बचियाँ रोटियां दे टुकड़यां जो सत टोकरियां च भरी लिया। 9 कने से लोक लगभग चार हजार थे, कने यीशू एना लोकां जो विदा किता। 10 कने यीशू चेलयां सोगी किस्तिया पर चडी करी दलमनुता इलाके जो चली सग्या। 11 फिरी फरीसी आई करी यीशू ने गल्ल बात करणा लगे, क्योंकि से उसयो फसाणा चांदे थे इस ताई उना उसयो पृथया स्वर्गे दा कोई चमत्कार दस। जिसने ए साबित होई जां की परमेश्वर तिजो शक्ति दितियो है। 12 उनी उना दे अविश्वास ला नराज होईकरी लम्बा साह लियो कने बोल्या, “इस युगे दे लोक कजो चमत्कार तोपेदे न? मै तुहांजो ने सच्च बोलदा है, की इस युगे दे लोकां जो कोई चमत्कार नी देणा है।” 13 फिरी सै फरीसियों जो छडी करी, अपने चेलयां सोगी किस्तिया पर चडी गिया कने गलील झिला दे चारो पासयां ला होंदे होए चली गया। 14 यीशू दे चले रोटियां लेणा भूली गियो थे, कने उदिया वजा ने उना बाल किस्तिया च इक रोटिया जो छडी करी कख भी नी था। 15 कने यीशू एना जो चेतावनी दिती कि, “फरीसियां कने हेरोदेस दे खमिरे ला बचणे ताई चौकने रेनयो।” 16 सै अपु चे बिचार करिके बोलणा लगे, कि यीशू ए इस ताई बोलया क्योंकि “साडे बाल रोटीयां घट न।” 17 ए जाणी करी यीशू एना ने बोल्या, “तुसां कजो अपु चे बिचार करा दे कि साडे बाल रोटिया नी न? क्या तुसां अपने मने जो इतणा कठोर बनाई लिया, तुसां क्या हले दीकर समझे नी? 18 तुसां बाल हखी कने कन्न होंदे होए भी नी दिखी कने सुणी सकदे। कने क्या तुहांजो कुछ भी याद नी है? 19 की ताल तुसां बचियाँ रोटियां दे टुकड़यां जो कितणियां टोकरियां च भरया था, जालु मै पंज हजार लोकां जो पंज रोटियां ला खुयाया था?” उना बोल्या, “बाहारा टोकरियां।” 20 “कने जालु चार हजार लोकां ताई सत रोटियां थियां तां कितणे टोकरे भरी करी चुके थे?” उना बोल्या, सत टोकरे। 21 यीशू एना जो बोल्या, “तुसां हाली दीकर कजो नी समझदे की मै कुण है?” 22 तालु यीशू कने उदे चले बैतसैदा शेहे च आणे, कने लोक कने अन्ने जो उदे बाल लेईकरी आणे कने उसला बिन्ती किती की इसी माणुए जो छ कने खरा करी दे। 23 तालु यीशू एउ अन्ने दा हथ पकडी करी उसयो ग्रा दे बाहर लेई गिया। कने यीशूए अपना थुक उदिया हखी पराला लाया कने उस पर हथ रखे, कने उसयो पुछया, “क्या तिजो कुछ मिल्ला दा है?” 24 उनी नजरां उपर करी के बोल्या, “मै माणुए जो दिखा दा है, पर सै साफ नी मिल्ला दे, सै मिजो सखां साई चलदे मिला दे न।” 25 तालु यीशूए दोबारा उदियां हखी पर हथ रखे, कने अन्ने गोरा ने दिखया, कने उदियां हखी ठीक होई गियां, कने उसयो सब कुछ साफ-सुथरा मिलणा लगी पिाया। 26 कने यीशूए उसयो हुकम दिता कि अपने घरे जो मुडी जा, पर ऐथु जडा होया गाणे बालयां जो दसणे ताई, गाणे दे अंदर पैर भी मत रखदा। 27 यीशू कने उदे चले बैतसैदा शेहे जो छडी करी कैसरिया फिलिपी शेहरां दे बखे आले ग्रां च चली गे, कने रस्ते च उनी अपने चेलयां जो पुछया, “की लोक मेरे बारे च क्या बोलदे न, की मै कुण है? 28 चेलयां जबाब दिता कुछ लोक बोलदे ने कि तुसां यहूना बपतिस्मा देणेबाले न; पर कोई-कोई एलियाहा बोलदा, कने कोई-कोई बोलदे न कि पुराणे जमाने दे परमेश्वरे दा संदेश देणेबालयां चे कोई इक है।” 29 फिरी यीशूए पुछया, “पर तुसां मिजो क्या बोलदे न?” पतरसे उसयो जबाब दिता, “तू मसीहा है, जडा परमेश्वरे दिया तरफा ला भेजया है।” 30 तालु यीशूए उना जो हुकम दिता की मेरे बारे च कुसी ने मत बोलदे की, मै मसीहा है कने परमेश्वरे मिजो भेजया है। 31 तालु यीशू अपने चेलयां जो सिखाणा लग्गा, कि मै, जडा माणुए दा पुत्र है, “मिजो मते दुख सेहणे पोणे न, कने यहूदी आनुवे, बड़े याजकां, कने यहूदी व्यवस्था जो सिखाणे बालयां मिजो अपनाणा नी है, कने मै मारी देणा है, कने फिरी मै तिन्ना रोजां बाद मरयां चे जिन्दा होई जाणा है।” 32 यीशूए उना जो ए गल्ल साफ तरिके ने बोली दिती। पतरस यीशूए जो बखिया लेई गिया कने इसा गल्ला पर झिडकणा लग्गा। 33 तालु यीशू पिच्छे मुडया कने चेलयां जो दिखया कने पतरसे जो झिडकी करी बोल्या, “शैताने सांई कम्म करणा बंद करा! मेरे सामणे ला दूर होई जा! क्योंकि तू परमेश्वरे दे सांई नी, पर तू माणुए सांई सोचदा है।” 34 यीशूए भिडा जो अपने चेलयां सोगी अपने बाल सदीकरी बोल्या, “जडा कोई मेरा चेला बनना चांदा है,

उसयो अपणिया शरीर दियां इच्छां कने जडियां तरकिबां बनाईयां उना जो छडी करी कने जडा मिजो तांई मरणे जो तैयार रेदा है, सेई मेरा चेला बणी करी मिजो पिच्छे चली सकदा है। 35 कोई माणु इयोदिया नी करणा कने अपने प्राणा जो बचाणा चांहाणा, उनी परमेश्वरे सोगी आत्मिक जिन्दगी जिणे दा मोका गबाई देणा है। पर जडा माणु मिजो पर भरोसा करणा कने मेरे शुभसमाचार दिया बजा ने मरगा उस माणुए जो परमेश्वरे सोगी सदा तांई दी जिन्दगी मिलणी। 36 अगर तुसां संसारे दा सब कुछ पाई लेंगे कने पर परमेश्वरे सोगी सदा दी जिन्दगी जिणे दा मोका गवाई दिगे, तां उदा क्या फायदा? 37 इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 38 तुहाडे च अगर कोई माणु मिजो अपना परमेश्वर कने मेरियां शिक्षा दा पालन करणे जो मना करदा है, क्योंकि तुसां डरदे न की गैर विध्वसी कने पापी लोकां तुहाडा मजाक उडणा। फिरी जालु मै माणुए दे पुत्रे, पबित्र स्वर्गादूतां सोगी धरतिया पर ओणा है, तां मै उना लोकां जो भी अपना चेला मनणे ला मना करी देणा है। तालु सारयां लोकां मेरी महिमा दिखणी जडी मेरे पिता दी है।”

9 यीशूए भिडा कने अपने चेलयां जो बोल्या, मै तुहांजो ने सच्च बोलदा है, “ऐथू खडोतयो लोकां चे कुछ लोक ऐसे न, उना तालु दीकर जिन्दे रेणा है जालु दीकर से परमेश्वरे दे राज्य जो शक्तिशाली स्पे च अपने बिच ओदे नी दिखी लेन।” 2 इक हफते बाद यीशू पतरस, याकूब कने यहूना जो इक उच्चे पहाडे पर लेई गिया कने ओथु उना सिबा होर कोई नी था, कने उना दे सामणे यीशूए दा रूप बदलुई गिया। 3 कने उदे कपडे चिटे होईकरी चमकणा लगे। धरतिया पर इयोदे चिटे कपडे कोई भी धोबी धोई करी नी करी सकदा। 4 तालु उना तिन्ना चेलयां, दो परमेश्वरे दे संदेश देणेबाले मूसा कने एलियाहा जो, जडे बडे पेहले जिन्दा थे उना जो यीशूए सोगी गल्लां करदे दिखया। 5 ए सब दिखीकरी पतरसे यीशूए जो बोल्या, “गुरू जी, साडा ऐथू रेणा ठीक है, इस तांई असां ऐथू तिन तम्ब बनादे न, इक तेरे तांई, इक मूसा तांई, इक एलियाहा तांई।” 6 पतरसे ए इस तांई बोल्या की, सै कने दुज्जे उदे चले डरी गियो थे, कने नी जाणुदे थे क्या बोलणा क्या करणा। 7 तालु इक बदल आया कने उनी उना जो अपना छाया हेठ ढकी लिया, कने उना बदले च परमेश्वरे जो बोलदे सुणया, “कि ए मेरा प्यारा पुत्र है, कने मै इसला खुश है, कने जडा ए बोलदा है, उसयो ध्याने ने सुणा।” 8 तालु उना अपने चारो पासे नजर मारी, तां मूसा कने एलियाहा ओथु नी थे, कने उना जो सिर्फ यीशु ही मिल्ला। 9 जालु यीशु कने उदे तिन्ने चले पहाडे ला उतरा दे थे, तालु यीशुए उना जो हुकम दिता कि, “कुसी जो भी मत दसदे कि तुसां क्या दिखया जालु दीकर मै, माणुए दा पुत्र मरयां चे जिन्दा ना होई जा।” 10 चेलयां जडा पहाडे पर होया उदे बारे च कुसी जो भी नी दसया, पर सै इसा गल्ला दे बारे चर्चा करणा लगे की, “मरयां चे जिन्दा होई जाणु।” इदा क्या मतलब था। 11 कने चेलयां उसला पुछया, “मूसा दी व्यवस्था दे अनुसार व्यवस्था जो सिखाणे बाले बोलदे थे, मसिहा ला पेहले एलियाहा ओणा था? अगर ओणा था, तां हाली दिकर कजो नी आया सै?” 12 यीशूए उना जो जबाब दिता, ए तां सच्च है कि एलियाहा पेहले आई करी सब कुछ सुधारणा है। पर कजो माणुए दे पुत्रे दे बारे च ऐसा लिखया है, की उनी बडे दुख सेहणे न, कने उसयो निच समझणा है। 13 पर मै तुसां ने बोलदा है, एलियाहा ता पेहले ही आई चुकया था, साडे अगुवां उदे कने बडा बुरा व्यवहार कितया। जियां सै करणा चांदे थे, जदिया की पबित्र शास्त्रां च बडी पेहले ही बोल्या था की उना करणा। 14 जालु यीशु कने तिन्ने चले बाकी चेलयां बाल मुडी करी आये, तां दिखया की उना दे चारो पासे तां बडी भरी भीड लगियो है, कने व्यवस्था जो सिखाणे बाले उना सोगी बेहस करा दे थे। 15 कने जियां ही सारे लोकां यीशूए जो दिखया, दिखदे ही बडे हेरान होये, कने उदे बाल दौडी करी आये कने उसयो नमस्ते किते। 16 यीशूए उना ला पुछया, “तुसां इना सोगी बेहस कुसा गल्ला पर करा दे न?” 17 भिडा चे इकी माणुए उसयो जबाब दिता, “गुरू जी, मै अपने पुत्रे जो तेरे बाल लेईकरी आया था, इदे च बुरी आत्मा है, जिना इसयो गूंगा बनाई दितया है। 18 जालु भी बुरी आत्मा उदे अंदर ओदी है, तां सै उसयो गुस्से ने जमिना पर पटकी दिन्दी, कने उदे मूए ला झाग निकलदा, कने दंदा पिंदा, सकत होई जांदा। मै तुहाडे चेलयां जो बोल्या की बुरिया आत्मा जो बाहर कडी दिया पर सै उना ला नी होया।” 19 ए सुणीकरी यीशूए उना जो जबाब दिता, “हे अविध्वसी लोकां, मै कालु दीकर तुहाडे सोगी रेणा, कने कालु दीकर तुहाडे

अविश्वास जो सेहन करणा? उस जागते जो मेरे बाल लोआ।” 20 तालू सै जागते जो यीशुए बाल लेई आये कने जालू बुरिया आत्मा यीशुए जो दिखया, तां उना आत्मा जागते जो झट मरोडया, कने धरतिया पर फकोडी दिता, कने सै मुए ला झाग निकालदे-निकालदे बिलाटियां मारणा लग्गा। 21 यीशुए जागते दे पिता ला पुछया, “ए कालू ला होआ दा है?” कने उनी बोल्या, “जालू ला ए लोका दिया नियणा होआ था। 22 मती बरी बुरिया आत्मा इसयो मारणे तांई अग्गी कने पाणिये च सुटी दितया था, पर अगर तू कुछ करी संके, तां सांझो पर तरस खाई करी साडी सहायता कर।” 23 यीशुए उना जो बोल्या, “अगर तू करी सकदा है, ए क्या गल्ल होई? जडा मिंजो पर भरोसा करदा है, उदे तांई सब कुछ होई सकदा है।” 24 बच्चे दे पिते झट पेरें च पेईकरी जोरे ने बोल्या, “प्रभू जी, मेरी सहायता करा की मैं तूसां पर भरोसा कर।” 25 जालू यीशुए दिखया, की मते सारे लोक उसयो दिखणे तांई गिठे होआ दे थे, तां उनी बुरिया आत्मा जो ए बोली करी झिडकां दितियां की, “हे बुरी आत्मा, जडी इसी जागते जो गंगा कने बेहरा बणा दी कने बोल्णा नी दे दी, मैं तिजो हुकम दीदा है की, इसयो छडी दे, कने फिरी कदी मत ओंदी।” 26 तालू बुरिया आत्मा चिलाई करी जागते जो मरोडी करी सटया, कने निकली गेई कने सै जागत बिना हिल्ले ओथु लाशा साईं पेई रिया था, ऐथु दीकर की मते लोक बोल्णा लग्गे की, ए तां मरी गया है। 27 पर यीशुए उदा हथ पकडी करी उसयो उठालया, कने सै खडोई गया। 28 बादे च जालू यीशु कने उदे चले घरे च किले थे, तालू उदे चेलयां पुछया कि, “एसेरियां आत्मा कने कजो नी कडी सके?” 29 यीशुए उना जो जबाब दिता, “एसेरियां बुरियां आत्मा जो प्राथना कने बरत कितयो बिना माणूनां जा बाहर नी कडी सके।” 30 बादे च यीशु कने उदे चेलयां उना जगा जो छडी दिता कने गलील प्रदेशे ला निकले। कने यीशु नी चांदा था की कोई उसयो जाणे की सै कुछु है। 31 क्योकि यीशु अपने चेलयां सोगी मता बकत बिताणा चांदा था कने उना जो सिखाणा चांदा था। कने उना ने बोला दा था की, “माणूए दा पुत्र, मेरे दुशमणा दे हथे पकडया जाणा है, कने उना लोका मिजो मारी देणा है, कने मरणे दे तरिये रोजे मरयां चे जिन्दा होई जाणा है।” 32 पर ए गल्ल उना दिया समझा च नी आई, कने चले पूछणे ला डरदे थे जडा यीशुए बोल्या था। 33 यीशु कने उदे चले कफरनहम शहरे च अपने घरे जो आये; कने जालू सै घरे अंदर थे, तालू यीशु उना जो पुछणा लग्गा, “रस्ते च तूसां कुसा गल्ला पर बेहसा दे थे?” 34 सै चुप रे, क्योकि उना रस्ते च ए बेहस कितियो थी कि, असां चे बडा कुण है। 35 तालू यीशु बेई गया कने बाहरां चेलयां जो अपने बाल गिठा होणे जो बोल्या, कने उना जो बोल्या, “जडा कोई सारयां ला महान बगना चांदा है, तां सै अपु जो सारयां ला निच समझे कने सारयां दा सेवक बणे।” 36 तालू यीशुए बखे इक बच्चा खुडोतया था, यीशुए बच्चे जो गल्ले लगाया कने चेलयां जो बोल्या। 37 “जडा कोई माणू इयां ही इक बच्चे पर दया दसदा है, सै सच्ची मेरा इज्जत मान करदा है। कने कोई मेरी इज्जत मान करदा है, तां सै मेरा ही नी बल्कि मेरे परमेश्वरे दी इज्जत मान करदा है, जिनी मिजो भेजया है।” 38 तालू यहन्ना उसयो बोल्या, “गुरू जी, असां इकी माणूए जो तेरे नाए दी शक्ति ने बुरियां आत्मा जो कडदे दिखया है, कने असां उसयो मना भी किता, क्योकि सै साडे सांई तेरा चेला नी था।” 39 यीशुए बोल्या, “उसयो मना मत करा अगर कोई मेरे नाये ने चमत्कार करदा है, क्योकि ऐसा कोई नी है, जडा मेरे नाए ने सामर्थ्य दे कम्म करे, कने जल्दी मिजो बुरा बोली संके, 40 क्योकि जडे साडे बेरी नी है, सै साडे सोगी साथी न।” 41 जडा कोई इक कटोरा पाणिये दा तुहांजो इस तांई पियां, की तूसां जो मसीह दे चले बोल्दे न, मैं तूसां ने सच्च बोल्दा हे की उनी अपना फल कुसा भी हालत च नी गवांणा है। 42 पर अगर कोई इना छोटयां चे, जडे मिजो पर भरोसा करदे न, उना दे पापां दी बजा बणे तां उना तांई ऐई ही खरा है की अपने गले च पथर बन्नी करी दरियाये च छलांग लगाई दे। 43 सारियां बुराइयां जो छडी दिथ्या जिना ने पाप होआ है! बुराइयां जो पुरे तरीके ने छडी दिया, जियां की तूसां इक हथ बड्ठा दे, जडा तुहाडे पापां दी बजा बणदा है। अगर तूसां स्वर्ग जो जांते न, भले ही तूसां बाल इक ही हथ है, सै तूसां तांई खरा है। कने अगर तूसां बाल दोनो हथ न, कने तूसां नरके जान, तां इसला भयानक कुछ नी है। (Geenna g1067) 44 नरके दिया उसा जगा पर जिथु सारयां दे जिस्मा जो खाणे बाले कीडे कदी नी मरदे कने बलियो अग्न कदी नी बुझदी। 45 सारियां बुराइयां जो छडी दिया जिना ने पाप होआ है, बुराइयां जो पुरे तरीके ने छडी दिया जियां की तूसां इक पेर बड्ठा दे, जडा

तुहाडे पापां दी बजा बणदा है। अगर तूसां स्वर्ग जो जांते न, भले ही तूसां बाल इक ही पेर है, सै तूसां तांई खरा है। कने अगर तूसां बाल दोनो पेर न, कने तूसां नरके जान, तां इसला भयानक कुछ नी है। (Geenna g1067) 46 नरके दिया उसा जगा पर जिथु सारयां दे जिस्मा जो खाणे बाले कीडे कदी नी मरदे कने बलियो अग्न कदी नी बुझदी। 47 सारियां बुराइयां जो छडी दिया जिना ने पाप होआ है, बुराइयां जो पुरी तरह छडी दिया जियां की तूसां इक हथी जो कडा दे, जडा तुहाडे पापां दी बजा बणदा है। अगर तूसां स्वर्ग राज्य जो जांते न, भले ही तूसां बाल इक ही हथ है, सै तूसां तांई खरा है। कने अगर तूसां बाल दोनो हथी न, कने तूसां नरके जान, तां इसला भयानक कुछ नी है। (Geenna g1067) 48 नरके दी उसा जगा पर जिथु सारयां दे जिस्मा जो खाणे बाले कीडे जडे कदी नी मरदे कने बलियो अग्न कदी नी बुझदी। 49 क्योकि हेर इनक जणा अग्नी ने शूद्र किता जाणा, जियां की बलिदान नुणे ने शूद्र होआ है। 50 नुण इक जरूरी चिज है, पर अगर उदा स्वाद चली जा, तां उदा स्वाद कियां वापिस लोणा? तूसां च लूँणे सांई खुबियां होणी चाईदियां, कने अपु चे मिली झूली कने शांतिया ने रिया।

10 यीशुए अपने चेलयां सोगी कपरनहम शहर छडी दिता, सै यहदिया प्रदेशे ला निकले कने यरदन खड्वा दे दूरे पासे चली गे। कने इक बरी फिरी भीड उदे बाल गिठी होई गेई, कने सै उना जो हरबरी सांई उपदेश देणा लग्गा। 2 तालू फरीसी उदे बाल आये कने उसयो परखणे तांई उसला पुछया, “क्या मूसा दिया व्यवस्था च इक मरदे जो अपणिया घरे बालिया जो तलाक देणे दा हक है?” 3 यीशुए उना जो जबाब दिता, “मूसा तुहांजो तलाक दे बारे च क्या हुकम दितया है?” 4 उना बोल्या, “मूसा हुकम दितया की त्याग पत्र लिखी करी अपनी घरे बालिया जो देई दिया कने उसा जो छडी दिया।” 5 यीशुए उना जो बोल्या, “तूसां हरबरी परमेश्वरे दे हुकम जो मरणे तांई मुकरी जांते न, क्योकि तूसां दा मन कटोर है, इस तांई मूसा ए लिखया था। 6 पर पबित्र शाशां च लिखया है कि जालू परमेश्वरे संसार बणया था, तालू उनी इक मर्द तांई इक जनानी बणाई। 7 जालू इक मर्द जनानिया ने बियाह करदा है, तां सै दोनो इक होई जान्दे न, क्योकि सै दोनो इक जान न। 8 कने सै दोनो हुण इक तन न, क्योकि हुण सै दो जणे नी, पर इक माणूए सांई न। 9 इस तांई उसा जनानिया कने मर्द जो बख नी करणा चाईदा जिना जो परमेश्वरे बियाह दे बंधना च बनया है।” 10 कने बादे च, जालू सै चेलयां सोगी घरे च किल्ला था, तालू चेलयां तलाक दे बारे च उसला पुछया। 11 यीशुए उना जो जबाब दिता, “जडा अपणिया घरे बालिया जो छडी करी दुईया ने बियाह करे तां सै उसा पेहलिया दे खिलाफ च व्यभिचार करदा है। 12 कने अगर घरे बाली अपने घरे बाले जो छडी करी कुसी होरसी ने बियाह करे, तां सै व्यभिचार करदी है।” 13 फिरी लोक बचयां जो यीशुए बाल लोणा लग्गे ताकि सै उना पर हथ रखीकर उना जो आशीष दे, पर चेलयां उना लोकां जो डांटाया। 14 यीशुए जो ए सब दिखीकरी गुस्सा आया कने उना जो बोल्या, “बचयां जो मना मत करा कने इना जो मेरे बाल ओणा दिया, जडे इना बचयां सांई भरोसेमंद न उना परमेश्वरे दे राज्य च रेणा। 15 मैं तूसां ने सच्च बोल्दा है, परमेश्वरे अपने राज्य च सिर्फ उना लोकां जो ओणा देणा है जडे परमेश्वरे दे राज्य जो बचयां सांई अपनादे न।” 16 कने यीशुए बचयां जो गल्ले ने लाया, कने उना पर हथ रखीकरी यीशुए आशीष दिती। 17 जालू यीशु कने उदे चेलयां यात्रा करणा शुरू किति थी, तां इक माणू उदे बाल दौडी करी आया कने इज्जत मान तांई उदे पारें अग्रे डेई पिया कने उसला पुछणा लग्गा की, “हे उताम गुरू, मैं क्या कम्म करां की परमेश्वर मिजो हमेशा दी जिन्दगी दे? (aiōnios g166) 18 यीशुए उसयो बोल्या, तूसां मिजो कजो उताम बोल्दे न, उताम तां सिर्फ इक ही है, सै परमेश्वर है।” 19 “तू परमेश्वर दे हुकमा जो तां जाणदा है की: हत्या नी करणी, व्यभिचार नी करणा, चोरी नी करणी, झूठी गबाई नी देणी, बेईमानी नी करणी, कने अपने माता पिता दा आदर करणा।” 20 उनी यीशुए बोल्या, “गुरू जी, इना सबना हुकमा जो तां मैं बचपने ला ही मनदा आया है।” 21 यीशुए उस पासे नजर करी के प्यारे ने दिखया कने उसयो बोल्या, “इक कम्म है जडा तिजो हालती भी करणे दी जरूरत है। जा, कने जडा कुछ तेरा है उसयो बेची करी गरीबां जो देई दे, तां तिजो स्वर्ग दा धन मिलणा, इयां करणे बाद आ कने मेरा चेला बणिया।” 22 तालू माणूए यीशुए दी इसा गल्ला जो सुणया, कने उदे चेहेरे पर उदासी छाई गेई, कने सै दुखी होईकरी चली गया, क्योकि सै बडा भरी अमीर था। 23 यीशुए चारो पासे दिखीकरी

अपने चेलयां जो बोलया, “अमीरां दा परमेश्वरे दे राज्य च जाणा बडा मुशकिल है।” 24 तालू चले यीशुए दियां गल्लां सुणी की हेरान होईं गे, यीशुए बोलया मेरे भाईयो, जडा कोई अपने पैसयां उपर भरोसा करादा है, उना तांई परमेश्वरे दे राज्य जो जाणा बडा मुशकिल है। 25 ऊंटे दा सुइया दे नाके चे निकलना असान है, पर अमीरां दा परमेश्वरे दे राज्य च जाणा बडा भरी मुशकिल है। 26 जालू चेलयां ऐ सुणया, तां सै बडे हेरान होईंकीरुं अपु चे बोलणा लगे, “तां कुण अपने पापां दी सजा मिलणे ला बची सकदा है?” 27 यीशुए उना दे पासे दिखीकीरुं बोलया, “जडा माणु नी करी सकदे, पर सै परमेश्वर करी सकदा है, क्योंकि परमेश्वरे सब कुछ करी सकदा है।” 28 पतरस यीशुए जो बोलणा लग्गा, सांडो क्वा मिलणा? असां तां तुहाडे चले बणने तेई अपना सारा कुछ छडी दितया है। 29 यीशुए चेलयां जो बोलया, “मै तुहांजो ने सच्च बोलदा है, मेरे चले बणने तांई कने शुभममाचार दा प्रचार करणे तांई तुसां च जिनी भी घरे जो छडया, या अपने भाई बेहण, माता-पिता, अपणिया जमिना जो छडया है। 30 उसयो इस बकते सौ गुणा ना मिल्ला हो, जिनी अपना टबर, भाई कने बेहणां, माता-पिता, बाल बचयां जो या खतरां जो छडया हो। पर उसयो तकलिफां कने ओणे बाले बकते च हमेशा दी जिन्दगी मिलणी है। (aiōn g165, aiōnios g166) 31 पर मते लोक न जडे हुण महान कने अग्रे न, उसी बकते सै पीच्छे होणे, कने जडे पीच्छे न, सै उस बकते पेहले होणे ना।” 32 सै यरुशलेम शेर जो जांटे बेले जालू रस्ते च थे, तां यीशु उना दे अग्रे-अग्रे चलया था, कने उदे चले बडे हेरान होए की जियुं सै चलयो थे, ओथु मते लोका उना दा बिरोध किता था, कने जडे लोके उणे सोगी थे, सै इसा गल्ला ला डरयो थे, की यरुशलेम शेर च उना दा क्या होणा। तालू सै फिरी उना बाहरां चेलयां जो इकी तरफा लेईकीरुं उना ने गल्लां बोलणा लग्गा, जडियां उस सोगी होणे बालियां थियां। 33 “दिखा, ध्याने ने सुणा, असां यरुशलेम शेरहे जो चलयो न, कने मै माणुए दा पुत्र बड्डे याजकां कने यहूदी व्यवस्था जो सिखाणे बालयां दे हथे पकडया जाणा है, कने उना मिजो मौत दी सजा देणी है, कने होर जातियां दे हथे देई देणा है। 34 कने उना मेरा मजाक उडणा है, मिजो पर थुकणा, कने मिजो कोडे मारणे, कने मिजो मारी देणा है, कने मै तिजे दिने मरयां च जिंटे होई जाणा है।” 35 याकूब कने यहूना दो भाई, जडे जब्दी दे पुत्र थे उना यीशुए बाल आई करी बोलया, “गुरु जी, असां कुछ तिजो ला मंगणा चांटे न, सेई तू साडे तांई करा।” 36 यीशुए उना ला पुछया, “तुसां मंगा चांटे न की मै तुहाडे तांई करे?” 37 उना यीशुए जो बोलया, “असां तुसां दे महिमामय राज्य च तुसां दे बखे इज्जत बाली जगा च बोणा चांटे न। असां च इक तुहाडे खबे कने इक सज्जे हथे बखे बोणा चांटे न।” 38 यीशुए उना जो बोलया, “तुसां जो नी पता कि तुसां क्या मंगा दे? हुण जडे दुख मै सेहणे न, क्या तुसां उना दुखां जो सेहन करी सकदे न? क्या तुसां मरणे तांई तैयार न क्योंकि मै जल्दी ही मरणे बाला है?” 39 उना उसला बोलया, “असां करी सकदे न।” यीशुए उना ने बोलया, “तुसां भी सारे दुख सेहणे न, जियां मै सेहणे। तुसां जो भी मारया जाणा है, जियां मिजो मारणा है। 40 मिजो ए तय करणे दा हक नी है, की मेरे सज्जे कने खबे कुसयो सै जगा मिलणी है, सै जगा उना लोकां तांई न, जिना जो परमेश्वर चुणयां है।” 41 ए सुणीकीरुं बाकी दसो चले याकूब कने यहूना पर गुस्सा करणा लग्गे। 42 तां यीशुए उना जो अपने बाल सदीकीरुं उना जो बोलया, “तुहांजो पता है ना, कि जडे लोक प्रधान मने जांटे थे, सै अपने अधिकारां दा इस्तेमाल अपने अधीन लोकां दे उपर हक जमाणे तांई करदे न। उना दे अगुवे लोक अपणी गल्ल मनाने तांई हक जतांटे न। 43 पर तुहांजो उना सांई नी होणा चांईदा, तुहांजो चे जडा महान बणना चांदा है, उसयो बाकियां दी सेवा करणी चांईदी। 44 कने जडा कोई तुसां चे प्रधान बणना चांदा हो, सै सारायां दा नौकर बणे। 45 मै ए इस तांई बोलदा है क्योंकि मै, माणुए दा पुत्र, इस संसारे च सारायां दी सेवा करणे तांई आया है, मै इस तांई नी आया कि लोकां ला अपणी सेवा करां। मै तां लोकां जो पापां ला छुटकारा करणे तांई अपने प्राण कीमत च देणा आया है।” 46 यरुशलेम शेरहे दे रस्ते च जांटे, यीशु कने चले येरीहो च आये, जालू सै कने उदे चले कने इक बडी भीड येरीहो शेरहे ला निकला दी थी, इक बरतिमाई नाए दा अन्ना भिखारी सडका दे बखे बैठया था। सै तिमाई दा जागत था। 47 सै ए सुणीकीरुं की यीशु नासरत शेरहे ला है, जडा रस्ते च चलया था, डडी-डडी करी बोलणा लग्गा, “हे यीशु, राजा दाऊदे दे बंशज, मिजो पर दया कर।” 48 उसयो मतयां झिडकां दीतियां की चुप रे, पर सै होर जौरे ने बोलणा लग्गा की, “हे यीशु, राजा दाऊदे दे बंशज, मिजो पर दया कर।” 49

तालू यीशुए ए सुणया कने स्की करी बोलया, “उसयो ऐथू लोआ।” कने लोकां उस अन्ने जो सदीकीरुं बोलया, “हिम्मत रख, उठ सै तिजो सदा दा है।” 50 कने अन्ने माणुए झट अपने उपर ओडियो चादर सुटी कने उठी करी यीशुए बाल आया। 51 यीशुए उसयो पुछया, “तू क्या चांदा है की मै तेरे तांई करे?” अन्ने उसयो बोलया, “गुरु जी, ऐ की मिजो मिलणा लग्गी पोए।” 52 यीशुए उसयो बोलया, “मै तिजो ठीक करा दा क्योंकि तू मिजो पर भरोसा करादा है। हुण तू घरे जो जाई सकदा है” कने उसयो मिलणा लग्गी पिया, कने रस्ते च यीशुए पिच्छे चली पिया।

11 जियां यीशु कने उदे चले यरुशलेम शेरहे दे बखे पुज्जे, सै जैतून रखां दे पाहडे दे कंडे बैतफणे कने बैतनिय्याह गांरे च आये, तां यीशुए अपने दो चेलयां जो ऐ बोली करी भजया, 2 “सामणे दे गां च जा, कने ओथु पुजदे ही तुहांजो इक गधिया दा बच्चा बनया मिलणा है, उदे उपर हली कोई नी बैठया था। सै खुंटे च बनया होणा उसयो खोली करी लेई ओआ। 3 अगर कोई तुहांजो ला पुच्छे, कि ऐ क्या करा दे न? तां बोलनयो, कि साडे प्रभु जो इदी जरूरत है। कने उनी जल्दी ही बापस करी देणा है।” 4 चेलयां गांरे च जाई करी उस गधिया दे बच्चे जो इक घरे दे दरबाजे बखे खुंटे ने बनया दिखया, कने सै उसयो खोलणा लग्गे। 5 कने जडे ओथु खडुतयो थे उना चे कोई-कोई बोलणा लग्गे की ऐ क्या करा दे न, इस गधी दे बच्चे जो कजो खोला दे न? 6 जियां यीशुए बोलया था, तियां ही चेलयां उना जो बोलीं दिता उना गधिया दे बच्चे जो जाणा दिता। 7 कने दो चेलयां उस गधिया दे बच्चे जो यीशुए बाल लांदा, कने उस पर अपने उपरे बाले कपडे उदिया पीठी पर पाई दिते कने यीशु उस पर बेई गिया कने यरुशलेम शेरहे दी पास्से चलणा लग्गे। 8 तालू मतयां सारायां लोकां अपने कपडे रस्ते च बडाई दिते कने उदा आदर मान किता। कने केईयां रस्ते च पत्रां बालियां डालीयां बडी-बडी करी बडाई करी उदा मान आदर किता। 9 कने थोडे लोक यीशु दे अग्रे-अग्रे चलयो थे, कने थोडे लोक पिच्छे चलयो थे, सै सारे खुशिया ने जौरे ने बोला दे थे, “होशाना; परमेश्वर इसला खुश है जडा उदे हके सोगी ओंदा है। 10 परमेश्वरे दा अग्रह ओणे बाले राज्य पर है, जडे साडे सियाणे राजा दाऊदे दे राज्य सांई है, धन्य हो। परमेश्वर जडा स्वर्ग च रंदा है, उदी होशाना हो।” 11 जालू यीशु यरुशलेम शेरहे च पुज्जा कने तां सै परमेश्वरे दे मंदरे दे अंदर गिया, कने सारे पासे दिखया कने सै अपने बाहरां चेलयां सोगी बैतनिय्याह गांरे जो मुडी गिया, क्योंकि संज होई गियो थी। 12 दुज्जे दिने जालू यीशु कने उदे चले बैतनिय्याह गांरे ला यरुशलेम शेरहे जो चलयो थे, तालू यीशुए जो भूख लग्गी। 13 कने उनी पतयां ने भरया होया अंजीर दा सख दिखया कने सै उदे बखे गे, ताकि कुछ खाणे जो मिली जा, पर ओथु पतयां जो छडी करी होर कोई फल नी मिल्ला, क्योंकि फल देणे दी रित नी थी। 14 कने यीशुए उस सखे जो बोलया, “अज्जे ला बाद तेरा फल कुनी नी खाना। कने उदे चले सुंगा दे थे।” (aiōn g165) 15 “उदे बाद यीशु कने उदे चले सै यरुशलेम शेरहे च आणु,” उनी उना लोकां जो परमेश्वर दे मंदरे ला कडी दिता, जडे ओथु जानवर कने चिजां खरीदणे बचने दा कम्म करा दे थे। यीशुए पैसयां बदलने बाले मंजे जो, कने कबुतरां जो बेचणे बालयां दे पिजरां जो बाहर सुटी दिता। 16 “कने उनी लोकां जो हुकम दिता की मंदरे दे अंगणे ला होईकीरुं चिजां जो लिणा बंद कर। 17 कने यीशुए उना जो बोलया, पबित्र शाब्ब ए बोलदा की, लोक मेरे घरे जो प्राथना दा घर बोलेदे न, जियुं सारे लोक प्राथना तांई ओंटे न? पर तुसां तां इसयो डाकुआं ला भरईयो गुफा सांई बणाई दितया है।” 18 बड्डे याजकां कने यहूदियां दिया व्यवस्था जो सिखाणे बालयां ए सुणया, जडा यीशुए बोलया कने किताया, तां सै उसयो मारणे दा मौका तोपणा लग्गे, पर सै लोकां ला डरा दे थे, क्योंकि सारे लोक यीशुए दियां गल्लां ने हेरान थे। 19 जालू संझा दा बेला होया, तां यीशु कने उदे चले शेरह छडी करी बैतनिय्याह गां जो मुडी गे। 20 फिरी ब्यागा तडके बेले यीशु कने उदे चले यरुशलेम शेरहे जो ओआ दे थे, तालू उना अंजीर दे सखे जो दिखया तां सै सुकी गिया था। 21 पतरसे जो सै गल्ल याद आई, कने उनी यीशुए जो बोलया, “गुरु जी, दिख। ए अंजीर दा सख जिसयो तू श्राप दितया था सै सारा सुकी गिया है।” 22 यीशुए उसयो जबाब दिता की, “परमेश्वरे पर भरोसा रख जडा तुसां मंगे सै सारा कुछ मिलणा। 23 मै तुसां ने सच्च बोलदा है, की अगर कोई इस पहाडे जो बोले की, की ऐथू ला उठ कने समुंद्रे च जाई करी पेई जा, कने अपने मने च कोई शक नी रखे, पर भरोसा रखे, की जडा मै बोलदा है सै होई जा, तां उस तांई तदिया होई जाणा है। 24 इस तांई मै

तुहांजो बोलदा है की जडा कुछ तूसां प्राथना करिके मंगा, तां भरोसा करी लिया की तुहांजो मिली गिया है, तां से तुहांजो मिली जाणा। 25 जालू कदी तूसां प्राथना करदे न, तां अगर तुहाडे मने च कुसी ताई बैर है, तां उसयो माफ करी दिया, इस ताई की तुहाडा पिता परमेश्वर जडा स्वर्ग च रेंदा है, उनी तूसां दे पाप माफ करी देगे। 26 पर अगर तूसां माफ नी करगे, तां तुहाडे पिता परमेश्वरे जडा स्वर्ग च है, उनी भी तुहाडा पाप माफ नी करणा।” 27 यीशु कने उदे चेले यरूशलेम शेहरे जो मुडी करी आये, जालू सै मंदरे च गुमा दा था तां बहुये याजक कने यहदी व्यवस्था जो सिखाणे बालयां कने यहदी अगुवे उदे बाल आये कने पछणा लगे, 28 “उना उसयो बोलया, ऐ कम्म तू कुसी हके ने करा दा है? कने तिजो ऐ हक कुनी दितया है?” 29 यीशुए उना जो बोलया, “मै भी तुहांजो ला इक गल्ल पछदा है, अगर तूसां मिजो जबाब दिगे, तां मै दसगा कि ऐ कम्म मै कुसी हके ने करदा है। 30 यहन्ना जो लोकां जो बपतिस्मा देणे ताई कुनी भेजया था? क्या सै परमेश्वरे भेजया था या माणुऐ? मिजो दसा।” 31 तालू सै अपु च बोलणा लगे कि अगर असां बोलया कि, “परमेश्वर जडा स्वर्ग च है उनी भेजया है, तां यीशुऐ सांझो ला पुछणा, कि तूसां यहन्ना पर भरोसा कुनी किता?” 32 अगर असां बोलया की, सै माणुऐ दे पासो ला आया है, तां से जबाब नी देई सके, क्योकि सै उना लोकां ला डरदे थे, जडे ऐ मंदे थे की यहन्ना परमेश्वर दे पासो आया इक सच्चा परमेश्वरे दा संदेश देणेवाला था। 33 उना यीशुऐ जो जबाब दिता, सांझो नी पता कुनी यहन्ना बपतिस्मा देणेवाले जो भेजया। यीशुऐ उना जो जबाब दिता, “मै भी तुहांजो नी दसणा की मिजो ऐसे कम्म करणे दा हक कुनी दितया है।”

12 इदे बाद, यीशु यहदी अगुवां ने कहाणियां च गल्लां करणा लग्गा, इक माणुऐ बागे च अंगर लाये। उनी अंगुरा दे बागे दे चारों पासे बाड लगवाया, कने इक जगा अंगुरा दे रसे जो निचोडने ताई बनाई, कने निगरानी रखणे ताई इक उचिया जगा पर कमरा बनाया। फिरी उनी बागे जो कुछ किसाना जो ठेके पर देई दिता, कने परदेस चली गिया। 2 फिरी जालू अंगुर पक्की गे, तां उनी अपना इक नोकर ठेकेदारे बाल अपना अंगुरे दे बागे दा हिस्सा लोणे ताई भेजया। 3 पर ठेकेदारां उसयो पकडया कने मारी कुटी करी बिना कुछ दितयो खाली हथ भेजी दिता। 4 बागे दे मालिके इक होर नोकर भेजया, ठेकेदारां उदा सिर फोडया कने उदी बेस्ती किती। 5 फिरी बागे दे मालिके इक होर नोकरे जो भेजया, कने उना उसयो मारी दिता। तां उनी होर मतयां जो भेजया, पर ठेकेदारे उना चे केईयां जो कुटया, कने केईयां जो मारी दिता। 6 हुण बागे दे मालिके बाल भेजणे ताई सिर्फ इक ही माणु था। जडा उदा अपना प्यारा जागत था। उना बाल भेजया की सै मेरे जागते दी इज्जत करगे। 7 पर उना ठेकेदारां उदे जागते जो ओदे दिखया, कने उना अपु चे सलाह किती करी, ऐई तां बारिस है, इनी तां अंगुरे दे बागे दा मालिक बनाना, ओआ असां इसयो मारी दिन्दे न, तां सारी जयादात साडी होई जाणी। 8 कने उना उसयो पकडी करी मारी दिता, कने उदी लाशा जो अंगुरे दे बागे बाहर फेंकी दिता। 9 “तां हुण, अंगुर दे बागे दा मालिक क्या करगा? क्या उनी आई करी उना ठेकेदारां जो खतम करी दिगां, कने दाखां दे बागे दा ठेका कुसी होरसी जो दिगा। 10 क्या तूसां पबित्र शांभे दा ऐ हिस्सा नी पढया जिदे च मसीह दी तुलना इक खास पथरे ने करदा है? सै बोलदा है, जिस पथरे जो राजमिश्त्रिये बेकार बोलया था कने सुटी दितया, सै ही पथर, सबना ला खास पथर बणी गिया। 11 प्रभु परमेश्वरे इयोदिया किता, कने साडिया नजरा च ऐ बडा ही अनोखा है।” 12 तां उना उसयो पकडना चाया, क्योकि सै समझी गियो थे, उनी साडे बरोध च ऐ कहाणी बोलियो है। पर सै यीशुऐ जो पकडी नी सके क्योकि सै लोकां ला उदा दे थे, इस ताई सै यीशुऐ जो किल्ला छडी करी चली गे। 13 तालू उना उसयो गल्लां च फसाणे ताई केई फरीसियां कने राजा हेरोदियां दे दले दे लोकां जो उस बाली भेजया। 14 उना आई करी उसयो बोलया, “गुरु जी, सांझो पता है की, तूसां हमेशा सच्च बोलदे न, कने तूसां इसा गल्ला ला नी डरदे की दुजजे लोक तुहाडे बारे च क्या सोचदे न, कुसदी परबाह नी करदे न, क्योकि तूसां सारयां कने इकोदिया व्यवहार करदे न, तू तां परमेश्वरे दा रस्ता सचाइया ने दसदा है। तां हुण सांझो दसा। क्या महाराजा जो कर देणा साडिया व्यवस्था दे खिलाफ है या नही? 15 असां जो कर देणा चाईया या नी देणा चाईदा?” यीशुऐ उना दा कपट जाणी करी उना जो बोलया, “तूसां मिजो ला कुछ गलत बुलबाई करी फसाणे दी कोशिस कजो करा दे न? इक चांदी दा सिक्का मिजो बाल लोईकरी ओआ, मै

उसयो दिखें।” 16 सै लोई आये, कने यीशुऐ उना जो पुछया, “मिजो दसा की इस चांदी दे सिक्के च कुसदा चित्र बणया कने कुसदी मोहर लगियो?” उना बोलया, “महाराजा दा।” 17 यीशुऐ उना जो बोलया, “जडा महाराजा दा है, सै महाराजे जो दिया, कने जडा परमेश्वरे दा है, सै परमेश्वरे जो दिया।” तालू सै उस पर बडे हेरान होए। 18 यहदिया दे धर्मी दल दे थोडे लोक जिना जो सदकी भी बोलदे न, तालू थोडे यहदी अगुवे यीशुऐ बाल आये। कने सै भरोसा नी करदे थे, कि लोक मरणे दे बाद फिरी जिन्दे होई सकदे ने। उना यीशुऐ ला पुछया, 19 “गुरु जी, मूसा साडे ताई लिखया है, की अगर कुसी दा भाई बिना ओलादी मरी जा, कने उदी घरे बाली जिन्दा रे, तां उदा भाई उदिया घरे बालिया सोणी बियाह करिके अपने भाई ताई बंश पैदा करे। 20 स्तुजियां यीशुऐ जो इक कहाणी सुणाई की, इक घरे च सत भाई थे। सबसे बडे भाईये इकी जाननिया ने बियाह किता, जालू सै मरी गया तां उदी कोई भी ओलाद नी थी। 21 तां दुऐ भाईऐ उसा सोणी ही बियाह करी लिया कने सै भी बिना ओलादी मरी गिया, कने इयां ही तिजे भाईये किता, 22 कने सतां भाईयां उसा ने बियाह किता कने सतो भाई बिना ओलादी मरी गे। सबना दे बाद सै जनानी भी मरी गेई। 23 हुण, सांझो दस सतां भाईयां उसा जाननिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बाली होणी?” 24 यीशुऐ उना जो बोलया, “तूसां दो बज्जा ने गलत न, तूसां पबित्र शांभे जो नी जाणदे ने जडा मरणे दे बाद लोकां जो जिन्दा रेणे दे बारे च दसदा है। तूसां ऐ नी जाणदे न की परमेश्वरे बाल मरयो लोकां जो जिन्दा करणे दी शक्ति है। 25 क्योकि जालू उना मरयो च जिन्दा होणा, तां उना लोकां च जिन्दा नी होणे; जियां स्वर्ग च रेणेवाले स्वर्गदूत बियाह नी करदे। 26 मरयां च जिन्दा होणे दे बारे च, तूसां क्या मूसा दिया कताबां च नी पढया जालू झाडिया जो अगग लगियो थी, तां उसा जगा पर क्या होया था, परमेश्वरे मूसा ने गल्ल किती कने बोलया, मै अब्राहम, इसहाक, कने याकूब दा परमेश्वर है, जिदी ऐ अराधना करदे थे। 27 ताई तां मरयो लोकां दा परमेश्वर नी है। पर जिन्दया दा परमेश्वर है, तूसां बडे गलत न।” 28 कने यहदी मूसा दी व्यवस्था जो सिखाणे बालयां च इकी ऐ चर्चा सुणी, जडी यीशु कने सदकी अपु च करा दे थे, कने ऐ जाणी करी की यीशुऐ उना जो ठीक तरीके ने जबाब दिता, तां सै यीशुऐ बाल आया कने पुछया, “की परमेश्वरे जडे भी हुकम दितयो न, उना सारयां च सारयां ला बडा हुकम कुण दिया है?” 29 यीशुऐ जबाब दिता, “सबना हुकमा ला बडा हुकम ऐ है: इब्राएल दे लोके तूसां सुणा। प्रभु साडा परमेश्वर जिसदी असां अराधना करदे न, सै इक ही प्रभु है। 30 कने तू अपने प्रभु परमेश्वर ने अपने सारे मने ने, कने अपने सारे प्राणा ने, कने अपणिया सारिया अकला ने, कने अपणिया सारिया शक्तियां ने प्यार रखनयो। 31 परमेश्वर दा दुज्जा हुकम ऐ है, की जितणा तूसां अपने आपे जो प्यार करदे न, दुज्यां ने भी उतणा ही प्यार करा, परमेश्वरे इना दो हुकमा ला बहुे होर कोई हुकम नी दितया न।” 32 मूसा दिया व्यवस्था जो सिखाणे बालयां उसयो बोलया, “गुरु जी,” बिलकुल ठीक। तू सच्च बोलया है, सै ही परमेश्वर है, कने उसयो छडी करी होर कोई नी है। 33 कने उसला सारे मन, कने सारिया अकला ने, कने सारे प्राणा ने, कने सारिया ताकता ने प्यार रखणा, कने पडोसियां ने अपणयां सांई प्यार रखणा, ऐ सब परमेश्वरे जो जानवरां दियां बलियां चढाणे ला जादा जरूरी है। 34 जालू यीशुऐ दिखया की उनी सोची समझी करी जबाब दिता, तां यीशुऐ उसयो बोलया, “तू परमेश्वरे दे राज्य च प्रवेश करणे दे नेडे है।” कने फिरी होर कुसी जो उसला कुछ पछणे दी हिम्मत नी होई। 35 फिरी यीशुऐ परमेश्वरे दे मंदरे च उपदेश दिन्दे होये बोलया की, व्यवस्था जो सिखाणे बाले कियां बोली सकदे न की मसीह राजा दाऊदे दा बंशज है? 36 ऐथु दिकर कि राजा दाऊद, जालू परमेश्वर दी पबित्र आत्मा उसयो बोलणे दी शक्ति दिती, तां उनी बोलया, “परमेश्वरे मेरे मसीह जो अपने बखे इज्जत मान कने हक दी पदवी च बोणे ताई बोलया था, हालांकि उनी उदे सारे दुशमणा जो पूरी तरह उदे अनीन करी दिता।” 37 “ऐथु दिकर कि राजा दाऊदे भी मसीह जो प्रभु करी के बोलया, तां सै दाऊद दा बंशज कियां होया?” कने लोक उसयो बडे मजे ने सुणदे थे। 38 यीशुऐ अपने उपदेश च उना ने बोलया, “व्यवस्था जो सिखाणे बालयां ला साबधान रिया, जडे लोकां जो दसणे ताई लम्बे कने मेगे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन, 39 कने यहदी जंज घरां च खास-खास आसना पर बोणा पसंद करदे न। कने खांदे बेले खास जगा चांदे न। 40 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे ताई बडी

देरा दीकर प्राथना करते न, परमेश्वर ला इना जो बड़ी बुरी सजा मिलणी है। 41 यीशु मंदरे दे भंडोरे सामणे बेईसरी दिखा दा था की लोक परमेश्वर दे मंदरे दे भंडोरे च कियां पैसा पांदे न, कने मते अमीरां लोकां बडा सारा पैसा पाया। 42 इतणे च इक गरीब बिधवा आई करी दो तांबे दे सिक्के पाये, जिना दी कीमत बड़ी घट थी। 43 तालू उनी अपने चेलयां जो अपने बखे सदीकरी बोलया, "मैं तुसां ने सच्च बोतदा कि इस मंदरे दे भंडोरे च जितणया भी दान पाया है, उना सबना ला बदीकरी इना गरीब बिधवा पाया है।" 44 क्योंकि सबना अपने भंडारे चे थोडा दिया दिता, पर इना गरीब बिधवा इसा बाल जितना भी था, सारा पाई दितया है।

13 जालू यीशु मंदरे ला निकला दा था, तां उदे चेलयां चे इकी उसयो बोलया, "गुरू जी, दिख, कितणियां छेल ईमारता न कने बड़े-बड़े पत्थरां न बणियां न कने कितणे-कितणे बड़े घर न।" 2 यीशुए उसयो बोलया, "तुसां इना बड़े-बड़े घरां जो दिखा दे न, इक दिन इना चे ऐथु इक भी घर नी बचणा है, ऐथु दीकर की इक पथरे उपर पथर नी रेंगा है, जडा डायी नी जांगा।" 3 जालू यीशु मंदरे ला जैतनु सखां दे पाहडे पर चली गिया कने मंदरे दे सामणे बेई गिया, तां पतरस, याकूब, यहूना कने अन्दियास यीशुए बाल अये कने तालू यीशुए बाल कोई नी था, कने उसला पुछया, 4 "सांझो दस ऐ सब कुछ काल होणा है? कने जालू ऐ सब कुछ पूरा होणेबाला होंगा तां उदा क्या निशान होणा है?" 5 यीशुए उना ने बोलया, ध्यान रखयो की तुहांजो कोई धोखा न दे। 6 मते सारे लोकां मेरे नाए ने दाबा करिके ओणा है। उना बोलणा है, मैं मसीहा हूँ कने उना मतयौ लोकां जो भटकाणा है। 7 जालू तुसां लडाईयां, कने लडाईयां दियां गल्लां सुणणे तां डरदे मत; क्योंकि इना दा होणा जरूरी है, पर तालू संसारे दा खातमा नी होणा है। 8 क्योंकि जातियां ने जातियां कने राज्य ने राज्यां इक दुज्जे ने लडाईयां करणियां न। कने हर कुशी हिलण होणे न कने अकाल पोणे न। ऐ तकलीफ कने दुख पैदिया होणा जदिया की जालू मों बच्चे जो जन्म देणा लागदी है। 9 "पर तुसां जो हमेशा चौकने रेणा चाईदा, क्योंकि लोकां तुहांजो कैदी बणाना कने यहदी जंज घरा च देणा कने तुहांजो मार पोणी, कने मेरिया बजा ने तुहांजो हाकिमा कने राजयां सामणे न्याय ताई महासभा च पेश करणा है, ताकि तुसां उना जो मेरे ताई गबाई देन। 10 कने सारे देशां च, तुहांजो कने हौर जडे मिजों उपर भरोसा करदे न, तुहांजो संसारे दे अंत होणे दे पहले सारयां लोकां जो शुभसमाचार सुणाणा है। 11 जालू तुहांजो कैदा च पाणा है, तां तुसां इदी चिंता मत करदे, की असां क्या बोलणा है। क्योंकि उस बेले पबित्र आत्मा तुसां दे जरिये गल्लां कारणियां न। 12 उसी बेले, जडे लोक मिजों पर भरोसा नी करदे न, उना अपने भाईयां जो जेला च करी लेणा, जडे मिजों पर भरोसा करदे ने सै मरवाई देणे न। पिता अपने बचयां सोगी इयां ही करणा है, कने बचयां मां-प्यो दे खिलाफ होईकरी उना जो मारी देणा है। 13 क्योंकि तुसां मेरे चले न उदिया बजा ने सारे लोकां तुसां ने बैर करणा है, पर जडे लोक मिजों पर भरोसा रखदे न कने आखरी दीकर सेहन करणा, उना दा ही उद्धार होणा है।" 14 जालू तुसां इक मसीह बिरोधी जो यरूशलेम मंदरे च खडोतयो दिखणा, जिथु उसयो नी होणा चाईदा। यहदिया प्रदेशे दे लोकां जो जान बचाणे ताई पाडा पर नसणा पोणा। 15 जडा कोई अपणी घरे दिया छती पर हो, तां सै समान लेणे ताई थले ना उतरे, ना ही अंदरे जो जा। 16 कने जडा खतरां च होऐ, सै अपणे कपडे लेणे ताई मुडी करी करे न घरे ना ओऐ। 17 ऐ उना जानियां ताई बडा बुरा बकत होणा जडियां लैरथियां न, कने उना जानियां ताई जडियां नियाणे जो दूथ पियादियां न, उना जो अपणी जान बचाणे ताई नसणा बडा मुशकिल होई जाणा। 18 इस ताई प्राथना करा की ऐ बुरा बकत सर्दियां च ना हो, जालू सफर करणा मुशकिल हो। 19 क्योंकि उना दिना लोकां जो बडे दुख होणे न, उना लोकां कदी भी ऐसे दुखां दा सामणा नी कितया होणा, जालू ला परमेश्वरे संसार बणाया है। 20 अगर परमेश्वरे उस बुरे बकते जो नी घटादां, तां कोई भी माणु नी बचदा। पर उना चुणयो होऐ लोकां दिया बजा ला, जिना जो परमेश्वरे चुणयां है, बकत घटाणा है। 21 अगर उस बेले कोई तुसां जो बोले, की दिखा, मसीह ऐथु है। या दिखा, ओथु है। तां उदा भरोसा मत करदे। 22 क्योंकि झूठे मसीह कने झूठे परमेश्वरे दा संदेश देणेबालयां ओणा है, उना लोकां जो धोखा देणे ताई जिना जो परमेश्वरे चुणयां है, उना चमत्कार कने अनेखे कम्म दसणे न। 23 पर तुसां चौकने रिया, दिखा मैं तुहांजो सारियां गल्लां होणे ला पहले ही बोलीं दितियां न। 24 "उना दिना च, बुरा कने दुखे बाल बकत मुकी जाणे दे बाद, सूरजे च अंधेरा होई जाणा, कने च चद्रमैं लौ नी देणी। 25 अम्बरे ला तारायां पेई जाणा, कने अम्बरे दियां शक्तियां हिलाईयां

जाणियां। 26 तालू लोकां मिजों, माणुए दे पुत्रे जो धरतिया पर बदलां उपर ओंई कने उना मेरी शक्ति कने महिमा जो दिखणा। 27 मैं अपने स्वर्गतां जो धरतिया पर भेजणा, ताकि सै उना सारे लोकां जो गटेरी करी, जिना जो मैं चुणयां है, कने उना संसारे दे चारों पासयां ला लोकां जो गटेरणा है।" 28 "अंजीर दे स्खे ला ऐ सिखा, जालू उदियां डालियां निकलदियां न कने पते निकलना लगेदे न, तां तुसां जो पता लगीं जांदा है, की गर्मियां दी रित नेडे ओआ दी है।" 29 जालू तुसां इना चिजां जो होंदे होये दिखणे, तां तुसां जाणी लेनयो, की सै माणुए दा पुत्र ओणे बाला है, कने ऐ दुर नी है। 30 मैं तुसां ने सच्च बोलदा है, इसा पीडिया दे सारे लोकां तालू दिकर नी मरणा है, जालू दिकर ऐ सब होई ना जा। 31 अम्बर कने धरती खत्व होई जाणे, पर मेरियां बोलियां गल्लां कदी नी टलनियां न, सै हमेशा रेंणियां न। 32 "ऐ गल्लां कुसी रोजे या कुसा घडिया होणिया न कोई भी नी जाणदा है, ना स्वर्गदूत कने ना ही मैं, माणुए दा पुत्र, पर सिर्फ पिता परमेश्वर ही उसी रोजे कने घडिया जो जाणदा है। 33 दिखा, जागदे कने प्राथना करदे रिया; क्योंकि तुहांजो नी पता की कालू मैं मुडी करी ओणा। 34 मेरा धरती छडणा कने बापिस ओणा इया होणा है, जियां परदेस जांदे बेले अपना घर छडी जाऐ, कने अपने नोकरां जो हक दे, कने सारयां जो अपना-अपणा कम्म दसी दे, कने दूर पालां जो पेहेदारी करणे दा हुकम दिता कने उदे वापिस ओणे तां तैयार रे। 35 तुसां नी जाणदे न कि घरे दे मुखिया कालू मुडी के ओणा है, तां तुसां पेरादारी करनयो, क्योंकि मैं घरे दा मुखिया संज्ञा जो या अधिया राती जो, या मुर्गे दिया बांगा देणे दे बेले या ब्यागा जो कालू भी आई सकदे।" 36 इयां नी होऐ तां तैयार रे की मैं अचानक ओऐ कने मैं इयां नी दिखणा चांदा की तुसां विना तयारी दे होना। 37 कने जडा मैं तुहांजो बोलदा है, सै ही सारयां जो बोलदा है, की मेरे ओणे दीकर तैयार रिया।"

14 दो दिना बाद फसह कने अखमीरी रोटिया दा त्योहार होणेबाला था। कने बड़े याजक कने व्यवस्था जो सिखणे बाले इसा गल्लां दिया तोपा च थे, की यीशुए जो कियां धोखे ने पकडी करी मारी देन। 2 पर बोलदे थे की, "सांझो त्योहारे दे बेले ऐ नी करणा चाईदा। कुशी इयां ना हो की लोकां च रोला नी पेई जा।" 3 जालू सै बैतनिय्याह च च शमौन कोदी दे घरे था, जिसयो यीशुए कोडे दिया बिमारिया ला खरा कितया था। सै ओथु रोटी खाणा बैठया था, तां इक जनानी उदे घरे जो आई कने उना इक बोतल लांदियो थी; जडी संगमरमर दी थी, उसा बोतला च जटामासी तेले ने बणाया बडा मेंहगा इत्र था, कने उना बोतला दा मुह तोडी करी सारा इत्र यीशुए दे सिरे पर नियोरी दिता। 4 पर केई लोक मने च बोलणा लगे, "इस मेंगे इत्रे जो सत्यानाश नी करणा चाईदा था। 5 क्योंकि ऐ इत्र इतणा मेंहंगा था की, इस इत्र दी कीमत इक साले दिया मजदुरिया बराबर थी, कने इसयो बेचिकरी गरीबां जो बंडी सकदे थे।" कने सै उसा जो बुरी हाले झिडकणा लगे। 6 यीशुए बोलया, "इसा जो किटली छडी दिया, इसा जो तंग करणा बंद करा, इयां तां मिजो पर इत्र पाणा खरी गल्ल है। 7 गरीब तां हमेशा तुहाडे सोगी रेंदे न, कने तुसां उना ने जालू मजीं खरा करी सकदे न, पर मैं तुहाडे सोगी सदा नी रेंणा है। 8 इना जनानिया मेरे ताई खरा कम्म कितया है, ऐ जडा कुछ करी सकदी थी, सै इना किता, इना मेरे शरीर पर इत्र मलया है, इना मिजो मरणे ला पहले ही दफनाणे दी तैयारी किती है। 9 मैं तुसां ने सच्च बोलदा है, सारे संसार च जिथु भी शुभसमाचार दा प्रचार होंगा, इना जनानिया जडा कितया ओथु इसा दे इस कम्मे दी चर्चा भी उसा दिया यादा च किती जाणी है।" 10 तालू यहदा इस्करियोती जडा बाहरां चेलयां च इक था, सै यीशुए जो पकडणे च सहायता करणे तांई बड़े याजकां बाल गिया। 11 सै ऐ सुणीकरी खुश होऐ, कने उसयो पेसे देणे जो मन्नी ने, कने सै यीशुए जो धोखे ने यहदी अणुवां दे हथे पकडणे दा तां मौका तोपा दे थे। 12 अखमीरी रोटिया दे त्योहारे दे पहले दिने, जिस रोजे फसह दी बलि दिन्दे थे, उदे चेलयां उसयो पुछया, "तुसां सांझो कुथु भेजणा चांदे न की असां फसह दे त्योहारे दा खाणा बणाई करी खाई सकन?" 13 उनी अपने दो चेलयां जो ऐ बोली करी भेजया, "की यरूशलेमे शेहरे जो जा, कने ओथु तुहांजो इक माणु घडे चुकी करी चलया मिलणा, उदे पिच्छे चली जानयो। 14 कने सै जिस घरे जो जांगा, उस घरे दे मालिके जो बोलयो: की गुरू जी ने पुछया है, की मेरा कने मेरे चेलयां दा फसह दा खाणा खाने बाला कमरा कुथु है? 15 उनी तुहांजो इक उपरे आला सजया सजाया कने तैयार कितया बडा कमरा दसी देणा है, कने तुसां ओथु साडे ताई तैयारी करा।" 16 दो चले निकली करी नगरे च आये कने जियां यीशुए उना

जो बोलया था, तियां ही था, कने उना फसह त्योहारे दा खाणा तैयार कित्ता। 17 जालू संज होई, तां यीशू बारां चेलयां सोगी उदे घरे जो आया। 18 कने जालू से रोटी खाणा बैठयो थे, तां यीशूए बोलया, “मै तुसां ने सच्च बोलदा है, की तुहांजो चे इकी जणे, जडा मेरे सोगी रोटी खा दा है, मिजो पकडवाणे तांई मेरयां दुशमणा दी सहायता करणी है।” 19 जालू उदे बाद उना ऐ गल्ला सुणिया तां उना पर उदासी छाई गेई कने से इक-इक करी के उसने बोलणा लगे, “क्या सै मै है?” 20 यीशूए उना जो बोलया, “सै बाहरां चेलयां चे इक है, जडा मेरिया थालिया च डुबोई करी खा दा है। 21 क्योकि मै, माणुए दे पुत्रे मरी जाणा है, ऐ सब कुछ पिबत्र शाखां च लिखया है, पर उस माणुए जो बडी बुरी सजा होणी है, जडा मिजो धोखा दिन्दा है जिनी मिजो पकडवाणे च सहायता करणी है, अगर उस माणुए दा जन्म ही नी होया होदा तां ही उदे तांई खरा होणी।” 22 जालू सै खा दे थे, तां यीशूए रोटी लेई, कने परमेश्वरे दा धन्यवाद करी के तोडी, कने अपने चेलयां जो देईकरी बोलया, “खाई लिया, ऐ मेरा शरीर है।” 23 फिरी उनी दाखरस दे कटोरे जो चुकी करी परमेश्वरे दा धन्यवाद कित्ता, कने चेलयां जो दिता, कने उना सारयां उस कटोरे च पीता। 24 कने यीशूए उना जो बोलया, “ऐ दाखरस मेरा खून है, मेरा खून केईयां लोकां दी भलाई तांई बहाया जाणा है, ऐ उसा बाचा जो साबित करगा, जडा परमेश्वरे अपने लोकां सोगी कितया है। 25 मै तुहांजो ने सच्च बोलदा है, मै उसी दिने बाद कदी भी धाखा दा रस नी पीणा, जालू दीकर परमेश्वरे दे राज्य च नोआ दाखरस नी पी लेंगा।” 26 फिरी यीशूए कने उदे चेलयां फसह दे त्योहारे दे भजन आई करी यस्शलेम शहरे दे बाहर जैतून स्थान दे पाहडे पर चली गे। 27 तालू यीशू पाहडे दे सारे चेलया था उनी चेलयां जो बोलया, तुसां सारयां मिजो छडी करी नसी जाणा है, क्योकि पिबत्र शाखे च लिखया है, सै सच्च होणा है: “मै रखवाले जो मारणा कने भेडां तितर बितर होई जाणा है।” 28 पर मै मरी के जिन्दा होणे ला बाद तुहांजो ला पेहले गलील प्रदेश च पूजणा है, कने तुहांजो ने मिलणा है। 29 पर पतरसे यीशूए जो बोलया, “चाहे सारे छडी करी नसी जाणे पर मै नी नसगा।” 30 यीशूए उसयो बोलया, “मै तिजो ने सच्च बोलदा है, की अज ही इसा राती मुर्गे जो दो बार बांग देणे ला पेहले तू मिजो तीन बरी बोलणा है, की मिजो नी जाणदा है।” 31 पर उनी होर भी जोर देईकरी बोलया, “अगर मिजो तेरे सोगी मरण भी पोंगा तमी मै कदी नी बोलणा की मै तिजो नी जाणदा।” इयां ही बाकी सारयां चेलयां भी बोलया। 32 फिरी जालू यीशू कने उदे अनुयायी गतसमनी नाए दे इक बागे च आये, कने उनी अपने चेलयां जो बोलया, “ऐथू बेई रिया, जालू दीकर मै प्रार्थना करे। 33 कने यीशू पतरस, याकूब कने यहन्ना जो बागे च थोडा दिया अगे लेई गिया, कने सै बडा ही दुखी कने बेचेन होणा लग्गा, 34 कने उना ने बोलया, “मेरा मन बडा उदास है, ऐथू दीकर कि मेरे प्राण निकली चलयो न, तुसां ऐथू स्का कने जागदे रिया।” 35 फिरी यीशू थोडा अगे गिया, कने गोडे भार बेई गिया कने मुह धरतिया पाससे करी प्रार्थना करणा लग्गा, “की अगर होई सके तां ऐ घडी मिजो ला टली जा।” 36 कने बोलया, “पिता जी, तिजो ला सब कुछ होई सकदा है, ऐ जडा दुख ओणे बाला है, ऐ टली जाये पर जियां तुसां चादे न तियां ही होऐ।” 37 फिरी जालू यीशू बापस आया कने तिन्न चेलयां जो सुतया दिखीकरी उनी पतरसे जो बोलया, “हे शमौन, तू सुतया है? तुसां इक घंटा भी मेरे सोगी जागदे नी रेई सके? 38 जागदे कने प्रार्थना करदे रिया ताकि मिजो पर भरोसा रखणा नी छडन। आत्मा तां खरा करणा चांहदी है पर शरीर च जोरे दी कमी है।” 39 कने यीशू फिरी बापिस चली गिया, कने सै ही बोली करी प्रार्थना कित्ती। 40 कने उनी फिरी आई करी उना जो सुतया दिखया, क्योकि से जागते रेईकरी बडे थकी गियो थे, जालू यीशूए उना जो जगाया कने उना जो नी पता था की उसयो क्या बोलन। 41 फिरी तीजी बरी आई करी उना जो बोलया, “हुण सोदे रिया कने अराम करा, तुसां बडा सोई लिया हुण से बकत आई गिया है, जालू मै, माणुए दा पुत्र पापियां दे हथे पकडया जाणा है। 42 उदा कने चला। दिखा, जिनी माणुए मिजो पकडवाणा है, सै बखे आई रिया है।” 43 जालू यीशू ए बोला दा ही था, तां यहदा जडा बाहरां चेलयां चे इक था, सै ओथु आया, सै अपने सोगी मते सारे लोकां जो लेईकरी आया जिना तलवारां कने डंडे लियो थे, ऐ सारे लोक बड़े याजकां, यहदी व्यवस्था जो सिखाणे बाले कने यहदी अगुवां भेजयो थे। 44 कने यीशूए जो पकडणे बाले यहदा उना दी सहायता कित्ती, कने उना जो पेहले ही दस्सी दितया था, की जिसयो मै गुरू बोलणा कने गले लाईकरी चुम्मी लेंगा, तां उसयो पकडी करी दंगे ने लेई जानयो। 45 कने यहदा आया कने उनी झट यीशू दे

बखे जाई करी बोलया, “गुरू जी।” कने गेले लाईकरी उदी चुम्मी लेई। 46 तालू उना उसयो कस्सी करी पकडी लिया कने बन्दी बनाई लिया। 47 जडे उदे बखे खडोतयो थे, उना चे इकी जणे अपनी तलवार कडी कने महायाजके दे नोकरे पर चलाई दिती कने उदा इक कन बडी दिता। 48 यीशूए उना जो बोलया, “तुसां क्या मिजो डाकू समझीकरी तलवारां कने डांगा लेईकरी बन्दी बाने तांई आयो? 49 मै तां रोज ही मंदरे च तुहाडे सोगी रेईकरी उपदेश दिन्दा था, तालू तां तुसां मिजो बन्दी नी बणाया पर ऐ इस तांई होया की पिबत्र शाखां च लिखया पुरा होऐ।” 50 जालू ऐ होया तां उदे सारे चले उसयो छडी करी नसी गे। 51 इक जवान अपने नगे शरीर पर चादर ओडी करी उदे पिच्छे चली पिया; कने लोक उसयो यीशूए दा चेला समझीकरी पकडना लग्गा। 52 पर सै चादरा छडी करी नंगा ही नसी गिया। 53 फिरी सै यीशूए जो महायाजके दे घरे बाले लेई अये; कने सारे बड़े याजक, कने यहदी अगुवे कने व्यवस्था जो सिखाणे बाले ओथु गिठे होई गे। 54 पतरस भी उना दे पिच्छे-पिच्छे महायाजके दे अंगणे च जाई रिया, कने मंदरे दे सिपाईयां सोगी बेईकरी अग्ग तपणा लगी पिया। 55 बड़े याजक कने यहदी महासभा दे सदस्य यीशूए जो मारी देणे तां उदे खिलाफ च गबाई तोपा दे थे, पर उना जो कोई गबाई नी मिली। 56 क्योकि मते लोक उदे खिलाफ च झुटियां गबाईयां दिन्ने थे, पर उना दियां गबाईयां इक दियां नी थियां। 57 तां कितणयां ही लोकां उठी करी उदे खिलाफ ऐ झूठी गबाई दिती। 58 “असां इसयो ऐ बोलदे सुणया है, की मै माणुए दे बणायो मंदिर जो डाई करी तिन्ना रोजां च नोआ मंदिर बनाई लेणा, जडा हथा ने नी बणया होणा है।” 59 ऐ गबाई भी उना दी इक देई नी निकली। 60 तालू महायाजके बिच खडोई करी यीशूए ला पुछया, तू कोई जबाब कनी दिन्दा? ऐ लोक तेरे खिलाफ क्या गबाई दिन्ने न? 61 पर सै चुप ही रिया, कने उनी कोई जबाब नी दिता: महायाजके उसयो फिरी पुछया, “क्या तू उस परमधन्य परमेश्वरे दा पुत्र मसीह है, जिदी असां अराधना करदे न?” 62 यीशूए बोलया, “हां मै है: कने तुसां मिजो माणुए दे पुत्रे जो सबसे शक्तिशाली परमेश्वर दे सजे पासे हके कने बैठयो दिखणा, कने अम्बरे च बदलां सोगी ओदे दिखणा है।” 63 जालू महायाजके यीशूए जो ऐ बोलदे सुणया तां उनी गुरू से अपने कपडे फाडी दिते, कने बोलया, “हुण सांझो कुसी गबाह दी जरूरत नी है। 64 तुसां इसयो परमेश्वरे दी निंदा करदे सुणया, तुहाडी क्या सलाह है इसा गल्ला पर?” उना सारयां फेसला कित्ता की यीशूए परमेश्वर दी निन्दा कितियो, इस तांई इसयो मौत दी सजा मिल्ले। 65 तालू कोई तां उस पर थुक्णा लग्गे, कने कोई उदा मु ढक्णा कने मुके मारणा, कने मजाक उडाई करी बोलणा लग्गे, “गुरू जी, अगर तू परमेश्वरे दा संदेश देणेबाला है, तां सांझो दस कुनी तिजो मारया, कने सिपाईयां उसयो पकडी करी थप्पड मारे।” 66 जालू पतरस थल्ले अंगणे च अग्गी सेका दा था, तां महायाजक दिया नोकराणियां चे इक ओथु आई, 67 कने उना पतरसे जो अग्ग तपदे दिखया कने उसयो ध्याने ने दिखीकरी बोलणा लग्गी, “तू भी तां इस यीशू नासरत बाले दा सोगी था।” 68 सै मुकरी गिया, कने बोलणा लग्गा, मै नी जाणदा इसयो कने मिजो नी पता की तू क्या बोला दी है। फिरी सै बारले पासे चली गिया, कने मुर्गे बांग देई दिती। 69 सै नोकराणी बखे खडोतयो बंदयां ने फिरी बोलणा लग्गी, की ऐ उदे चेलयां चे इक है। 70 पर सै फिरी मुकरी गिया। कने थोडिया देरा बाद उना जडे बखे खडोतया थे, उना पतरसे जो बोलया, “पक्का तू उना चे ही इक है, जियां तू बोलदा है इसला लग्गा तू भी गलील प्रदेश ला है, तू उदे चेलयां चे इक है।” 71 पतरस अणु जो कौसणा लग्गा, कसम खाणा लग्गा, की जिस माणुए दी तुसां गल्ल करा दे न उसयो मै नी जाणदा। 72 तां तालू मुर्गे दुज्जी बरी बांग दिती: तालू पतरसे जो यीशूए दी गल्ल याद आई जडी उसयो बोलियो थी, “की मुर्गे जो दो बार बांग देणे ला पेहले तू मिजो तिन्न बरी मुकरणा है।” तालू पतरस अपने दुखे जो नी संभाली पाया कने दुखी होईकरी जोर-जोर ने रोणा लग्गा।

15 कने ब्यागा तडके होंदे ही झट उना बड़े याजकां, कने यहदी अगुवां, कने व्यवस्था जो सिखाणे बालयां कने महासभा दे सारे लोकां सलाह करिके के यीशूए जो बन्नया, कने न्याय करणे तांई यहदिया प्रदेश दे राज्यपाल पिलातुस दे हबाले करी दिता। 2 कने पिलातुसे उसयो पुछया, “क्या तू यहदियां दा राजा है?” यीशूए उसयो जबाब दिता, “जडा तू बोला दा है, ऐ सही है।” 3 कने बड़े याजक उस पर बडियां गल्लां दा दोष ला दे थे। 4 पिलातुसे उसयो फिरी पुछया, “तू क्या

कोई जबाब भी देना है, दिख ए तित्तो पर कितणियां गल्लां दा दोष ला दे न?" 5 यीशु फिरी चुप रिया कने कोई जबाब नी दिता, एे दिखीकरी पिलातुस बडा हेरान होया। 6 हर साले फसह दे त्योहारे च, पिलातुस इक केदिये जो छडी दिन्दा था, जिसयो लोक चांदे थे की सै छूटे। 7 कने बरअब्बा नाए दा इक माणु बाकी कंतिकारियां सोगी केदा च था, जिना रोम सरकार दे खिलाफ च लोकां दी हत्या कितियो थी। 8 कने भीड पीतातुस दे बखे आई कने उसने बिनती करणा लम्गी, कने साडे ताई इक कैदी जो छडी दे जियां त् हरबरी करदा है। 9 पिलातुसे उना जो जबाब दिता, क्या तुसां चांदे न की, मै तुहाडे ताई यहूदियां दे राजे जो छडी दे? 10 क्योकि सै जाणदा था, की बड़े याजक ना यीशुए जो जलनिया ने पकडाया था। 11 पर बड़े याजकनां लोकां दिया भिडा जो बडकाया, कि पिलातुस ला यीशु जो छडणे दी बजाये बरअब्बा जो छडणे दी माँग करी। 12 एे सुणीकरी पिलातुस उना ला फिरी पुछ्या, "तां जिसयो तुसां यहूदियां दा राजा बोल्दे न, उदा मै क्या करे?" 13 भीडा दे लोक चिलाणा लगे, "उसयो सूली पर चढाई करी मारी दिया।" 14 पिलातुसे उना जो बोलया, "कजो इनी क्या बुरा कितया है?" पर भीड होर भी जोरे ने चिलाणा लम्गी की, "इसयो सूली पर चढाई करी मारी दिया।" 15 तालू पिलातुसे भिडा जो खुश करणे ताई बरअब्बा जो उना ताई छडी दिता, कने यीशुए जो कोडे लगबाई करी सूली पर चढाणे ताई रोमी सिपाईयां दे हबाले देई दिता। 16 सिपाई उसयो किले दे अंदरे बाले अंगणे च लेई गे जिसयो प्रीटोरियुम बोल्दे न, कने सारिया सिपाईयां दिया पलटना जो सदी लेई आये। 17 कने यीशुए दा मजाक उडाणे ताई उना उसयो बैगणी रंगे दे कपडे पेहनयो, कने कंडयां दा मुकट बनाई करी उदे सिर पर रखया, 18 कने सै यीशुए दा मजाक उडाणे ताई उसयो एे बोल्दे थे की, "हे यहूदियां दे राजा, नमस्ते।" 19 सै बार-बार उदे सिर पर भारी सरकंडे ने मारदे थे, कने उदी बेजती करणे ताई उस पर थुका दे थे, कने उसयो इज्जत मान देणे ताई अराधना करणे जो गोडे भार बेईकरी उसयो नमस्ते करणे दा नाटक करा दे थे। 20 जालू सै उदा मजाक उडाई बैटे, तां उना सै बैगणी कपडे उतारी करी उदे अपने कपडे उसयो पेहनाए, फिरी उसयो सूली पर चढाणे ताई शेहरे ला बाहर लेई गे। 21 जालू सै शेहरे बाहर चलयो थे, तां शमीन नाए दा माणु कुरेनी गांएे ला ओआ दा था, उदे पुत्र सिकन्दर कने स्फुस थे। कने सिपाईयां शमीन जो हुकम दितया की सै सूली जो चुकी करी उसा जगा लेई जा जिथू उना यीशुए जो सूली पर चढाणा था। 22 सिपाई यीशुए जो गुलमूता नाए दिया जगा पर लेई आये, जिदा मतलब है खोपडी दी जगा। 23 तालू सिपाईयां यीशुए जो गन्धरस नाए दी दवा, दाखरस च मिलाई करी पिणे ताई यीशुए जो दिता ताकि उसयो पीडा दा असर नी होए, पर उनी पिणे जो मना करी दिता। 24 फिरी उना यीशुए जो हथां पैरां पर किल्लां ठोकी करी सूली पर चढाया, कने उदे कपडयां ताई पर्शियां पाईयां, एे दिखणे ताई की क्या कुसयो मिलादा है, कने कपडयां जो अपु चे बंडी लिया। 25 ब्यागा दे कोई नौ की बजे, जालू उना यीशुए जो सूली पर चढाया। 26 सिपाईयां यीशुए दिया सुल्या उपर लकडी दी पटी लाई दिती। उदे च यीशुए दा दोष लिखया था, की एे "यहूदियां दा राजा।" 27 उना उदे सोगी दो डाकू, इक उदे सजे पासे कने इक उदे खबे पासे सूली पर चढाया। 28 तालू सै पबित्र शाब्दे दा बचन सच्च होई गिया जडा मसीह दे बारे च बोलया था, की सै अपराधियां सांई गिणया जाणा, कने सै पुरा होया। 29 कने रस्ते च जाणे बाले सारे लोक सिर हिलाई-हिलाई करी, उदी एे बोली करी निदा करदे थे, "वाह रे। मंदरे जो ढाणे बाले, कने तिन्ना रोजां च बणाणे बाले। 30 सूली ला उतरी करी अपने आपे जो बचाई ले।" 31 इथां ही बड़े याजक कने मसा दी व्यवस्था जो सिखाणे बाले अपु चे मजाके च बोल्दे थे, "की इनी होरनी जो बचाया, पर अपने आपे जो नी बचाई सकदा। 32 एे माणु जडा इम्राएल दा राजा, मसीह होणे दा दाबा करदा है, हण सूली ला उतरी आए तां, असां दिखीकरी भरोसा करी लेणा कि एे साडा राजा है।" कने जडे उदे सोगी दो जणे सुल्या पर चढाये थे, सै भी उदी निदा करा दे थे। 33 दोपहर बाहरा बजे ला तिन्ना बजे दीकर सारे देशे च नेहेरा होई गिया। 34 दोपेरा दे तिजे पेहर यीशुए बडे जोरे ने पुकारी करी बोलया, "इलोई, इलोई, लमा शबक्तनी?" जिसदा मतलब है, "मेरे परमेस्वर, मेरे परमेस्वर, त् मिजो कजो छडी दिता?" 35 कने कुछ लोक जडे उदे बखे खडोटयो थे, उना सुणया जडा यीशुए बोलया पर सै समझे नी कने बोलाणा लगे, "दिखा, एे एलियाह जो सहायता ताई पुकारा दा है।" 36 कने उना लोकां च इक जणा दौडी करी गिया कने उनी स्पंज लेईकरी सिरके च डुबाया, कने सरकंडे दे उपर बन्नी करी यीशुए जो चुसाया, कने

बोलया, "स्की जा कुछ मत करा, दिखदे न की, एलियाह इसयो उतारणे ताई ओदा है की नी।" 37 तालू यीशु बडे जोरे ने बोली करी मरी गिया। 38 कने सै मोटा परदा जडा मंदरे च टंगया होया था, जडा सारयां जो परमेस्वर दी मोजुदगी च अंदर ओणे जो रोकदा था, उपरे ला थले दीकर फटी गिया कने उदे दो टुकडे होई गे। 39 जडा सुबेदार उदे सामणे खडोतया था, उनी जालू यीशुए दी पुकार सुणी कने उसयो दिखया की सै क्रियां मरया, तां उनी बोलया, "सच्ची एे माणु, परमेस्वर दा पुत्र था।" 40 कने केई जनानिया भी दुरे ला दिखा दिया थियां: उना चे इक मरियम भी थी जडी मगदल नाए दे शेहरे ला थी, सलोमी कने मरियम जडे छोटा याकूब कने योसेस की मां थी। 41 जालू सै गलील प्रदेशे च था तां सै उदे पिच्छे चलदियां थियां, कने उदी सेबा करदियां थियां, कने होर भी मतियां जनानिया थियां, थियां उदे सोगी यस्शलेम शेहर च आईयां थियां कने सै उसयो दुरे ला दिखा दिया थियां। 42 जालू संज होई गेई, तां इस ताई की सै तैयारिया दा दिन था, जडा सब्ते दे इक रोज पेहले होंदा है। 43 अरिमतिया शेहरे दा रेहणे बाला यूसुफ नाए दा इक माणु था, सै यहूदी सभा दा इक बडा मनया तनया मंत्री था, कने अपु भी परमेस्वर दे राज्य दी नियाल रखदा था। सै हिम्मत करिके पिलातुस बाल गिया कने उनी यीशुए दी लाश दफनाणे ताई मंगी। 44 पिलातुस जो भरोसा नी होया, की यीशु इतणी तोल्ली मरी गिया, कने उनी सुबेदारे जो सदीकरी पुछया, की क्या एे सच्च है, की यीशुए मरयो बडी देर होई गियो है? 45 जालू उनी सुबेदारे ला हाल पता करी लिया, तां पिलातुसे यूसुफ जो लाश लेई जाणे दी अम्मत देई दिती। 46 तालू उनी इक मलमल दी चादर खरीदी, कने लाश उतारी करी यहूदी रिबाजां सांई मलमल दिया चादरा च लपेटी लिया, कने दफनाणे ताई कबरां च रखया कने सै कबर चढाणा जो कटी करी बणाईयो थी, कने उनी कबरां दा मु बंद करणे ताई इक गोल पथर लुडकाई करी रखी दिता। 47 मरियम जडी मगदलीनी शेहरे ला थी कने योसेस दी मां मरियम दिखा दिया थियां की, सै कुथु रखया है।

16 अगली संज्ञा जालू सब्ते दे दा रोज होई गिया, तां उना जनानियां जिना दे नां मरियम मगदलीनी, याकूबे दी मां मरियम, सलोमी उना सुगंध बालियां चिंजा खरीदियां, ताकि यीशुए दिया लाशा पर मलन, क्योकि एे सारा यहूदियां दा रिती रिबाजा था। 2 ब्यागा तडके तुअरे बाले दिने, सै कबरां पर गियां, 3 कने अपु चे बोला दिया थियां की, "साडे ताई कबरां दे रखयो बडे कने भारी पथरे जो कुण हटांग?" 4 पर जालू उना यीशुए दी कबरा पासे दिखया, तां दिखया की सै पथर तां पेहले ला ही हटया होया है। 5 कने जालू सै कबरा दे बखे पुजियां कने अंदर गियां, उना ओथु इक नौजवान जागते जो चिट्टे चमकदार कपडे पाई करी उदे सजे पासे बैठया दिखया, कने सै बडियां हेरान होईयां कने डरी गियां। 6 उनी जवान माणुए उना जनानियां जो बोलया, इरा मत, तुसा यीशु नासरत बाले जो तोपा दियां न, जिसयो सूली पर चढाया था। सै जिन्दा होई गिया है, ऐथू नी है; दिखा एे सेई जगा है, जिथू उना उसयो रखया था। 7 पर हण तुसां जा, कने एे गल्ल तुसां पतरस कने यीशुए दे बाकी चेलयां जो बोला की यीशुए तुहांजो ला पेहले गलील प्रदेशे जो जाणा है, जियां उनी तुहांजो ने बोलया था, तुसां उसयो ओथु दिखणा है। 8 जालू उना एे सुणया, तालू सै कबरां ला निकली करी नदी गियां क्योकि सै घबराई करी कमी पिर्थां थियां। कने उना रस्ते च कुसी होरसी ने कुछ नी बोलया। 9 (note: The most reliable and earliest manuscripts do not include Mark 16:9-20.) हफ्ते दे पेहले तुअरो ब्याग होंदे ही सै जिन्दा होईकरी सबना ला पेहले यीशु मरियम मगदलीनी जो मिल्ला, जिसा चे उनी सत बुरियां आत्मा कडियां थियां। 10 सै यीशु दे चेलयां बाली गेई, चेले बडे भरी गमे च थे कने रोआ दे थे, उना जडा कुछ उना दिखया था, सै उना जो सुणया। 11 पर जालू उना उसा ला सुणया की यीशु जिन्दा है, कने उना उसयो दिखया है, उना भरोसा नी किता। 12 उदे बाद यीशु दुज्जे दो होर चेलयां सामणे आया, जडे यस्शलेम शेहरे ला अपने घरे जो ओआ दे थे, पर पेहले उना उसयो नी पछाणा, क्योकि उदी भेस भुशा पेहले ला लग थी। 13 जालू उना जाणी लिया सै कुण है, तालू सै दौडी करी दुज्जयां जो दसणा गे, पर उना भी भरोसा नी किता। 14 इंदे बाद यीशु उना गयारां चेलयां जो भी मिल्ला, जालू सै रोटी खाणां बैठयो थे, तां यीशुए उना जो झिडकया, क्योकि यीशुए जो जिन्दा होणे बाद दिखया, फिरी भी उना भरोसा नी कितया था। 15 कने यीशुए उना जो बोलया, "तुसां सारे संसार च जाई करी

लोकं जो परमेश्वर दे शुभसमाचार दा प्रचार करा। 16 जडा कोई मिजों पर भरोसा करगा कने बपतिस्मा लैगा परमेश्वरे उसयो उदे पापां दी सजा ला बचाणा, पर जडा मिजो पर भरोसा नी करगा तां उसयो सजा मिलणी है। 17 कने जडे लोक मिजों पर भरोसा करगे सै चमत्कारी निशाण उना दे बाली होणे न, उना मेरे नाए ने बुरियां आत्मा जो कडणा, कने मै उना जो नोईयां-नोईयां भाषा बोलणे दे काबील बणागां। 18 मै उना जो बचाणा है, जडे सप्पां जो भी चुकी लैगे, कने जहरीली चीज भी पी लैगे, मै तमी उना जो मरणा नी दिगां, उना बिमारां पर हथ रखणा कने उना जो मेरे नाए ला खरा करणा है।” 19 तालू उदे बाद प्रभु यीशु उना ने गल्लां करणे बाद परमेश्वरे यीशुए जो स्वर्ग च सदी लिया, कने यीशु परमेश्वरे दे सजे पासे इज्जत बाले सिहांसन पर बैठी गया। 20 तालू चेले सारयां पाससे गे कने हर जगा परमेश्वरे दा प्रचार किता, कने प्रभु उना सोगी कम्म करदा रिया, कने उना चमत्कारां दे जरिये जडे सोगी-सोगी होदे थे, बचना जो पुरा करदा रिया। आमीन।

लूका

1 श्रीमान थियुफिलसुस ताई मतयां लोकां साडे बिच होइयां घटना दे बारे च इक दस्तावेज लिखणे दी कोशिश कितियो है। 2 उना बिलकुल सेई लिखया जडा सान्झो उना लोकां दसया था, जिना शुरू ला ही यीशुए दी सेबकाई जो अपनी हथी ने दिखया था कने जडे बादे च परमेष्करे दे बचने दे सेवक बणे। 3 इस ताई श्रीमान थियुफिलसुस मै भी इना सारियां गल्लां दी जांच परख किती कने मिजो ऐ ठीक लग्गा की तुहाडे ताई इना घटना जो क्रमानुसार लिखे। 4 मै ऐ इस ताई करा दा ताकि तुहांजो हर उसा गल्ला दा पता पुरिया सचाइया ने लगे जडियां लोकां तुहांजो दसियां ना। 5 जालू हेरोदेस यहूदिया प्रदेश दा राजा था, अबिय्याह दी टोलिया च जकर्याह नाए दा इक याजक था, कने उदी घरे बालिया दा ना एलीशिबा था कने सै भी इसाएल दे पेहले याजक हासन दे बंशे ला थी। 6 सै दोयो ही परमेष्करे दे सामणे धर्मी थे, कने सै प्रभु दे सारे हुकम कने नियम पर सच्चे चलणे बाले थे। 7 पर उना दी कोई ओलाद नी थी, क्योंकि एलीशिबा बच्चा पैदा नी करी सकदी थी, कने सै दोयो ही बूढे थे। 8 इक दिन जालू जकर्याह यरुशलेम शेहरे दे मंदरे च परमेष्करे दे सामणे याजके दे स्पे च सेबा करा दा था, क्योंकि उस हप्तते उदिया टोलिया दी याजक सेबा दी बारी थी। 9 याजकां दे पचीं पाणे बाले रिबाजे दे हिसावे ने जकर्याह दे नाए दी पचीं निकली की प्रभु दे मंदरे च जाई करी धूप बाल्ले। 10 जालू सै धूप लगाणे दे बेले सारे लोक बाहर अंगणे च खडोई करी प्राथना करा दे थे। 11 तालू जकर्याह जो प्रभु दा स्वर्गदूत धुने दिया बेदिया दे सजे पासे खडोतया दुसा। 12 कने जकर्याह उसयो दिखीकरी घबराई गया कने सै बडा भरी डरी गया। 13 पर स्वर्गदूते उसयो बोलया, “ओ जकर्याह डर मत क्योंकि परमेष्करे तेरी प्राथना सुणी लिहयो है, तेरिया घरे बालिया एलीशिबा इक जागत जमणा है, कने तू उदा ना यहूना रखया। 14 कने तिजो खुशी होणी: कने मते लोकां उदे पैदा होणे दिया बजा ने खुश होणा। 15 क्योंकि उनी परमेष्करे दे सामने बडा महान होणा; कने उनी कदी भी कोई ऐसी चीज नी खाणी पिणी जिसने कोई नशा होंदा है; कने उनी अपने पैदा होणे ला पेहले ही पबित्र आत्मा ने परिपूर्ण होई जाणा है। 16 कने उनी इसाएलियां च मतयां लोकां जो उना दे प्रभु परमेष्करे दे बाल बापस लोणा है। 17 यहूना इक ऐसा माणु होणा है उनी परमेष्करे दा संदेश देणेबाले एलियाह सांई आत्मा च शक्तिया ने भरपूर होणा है कने प्रभु दा रस्ता तैयार करणा है। ताकि माता पिता दा मन बाल बचयां दे पासे फेरी दे, कने हुकम नी मनेणे बालयां जो धर्मियां सांई जीणा सिखाणा; कने प्रभु ताई इक खरी प्रजा तैयार करे। 18 जकर्याह स्वर्गदूते ला पुछया, ऐ मै कियां यकीन करे की साडे ने ऐसा होणा? क्योंकि मै तां बूढा है, कने मेरी घरे बाली भी बूढी होई गियो है।” 19 स्वर्गदूते उसयो जबाब दिया, “मै जिब्राईल है, जडा परमेष्करे दे सामने खडोई रेंदा है, कने मिजो तेरे ने गल्लां करणा कने तिजो ऐ शुभसमाचार सुणणे ताई भेजया है। 20 कने दिख जीस दिने दीकर ऐ बच्चा पैदा नी होणा कने मेरियां बोलियां गल्लां सही बकत पर पुरियां नी होंगिया उसी रोजे दीकर तिजो ला बोली नी होणा, क्योंकि जडियां गल्लां मै तिजो बोलियां न तू उना गल्लां दा भरोसा नी किता।” 21 लोक जकर्याह जो नित्याला दे थे क्योंकि याजक मंदरे च धूप लगाणे बाद बाहर आई करी लोकां जो आशीर्वाद दिन्दा था, पर उसयो बडी देर होई गई थी अंदर, तां लोक बडे हेरान होए। 22 जालू सै मंदरे ला बाहर आया, तालू सै उना ने बोली नी सकया, तालू सै समजी गे, की इसयो मंदरे च कोई दर्शन होया है, कने सै उना ने इशारे च गल्लां करा दा था, सै गूंगां होई गिया। 23 जालू मंदरे च उदिया याजक सेबा दे दिन पूरे होई गे, तां सै यरुशलेम शेहरे ला अपने घरे जो चली गिया। 24 कुछ दिना बाद उदी घरे बाली एलीशिबा लेरथी होई; कने पंज महीने दीकर अपने आपे जो लोकां ला लुकाई रखया। 25 की प्रभुए मेरे तांई भला कम्म किता है, माणुआं च मेरिया बाजपन दिया बदनामिया जो दुर करणे तांई इना दिना च प्रभुए मेरे उपर कृपा करिके मिजो तांई ऐसा किता है। 26 जालू एलीशिबा जो छेमा मिना लगया था तालू परमेष्करे दिया तरफा ला जिब्राईल स्वर्गदूत गलील प्रदेश दे नासरत शेहरे च इक कुवारिया बाल गीया; 27 जिसा दी मंगणी राजा दाऊदे दे बंशे दे यूसुफ नाए दे इक मरदे ने होईयो थी; उसा कुवारिया दा ना मरियम था। 28 कने स्वर्गदूत अन्दर आई करी उसा जो बोलया, “खुशी कने तेरी जय हो, परमेष्करे तिजो पर कृपा किती है! परमेष्कर तेरे सोगी है।” 29 सै इस बचने ला

बडी घबराई गई, कने सोचना लग्गी की इसा गल्ला दा क्या मतलब है? 30 स्वर्गदूते उसा जो बोलया, “हे मरियम, डर मत, क्योंकि तिजो पर परमेष्करे दी कृपा होईयो है। 31 कने दीख, तू लेरथिया होणा है, कने तिजो इक जागत पैदा होणा है; कने तू उदा ना यीशु रखया। 32 कने उनी बडा महान होणा; कने उसयो परमेष्करे दा पुत्र बोलया जाणा; कने प्रभु परमेष्करे उसयो उदे पूर्वज दाऊदे सांई राजा बणाना है। 33 कने उनी इसाएल दे लोकां पर हमेशा राज करणा; कने उदे राज्य दा कदी अंत नी होणा।” (aiōn g165) 34 मरियमा स्वर्गदूते जो बोलया, ऐ कियां होणा? मेरा तां अजे बियाह भी नी होया है। 35 स्वर्गदूते उसा जो जबाब दिया, पबित्र आत्मा तिजो पर उतरणा है, कने परमेष्करे दिया शक्तिया तिजो पर छं करणी है, तां तां तेरा जन्म लेणे बाला जागत पबित्र होणा है, सै परमेष्करे दा पुत्र बोलया जाणा। 36 कने सुणे तेरी रिशतेदार एलीशिबा दे भी बूडे बारे बच्चा होणेबाला है, ऐ इसा दा छेमा महिना है जिसा जो लोक बांज बोलदे थे। 37 क्योंकि परमेष्कर सब कुछ करी सकदा है। 38 मरियमा बोलया, “दीख, मै प्रभु दी दासी है, जियां तू बोलया है सेई मेरे सोगी हो।” तालू स्वर्गदूत ओथु ला चली गिया। 39 कुछ दिना बाद मरियम उठी करी यहूदिया प्रदेश दे इक पाहडी इलाके दे इकरी गां जो गई। 40 कने जकर्याह दे घरे पुजिकरी एलीशिबा जो नमस्ते किते। 41 जियां ही एलीशिबा मरियमा दे नमस्ते सुणे, तियां ही बच्चा उसा दे पेटे च उछली पिया, कने इलीशिबा पबित्र आत्मा ने परिपूर्ण होई गई। 42 कने तिन्ना बडे जोरे ने बोलया, “तू सारियां जनानिया चे बडी भरी धन्य है, कने जडा बच्चा तू जमणा है सै धन्य है। 43 कने मै बडी सोभायशाळी है, की मेरे प्रभु दी मं मिजो ने मिलणा आई है? 44 दिख जियां ही तेरे नमस्ते बोलणे दी अबाज मेरे काना च पेई तियां ही मेरे पेटे च बच्चा खुशिया ने उछली पिया। 45 कने तू धन्य है, क्योंकि तू भरोसा किता जडियां गल्ला प्रभुये दी तरफा ने बोलियां न, कने सै परमेष्करे पुरियां करणियां न।” 46 तालू मरियमा बोलया, मै परमेष्करे दी स्तुति करदी है। 47 कने मै अपने उद्गार करणे बाले परमेष्करे ला बडी खुश है। 48 क्योंकि उनी मिजो अपणिया दासियां दिया दीनता पर नजर किती है; इस तांई दिखा, हण सारे युगां-युगां दे लोकां मिजो धन्य बोलणा है। 49 क्योंकि उनी अपणिया शक्तिया ने मिजो तांई बूढे-बूढे कम्म कितयो न, कने उदा ना पबित्र है। 50 जडे परमेष्करे दा डर मंदे न, उना पर उदी दया पीढियां ला पीढियां दीकर बर्णी रेंदी है। 51 उनी अपणी महान शक्ति ने बूढे-बूढे कम्म किते न, कने जडे बडे घमंडी थे उना जो हराई दिता। 52 परमेष्करे राजयां ला राज करणे दा हक लेई लेणा है; कने गरीबां जो उच्चा करदा है। 53 उनी भुखयां जो खरियां-खरियां चीजा ने रजाया, कने अमीरां जो खाली हथ कडी दिता। 54 परमेष्करे साडे पूर्वजां ने कितयो बायदे जो याद किता कने अपने सेवक इसाएल दे लोकां दी मदद करणा आया है। 55 उनी अब्राहम जो कने उदे सारे बंशजा जो हमेशा तांई दया दसणे तांई याद कितया है। (aiōn g165) 56 मरियम पूरे तिन मिहने उसा सोगी रेंदकरी घरे जो बापस गई। 57 तालू एलीशिबा दा बच्चा पैदा करणे दा बकत पूरा होया, कने उना इक पुत्र जमया। 58 उसा दे पडोसियां कने रिशतेदारां ऐ गल्ल सुणीकरी की प्रभुये उसा पर बडी बडी दया किती है, कने सै उसा सोगी बडे खुश होए। 59 कने जालू सै उखमे रोजे उदा खतना करणे तांई आये। तालू सै उदा ना उदे पिता दे नाए पर जकर्याह रखणा लगे, 60 तां उदिया माता एलीशिबा बोलया, “नी; इदा ना यहूना रखा।” 61 उना उसा जो बोलया, “ऐ ना तां तेरिया रिशतेदारिया च कुसी दा भी नी है।” 62 तालू उना उदे पिता जो इशारा करी के पूछया की तू इदा ना क्या रखणा चांदा है? 63 कने उनी लिखणे बाली पट्टी मंगाई करी लिखया, इदा ना यहूना है, कने सारे हेरान होए। 64 तालू ही उदी अबाज बापस आई गई; कने सै परमेष्करे दा धन्यवाद करणा लग्गा। 65 कने उदे अखे-बखे दे लोकां पर डर बेठी गिया; कने उना सारियां गल्लां दी चर्चा यहूदिया प्रदेश दे पाहडी इलाकयां च फेली गई। 66 कने सारयां सुणने बालयां लोकां अपने मने च बिचार करिके बोलया, ऐ बच्चा कदिया होंगा? “क्योंकि इदे सोगी प्रभु दी शक्ति है। 67 कने उदा पिता जकर्याह पबित्र आत्मा ने परिपूर्ण होई गिया, कने भविष्यवाणी करणा लग्गा। 68 प्रभु, इसाएल दे परमेष्कर दी स्तुति करा, क्योंकि सै अपने लोकां जो मिलणा आया है, कने अपने लोकां जो छुडायो है। 69 जडा प्रभु दे सेवक, राजा दाऊद दा बंशज है उनी साडे तांई इक शक्तिशाली उद्गार करणे बाले जो भेजया है। 70 बडे पेहले प्रभुये अपने पबित्र परमेष्करे दा संदेश देणेबाले दे जरिये बोलया, जडे संसार दे आदि ला होंदे आये न, मतलब की उनी सान्झो साडे दुशमणा ला कने उना सारियां शक्तियां ला

बचाणा जडे सान्झो ने नफरत करदे न। (aiōn g165) 72 उनी अपने पबित्र बायदे जो याद करिके साडे पूर्वजां पर दया करणी, 73 उनी साडे पूर्वज अझाहम ने कसम खाई करी बायदा किता, 74 की उनी सांझो साडे दुस्मणा ला बचाणा, 75 ताकि असां उदे सामणे पबित्रता, धार्मिकता कने बिना कुसी डरे जिन्दगी भर उदी सेबा करी सकन। 76 कने हे बच्चे, तिजो परम प्रधान परमेश्वरे दा संदेश देणेबाला बोलया जाणा है क्योंकि तू प्रभु दे अग्रे-अग्रे चलणा कने माणुआं जो तैयार करणा, 77 कने इनी अपने लोकां जो सिखाणा की पापा दी माफी दे जरिये छुटकारा पाई सकदे न। 78 ए साडे परमेश्वरे दिया उसा दया ने होणा है; जियां सूरज सांझो रोशनी देणे ताई चमकदा है, तियां ही मसीह भी साडे बाल स्वर्ग ला ओणा है। 79 पाप च कने मोता दी छोआं च बोणे बालयां जो रोशनी देणी है, इना रोशनिया सान्झो जिन्दगी च मार्गदर्शन करणा, जडा सांझो परमेश्वर सोगी शक्ति दिन्दै है।” 80 कने सै जागत यहन्ना बडा होईकरी आत्मा च बलशाली होंदा गया, कने इस्राएल दे लोकां दे सामणे ओणे दीकर सै सुनसान जगा च रिया।

2 उना दिना च रोमी महाराजा औगस्तस कैसरे सारे रोमी सम्राज्य दी जनगणना करणे दा हुकम दिता। 2 ए पैली जनगणना उस बेले होई, जालू क्विबेरिनियस सीरिया प्रदेश दा राज्यपाल था। 3 कने सारे लोक जनगणना च ना लिखाणे ताई अपने-अपने शेहरे जो गे जिथ् उना दे पूर्वज थे। 4 यूसुफ भी ताई तां गलील प्रदेश दे नासरत शेहरे ला यहूदिया प्रदेशे दे राजा दाऊद दे शेर बैतलहम शेहरे जो गया था, क्योंकि सै राजा दाऊद दा बंशज कने परिवारे दा था। 5 ताकि अपनी मीगतर मरियम जडी लेखी थी, उसा सोगी जाई करी ना लिखाइ दे। 6 जालू सै बैतलहम शेहरे च थे तां उसा दे बच्चा जमणे दे दिन पुरे होई गे। 7 कने उना अपना जेठा पुतर जमया कने उसयो कपडे च लपेटे की खुरलिया च रखया; क्योंकि उना ताई सरां च जगा नी थी। 8 कने उस देशे च कुछ पुआल थे, जडे मैदाना च रेईकरी अपने धंणे दा पैरा दिन्दे थे। 9 कने प्रभु दा इक स्वर्गदूत उना बखे आई खडोता; कने प्रभु दी चमक उना दे चारो पास्से चमकी, कने सै बडे डरी गे। 10 तालू स्वर्गदूते उना ने बोलया, “डरा मत; दिखा मै तुहांजो इक बडी खुशिया दा शुभसमाचार सुणांदा है; जडा सारे लोकां ताई होणा, 11 की अज राजा दाऊद दे शेर बैतलहम च तहाडे ताई इक उद्धारकर्ता जमया है, सेई मसीह प्रभु है। 12 मै तहाडे ताई उना दी ए पछेण दिन्दै की सै बच्चा कुण है, तुहांजो इक बच्चा फालडु च लपेटया कने खुरलिया च पिया मिलणा है।” 13 तालू उस स्वर्गदूते सोगी इक स्वर्गदूतां दी टोली परमेश्वरे दी स्तुति कने ए बोलेद होए प्रगट होई, 14 “स्वर्ग च परमेश्वरे दी महिमा कने धरतिया पर जिना लोकां ला सै खुश हे शांति हो।” 15 जालू स्वर्गदूत उना बखे ला स्वर्ग जो चली गे, तालू पुआलां अपु चे बोलया, “ओआ, असा बैतलहम शेहरे च जाई करी ए गल्ल जडा होइयो है, कने जडा प्रभुये सांझो ने दसया है, उसयो दिखन।” 16 कने उना झट पट जाई करी मरियम कने यूसुफ जो कने खुरलिया च उस बच्चे जो पिया दिखया। 17 इना जो दिखीकरी उना सै गल्लां जडियां उस बच्चे दे बारे च स्वर्गदूतां ने बोलिया थी, सै सबना जो दसणा लग्गे। 18 कने सारे लोकां जालू ए गल्लां सुणियां जडियां गल्लां उना पुआलां बोलियां, तां सै बडे हेरान होए। 19 पर मरियम इना सारियां गल्लां जो मने च रखीकरी सोचदी रेईं। 20 कने जियां उना स्वर्गदूतां पुआलां जो बोलया, तियां ही सारा सुणिकरी कने दिखीकरी परमेश्वरे दी महिमा कने स्तुति करदे बापस चली गे। 21 जालू यीशुए जो पैदा होयो अठ रोज पुरे होए, कने उदे खतने दा बकत आया, तां उदा ना यीशु खया, जडा स्वर्गदूते उदे पेटे च ओणे ला पहले बोलया था। 22 जालू मूसा दिया व्यवस्था दे अनुसार उना दे शुद्ध होणे दे दिन पुरे होए तां सै उसयो यरुशलेम शेहरे दे मंदरे च लेई गे, ताकि उसयो प्रभु दे सामणे लेई ओन। 23 जियां की मूसा दिया व्यवस्था च लिखया है: “हर जेठा पुतर प्रभु ताई पबित्र होणा।” 24 मूसा दिया व्यवस्था दे बचना दे अनुसार, “पंडुको दा इक जोडा, या कबुतरा दे दो बच्चां दी बलि दिया।” 25 उस बकते यरुशलेम शेहरे च शमोन नापे दा इक माणु था। कने सै माणु बडा धर्मी कने भक्त था। कने बडिया बेसबरिया ने मसीह दे ओणे दी नियाल रखा था की सै आरे कने इस्राएल दे लोकां जो तसल्ली दे, कने पबित्र आत्मा उस सोगी थी। 26 कने उसयो पबित्र आत्मा दसया था कि, तू प्रभु दे मसीह जो दिखणे ला पहले मरणा नी है। 27 उस दिन उसयो आत्मा अरुवाइ किती तां सै मंदरे च आया। कने जालू माता-पिता यीशुए जो अंदर लेई आये, ताकि उस ताई व्यवस्था दे रीती रिबाजा दे अनुसार करन, 28 तां उनी बच्चा यीशु जो गोदा च लिया कने परमेश्वरे दा धन्यवाद करिके बोलया, 29

प्रभु जी, हण तू मिजो अपने सेवके जो अपने बायदे दे अनुसार शांतिया ने मरणा दे; 30 क्योंकि मै उस उद्धारकर्ता जो दिखी लिया है। 31 जिसयो तू सारे लोकां जो बचाणे ताई भेजया है। 32 ताकि सै होर जातियां जो परमेश्वरे दा रस्ता दसणे ताई लौ बणे, कने तेरे अपने लोक इस्राएल दी महिमा करन। 33 कने यीशुए दे माता पिता उना गल्लां जो जडियां शमौने उदे बारे च बोलियां, सै उना गल्लां ने बडे हेरान हुंदे थे। 34 तालू शमौने उना जो आशीष देईकरी, उदिया माता मरियम ने बोलया, दिख, सै तां इस्राएल च मतयां लोकां दे विनाश कने उद्धार ताई, इसयो परमेश्वरे दिया तरफा ला इक नशाण दे स्पे च भेजया है, जिदे खिलाफ च गल्लां कितियां जाणियां न। 35 इक भयंकर दुखे कने इक तलबारा साई विनी देणा इसला मतयां लोकां दे दिले दे बिचार सामणे होणे न। 36 कने आशेर दे गोर ला हन्नाह नापे दी फनुलल दी इक कुडी परमेश्वरे दा संदेश देणेबाली थी: कने सै बडी बुडी थी, सै बिशयस होणे ला सतां साला दीकर अपने घरे बाले ने रेई सकी थी। 37 सै चोरासियां सालां दी बिधवा थी: कने सै मंदरे जो नी छडती थी पर दिन रात बरत कने प्राथना करी-करी भक्ति करदी थी। 38 सै उस बेले ओथु आई करी परमेश्वर दा धन्यवाद करणा लग्गी, कने उना सारयां ने, जडे यरुशलेम शेहरे दे लोकां जो छुडाणे ताई मसीह जो भेजेण ताई परमेश्वरे दी राह दिखदे थे, उदे बारे च गल्लां करणा लग्गी। 39 कने जालू यूसुफ कने मरियम प्रभु दीया व्यवस्था दे अनुसार सारा कुछ करी बेठे तां सै गलील प्रदेश च अपने शेहर नासरत जो बापस चली गे। 40 बच्चा बडा कने जौरे बाला होंदा गया; कने अकला बाला होंदा गया; कने परमेश्वरे दा अनुग्रह उस पर था। 41 यीशुए दे माता पिता हर साल फणुए दा त्योहार मनाणे ताई यरुशलेम शेहरे जो जांटे थे। 42 जालू सै बहारां सालां दा होया, तालू सै त्योहारे दे रिबाजे ने अनुसार यरुशलेम शेहरे जो गे। 43 जालू यीशुए दे माता-पिता उना दिना जो पूरा करिके के बापस ओणा लग्गे, तां सै जागत ओथु यरुशलेम शेहरे च ही रेई पिया, कने उदे माता पिता जो इसा गल्ला दा पता नी था। 44 सै ए समझीकरी, की सै होर यात्रियां सोगी होणा, कने इक दिन होई गिया कने सै अपने रिश्तेदार कने जान पछेणा बालयां च तोपणा लग्गे। 45 पर जालू नी मिल्ला, तां सै तोपदे-तोपदे यरुशलेम शेहरे जो बापिस चली गे। 46 कने तिन्ना रोजां बाद उना उसयो यरुशलेम शेहरे दे मंदरे दे अंगणे च उपदेशकां दे बिच बैठया, कने उना जो सुणदे कने उना ला सबाल पुछदे दिखया। 47 कने जडे भी उसयो सुणे दे थे, सै उदिया समझा कने उदे जब्बाल ला हेरान थे। 48 तालू यीशुए दे माता पिता उसयो दिखीकरी हेरान होए, कने उदिया माता उसयो बोलया, “पुत्र, तू सांझो ने इयोदिया व्यवहार कजो किता? दिख, तेरे पिता कने मै, तिजो तोपा दे कने बेचेन थे।” 49 उनी उना ने बोलया, “तुसां मिजो कजो तोपा दे थे? क्या तुहांजो पता नी था, की मिजो अपने पिता दे घरे होना जरूरी है?” 50 पर जडी गल्ल उनी उना ने बोली, उना सै गल्ल समझी नी। 51 तालू सै उना कने गिया, कने नासरत नगर च आया, कने उना दे कुले च रिया; कने उदिया माता ए सारियां गल्लां मने च रखियां। 52 कने यीशु अकला कने डील-डौल च कने परमेश्वर कने माणुए दे अनुग्रह च अग्रे बढदा गिया।

3 रोमी महाराजा तिबिरियस कैसर दे राज्य दे पदमें साले च, जालू पुन्तियस पिलातुस यहूदिया प्रदेश दा राज्यपाल था, कने गलील प्रदेश च राजा हेरोदेस राज करा दा था कने इतुरैया कने त्रखोनितिस दे इलाके च उदा भाई फिलिप्पुस, कने अबिलेने प्रदेश च राजा लिसानियास राज्य करा दे थे। 2 कने जालू हन्ना कने कैफा बडे याजक थे, उस बकते परमेश्वरे दा बचन सुनसान जगा च जकर्याह दे पुत्र यहन्ना बाल पुज्जा। 3 कने यहन्ना यरदन खड्दा दे अखे-बखे दे सारे देशां च जाई करी प्रचार करदा था, की अपने पापां जो मन्नी लिया कने गलत कम्मा जो छडी दिया तां तुहांजो परमेश्वरे माफ करणा कने बपतिस्मा लिया। 4 जियां यशायाह परमेश्वरे दा संदेश देणेबाले दे बचना दीया कताबां च लिखया है, “सुनसान जगा च इक पुकारणे बाले दी अब्राज सुणुआ दी है की प्रभु दा रस्ता तैयार करा, कने उदियां सडकां सिदियां बणा।” 5 हर इक घाटी भरी दिती जाणी, कने हर इक पहाड कने टीला थले करी देणा; कने जडा ढेरा है सै सीधा, कने जडा उच्चा सै नीठा है सै पदरा रस्ता बणाना। 6 कने सारे लोकां उसयो दिखणा है जिसयो परमेश्वरे उना जो बचाणे ताई भेजया है। 7 जडी भीडा दी भीड उसला बपतिस्मा लेणे ताई निकली करी ओदी थी, सै उना जो बोलदा था की, “तुसां लोक जहरीले सांपा साई बुरे न, तहाडा ए सोचना गलत है की सिर्फ तुसां बपतिस्मा लेणे ने अपने

पापां दी सजा ला बची जाणा जडी परमेश्वरे तुसां जो देणी है। 8 सजा ला बचने तांई पैसे कम्म करा जिना ने पता चले की तुसां सच्ची ही पश्चाताप किता है; कने अपणे-अपणे मने च ऐ मत सोचा, परमेश्वरे सान्द्रो सजा नी देणी क्योकि साडा पिता अब्राहम है; क्योकि मैं तुसां ने बोलदा है की, परमेश्वर तुहाडी जगा लेणे तांई इना पथारां ला भी अब्राहम तांई ओलाद पैदा करी सकदा है। 9 कने हुण कुहाडी स्यां दिया जडा च रखियो है, हर इक माणु उस स्ये सांई है जडा खरा फल नी दिन्दा है, उसयो परमेश्वरे दोणी बोलणा है कने सै स्ख बडी करी अग्गी च फूकी देणा। 10 कने लोकां उसला पुछ्या, “तां असां परमेश्वरे दिया सजा ला बचणे तांई क्या करन?” 11 यहून्ना उना जो जबाब दिता, “जिसदे बाल दो कुरते न, सै उसयो बंडी दिया जिना बाल नी न, कने जिसदे बाल खाणां है, सै भी इयां करन।” 12 कने कर लेणेबाले भी बपतिस्मा लिया आये, कने उसला पुछ्या, “गुरू जी, असां क्या करन?” 13 यहून्ने उना जो बोलया, “जिणा तुहांजो अधिकारियां बोलया लेणे तांई, उसला जादा चुंगी मत लेंदे।” 14 कने सिपाईयां भी उसला पुछ्या, असां क्या करन? उनी उना जो बोलया, कुसी ने लडाई मत करदे, कने कुसी पर झूठा दोष मत लांदे, कने अपणिया तनखाई पर खुश रेंणा। 15 जालू सारयां लोकां मसीह दे तोल्ली ओणे दी आस लगाईयो थी, कने सारे अपणे-अपणे मने च यहून्ना दे बारे च सोचा दे थे, की सै ही मसीहा ता नी है। 16 तां यहून्ने उना सारयां जो जबाब दिता, “मैं तां तुहांजो पाणिये ने बपतिस्मा दिन्दा है, पर सै ओणेवाला है, सै मिंजो ला भी शक्तिशाली है; मैं तां उस जोगा भी नी है की उदे जूतयां दे तस्मे भी खोली सके, उनी तुहांजो पबित्र आत्मा ने कने अग्गी ने बपतिस्मा देणा है। 17 उदा सूप, उदे हथे च है; कने उनी अपना खेतर ढंगे ने साफ करणा; कने कणका जो अपणे खेतेरे च गिटेरगा, पर भूरे जो अग्गी च फूकी देणा है, सै अग्ग कदी नी बुझदी है।” 18 सै बडियो सारियां शिक्षा देईकरी लोकां जो श्भसमाचार सुणांदा रिया। 19 पर जालू यहून्ना गलील प्रदेश दे इलाके दे राजा हेरुदेस जो उदे भाई फिलिपुस दिया घरे बाली हेरुदियास दे बारे च, कने उना दे सारे बुरे कम्मा दे बारे च जडे उनी कितयो थे, उना दी निंदा किती। 20 तां ही तां राजा हेरोदेसे सारयां ला बडी करी बुरा कम्म किता, की यहून्ना जो जेला च पाई दिता। 21 जालू सारे लोकां बपतिस्मा लिया, कने यीशु भी बपतिस्मा लेईकरी प्राथना करा दा था, तां स्वर्ग खुली गेया। 22 कने पबित्र आत्मा शरिर दे स्मे च कबुरण बणी करी उस पर उतरी, कने आकाशवाणी होई: तू मेरा प्यारा पुत्र है, तिजो ला मैं खुश है। 23 जालू यीशु अपु उपदेश करणा लग्गा तां सै लगबग तियां सालां दा था कने (जदिया समझया जांदा है) की यूसुफ दा पुत्र था; कने यूसुफ एली दा पुत्र, 24 कने एली मत्तात दा पुत्र, कने मतात लेवी दा पुत्र, कने लेवी मलकी दा पुत्र, कने मलाकी यन्ना दा, कने यन्ना यूसुफ दा पुत्र, 25 कने यूसुफ मत्तियाह दा, कने मत्तियाह आमोस दा पुत्र, कने आमोस नहम दा, कने नहम असल्याह दा पुत्र, कने असल्याह नोगह दा पुत्र, 26 कने नोगह मात दा पुत्र, कने मात मत्तियाह दा पुत्र, कने मत्तियाह शिमी दा, कने शिमी योसेख दा पुत्र, कने योसेख योदाह दा पुत्र, 27 कने योदाह यहून्ना दा पुत्र, कने यहून्ना रेसा दा पुत्र, कने रेसा जम्बाबेल दा, कने जम्बाबेल शालतियेल दा पुत्र, कने शालतियेल नेरी दा पुत्र, 28 कने नेरी मलकी दा पुत्र, कने मलकी अदी दा पुत्र, कने अदी कोसाम दा पुत्र, कने कोसाम इलमोदाम दा पुत्र, कने इलमोदाम एर दा पुत्र, 29 कने एर येशु दा पुत्र, कने येशु एलीएजेर दा पुत्र, कने एलीएजेर योरिम दा पुत्र, कने योरिम मत्तात दा पुत्र, कने मत्तात लेवी दा पुत्र, 30 कने लेवी शमोन दा पुत्र, कने शमोन यहदा दा पुत्र, कने यहदा यूसुफ दा पुत्र, कने यूसुफ योनान दा, कने योनान एलयाकीम दा पुत्र, 31 कने एलयाकीम मलेआह दा पुत्र, कने मलेआह मिन्नाह दा पुत्र, कने मिन्नाह मत्तात दा पुत्र, कने मत्तात नातान दा पुत्र, कने नातान दाऊद दा पुत्र, 32 कने दाऊद यिशै दा पुत्र, कने यिशै ओबेद दा पुत्र, कने ओबेद बोअज दा पुत्र, कने बोअज सलमोन दा पुत्र, कने सलमोन नहशोन दा पुत्र, 33 कने नहशोन अम्मीनादाब दा पुत्र, कने अम्मीनादाब अरनी दा पुत्र, कने अरनी हिस्सोन दा पुत्र, कने हिस्सोन पेरस दा पुत्र, कने पेरस यहदा दा पुत्र, 34 कने पेरस याकूब दा पुत्र, कने याकूब इसहाक दा पुत्र, कने इसहाक अब्राहम दा पुत्र, कने सै तेरह दा पुत्र, कने तेरह नाहोर दा पुत्र, 35 कने नाहोर सप्पा दा पुत्र, कने सप्पा रूद दा पुत्र, कने रूद फिलिग दा पुत्र, कने फिलिग एबिर दा पुत्र, कने एबिर शिलह दा पुत्र, 36 कने शिलह केनान दा पुत्र, कने केनान अरफक्षद दा पुत्र, कने अरफक्षद शेम दा पुत्र, कने सै न्ह दा पुत्र, कने न्ह लेमेक दा पुत्र, 37 कने लेमेक मथशिलह दा पुत्र, कने

मथशिलह हनोक दा पुत्र, कने हनोक थिरिद दा पुत्र, कने थिरिद महललेल दा पुत्र, कने महललेल केनान दा पुत्र, 38 कने केनान एनोश दा पुत्र, कने एनोश शेत दा पुत्र, कने शेत आदम दा पुत्र, कने शेत परमेश्वरे दा पुत्र था।

4 फिरी यीशु पबित्र आत्मा ने परिपूर्ण होईकरी यरदन खडा ला बापस आया; कने आत्मा दी अगुवाई ने सुनसान जगा च रिया; 2 कने शैतान चालियां रोजां दीकर उदी परख करदा रिया। उना रोजां च उनी कुछ नी खादा कने जालू सै रोजे पुरे होई गे, तालू उसयो भूख लग्गी। 3 कने शैताने उसयो बोलया, “अगर तू परमेश्वरे दा पुत्र है तां इसी पथरे जो बोल की, तू रोटी बणी जा।” 4 यीशुए उसयो जबाब दिता, “पबित्र शास्त्र च लिखया है: माणुए सिर्फ रोटियां ने ही जिंदि नी रेणा।” 5 तालू सै शैतान उसयो लेई गिया कने पल भर च ही सारे संसारे दे राज्य उसयो दस्से। 6 कने उसयो बोलया, मैं ऐ सारे हक, कने सारा धन दौलत तिजो दिगा, क्योकि सै मिंजो दितया है: कने जिसयो दिल करदा उसयो देई दिन्दा है। 7 इस तांई अगर तू मिंजो नमस्ते करगा, तां ऐ सारा तेरा होई जाणा। 8 यीशुए उसयो जबाब दिता, “पबित्र शास्त्र च इयां लिखया है: तू अपणे परमेश्वरे जो नमस्ते कर; कने उदी ही उपासना कर।” 9 तालू उनी उसयो यरूशलेम शहर च लेईजाई करी मंदरे दिया चुंडिया पर खडेरया, कने उसयो बोलया, “अगर तू परमेश्वरे दा पुत्र है, तां अपणे आपे जो ऐथू ला थले फेंकी दे। 10 क्योकि पबित्र शास्त्र च लिखया हे, उनी तेरे तांई अपणे स्वर्गदांता जो हुकम देणा, की सै तिजो बचान। 11 कने उना तिजो हथो हथ सभांली लेणा पर इयां ना हो की तेरे पैरां च पथरे ने चोट लग्गी जा।” 12 यीशुए उसयो जबाब दिता, पबित्र शास्त्र च ऐ भी लिखया है: तू अपणे प्रभु परमेश्वरे दी परख मत करदा। 13 जालू शैतान सारियां परखां करी बैठा, तालू सै थोडी देरां तांई उदे बखे ला चली गिया। 14 फिरी यीशु आत्मा दिया शक्तिया ने परिपूर्ण होईकरी गलील प्रदेश जो बापिस गिया, कने उदी चर्चा अखे-बखे दे देशां च फेली गई। 15 कने सै उना ही यहदी जंज घरां च उपदेश करदा रिया, कने सारे उदी बडाई करदे थे। 16 कने सै नासरत च बापस आया; जिथू पलया बडोयो था; कने अपणे रिबाजे दे अनुसार सन्त दे रोजे पबित्र शास्त्र पढने तांई यहदी जंज घर च जाई करी खडोई गिया। 17 परमेश्वरे दा संदेश देणेबाले यशायाह दी कताब पढने जो उसयो दिती। कने उनी कताब खोलिकरी सै जगा कडी जिथू ऐ लिखया था: 18 “प्रभु दी आत्मा मिंजो सोगी है, इस तांई उनी कंगालां जो श्भसमाचार सुनाणे तांई मेरा अभिषेक कितया है, कने मिंजो इस तांई भेजया है, की केदियां जो छुटकारे दा कने अन्नयां जो नजर मिलणे दा श्भसमाचार दा प्रचार करे कने कुचले होया जो छुडा। 19 कने प्रभु दे खुश रेंणे दे साले दा प्रचार करे।” 20 तालू उनी कताब बंद करी के सेवके दे हथे च देई दिती, कने बैठी गिया: कने यहदी जंज घर दे सारे लोकां दियां नजरां उस पर थियां। 21 तालू सै उना ने बोलणा लग्गा, “अज ही तुहांजे सुणने ने ऐ लेख चुकी होया है।” 22 कने सारयां लोकां उदी प्रशंसा किती, जिडियां अनुग्रह दियां गल्लां उदे मुए ला निकलदियां थियां, उना ला हेरान होए; कने बोलणा लग्गे, “क्या ऐ यूसुफ दा पुत्र नी है?” 23 उनी उना जो बोलया, “तुसां मिंजो पर ऐ कहावत जरूर बोलणी है, की हे बैध, अपणे आपे जो खरा कर। जडा कुछ असां सुणाया है की तू कफरनहम शेहेरे च कितया है, उसयो अपणे देशे च भी कर।” 24 कने उनी बोलया, “मैं तुहांजो ने सच्च बोलदा है, कुसी भी परमेश्वरे दा संदेश देणेबालयां जो अपणे देशे च इज्जत नी मिलदी। 25 मेरी गल्ल सुणा। की परमेश्वरे दा संदेश देणेबाले एलियाह दे दिना च जालू साडे तिन्ना सालां दीकर कोई बरखा नी होई, ऐथू दीकर की सारे इझाएल देशे च बडा भरी अकाल पिया, तां इझाएल देशे च मतिंयां बिधवा थियां। 26 पर एलियाह जो इझाएल च उना चे कुसी बाल भी नी भेजया गिया, सिर्फ सिदोन शेहेर दे बखे सामरत दे इलाके च इक होर जाति दी बिधवा बाल भेजया। 27 कने परमेश्वरे दा संदेश देणेबाले एलीशा दे बकते इझाएल देशे च बतरे कोडी थे, पर सीरिया दा वासी नामान जो छडी करी उना चे कोई भी ठीक नी किता, नामान होर जाति दा था।” 28 ऐ सारियां गल्लां सुणिकरी जितणे भी यहदी जंज घर च थे, सारे गुस्से होई गे। 29 कने उना उठी करी उसयो शेहेरे ला बाहर कडया, कने जिस पाहडे पर उना दा शेर बसया था, उसयो उदिया चुंडिया पर लेई चले, ताकि उसयो ओथु ला थले फेंकी करी मारी देन। 30 पर सै उना दे बिचे ला निकली करी चली गिया। 31 फिरी यीशु गलील प्रदेश दे कफरनहम शेहेर च गिया, कने सन्त दे रोजे लोकां जो उपदेश दिन्दा था। 32 सै उदे उपदेशे ने हेरान होई गे

क्योंकि यीशु बचन अधिकारे ने बोलदा था। 33 तालू ही यहूदी जंज घर च इक माणु था, जिदे बिच इक बुरी आत्मा थी। 34 उनी जोरे ने बोलया, “हे नासरत दे यीशु, तू सांझो कजो परेशान करदा है? तू क्या सांझो खत्म करणा आया है? मिंजो पता है की, तू कुण है? तू ही परमेस्वर दा पबित्र पुत्र मसिहा है, जडा परमेस्वरे ला आया है।” 35 यीशुए बुरिया आत्मा जो झिडकया कने बोलया, चुप रे; कने इस माणुए ला निकली जा, तालू सै बुरी आत्मा उसयो बिच पटकी करी बिना नुकसान कितयो उस बन्दे ला निकली गई। 36 इस पर सबना जो हेरानी होई, कने से अपु चे गल्लां करी के बोलणा लग्गे, “ए कदिया बचन है? की सै हक कने सामर्थ्य ने बुरियां आत्मा जो हुकम दिन्दा है, कने बुरी आत्मा इसदियां गल्लां जो मंदियां भी ना।” 37 इदे बाद यीशुए दी चर्चा सारे पासे होणा लग्गी पेई। 38 सै यहूदी जंज घर ला उठी करी शमौने दे घरे जो गिया कने शमौने दिया ससु जो बुखार चडया था, कने उना उसा तांई यीशुए ने बिनती कीती। 39 उनी उसा बखे खडे होईकरी बुखारे जो डांटया कने बुखार उतरी गिया कने सै झट पट उठी करी उदी सेबा करणा लग्गी पेई। 40 सूरजे डुबणे दे बेले जिना -जिना लोकां जो लग-लग तरा दियां बमारियां थियां उना सारयां लोका जो यीशुए बाल लेईं आये, कने उनी इकी-इकी पर हथ रखीकरी सारयां जो ठीक कित। 41 कने बुरियां आत्मा चिखदियां कने बोलदियां होइयां मतयां लोकां ला निकली गियां की, “तू परमेस्वरे दा पुत्र है” पर सै उना जो डांटदा था, कने बोलणा नी दिन्दा था, क्योंकि उना जो पता था की ए मसीह है। 42 जालू दिन होया तां सै निकली करी इक सुनसान जगा पर चली गिया, कने भिडा दी भीड उसयो तोपदे उस बाल आई, कने उसयो रोकणा लग्गी, की ऐथू ला ना जा। 43 पर यीशुए उना ने बोलया, “मिंजो होर-होर शेहरां च भी परमेस्वरे दे राज्य दा श्रमसाचार सुणाणा जरूरी है, क्योंकि मैं इसी तांई संसारे च भेजया है।” 44 कने सै गलील प्रदेश दे यहूदी जंज घर च प्रचार करदा रिया।

5 इक दिन जालू यीशु गलील दे झिला दे कंडे पर खडोतया था, तां भीड परमेस्वरे दा बचन सुणने तांई उस पर डेईं पोआ दी थी। 2 की उनी झिला दे बखे दो किस्तिया लगियां दिखियां, कने मखबारे उना ला उतरी करी मच्छियां पकडणे बाले जाले जो धोआ दे थे। 3 उना किस्तिया चे इकी पर, जडी शमौने दी थी, चडी करी यीशुए उसला बिनती कीती की, किनारे ला थोडी हटाई ले, तालू सै किस्तिया पर बेईकरी लोकां जो उपदेश देणा लग्गा। 4 जालू यीशु लोकां ने गल्लां करी बैठा, तां उनी शमौने जो बोलया, “डुगे पाणिए चे लेईं चल, कने मच्छियां पकडने तांई अपने जाले जो फेक।” 5 शमौने उसयो जबाब दिता, “हे मालिक, असां सारी रात मेहनत कीती कने कुछ नी पकडया; पर तरे बोलने ने असां जाल फेका दे न।” 6 जालू पतरस कने उदे साथियां जाल पाया, तां मतियां भरी मछियां जाले च फस्ती गियां, कने उना दे जाल फटणा लग्गी पिया थे। 7 इस पर उना अपने साथियां जो झारा कित जडे दुईयां किस्तिया पर थे, ताकि आई करी साडी मदद करा: कने उना आई करी, दोनो किस्तिया मच्छियां ने इतणियां भरी लियां की सै डुबणा लग्गी पियां थियां। 8 ए दे दिखीकरी शमौन पतरस यीशुए दे पैरां च पेई गिया, कने बोलया, “प्रभु जी, मेरे बखे ला चली जा, क्योंकि मैं पापी माणु है।” 9 क्योंकि इतणियां मछियां पकडणे ने उसयो कने उदे साथियां जो बडी हेरानी होई; 10 कने तियां ही उदे साथी जब्दी दे पुत्र याकुब कने यहूना भी बडे हेरान होऐ। तालू यीशुए शमौने ने बोलया, “डरा मत, हण ला तुसां माणुआं जो मेरे केले बणना सिखाणा है।” 11 कने सै किस्तिया जो किनारे पर लेईं आऐ, कने सब कुछ छडी करी उदे पिच्छे चली पे। 12 जालू यीशु कुसी शेहेर च था, तां दिखा, ओथू इक माणु था, जिसयो कोह होया था कने सै यीशुए जो दिखीकरी मुए दे भार पेई गिया, कने बिनती करणा लगा कि, “प्रभु जी अगर तू चा तां मिंजो ठीक करी सकदा है।” 13 यीशुए हथ अग्रे करी के उसयो छुता कने बोलया, “मैं चांदा है की तू ठीक होई जा” कने तालू ही उदा कोह ठीक होई गिया। 14 तालू उनी उसयो समझया, “कुसी ने कुछ मत बोलदा, पर जाई करी अपने आपे जो याजकां जो दस, की तू खरा होईया कने परमेस्वरे जो भेंट चढा जिदे बारे च मूसा हुकम दितया है, ताकि लोक जाणी सकन की तू खरा होई गिया।” 15 पर यीशु दे बारे च खबर होर भी जादा फेलदी गई, कने भिडा दी भिड उसयो सुणने तांई कने अपणियां बमारियां ला ठीक होणे तांई गिती होई। 16 पर यीशु मसीह हमेशा सुप्तान जगा च जाई करी किन्ला प्राणना करदा था। 17 कने इक रोज ऐसा होया की सै उपदेश दे दा था, कने फरीसी कने व्यवस्था जो सिखाणे बाले ओथू

बैठयो थे, जडे गलील प्रदेश कने यहूदिया प्रदेशे दे इलाके दे हर इक गां ला कने यस्शलेम शेहेर ला आयो थे; कने ठीक करणे तांई प्रभु दी शक्ति उस सोगी थी। 18 कने दिखा लोक इक माणुए जो मझे पर चुकी लेईं आऐ, कने सै धरंगे दा मरीज था, कने सै उसयो अंदर लेईं जाणे कने यीशुए दे सामणे रखणे दी तरकीब तोपा दे थे। 19 कने जालू भिडा दिया बजा ने अंदर नी लेईंजाईं सके तां उना छती पर चडी करी कने खपैलां जो हटाई करी, उना उसयो मझे समेत कमरे बिच यीशु दे सामणे उतारी दिता। 20 उनी उना दा भरोसा दिखीकरी बोलया, “हे माणु, तरे पाप माफ होऐ।” 21 तालू व्यवस्था जो सिखाणे बाले कने फरीसी गल्लां करणा लग्गे, “ए कुण है, जडा परमेस्वरे दी निंदा करा दा है? परमेस्वरे जो छडी करी होर कुण पापां जो माफ करी सकदा है?” 22 यीशुए उना दे मने दियां गल्लां जो जाणी करी बोलया, “की तुसां अपने मने च क्या गल्लां करा दे न? 23 क्या बोलणा असान है? क्या इयां बोलणा, की तरे पाप माफ होये, या की इयां बोलणा की उठ कने हंड फिर? 24 पर ए इस तांई की तुहांजो पता लग्गे की मिंजो, माणुए दे पुत्रे जो धरतिया पर पाप माफ करणे दा हक भी है।” उनी उस धरंगे दे मरिजे जो बोलया, “मैं तिजो ने बोलदा है, उठ कने अपने मझे जो चुकी करी अपने घरे चली जा।” 25 सै झट पट उदे सामणे उठया, कने जिस पर सै लेटया था उसयो चुकी करी, परमेस्वरे दी बडाई करदा होया अपने घरे जो चली गिया। 26 तालू सारे हेरान होऐ कने परमेस्वरे दी बडाई करणा लग्गे, सारे डरीकरी बोलणा लग्गे, “अज असां बडियां अनोखियां गल्लां दिखियां।” 27 कने उदे बाद यीशु बाहर गिया, कने उनी लेवी नादे दे इक कर लेणेबाले जो चुगिया दिया चोकिया पर बैठया दिखया, कने उसयो बोलया, “की मेरा चेला बण।” 28 तालू सै सब कुछ छडी करी उठया कने उदे पिच्छे चली पिया। 29 कने लेवी अपने घरे यीशुए तांई इक बडी बडी धाम दिती; कने चुंगी लेणेबाले कने होर मते भरी लोकां उदे सोगी खाणां खादा था। 30 कने फरीसी कने मूसा दी व्यवस्था जो सिखाणे बाले उदे चेलयां जो ए बोली करी गल्लां करणा लग्गे, “की तुसां चुंगी लेणेबाले कने पापियां सोगी कजो खडे पिंदे न?” 31 यीशुए उना जो जबाब दिता, वैध भले चंगे लोका तांई नी होंदा, पर सै बिमारां तांई जरूरी होंदा है। 32 मैं धर्मियां जो नी, पर पापियां जो मन बदलने तांई सदणा आया है। 33 फरीसी कने मूसा दिया व्यवस्था जो सिखाणे बालयां यीशुए जो बोलया, “यहूना दे चेले तां बराबर बरत रखदे कने प्राथना करदे न, कने तियां ही फरीसियां दे भी करदे न, पर तरे चेले तां खडे पिंदे न।” 34 यीशुए उना जो बोलया, “क्या तुसां बरातियां ला बरत करवाईं सकदे न जालू दीकर लाडा उना सोगी होऐ? 35 पर सै दिन ओणे न, जिना च लाडा उना ला बख कितया जाणा है, तालू बरातियां उना रोजां च बरत रखणे न।” 36 यीशुए उना ने इक होर कहाणी बोली: कोई भी माणु नोए कपडयां जो फाडिकरी पराणे कपडयां च रफू नी लांदा है, अगर कोई इयां करदा है तां नोआ कपडा धोणे बाद छोटा होई जांदा है, जिसने पराणे कपडे होर फटी जाणा कने सै पराणा कपडा उस सोगी मेल नी खाणां। 37 नोए अंगरा दे रसे जो पराणिया खलडिया च कोई नी रखदा है नी तां नोआ अंगर रस पराणिया खलडिया जो फाडी करी निकली जांदा है, कने अंगर रस खलडिया जो बरबाद करी दिन्दा है, 38 तां तां नोआ अंगर रस नोईयां खलडिया च ही रखणा चाईदा। 39 कोई माणु पराणा अंगर रस पी करी नोआ नी पिणा चांदा क्योंकि सै बोलदा है, की पराणा ही खरा है।

6 फिरी सै सब्दे दे रोजे खेतरां च होईकरी चलया था, कने उदे चले बेलां तोडी-तोडी करी कने हथा ने मल्ली-मल्ली करी खांदे जा दे थे। 2 तालू फरीसियां च कोई बोलणा लग्गे, “तुसां सै कम्म कजो करदे न जडा सब्दे दे रोज करणा ठीक नी है?” 3 यीशुए उना जो जबाब दिता, की तुसां ए नी पढया, कि राजा दाऊदे जालू सै कने उदे साथी भूखे थे तां उना क्या कित? 4 दाऊद कियां परमेस्वरे दे घरे गिया, कने भेंट चढाईयां रोटियां लेईंकरी खादियां कने अपने साथियां जो भी दितियां, जिना जो सिर्फ याजक लोक ही खाईं सकदे थे? 5 कने यीशुए उना ने बोलया, “मैं माणुए दा पुत्र ए बोलणे दा हक रखदा है कि लोकां जो सब्दे बाले रोजे क्या करणा चाईदा कने क्या नी करणा चाईदा।” 6 कने इक दिन इयां होया की सै कुसी होर सब्दे दे रोजे यहूदी जंज घर च जाई करी उपदेश देणा लग्गा; कने ओथू इक माणु था, जिदा सज्जा हथ सुक्या था। 7 व्यवस्था जो सिखाणे बालयां कने फरीसी उस पर दोष लग्गणे दे मोके दीया ताका पर थे, की दिखदे न की सै सब्दे दे रोजे ठीक करदा है की न। 8 पर सै उना दे बिचार जाणदा था; तां तां उनी सुक्यो

हथे बाले माणुए जो बोलया, “उठ, खडोई जा!” सै उठी होया। 9 यीशुए उना जो बोलया, “मै तुसां ला ऐ पुख्ता है की सक्त दे रोजे क्या ठीक है, भला करणा या बुरा करणा; जान बचना या मारणा?” 10 तालू यीशुए उना लोकां पासे दिखया। कने उस माणुए जो बोलया, “अपणा हथ कर र्ख्वां।” उनी किता, कने उदा हथ खरा होई गया। 11 पर ऐ दिखीकरी फरीसी कने मूसा दी व्यवस्था जो सिखाणे बाले बडे गुस्सा होई गे कने अपु चे बोलणा लग्गे की असां यीशुए दा क्या करन? 12 उदे बाद यीशु धारा पर प्राथना करणे तांई गया, कने परमेस्वरे ने प्राथना करणे च सारी रात बिताई। 13 जालू दिन होया, तां उनी अपने चेलयां जो सदीकरी उना चे बाहरा चुणी ले, कने उना जो प्रेरित बोलया। 14 कने सै ऐ न: शमौन जिदा न उनी पतरस भी रखया; कने उदा भाई अन्दियास, कने याकूब, कने यहूना, कने फिलिपुस, कने बरतुलमै, 15 कने मती, कने थोमा, कने हलफई दा पुत्र याकूब, कने शमौन जिसयो जेलोतेस बोलदे न, 16 कने याकूब दा पुत्र यहूदा, कने यहूदा इस्करियोती, जडा उसयो पकडवाणे बाला बणया। 17 तालू सै उना सोगी उतरिकरी चौरस दिया जगा पर खडोता, कने उदे चेलयां दी मती भीड कने सारे यहूदिया प्रदेश, कने यरूशलेम शहर, कने सूर कने सैदा शहरां दे कने समुद्रे दे बखे ला बतरे लोक, 18 जडे उदी सुणना कने अपणियां बमारियां ला ठीक होणे तांई उस बाल आयो थे, ओथु थे। कने बुरियां आत्मा दे सताये होऐ लोक भी ठीक होंदे थे। 19 कने सारे उसयो रूणा चांदे थे, क्योकि उसला शक्ति निकलदी थी जडी सबना जो ठीक करदी थी। 20 तालू उनी अपने चेलयां पासे दिखीकरी बोलया, “धन्य न तुसां, जडे दीन न, क्योकि परमेस्वरे दा राज्य तुहाडा है।” 21 “धन्य न तुसां, जडे की हुण भूखे न; क्योकि तुसां रजोऐ जाणे न। धन्य न तुसां, जडे की हुण रोंदे न, क्योकि तुसां हसणा है।” 22 “धन्य न तुसां, जालू माणुए दे पुत्रे दिया बजा ने लोकां तुहांजो ने दुशमणी रखणी है, कने तुसां जो कडी देणा, कने तुहाडी निंदा करणी, कने तुहाडा ना बुरा समझीकरी तुहांजो बडी देणा है।” 23 “उस रोजे खूश होनयो, क्योकि तुहाडे तांई स्वर्गे च बडा इनाम है। उना दे बाप-तूदे भी परमेस्वरे दा संदेश देणेबालयां सोगी इयां ही करदे थे।” 24 “पर तुहाडे तांई बडी बुरी सजा होणी जडे बडे अमीर न, क्योकि तुहांजो पेहले ही अपणी खूशी मिली गियो है।” 25 “तुहाडे तांई बडी बुरी सजा होणी जडे हुण रजी करी खादे न, क्योकि उना भूखे रेणा है। तुहाडे तांई बडी बुरी सजा होणी; जडे हुण हसदे न, क्योकि बादे च शोक करणा कने रोणा है।” 26 “तुहाडे तांई बडी बुरी सजा होणी, जालू सारे माणु तुहांजो खरा बोलगे, क्योकि तुहाडे पूर्वजां उना लोकां दे बारे च खरियां गल्लां बोलियां जडे परमेस्वरे दे संदेश देणेबाले झूठे लोक थे। इसला पता चलदा की तुसां भी परमेस्वरे दे संदेश देणेबाले झूठे लोक न।” 27 पर तुसां सुणने बालयां जो मै बोलदा है, की अपने दुशमणां ने प्यार रखा; जडे तुहांजो ने बैर करन, उना दा भला करा। 28 जडे तुहांजो श्राप देन, उना जो आशीष दिया; जडे तुहाडी बेजती करन, उना तांई प्राथना करा। 29 जडा तेरिया इकी खाडिया पर थपड मारणा तां तू दजी भी उस पासे करी दे, कने जडा तेरी चादर खोई ले, उसयो अपणा कुरता देणे ला भी मत रोक। 30 जडा कोई तिजो ला मंगे, उसयो देई दे; कने जडा तेरी चिज खोई ले, उसला मगदा मत। 31 कने जियां तुसां चांदे न की लोक तुहांजो ने करन, तुसां भी उना ने तदिया ही करा। 32 अगर तुसां अपने ने प्यार रखणेबाले ने प्यार रखन, तां तुहाडी क्या बडाई? क्योकि पापी भी तां अपने ने प्यार रखणे बालयां सोगी प्यार रखदे न। 33 कने अगर तुसां अपने ने भलाई करणे बाले ने ही भलाई करदे न, तां तुहाडी कोई कजो बडाई करे? क्योकि पापी भी तां इयां ही करदे न। 34 कने अगर तुसां उसयो ही उधार दिन्दे न, जिसला बापस मिलणे दी आस रखदे न, तां तुहाडी कोई कजो बडाई करे? क्योकि पापी भी पापियां जो उधार दिन्दे न, ताकि उतणा ही बापस मिलले। 35 अपने दुशमणां ने प्यार रखा, कने भलाई करा, कने फिरी बापस नी मिलणे दी इच्छा नी रखीकरी उधार दिया; कने तुहाडे तांई बडा इनाम होणा है; कने तुसां परम प्रधान परमेस्वर दे सन्तान बणाना, क्योकि सै उना पर जडे परमेस्वरे दा धन्यबाद नी करदे न कने बुरे लोकां पर भी दया करदे न। 36 जियां तुहाडा पिता दयाबान है, तियां ही तुसां भी दयाबान बणा। 37 “कुसी पर दोष मत लगा; तां तुहांजो पर भी परमेस्वरे दोष नी लगाणा: कुसी जो सजा नी देणी, तुसां भी दुजयां जो माफ करगे तां तुहांजो भी परमेस्वरे माफ करणा।” 38 दिया करा, तां तुहांजो भी मिलणा। लोकां पूरा नाप दबाई-दबाई करी कने हिलाई-हिलाई करी कने उभरदा होया तुहाडिया गोदा च पांणा, क्योकि जिस नापे ने तुसां नापदे न, उसी नापे ने तुहाडे तांई भी नापया जाणा। 39 फिरी यीशुए उना ने न इक होर

कहाणी बोली: क्या कोई अन्ना माणु, कुसी अन्ने जो रस्ता दसकी सकदा है? क्या इना दोना खड्डे च नी पांणा? 40 चेला अपने गुप्ते ला बडा नी होदा, पर जडा कोई पूरा शिक्षित होंगा, सै ही अपने गुप्ते सांई होणा। 41 तू कजो अपने भाईऐ दियां छोटियां-छोटियां गलतियां जो दिखदा है, जडियां उदिया हखी च पिये छोटे दे कखे सांई न, कने तिजो अपणियां बडियां-बडियां गलतियां नी मिलदियां, जडियां तेरियां हखी च इक लठे सांई न। 42 जद की तिजो अपणी ही हखी दा लठा नी मिलदा है, तां अपने भाईये जो कियां बोली सकदा है, भाई रूक मै तेरी हखी दे तिनके जो कडी दिन्दा है? हे कपटी मने दे लोको पेहले तां अपणी हखी दे लठे जो कडा, तां जडा तिनका तेरे भाईऐ दी हखी च है, उसयो दंगे ने दिखीकरी कडी सकदे न। 43 कोई ऐसा खरा सख नी है, जडा बेकार फल दे, कने ना ही तां कोई बेकार सख है, जडा खरा फल दे। 44 हर कोई सख अपने फले ने पछयेणा जांदे है; क्योकि लोक झिल्लां च अंजीर नी तोडदे न, कने ना बेरी दे झिले ला अंगूर तोडदे न। 45 भला माणु अपने मने दे भले भंडारे ला खरियां गल्लां कडदा है, कने बुरा माणु अपने मने दे बुरे भंडारे ला बुरियां गल्लां ही कडदा है; क्योकि जडा मने च भस्या होदा हे सेई गुए च ओदा है। 46 जालू तुसां मेरा बोलया नी मदे, तां कजो मिजो प्रभु-प्रभु बोलंदे न? 47 जडा कोई मेरे बाल ओदा है, कने मेरियां गल्लां सुणीकरी उना जो मनदा है, मै तुहांजो दसदा है की सै कुसदे सांई है? 48 सै उस माणुए सांई है, जिनी घर बणादे बेले हुगी जमीन खणीकरी पथरां दी नियां बणायां न, कने जालू बाह आई तां पांणी उस घरे ने लग्गा, पर उसयो हिलाई नी सकया, क्योकि सै पक्का बणया था। 49 “पर जडे सुणीकरी नी मदे न, सै उस माणुए सांई न, जिनी मिटीया पर बिना नियां दा घर बणया है, जालू उस पर पांणी लगया, तालू सै झट ढेई गया, कने सै ढेईकरी टूटी भजी गया।”

7 जालू सै लोकां जो अपणिया सारियां गल्लां सुणाई बैठा, तां कफरनहम शहर च आया। 2 कने ओथु कुसकी सबेदारे दा इक सेवक जडा उदा बडा खास सेवक था, सै बमारियां ने मरणे बाला था। 3 उनी यीशु मसीह दे बारे च सुणया कने सुणिकरी केई बड्डे यहूदी अगुवां जो उसला ऐ बिनती करणे तांई उदे बाल भेजया, की आई करी मेरे दासे जो ठीक करी दे। 4 सै यीशु बाल आये कने उसला बडी बिनती करी के बोलणा लग्गे, “ऐ सेनापति इस काबील है की, तू उस तांई ऐ कम्म करे, 5 क्योकि सै साडिया जातियां ने प्यार रखदा है, कने उनी ही साडे यहूदी जंज घर जो बणया है।” 6 यीशु उना सोगी-सोगी चलयया, पर जालू सै घरे ला थोड़ी दूर था, तां सबेदारे उसयो अपने केई साथियां बाल बोली भेजया, प्रभु जी, इतणा कष्ट मत कर, क्योकि मै इस लायक नी है की, तू मेरे घर आये। 7 इसा बजा ला मै अपने आपे जो इसी लायक नी समझया की, तेरे बाल ओऐ, पर तू बचन ही बोली दे तां ही मेरा सेवके ठीक होई जाणा। 8 मै भी अधिकारियां दे थल्ले कम्म करणे बाला माणु है, कने मेरे अर्थीन सपाई कम्म करदे न, कने जालू इकी सपाईऐ जो बोलदा है कि, तू जा, तां सै चली जांदा है; कने तुऐ जो बोलदा है कि, तू ऐथू आ, तां सै आई जांदा है, कने जालू मै अपने नोकरे जो बोलदा, कि ऐ कर, तां सै करी दिन्दा है। 9 ऐ सुणिकरी यीशु हेरान होया, कने उनी मु फेरिकरी उसा भिडा ने जडी उदे पिच्छे ओआ दी थी बोलया, “मै तुहांजो ने बोलदा है, कि मै इम्राएल च भी ऐदिया भरोसा नी दिखया।” 10 कने जडे साथी भेजयो थे सै घरे बापस आये, कने उस सेवके जो दिखया तालू सै ठीक होई गया था। 11 थोडे रोजां बाद सै नाईन नाऐ दे इक शहरे जो गया, कने उदे चले कने बडी भरी भीड उदे सोगी चलियो थी। 12 जालू सै शहरे दे फाटके बखे पुज्जा, तां ओथु लोक इकी मुई जो बाहर लेई चलयो थे कने सै अपणिया माऊ दा इकलोता पुत्र था, कने सै बिधवा थी, कने शहरे दे मते लोक उना सोगी थे। 13 उसा जो दिखीकरी प्रभु जो उसा पर बडा तरस आया, कने यीशुए उसा जो बोलया की, “रो मत।” 14 तालू यीशुए जाई करी अर्थिया जो छुला; कने जडे अर्थिया लेईकरी चलयो थे सै स्की गे, तालू यीशुए बोलया, “हे जवान, मै तिजो बोलदा है, की उठ जा!” 15 तालू सै मुर्दा जिंदा होई गया, कने बोलणा लगी पिशा: कने उनी उसयो उदिया माऊ जो देई दिता। 16 ऐ सब कुछ दिखीकरी सै सारे डरी गे; कने सै परमेस्वरे दी बडाई करी के बोलणा लग्गे, “साडे बिच इक परमेस्वरे दा संदेश देणेबाला बडा महान माणु आया है, कने परमेस्वर अपने लोकां दी मदद करणे तांई आया है।” 17 कने उदे बारे च ऐ गल्ल सारे यहूदिया प्रदेशे दे इलाके कने अखे-बखे दे देशे च फेली गईं। 18 कने यहूना जो उदे चेलयां इना सारियां गल्लां दी खबर दिती। 19

तालू यूहन्ने अपने चेलयां चे दो चेलयां जो सदकीरणी प्रभु बाल ए पूछणे तांई भेजया, “की क्या तू ही मसीह है, जिसयो भेजणे दा बायदा परमेश्वरे कितया था या असां कुसी दुजे दी नियाल रखन?” 20 उना यीशुए बाल जाई करी बोलया की, “यूहन्ना बपतिस्मा देणेबाले सांझो तैरे बाल ए पूछणे तांई भेजया है, की क्या तू ही मसीह है, जिसयो भेजणे दा बायदा परमेश्वर ने कितया था या असां कुसी दुजे दी नियाल रखन?” 21 उसी बेले यीशुए मतयां जो बिमारियां कने पीडा, कने बुरियां आत्मा ला छुड़ाया; कने मते अनयां जो हखी दितियां। 22 कने यीशुए उना ने बोलया, जडा कुछ तसां दिखया कने सुणया है, जाई करी यूहन्ना जो बोली दिया, “की जडे अन्ने थे उना जो मिलणा लग्गी पिया, कने जडे लंगडे थे से चलदे फिरदे न, कने कोढियां दा कोढ की होइ गिया है, कने जडे टोणे थे से सुणा लागी पे, कने मुदई जिन्दे होई जादे न, कने कंगलां जो शुभसमाचार सुणया जांदा है। 23 धन्य न सै, जडे मिंजो पर शक नी करदे न।” 24 जालू यूहन्ना दे भेजयो संदेश देणेबाले दूत चली गे, तां यीशु यूहन्ना दे बारे च लोकां ने बोलणा लग्गा, की तसां सुनसान जगा च क्या दिखणा गियो थे? क्या होआ ने हिलदे होए सरकंडे जो? 25 तां फिरी तसां क्या दिखणा गियो थे? क्या नरम कपडे लायो माणु जो? जडा मेगे कपडे पांदा है, कने ठाठ-बाठ ने मेहलां च रंदा है। 26 तां फिरी क्या दिखणा गियो थे? क्या कुसी परमेश्वरे दा संदेश देणेबाले जो? हां, मै तुहांजो ने बोलदा है, की तसां परमेश्वरे दे संदेश देणेबाले ला भी बूहे जो दिखया है। 27 एे सै ही है, जिसदे बारे च पबित्र शाब्दां च लिखया है. “दिख, मै अपने संदेश देणेबाले दूते जो तैरे अगे-अगे भेजदा है, जिनी तिरा अगे दा रसता तैयार करणा है।” 28 “मै तुहांजो ने बोलदा है, जडे जनानिया ला जमयो न, उना च यूहन्ना ला बडा कोई नी: पर जडा परमेश्वरे दे राज्य च छोटे ला छोटा है, सै उसला भी बडा है।” 29 जालू उना यीशुए दियां बोल्यां गल्लां जो सुणया, तां सारयां लोकां ऐथू दीकर की कर लेणेबालयां भी यूहन्ना ला बपतिस्मा लेईकरी परमेश्वरे जो सच्चा मनी लिया है। 30 पर फरीसियां कने व्यवस्था जो सिखणे बालयां उसला बपतिस्मा लेणे ला मना करी दिता कने परमेश्वरे दिया मर्जिया जो जडी उना तांई थी उसा जो अपनाणे ला मना करी दिता। 31 मै इस युगे दे लोकां दी तुलना कुसने दे कि सै कुदे सांई न। 32 सै उना जागतां सांई न, जडे बजारां च बेईकरी इकी दुजे जो पुकारी करी बोलदे न। की असां तुहाडे तांई खुशिया दे गाणे गाए, कने तसां नचे नी; असां रोए, कने तसां छाती नी पिटी। 33 क्योंकि यूहन्ना बार-बार बरत रखदा कने ना शराब पिन्दा था, कने सै बोलदे न कि उदे च बुरी आत्मा है। 34 मै माणुए दा पुत्र खांदा पिंदा है; कने तसां बोलदे न, दिखा, पेद कने शराबी माणु, कने कर लेणेबालयां दा कने पापियां दा साथी है। 35 “पर ज्ञान दी सच्चाई उदियां सारियां ओलादी दे सामणे आई है।” 36 फिरी कुनकी फरीसिए उसला बिनती किती, की मेरे सोगी खाणां खा; कने यीशु उस फरीसिए दे घरे जाई करी रोटी खाणां बैठा। 37 कने दिखा, उस शेहरे दी इक पापी जनानिया जो जालू ए पता लग्गा की फरीसी दे घरे यीशु रोटी खाणां आया है, तां सै संगमरमर दे भांडे च बडा मेगा इत्र लेई आई। 38 कने उदे पैरां बखे बेईकरी रोई-रोई करी, पैरां जो आंसुआं ने सेडणा लग्गी कने अपने बाला ने पुंजया कने उदे पैरां जो बार-बार चुमणा लग्गी कने इत्र यीशुए दे पैरां च मलया। 39 एे दिखीकरी, सै फरीसी जिनी यीशुए जो सदया था, अपने मने च सोचणा लग्गा, “अगर ए परमेश्वरे दा संदेश देणेबाला होंदा तां इसयो पता लागी जांदा, की एे जडी उसयो छुआ दी है, सै कुण है कने कदेई जनानी है? क्योंकि सै तां पापी जनानी है।” 40 यीशुए उदे बिचारां जो जाणी करी उना जो जबाब च बोलया, हे शमौन, मिंजो तिजो ने कुछ बोलणा है। उनी बोलया, “गुरु जी, बोला।” 41 तालू यीशुए इक कहाणी सुणाई, “कुसकी महाजने दे दो देणदार थे, इक पंजसो दिना दी मजदुरिया दा कने दुआ पंजा दिना दी दियाडी दा देणदार था।” 42 पर जालू उना बाल बापस करणे जो कुछ नी रिया, तां उनी महाजने दोनो जणयां दा कर्ज माफ करी दिता। उना दोनों के कुनी उम महाजने ने जादा प्यार रखणा। 43 शमौने जबाब दिता, “मेरिया समझा च तां सै माणु जिदा जादा कर्ज माफ करी दिता।” यीशुए उसला बोलया, तू ठीक जबाब दिता है। 44 कने उसा जनानिया पासे फिरी करी उनी शमौने ने बोलया, “क्या तू इसा जनानिया जो दिखया इना क्या किता? मै तैरे घरे जो आया पर तू मिंजो पैरां धोणे तांई पाणी नी दिता, पर इना मेरे पैर आंसुआं ने धोते, कने अपने बाला ने पूजे।” 45 तू गले लाईकरी मेरा स्वागत नी किता, पर जालू ला मै आया है तालू ला इना मेरी इज्जत करणा नी छडी है। 46 तू मेरे सरे च तेल नी मलया; पर इना मेरे पैरां च इतणा

मेहणा इत्र मली करी मेरा इज्जत मान किता है। 47 “तांई तां मै तिजो ने बोलदा है; की मते सारे पाप जडे इना कितयो न, सारे माफ होए, क्योंकि इना जादा प्यार किता है; पर जिदा थोडा माफ होया है, सै घट प्यार करता है।” 48 कने उनी जनानिया ने बोलया, “तैरे पाप माफ होए।” 49 तालू जडे लोक ओथू रोटी खाणां बैठयो थे, सै अपने-अपने मने च सोचणा लग्गे, “एे कुण एे जडा पापां जो भी माफ करता है क्योंकि परमेश्वर ही एे करी सकता है।” 50 पर उनी जनानिये ने बोलया, “परमेश्वरे तिजो बचाई लिया है क्योंकि तू मिंजो पर भरोसा किता है, कने शांतिया ला चली जा।”

8 उदे बाद यीशु शेहरे-शेहरे च कने गांए-गांए च जाई करी प्रचार करदे होए कने परमेश्वरे दे राज्य दा शुभसमाचार सुणणे लग्गा कने सै बाहरा चले भी उदे सोगी थे। 2 कने कुछ जनानिया भी जिना जो बुरियां आत्मा कने बिमारियां ला ठीक कितया था, कने उना दे ना एे न: मरियम जडी मगदल गां ला थी, जिसा ला सद बुरियां आत्मा निकलियां थियां। 3 कने राजा हेरोदेस दे भण्डारी खोजा दी घरेबाला योअन्ना कने सूसनाह कने मतियां जनानिया अपणिया कमाईयां ने यीशु कने उदे चेलयां दी सेवा करदियां थियां। 4 जालू मती भरी भीड गिठी होई, कने शेहरे-शेहरे दे लोक उदे बाल चली ओदे थे, तां उनी इक कहाणी उना जो सुणाई: 5 इक किसान अपने खेतरे च बी रांणे तांई निकलया: रांदे बेले थोडे बी रस्ते दे बखे पेयी गे कने सै तां पंछियां आई करी चुगी ले। 6 कने थोडे बी पथरलिया जमिना पर पे जिथू उसयो जादा मिटी नी मिली, कने जादा मिटी नी होणे दिया बजा ने तौली लुंगी पे, कने जालू खडी धूप पेई, तां सै फकुई गे, क्योंकि उना दियां जडा डुगियां नी थियां तां सै सुकी गियां। 7 कने थोडे बी झिल्लां च पै, कने जालू झिल्ल बदे तां उना से बी डकी ले, कने उना फल नी दिता। 8 पर थोडे बी खरिया जमिना पर पे, कने सै बी लुंगे, कने मते सारे फल देणेबाले होए; केईयां ती गुणा, केईयां सठ गुणा, केईयां सी गुणा फल दिता। “एे बोलिकरी उनी जोरे ने बोलया, जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।” 9 उदे चेलयां उसयो पुछया, “की इसा कहाणिया दा क्या मतलब है?” 10 उनी बोलया, तुहांजो परमेश्वरे दे राज्य दे भेदां जो समझणे दी समझ दितियो है, पर एे कहाणियां बाकियां तांई सुणादा है, इस तांई की “सै दिखे होए भी ना दीखन, कने सुणदे होए भी ना समझन।” 11 इसा कहाणिया दा मतलब एे की: बी तां परमेश्वरे दा बचन है। 12 रस्ते बखे बाले सै न, जिना सुणया; पर शैतान झट पट जादां कने उना दे मने ला बचन कडी दिन्दा है, ताकि कुथी इयां ना होये की सै भरोसा करी लेन कने उना दा उद्धार होई जा। 13 कने जडा पथरिलिया जमिना च राया था, एे सै माणु न, जडे बचना जो सुणीकरी उना जो झट खुशिया ने ग्रहण करी लेंदे न। पर परमेश्वर दे बचना जो मने दिया गहराईया च बढणा नी दिन्दे, उदे बाद जालू बचने दिया बजा ने उना पर कला क्लेश या पेशानी होंदी है, तां सै बचना ला पिच्छे हटी जांदे न। 14 जडे बी झिल्लां च पियो न, एे सै माणु न जिना बचन सुणया, पर सै संसारे दियां चिंता जो लेईकरी दुखी, कने संसारिक चिंजा दा लालच उना दे मने च रंदा है, एे सब परमेश्वरे दे बचना च स्काबट पांदा है। कने सै बचन उना तांई फायदेमंद नी होंदा। 15 कने खरियां जमिना बाले बी सै न, जडे बचन सुणीकरी भले कने खरे मने ने सम्भाली करी रखदे न, सै सबर ने फल दिन्दे न। 16 कोई दिव्या बाली करी भांडे नी न दकदा है, कने ना मंझे हेठ रखदा है, पर धारिया पर रखदे न, ताकि अंदर ओणे बालयां जो लो होए। 17 “क्योंकि जडा कुछ भी लुक्या है, सै सामणे करणा है; कने हर इक गुप्त गल्ल सामणे आई जाणी है। 18 जिना बाल समझणे दी इच्छा है जडा परमेश्वर सिखांदा है, उसयो परमेश्वरे होर समझ देणी, पर जडा समझणे दी इच्छा नी रखदा, की मै क्या सिखांदां, तां सै जडा समझया है, परमेश्वरे सै भी उसला लेई लेणा।” 19 उदी माता कने उदे भाई उस बाल आए, पर भीडा दिया बजा ने मिली नी सके। 20 कने उसयो बोलया, “तेरी माता कने तैरे भाई बाहर खडोतयो न कने तिजो ने मिलणा चांदे न।” 21 उनी उदे जबाब च बोलया, “मेरी माता कने मेरे भाई एे ही न, जडे परमेश्वरे दे बचना जो सुणदे कने मंदे न।” 22 फिरी इक रोज सै कने उदे चले किस्तिया पर चडे, कने उनी उना ने बोलया, “ओआ, गलील झीला दे पार चलदे न।” कने उना किस्ति खोली दिती। 23 जालू किस्ति चलियो थी तां सै सोई गिया: कने झीला च तूफान आई गिया, कने किस्ति पाणिए ने भरणा लागी पेई कने सै खतरे च थे। 24 तालू उना यीशुए बखे आई करी उसयो जगाया, कने बोलया, “हे स्वामी। हे स्वामी। असां डबणा लागी पियो न।” तालू उनी उठी करी पाणिए

कने तुफाने जो डांटया कने सै स्की गे, कने सै शान्त होई गिया। 25 यीशुए उना ने बोलया, तुहाडा भरोसा कुथु था? पर सै डरी गे, कने हेरान होईकरी अपु चे बोलणा लमगे, “ऐ कदिया माणु है? ऐथु दीकर की तुफान कने लैहरां भी इदा हुकम मदे ना।” 26 फिरी सै गिरासे दे लोकां दे देशे च पुज्जे, जडा उसी पार गलील प्रदेशे दे सामणे है। 27 जालु सै किनारे पर उतरया, तां उस ग्रांए दा इक माणु उसयो मिल्ला, जिदे च बुरी आत्मा थी। कने सै कपडे नी पांदा था, कने ना घरे रेंदा था, सै कब्रिस्तान च रेंदा था। 28 सै यीशुए जो दुरे ला ही दिखीकरी दोडया, कने यीशुए जो इज्जत देणे तांई उदे पैरां अमगे डेई पिया। उनी जोरे ने चिलाई करी बोलया, “हे यीशु, परमपिता परमेश्वरे दे पुत्र। मिंजो तिजो ने क्या कम्म? मै तिजो ने बिनती करदा है, मिंजो दुख ना दे।” 29 क्योकि सै उना बुरिया आत्मा जो उस माणुए ला निकलने दा हुकम दे दा था, क्योकि सै उदे च बार-बार प्रबल होदी थी। लोक उसयो रसियां कने सुंगला ने बन्दे थे, तमी सै सब केसी जो तोडी दिन्दा था, कने बुरी आत्मा उसयो सुनसान जगा जो नटाई लेई जांदि थी। 30 यीशुए उसयो पुछया, “तेरा क्या ना है?” उनी बोलया, “मेरा ना सेना है, क्योकि मतियां बुरियां आत्मा उदे च समाई गियां थियां।” 31 कने उना उसला बिनती किती की, “सांझो अथाह कुंडे च जाणे दा हुकम मत दीदा।” (Abyssos g12) 32 ओथु पाहडे पर इक बडा बडा सुअरां दा झण्ड चुग्गा दा था, उना उसला बिनती किती, “सांझो उना च समाणा दे।” कने यीशुए उना जो जाणा दिता। 33 तालु सै बुरियां आत्मा उस माणुए ला निकली करी सुअरां दे झण्डे च समाई गियां कने सै झण्ड पाहडे ला रिडकी करी दरियाये च पेई गिया कने सारे सुअर डूबी करी मरी गे। 34 उना दे पुहालां नटी करी शेहर कने ग्रांए च ऐ खबर सुणाई। 35 कने जडा होया था लोक उसयो दिखणा आये कने जिस माणुए ला बुरियां आत्मा निकलियां थियां, उसयो यीशुए बखे कपडे पाइकरी कने ठीक-ठाक बैठया दिखीकरी सै डरी गे। 36 कने दिखणे बालयां उना जो दसया, की सै बुरियां आत्मा ने सताया होया माणु कियां ठीक होया। 37 तालु गिरासे दे लोकां दे देशे अखे-बखे दे लोकां यीशुए ने बिनती किती, की साडे ऐथु ला चली जा: क्योकि सै बडे डरी गियो थे। कने सै किस्तिया च चढी करी चली गिया। 38 जिस माणुए चे बुरियां आत्मा निकलियां थियां, सै यीशुए ने बिनती करणा लग्गा, की मिंजो अपने सोगी रेंणा दे, पर यीशुए उसयो भेजी करी बोलया। 39 “की अपने घरयो बापस चली जा कने लोकां ने बोली दे, की परमेश्वरे तेरे तांई कदे बडे-बडे कम्म किते ना।” कने सै जाई करी सारे शेहेर च प्रचार करणा लग्गा, की यीशुए मेरे तांई कदे बडे-बडे कम्म किते ना। 40 जालु यीशु बापस ओआ दा था, तां लोक उसला खुशिया ने मिल्ले; क्योकि सै यीशुए जो निव्याला दे थे। 41 यहूदी जंज घर दे सरदारां चे इक याईर नाये दा सरदार आया, सै यीशुए दी इज्जत मान तांई यीशुए दे पैरां अमगे डेई पिया, कने उनी ऐ बोली करी बडी बिनती किती, “मेरे घरे जो चला।” 42 क्योकि उदी बाहरां सालां दी इक ही कुडी थी, कने सै मरणे बाली थी। जालु सै चलदा था, तां लोक यीशुए पर डेई पोदे थे। 43 कने इक जनानी जिसा जो बाहरां सालां ला खन चलणे दी बिमारी थी, कने उना अपनी सारी कमाई वेद्यां पिच्छे खची बैठियो थी कने तमी कुदे भी हथे ला ठीक नी होइयो थी, 44 उना पिच्छे ला आई करी उदे कपडे दे कुंणे जो छुता, झट उसा दा खन निकलन बंद होई गिया। 45 इस पर यीशुए बोलया, मिंजो कुनी छुता? जालु सारे मुकरणा लमगे, तां पतरस कने उदे साथियां बोलया, “हे स्वामी, तू दिखदा दा हे की तेरे अखे बखे इतणी भरी भीड है, कने तिजो पर डेई पोदे ना।” 46 पर यीशुए बोलया, “कुनकी मिंजो छुता है मिंजो पता लगी गिया है की मिंजो ला शक्ति निकली है।” 47 जालु जानानिया दिखया, की मै लुकी नी सकदी, तालु कम्मदी होई आई, कने उदे पैरां पर पेईकरी सारे लोकां सामणे दसया, की मै तिजो कजो छुता है, कने कियां मै झट ठीक होई गईं। 48 उनी उसा जो बोलया, “बेटी तेरा भरोसा जडा मिजो पर था उनी भरोसे तिजो ठीक कितयां है, शांतिया ला चलिया।” 49 यीशु हले उसा ने गल्ल करदा दा ही था, यहूदी जंज घरे दे सरदारो दे घरे ला कुछ लोकां आई करी बोलया, “की तेरी कुडी तां मरी गई है” हणु गरुसे जो कजो तकलीफ दे दा है? 50 जडी गल्ल सै बोला दे थे, उसा गल्लां जो यीशुए अंगरुणी करिके यहूदी जंज घर दे सरदारो जो बोलया, “डर मत, सिर्फ मिजो पर भरोसा रख, तां उना ठीक होई जाणा।” 51 घरे आई करी उनी पतरस, कने यहूना, कने याकूब कने कुडिया दे माता-पिता जो छडी करी होर कुसयो भी अंदर नी ओणा दिता। 52 कने सारे उसा तांई रोआ दे थे, पर उनी बोलया, “रोआ मत; सै मरियो नी है पर सुतियो है।” 53 सै ऐ जाणी

करी, की मरी गियो है उदा मजाक उडाणा लमगे। 54 पर उनी उसा कुडिया दा हथ पकडया कने पुकारिकरी बोलया, “हे कुडी उठ।” 55 तालु उदे प्राण बापस आई गे कने सै झट उठी बैठी; फिर उनी हुकम दिता की, इसा जो कुछ खाणे जो दीया। 56 उसा दे माता-पिता हेरान होए, पर उनी उना जो चेतावनी दिती, की ऐ जडा होया है, सै कुसी ने मत बोलदे।

9 फिरी यीशुए ना बाहरां चेलयां जो सदिकरी उना जो सारियां बुरियां आत्मा जो कडणे कने बमारियां जो दूर करणे दी शक्ति कने हक दिता। 2 कने उना जो परमेश्वरे दे राज्य दा प्रचार करणे, कने बिमारियां जो ठीक करणे तांई भेजया। 3 कने उनी उना ने बोलया, की अपने रस्ते तांई सिर्फ इक सोठी लेनयो। ना तां खाणे तांई रोटी लेणी, ना तां झोला, ना ही बटुए च पेसे, पर जुते पाई लेनयो कने होर कोई कपडे पाणे तांई मत लेदे। 4 अगर कोई तुहांजो अपने घरे रेहणे तांई सदगा, जालु दीकर तुसां उसी ग्रांए च रेंगे, तालु दीकर उसी दे घरे च परोणे बणी करी स्की रिया। 5 “जिसा जगा दे लोक तुहांजो अपनांगे नी कने तुहाडी सुणगे नी, ओथु ला जादे बेले अपने पैरां दी धुड जाडी दिनयो, ताकि उना लोकां जो पता लमगे की परमेश्वरे दिया तरफा ला मिलणे बाली सजा दे सै अपु ही जिम्मेवार ना।” 6 सै निकलिकरी ग्रांए-ग्रांए च जाई करी शुभसमाचार सुणा दे, कने हर कुथी लोकां जो ठीक करदे फिरदे थे। 7 कने देशे दी चौथाई दा राजा हेरोदेस ऐ सारा कुछ सुणिकरी घबराई गिया, क्योकि मतयां बोलया, की यहूना मरी करी जिन्दा होई गिया है। 8 कने मतयां ऐ बोलया, की एलिय्याह दिखया है: कने केईयां बोलया की पारणे परमेश्वरे दा संदेश देणेबाले चे कोई जिन्दा होया है। 9 पर राजा हेरोदेसे बोलया, “यहूना बपतिस्मा देणेबाले दा तां मै सिर कटबाया था तां हणु ऐ कुण है, जिसदे बारे च ऐसिया गल्लां सुणादा मै।” कने हेरोदेसे जो उसयो दिखणे दी इच्छा होई। 10 जालु सै प्रेरित जिना जो यीशुए भेजया था, सै यीशुए बाल मुडी करी आये कने उदे चारों बडे खडाई, कने जडा कुछ उना किता, कने सिखया था, उसयो दसी दिता, कने सै उना जो लग करिके बैतसैदा नापे दे इकी शेहेर जो लेई गिया। 11 ऐ जाणी करी भीड उदे पिच्छे चली पेई, कने सै खुशिया ने उना ने मिला, कने उना सोगी परमेश्वरे दे राज्य दियां गल्लां करणा लग्गा, कने जडे ठीक होणा चांदि थे उना जो ठीक किता। 12 जालु संज होणा लग्गी, तां उना बाहरां आई करी उसयो बोलया, “भिडा जो बिदा कर, ताकि असां अखे बखे दे ग्रां कने बस्तियां च जाई करी अपने रेंणे तांई कने रोतिया दा इंतजाम करन, क्योकि असां ऐथु सुनसान जगा च ना।” 13 यीशुए उना जो बोलया, “तुसां ही उना जो खाणे जो दिया।” उना बोलया, “साडे बाल पंज रोतियां कने दो मखियां जो छडी करी कुछ होर कुछ नी है, पर हों, अगर असां जाई करी इना सारां लोकां तांई रोतियां खरीदी लेई ओन, तां होई सकदा है।” 14 (क्योकि ओथु लगगा पंज हजार मर्द थे।) कने उनी अपने चेलयां ने बोलया, उना जो पंजा-पंजा करिके झण्डा च बठाई दिया। 15 उना तियां ही किता, कने सबना जो बठाई दिता। 16 तालु उनी सै पंज रोतियां कने दो मखियां लिईयां, कने स्वर्गो पासे दिखीकरी धन्यावाद किता, कने तोडी-तोडी करी चेलयां जो दिन्दा गिया ताकि सै लोकां जो परोसी देंन। 17 सारे खाई करी रजी गे। कने जालु रोटी खायीं बैठे तालु चेलयां बाकी बचियां रोतियां कने मखियां गिठेरेंयां कने उसला बाहरा टोकरियां भरई गियां। 18 जालु यीशु एकांत च प्रथना करदा दा था, कने चले उदे सोगी थे, तां उनी उना ला पुछया, “लोक मिंजो क्या बोलंदे ना?” 19 चेलयां जबाब दिता कुछ लोक बोलंदे ने कि तुसां यहूना बपतिस्मा देणेबाले ना, पर कोई-कोई बोलंदे एलिय्याह है, कने कोई-कोई बोलंदे ना कि पुराणे जमाने दे परमेश्वरे दा संदेश देणेबालयां चे कोई इक है। 20 यीशुए उना ला पुछया, “पर तुसां मिंजो क्या बोलंदे ना?” पतरस जबाब दिता, परमेश्वरे दा मसीहा। 21 तालु यीशुए उना जो समझाई करी बोलया, “ऐ कुसी ने मत बोलंदे।” 22 कने उनी बोलया, कि मै, जडा माणुए दा पुत्र है, “मिंजो मते दुख सेहणे पोणे ना, कने यहूदी आये, बडे याजकां, कने यहूदी व्यवस्था जो सिखाणे बालयां मिंजो अपनाणा नी है, कने मै मारया जाणा है, कने फिरी मै तिन्ना रोजां बाद मरयां चे जिन्दा होई जाणा है।” 23 यीशुए उना सबना जो बोलया, “जडा कोई मेरा चेला बनाणा चांदा है, उसयो अपणिया शरीर दियां इच्छां कने जडियां तरकिबां बणाईयां ना उना जो छडी करी! कने जडे मिजो तांई मरणे जो तैयार रेंदे ना सेई मेरे चेले बणी करी मिजो पिच्छे चली सकंदे ना। 24 कोई माणु ऐसा नी करगा कने अपने प्राणा जो बचाणा चांहागा, उनी परमेश्वरे सोगी आत्मिक जिन्दगी जिणे दा मोका गवाई देणा है। पर जडा माणु मिजो पर भरोसा करणा कने

मेरे शुभसमाचार दिया बजा ने मरगा उस माणुए जो परमेश्वरे सोगी सदा ताई दी जिन्दगी मिलणी। 25 अगर तूसां संसारे दा सब कुछ पाई लेगे कने पर परमेश्वरे सोगी हमेशा दी जिन्दगी जिणे दा मोका गवाई दिगे, तां उदा क्या फायदा? इक माणु परमेश्वरे जो क्या देई सकदा है, जडा उदी हमेशा दी जिन्दगी खरिदगा? कुछ नी! 26 तुहाडे च अगर कोई माणु मिजों अपना परमेश्वर कने मेरियां शिक्षा दा पालन करणे जो मना करदा है, क्योंकि तूसां डरदे न की गैर किन्वासी कने पापी लोकां तुहाडा मजाक उडाणा। फिरी जालू मैं माणुए दा पुत्र, पबित्र स्वर्गदूतां सोगी धरती पर ओणा है, तां मैं उना लोकां जो भी अपना चेला मणो ला मना करी देणा है, तालू सारयां लोकां की महिमा दिखणी जडी मेरे पिता दी है। 27 "मैं तूसां ने सच्च बोलदा है, की जडे ऐथु खुदतुयो न, उना चे कोई-कोई ऐसे न, की जालू दीकर परमेश्वरे दा राज्य नी दिखी लेगे, तालू दीकर उना मोत दा स्वादा नी चखणा है।" 28 इना गल्लां दे कोई अठ रोज बाद से पतरस, कने यहूना कने याकूब जो सोगी लेईकरी प्रार्थना करणे तांई पहाडे पर गया। 29 जालू सै प्रार्थना करा दा ही था, तां उदे चेहरे दा रूप बदलुई गया, कने उदे कपडे चिटे होईकरी चमकणा लगे। 30 कने दिखा, दो परमेश्वरे दे संदेश देणेबाले मूसा कने एलिय्याह जो, जडे बडे पहले जिन्दा थे उना जो यीशुए सोगी गल्लां करदे दिखया। 31 ऐ महिमा सोगी मिल्ले, कने उदे मरणे दी चर्चा करा दे थे, जडा यस्शलेम च हणेबाला था। 32 पतरस कने उदे साथी निद्रा ने भरयो थे, जालू ढंगे ने उठी होए, तां उदी महिमा, कने उना दो आदमियां जो, जडे उदे बखे खुदतुयो थे, दिखया। 33 जालू सै उदे बखे ला जाणा लगे, तां पतरसे यीशुए जो बोलया, "प्रभु जी, साडा ऐथु रेंणा ठीक है, इस तांई असां ऐथु तीन तम्बू बणां दे न, इक तरे तांई, इक मूसा तांई, इक एलिय्याह तांई।" पतरसे ऐ इस तांई बोलया की, सै कने दूजे दो चले डरी गियो थे, कने नी जाणदे थे क्या बोलणा क्या करणा। 34 सै ऐ बोला दा ही था, की इक बदले आई करी उना जो डक लिया, जालू सै उस बदले ने घिरणा लगे तां सै डरी गे। 35 कने उस बदले चे ऐ अबाज निकली, "ऐ मेरा प्यारा पुत्र है, कने मैं इसला खश है, कने जडा ऐ बोलदा है उसयो ध्याने ने सुणा।" 36 ऐ अबाज होई ही यीशुए जो उना किल्ला दिखया; कने सै चुप रे, कने जडा कुछ उना दिखया था, उदी कोई गल्ल उना रोजा च कुनी नी किती। 37 कने दूरे रोजे जालू सै पहाडे ला उतरे, तां इक बडी बडी भीड़ उसला मिलणा आई। 38 तालू भिडा चे इक माणुए जोरे ने बोलया, गुस् जी, मैं तिजो ने बिनती करदा है, की मेरे पुत्रे पर दया कर; क्योंकि सै मेरा इकलोता पुत्र है। 39 कने इक बुरी आत्मा उसयो पकडी लेंदी है, कने सै इकदम बकणा लगी पोंदा है, कने सै आत्मा उसयो ऐसा मरोडदी है, की उदे मुरे ला झाग निकली पोंदा है; कने उसयो गेरेकी करी बडिया मुशकिला ने छडदी है। 40 कने मैं तैरे चेलयां ने बिनती किती, की इसा जो कडी दिया; पर सै कडी नी सके। 41 ऐ सुणीकरी यीशुए उना जो जबाब दिता, "हे अकिन्वासी लोकों, मैं कालू दीकर तुहाडे सोगी रेंगा, कने कालू दीकर तुहाडे अकिन्वास जो सेहन करणा उसी जागते जो मेरे बाल लोआ।" 42 सै ओआ दा ही था की बुरिया आत्मा उसयो पटकी करी मरोडया, पर यीशुए बुरिया आत्मा जो डांटया कने जागते जो ठीक करिके उदे पिता जो देई दिता। 43 तालू सारे लोक परमेश्वरे की इसा शक्तिया ला हेरान होए। पर जालू सारे लोक उना सारे कम्मा ने जडे सै करदा था, हेरान होआ दे थे, तां उनी अपने चेलयां ने बोलया, 44 "ऐ गल्लां तूसां मत भुलदे, क्योंकि माणुए दा पुत्र, मेरे दुशमणा दे हथे पकडया जाणा है।" 45 पर ऐ गल्ल उना दिया समझा च नी आई, कने ऐ उना ला छिपी रेई; ताकि उना जो पता नी लगे, कने सै इसा गल्ला दे बारे च पुछणे ला डरदे थे। 46 फिरी उना च ऐ बेहस होणा लगी की, की सांझो चे बडा कुण है? 47 पर यीशुए उना दे मने दी गल्ल जाणी लेई, कने इक बच्चे जो लेईकरी अपने बखे खडेया, 48 कने उना ने बोलया, "जडा कोई मेरे नाए ने इस बच्चे जो अपनांदा है, सै मिजो अपनांदा है, कने जडा कोई मिजो अपनांदा है, सै मिजो भेजणे बाले जो अपनांदा है, क्योंकि जडा तुहाडे चे सबना ला छोटा है, सेई बडा है।" 49 तालू यहूने बोलया, "प्रभु जी, असां इकी माणुए जो तैरे नाए दिया शक्तिया ने बुरियां आत्मा जो कडदे दिखया है, कने असां उसयो मना भी किता, क्योंकि सै साडे सांई तेरा चेला नी था।" 50 यीशुए उसयो बोलया, "उसयो मना मत करा; क्योंकि जडे साडे बैरी नी है, सै साडे सोगी साथी ना।" 51 जालू यीशुए दे स्वर्ग जाणे दे दिन पुरे होणे बाले थे, तालू उनी यस्शलेम जाणे दा बिचार पका किता। 52 यीशुए ओथु जाणे ला पहले अपने अगे संदेश देणेबाले दूत भेजे: सै सामारियों दे इक गांए जो गे,

ताकि उदे तांई जगा तैयार करन। 53 पर उना लोकां उसयो उतरणा नी दिता, क्योंकि सै यस्शलेम शेहरे जो चलया था। 54 ऐ दिखीकरी उदे चेलयां याकूब कने यहूना ने बोलया, "प्रभु जी, क्या तू चांदा है, की असां हुकम देन, की अम्बरे ला अगग पोये कने उना जो भस्म करी दे?" 55 पर यीशुए उना जो मुडी करी डांटया कने बोलया, "तूसां नी जाणदे न की तूसां कदेई आत्मा दे न। 56 क्योंकि माणुए दा पुत्र लोकां दे प्राणा जो खत्म करणे तांई नी पर बचाणे तांई आया है।" कने सै कुसकी होरसी गांए जो चली गे। 57 जालू सै रस्ते च चलयो थे, तालू कुनकी उसयो बोलया, "जिथु-जिथु तू जांगा, मैं भी तैरे पिच्छे जाणा।" 58 यीशुए उसयो बोलया, "मिगडियां जो रेहणे तांई कुडी न, कने अम्बरे दे पंछियां दे घोंसले होदे न; पर लिंगो, माणुए दे पुत्रे बाल इक भी पर नही है, जिथु मैं सोई सकें।" 59 उनी दूरे ने बोलया, "मेरे चले बणी जा।" उनी बोलया, "प्रभु जी, मिजो पहले जाणा दे ताकि मैं अपने पिता जो दबी ओए।" 60 उनी उसला बोलया, "जडे लोक आत्मिक स्पे ने मरयो न, उना जो अपने मुर्दे दबाणा दे, पर तू जाई करी परमेश्वरे दे राज्य दा शुभसमाचार सुणा।" 61 इक होरनी बन्दे बोलया, "प्रभु जी, मैं तैरे पिच्छे ओंगा; पर पहले मिजो जाणा दे ताकि मैं अपने घरे दे लोकां ने बिदा लेई ओए।" 62 यीशुए उसयो बोलया, "जडा कोई अपना हथ हले पर रखीकरी पिच्छे दिखदा है, सै परमेश्वरे दे राज्य जोगी नी है।"

10 इदे बाद प्रभुए सतर होर चले रखे कने जीसी-जीसी शेहरे कने जगा पर उनी अपु जाणे दी योजना बणाईयो थी ओथु उना जो दो-दो करिके अगे भेजया। 2 कने उनी उना जो बोलया, "पकियो फसला दे खेत बडे न; पर मजदूर थोडे न: इस तांई खेतरे दे मालिके ने बिनती करा, की सै अपने खेतारां जो बडणे तांई मजदूर भेजी दे।" 3 जा; दिखा मैं तुहांजो भेडां सांई भेडियां दे बिच भेजदा है। 4 इस तांई ना बटुआ, ना झोली, ना जुते; कने ना ही रस्ते च कुसयो नमस्ते करा। 5 जिसदे भी घरे जा, पहले बोला, इस घरे दा कल्याण हो। 6 अगर ओथु कोई मेहमाना दा आदर करणे बाला होगा; तां तुहाडी आशीष उस पर होणी, नी तां तुहाडे बाल बापस आई जाणी। 7 उसी घरे च रिया, उस घरे ला तुहांजो जडा कुल मिलदा है, सेई खा पिया; क्योंकि मजदूरे जो तां अपनी मजदूरी मिलणा चाईदी; घरे-घरे मत फिरदे। 8 कने जिसी शेहरे च जांगे, कने ओथु दे लोक तुहांजो अपने घरे खुशिया ने अपनांगे, तां जडा कुछ तुहाडे सामणे रखगे सै ही खा। 9 ओथु दे बिमारां जो ठीक करा: कने उना जो बोलणा, परमेश्वरे दा राज्य तुहाडे बखे आई रिया है। 10 पर जिस शेहरे च जांगे, कने ओथु दे लोक तुहांजो अपनांगे नी, तां उना दे बजारां च जाई करी बोला, 11 तुहाडे शेहरे दी धुड भी, जडी साडे पैरां च लगियो है, असां तुहाडे सामणे झाडी दिन्दे न, तमी ऐ समझी लिया, की परमेश्वरे दा राज्य तुहाडे बखे आई रिया है। 12 "मैं तूसां ने सच्च बोलदा है, की न्याय बाले रोजे सै शेहरे जिथु दे लोक परमेश्वरे दा बचन नी मदे, उना दी हालत सदोम दे लोकां दी हालत ला भी जादा भयानक होणी है।" 13 "हाय! खुराजीन शेहर कने बैतसैदा शेहर दे लोको! जडे अनोखे कम्म तुहाडे शेहरे च कितयो न, अगर सै कम्म सर कने सैदा शेहरे च किते जांदे, तां सै ऐ दसणे तांई की उना अपने पापां ला पन्नातप करी लिया है, तां बडे पहले टाट ओडी लेंदे, कने धुडी अपने उपर छिडकी लेंदे।" 14 की परमेश्वरे दे न्याय दे रोज जडी सजा सर कने सैदा शेहरे दे लोकां जो देणी है, सै सजा तुहाडिया सजा ला घट होणी है। 15 हे कफरनहम शेहरे दे लोको तूसां क्या स्वर्ग दीकर उच्चे किते जाणे न? तूसां तां पताल लोक दीकर थले किते जाणे न। (Hades 986) 16 "जडा तुहाडी सुणदा है, से मेरी सुणदा है, जडा तुहांजो तुच्छ समजदा है, से मिजो भी तुच्छ समझदा है, कने जडा मिजो तुच्छ समजदा है, से मेरे भेजने बाले जो भी तुच्छ समजदा है।" 17 सै सतर चले खुशिया ने बापस आई करी बोलणा लगे, प्रभु जी, बुरियां आत्मा भी साडी गल्ल मन्नी जालू असां उना जो तैरे नाए ने हुकम दिता। 18 यीशुए उना ने बोलया, जालू बुरियां आत्मा तुहाडा हुकम मनया, तां मैं शैताने जो बिजलिया सांई स्वर्ग ला पोंदे दिखया। 19 मैं तुहांजो सपां कने बिच्छुआं जो मारणे, कने शैताने दी शक्तिया पर हक दितया है, कने कुसा भी चीजा ने तुहांजो कोई नुकसान नी होणा। 20 पर तूसां इसला खश मत होआ, की बुरियां आत्मा तुहाडा हुकम मंदियां न, पर इसला खश होआ की तुहाडे ना स्वर्ग च लिखयो न। 21 तालू सै पबित्र आत्मा च होईकरी खुश होई गया, कने बोलया, पिता जी, स्वर्ग कने धरतिया दे प्रभु, मैं तेरा धन्यवाद करदा है, की तू इना गल्लां जो जानिया कने

समजदारीं ला लुकाई रखया, कने बचयां पर प्राट कितया है, पिता जी, क्योंकि तिजो ऐई खरा लग्गा। 22 “भरे पिता मिजो सब कुछ देई दितया है; कने कोई नी जाणदा है की पुत्र कुण है सिर्फ पिता ही जाणदा है, कने पिता कुण है ऐ भी कोई नी जाणदा, सिर्फ पुत्र जाणदा कने सै जिदे पर पुत्र उसयो प्रकट करणा चांगा।” 23 तालू यीशुए चेलयां पासे मुडी करी उना जो एकांत च बोलया, “धन्य न सै हखी, जडियां गल्लां तुसां दिखदे न उना गल्लां जो सै भी दिखदियां न। 24 क्योंकि मै तुहांजो ने बोलदा है, की परमेश्वरे दे संदेश देणेबाले भरे लोक कने राजे चांदे थे, की जडियां गल्लां तुसां दिखदे न उना जो दिख; पर नी दिखियां कने जडियां गल्लां तुसां सुणदे न उना जो सुणा, पर नी सुणियां।” 25 इक दिन जालू यीशु लोकां जो सिखा दा था तां इक यहूदी मूसा दी व्यवस्था जो सिखाणे बालयां च उठया; कने ऐ बोली करी उदी परख लेणा लग्गा, “रूस जी, हमेशा दी जिनदगिया दा बारिस बणने तांई मै क्या करे?” (aiōnios q166) 26 यीशुए उसयो बोलया, “मूसा दी व्यवस्था च क्या लिखया है? तू उना जो कियां समझा है?” 27 उनी जबाब दिता, “तू अपने प्रभु परमेश्वरे सोगी अपने सोरे तन मन कने अपने सोरे प्राण कने अपने सोरे जोरे ने कने अपणिया सारिया अकला ने प्यार कर; कने अपने पडोसिये ने अपणयां सांई प्यार रखा।” 28 यीशुए उसयो बोलया, “तू ठीक जबाब दिता, ऐई कर तां तिजो हमेशा दी जिनदगी मिलणी।” 29 पर उनी अपने कम्मा जो सही ठेहराणे तांई यीशुए ला पुछया, तां मेरा पडोसी कुण है? 30 यीशुए उसयो इक कहणिया दे जरिये जबाब दिता, इक माणु यरुशलैम शेहर ला यरीहो शेहर जो चलय था, कने डाकुयां अपर हमला करी दिता कने उदे कपडे उतारी दिते, कने उसयो मारी-कुटी करी अदमर करी के छडी गो। 31 कने उनां होया की उस रस्ते च इक यहूदी याजक चलय था, पर याजके उसयो दिखीकरी उदी कोई मदद नी किती कने ओथु ला चली गया। 32 इयां ही इक लेवी जडा यहूदी मंदरे च कम्म करदा था उसा जगा पर आया, उनी भी उसयो दिखीकरी उदी कोई मदद नी किती कने दूजे पासे ला चली गया। 33 पर इक सामरिया प्रदेश दा इक माणु उसा जगा ला निकलया जिथु सै जखमी माणु पिया था, उसयो दिखीकरी उस पर तरस आई गया। 34 कने उदे बखे आई करी उनी उदे जखमा पर तेल कने दाखरस लाईकरी पटी बनी, कने अपणिया सवारिया पर चडाई करी उसयो सारा च लेई गया, कने उदी सेबा किती। 35 दूऐ रोजे उनी दो दीनार (दो दीनार मतलब दो दिना दी मजदूरी) देईकरी उसा सरां दे मालके जो दिते, कने बोलया, इसदी सेबा करनयो, कने जडा कुछ तेरा होर लग्गा, सै मै तिजो बापस आई करी देई दिगा। 36 तालू यीशुए पुछया “हुण तेरिया समझा च जिस पर डाकुआं हमला कितया था, उदा इना तिन्ना च पडोसी कुण होया?” 37 उनी बोलया, “सै ही जिनी उस पर तरस खादा था।” यीशुए उसयो बोलया, “जा, तू भी इयां ही कर।” 38 यीशु कने उदे चेले जालू चलयो थे, तां सै इक गांए च गया, ओथु मार्या नाए दी इकी जनानिया उसयो अपने घरे ओणे दा नियोता दिता। 39 कने मरियम नाए दी उसा दी इक बेंहण थी; सै प्रभु दे पैरां बखे बेईकरी उदी शिक्षा जो सुणा दी थी। 40 पर मार्या रोटियां बणादे-बणादे घबराई गई कने उदे बखे आई करी बोलाण लग्गी, प्रभु जी, क्या तिजो जरा ही चिंता नी है की मेरिया बेंहण मिजो सोरे कम्म करणे तांई किल्ला छडी दितया है? इस तांई उसा जो बोल, की मेरी मदद कर। 41 यीशुए उसा जो जबाब दिता, “मार्या, हे मार्या; तू बडियां गल्लां तांई चिन्ता करदी कने घबरांदी है। 42 पर इक ही गल्ला दी चिंता करणे दी जरूरत है, कने मरियमा से कम्म तोपी लिया है, कने इसा जो इसला दूर नी कित जाणा है।”

11 यीशु कुसकी जगा पर प्राथना करा दा था। कने जालू सै प्राथना करी बैठा, तां उदे चेलयां च इकी चले उसयो बोलया, “प्रभु जी, जियां यहून्ने अपने चेलयां जो प्राथना करणा सिखया है तियां ही सांझो सिखाई दे।” 2 यीशुए उना ने बोलया, तुसां इस तरीके ने प्राथना करणा चाइदी की: है साडे पिता परमेश्वर, जडा तू स्वर्ग च है; तेरा ना सोरे लोकां च पबित्र मनया जा, कने तेरा राज्य सांझो च ओए। 3 सांझो हर रोज सै खाणा दे जडा सांझो उस दिने तांई चाइदा है। 4 कने जियां असां सांझो सोगी गलत करणे बालयां जो माफ कितया है, तियां ही तू भी साडियां गलतियां जो माफ कर कने सांझो परख च फसणे ला बचा। 5 कने यीशुए उना ने बोलया, तुसां च कुण है, जिसदा इक मित्र हो, कने सै अधिया राती जो उदे घरे जाई करी उसयो बोले, मिजो तिन्ने रोटियां दे। 6 क्योंकि मेरा इक मित्र हुणी मिजो मिलणे तांई आया है कने मिजो बाल उसयो खुआणे तांई कुछ नी है। 7 कने

सै अंदरे ला जबाब दिन्दा है, मिजो तंग मत कर; हुण तां दरबाजा बंद है, कने भरे बच्चे भरे सोगी बिस्तरे च सुतयो न, इस तांई मै उडीकरी तिजो कुछ नी देई सकदा। 8 मै तुहांजो ने जडा बोलदा है उसयो समझा, अगर सै उदा मित्र होणे पर भी उसयो उठी करी री नी देणा चा, फिरी भी उस दोस्ते दे बार-बार बिनती करणे पर उदिया जरूरतं दे अनुसार उतणा उठी करी जस्त दिगा। 9 “तुसां जो जडा चाइदा सै परमेश्वरे ला मंगा कने उनी तुसां जो देणा; अगर तुसां तोपणे, तां तुसां जो मिलणा; अगर खटखटागे, तां तुहाडे तांई खुलणा।” 10 क्योंकि जडा कोई मंगादा है, उसयो मिलदा है; जडा तोपदा है, उसयो मिलदा है; कने जडा खटखटादा है, उदे तांई खुलदा है। 11 तुहाडे च कुण ऐदिया पिता होंगा, की जालू उदा पुत्र रोटी मगे तां उसयो पधर दे: या मच्छी मंगे तां मछिया दे बदले सप दे? 12 या अंडा मगे तां उसयो बिच्छु देई दे? 13 “अगर तुसां बुरे होईकरी अपने बचयां जो खरियां चिजा देणा जाणदे न, तां तुहाडे स्वर्गीय पिता परमेश्वरे अपने मंगणे बाले जो केई जादा बदीकरी पबित्र आत्मा देणे तांई तैयार है।” 14 फिरी उनी इक गुंगी बुरी आत्मा जो कडया; जालू सै बुरी आत्मा निकली गई, तां सै गुंगा बोलाण लग्गी पिया; कने लोकां जो हेरानी होई। 15 पर उना च कितणयां ही बोलया, “ऐ तां बुरियां आत्मा दे सरदार शैताने दी मदद लेईकरी बुरियां आत्मा जो कडदा है।” 16 होरनी उदी परख लेणे तांई उसला स्वर्ग दा कोई निशाण दसणे तांई बोलया। 17 पर उनी, उना दे मने दियां गल्लां जो जाणी करी, उना ने बोलया, “अगर कुसी राज्य च लोक अणु चे ही लडदे रेगे तां सै राज्य उजडी जांदा है। कने अगर कुसी घरे दे माणु अणु चे ही लडदे रेगे तां सै घर भी उजडी जांदा है।” 18 अगर शैतान अपणी ही बुरी आत्मा दे खिलाफ लडगा, उना उनी अपना ही नाश करी लेणा है, तां फिरी उदा राज्य कियां बदी सकदा है? क्योंकि तुसां भरे बारे च तां बोलदे न, की ऐ तां शैताने दिया मददा ने बुरियां आत्मा जो कडदा है। 19 “भला अगर मै शैताने दिया मददा ने बुरियां आत्मा जो कडदा है, तां तुहाडी ओलाद कुसदिया मददा ने बुरियां आत्मा जो कडदी है? इस तांई तुहाडिया ओलादी ही तुहाडा न्याय करणा है।” 20 पर अगर मै परमेश्वरे दिया शक्तिया ने बुरियां आत्मा जो कडदा है, तां परमेश्वरे दा राज्य तुहाडे बखे आई रिया है। 21 जालू जोरे बाला माणु हथियार लेईकरी अपने घरे दी रखबाली करदा है, तां उदी संमति बची रैदी है। 22 परे जालू उसला जादा जोरे बाला उसला लडी करी उसयो जीती लेंदा है, तां उदे सै हथियार जिना पर उसयो भरोसा था, उना जो खोई लेंदा है कने उदिया संपतिया जो लुटी करी बंडी दिन्दा है। 23 “जडा भरे सोगी नी है सै भरे खिलाफ है, कने जडा भरे सोगी नी बटोलदा है सै खलारदा है।” 24 जालू बुरी आत्मा माणुए ला निकली जांदा है, तां सै सुकियां जगा च अराम तोपदी फिरदी है, पर उसा जो अराम नी मिलदा है। तां सै अपने आपे ने बोलदी है, कि मै अपने तिस्ती घरे जो बापस चली जाणा है, जिस माणुए ला निकली थी, 25 “जालू सै बापस ओंदी है तां उस माणुए जो उस घरे सांई पांदी है, जिसयो छेल करी साफ कने सजाया हो।” 26 तालू सै बुरी आत्मा जाई करी अपने ला होर बुरियां सत आत्मा जो अपने सोगी लेई ओंदी है, कने सै उदे अंदर बडी करी ओथु रदियां न, कने उस माणुए दी हालत पहले ला भी बुरी होई जांदा है। 27 जालू यीशु ए सब गल्लां बोला दा ही था तां भिडा च इकी जनानिया उचिया अबाजा ने बोलया, “धन्य हे सै जनानी जिना तिजो पैदा कित कने तिजो अपना दूध पियाया।” 28 उनी बोलया, “हाँ, पर धन्य न सै, जडे परमेश्वरे दा बचन सुणीकरी मंदे न।” 29 जालू बडे भरी लोकां दी भीड गिटी होआ दी थी तां सै बोलाण लग्गा, “इस युगे दे बुरे लोक चिन्न चमत्कार तोपदे न, पर परमेश्वरे दा संदेश देणेबाले योना दे चिन्न चमत्कार जो छडी करी उना जो कोई होर कोई चिन्न नी मिलणा।” कने यीशु उना जो छडी करी चली गया। 30 जियां योना नीनवे शेहरे दे लोकां तांई चिन्न बणाया, तियां ही मै माणुए दा पुत्र भी इस युगे दे लोकां तांई चिन्न होणा है। 31 दक्षिणे दिया राणिया न्याय दे रोजे इस बेले दे आदमियां दे सोगी उठी करी, उना जो दोषी बोलाण है, क्योंकि सै राजा सुलैमान दा ज्ञान सुणने तांई बडी दुरे ला आई, कने दिख ऐथु सै है जडा सुलेमान ला भी बडा है। 32 नीनवे शेहरे दे लोकां न्याय दे रोजे इस बेले दे लोकां सोगी खडे होईकरी, इसा पीडी दे लोकां जो दोषी बोलाण है; क्योंकि उना योना दा प्रचार सुणि करी मन बदलया है कने दिख, ऐथु सै है जडा योना ला भी बडा है। 33 “कोई माणु दिव्या बाली करी थले या टोकस्पे हेठ नी रखदा है, पर धारिया पर रखदा हे ताकि अंदरे ओणे बालयां जो लौ होए।” 34 तेरियां हखी तेरे शरिरे तांई इक दिव्ये सांई न, इस तांई अगर तेरी हख साफ है, तां

तेरा सारा शरीर भी लौ लुआन है; पर अगर सै बुरी है, तां तेरा शरीर भी नेहेरे च है। 35 ताई तां ध्यान रखा, की जड्डी लौ तिजो च है सै नेहेरा ना होई जाये। 36 इस ताई अगर तेरा सारा शरीर लौ लुआन हो, कने उदा कोई हिसा नेहेरे च नी रे, तां सारे दा सारा शरीर ऐसा लौ लुआन होणा, जियां उस बेले होदा है, जालू दिव्या अपणिया लौइ ने तिजो लौ दिन्दा है। 37 जालू यीशु अपना प्रचार खत्म करी बेठा, तां इक्की फरीसिये उसला बिनती कित्ती, की मेरे धरे रोटी खाणां चल; कने सै अंदर जाई करी रोटी खाणां बैठा। 38 फरीसी जो ऐ दिखीकरी बडी हेरानी होई की यीशुऐ खाणां खाणे ला पेहले अपने रिती रिबाजा ने हथ पैर नी धोते। 39 प्रभु यीशुऐ उसयो बोलया, “हे फरीसियों, तुसां ऐसे भांडे न, जडे तां उपरे-उपरे ला तां साफ न, पर तुसां दे मन अंदर लालच कने बुराई भरइयो है।” 40 हे मूर्खीं, जिनी बहने दा हिसा बणाया है, क्या उनी ही अंदरे दा हिसा नी बणाया है? 41 गरीब लोकां जो दान देईकरी अपना मन अंदरे ला साफ करा, तां दिखा सब कुछ तुहाडे ताई पबित्र होई जाणा। 42 “पर हे फरीसियों, तुहाडे ताई बडा बुरा होणा है। तुसां पुदीने कने जरि दा, कने सारिया भान्तिया दे साग पतयां दा दसमां हिसा दिन्दे न, पर न्याय जो कने परमेश्वरे दे प्यारे जो टाल्सी दिन्दे न; तुहांजो इयां करणा चाईदा था की इना जो भी करदे रेदे कने उना जो भी नी छडते।” 43 हे फरीसियों, तुहांजो ताई बडा बुरा होणा है! तुसां यहूदी जंज घर च खास-खास जगा च आसन कने ऐ चांदे न की बाजारां च लोक तुहांजो नमस्ते बोलन। 44 “तुहांजो ताई बडा बुरा होणा है। क्योकि तुसां उना लुकियां कबरां दे साई न, जिना पर लोक चलते न, पर जाणदे नी ना।” 45 तालू इक्की व्यवस्था जो सिखाणे बाले उसयो जबाब दिता, “गुरु जी, ऐसिया गल्लां बोलरी तू साडी निंदा करा दा है?” 46 उनी बोलया, “हे व्यवस्था जो सिखाणे बालयो, तुहांजो ताई बडा बुरा होणा है। तुसां ऐसे बोझे जो माणुऐ पर लददे न, जिसयो चुकणा बडा मुशकिल है, पर तुसां अपु उना बोझां जो अपणिया इक्की उंगलियां ने भी नी हिलां दे ना।” 47 तुहांजो ताई बडा बुरा होणा है। तुसां उना परमेश्वरे दा संदेश देणेबालयां दियां कबरां बणां दे न, जिना जो तुहाडे बाप दादयां मारी दिव्या था। 48 इसा गल्ला दे तुसां गबाह न, कने अपने बाप दादयां दे कम्मा ने सहमत न; क्योकि उना तां उना जो मारी दिता कने तुसां उना दियां कबरां बणा दे। 49 इस ताई तां परमेश्वरे दिया अकला भी बोलया है, की मै उना बाल परमेश्वरे दा संदेश देणेबालयां कने प्रेरितां जो भेजगी, कने उना इना चे कित्तियां जो मारी देणा, कने कित्तियां जो सतणां है। 50 ताकि जितणे भी परमेश्वरे दा संदेश देणेबालयां दा खून इस संसारे दे शुरू ला बहाया है, सबना दा लेखा, इस युगे दे लोका ला लेणा है। 51 हाबिल दिया हत्या ला लेईकरी परमेश्वर दा संदेश देणेबाले जकर्याह दिया हत्या दीकर जिसयो बेदी कने मंदरे दे बिच मारया था; मै तुसां ने सच्च बोलदा है; उदा लेखा इस बकते दे लोकां ने लेणा है। 52 “व्यवस्था जो सिखाणे बालयां लोकां पर लानत है! क्योकि तुहांजो बाल स्वर्ग जाणे दा रस्ते दा पता था। पर तां भी तुसां उसी रस्ते पर नी चले कने दुजे लोकां जो भी जाणे ला रोकी लिया है।” 53 जालू सै ओथु ला निकलया, तां व्यवस्था जो सिखाणे बाले कने फरीसी बडे पिच्छे पेई गे, कने छेडना लगे, की सै बडियां गल्लां तां ची चर्के, 54 कने उदिया ताका पर लगरी रे, की उदे मुरे दी कोई गल्ल पकडन।

12 इतणे च ओथु जालू हजारों दी भीड होई गेई, ऐथु दीकर की लोक इक्की टुपे पर डेई पोंदे थे, तां यीशुऐ सबना ला पेहले अपने चेलयां ने बोलया, फरीसियां दी कपटरूपी जिन्दगी ला जड्डी खमिरे साई है उसा ला बची करी रेनयो। 2 क्योकि कुछ भी ढक्या नी है, जडा खोलया नी जाणा है; कने कुछ छुपया नी है, जडा सामणे नी ओणा है। 3 ताई तां जडा कुछ, तुसां नेहेरे च बोलया है, सै लौइ च सुणाया जाणा, कने जडा तुसां अंदर कम्मयां च कन्ना च बोलया है, उदा छती पर चढी करी प्रचार होणा। 4 “पर मै तुसां ने बोलदा है, जडे मेरे साथी न, कि जडे शरीर जो मारी सकदे न, पर सै आत्मा जो नी मारी सकदे न, उना ला डरदे मता।” 5 मै तुहांजो चेतावनी दिन्दा है की तुहांजो कुसने डरना चाईदा, तुहांजो उस परमेश्वरे ला डरणा चाईदा जिसयो तुहांजो मारणे ला बाद नरके च भेजणे दा हक है। (Geenna g1067) 6 “क्या बडी घट कीमत च पंज चीडियां नी बिकदियां? तमी परमेश्वर उना चे इक्की जो भी नी भुवदा।” 7 बल्कि तुहाडे सिरे दे सारे बाल भी गिणयो न, इस ताई डरा मत, तुसां परमेश्वरे ताई मतियां चीडियां ला भी बदीकरी कीमती न। 8 मै, माणुऐ दे पुत्र तुहांजो बोलदा है जडे कोई बोलदे न, की सै मेरे चले न, उसयो मै भी अपने स्वर्गीय पिता परमेश्वर दे सामणे अपने

वेले मनी लेंगा। 9 पर अगर सै दूजयां दे सामणे ऐ बोलणे ला डरदे न, कि असां यीशुऐ दे चले न, तां परमेश्वरे भी अपने स्वर्गदूतां सामणे तुहांजो चेला नी मण्णा है। 10 पर जडा कोई माणुऐ दे पुत्रे दे बारे च कोई बुरी गल्ल बोलगा, उदा ऐ अपराध माफ होई जाणा, पर जडा कोई पबित्र आत्मा दे बारे च बुरा बोलगा, उदा अपराध माफ नी होणा है। 11 “जालू लोक तुहांजो यहूदी जंज घर च कने हाकिमां कने अधिकारियां दे सामणे लेई जाणे, तां चिंता मत करदे की असां कियां या क्या जबाब देन, या क्या बोलन।” 12 क्योकि पबित्र आत्मा तुहांजो तालू ही सिखाई देणा, की क्या बोलणा चाईदा। 13 फिरी भिडा चे इक्की माणुऐ यीशुऐ बोलया, “गुरु जी, मेरे भाईऐ जो बोल, की पिता दी जमीन जयादात मिंजो देई दे।” 14 यीशुऐ उसयो बोलया, “हे माणु, कुनी मिंजो तुहाडा न्याय करणे बाला या धन बंडणे बाला बणाया है?” 15 कने यीशुऐ उना जो बोलया, “ध्यान रखा, कने हर तरा दिया मोहमाया ने अपने आपे जो बचाई रखा; क्योकि कदी भी जिन्दगी उदिया जमीन जायदाद ला जादा नी होंदी।” 16 यीशुऐ उना जो इक कहाणी सुणाई, कुसकी अमीर दिया जमिना च मती भरी फसल होई। 17 तालू सै अपने मने च सोचना लग्गा, की मिंजो नी समझ ओआ दी की मै क्या करे, क्योकि मेरे बाल तां इतणी जगा ही नी है, जिथु मै अपनी सारिया फसला जो रखी सके। 18 कने उनी बोलया, मै इयां करणा है की अपने गोदामें दियां बखारियां जो तोडी करी उना ला बडियां बणाणियां न; कने ओथु अपनी सारी संपति कने फसल रखणी; 19 कने इदे बाद अपने आपे ने बोलणा, की तरे बाल मत साला ताई मती धन दौलत कने फसल रखियो है; मजे ने खा पी, सूडे ने रे। 20 पर परमेश्वरे उसयो बोलया, हे मुर्ख! इसा राती तू मरी जा; तां तालू जडा कुछ तू गठेरया है, सै कुसदा होणा? 21 “इयां ही उस माणुऐ ने भी होणा है जडा सब कुछ अपने ताई गठेरदा, पर परमेश्वरे दिया सेबा करणे ताई अपनी क्षमता कने धन दौलत खर्च नी करता।” 22 फिरी उनी अपने चेलयां ने बोलया, ताई तां मै तुहांजो बोलदा है, अपनी जिन्दगी दी चिंता मत करा, की असां क्या खांणे; ना ही अपने शरीर दी की असां क्या पांणे। 23 क्योकि रोटिया ला जिन्दगी कने कपडयां ला शरीर जादा बदीकरी है। 24 कोयां पर ध्यान दिया; ना सै रादे न, ना सै बडदे न, न उना बाल खतर; ना उना दे गोदाम होदे न जिथु से गठेरी सकन, तमी परमेश्वर उना जो पालदा है। तुहाडी कीमत पंछियां ला भी बदीकरी है। 25 तुसां चे ऐसा कणु है, जडा चिंता करणे ने अपणिया जिन्दगीया च इक घडी भी बधाई सकदा है? 26 इस ताई अगर तुसां सबना ला छोटा कम्म भी नी करी सकदे, तां जिन्दगी च दूजियां गल्लां दी कजो चिंता करदे न? 27 “जंगली फुलां दे बारे च सोचा की सै कियां बडुदे न, सै ना तां मेहनत करदे न, कने ना ही कपडे पांदे न, तमी मै तुसां ने बोलदा है, की जालू राजा सुलेमान बाल धन दौलत थी, तालू भी उनी जंगली फुलां चे कुसी साई भी कपडे नी पायो थे।” 28 इस ताई अगर परमेश्वर दाबडे दे घाए जो, जडा अज है, कने कल अग्गी च फुक्या जाणा, तमी परमेश्वर घाए जो इतणी सुन्दरता दिन्दा है, तां हे अल्पविश्वासियों, तां उनी पक्का तुहाडी देबखाल करणी है, तुहाडा भरोसा इतणा घट कजो है? 29 कने तुसां इसा गल्लां दिया तोपा च मत रिया, की क्या खांणे कने क्या पीणे, कने ना ही शक करा। 30 क्योकि जडे लोक परमेश्वरे जो नी जाणदे सै इना चिजां जो तोपदे रेदे न; कने तुहाडा पिता जाणदा है, तुहांजो इना चिजां दी जरूरत है। 31 पर उदे राज्य दिया तोपा च रिया, तां ऐ चिजां भी तुहांजो मिली जाणियां। 32 तुसां मेरे ताई भेडां दे झण्ड साई न, इस ताई कुसा भी गल्ला दे बारे च मत डरा; क्योकि तुहाडे परमेश्वर पिता जो ऐ खुशी है, की तुहांजो राज्य दे। 33 अपणिया जमीन जयादात जो बेचिकरी दान करी दीया; कने अपने ताई ऐसे बटुऐ बणां, जडे पराणे नी होंदे, इदा मतलब की स्वर्ग च ऐसा धन गठेरा जडा घटदा नी है कने जिसदे नेडे चोर नी जांदा है, कने खराब करणे बाला कीडा नी लगदा। 34 क्योकि जिथु तुहाडा धन है, ओथु तुहाडा मन भी लगया रेदा है। 35 हमेशा सेबा करणे तांइ तैयार रिया कने सारी रात तुहाडे दिव्ये बलदे रेन। 36 कने तुसां उना माणुऐ साई बणा, जडे अपने मालिके जो निर्याला दे होन, की सै बियाह ला कालू बापस ओगा; की सै जालू आई करी दरबाजा खट खटाणां तां झट उदे तांइ खोली देन। 37 धन्य न सै सेवक, जिना जो मालिक आई करी उदे बापस ओणे दी निर्याल रखदे दिखे; मै तुहांजो ने सच्च बोलदा, की उनी इक सेवक साई कपडे पाई करी उना जो रोटी खाणां बढाणा, कने अपु उना जो खांणे ताई परोसणा। 38 अगर सै अधिया राती या ब्यागा पेहर च आई करी उना जो जागदा दिखे, तां सै सेवक धन्य न। 39 पर तुसां ऐ जाणी लिया,

की अगर घरे दा मालिक जाणदा, की चोरे कुसा घडिया ओणा है, तां सै जागदा रेंदा, कने अपने घरे च चोरी नी होणा दिन्दा। 40 तुसां भी भेरे बापस ओणे तांई तैयार रिया; क्योकि मैं, माणुं दे पुत्रे ऐसिया घडिया स्वर्ग ला ओणा जालू तुसां मेरे ओणे दी उम्मीद नी कितियो होणी है। 41 तालू पतरसे बोल्या, “प्रभु जी, क्या ऐ कहाणी तू सांझो ही बोला दा है की सबना जो बोलदा है।” 42 प्रभु यीशुऐ बोल्या, “सै भरोसे लाइक कने अकला बाला भंडारी कुण है, मालिक जिसयो नोकरांचाकरां दा सरदार बणाऐ ताकि सै उना जो टेमे दा खाणे पिणे दा समान दे।” 43 धन्य है सै सेवक, जिसयो उदा मालिक आई करी ऐसा ही करता दिखे। 44 मैं तुहांजो ने सच्च बोलदा; उनी उसयो अपणिया सारिया संपतिया दा मालिक बणाई देणा। 45 पर अगर सै सेवक सोचणा लग्गे, की मेरे मालिके जो ओणे च हल्ले बणा बकत है, कने सै दासां कने जो मारणा-कुटणा कने खाणा-पिणा कने शराबी होणा लग्गे। 46 तां उस दासे दे मालिके ऐसे रोजे ओणा है जिस दिने सै उसयो निग्याला दा नी होणा, कने ऐसी घडी जिसा जो सै जाणदा ना होणा, तालू उदे मालिके ओणा, उसयो खरियाँ झिडकां देईकरी उदी गिणती अक्विवासियां सोगी करी देणा। 47 कने सै सेवक जडा मालिके दी इच्छा जाणदा था, कने तैयार नी रिया कने ना उदिया मरजिया चलया, उनी बडी मार खाणी। 48 पर जिसयो पता नी होईकरी मार खाणे जोगा कम्म करे उनी घट मार खाणी, तांई तां जिसयो जादा दितया है उसला जादा मंगया जाणा है; कने जिसयो जादा सौपया है, उसला जादा दा हिसाब लेणा है। 49 मैं धरतिया पर अग्न लगाणा आया है; बस ऐ ही चांदा है, की हुण ही लगी जांती। 50 मिंजो जल्ल ही इक भयंकर पीड झेलणा पोणी है; कने जालू दीकर सै पीड नी झलगा तालू दीकर मैं बडा बेचेन है। 51 तुसां क्या सोचंदे न की मैं धरतिया पर लोकां बिच मेल मिलाप करणा आया है? मैं बोलदा है, नी मैं लग करणा आया है। 52 क्योकि अगर कुसी इकी घरे दे पंज जणे न, तां उना अपु चे बख रेणा है, तिन्ना जाणया जडे मिंजो पर भरोसा नी करते उना दो जणयां दा बिरोध करणा जडे मिंजो पर भरोसा करते न। 53 पिता पुत्रे ने, कने पुत्रे पिता ने बेर रखणा; माता कुडिया ने, कने कुडिया माता ने, सस नुआ ने, कने नुआ ससु ने बैर रखणा है। 54 कने यीशुऐ भिडा ने भी बोल्या, जालू तुसां बदलां जो पश्चिम ला उठदे दिखंदे न, तां झट बोलेदे न, की बरखा होणी है, कने इयां ही होंदा है। 55 कने जालू दक्षिणी होआ चलती दिखंदे न तां बोलेदे की लू चलणी, कने इयां ही होंदा है। 56 हे कपटियो, तुसां धरती कने अम्बरे दे स्पे च भेद करी सकंदे न, पर इस युगे च परमेश्वर क्या करा दा है, उदे बारे च भेद कजो नी जाणंदे न। 57 तुसां जो अपु ही फेसला करणा चाईदा की तुहाडे तांई क्या ठीक है? 58 जालू तू अपने मुई सोगी न्याय करणे बाले बाल चलया है, तां रस्ते च ही उसला छुट्टे दी कोसिस करी ले इयां ना हो, की सै तिजो जजे बाल लेई जाऐ, कने जज सिपाई बाल देई दे कने सिपाई तिजो जेला च पाई दे। 59 मैं तुहांजो बोलदा है, कि जालू दीकर तू दमडी-दमडी नी देई दिगा तालू दीकर ओथु ला नी छुटी सकणा है।

13 उस बेले कुछ लोक आईरे, कने उना यीशुऐ ने बोल्या, की रोमी राज्यपाल पिलातुसे गलील प्रदेशे दे थोडे लोकां दी हत्या करी दितियो थी, जालू से मंदिर च बलि चढा दे थे। 2 ऐ सुणीकरी यीशुऐ उना जो जबाब च ऐ बोल्या, “क्या तुसां ऐ समझंदे न, की ऐ गलील प्रदेशे दे लोक, बाकी सारयां गलीली लोकां ला जादा पापी थे की उना पर ऐ मुशकिल पड़े?” 3 मैं तुसां ने बोलदा, की नी थे; पर अगर तुसां भी अपने पापां जो नी मनगे कने मन नी बदलगे तां तुसां भी इयां ही खतम होणा है। 4 या क्या तुसां समजंदे न, की उना ठारा जणयां दे बारे च तुहाडा क्या बोल्या है जालू उना पर शीलोल दा गुम्मत पिया, कने सै दुई करी मरी गे: क्या सै यरूशलेम शेहरे दे होर सारे रेणे बालयां ला जादा पापी थे? 5 “मैं तुसां ने बोलदा है, की नी थे; पर अगर तुसां मन नी बदलया तां तुसां भी इना सांई ही खतम होणा।” 6 फिरी उनी ऐ कहाणी भी सुणाई, की कुसकी अंगरा दे बागे च इक अंजरी दा रूख लगया था: सै उदे च फल तोपणा हर साल आया, पर नी मिल्ले। 7 तालू उनी बागे दे रखबाले जो बोल्या, दिख मैं तिन्ना सालां ला इस अंजरी दे रूखे च फल तोपणा ओंदा है, पर मिलंदे नी न, इसयो बडी दे क्योकि ये खरिया जमिना जो खराब करा दा है। 8 “उनी उसयो जबाब दिता, की हे मालिक इसयो इस साल तां रेंपी दे; की मैं इदे चारो पासे खूणी करी खाद पां। 9 अगली बरी अगर ऐ फलगा तां ठीक नितां इसयो बडी दियां।” 10 सन्वे दे रोजे यीशु इकी यहूदी जंज घर च उपदेशे दे दा था। 11 कने ओथु इक जनानी थी, जिसा जो ठारां

सालां ला इक बुरी आत्मा बिकलांग करी रखया था, कने सै बडी जादा कुबडी होई गियो थी, कने कुसी भी तरीके ने सिदी नी होई सकती थी। 12 यीशुऐ उसा जो दिखीकरी सदया, कने बोल्या, “हे नारी, तू इसा अपणिया बिमारिया ला छुटी गेई।” 13 तालू उनी उसा पर हथ रखे, कने सै झट सीधी होई गेई, कने परमेश्वरे दी बडाई करणा लग्गी। 14 इस तांई की यीशुऐ उसा जो सन्वे दे रोजे ठीक किता था, यहूदी जंज घरे दा सरदार लोकां ने बोल्या लग्गा, “इक हफते च छे रोज न, जिना च असां कम्म करी सकंदे न, इना रोजा च आई करी ठीक होआ; पर सन्वे दे रोजे नी।” 15 ऐ सुणिाकरी प्रभु यीशु जबाब दिता, “हे कपटियो, क्या सन्वे दे रोजे तुसां सारे जणे अपने दांदा या गधे जो बेकां ला खोलिकरी पाणी पिणा नी लेई जांते?” 16 ऐ जनानी जडी अब्राहमे दे बंशज है, जिसयो शैताने ठारां सालां ला बन्नी रखया था, क्या ठीक नी था की सन्वे दे रोजे अपने बंधने ला छुडाई जांते? 17 जालू उनी ऐ गल्लां बोलियाँ, तां उदे सारे बिरोधी शरमिदा होई गे, कने सारी भीड उना महान कम्मा ने जडे सै करता था, खुश होई। 18 फिरी यीशुऐ बोल्या, “परमेश्वरे दा राज्य कुसदे सांई है? कने मैं उदी तुलना केसने करे?” 19 “सै राईया दे इकी दाणे सांई है, जिसयो इकी माणुं ऐ लेईकरी अपणिया जमिना च राया है: कने सै बडोईकरी स्पष्ट बणी गिया; कने अम्बरे दे पंछियां उदियां डालियाँ पर अपने घोसले बणाऐ।” 20 उनी फिरी बोल्या, मैं परमेश्वरे दे राज्य दी तुलना केसने करे? 21 “सै खमिरे सांई है, जिसयो इकी जनानिया लेईकरी बडे सारे ओंटे च पाया, कने होदे-होदे सारा अटा खमीर बणी गिया।” 22 सै शेहर-शेहर, कने अपने चेलयां सोगी ग्रं-ग्रं होईकरी उपदेश दिन्दा होया यरूशलेम शेहर दे पासे जा दा था। 23 कने कुनकी यीशुऐ पुछया, “प्रभु जी, क्या परमेश्वरे कुछ लोकां जो ही अनन्तकाल दी सजा ला बचाणा है?” उनी उना जो बोल्या, 24 परमेश्वरे दे राज्य च जाणे दी कोशिश करा, क्योकि परमेश्वरे दे राज्य च अंदर जाणा सुंगडे दरबाजे ला अंदर जाणे सांई है, क्योकि मैं तुसां ने बोलदा है, की मतयां अंदर जाणे दी कोशिश करणी है, पर जाई नी सकणा है। 25 जालू परमेश्वर जडा घरे दा मालिक है उठी करी दरबाजा बंद करी बैठया हो, कने तुसां बाहर खडोई करी दरबाजा खट खटाई करी कने बिनती करी बोलन, प्रभु जी, साडे तांई खोली दे, कने सै जबाब दे की मैं तुहांजो नी जाणदा, तुसां कुथु ला आयो न? 26 “तालू तुसां बोल्या लगणा, की असां तरे सामणे खांदा पीता कने तू साडे बजारां च उपदेश दिता।” 27 पर परमेश्वरे बोल्या, मैं तुसां ने बोलदा है, मैं नी जाणदा तुसां कुथु ला ना। हे सुरे कम्म करणे बालयो, तुसां सारे मिंजो ला दूर होई जा। 28 ओथु रोणा कने दंद पीणे: जालू तुसां पूर्वज अब्राहम कने इसहाक कने याकूब कने सारे परमेश्वरे दे संदेश देणेबालयां जो परमेश्वरे दे राज्य च बैठया कने अपने आपे जो बाहर कडया दिखणा। 29 तालू पूरे संसारे ला लोक आई करी परमेश्वरे दे राज्य दिया दावता च हिस्सेदार होंगे। 30 “कने दिखा, जडे पिछले न, उना पेहले होई जाणा, कने जडे पेहले न, उना पिछले होणा।” 31 उसा घडिया कितणे ही फरीसियां आई करी उसयो बोल्या, ऐथु ला निकली करी चली जा; क्योकि राजा हेरोदेस तिजो मारी देणा चांदा है। 32 उनी उना ने बोल्या, जाई करी उस माणुं ऐ जो बोली दिया जडा लोमडियां सांई चलका है, की दिख मैं अज कने कल सारी बुरी आत्मा जो कडदा कने बिमारां जो ठीक करता है कने तिजे रोजे अपना कम्म पूरा करणा है। 33 तमी मिंजो अज कने कल कने परसु सफर करणा जरूरी है, क्योकि इक परमेश्वरे दा संदेश देणेबाला सिर्फ यरूशलेम शेहरे च ही मारया जाणा है। 34 “हे यरूशलेम शेहरे दे लोको! तुसां इना परमेश्वरे दा संदेश देणेबालयां जो मारी दिता है, जडे पेहले रेंदे थे कने उना लोकां जो पथरां ने मारंदे न जिना जो तुहाडे बाल भेजया; कितणी ही बरी मैं ऐ चाया, की जियां सुर्गीं अपणयां बचयां जो अपने फंगा थले गिटे करदी है, तियां ही मैं भी तरे बचयां दी रखबाली करे, पर तू ऐ नी चाया।” 35 “दिखा, तुहाडा मंदिर तुहाडे तांई उजाडी छडया है, कने मैं तुसां ने बोलदा है; जालू दीकर तुसां नी बोलगे, की धन्य है सै, जडा प्रभु दे नारे ने ओंदा है, तालू दीकर तुसां मिंजो कदी नी दिखणा है।”

14 फिरी यीशु सन्वे दे रोजे फरीसियां दे सरदारां च कुसकी दे घरे रोटी खाणां खाणे तांई गिया: कने सै यीशु जो ढंगे ने ताका दे थे की कोई गलती तोपी सकन। 2 ओथु इक माणु था, जिसदे हथ कने पैर सूजी गियो थे। 3 इसा गल्ला पर यीशुऐ व्यवस्था जो सिखाणे बालयां कने फरीसियां ने बोल्या, “क्या सन्वे दे रोजे लोकां जो ठीक करणे दी अनुमति व्यवस्था च है, की नी है?” 4 पर सै

चुपचाप ही रहे। तालू यीशुए उस पर हथ रखीकरी ठीक किता, कने जाणा दिता। 5 कने उना जो बोलया, “मन्नी लिया कि तुसां के कुसकी दा जागत या दांद सब्दे दे रोजे खूए च पेई जा कने उसयो उस रोजे झट बाहर ना कडे?” 6 सै इना गल्लां दा कोई भी जबाब नी देई सके। 7 तालू उनी दिखया, की सदयो लोक कियां सै जगा चुणी लेंदे जिथु सबते खास लोक बोदे न, तां यीशुए उना जो इक कहाणी सुणाई करी उना ने बोलया, 8 जालू कोई तिजो बियाये दिया धामा च सदगा, तां तुसां उना खास आपसना च मत बौदा, कुथकी इयां ना हो की उनी तिजो ला भी बडे खास बदे जो न्युंद दितियो हो। 9 कने जिनी तिजो कने उसयो दोनो जो न्युंद दितियो है, सै आई करी तिजो ने बोले, की इसयो जगा दे, तालू तिजो शरमिदा होईकरी सारयां ला पिच्छे बालिया जगा च बोणा पोई। 10 पर जालू तिजो सदगे, तां सारयां ला पिच्छे बालिया जगा जाई करी बेई जा, की जालू सै, जिनी तिजो सदया हे सै ओए, कने तिजो ने बोले की हे मित्र, अगगे जाई करी खास बाली जगा च बैठ; तालू तैरे सोगी बोंणे बालयां दे सामणे तेरी बडाई होणी। 11 “क्योंकि जडा कोई अपने आपे जो बडा महान बणांगा, उसयो छोटा किता जाणा; कने जडा कोई अपने आपे जो छोटा बणांगा, सै सबते महान कितया जाणा।” 12 तालू यीशुए अपने न्युंद देणेबाले फरीसियो जो भी बोलया, “जालू तू दिने दा या राती दा खाणां खांगा, तां अपने दोस्तां या भाईयां या रिशतेदारां या अमीर पडोसियां जो मत सददा, की इयां ना हो, की सै भी तिजो सदन, कने जडा तू खाणा खुआया उदा बदला होई जाऐ।” 13 “पर जालू तू रोटी खाऐ, तां गरीबां जो, लंगडयां जो कने अन्नयां जो सळी लियां। 14 तालू तू धन्य होणा, क्योंकि उना बाल तिजो देंणे तांई कुठ नी है, पर जालू धर्मी लोकां दे फिरी जिन्दा होई जणा तालू परमेस्वरे तुहांजो इदा इनाम देणा।” 15 उदे सोगी रोटी खाणे बालयां च इकी ऐ गल्लां सुणिकरी उसयो बोलया, “धन्य है सै, जडा परमेस्वरे दे राज्य दिया धाम च शामिल होंगा।” 16 उनी उसयो बोलया, कुनकी माणुए बडी बडी धाम दिती कने मतयां जो सदया। 17 जालू खाणां तैयार होई गिया, तां उनी अपने नोकरे जो भेजया कि जिना जो नियुंद दितियो उना लोकां जो बोली ओआ, की ओआ, खाणां तैयार है। 18 पर सै सारे दे सारे माफी मंगणा लगे, पेहेले माणुए उसला बोलया, मै खतर खरीदया है कने जरूरी है की मै उसयो दिखें; मै तिजो ने बिनती करदा है, की मिंजो माफ करी दे। 19 दूरे माणुए बोलया, मै पंज जोडीं दांद खरिदयो न, कने उना जो परखाणा जाणा है; मै तिजो ने बिनती करदा है की मिंजो माफ करी दे। 20 इकी होरनी बोलया, की मै बियाह कितया है, इस तांई मै नी आई सकदा है। 21 उनी सेवके आई करी अपने मालिके ने ऐ गल्ल सुणाई। तालू घरे दे मालिके गुरसे च आई करी बोलया, शेहरे दे बजारां कने गलियां च जाई करी झट कंगालां, टुंडे, लंगडयां कने अन्नयां जो पेशु लेई ओआ। 22 सेवके फिरी बोलया, हे मालिक, जियां तू बोलया था, तियां ही कितया है; फिरी भी जगा है। 23 “मालिके सेवके ने बोलया, सडकां कने बागां च जाई करी लोकां जो मजबूर करी के लेई आए ताकि मेरा घर भरई जा। 24 क्योंकि मै तुसां ने बोलदा है, की पेहेले सदयो होए लोकां च कोई भी मेरिया रोटिया जो नी चखगा।” 25 कने जालू मती भीड यीशुए सोगी चलियो थी, तां उनी पिच्छे मुडी करी उसला बोलया। 26 “जडे लोक मेरे बाल ओदे न, सै तालू दीकर मेरे चेले नी बणी सकदे, जालू दीकर अपने माता-पिता कने घरे बाली कने बच्चे कने भाई बेंहण कने अपने आपे ला जादा प्यारा मिंजो ने नी करदे।” 27 जडा मेरिया बजा ला दुख सेहन कने मरणे तांई तैयार नहीं है, सै भी मेरा चेला बणने दे लायक नहीं है। 28 “अगर तुसां च कोई इक बडा बडा घर बणाणा चांदा हो, तां उनी सबते पेहेले बेईकरी इसा गल्ला दा हिसाब लाणा की इसयो बणाणे च कितणा खची ओणा, कने दिखणा की इसयो पूरा करणे तांई पूरा पैसा है की नी।” 29 अगर उनी इयां नी किता, तां उनी जालू नियां पाई करी घरे जो पूरा तैयार नी करी सकणा, तां सारे दिखणे बाले ऐ बोलिकिरी उदा मजाक उडणा, 30 की इनी माणुए घर बणाणा तां शुरु किता, पर पूरा बणाई नी सकया? 31 “अगर इक राजा दस हजार माणुआं जो लेईकरी दूरे राजे ने लडना चलयया हो, जडा बी हजार माणुआं जो लेईकरी उस पर हमला करणा ओआ दा हो, तां सबते पेहेले बेईकरी इसा गल्ला पर बिचार करे की जडा बी हजार लेईकरी मिंजो ने लडना ओआ दा है, क्या मै उदा सामणा करी सकदा है की नी?” 32 नितां उदे दूर रेंदे ही, उसला संधी करणे दे बारे च गल्ल बात करणे तांई सै दूतां जो भेजे। 33 इयां ही तुसां च जडा कोई अपना सब कुछ छडी दे, सै ही मेरा चेला होई सकदा है। 34 लौण तां खरा होंदा है, पर अगर उदा स्वाद बिगडी जा, तां उदा स्वाद

कियां नमकीन करया? 35 “सै तां ना जमिना दे ना तां खादी दे कम्मे ओदा है: उसयो तां लोक बाहर फेंकी दिन्दे ना। जिस बाल सुणने तांई कन्न न सै ध्यान लाईकरी गल्ला जो सुणे, कने इसा गल्ला जो समझी ले।”

15 सारे कर लेणेबाले कने पापी लोक यीशु बाल ओदे थे ताकि उदी सुणना। 2 कने फरीसी कने व्यवस्था जो सिखाणे बाले बोलणा लगगे, “ऐ तां पापी लोकां ने मिलदा है कने उना सोगी खाणा खांदा है।” 3 तालू उनी उना जो ऐ कहाणी सुणाई; 4 “अगर तुसां च कुसी बाल सो भेडां होन, कने उना च इक गबाची जाये तां सै उना नडिनुए भेडां जो सुससान जगा च छडी करी, उसा गवाचिया जो तालू दीकर तोपे जालू दीकर सै मिल्ली न जा।” 5 कने जालू मिल्ली जांदि है, तां सै बडिया खुशिया ने उसा जो मुंडे पर चुकी लेंदा है। 6 कने अपने घरे आई करी दोस्तां कने पडोसियां जो गिठे ठरी के बोलदा है, मेरे सोगी खुशी मना क्योंकि मेरी गवाचियो भेड मिली गेई है। 7 मै तुसां ने बोलदा है: की इयां ही इक मन बदलने बाले पापिये दे बारे च स्वर्ग च इत्नी ही खुशी होणी, जितनी की उना नडिनुए धर्मियां दे बारे च नी होंदी जडे सोचदे न की सै धर्मी न, कने जिना जो फ्र्याताप दी जरूरत नी है। 8 तालू यीशुए इक होर कहाणी सुणाई अगर कुसी जनानिया बाल दस चांदि दे सिक्के होन, कने उना च इक सिक्का गबाची जाऐ; तै सै दिय्या बाली करी कने पूरे घरे च बोंखरिया ने सोतया, तालू दीकर सै ध्यान लगाई करी तोपदी रेंडे जालू दीकर तोपी ना ले। 9 कने जालू मिल्ली जांदा है, तां सै अपणियां सेलियां कने पडोसियां जो गठेरी करी बोलदी है, की ओआ मेरे सोगी खुशी मना क्योंकि मेरा गवाचिया सिक्का मिली गिया है। 10 “मै तिजो ने बोलदा है; की इयां ही इक पापी माणु जालू अपने पापां जो मन्नी लेदां है, तां परमेस्वरे दे स्वर्गदूत उस पापी तांई खुशी मनादे ना।” 11 फिरी उनी इक होर कहाणी सुणाई, इकी माणुए दे दो पुत्र थे। 12 उना च छोटे जागते पिता ने बोलया, पिता जी, की जडा हिसा मेरा जमीन जयादात च है, सै हण मिंजो देई दिया। कने पिता उना जो अपणी सारी जमीन जयादात दोनो जागतां बिच बंडी दिती। 13 “कने कुछ दिना बाद की छोटा पुत्र सारा कुछ अपणी करी दूर कुसी देशे जो चली गिया कने ओथु बरे कम्मा कने खाणे पिणे च अणणी सारी धन दौलत उडाई दिती।” 14 जालू सै सारा कुछ खची बैठा, कने उसी देशे बडा बडा अकाल पेई गिया, कने उस बाल खाणे पिणे जो कुछ नी बचया। 15 कने सै उसी देशे दे रेहणे बाले इक माणुए दे घरे कम्म करणे तांई गिया। उनी उसयो अपने खेतरां च सूअरां जो चुगाणे तांई भेजया। 16 कने सै इतणा भूखा था, की सै उना फलियां जो खाणे ने इतणा खुश था जिना जो सूअर खांते थे, क्योंकि उसयो कोई कुछ नी दिन्दा दा खाणे जो। 17 जालू उसयो समझ आई तां सोचणा लग्गा कने बोलणा लग्गा, की मेरे पिता दे कितणे ही मजदुरां जो खाणे ला जादा रोटी मिलदी है, पर मै ऐथु भूखा मरा दा। 18 मै हण उठी करी अपने पिता बाल जाणा है कने बोलणा की पिता जी मै परमेस्वर दे खिलाफ च कने तेरिया नजरा च पाप कितया है। 19 हण इसी उनी नी है की तेरा पुत्र बणे, मिंजो अपने इकी मजदुरे सांई ही रखी ले। 20 तालू उनी नी उदे देशे जो छडी दिता कने अपने पिता बाल जाणे तांई बापस चली पिया, सै अजे दूर ही था, की उदे पिता जो उसयो दिखीकरी तरस आई गिया, कने उस पासे दोडी करी उसयो गल्ले लाई लिया, कने बडे चूमे ले। 21 पुत्रे उसला बोलया, पिता जी, मै परमेस्वरे दे खिलाफ च कने तेरिया नजरा च पाप कितया है; कने मै हण तेरा पुत्र होणे जोगा नी रिया है। 22 पर पिता अपने नोकरां ने बोलया, झट छेल दे कपडे कडी करी इसयो पेहना, कने इदिया उंगलियां च गुन्ठिया कने पैरां च जतियां पेहना, 23 कने इक बडी बडी धाम तैयार करा ताकि असां खाई करी खुशी मना। 24 क्योंकि मै सोचया था की मेरा ऐ पुत्र मरी गिया है, पर ऐ मरया नी है: गवाची गिया था, पर हण मिली गिया है। कने सै खुशी मनाणा लगगे। 25 जालू ऐ सब होआ दा था पर उदा जेठा पुत्र खेतरां च कम्म करा दा था। कने सै जालू घरे बखे पुज्जा, तां उनी गाणे-बजाणे कने नचणे दा रोल्ला सुणया। 26 कने उनी इकी नोकरे जो सदीकरी पुख्या, ऐ क्या होआ दा है? 27 उनी उसला बोलया, तेरा भाई घर बापिस आया है, कने तेरे पिता बडी धाम तैयार कितयो है, क्योंकि सै भला चंगा घर बापस आया है। 28 ऐ सुणिकरी उसयो बडा गुस्सा आई गिया कने सै घरे अंदर नी जादा था, इस तांई उदा पिता बाहर आई करी उसयो अंदर चलणे तांई मनाणा लग्गा। 29 उनी पिता जो जबाब दिता, की दिख; की मै इतणे सालां ला तेरी सेबा करा दा है, कने कदी तेरी गल्ल नी टाल्ली, तमी तू मिंजो अजे दीकर कदी तू

मिंजो कुछ खरा नी दिता, की मैं अपने दोस्तां सोगी खूशी मनां। 30 पर जालू तेरा ऐ पुत्र आया, जिनी तेरी सारी धन दौलत कन्जरीयां पिच्छे उडाई करी आया है, तां तू इदे ताई बडी धाम लगायी। 31 “उनी उसला बोलया, मेरा पुत्र तू हेमेशा मेरे सोगी है; कने जडा कुछ मेरा है से सब कुछ तेरा ही है। 32 पर हण तिजो खूशी मनाणी कने मगन होणा चाईदा क्योकि तेरा ऐ भाई मरी गया था पर ऐ मरया नी है: गवाची गया था, पर हण मिली गया है।”

16 फिरी उनी चेलयां जो भी कहाणी सुणाई, कुसकी इक अमीर बन्दे दा इक भंडारी था, कने लोकां उदे सामणे उस पर इलजाम लगाया की ऐ तेरिया धन दौलत जो उडाई दिन्दा है। 2 कने उनी अमीर बंदे अपने भंडारी जो सदीकरी बोलया, ऐ क्या है जडा मैं तेरे बारे च मैं क्या सुणादा है? तू मेरे पैसयां दा क्या कितया है सारा हिसाब दे; क्योकि तू अजे बाद भंडारी नी है। 3 “तालू भंडारी सोचना लमा, की हुण मैं क्या करे? क्योकि मेरा मालिक मिंजो भंडारी दे कम्मे ला कडा दा है: कोई मेहनत बाला कम्म तां मिंजो ला हौंदा नी, कने भीख मांणे ने मिंजो शर्म ओदी है।” 4 मिंजो पता है की क्या करणा ताकि जालू मिंजो भंडारिये दे कम्मे ला कडया जांगा तां लोक मेरी मदद करन। 5 कने उनी अपने मालिके दे देणदारां जो इक-इक करी के सदया कने पेहले ला पुछया, की तिजो पर मेरे मालिके दा कितणा कर्ज है? 6 उनी बोलया, 3,700 लिटर तेल, तालू उनी उसला बोलया, की अपणी खाता बही ले कने बेकरी झट 1,850 लिटर तेल लिखी दे। 7 फिरी दुज्जे ला पुछया, तिजो पर कितणा कर्ज है? उनी उसला बोलया, 20,000 किलो कणक, तालू उनी उसयो बोलया, अपना बही खाता ले कने 16,000 किलो कणक लिखी दे। 8 मालिके उस अधमीं भंडारी दी तारीफ किती, की उनी चलाकिया ने कम्म कितया है; क्योकि इसा दुनिया दे लोक अपने बकते दे लोकां सोगी व्यवहार करणे च ज्योति दे लोकां ला जादा चलाक न। (aiōn g165) 9 कने मैं तुसां ने बोलदा है, की संसारिक पेसे ने अपने ताई मित्र बणाई लिया; ताकि जालू ऐ पैसा नी रंगा तां अनन्तकाल दे घरे च तुहांजो रेहणे ताई जगा दे। (aiōnios g166) 10 जडा छोटिया-छोटिया गल्लां च भरोसे दे लायक है, से बडियां गल्लां च भी भरोसे दे लायक है: छोटिया-छोटिया गल्लां च भरोसे दे लायक नी है, से बडियां गल्लां च भी भरोसे दे लायक नी है। 11 इस ताई जालू तुसां संसारिक पेसे च भरोसे दे लायक नी, तां तुहांजो स्वर्ग दा धन कुनी देणा? 12 अगर तुसां होरसी दे पेसे च भरोसे दे लायक बणी रे, तां जडा तुहाडा है, उसयो तुहांजो कुण दिया? 13 “कोई सेवक दो मालिकां दी सेबा नी करी सकदा: क्योकि उनी इकी ने बेरे कने इकी ने प्यार रखणा; या इकी ने मिली की रंगा कने दुज्जे जो बुरा समझणा: तुसां परमेस्वर कने धन दौलत दोनो दी सेबा नी करी सकदे।” 14 फरीसी जडे लालची थे, ऐ सारियां गल्लां सुणिकरी उदा मजाक उडणा लगे। 15 यीशु ऐ उना ने बोलया, “तुसां तां माणुऐ दे सामणे अपने आपे जो सही दसदे न: पर परमेस्वर तुहाडे मने जो जाणदा है, जडी चीज आदमियां दिया नजरा च बडी जरूरी है, से परमेस्वरे दिया नजरा च बुरी है।” 16 जालू यहूना बपतिस्मा देणेबाला आया, उसला पेहले मूसा दी व्यवस्था कने परमेस्वरे दा संदेश देणेबाले तुहाडे मार्गदर्शक थे, पर परमेस्वरे दे राज्य दा शुभसमाचार दा प्रचार सुणाया जादा है, कने हर कोई परमेस्वरे दे राज्य अंदर जाणे ताई उताबले न। 17 “परमेस्वरे दिया व्यवस्था दे इक बिन्दु दे मिटी जाणे ला, अम्बर कने धरतिया दा खतम होई जाणा असान है।” 18 उदाहरण ताई जडा कोई अपणिया घरे बालिया जो छडी करी दुजिया ने बियाह करदा है, से ब्यभिचार करदा है, कने जडा कोई ऐदिया जनानिये ने बियाह करदा है, से भी ब्यभिचार करदा है। 19 यीशु ऐ इक होर कहाणी सुणाई इक अमीर माणु था से बडे भेगे कने मतमले दे कपडे पेहनदा था कने हर रोज शानदार खाणा खादां कने ठाठ बाठ ने रेंदा था। 20 कने लाजर नापे दा इक गरीब जिदे शरीर च फोडे थे उसयो लोक उस अमीर माणुऐ दे घरे बाहर छडी दिन्दे थे। 21 कने से चांदा था, की अमीर माणुऐ दे खाणे बाद बचयो जुटे टुकडयां ने अपना पेट भरे, कने कुते भी आई करी उदे जखमा जो चटदे थे। 22 कने इयां होया की से गरीब मरी गया, कने स्वर्गदूत लाजर जो पूर्वज अब्राहम बाल लेई गया। कने से अमीर भी मरया कने दबी दिता, 23 कने पताल च पीडा ने तडफदे होऐ उनी उपर दिखया कने दूरे ला लाजर जो अब्राहमे दे बखे बैठया दिखया। (Hadēs g86) 24 कने उनी जोरे ने अबाज लाईकरी बोलया, हे पिता अब्राहम, मिंजो पर दया करी के लाजरे जो मिंजो बाल भेजी दे, ताकि से मिंजो

अपणिया उंगलियां दे सिरे जो सेडी करी मेरिया जीभा जो ठंडा करे, क्योकि मैं इसा अग्नी ने तडपा दा है। 25 पर अब्राहमे बोलया, हे पुत्र याद कर, की तू अपणिया जिंदगियां च खरियां चिजा लेई बैठया है, कने तियां ही लाजर जो सारियां बुरियां चिजां पर इसयो हण ऐथू शांति मिल्ला दी है, कने तू तडपा दा है। 26 कने इना सारियां गल्लां जो छडी करी साडे कने तुहाडे बिच इक बडी बड्डी खाई है ताकि जडा ऐथू ला उस पर जाणा चा सै ना जाई सके, कने ना कोई ओथु ला इस पर साडे बाल आई सके। 27 उनी बोलया, हे पिता जी, मैं तिजो ने बिनती करदा है, की तू लाजर जो मेरे पिता दे घरे भेज, 28 क्योकि मेरे पंज भाई न, मैं चांदा है की लाजर जाऐ कने मेरे भाईयां जो चेताबनी दे, इयां ना होऐ की सै भी इसा पीडा दिया भयानक जगा च ओन। 29 अब्राहमे उसला बोलया, उना बाल चेताबनी देणे ताईं तां मूसा दी व्यवस्था कने परमेस्वरे दा संदेश देणेबाले न, उना जो इना जो सुणा चाईदा। 30 “उनी बोलया, नि, पिता अब्राहम; पर अगर कोई उना जो चेताबनी दे, तां उना अपने पापां दा पश्चाताप करणा है। 31 अब्राहमे उसयो बोलया, जद सै मूसा कने परमेस्वरे दा संदेश देणेबालयां दी नी मंदे न, तां अगर कोई मरयां चे जिन्दा होई जा तां उना उदी गल्लां दा भी भरोसा नी करणा।”

17 फिरी यीशुऐ अपने चेलयां बोलया, ऐ गल्लत ता पक्की है कि परिशां माणुऐ पर जस्र ओणियां न जडा उना जो पाप करणे दी बजा बणगा, पर हाय उसी माणुऐ पर, जिदिया बजा ने सै ओदियां न। 2 पर जडा कोई इना छोटयां च कुसी इकी जो भी भरोसे ला भतकांदा है या उना दे पाप करणे दी बजा बणदा है, उदे ताईं तां खरा हौंदा, कि उदे गले च बड्डी धरते दा पथर लटकाया जाऐ, कने डुगे समुद्रे च डोबया जाऐ। 3 “ध्यान रखा; अगर तेरा मसीह भाई गलत कम्म करे तां उसयो समजाओ, कने अगर सै पछतांगा तां उसयो माफ करी दे।” 4 “अगर सै दिन भर च सत बरी तिजो ने गलत करे कने सतां बरी तेरे बाल आई करी बोले, की मैं पछतांदां है, तां उसयो माफ करी दे।” 5 तालू प्रेरितां प्रभु यीशु ने बोलया, “साडे भरोसे जो होर जादा बडा कने मजबूत करण। 6 प्रभुऐ बोलया, अगर तुहाडा भरोसा राईया दे दांणे बाबाबर भी हौंदा, तां अगर तुसां इस तुते दे सखे जो बोलदे की तू जडा ला उखडी करी समुद्रे च लगी जा, तां उनी तुहाडी मनी लेणी। 7 अगर तुहाडा सेवक हल जोती करी, या भेडां चुगाई करी बापस घरे जो ओऐ, तां उसयो बोले, झट आ कने रोटी खाई ले? 8 ना, उनी तां इयां बोलणा, की मिंजो ताई रोटी बणा कने जालू दीकर मैं रोटी खां तालू दीकर मेरी सेबा करणे ताई तैयार रे इदे बाद तू भी खाई लिया? 9 क्या तुसां अपने सेवके जो उस कम्मे जो करणे ताई धन्यवाद नी करगे जडा तुसां उसयो करणे ताई बोलया था? 10 “इयां ही जालू तुसां सै सब कुछ करी लिया हो जडा तुसां जो करणे ताई बोलया था, तां तुसां जो ऐ बोलणा चाईदा, असां निकम्मे सेवक न; की जडा सांझो करणा चाईदा था सेई असां कितया है।” 11 जालू यीशु कने उदे चेले यस्शलेम शेहरे जाणे बाले रस्ते पर चलयो थे, सै सामरियां कने गलील प्रदेश ला होईकरी जा दे थे। 12 कने कुसकी गांऐ ला जांदे बेले उसयो दस कोडी मिल्ले। 13 कने उना दूरे ला ही खडोई करी, “जोरे ने बोलया, यीशु जी, मालिक जी, सांझो पर दया कर।” 14 यीशुऐ उना जो दिखीकरी बोलया, “यस्शलेम दे मंदिर च जाओ; कने अपने आपे जो याजकां जो दस्सा कि तुसां खरे होई गियो न” कने सै जांदे-जांदे ही ठीक होई गे। 15 तालू उना चे इकी ऐ दिखया की मैं ठीक होई गया है, से जोरे ने बोली करी परमेस्वरे दी बडाई करदा यीशुऐ बाल बापस आया; 16 कने यीशुऐ दे पैरां पर झुकी करी धन्यावाद करणा लमा; कने सै सामरी था। 17 इसा गल्लां पर यीशुऐ बोलया, क्या सै दसो जणे ठीक नी होऐ, तां सै होर नी जणे कतां न? 18 “क्या इस मेर यहूदी जो छडी करी कोई होर नी निकलया, जडा परमेस्वरे दी बडाई करदा है?” 19 तालू यीशुऐ उसला बोलया, “उठी करी चली जा; क्योकि तू भरोसा कितया है की तू ठीक होई गया है।” 20 जालू फरीसियां उसयो पुछया, की परमेस्वरे दा राज्य कालू ओणा है? तां यीशुऐ उना जो जबाब दिता, “परमेस्वरे दा राज्य इयोदिया नी है, जिसयो तुसां दिखी सकदे न। 21 कने लोकां ऐ नी बोलणा, की दिखा, ऐथू है, या ओथू है। क्योकि दिखा, परमेस्वरे दा राज्य तुहाडे बिच है।” 22 कने यीशुऐ चेलयां ने बोलया, सै दिन ओणे न, जिना च तुसां माणुऐ दे पुत्रे दे रोजां च इकी रोजे जो दिखया चाणा है, पर नी दिखी सकणा है। 23 लोकां तुसां ने बोलणा, दिखा मसीह ओथु है? या दिखा ऐथू है? पर तुसां चली मत जांदि कने पिच्छे ही मत होई जांदा। 24 क्योकि जियां बिजली अम्बरे दे इकी छोरे ला दुए

छोरे दीकर चमकती है, तियां ही मैं माणुए दे पुत्रे भी अपने रोजे च सामणे ओणा है। 25 पर पेहले बडा जरूरी है, की सै बडे जादा दूख झेले, कने उसयो इसा पीढी दे लोक निच बोलन। 26 जियां साडे पूर्वज नूह दे रोजां च होया था, तियां ही माणुए दे पुत्रे दे रोजां च होणा है। 27 जिस रोजे दीकर नूह जहाजे पर नी चढया, उस दिने दीकर लोक खांदे पिंदे थे, कने उना च बियाह शादियां होंदिया थियां; तालू जल-प्रलय आई कने सब कुछ खत्म करी दिता। 28 कने तियां रिती ला ही साडे पूर्वज लूत दे रोजां च होया था जडा सदोम शेहरे च रे दा था, की लोक खांदे-पिंदे कने लेंगे देण करदे, कने पेड लागाने कने घर बणांदे थे; 29 पर जिस रोजे लूत सदोमे ला निकलया, उस रोजे अम्बरे ला अग गन्धक बरसी कने सारे लोकां जो जडे शेहर च रेंदे थे खत्म करी दिता। 30 कने सै रोजे भी इयोदिया होणा, जालू मैं माणुए दे पुत्रे इयां ही इकदम दोबारा बापिस ओणा है। 31 उस रोजे जडा छलीं पर होंगा, कने उदा समान घरे हो, तां सै उसयो लेंगे ताईं थले ना उतरे, कने तियां ही जडा खेतेरे जो गिया हो सै बापस नी ओए। 32 साडे पूर्वज लूत दी घरे आलीं जो याद रखा, की उसा कने क्या होया था। 33 जडा कोई अपने प्राण जो बचाणा चांहागा, उनी परमेखरे सोगी आत्मिक जिन्दगी जिणे दा मोका खोई देणा है। जडा कोई मेरे ताईं अपनी जान गबांणा उसयो परमेखरे सोगी सदा ताईं दी जिन्दगी मिलणी। 34 मैं तुसां ने बोलदा है, उसा रातीं दो माणु इकी मंडे पर होणे, पर इक लेईं जाणा कने दुज्जे जो छडी देणा है। 35 “दो जनानिया सोगी चक्की पियां दियां होणियां, इक लेईं जाणी कने दुई छडी देणी।” 36 (दो जणे खेतेरे च होणे न, इक लेईं जाणा कने दूजा छडी देणी।) 37 ऐ परमीकरी उना उसला पुछया, हे प्रभु ऐ कुथु होणा है? उनी उना ने बोलया, हर कोई जाणदा है ऐ कुथु होणा है तियां सारे जाणदे न जिथु लाश है, ओथु इल्लां गिठियां होंदियां न।

18 फिरी यीशुए अपने चेलयां जो इदे बारे बोलया की रोज प्राथना करणा कने कदी हिम्मत नी छडणी चाईदी, इस ताईं उना ने ऐ कहाणी सुणाई: 2 “कुसकी शेहरे च इक न्यायधीश रेदा था; सै ना परमेखरे ला डरदा था ना कुसी माणुए दी परवाह करता था।” 3 कने उसी शेहरे च इक बिधवा भी रेदी थी: जडी उदे बाल आई करी बोलदी थी, की मेरा न्याय करी के मिंजो दुशमणे ला बचाई ले। 4 कने बडे दिना दीकर तां मनया नी पर आखरी च मने च सोची करी बोलया, मैं ना परमेखरे ला डरदा, कने ना आदमियां दी परवाह करता है; 5 तमी ऐ बिधवा मिंजो तंग करदी रेदी है, इस ताईं मैं इसा दा न्याय करणा है, कुथी इयां ना हो की बार-बार आई करी आखरी च मिंजो बुरी तरह थकाई दे। 6 प्रभु ने बोलया, सुंणा, की इनी अधर्मी न्यायधीश क्या बोलया है, उस बारे च ध्यान ने सोचा। 7 क्या परमेखर अपने चुणयो लोकां दा न्याय नी करणा, जडे रात-दिन उदे सामणे रोंदे न; परमेखरे उना दी मदद करणे च जरे नी करणी है? 8 “मैं तुसां ने बोलदा है; उनी झट उना दा न्याय करणा; तमी जालू मैं, माणुए दे पुत्रे बापस धरती ओणा, तां मिंजो हेरानी होंदी है की क्या मिंजो धरतिया पर ऐसा माणु मिलणा जडा मिंजो पर भरोसा करता हो।” 9 कने यीशुए उना लोकां ने जडे अपने बारे च सोचदे न, की असां धर्मी न, कने दुजयां जो निच बोलदे थे, ऐ कहाणी सुणाई 10 “दो माणु मंदरे च प्राथना करणा गे; इक फरीसी था कने दूजा कर लेणे बाला था। 11 फरीसी खडोई करी अपने मने च इयां प्राथना करणा लग्गा, की हे परमेखर, मैं तेरा धन्यवाद करता है, की मैं होरनी माणुए सांई बुरा करणे बाला, अन्यायी कने व्यभिचारी नी है, कने ना ही इस कर लेणेबाले सांई है। 12 मैं हप्ते च दो बरी बरत रखादा है; मैं अपणिया कमाईया दा दसमा हिस्सा भी तुसां जो दिन्दा है। 13 पर कर लेणेबाले दूर खडोई करी, स्वर्ग पासे दिखणा भी नी चाया, पर सै दूखे ने अपणिया छातिया पिटी-पिटी करी बोलणा लग्गा, हे परमेखर मैं पापी है, मिंजो पर दया कर, मिंजो माफ कर। 14 यीशुए बोलया मैं तुसां ने बोलदा है, की ऐ चुंगी लेणे वाला था ना की फरीसी माणु जडा परमेखरे सामणे धर्मी दसया; क्योंकि जडा कोई अपने आपे जो बडा महान बणागा, सै छोटा करी देणा है; कने जडा अपने आपे जो छोटा बणागा, उसयो आदर मान मिलणा।” 15 फिरी लोक अपने बचयां जो यीशुए बाल लोणा लग्गे, ताकि सै उना पर हथ रखे; कने चेलयां दिखीकरी उना जो डांटया। 16 यीशुए बचयां जो अपने बाल सदीकरी बोलया, बचयां जो मना मत करा कने इना जो मेरे बाल ओणा दिया, क्योंकि परमेखरे दा राज्य उना दा है जडा इना बचयां सांई है। 17 मैं तुसां ने सच बोलदा है, परमेखरे अपने राज्य च सिर्फ उना लोकां जो ओणा देणा है जडे परमेखरे दे राज्य जो बचयां सांई अपनांदा है। 18

कुंनकी यहदी अधिकारिये उसला पुछया, “उतम गुरू जी, मैं क्या कम्म करां की परमेखर मिंजो हमेशा दी जिन्दगी दे?” (aiōnios g166) 19 यीशुए उसयो बोलया, तुसां मिंजो कजो उतम बोलदे न, उतम तां सिर्फ इक ही है, सै परमेखर है। 20 तू परमेखरे दे हुक्मा जो तां जाणदा है की: “व्यभिचार नी करणा, झूठी गबाई नी देणी, अपने माता पिता दा आदर करणा।” 21 उनी बोलया, “मैं तां इना सबना हुक्मा जो तां बचन ला मनदा आया है।” 22 ऐ सुणीकरी, यीशुए उसला बोलया, तिजो च अजे भी इक गल्ला दी कर्मी है, जा, कने जडा कुछ तेरा है उसयो बेची करी गरीबां जो देईं दे, तां तिजो स्वर्ग दा धन मिलणा, इयां करणे बाद आ कने मेरा चेला बणिया। 23 सै ऐ सुणीकरी बडा उदास होई गिया, क्योंकि सै बडा अमीर था। 24 यीशुए उसयो दिखीकरी बोलया, अमीरां दा परमेखरे दे राज्य च जाणा बडा मुशकिल है। 25 ऊंटे दा सुझा दे नाके चे निकलना असान है, पर अमीरां दा परमेखरे दे राज्य च जाणा बडा भरी मुशकिल है। 26 कने सुणने बालयां बोलया, “अगर ऐसा है तां कुण अपने पापां दी सजा मिलणे ला बची सकदा है?” 27 यीशुए जबाब दिता, “जडा माणुए ला नी होई सकदा है सै परमेखरे ला होई सकदा है।” 28 पतरसे यीशुए जो पुछया, दिख, असां तां घर-बार छडी करी तैरे पिच्छे चलयो ना। 29 यीशुए उना जो जबाब दिता, “मैं तुसां ने सच बोलदा है, जिनी भी परमेखरे दे राज्य तांईं घर, या घरे बालीं, या भाईं, या माता पिता, या बाल बचयां जो छडी दितया हो। 30 कने इस बेले केईं गुणा जादा मिलणा; पर परलोके च हमेशा दी जिन्दगी मिलणी।” (aiōn g165, aiōnios g166) 31 फिरी यीशुए बाहरां चेलयां जो एकांत च लेईंजाईं करी उना ने बोलया, दिवा, असां यकशलेम शेहरे जो जाणा है, कने जितणियां भी गल्लां मेरे, माणुए दे पुत्रे तांईं परमेखरे दा संदेश देणेबालयां लिखियां न सै सारियां पुरियां होणियां न। 32 “क्योंकि सै होर जातियां दे हथे देईं देणा है। कने उना मेरा मजाक उडाणा है, कने मेरी निंदा करी के मिंजो पर थुकणा, 33 कने मिंजो कोडे मारणे, कने मिंजो मारी देणा है, कने मैं तिजे दिने मैं मरयां चे जिंटे होई जाणा है।” 34 कने चेलयां इना गल्लां चे कोई भी गल्ल नी समझ आई: कने ऐ गल्ल उना च ही लूककी रेई, कने जडा बोलया था सै उना दिया समझा च नी आया। 35 जालू यीशु यरीहो शेहरे दे बखे पुज्जा, तां इक अन्ना सडका कंडे बेईकरी भिख मंगा दा था। 36 कने भिडा दी चलने दी अबाज सुणीकरी पुछणा लग्गा, ऐ क्या होआ दा है? 37 उना उसयो दसया, “नासरत दा यीशु मसीह जा दा है।” 38 तालू उनी अबाज लाईकरी बोलया, “हे यीशु, राजा दाऊदे दे बंशज, मिंजो पर दया कर।” 39 जडे अगे-अगे चलयो थे, सै उसयो डांटणा लग्गे की चुप रे: पर सै होर जोंरे ने बकणा लग्गा, “हे राजा दाऊदे दी बंशज मिंजो पर दया कर।” 40 तालू यीशुए ऐ सुणया कने स्की करी बोलया, “उसयो ऐथु लोआ।” कने तालू सै बखे आया तां यीशुए उसयो पुछया, 41 “तू क्या चांदा है की मैं तेरे तांईं करे?” अन्ने उसने बोलया, गुरू जी, ऐ की मिंजो मिलणा लगी पोए। 42 यीशुए उसयो बोलया, “दिखणा लग, तेरे भरोसे जडा मिंजो पर है तिजो ठीक करी दिता है।” 43 कने सै झट मिलणा लगी पिया; कने परमेखरे दी बडाईं करता होया उदे पिच्छे चली पिया, कने सारे लोकां ऐ दिखीकरी परमेखरे दी स्तुति किर्ती।

19 यीशु यरीहो शेहर ला होईकरी जा दा था। 2 कने दिखा, जक्कईं नाए दा इक माणु था जडा चुंगी लेणेबालयां दा सरदार कने अमीर था। 3 सै यीशुए जो दिखणा चांदा था की सै कुण दिया है? पर दिवा दिया बजा ने सै दिखी नी सका दा था। क्योंकि सै छोटे कंदे दा माणु था। 4 तालू सै उसयो दिखणे तांईं अगे दोडीं करी इक गूरर दे स्खे पर चडी गिया, क्योंकि यीशु उनी रस्ते ला जाणे बाला था। 5 जालू यीशु उसा जगा पर पुज्जा जिथु जक्कईं था, तां यीशुए उपरे पासे दिखीकरी बोलया, हे जक्कईं, झट उतरी आ; क्योंकि अज मिंजो तेरे घरे रेंणा जरूरी है। 6 सै झट स्खे ला उतरया कने यीशुए जो खुशिया ने अपने घरे जो लेईं गिया, कने खुशिया सोगी उदा स्वागत किता। 7 ऐ दिखीकरी सारे लोक बुडबडाणा लग्गे, “की सै तां इक पापी माणुए दे घरे चली गिया है।” 8 जक्कईं खाणे दे बकते खडोई करी यीशु ने बोलणा लग्गा, “प्रभु जी, दिख मिंजो बाल जिदा कुछ है सै गरीबां जो दिन्दा है, कने अगर मैं लोकां ला चुंगी लेणे च बेईमानी किंतियो है तां उसयो चार गुणा बापस करी दिन्दा है।” 9 तालू यीशुए उसला बोलया, अज इसी घरे दे लोकां बिच उद्गार आया है, क्योंकि ऐ भी अन्नाहमे दा बंशज है। 10 “क्योंकि मैं, माणुए दा पुत्र गवाचयां जो तोपणा कने उना जो अनन्त

सजा ला बचाणे ताई आया है।” 11 जालू लोक ऐ गल्लां सृंगा दे थे तां यीशुऐ उना जो इक कहाणी सुणाई, इस ताई की से यस्त्रालेम शेहरे दे नेडे था, कने लोकां जो लागया की परमेस्वर दे राख्य बस हण ओणे बाला है। 12 यीशुऐ बोलया, इक अमीर माणू दूर देशे जो चलया ताकि राजपद पाई करी बापस आई जा। 13 कने उनी अपने दस सेवकां जो दस मुहरां दितियां, कने उना ने बोलया, मेरे बापस ओणे दीकर लेण देण करनयो। 14 पर उदे शेहरे बाले उसला बैर रखे थे, उदे पिच्छे संदेशे देणेबाले दूतां ने बोली भेजया, की असां नी चांदे न की ऐ सांझो पर राज करे। 15 जालू सै राजपद लेईकरी बापस आया, तां इयां होया की उनी अपने सेवकां जो जिना जो मुहरां दितियां थियां, अपने बाल सदया ताकि पता लगे के लोके देणे ने उना क्या-क्या कमाया है। 16 तालू पहले आई करी बोलया, हे मालिके तेरियां मुहरां ने मै दस होर मुहरां कमाईया न। 17 उनी उसला बोलया, उसम सेवक, बडा खुरा किता, तू बडे ही थोडे च भरोसे बाला निकलया हणे ला तू दसां नगरां दा अधिकारी। 18 दुज्जे आई करी बोलया, हे मालिक तेरिया मुहरां ने मै पंज होर मुहरां कमाईया न। 19 उनी उसला बोलया, जा तू भी पंजा नगरां दा अधिकारी। 20 कने तिजे आई करी बोलया, हे मालिके दिख, तेरी मोहर ऐ है, जिसा जो मै गमछे च बनी करी रखया था। 21 क्योंकि मै तिजो ला डरदा था, क्योंकि तू बडा सकत माणू है; जडा तू नी रखया होंदा उसयो तू चुकी लेंदा, कने जडा तू नी राया है, उसयो तू बडदा है। 22 उनी उसला बोलया, हे निकम्मे सेवक, मै तेरियां ही गल्लां ने तिजो दोषी बनादा है: तू मिजो जाणदा था की मै सकत माणू है, जडा मै नी रखदा है उसयो चुकी लेंदा है, कने जडा मै नी राया उसयो बडी लेंदा है? 23 तां तू मेरे पैसे बयाजे पर महाजना बाल कनी रखी दिते, इयां करता तां मै आई करी बयाजे समेत लेई लेंदा। 24 कने जडे लोक उदे बखे खडोतयो थे, मालिके उना ने बोलया, इसला मुहरां जो लेई लिया, कने जिसदे बाल दस मुहरां न उसयो देई दिया। 25 उना मालिके ने बोलया, हे मालिक, उस बाल दस मुहरां तां हेन। 26 मालिके उना जो बोलया, “जिना बाल समझणे दी इच्छा है जडा परमेस्वर सिखांदा है, उसयो परमेस्वर होर समझ देणी, पर जडा समझणे दी इच्छा नी रखदा, की मै क्या सिखांदां, तां थोडा जडा उसयो समझ आया से भी उसला लेई लेणा।” 27 “पर मेरे उना बैरियां जो जडे नी चांदे थे की मै उना दा राजा बना, उना जो मेरे सामणे लेई ओआ कने मारी दिया।” 28 ऐ गल्लां बोली करी यीशु अपने चेलयां सोगी यस्त्रालेम शेहरे दे पासे उना दे अणे-अणे चलया। 29 कने सै जालू जैतून सखां दे पाहडे पर बैतगणे कने बैतनिय्याह गांरे दे बखे पुज्जा, तां उनी अपने दों चेलयां जो ऐ बोली करी भेजया, 30 सामणे दे गां च जा, कने ओथु पुजदे ही तुहांजो इक गधिया दा बच्चा बननया मिलणा है, उदे उपर हिली कोई नी बैठया था, सै खडे च बननया होणा उसयो खोली करी लेई ओआ। 31 “कने अगर कोई तुहांजो ला पुच्छे, की कजो खोला दे न, तां ऐ बोली देणा, कि प्रभु जो इसदी जस्रत है।” 32 जडे चले भेजयो थे, उना जाई करी सियुदा ही दिखया, जियां यीशुऐ बोलया था। 33 जालू सै गधे दे बच्चे जो खोला दे थे, तां उदे मालिके उना ला पुछया, “इसयो कजो खोला दे न?” 34 उना बोलया, “प्रभु जो इसदी जस्रत है।” 35 सै उसयो यीशुऐ बाल लेई आये कने अपने कपडे उदे उपर पाई दिते कने यीशु उस पर बैठी गया। 36 जालू यीशु गधे पर बेईकरी जा दा था, तां मतयां लोकां अपने कपडे रस्ते च बछाई दिते। 37 यस्त्रालेम शेहरे जांदे बेले जालू यीशु जैतून सखां दे पाहडे दिया उतराईया च पुज्जा, तां चेलयां दी सारी मंडली उना सारे अनोखे कम्मा दिया बजा ने जडे उना दिखयो थे, खुश होईकरी जोरे ने सारे परमेस्वर दी स्तुति करणा लगे: 38 “धन्य हो सै राजा, जडा प्रभु दे नाऐ ने ओंदा है। स्वर्ग च शांति कने अम्बरे च महिमा हो।” 39 तालू भिडा चे कितणे ही फरीसी उसयो बोलणा लगे, “गुरू जी, अपने चेलयां जो ऐ गल्लां बोलणे तांई डांट।” 40 यीशुऐ जबाब दिता, “मै तुसां ने बोलदा है, अगर ऐ लोक चुप रे, तां पथरां बोली पोंगा है।” 41 जालू यीशु यस्त्रालेम शेहरे बखे आया तां उस शेहरे जो दिखीकरी रोया। 42 कने बोलया, की तरे तांई कितणा भला होंदा, कि तू, इस रोजे तू परमेस्वर दे दिया शांतिया दियां गल्लां समझदा जडियां तिजो शान्ति दिन्दियां, पर हण सै तेरिया नजरा ला लुक्की गियां न। 43 “क्योंकि सै दिन तिजो पर ओणे न जालू तरे दुःखामणा हर तरफां ला शेहर पर हमला करणा है, कने चारो पासे ला तुहांजो देवाई देणा है। 44 तरे दुःखामणा पूरी तराह ने शेहरे जो खत्म करी देणा कने तरे सारे लोकां जो मारी देणा, कने तिजो च पथरे पर पथर भी नी छडणा है; क्योंकि तू सै मोका नी पछेणया जालू परमेस्वर तिजो बचाणे तांई

आया था।” 45 तालू सै मंदरे च जाई करी बेचणे बालयां जो बाहर कडणा लग्गा। 46 कने यीशुऐ उना जो बोलया, पबित्र शास्त्र च लिखया है की, मेरा घर प्राथना दा घर होणा, पर तुसां तां इसयो डाकुआं ला भरईयो गुफा सांई बणाई दितया है। 47 कने सै हर रोज मंदरे च उपदेश दिन्दा था: कने बड़े याजक कने यहदी व्यवस्था जो सिखाणे बालयां कने बड़े लोक उसयो मारणे दा मोका तोपदे रेंदे थे। 48 पर कोई तरिका नी तोपी सके; की ऐ कियां करणा, क्योंकि सारे लोक उसयो बड़े चाऐ ने सुणदे थे।

20 इक रोज ऐसा होया की जालू यीशु लोकां जो मंदरे च उपदेश दे दा था, कने श्रुसमाचार सृंगा दा था, तां बड़े याजक कने यहदी व्यवस्था जो सिखाणे बाले कने यहदी अगुवे यीशुऐ बाल आया। 2 कने बोलणा लगे, “सांझो दस, तू इना कम्मा जो कुस अधिकारे ने करता है, कने सै कुण है, जीनी तिजो ऐ हक दितया है?” 3 यीशुऐ उना जो जबाब दिता, “मै भी तुसां ला इक सबाल पुछदा है, मिजो दसा तां मै भी दसगा: 4 यहन्ना जो लोकां जो बपतिस्मा देणे तांई कुनी भेजया था? क्या सै परमेस्वर भेजया था या माणूऐ? मिजो दसा।” 5 तालू सै अपु चे बोलणा लगे कि अगर असां ऐ बोलया कि, “परमेस्वर जडा स्वर्ग च है उनी भेजया है, तां यीशुऐ सांझो ला पुछणा, कि तुसां यहन्ना पर भरोसा कन्नी किता?” 6 “अगर असां बोलया, माणूऐ दिया तरफा ला, तां सारे लोकां सांझो पथर मारणे, क्योंकि सारे लोक सची जाणदे न की यहन्ना सच्चा परमेस्वर दा संदेश देणेबाला था।” 7 उना जबाब दिता, “असां नी जाणदे, की सै कुसदिया तरफा ला था।” 8 यीशुऐ उना ने बोलया, “तां मै भी नी दसणा की मै ऐ कम्म कुसदे हके ने करता है।” 9 तालू यीशु लोकां जो इक कहाणी सुणाणा लग्गा, इकी माणूऐ अंगरा दा बाग लगाया, कने किसाना जो उदा ठेका देईकरी कने मतयां रोजां तांई परदेस जो चली गया। 10 फिरी जालू अंगर पक्की गे, तां उनी अपना इक नोकरे जो ठेकेदारो बाल अपना अंगरे दे बागे दा हिस्सा लोणे तांई भेजया। पर ठेकेदारो उसयो पकडया कने मारी कुटी करी बिना कुछ दितयो खाली हथ भेजी दिता। 11 फिरी मालिके इक होर नोकर भेजया, कने उना उसयो भी मारी कुटी करी कने बेजती करिके खाली हथे भेजी दिता। 12 फिरी मालिके तिजे नोकरे जो भेजया, कने उना उसयो भी मारी कुटी करी बाहर कडी दिता। 13 “तालू अंगरा दे बागे दे मालिके बोलया, मै क्या करे? मै अपने प्यारे पुत्रे जो उना बाल भेजदा है शायद सै मेरे पुत्रे दा आदर करन।” 14 जालू ठेकेदारो उसयो दिखया तां अपु चे बिचार करणा लगे, ऐ तां बारिस है; ओआ, असां इसयो मारी दिन्दे, ताकि सब कुछ साडा होई जा। 15 कने उना उसयो अंगरा दे बागे ला बार कडी करी मारी दिता: तां दाखे दे बागे दे मालिके उना सोगी क्या करणा? 16 “उनी आई करी उना ठेकेदारो दा नाश करणा, कने अंगरा दे बागे जो कुसकी होरसी जो देई देणा। ऐ सुणीकरी लोकां बोलया, हे परमेस्वर इयां मत करता।” 17 उनी उना पासे दिखीकरी बोलया, फिरी पबित्र शास्त्र च ऐ क्या लिखया है: जिसी पथरे जो राजमिस्त्रियां बेकार बोलया था, सेई कुणे दा सिरा बणया। 18 “जडा कोई उस पथरे पर पोंगा उदे टोटे-टोटे होई जाणे, कने जिदे पर सै पोंगा, उनी सै पिई देणा।” 19 तालू ही बड़े याजक कने यहदी व्यवस्था जो सिखाणे बाले यीशुऐ जो पकडना चांदे थे, क्योंकि सै समझी गे, की उनी सांझो पर ऐ कहाणी बोलियो है, पर सै लोकां ला डरदे थे। 20 सै यीशुऐ जो फसाणे दिया ताका च थे। कने उना गुत्तर भेजे, की सै धमीं दा बस बणाई करी उदी कोई गल्ल पकडन, ताकि उसयो राज्यपाल कने अधिकारियां दे हथे देई दें। 21 उना उसला ऐ पुछया, गुरू जी, असां जाणदे न की, तुसां हमेशा सच बोलंदे न कने सिखांदा भी है, कने कुसदा भी पक्षपात नी करता है; कने परमेस्वर दा रस्ता सच्चाईया ने दसदा है। 22 “इस तांई सांझो दस की महाराजा जो कर देणा ठीक है की नी?” 23 उनी उना दी चलाकी दिखीकरी उना ने बोलया, 24 इक दीनार मिजो दससा। इस पर कुसदी छाप कने न है? उना बोलया, “महाराजा दा।” 25 यीशुऐ उना ने बोलया, “तां जडा महाराजा दा है, उसयो महाराजा जो दिया कने जडा परमेस्वर दा है उसयो परमेस्वर जो दिया।” 26 सै लोका सामणे उसा गल्ला जो पकडी नी सके, कने उदे जबाबे ने हेरान होईकरी चुप होई गे। 27 फिरी सदकी जडे बोलंदे न, की मरयां दा जिन्दा होई नी, उना चे थोडयां यीशुऐ बाल आई करी पुछया। 28 गुरू जी, मुसा दिया व्यवस्था च साडे तांई ऐ लिखया है, “अगर कुसकी दा भाई अपणिया घरे वालिया दे होंदे बिना बच्चे दे मरी जा, तां उदा भाई उदिया घरे वालिया जो

ब्याई ले, कने उदे ताई बंश पैदा करे। 29 इक घरे च सत भाई थे, पेहला भाई बियाह करिके बिना ओलादी दे मरी गया। 30 तां दुपे भाईरे उसा ने ही बियाह करी लिया कने से भी बिना ओलादी मरी गया, 31 कने इयां ही तिजे भाई ने होया कने सतां भाईयां उसा ने बियाह किता कने सतो भाई बिना ओलादी मरी गे। 32 बादे च सै जनानी भी मरी गई। 33 हुण, सांझो दस सतां भाईयां उसा जनानिया ने बियाह कितया था, जालू सै मरणे दे बाद फिरी जिन्दे होंगे, तां सै जनानी कुदी घरे बालीं होणी? 34 यीशुए उना ने बोलया, इसी युगे दे लोकां च तां बियाह होदे न। (aiōn g165) 35 पर जिना लोकां इस लाइक होणा है, की उसी युगे च कने मरयां के जिन्दे होणा है, उना च बियाह नी होणे न। (aiōn g165) 36 फिरी उना मरणा भी नी; क्योंकि सै स्वर्गादूते सांई होणे, कने मरयां च जिन्दा होणे ने सै परमेश्वरे दी ओलाद होणे न। 37 पर इसा गल्ला जो की मरयो होए भी जिन्दा होई जादे न, मूसे झाडी बालिया कथा च सिखाया है, इस तांई "सै परमेश्वर जो अशहाम दा परमेश्वर, कने इसहाक दा परमेश्वर, कने याकूब दा परमेश्वर बोलदा है।" 38 "परमेश्वर तां मुर्दयां दा नी पर जिंदया दा परमेश्वर है: क्योंकि उदे तांई सारे जिंदे न।" 39 तालू ए सुणिक्की कितणयां ही व्यवस्था जो सिखाणे बालयां बोलया, "गुरू जी, तू ठीक बोलया है।" 40 कने उना जो होर कुछ पूछणे दी हिम्मत नी होई। 41 फिरी यीशुए उना ला पुछया, मसीह जो राजा दाऊदे दा बंशज कियां बोलदे न? 42 राजा दाऊदे अपु भजन संहिता दिया कताबां च बोलया है: "प्रभुए मेरे प्रभु ने बोलया, 43 तू मेरे सिंहासने दे सजे पासे बो, जालू दीकर मै तेरे बैरियां जो तेरे पैरां हेठ करी दे।" 44 "राजा दाऊद तां उसयो होए भी जिन्दा होई जादे न तां सै फिरी उदा बंशज कियां होया?" 45 जालू सारे लोक सुणने दे थे, तां यीशुए अपने चेलयां ने बोलया। 46 "व्यवस्था जो सिखाणे बालयां ला साबधान रिया, जडे लोकां जो दसणे तांई लम्बे कने मेगे कपडे पाणा पसंद करदे, कने उना जो बडा पसंद है की लोक उना जो बजारां च नमस्ते करन, कने यहूदी जंज घरां च कने खांदे बेले खास-खास आसना पर बोणा पसंद करदे न। 47 सै धोखे कने वेईमानिया ने विधवां दे घरां दी चिजां पर कब्जा करी लेंदे न। कने लोकां जो दसणे तांई बडी देरा दीकर प्राथना करदे न, परमेश्वरे ला इना जो बडी बुरी सजा मिलणी है।"

21 फिरी यीशुए मंदरे दे भंडारे दे सामणे बेईकरी अमीरां जो अपणा-अपणा दान पेटिया च पांदे दिखया। 2 इतणे च इक गरीब बिधवा आई करी दो तांबे दे सिक्के पाये, जिना दी कीमत बडी घट थी। 3 तालू उनी बोलया, मै तुसां ने सच्च बोलदा है, की इना गरीब बिधवा सबना ला बदीकरी इस भंडारे च पाया है। 4 क्योंकि सबना अपने भंडारे चे थोडा दिया दिता, पर इना गरीब बिधवा इसा बाल जितना भी था सारा ही पाई दिता है। 5 जालू कुछ चले मंदरे दे बारे च गल्लां करा दे थे, की सै कदे छेल पथरां ने कने चढाईयां चिजां ने सवारया है, तां यीशुए बोलया, 6 "सै दिन ओणे न, जिना चिजा दी तुसां बडी तीकर करा दे न, इक दिन ओणा है इना भवना दे इक भी पथरे पर पथर नी रणा है, जडा इना नी जाणा है।" 7 चेलयां यीशुए ला पुछया, "गुरू जी, सांझो दस ए सब कुछ कालू होणा है? कने जालू ए सब कुछ पूरा होणेबाला होंगा तां उदा क्या निशान होणा है?" 8 यीशुए बोलया, ध्यान रखयो की तुहांजो कोई धोखा न दे। मते सारे लोकां मेरे नाए ने दाबा करिके ओणा है। उना बोलणा है, मै मसीहा हूँ, कने ए भी बोलणा की टेम नेडे आई गिया है: तुसां उना पिच्छे मत चली जादे। 9 जालू तुसां लडाईयां, कने दंगया दियां गल्लां सुणणे तां डरी मत जांदे; क्योंकि इना दा होणा जरूरी है, पर तालू संसारे दा खात्मा नी होणा है। 10 तालू यीशुए उना ने बोलया, क्योंकि जातियां ने जातियां ने कने राज्य ने राज्यां ने इक दुजे ने लडाईयां करणियां न। 11 कने हर कुशीं हिलण होणे न कने अकाल पोणे, कने महामारियां पोणिया न, कने अम्बरे च गल्लां कने बड़े-बड़े निशान प्रगट होणे न। 12 पर इना सबना गल्लां ला पहले उना लोकां तुहांजो कैदी बनाना कने यहूदी जंज घरे च देणा कने तुहांजो मार पोणी, कने मेरिया बजा ने तुहांजो हाकिमा कने राजयां दे सामणे न्याय तांई पेश किते जाणे न, 13 पर ए तुहाडे तांई ग्वांई देणे दा मोका बणी जाणा है। 14 इस तांई सब अपने-अपणे मने च पहले ही ठाणी लिया की असां जबाब देणे दी चिंता नी करणी है। 15 क्योंकि मै तुहांजो ऐसे बोल कने दिमाग दिगा, की तुहाडे सारे बिरोधियां सामणा कने टाल्ली नी सकणा है। 16 कने तुहाडे माता-पिता कने भाई कने रिश्तेदारां, कने दोस्तां भी तुहांजो पकडाणा है; ऐथू दीकर की तुहांजो चे कितणयां जो मरवाई देणा है। 17 कने मेरे उद दे दिया बजा ला सबना लोकां तुहांजो

ने बैर करणा है। 18 पर तुहाडे सेरे दा, इक बाल भी बांका नी होणा। 19 पर जडा जिंदगी दे अंत दीकर मिजो पर भरोसा रखणा सै ही बचाया जाणा है। 20 जालू तुसां यरूशलेम जो सेना ने धरिया दिखन, तां समझी लिया की उदा बिनाश होणेबाला है। 21 यहूदिया प्रदेशे दे लोकां जो जान बचाणे तांई पहाडा जो नसणा पोणा। कने जडे यरूशलेम दे अंदर होंन सै बाहर नसी जान; कने जडे ग्रां च होंन सै उना च मत जांदे। 22 क्योंकि ए बदला लेणे दे ऐसे रोज होणे न, जिना च सारियां लिखियां होइयां गल्लां पुरियां होणियां न। 23 ए उना जनानियां तांई बडा बुरा बकत होणा जडियां लैरथियां न, कने उना जनानियां तांई जडियां नियाणे जो दूध पियादियां न। क्योंकि देशे च बडा बडा क्लेश कने इना लोकां पर बडी मुसीबत होणी है। 24 उना जो तलबारां ने मारयां जाणा है, कने केई देशां दे लोक गुलाम बनाई करी लेई जाणे न, कने जालू दीकर बाकी जातियां दा बकत पूरा नी होणा, तालू दीकर यरूशलेम बाकी जातियां दा गुलाम रेणा है। 25 कने सुरज कने चन्द्रमा कने तारयां च अनोखे निशान मिलणे न, कने धरतिया पर, देशे-देशे दे लोकां जो पेशानी होणी है; क्योंकि उना उफणदे समुद्रे दियां लेहरां ने घबराई जाणा है। 26 कने डरे दिया बजा ने कने दुनिया च ओणे बालियां घटना दी राह दिखदे-दिखदे लोकां दीया जानी च जान नी रैणी है क्योंकि अम्बरे दियां शक्तियां हिलाईयां जाणियां न। 27 तालू उना मिजो माणुए दे पुत्रे जो सामर्थ्य कने बडी महिमा दे सोगी बदले पर ओंदे दिखणा है। 28 "जालू ए गल्लां होणा लगन, तां सीधे होईकरी अपने सिरे जो उपरे उठाणा; क्योंकि तुहाडा छुटकारा नेडे होणा।" 29 यीशुए उना जो इक कहणी सुणाई, अंजरी कने सारे सखां जो दिखा। 30 जियां ही उना दियां कुम्बलियां निकलदियां न, तां तुहांजो ए दिखीकरी पता लगगी जांदा है, की गर्मियां ओणे बालियां न। 31 इयां ही जालू तुसां ए गल्लां होंदे दिखन, तां समझी लिया की परमेश्वरे दा राज्य नेडे है। 32 "मै तुसां ने सच्च बोलदा है, कि जालू दीकर ए सारियां गल्लां पुरियां नी होई जांदियां न, तालू दीकर इसा पीछिया दा अंत नी होणा है।" 33 "अम्बर कने धरती खत्म होई जाणे, पर मेरियां बोलियां गल्लां कदी नी टलनिया न, सै हमेशा रेंणियां न।" 34 इस तांई साबधान रिया, ऐसा ना हो की तुहाडे मन नशे च संसारे दियां मोहमाया च कने इसा जिन्दगिया दिया चिंता च सूस्त होई जाण, कने सै दिन तुहांजो पर फंदे सांई इकदम आई पोए। 35 क्योंकि उनी सारिया धरतिया पर रेंणेबाला पर इयां ही आई पोणा है। 36 "इस तांई जागदे रिया कने हर बेले प्राथना करदे रिया ताकि तुसा ओणे बालियां पेशानियां ला बचणे कने मिजो माणुए दे पुत्रे दे सामणे खडोणे लाइक बणन।" 37 कने सै दिने मंदरे च उपदेश करदा था; कने राती जैतून सखां दे पाहडे पर जाई करी रेंदा था। 38 कने ब्यागा उसयो सुणने तांई मंदरे च उदे बाल ओंदे थे।

22 अखमीरी रोटिया दा त्योहारे जिसयो फसह बोलदे न, नेडे ही था। 2 कने बड़े याजक कने व्यवस्था जो सिखाणे बाले इसा गल्ला दिया तोपा च थे की, उसयो कियां मारन, पर सै लोकां ला डरदे थे। 3 कने शैतान यहूदा च बडी गिया, इसयो इस्करियोती भी बोलदे न कने सै बाहरां चेलयां च इक था। 4 उनी जाई करी बड़े याजकां कने सरदारां ने गलबत किती, की उसयो कियां उना दे हथे पकडा। 5 सै खुश होए, कने उसयो पेसे देणे दा बचन दिता। 6 उनी मन्नी लिया, कने मोका तोपणा लगगा, की बिना बुरा कितयो यीशुए उना दे हथे पकडाई दे। 7 तालू अखमीरी रोटिया दे त्योहारे दा दिन आया, जिदे च फसह दे मेमने दी बलि देणा जरूरी थी। 8 कने यीशुए पतरस कने यहूना जो ए बोली करी भेजया, "जाई करी साडे खणे तांई फसह दा खणा तैयार करा।" 9 उनी यीशुए पुछया, "तू कुथ चांदा है, की असां फसह दा खणा तैयार करन?" 10 उनी अपने दो चेलयां जो ए बोली करी भेजया, की यरूशलेमे शेहरे जो जा, कने ओथू तुहांजो इक माणू घडे चुकी करी चलया मिलणा, उदे पिच्छे चली जानयो। 11 कने सै जिस घरे जो जांगा, उस घरे दे मालिके जो बोलयो: की गुरू जी ने पूछया है, की मेरा कने मेरे चेलयां दा फसह दा खणा खाने बाला कमरा कुथु है? 12 "उनी तुहांजो इक उपरे आला सजया सजाया कने तैयार कितया बडा कमरा दर्सी देणा है, कने तुसां ओथू साडे तांई तैयारी करा।" 13 उना जाई करी, जियां यीशुए उना ने बोलया था, सियुदा ही था, कने उना उसा जगा फसह दा खणा तैयार किता। 14 जालू बकत होया, तां यीशू बारह प्रेरितां सोगी रोटी खणा बैठा। 15 कने यीशुए उना ने बोलया, "की मिजो बडी इच्छा थी, की दुख भोगणे कने मरणे ला पेहले फसह दे त्योहारे दा खणा तुहाडे सोगी ख। 16" क्योंकि मै तुसां ने बोलदा है, की जालू

दीकर सै परमेस्वरे दे राज्य च पूरा नी होगा तालू दीकर मैं फूसह दे त्योहारे दा खाणा दुबारा नी खाणा।” 17 तालू उनी अंगर दे रस दा कटोरा लेईकरी परमेस्वरे दा धन्याबाद किता कने बोलया, “इसयो लिया कने अपु चे बंडी करी पी लिया। 18 क्योंकि मैं तुसां ने बोलदा है, की जालू दीकर परमेस्वरे दा राज्य नी ओगा तालू दीकर मैं अंगरा दा रस कदी नी पिंगा।” 19 फिरी उनी रोटी लेई, कने धन्याबाद करिके तोड़ी, कने उना जो ऐ बोली करी दिती, ऐ मेरा शरीर है, जडी तुहाड़े तांई दितया जांदा है: मिंजो याद करणे तांई ऐई करा-करा। 20 इया ही उनी खाणां खाणे बाद कटोरा भी ऐ बोलदे दिता, ऐ अंगर दे रसे दा कटोरा मेरे उस खूने च नोई बाचा है जडा तुहाड़े तांई भाया जाणा है। 21 पर दिखा, मिंजो पकड़वाणे बाले दा हथ मेरे सोगी मेरिया थालिया च है। 22 “क्योंकि मिंजो, माणुए दे पुत्रे दा जियां उदे तांई तय है तियां करदा है, पर हाय उस माणुए पर, जिसदिखा बजा ने पकड़ाया जांदा है।” 23 तालू सै अपु चे बोलाणा लगे की, “असां चे कुण है, जडा ऐ कम्म करणा?” 24 उना चे ऐ भी बेहस होई की, सांझो चे कुण बडा समझया जांदा है? 25 यीशुए उना ने बोलया, बाकी जातियां दे राजे उना पर प्रभुता करदे न; जडे उना पर हक रखदे न, उना जो उपकारक बोलदे न। 26 पर तुसां ऐ दे मत बणदे; नितां जडा तुसां चे बडा है, सै छोट्टे दे बराबर कने जडा सबते बड़ा है सै सेबक दे बराबर बणे। 27 क्योंकि बडा कुण है; सै जडा रोटी खाणां बैठया या सै जडा सेवा करदा है? क्या सै नी जडा रोटीया खाणां बैठया है? पर मैं तुहाड़े बिच सेवके सांई है। 28 पर तुसां ही न, जडे मेरियां पुरिशां च लगातार मेरे सोगी रे; 29 कने जियां मेरे पिता मिंजो तांई इक राज्य दितया है, तियां ही मैं भी तुहाड़े तांई राज्य दिन्दा है। 30 ताकि तुसां मेरे राज्य च मेरिया मेजा पर खा पिया; कने सिंहसनां पर बेईकरी झ्माएले देशे दे बाहरां गोत्रों दे लोकां दा न्याय करा। 31 “शमौन, हे शमौन, दिख, शैताने तुसां लोकां जो परखणे तांई परमेस्वर ला आज्ञा मंगी लियो है, कि भलाई जो बुराई ला बख करणा जियां किसान कणका ला भुए जो बख करदा है। 32 पर मैं तैरे तांई परमेस्वरे ला प्रार्थना किती है, की तेरा भरोसा मिंजो ला नी जा: कने जालू तु पञ्चाताप करें, तां अपने भाईयां जो भी मिंजो पर भरोसा करणे तांई मजबूत करें।” 33 परतसे यीशुए बोलया, “प्रभु जी, मैं तैरे सोगी जेला जाणे कने मरणे जो भी तैयार है।” 34 पर यीशुए बोलया, “हे परतस मैं तिजो ने बोलदा है, की अज मुर्गे तालू दीकर बांग नी देणी जालू दीकर तू तिन्न बरी मिंजो पछेणने ला मना करी बोणा है।” 35 कने यीशुए उना ने बोलया, “जालू मैं तुहांजो बटुए, कने झोली, कने जुते बिना श्भसमाचार प्रचार करणे भेजया था, तां क्या तुहांजो कुसा भी चिजा दी कमी होई थी?” उना बोलया, “नी होई कुसा भी चिजा दी।” 36 उनी उना ने बोलया, “पर हण लोक साडे खिलाफ न हण जिसदे बाल बटुआ है सै उसयो लेई ले, कने तियां ही झोली भी, कने जिसदे बाल तलबार नी है सै बाहरे दे कपडे बेची करी खरीदी ले।” 37 क्योंकि मैं तुसां ने बोलदा है, की ऐ जडा पबित्र शास्त्र च लिखया है सै पूरा हो की, “सै अपराधियां सांई मनया गिया है, उदा पूरा होणा जरूरी है: क्योंकि मेरे बारे जडियां गल्लां लिखियां न सै पुरियां होंगे बालियां न।” 38 चेलयां बोलया, “प्रभु जी, दिख, ऐथू दो तलबारां न।” यीशुए उना ने बोलया, “बतेरियां न।” 39 तालू सै बाहर निकली करी रोजे सांई जैतन रूखां दे पाहडे पर गिया, कने चले उदे पिच्छे गे। 40 उसा जगा पर पुज्जी करी यीशुए उना ने बोलया, “प्रार्थना करा, की तुसां दी परख ना होए।” 41 फिरी यीशु थोडा अगे गिया, कने गोडे भार बेईकरी प्रार्थना करणा लग्गा, 42 “पिता जी अगर तू चा तां इस कटोरे जो बखे ला हटाई ले, पर तमी मेरी नी पर तेरी इच्छा पूरी हो।” 43 तालू स्वर्ग दे इक स्वर्गदूते आथु प्रगत होया जडा उसयो सामर्थ्य दिन्दा था। 44 कने सै बडा परेशान कने व्याकुल होईकरी कने दूखे ने प्रार्थना करणा लग्गा; कने उदा पसीना मना की खूने दियां बडियां-बडियां बूदा सांई धरतिया पर पोआ था। 45 तालू सै प्रार्थना ला उठया कने अपने चेलयां बखे आई करी उना जो उदासिया दे मारयो सुनया दिखया। 46 कने उना ने बोलया, “कजो सोआ दे न? उठा, प्रार्थना करा, की तुहाड़ी परख ना होए।” 47 जालू यीशु ए बोला दा ही था, की दिखा मते सारे लोक आरे, यहदा जडा बाहरां चेलयां चे इक था सै अगो-अगो ओआ दा था, सै यीशुए दे बखे आया, ताकि उदा चूमा लेई सके। 48 यीशुए उसयो बोलया, “हे यहदा, क्या तू चूमा लेईकरी मिंजो, माणुए दे पुत्रे जो पकड़वा दा है?” 49 उदे साथियां जालू दिखया की क्या होणे वाला है, तां बोलया, “प्रभु जी, क्या असां तलबार चलान?” 50 कने चेलयां चे इकी महायाजके दे नोकरे पर तलबार चलाई करी उदा सजा कन उडाई दिता। 51 इस

पर यीशुए बोलया, “हूण बस करा।” कने उदा कन छुई करी उसयो ठीक किता। 52 तालू यीशुए बड़े याजकां कने मंदरे दे रखलायां दे अगुवां कने यहदी अगुवां जो बोलया, तुसां क्या तलबारां कने डांगा लेईकरी मिंजो डाकुआं सांई पकड़ना आयो न। 53 “मैं जालू हर रोज मंदरे च बेईकरी उपदेश दिन्दा था, तालू तां तुसां मिंजो नी पकड़या; पर ऐ तुहाडा बकत है, कने नेहेरे दा हक है।” 54 फिरी सै उसयो पकड़ी करी लेई चले, कने महायाजक दे घरे जो लेई आये कने परतस दूरे-दूरे ला ही उना दे पिच्छे चलया था। 55 कने जालू सै अंगणे च अग वाल्ली करी गिठे बैठे, तां परतस भी उना दे बिच बेई गिया। 56 कने इक दासिया उसयो अग्गी दी लौई च बैठया दिखीकरी कने उदे पासे दिखीकरी बोलाणा लगी, “ऐ भी तां यीशुए सोगी था।” 57 पर परतसे ऐ बोली करी मना किता, “मैं इसयो नी जाणदा। 58 थोड़ी देरा बाद फिरी कुनकी होरनी उसयो दिखीकरी बोलया, “तू भी तां उना चे है।” परतसे बोलया, “सै माणू मैं नी है।” 59 कोई इक घंटे बाद इक होर माणू बोलाणा लग्गा, “पक्का ऐ भी उना सोगी ही था; क्योंकि ऐ भी गलीली है।” 60 परतसे बोलया, “मिंजो नी पता की ऐ क्या बोला दा है?” परतसे दे इयां बोलदे ही, मुर्गे झट बांग देई दिती। 61 तालू प्रभु यीशुए मुडी करी परतसे पासे दिखया, कने परतसे जो सै गल्ल याद आई जडी उनी बोलियो थी, “अज मुर्गे जो बांग देंगे ला पहेले, तू तिन्न बरी मिंजो मना करणा है।” 62 कने परतस बाहर निकली करी बडा भरी रोणा लग्गा। 63 जिना माणूआं यीशुए जो पकड़या था, सै उदा मजाक उडाई करी उसयो कुटणा लगे; 64 कने उदियां हखी पर पटी बन्नी करी पुछया, “अगर तू परमेस्वरे दा संदेश देणेबाला है! तां सांझो दस कुनी तिजो मारया।” 65 कने उना होर भी बुरियां गल्लां उदे बारे च बोलियां। 66 जालू ब्याग होई तां यहदी अगुवां कने बड़े याजक कने व्यवस्था जो सिखाणे बाले गिठे होए, कने उसयो अपणिया महासभा च आंणी करी पुछया, 67 अगर तू मसीह है, तां सांझो ने बोली दे। यीशुए उना ने बोलया, “अगर मैं तुहांजो ने बोले तां तुसां मनणा नी। 68 अगर मैं कोई सबाल पूछां, तां तुसां जबाब नी देणा। 69 पर हणे ला मैं, माणुए दे पुत्रे सबते शक्तिशाली परमेस्वरे दे सजे पासे बेई रेणा।” 70 इस पर सारयां बोलया, “तां तू क्या परमेस्वरे दा पुत्र है?” यीशुए उना ने बोलया, “तुसां अपु ही बोलदे न, क्योंकि मैं है।” 71 तालू उना बोलया, “हण सांझो गबाई दी क्या जरूरत है क्योंकि असां अपु ही इदे मुए ला सुणी लिया है।”

23 तालू सारी सभा उठी करी उसयो पिलातस बाल लेई गईं। 2 कने सै ऐ बोली करी उस पर दोष लगाणा लगे, “असां इसयो साडे लोकां जो बेहकादे कने महाराजा जो कर देंगे ला मना करदे, कने अपने आपे जो मसीह, कने राजा बोलदे सुणया है।” 3 पिलातुसे उसला पुछया, “क्या तू यहदियां दा राजा है?” उनी उसयो जबाब दिता, “तू अपु ही बोला दा है।” 4 तालू पिलातुसे बड़े याजकां कने लोकां ने बोलया, “मिंजो इस माणुए च कोई दोष नी मिलदा है।” 5 पर सै होर भी दबाब पाई करी जोरे ने बोलाणा लगे, “यहदिया प्रदेशे दे सारे लोकां च इदिया शिक्षा दिया बजा ने दंगे हो दे न, कने गलील प्रदेश च भी इयां ही किता कने हण ऐथू आई गिया है।” 6 ऐ सुणीकरी पिलातुसे पुछया, “क्या ऐ माणू गलील प्रदेश दा रेणे बाला है?” 7 कने ऐ जाणी करी की सै उस प्रदेश दा है जिथू राजा हेरोदेस राज करदा है, तां उसयो हेरोदेसे बाल भेजी दिता, क्योंकि उना दिना राजा हेरोदेस भी यरूशलेम च था। 8 हेरोदेस यीशुए जो दिखीकरी बडा खुश होया, क्योंकि सै उसयो बड़े रोजां ला दिखणा चांदा था: उनी उदे बारे च सुणया था, कने हेरोदेस यीशुए ला कुछ चमत्कार दिखणे दी आस रखदा थी। 9 सै उसला मतियां गल्लां पुछदा रिया, पर उनी उना दा कोई भी जबाब नी दिता। 10 कने बड़े याजक कने व्यवस्था जो सिखाणे बाले खडोई करी पुरे जोर शोर लाईकरी उस पर दोष लांदे रे। 11 तालू राजा हेरोदेसे अपणे सिपाइयां सोगी उदी बेजती करिके उदा मजाक उडाया, कने चटकिले कपडे पेहनाई करी उसयो पिलातुस बाल बापस भेजी दिता। 12 उस बकते दीकर पिलातुस कने हेरोदेस इकी दुपे दे दुशमण थे, पर दोनो उसी रोजे मित्र बणी गे। 13 पिलातुसे बड़े याजकां कने सदारां कने लोकां जो सदीकरी बोलया, 14 तुसां इस माणुए जो मेरे बाल लेई आये कने बोलया की दंगा करणे तांई लोकां जो भटकंदा था। पर दिखा, मैं तुहाड़े सामणे इसदी जाँच किती, पर जिना गल्लां दा तुसां इदे पर दोष लागे दे न, मिंजो उना गल्लां दे बारे च उदे च कोई भी दोष नी मिल्ला है; 15 कने ना ही हेरोदेसे उस पर कोई दोष लाया, क्योंकि उनी इसयो साडे बाल बापस भेजी दितया है क्योंकि इनी माणुए ऐसा कुछ नी कितया की इसयो मौत दी सजा मिल्ले। 16 “इस तांई मैं इसयो कोडे मरवाई

करी छडी देणा है।” 17 पिलातुस फसह दे त्योहारे दे बेले उा दे इकी केदिये जो छडी दिन्दा था। 18 तालू सारे मिली करी बोलणा लग्गे, इसयो मौदी ती सजा दिया, कने साडे ताई बरअब्बा जो छडी दे। 19 सै कुसकी दंगे दिया बजा ने जडा शेहे च होया था, कने हत्या दिया बजा ने जेला च पाया था। 20 पर पिलातुसे यीशुए जो छडणे दिया इच्छा ने लोका जो फिरी समझाया। 21 पर सै जौरे-जौरे ने बोलणा लग्गे, “इसयो सूली पर चढाई दिया। इसयो सूली पर चढाई दिया!” 22 उनी तिजी बार फिरी बोलया, “कजो उनी क्या बुरा कितया है? पर मिजो इदे च मौत दी सजा देणे जोगी कोई गल्ल नी मिल्ला दी है, मै इसयो मारी कुटी करी छडी देणा है।” 23 पर सै चिलाई-चिलाई करी पिच्छे ही पेई है, की इसयो सूली पर चढाई दिया, कने सै होर जौरे-जौरे ने बोलणा लग्गे। 24 पिलातुसे हुकम दिता, की इना दिया बिनतिया दे अनुसारा है। 25 कने उनी उस माणुए जो जडा दंगे कने हत्या दिया बजा ने जेला च था, जिसयो सै मंगदे थे, छडी दिता; कने यीशुए जो उना दिया इच्छा अनुसारा उना जो देई दिता। 26 जालू सिपाई यीशुए जो लेई चलयो थे, तां उना शमौन नापे दे इक कुरेनी जो जडा गांए ला ओआ दा था, उसयो पकडी करी उस पर सूली लदी दिती ताकि उसयो यीशुए दे पिच्छे-पिच्छे लेई चले। 27 कने लोका दी बडी बडी भीड उना दे पिच्छे चली पेई, कने उना चे जनानिया भी मतियां थियां, जडियां उदे ताई छातिया पिटी करी रोआ दियां थियां। 28 यीशुए उना पासे मुडी करी बोलया, “हे यरूशलेम शेहे दियां कुडियो, मेरे ताई मत रोआ; पर अपने ताई कने अपने बचयां ताई रोआ।” 29 क्योकि दिखा, सै दिन दुख भरे दिन ओणे न, जिना च लोकां बोलणा है, “थयन न सै जनानियां जिना दे कदी बच्चे नी थे, कने जिना कदी बच्चे जम्मे नी, जिना ना कदी उना जो दूध पियाया।” 30 उस बेले, उना लोकां पहाडा ने बोलणा लगणा है, की सांझो पर पेई जा, कने पहाडियां ने की सांझो ढकी लिया। 31 “क्योकि अगर सै मिजो इस तरीके ने मारदे न जडा हरे सखे सांई है, तां जडे लोक सुके सखे सांई न उना ने क्या कुछ नी करणा।” 32 सै होर दो माणुआं जो यीशुए सोगी मारणे तां लेई चले जिना बुरे कम्म कितयो थे। 33 जालू सै उसा जगा पर पुज्जे जिना जो खोपडी बोलदे न, तां उना ओथु उसयो कने उना दो बुरे कम्म करणे बालयां जो भी इकी जो सजे पासे कने दुज्जे जो खबे पासे सूली पर लटकाया। 34 तालू यीशुए बोलया, “हे पिता, इना जो माफ कर, क्योकि ऐ जाणदे नी न की ऐ क्या करा दे न?” कने उना पर्वियां पाई करी उदे कपडे बंडी ले। 35 लोक खडोई करी दिखणे दे थे, कने सरदार भी मजाक करिके बोलदे थे, इनी होरां जो बचाया, अगर ऐ परमेश्वरे दा मसीह है, कने उदा चुण्यां होया है, तां अपने आपे जो बचाई ले। 36 सिपाई भी बखे आई करी यीशुए जो पिणे तांई सिरका देई करी उदा मजाक करिके बोलदे थे। 37 “अगर तू यहूदियां दा राजा है, तां अपने आपे जो बचा।” 38 कने उदे उपर इक दोष पत्र भी लाया था। “ऐ यहूदियां दा राजा है।” 39 जडे बुरे कम्म करणे बाले यीशुए सोगी लटकाये थे, उना चे इकी निदा करिके बोलया, “क्या तू मसीह नी है? तां फिरी अपने आपे जो कने सांझो बचा।” 40 इसा गल्लां पर दुज्जे उसयो डांटया, “क्या तू परमेश्वरे ला भी नी उरदा है?” तिजो भी तां से ही सजा मिलियो है, 41 “कने सांझो तां न्याय दे अनुसारा सजा मिलियो है, क्योकि सांझो तां अपने कम्मा दा ठीक फल मिला दा है; पर इनी तां कोई गलत कम्म नी कितया है।” 42 तालू उनी बोलया, “यीशु जी, जालू तू अपने राज्य च राजा होई करी ओगा, तां मिजो याद रखयां।” 43 यीशुए उसला बोलया, “मै तिजो ने सच्च बोलदा है की अज ही तू भरे सोगी स्वर्गलोक च होणा है।” 44 कने लगभग दोपहर ला लेई करी तिन्न बजे दीकर सारे देशे च नेहेरा रिया, 45 कने सूरजे दी लोओ चली गई, कने मंदरे दा मोटा परदा बिचे ला फटी करी दो टुकडे होई गया, 46 कने यीशुए जौरे ने बोलया, “पिता, मै अपनी आत्मा तेरे हथां च दिन्दा है।” ऐ बोलती करी अपने प्राण छडी दिते। 47 सबदेरों जडा कुछ होया था दिखी करी परमेश्वरे दी बडाई किती, कने बोलया, पर ए के कोई धर्मी माणु था। 48 भीड जडी ऐ दिखणे तांई गिटी होईयो थी, इसा घटना जो दिखी करी छातियां पिटदे होए अपने घरां जो बापस चली गई। 49 कने यीशुए दे सारे जाणने पछेणने बाले मित्र, कने जडियां जनानिया गलील प्रदेश ला उदे सोगी आईयां थियां, दूर खडोई करी जडा कुछ होया था सारा कुछ दिखा दियां थियां। 50 कने ओथु यसुफ नापे दा इक माणु था सै महासभा दा सदस्य था कने सज्जन कने धर्मी था। 51 कने सै यहूदी अणुवां दे बिचारां कने उना दे कम्मा ला खुश नी था; कने सै यहूदियां दे शेहर अरिमतिया शेहे दा रहेणे बाला कने परमेश्वरे दे राज्य दी नियाल्ल रखणे बाला था। 52 उनी पिलातुस दे बाल जाई

करी यीशुए दी लाश मंगी, 53 कने लाशा जो सूली ला उतारी करी मलमेले दिया चादरा च लोटया, कने उसयो इक कबरा च रखया, जडी पथरे च खणियो थी; कने उसा च कदी भी कोई नी रखया था। 54 सै रोज शुक्रवार था, जडा तैयारी वाला दिन था कने सब्दे दा रोज शुरू होणेबाला था। 55 कने उना जनानियां जडियां उदे सोगी गलील प्रदेशे ला आईयां थियां, पिच्छे-पिच्छे जाई करी कबर दिखी कने ऐ भी की उदी लाश कियां रखी है। 56 कने अपने घरां जो बापस आई करी उना सुगंध बालियां चिजां कने इत्र यीशुए दिया लाशा पर मलणे तांई तैयार किता; कने सब्दे दे रोजे उना मुसा दिया व्यवस्था दे अनुसारा अराम किता।

24 पर हन्ते दे पेहले रोजे सै बडी ब्यागा ही उना सुगंधित चिजां जो जडियां उना तैयार कितियां थियां, लेई करी कबरां पर आईयां। 2 कने उना दिखया की कबरा दे दरबाजे ला पथर पेहले ला ही हत्या होया है, 3 कने सै अंदर गियां कने दिखया पर यीशुए दी लाश ओथु नी थी। 4 जालू सै इसा गल्ला ने हेरान थियां तां दिखा, दो माणु चिट्टे चमकीले कपडे पायो उना बखे खडोयो थे। 5 जालू सै डरी गियां, कने उना मु धरतिया पासे हेठ करी दिते; तां उना स्वर्गदूतां जनानिया ने बोलया, “तुसां जिन्द्या जो मरयां चे कजो तोपदे न?” 6 “सै ऐथु नी है, पर जिन्दा होई गया है। याद कर उनी गलील प्रदेशे च रंटे बेले तुसां ने बोलया था, 7 की जरूरी है, की मै, माणुए दा पुत्र पापियां दे हथे पकडया जा, कने सूली पर चडाया जाए, कने तिजे दिने मरयां चे जिन्दा होई जाए।” 8 तालू यीशुए दियां गल्लां उना जो याद आईयां। 9 कने कबरा ला बापस आई करी उना गयारां चेलयां जो, कने बाकियां सबना जो, ऐ सारियां गल्लां सुणाई दीतियां। 10 जिना प्रेरिता ऐ गल्लां बोलियां, सै मरियम मगदलीनी कने योअन्ना कने याकूबे दी मां मरियम कने उना सोगी दियां सारियां जनानिया भी थियां। 11 पर उना दियां गल्लां उना जो कहाणियां सांई लगियां, कने चेलयां उना दा भरोसा नी किता। 12 तालू पतरस उटी करी होई करी यीशुए दिया कबरा पर गिया, कने निठे होई करी अंदर दिखया ओथु उनी सिर्फ बस कपडे पियो दिखे, कने जडा होया उसला हेरान होई करी बापस घरे चली गिया। 13 उसी रोजे यीशु दे दो चले इम्माऊस नापे दे इक गांए जो चलयो थे, जडा यरूशलेम शेहे ला कोई गयारा किलो मीटर दूर था। 14 कने सै इना सारियां गल्लां पर अपु चे गल्ल बात करा दे थे, जडियां होईयां थियां। 15 कने सै जालू अपु चे गल्ल बात कने पछताछ करा दे थे, तां यीशु अपु आई करी उना सोगी चलणा लग्गा। 16 पर परमेश्वरे उना जो यीशुए जो पछेणने ला रोकी रखया था, ताकि सै उसयो पछेणी नी सकन। 17 तालू यीशुए उना ने पुछया, “ऐ क्या गल्लां न, जडियां तुसां चलदे-चलदे अपु चे करा दे न?” सै स्क्री गे कने उना दे मु बडे उदास लग्गा दे थे। 18 ऐ सुणी करी, उना चे क्रिसपुसना नापे दे इकी माणुए बोलया, “शावद तू यरूशलेम च किल्ला ही परदेसी है; की जिसयो पता नी है की, पिछले इना रोजां च ऐथु क्या-क्या होया है?” 19 यीशु उना ला पुछया, “क्या-क्या होया है?” उना उसला बोलया, नासरत गां दे यीशु दे बारे च जडा असल च परमेश्वरे कने सारे लोका दे बखे कम्म कने बचन च सामर्थी परमेश्वरे दा संदेश देणेबाला था। 20 बुहे याजकां कने साडे सरदारां उसयो पकडाई दिता, की उसयो मारणे दा हुकम दिता; कने उसयो सूली पर चढाई दिता। 21 पर सांझो आस थी, की इनी ही इष्राएल देशे दे लोकां जो रोम देश ला छुटकारा देणा, कने इना सारियां गल्लां दे सिवा इसा गल्लां जो अज जिता दिन होई गया। 22 कने हण केई जनानिया सांझो हेरानिया च पाई दिता है, जडियां अज ब्यागा कबरा पर गियां थियां। 23 कने जालू उना जो उदी लाश नी मिलली, तां ऐ बोलदियां आईयां, की असां जो स्वर्गदूतां दे दर्शन होए, उना बोलया की यीशु जिन्दा है। 24 “तालू साडे सथियां चे केई कबरा पर गे कने जियां उना जनानिया बोलया था, तियां ही ओथु था; पर यीशुए जो उना नी दिखया।” 25 तालू यीशुए उना दोनो चेलयां ने बोलया, “हे मुखौं, जडा कुछ परमेश्वरे दा संदेश देणेबालयां दिया कताबां च लिखया है तुसां लोकां जो इना सारियां गल्लां पर भरोसा करणा बडा कठिन लगदा है।” 26 “ऐ जरूरी था, की मसीह ऐ सारे दुख झेले कने फिरी करी अपणिया महिमा च प्रवेश करे।” 27 तालू यीशुए उना जो पुरे पबित्र शाब्दां चे, उनी मुसा ला शुरू करिके सारे परमेश्वरे दा संदेश देणेबालयां जितणियां गल्लां उदे बारे च बोलियां दियां, सै उना जो समजाइयां। 28 जडियां चे सै उस गांए बखे पुज्जे, जिथु सै चलयो थे, कने यीशुए दे व्यवहारे जो दिखी करी ऐसा लग्गा था, की सै चेलयां ला अगगे बढणा चांदा है। 29 पर उना ऐ बोली करी उसयो रोकया, “साडे सोगी रे; क्योकि संज होई चलियो है, कने दिन बडा डली गया है।” तालू सै उना

सोर्गी रेहणे ताई अंदर गिया। 30 जालू यीशु उना सोर्गी रोटी खाणां बैठा, तां उनी रोटी लेईकरी धन्यवाद किता, उसा जो तोडीं करी उना जो देणा लग्गा। 31 तालू उना दियां हखी खुली गियां; कने उना उसयो पछेणी लिया, कने सै उना दी हखी अगो ला गायब होई गिया। 32 उना अपु चे बोलया, “जालू सै रस्ते च सांझो ने गल्लां करा दा था, कने सांझो पबित्र शाब्बां दा मतलब समझा दा था, तां क्या साडे मना च उतेजना नी जागी?” 33 सै उसी बेले उठी करी यरूशलेम शेहरे जो बापस चली गे, कने उना गयारां चेलयां कने उदे साथियां जो गिठे दिखया। 34 जडे गिठे होयो थे सै ऐ बोला दे थे, “प्रभु सची जिन्दा होई गिया है, कने शमौने जो मिलया है।” 35 तालू उना रस्ते दियां गल्लां उना जो दसियां कने ऐ भी बोलया की जालू सै रोटी तोडा दा था तां उना उसयो पछेणी लिया की सै यीशु है। 36 सै ऐ गल्लां करा दे ही थे, की यीशु अपु ही उना बिच प्रकट हुआ; कने उना ने बोलया, “तुहांजो शांति मिल्ले।” 37 पर सै घबराई गे, कने डरी गे, कने सोचणा लग्गे की असां भूते जो दिखा दे न। 38 यीशुऐ उना ने बोलया, कजो घबरा दे न? कने तुहाडे मने च कजो शक होंदा है? 39 “मेरे हथ कने पैरां जो दिखा, की मैं सै ही है, मिंजो छुई करी दिखा; कयोकि भुत दी हड्डी कने मास नी होंदा है जियां मिंजो च दिखदे न।” 40 ऐ बोली करी उनी उना जो अपने हथ पैर दस्से। 41 जालू खुशिया दे मारे उना जो भरोसा नी होया की यीशु जिन्दा है, कने हेरान होआ दे थे, तां यीशुऐ उना ला पुछया, “क्या ऐथू तुहाडे बाल कुछ खाणे जो है?” 42 उना उसयो भुनियो मछिया दा टुकडा दिता। 43 यीशुऐ सै मछिया दा टुकडा लेईकरी उना दे सामणे खादा। 44 फिरी यीशुऐ उना ने बोलया, “ऐ मेरियां सै गल्लां न, जडियां मैं तुहाडे सोर्गी रेईकरी तुहांजो ने बोलियां थियां, की जरूरी हे, की जितणियां गल्लां मुसा दिया व्यवस्था कने परमेव्हेरे दा संदेश देणेबालयां कने भजना दियां कताबां च मेरे बारे च लिखियां न, सै सारियां सच्च साबित होन।” 45 तालू यीशुऐ उना जो पबित्र शाब्ब समझणे ताई मदद किती। 46 कने उना ने बोलया, की पबित्र शाब्बां च ऐसा लिखया है की मसीह जो दुख झेलणे न, कने तिजे दिने मरयां चे जिन्दा होई जाणा है, 47 कने यरूशलेम शेहरे ला लेईकरी सारियां जातियां दे पापां दी माफी ताई श्भसमाचार दा प्रचार उदे नाणे ने होणा है। 48 “तुसां इना सारियां गल्लां दे गबाह न। 49 कने मैं अपु तुहांजो पर पबित्र आत्मा जो भेजणा है, जिसदा बायदा मेरे पिता कितया है। तालू दीकर शेहरे च इतंजार करणा होणा जालू दीकर तुहांजो स्वर्ग ला सामर्थ्य नी मिलदी।” 50 तालू सै उना जो बैतनिय्याह गाए दीकर शेहर ला बाहर लेई गिया, कने उना जो हथ चूकी करी आशीष दिती; 51 कने उना आशीष दिन्दे ही उना ला लग होई गिया कने स्वर्ग जो चली गिया। 52 कने सै उसयो टण्डवत करिके बडिया खुशिया ने यरूशलेम शेहरे जो बापस चली गे। 53 कने सै लगातार मंदरे च जाई करी परमेव्हेरे दी स्तुति करदे थे।

यूहन्ना

1 इस सारे संसारे दे बणने ला पहले बचन था, कने बचन परमेश्वरे सोगी था कने सै बचन परमेश्वर था। 2 बचन इस सारे संसारे दे बणने ला पहले ला ही परमेश्वरे सोगी था। 3 परमेश्वरे सारा कुछ उसी बचन ने ही बणाया है कने जडा कुछ भी बणाया है इदे चे कोई ही चीज बचन बिना नी बणियो है। 4 साडी शारीरिक कने आत्मिक जिन्दगी उना च ही थी, कने सै जिन्दगी सारे लोकां जो लौ दिन्दी जोत थी। 5 कने लौ नेहेरे च चमकदी है; कने नेहरा उसा लौइ जो बुझाई नी सकया। 6 परमेश्वरे यूहन्ना नाए दे इक माणुए जो भेजया। 7 सै लौइ दे बारे च दसणे तांई आया था ताकि सारे लोक उदे जरिये उसा जोती पर भरोसा करन। 8 यूहन्ना अपु तां सै लौ नी था, पर सै उसा लौ दी गबाई देणा आया था। 9 “सै जडी सच्ची लौ है” जडी हर इक माणुए जो लौ करदी है, सै संसार च ओणे बाली थी। 10 सै संसार च था, कने संसार उदे ने पैदा होया है, कने संसारे दे लोकां उसयो नी पछेणया। 11 सै अपने लोकां च आया पर उसयो उदे अपने लोकां नी अपनया। 12 पर जितणया उसयो अपनया, उनी उना जो परमेश्वरे दी ओलाद होणे दा हक दिता, मतलब लौ सै जडे उस पर भरोसा रखे नः 13 सै ना तां माता-पिता दी इच्छा ला, कने ना तां माणुए दिया इच्छा ने, ना शरिर दिया इच्छा ने, ना इक माणुए दिया ओलाद दी इच्छा ने, पर परमेश्वरे ला पैदा होया है। 14 कने बचन इक माणु बणया कने असां लोकां बिच रिया, कने असां उदी ऐसी महिमा दिखी, जदेई पिता दे इकलोते दी महिमा। जो पिता परमेश्वरे ला सचाइया कने अनुग्रह ने भरपूर होईकरी आया। 15 यूहन्ना उदे बारे च गबाई दिती, कने पुकारी करी बोलया, की ए सेई है, जिदे बारे च मैं बोलया था, की उनी मेरे बाद ओणा है, सै मिंजो ला भी बदीकरी है, क्योकि सै मिंजो ला पहले इस संसारे के मोजूद था। 16 क्योकि उदी परीपूर्णता ने सांझो सारयां जो मिलया है मतलब अनुग्रह पर अनुग्रह। 17 व्यवस्था तां मूसा ने दितियो है, पर परमेश्वरे यीशु मसीह दे जरिये अनुग्रह कने सचाई दर्सी। 18 परमेश्वरे जो कुनी भी कदी नी दिखया है, सिर्फ उदे इकलोते पुत्रे जडा असल च परमेश्वर है, कने पिता परमेश्वर दे सबते नेडे है, उनी सांझो दसया है, की परमेश्वर कदिया है। 19 यूहन्ना दी गबाई ए है, की जालू यहूदी अगुवां यस्-शलेम शेहेरे ला याजकां कने लेबियां जो उसला ए पुछणे तांई भेजया, “तू कुण है?” 20 यूहन्ना उना जो साफ-साफ बोलया, “मैं मसीह नी है।” 21 तालू उना उसला पुछया, “तां फिरी कुण है? क्या तू परमेश्वरे दा संदेश देणेबाला एलिथ्याह है?” उनी बोलया मैं नी है। तां क्या तू सै परमेश्वरे दा संदेश देणेबाला है जिसदा पिता परमेश्वरे बायदा कितया था? उनी जबाब दिता की, “नी।” 22 तालू उना यूहन्ना ला पुछया, “तां फिरी है क्या तू कित असां अपने भेजणे बालयां जो जबाब देई सकन। तू अपने बारे च क्या बोलदा है?” 23 उनी बोलया, “जियां यशायाह परमेश्वरे दा संदेश देणेबाला बोलया है, की मैं सुनसान जगा च इक हक पाणे बाले दी अबाज है की तुसां प्रभुए दा रस्ता सीधा करा।” 24 ए लोक फरीसियां दे पासे ला भेजयो थे। 25 उना उसला ए सबाल पुछया, की अगर तू मसीह नी है, कने ना एलिथ्याह है, कने ना ही सै परमेश्वरे दा संदेश देणेबाला है जडा ओणे बाला था, तां फिरी तू बपतिस्मा कजो दिन्दा है? 26 यूहन्ना उना जो जबाब दिता, की मैं तां पाणिणे ने बपतिस्मा दिन्दा है, पर तुहाडे बिच इक माणु खडोतया है, जिसयो तुसां नी जाणने न। 27 मतलब की मेरे बाद ओणे बाला है, मैं तां उदे जुतयां दे तस्मे खोलणे दे कार्बाल नी है। 28 ए गल्लां परदने खडु दे पार बैतनिय्याह शेहर च होईयां, जिथू यूहन्ना लोकां जो बपतिस्मा दिन्दा था। 29 यूहन्ने दुज्जे रोजे यीशुए जो अपने पासे ओंदे दिखीकरी बोलया, “दिखा, ए परमेश्वरे दा मेमना है, जिनी संसारे दे पाप चुकी लेई जाणे न। 30 ए सेई है जिदे बारे च मैं बोलया था, की इकी माणुए मेरे पिच्छे ओणा है, सै मिंजो ला भी बडा है, क्योकि सै मिंजो ला भी पहले था। 31 कने मैं उसयो पछेणदा नी था की सै मसीह था, इस्राएल देश दे लोकां जो ए दसणे तांई की सै कुण है, तां मैं पाणिणे ने बपतिस्मा दिन्दा आया।” 32 कने यूहन्ने ए गबाई दिती की, मैं पबित्र आत्मा जो कबूतरे सांई स्वर्ग ला उतरदे दिखया है, कने सै उस पर स्की गई। 33 पर तां उसयो पछेणदा नी था सै मसीह था, पर जिनी मिंजो पाणिणे ने बपतिस्मा देणा भेजया, उनी ही मिंजो ने बोलया, की जिस पर तू आत्मा जो उतरदे कने स्केदे दिखाना; सेई पबित्र आत्मा ने बपतिस्मा देणेबाला है। 34 कने मैं दिखया, कने गबाई दिती है की मैं

तुसां ने सच्च-सच्च बोलदा की ऐई परमेश्वरे दा पुत्र है। 35 दुज्जे रोजे फिरी यूहन्ना कने उदे दो चले खडोतयो थे। 36 कने यीशु चलयया था, तां उनी उदे पासे नजर करिके बोलया, “दिखा, ए परमेश्वरे दा मेमना है।” 37 तालू सै दोनो चले यूहन्ना दी गल्ल सुणीकरी यीशुए दे पिच्छे चली पे। 38 यीशुए पिच्छे मुडी करी उना जो पिच्छे ओंदे दिखीकरी उना ला पुछया, तुसां कुदिया तोपा च न? उना उसला बोलया, “गुरू जी, तू कुथु रेंदा है?” 39 यीशु मसीह उना ने बोलया, “चला दिखी लिया।” तालू उना आई करी उदे रेहणे दी जगा दिखी, कने उस रोजे सै सोगी रे; कने ए दोपहर दे लगबग चार बजयो थे। 40 उना दोना चे इक तां शमौन पतरस दा भाई अन्दियास था, जडे यूहन्ना दियां गल्लां सुणीकरी उदे पिच्छे आया था। 41 उनी पहले अपने सोगे भाई शमौन ने मिली करी उसला बोलया, की सांझो मसीह मिली गिया है। 42 अन्दियास शमौने जो यीशुए बाल लेई आया: यीशुए उस पासे नजर करिके बोलया, तू यूहन्ना दा पुत्र शमौन है, तिजो पतरस बोलणा है। 43 दुज्जे रोजे यीशुए गलील प्रदेशे जो जाणे दा फेसला किता, कने फिलिप्पुस ने मिली करी बोलया, “मेरे चले बणने तांई मेरे पिच्छे चली पो।” 44 फिलिप्पुस तां अन्दियास कने पतरसे दे शेहर बैतसैदा दा रेणेबाला था। 45 फिलिप्पुस नतनएल ने मिली करी बोलया, “सांझो सै माणु मिल्ली गिया है जिदे बारे च मूसा दिया व्यवस्था च कने परमेश्वरे दा संदेश देणेबालयां लिखया था। सै नासरत शेहेरे ला यूसुफे दा पुत्र यीशु है।” 46 नतनएले उसला बोलया, क्या कोई खरी चीज भी नासरत शेहर ला निकली सकदी है? फिलिप्पुसे उसला बोलया, “चली करी दिखी ले।” 47 यीशुए नतनएल जो अपने बाल ओंदे दिखीकरी उदे बारे च बोलया, दिखा, ए सची इस्राएल दा भरोसे बाला बंशज है: इदे च कोई कपट नी है। 48 नतनएले यीशुए जो बोलया, “तू मिंजो कियां जाणदा है?” यीशुए उसयो जबाब दिता, फिलिप्पुसे तिजो जालू सदया, उसला पहले जालू तू अंजिरि दे स्खे थले था, तालू मैं तिजो दिखया था। 49 नतनएले उसयो जबाब दिता, “गुरू जी, तू परमेश्वरे दा पुत्र है; तू इस्राएल दा महाराजा है।” 50 यीशुए उसयो जबाब दिता, “मैं तां तिजो ने बोलया, की मैं तिजो अंजिरि दे स्खे थले दिखया, क्या तू तां भरोसा करा दा है? तू इसला भी बड्डे कम्म दिखणे न।” 51 फिरी यीशुए उसयो बोलया, “मैं तुसां ने सच्च-सच्च बोलदा है की तुसां स्वर्ग जो खुलया कने परमेश्वरे दे स्वर्गदूते जो उपर जादे कने मिंजो, माणुए दे पुत्रे उपर उतरदे दिखया।”

2 फिरी दो दिन बाद गलील प्रदेशे दे काना शेहर च कुसकी दा बियाह था, कने यीशुए दी माता भी ओथु थी। 2 यीशु कने उदे चले भी उसी बियाह च सदया थे। 3 जालू दाखरस घटी गिया, तां यीशुए दिया माता उसला बोलया, “की इना बाल दाखरस नी रिया।” 4 यीशुए उसला बोलया, “माता जी तुसां मिंजो कजो दस्सा दे? अजे मेरा टेम नी आया है की लोक मिंजो मसीह से स्मे च पछेणया।” 5 पर उदिया माता सेवकां ने बोलया, “जडा कुछ सै तुहांजो बोलगा, सेई करनयो।” 6 ओथु यहूदियां दे अपने धार्मिक रिबाजां दे अनुराह हथ धोणे दा रिबाज था। उना हथ धोणे तांई पथरे दे छे घडे रखयो थे। जिना च लगभग सौ-सबासौ लिटर पांणी ओंदा था। 7 यीशुए उना ने बोलया, “घडयां च पांणी भरि दिया।” उना घडयां जो उपरे दीकर भरि दिता। 8 तालू यीशुए उना जो बोलया, “हूण पाणी निकाली करी धामा दे प्रधाने बाल लेई जा।” सेवकां तियां ही कितया जियां उना जो करणे तांई बोलया। 9 जालू धामा दे प्रधाने सै पाणी चखा, तां सै दाखरस बणी गिया था कने उसयो नी पता था की सै कुथु ला आया है, पर जिना सेवकां पांणी कुडया था सै जाणदे थे, तां धामा दे प्रधाने लाडे जो सदीकरी, उसयो बोलया। 10 हर इक माणु पहले सबना ला खरा दाखरस दिन्दा है, कने जालू लोक उसयो पी करी रजी जांदे न, तालू घटिया बाला धाखरस दिन्दा है; पर तू सबना ला बदिया दाखरस हले दीकर रखया है। 11 यीशुए गलील प्रदेशे दे काना शेहर च अपना ए पेहला चमत्कार दर्सी करी अपनी महिमा दर्सी कने उदे चेलयां उस पर भरोसा किता की सै ही मसीह है। 12 इदे बाद सै कने उदी माता, उदे भाई, उदे चले, कफरनरम शेहर जो गे कने ओथु थोडे दिन रे। 13 यहूदियां दा फसह दा त्योहारे नेडे था, कने यीशु यस्-शलेम शेहर जो गिया। 14 कने उनी मंदरे च उंदी, कने भेडां, कने कबूतरां जो बेचणे बालयां जो बैठया दिखया। 15 तालू तू रसियां जो कोडा बणाई करी, सारियां भेडां कने दांदा जो मंदरे ला कडी दिता, कने साहुकारां दे पेसे खलारी दिते, कने पिटां जो पुटा सुटी दिता, 16 कने कबूतरां बेचणे बालयां ने बोलया, “इना जो ऐथु ला लेई जा। मेरे पिता दे घरे जो व्यापारे दा घर मत बणा।” 17 तां उदे चेलयां जो याद आया की पबित्र शास्त्र च लिखया है, “तेरे घरे दा जन्तु

मेरे अंदर अग्नी साईं बलदा है।” 18 इस पर यहूदी अगुवां उसला बोलया, “तू सांझो क्या चमत्कार दर्सी सकदा है की जिसने साबित हो की तिजो परमेख्वरे दिया तरफा ला हक है।” 19 यीशुए उना जो जबाब दिता, “इसी मंदरे जो तोड़ी दीया, कने मैं इसयो उना रोजां च दोबारा बणाई दिगा।” 20 यहूदी अगुवां बोलया, “इस मंदरे जो बणाणे जो छयाली साल लगयो न, कने तू क्या इसयो उना रोजां च बणाई दिगा?” 21 पर यीशु जिस मंदरे दे बारे च बोला था, सै उदा शरीर था। 22 जालू यीशु मरी करी जिंदा होया था, तालू उदे चेलयां जो याद आया था की उनी ऐ बोलया था; कने पबित्र शत्रू कने सै बचन जडा यीशुए बोलया था, उस पर भरोसा किता। 23 जालू यीशु यरूशलेम शेर च फसह दे त्योहारे च था, तां मतयां उना चमत्कारां जो जडे सै दसदा था दिखीकरी उस पर भरोसा किता। 24 पर यीशुए भरोसा नी किता की उना उस पर भरोसा किताया है, 25 कने उसयो कुसदी भी जरूरत नी थी जडा उसयो लोकां दे बारे च दस्से क्योकि सै जाणदा था की उना दे दिलां च कने उना दे क्या इरादे न?

3 फरीसियां चे नीकुदेमुस नाए दा इक माणु था, जडा यहूदियां दा धार्मिक अगुवा था, सै इक फरीसी था। 2 उनी राती यीशुए बाल आई करी उसयो बोलया, “गुरू जी, असां जाणदे न, की परमेख्वरे तुहांजो सांझो सिखणा तांई भेजया है, क्योकि कोई भी इना चमत्कार जो जडे तू दसदा है, अगर परमेख्वर दा साथ न हो तां नी दर्सी सकदा है।” 3 यीशुए उसयो जबाब दिता, “मैं तिजो ने सचच-सचच बोलदा है, अगर कोई नोए सिरे ला नी जम्मे तां सै परमेख्वरे दा राज्य नी दिखी सकदा है।” 4 नीकुदेमुसे उसला बोलया, “माणु जालू बड्डा होई जांदा है तां सै कियां जन्म लेई सकदा है? क्या सै अपणिया माता दे पेटे च दुज्जी बरी जाई करी जन्म लेई सकदा है?” 5 यीशुए जबाब दिता, मैं तिजो ने सचच-सचच बोलदा है, जालू दीकर कोई माणु पाणिए कने पबित्र आत्मा ने नी पैदा होए तालू दीकर सै परमेख्वरे दे राज्य च प्रवेश नी करी सकदा है। 6 माणु अपने बचयां जो जन्म दिन्दे न। फिरी भी सिर्फ परमेख्वरे दी आत्मा ही तुसां जो परमेख्वरे दी ओलाद दे स्पे च बदली सकदा है। 7 हेरान मत हो, की मैं तिजो ने बोलया, तिजो दोबारा ला पैदा होणा जरूरी है। 8 हवा जिस पासे चांहदी है उस पासे चलदी है, कने तू उदी अबाज सुणदा है, पर ऐ पता नी की सै कुथु ला ओदी है कने कुस पासे चली जांदि है? जडा कोई पबित्र आत्मा ने जमया है सै ऐदिया ही है। 9 नीकुदेमुसे उसयो जबाब दिता, “क्या ऐ गल्लां होई सकदियां न?” 10 ऐ सुणीकरी यीशुए उसयो जबाब दिता, तू इसाएलियां दा इक महान गुरू है, तिजो तां असल च इना गल्लां जो समझणा चाईदा है? 11 मैं तिजो ने सचच-सचच बोलदा है की सांझो जडा पता है, सै बोलेद न, पर जिसयो असां दिखदे न उदी गबाई दिन्दे न, कने असां जडा बोलेद न उस पर तुसां भरोसा नी करेद न। 12 जालू मैं तुसां ने धरतिया पर होणे बालियां गल्लां बोलियां, तां तुसां भरोसा नी किता, अगर मैं तुसां जो दस्से की स्वर्ग च क्या होणा है, तां क्या तुसां भरोसा करगे? 13 कोई स्वर्ग पर नी गिया, “पर सिर्फ मैं, माणुए दा पुत्र स्वर्ग ला थल्ले आया है।” 14 कने जियां मुसे सुनसान जगा च पितल दे सपे जो उपर चढाया, तियां ही जरूरी है की मैं, माणुए दे पुत्रे जो भी उपर चढाया जाऐ। 15 ताकि जडा कोई मिंजो पर भरोसा करे उदे च उसयो हमेशा दी जिन्दगी मिल्ले। (aiōnios g166) 16 “क्योकि परमेख्वरे संसारे दे लोकां ने ऐसा प्यार किता की उनी अपना इकलोता पुत्र देई त, ताकि जडा कोई उस पर भरोसा करे, उदा नाश न होऐ, पर उसयो हमेशा दी जिन्दगी मिल्ले। (aiōnios g166) 17 क्योकि परमेख्वरे अपने पुत्रे जो संसारे दे लोकां पर सजा देणे तांई नी भेजया है, पर इस तांई भेजया की उदे जरिये संसारे दे लोकां दा उद्धार होऐ। 18 जडा परमेख्वरे दे पुत्रे पर भरोसा करेद न, उस पर सजा दा हुकम नी होदा, पर जडे परमेख्वरे दे पुत्रे पर भरोसा नी करेद न, सै दोषी न क्योकि उनी परमेख्वरे दे इकलोते पुत्रे दे नाए पर भरोसा नी किता। 19 कने सजा दा हुकम देणे दी बजा ऐ की लौ संसारे च आई है, कने लोकां नेहेरे जो लौइ ला जादा प्यार किता क्योकि उना दे कम्म बुरे थे। 20 क्योकि जडा कोई बुराई करदा है, सै लौइ ने बैर रखदा है, कने लौइ च नी ओंदा है, इयां ना हो कि उदे कम्मा पर दोष लगन। 21 पर जडा सचाइया पर चलदा है सै लौइ च ओंदा है, ताकि उदे कम्म प्रगत होन जडा परमेख्वरे चांदा की सै करन।” 22 इदे बाद यीशु कने उदे चले यहूदिया प्रदेश च आये; कने सै ओथु उना सोगी रेईकरी बपतिस्मा देणा लगगा। 23 कने यहून्ना भी ऐनान ग्रां च जडा सामरिया इलाके दे शालेम शेर दे नेडे है ओथु बपतिस्मा दिन्दा था। क्योकि ओथु मता पाणी था, कने लोक आई करी बपतिस्मा लेंदे थे।

24 क्योकि यहून्ना तालू दीकर जेला च नी पाया था। 25 ओथु यहून्ना दे चेलयां दा कुसकी यहूदिये सोगी रिबाजा दे हिसावे ने शुद्धी दे बारे च बेहस होई। 26 कने यहून्ना दे चेलयां उस बाल आई करी उसला बोलया, “गुरू जी, जडा माणु यरदन खडा दे पारले पासे तेरे सोगी था, जिसदे बारे च तुसां गबाही दिती थी; दिख, सै बपतिस्मा दिन्दा है, कने सब उस बाल ओंदे न।” 27 यहून्ने जबाब दिता, जालू दीकर माणुए जो स्वर्ग ला ना दितया जाऐ, उसयो तालू दीकर कुछ नी मिल्ली सकदा। 28 तुसां अपु मेरे गबाह न की क्या बोलया था, की मैं मसीह नी है, पर उदे पहले भेजया गिया है। 29 लाडा लाडिये ने बियाह करी लेंदा है, पर लाडे दा मित्र सोगी खडोई करी उदी सुणदा है, लाडे दियां गल्लां ने बडा खुश होंदा है; तियां ही मेरा दिल खुश होई गिया है। 30 जरूरी है सै होर जादा खास होई जा कने मैं घट खास होई जां। 31 “जडा स्वर्ग ला ओंदा है सै सबना ला बडा है, जडा धरतिया ला ओंदा है सै धरतिया दा है; कने धरती दियां गल्लां करदा है: जडा स्वर्ग ला ओंदा है, सै सबना ला उपर है। 32 जडा कुछ उनी दिखया, कने सुणया है, उदी गबाई दिन्दा है; पर बडे घट लोक उदे संदेशे जो मंदे न। 33 पर जिना लोकां उदा संदेशे मन्नी लिया उनी इसा गल्ला पर प्रमाण देई दिता की परमेख्वर सच्चा है। 34 क्योकि जिसयो परमेख्वरे भेजया है सै परमेख्वरे दे बचना दा कचार करेद न क्योकि ऐ सेई है जिसयो परमेख्वरे बिना नापी-तोली करी पबित्र आत्मा दिन्दा है। 35 पिता परमेख्वर पुत्रे ने प्यार करदा है, कने उनी सारियां चिंजा उदे हथां च देई दितियां। 36 जडा परमेख्वरे दे पुत्रे पर भरोसा रखदा है, हमेशा दी जिन्दगी उदी है; पर जडा पुत्रे जो नी मन्दा है, उसयो अनन्त जिन्दगी नी मिलणी, पर परमेख्वरे दी सजा उसयो मिलणी है।” (aiōnios g166)

4 फिरी जालू यीशुए जो पता लगगा की फरीसियां सुणया है की यीशु यहून्ना ला जादे चले बणांदा कने बपतिस्मा दिन्दा है। 2 यीशु नी उदे चले बपतिस्मा दिन्दे थे, 3 तालू सै यहूदिया प्रदेश जो छडी करी फिरी अपने चेलयां सोगी गलील प्रदेशे दे इलाके जो चली गिया, 4 कने उसयो सामरियां प्रदेश ला होईकरी जाणा जरूरी था, क्योकि परमेख्वर भी ऐई चांदा था। 5 तांई तां सै सामरिया प्रदेश दे खूखार शेहरे दीकर आया, जडा उसा जमिना दे बखे है जडी याकूबे अपने पुत्र यूसुफे जो दितियो थी। 6 कने याकूबे जडा खु ओथु बाणया था, सै हेले दीकर भी ओथु ही था। कने यीशु रस्ते च थकी करी उस खुरे पर इयां ही बेई गिया। कने ऐ गल्ल दोपहर दे बकते होई थी। 7 इतणे च इक सामरी जनानी पाणी भरना आई। यीशुए उसा जो बोलया की “मिंजो पीणे तांई पाणी दे।” 8 क्योकि उदे चले तां शेहरे च खाना खरीदणा गियो थे। 9 इना सामरी जनानिया उसला बोलया, तू यहूदी होईकरी सामरी जनानिया ला पाणी कजो मंगा दा है? क्योकि यहूदी सामरियां सोगी कुछ भी रिशता नी रखदे। 10 यीशुए जबाब दिता, “तू नी जाणदी है की परमेख्वर तिजो क्या देणा चांदा, कने ऐ भी नी जाणदी की कुण तिजो ला पाणी मंगा दा है। अगर तू जाणदी, तां तू मिंजो ला मंगदी, कने मैं तिजो जिन्दगिया दा पाणी दिन्दा जडा जिन्दगी दिन्दा है।” 11 जनानिया उसला बोलया, प्रभु जी, तेरे बाल पाणिए भरने तांई तां कुछ हे भी नी है, कने खु तां बडा डुगा है; तां फिरी सै जिन्दगिया दा पाणी तेरे बाल कुथु ला आया? 12 क्या तू साडे पूर्वज याकूबे ला बडा है, जिनी सांझो ऐ खु दिता; कने उनी कने उदे बचयां कने डंगरां समेत इस खुरे ला पीता? 13 यीशुए उसा जो जबाब दिता, जडा कोई इस पाणिए जो पिंगा उसयो फिरी तेरे लणी पाणी, 14 पर जडा कोई इस पाणिए जो पिंगा जडा मैं उसयो देणा, तां उनी फिरी अनन्तकाल दीकर कदी जिना नी होणा। जडा पाणी मैं उसयो दिगा, सै उदे च इक पाणिए दे दा खु बणी जाणा, जडा उस पाणिए जो दिन्दा रेंदा है कने उसयो हमेशा दी जिन्दगी देणी। (aiōn g165, aiōnios g166) 15 उना जनानिया उसला बोलया, “प्रभु जी, सै पाणी मिंजो दे ताकि मिंजो तेरे ना लग्गे कने ना पाणी भरणे तांई बार-बार इतणी दूरे जो ओऐ।” 16 यीशुए उसा जो बोलया, “जा, अपने घरे बाले जो ऐथु सदी लेई ओ।” 17 जनानिया जबाब दिता, “मेरा घरे बाले नी है।” यीशुए उसा ने बोलया, “तू ठीक बोलदी है, की मेरा घरेबाला नी है। 18 क्योकि तू पंज घरे बाले करी बैठियो है, कने हण तू जिस माणुए बाल है सै भी तेरा घरेबाला नी है; ऐ तू सचच बोलया है।” 19 जनानिया उसला बोलया, “प्रभु जी, मिंजो लगदा है तू परमेख्वर दा संदेशे देणेबाला है। 20 साडे सामरी पूर्वज इसी पाहेडे पर परमेख्वरे दी भक्ति करदे थे, कने तुसां यहूदी लोक बोलेद न की सै जगा जिथु अराधना करणी चाईदी सै यरूशलेम शेर च है।” 21 यीशुए उसा ने बोलया, “हे जनानिये, मेरिया गल्लां पर भरोसा कर की सै बकत ओणा है, ना तां

तुसां इसी पाहेडे पर पिता दी भक्ति करणी है ना तां यस्शलेम शेर च 22 तुसां सामरी लोक जिसयो नी जाणदे न, उदी भक्ति करदे न; कने असां यहदी लोक जिसयो जाणदे न उदी अराधना करदे न; क्योंकि उद्धार करणे बाले यहदियां चे ही ओणा है। 23 पर सै बकत ओणा है, मतलब अजे भी है, जिदे च सच्चे भक्त पिता परमेस्वरे दी भक्ति आत्मा कने सचाइया न करणी है, क्योंकि पिता परमेस्वर अपने तांई पेदे ही अराधना करणे बालयां जो तोपदा है। 24 परमेस्वर आत्मा है, कने जस्त्री है की उदी अराधना करणे बाले आत्मा कने सचाइया न भक्ति करन।” 25 जनानिया उसला बोलया, “मै जाणदी है की मसीह जिसयो ख्रिस्तसु बोलदे न, ओणे बाला है; जालू उनी ओणा है, तां उनी सांझो सारियां गल्लां दसी देणियां ना।” 26 यीशुऐ उसा न बोलया, “मै जडा तिजो न बोला दा है, सेई है।” 27 इतणे च उदे चेले आईं गे, कने हेरान होणा लगे की से जनानिया न गल्लां करा दा है; पर तमी कुनी नी पुछया, तू क्या चांदा है? “कने कजो इसा न गल्लां करा दा है?” 28 तालू सै जनानी अपणा घडा छडी करी शेहरे जो चलीं गईं, कने लोकां न बोलणा लग्गी, 29 “ओआ, इक माणुऐ जो दिखा, जिनी सब कुछ दसी दिता जडा मै कितया। कुधी ऐं तां मसीह नी है?” 30 तालू सै शेहरे ला निकली करी यीशुऐ जो दिखणा ओणा लग्गी। 31 इतणे च उदे चेले आईं करी उसला बिनती करणा लगे, “गुरू जी, कुछ खाईं ले।” 32 पर यीशुऐ उना न बोलया, “मेरे बाल खांणे तांई ऐसा खाणा है जिसयो तुसां नी जाणदे ना।” 33 तालू चेलयां अपु चे बोलया, “क्या कुनी इदे तांई कुछ खांणे जो लांदया है?” 34 यीशुऐ उना न बोलया, मेरा खाणा परमेस्वरे दी इच्छा दा पालन करणा है जिनी मिजो भेजया है, कने उस कम्मे जो पूरा करणा है जडा उनी मिजो सौंपया। 35 क्या तुसां नी बोलदे, बडाईं करणे जो अजे भी चार महीने पियो न? दिखा, मै तुसां न बोलदा है, अपणियां हखी खोला कने ओणे बाले लोकां जो दिखा। सै खतरां च पकियो फसला साईं न, कने बडाइ तांई तैयार न। 36 पहले ला ही बडणे बाले कम्म करा दे न कने उना जो अपणी मजदूरी मिल्ला दी है। कने बी राणे बाला कने बडणे बाला दोनां मिलिकरी खुशी मनान। (aiōnios g166) 37 क्योंकि इसा गल्ला पर ऐ कहावत ठीक बोदी है: राणे बाला कोई होर है कने बडणे बाला कोई होर है। 38 मै तुहांजो उस खेते जो बडणे तांई भेजया जिस च तुसां मेहनत नी कितियो होरनी मेहनत कितियो है, “तुसां असा फसला जो गटेरणा (जिस तांई उना कम्म कितया है)।” 39 कने उस शेहरे दे मतयां सामरियां उसा जनानिया दे बोलणे न यीशुऐ पर भरोसा किता; जिना ऐ बोलया था, की उनी सब कुछ दसी दिता, जडा मै कितया है। 40 जालू से सामरी उदे बाल आये, तां उसला बिनती करणा लगे की साडे ऐथे र। तां सै ओथु दो रोज रिया। 41 कने उदे संदेश दिया बजा न मतयां यीशुऐ पर भरोसा किता। 42 कने उना जनानिया बोलया, हुण असां तेरे बोलणे न ही भरोसा नी करदे न, क्योंकि असां अपु ही सुणी लिया, कने असां जाणदे न की ऐं सच्चीं दा संसारे दा उद्धार करणे बाला है। 43 फिरी सै उना दो रोजां बाद सै ओथु ला निकली करी गलील प्रदेशे जो गया। 44 क्योंकि यीशुऐ अपु ही बोलया था की परमेस्वरे दा संदेश देणेबाले दी अपने देशे च इज्जत नी हौदी है। 45 जालू सै गलील प्रदेशे गया, तां गलील बासी खुशिया न उसला मिल्ले; क्योंकि जितणे भी कम्म उनी यस्शलेम शेर च त्योहारे बेले कितयो थे, उना सारयां कम्मा जो दिखया था, क्योंकि सै भी त्योहारे जो गियो थे। 46 तालू सै फिरी गलील प्रदेशे दे काना शेर च आया, जिथु उनी पांणिए जो दाखरस बनाया था। ओथु राजे दा इक सेवक था जिसदा पुत्र कफनहम शेर च बीमार था। 47 सै ऐ सुणीकरी की यीशु यहदिया प्रदेशे ला गलील प्रदेशे च आया है, उदे बाल गया कने उसला बिनती करणा लग्गी की चलीं करी मेरे पुत्रे जो ठीक करी दे: क्योंकि सै मरणे बाला था। 48 यीशुऐ उसयो बोलया, जालू तुसां चमत्कार कने अनोखे कम्म नी दिखीं लेंगे तालू दीकर तुसां मिजो मसीहानी न मनणा। 49 राजे दे सेवके उसला बोलया, “प्रभु जी, मेरे जागते दी मौत होणे ला पहले चल।” 50 यीशुऐ उसयो बोलया, “जा तेरा जागत जिन्दा है।” उनी माणुऐ यीशुऐ दी गल्ल मन्नी कने चलीं गया। 51 सै अजे रस्ते च ही चलया था, की उदे सेवक उस बाल आईं र कने बोलणा लगे, “तेरा जागत जिन्दा है।” 52 उनी उना ला पुछया, “की कुस बकते सै खरा होणा लग्गा?” उना उसला बोलया, “कल दोपहर इक बजे उदा भुखार उतरीं गिया।” 53 तालू उस जागते दा पिता समझीं गिया की ऐ उस बकते ही होया है जिस बकते यीशुऐ बोलया, तेरा जागत जिन्दा है, “कने उनी कने उदे सारे घरे बालयां यीशुऐ पर भरोसा किता।”

54 ऐ दुज्जा चमत्कार था जडा यीशुऐ यहदिया प्रदेशे ला गलील प्रदेशे च बापस आईं करी किता।

5 इना गल्लां दे बाद यहदियां दा इक त्योहार होया, कने यीशु यस्शलेम शेर जो गया। 2 यस्शलेम च भेडां दे फाटके बखे इक तलाब है जिसयो इब्रानी भाषा च बैतहसदा बोलदे न, कने उदे चारो पासरे पंज बरां दे। 3 उना च मते बीमार, अन्ने, लंगडे कने सुकयो आंग बाले, पांणिए हिलणे दिया आसा च ओथु बेईं रेंदे थे। 4 क्योंकि परमेस्वरे दे नियुक्त बकते पर स्वर्गादत तलाब पर उतरीं करी पांणिए जो हिलांदे थे: पांणी हिलणे बाद जडा कोई भी पेहले अंदर जांदा था सै ठीक होई जांदा था चाऐ उदी कोई भी बिमारी हो। 5 ओथु इक माणु था, सै ठतियां सालां ला बीमारिया च था। 6 यीशुऐ उसयो पिया दिखीं करी कने जाणी करी की ऐ इसा हालता च बडे रोजां ला है, उसला पुछया, “क्या तू ठीक होणा चांदा है?” 7 उनी बिमारे जबाब दिता, “प्रभु जी, मेरे बाल कोई माणु नी है, की जालू पांणी हिले, तालू मिजो तलाब दे अंदर जाणे तांई मदद करे, मै तलाब दे अंदर जाणे दी कोशिश करदा है, हमेशा मेरे पुजणे ला पेहले ही कोई होर मेरला पेहले तलाब अंदर चलीं जांदा है।” 8 यीशुऐ उसला बोलया, “उठ, अपणिया चटाईया जो चुकी करी हंड फिर।” 9 सै माणु उठ ठीक होई गिया, कने अपणिया चटाईया जो चुकी करी चलणा फिरणा लग्गी पिया। 10 जिस रोजे ऐ सब होया सै सब्दे दा दिन था। इस तांई यहदी अगुवे उसला जडा ठीक होया था, बोलणा लगे, “मूसा दिया व्यवस्था दे अनुसार सब्दे दे रोजे, तिजो चटाईया जो चुकी करी लेईं जाणा ठीक नी है।” 11 उनी उना जो जबाब दिता, “जिनी मिजो ठीक किता उनी मिजो बोलया है, अपणिया चटाईया चुकी करी चल फिर।” 12 उना उसला पुछया, “सै कुण माणु है जिनी तिजो ऐ बोलया, चटाई जो चुक कने चल फिर?” 13 पर जडा ठीक होई गिया था, सै नी जाणदा था की सै कुण है; क्योंकि उसा जगा पर भीड होंणे दिया बजा न यीशु ओथु भिडा न मिली गिया कने उना जो मिल्ला नी। 14 कुछ बकते बाद सै यीशुऐ जो मंरे दे आंणे च मिला, तालू उनी उसला बोलया, “दिख, तू तां ठीक होई गिया है; हुण दोबारा पाप मत करदा, इयां ना हो की इसला भी बडी मुसिबत तिजो पर आईं जा।” 15 उनी माणुऐ जाईं करी यहदी अगुवां न बोली दिता की जिनी मिजो ठीक कितया है सै यीशु है। 16 इसा बजा न यहदी अगुवे यीशुऐ जो सताणां लगे, क्योंकि सै ऐसे-ऐसे कम्म सब्दे दे रोजे करदा था। 17 इसा गल्लां पर यीशुऐ उना न बोलया, मेरा पिता परमेस्वर हले दीकर कम्म करदा है कने मिजो भी कम्म करणा चाईंदा। 18 यीशुऐ ऐ बोलया इसा बजा न यहदी अगुवे उसयो होर भी जादा मारणे दी कोशिश करणा लगे, की सै सिर्फ ऐं नी की सब्दे दे दिने दे रिबाजे जो तोडा दा, पर सै परमेस्वरे जो भी अपणा पिता बोली करी, अपने आपे जो परमेस्वर दे बाबबर बोलदा था। 19 इसीं पर यीशुऐ उना न बोलया, मै तुसां न सच्च-सच्च बोलदा है, मै अपु ला कुछ नी करी सकदा है, सिर्फ सेईं जडा सै पिता परमेस्वर जो करदे दिखदा है, क्योंकि जिना-जिना कम्मा जो सै करदा है उना जो मै भी तियां ही करदा है। 20 इस तांई पिता परमेस्वर मिजो न प्यार करदा है कने जडे-जडे कम्म सै अपु करदा है, सै सारे उसयो दसदा है; कने उनी इना ला भी बडे कम्म उसयो दसणे न, ताकि तुसां हेरान होन। 21 क्योंकि जियां मेरा पिता परमेस्वर मरयां लोकां जो जिन्दा करदा है, तियां ही मै भी जिना जो चांदा है उना जो जिन्दा करदा है। 22 पिता परमेस्वर कुसी दा भी न्याय नी करदा है, पर न्याय करणे दा सारा कम्म मिजो देईं दितया है, 23 इस तांई जियां सारे लोक पिता परमेस्वर दा आदर करदे न तियां ही मेरा भी आदर करन जडा मेरा आदर नी करदा, सै पिता परमेस्वर दा आदर भी नी करदा है जिनी उसयो भेजया है। 24 मै तुसां न सच्च-सच्च बोलदा है, जडा मेरा बचन सुणीकरी मेरे भेजणे बाले पर भरोसा करदा है, हमेशा दी जिन्दगी उदी है, कने उसयो सजा नी मिलणी है पर सै तां अनन्त मौता ला बची गिया है कने उनी पेहले ला ही जिन्दगी च प्रवेश करी लिया है। (aiōnios g166) 25 “मै तुसां न सच्च-सच्च बोलदा है, सै बकत ओणा है, कने हुण है, जिदे च मरयां परमेस्वरे दे पुत्र, मेरी अबाज सुणनी, कने जडे सुणणे उना हमेशा तांई जी पोणा है।” 26 क्योंकि जियां पिता परमेस्वर अपने अंदर जिन्दगी रखदा है, तियां ही उनी अपने पुत्र, जो भी हक दितया है की सै अपने आपे च जिन्दगी रखे; 27 क्योंकि मै माणुऐ दा पुत्र है, इस तांई पिता परमेस्वरे मिजो सारे लोकां जो न्याय करणे दा अधिकार दितया है। 28 इसला हेरान मत होआ, क्योंकि सै बकत ओणा है, की सै सारे लोक जडे मरी गियो न, उना मेरी

मतलब की, माणुए दे पुत्रे दी अबाज सुणीकरी जिन्दे होई जाणा है। 29 जिना बाल अच्छी जिन्दगी थी, उना हमेशा दी जिन्दगी ताई जिन्दे होई जाणा है, से जडे बुराई च जिन्दगी बितान्दे न, उना दोषी होंगे ताई जी पोणा है। 30 “मै अपने आपे ला कुछ नी करी सकदा; मै लोकां दा न्याय तियां ही करदा है जियां पिता परमेस्वर मिंजो उना दा न्याय करणे ताई बोलदा है, कने मेरा न्याय सही है; क्योंकि मै अपनी मरजी नी, पर अपने भेजणे बाले दी मर्जी चांदा है। 31 अगर मै अपु ही अपनी गबाई दें, तां मेरी गबाई सच्ची नी है। 32 इक होर है जडा मेरा पिता परमेस्वर है, से भी मेरे बारे च गबाई दिन्दा है, कने मैं जाणदा है की मेरी जडी सै गबाई दिन्दा है, से सच्ची है। 33 तुसां यहूना बपतिस्मा देणेबाले बाल संदेश देणेबाले भेजे कने उनी सचाइया दी गबाई दितियो है। 34 पर मै अपने बारे च माणुआं दी गबाई नी चांदा है; तमी मैं इसा गबाई दे बारे च दसया है जडी यहूना दिति थी ताकि तुहाडा उद्गार होऐ। 35 यहूना इक दिख्ये सांई था; कने तुहांजो थोडिया देरा ताई उदिया लौई च, मगन होणा खरा लग्गा। 36 पर मेरे बाल यहूना ला भी बड़ी गबाई है: क्योंकि जडा कम्म पिता परमेस्वरे मिंजो पूरा करणे ताई दितया से मेरे बारे च गबाई दिन्दा है। जडा कम्म मैं करी सकदा है, से गबाई दिन्दा है की मिंजो पिता परमेस्वरे भेजया है। 37 कने पिता परमेस्वर जिनी मिंजो भेजया है, उना ही मेरी गबाई दितियो है तुसां ना तां उदी कदी अबाज सुणी, कने ना उसयो आम्णे लिखिया है। 38 कने उदे संदेशा जो मने च टिकाई करी नी रखदे, क्योंकि जिसयो परमेस्वरे भेजया है तुसां उदा भरोसा नी करदे। 39 तुसां पबित्र शास्त्र च ध्यान ने पढी कती तोपदे न, क्योंकि तुसां समझदे न की उना ने हमेशा दी जिन्दगी मिलदी है, कने ऐ सेई बचन है, जडा मेरी गबाई दिन्दा है; (aiōnios g166) 40 पर ऐ सब होंगे पर भी अनन्त जिन्दगी पाणे ताई मेरे बाल नी ओणा चांदे न। 41 मैं माणुए ला आदर दी आस नी रखदा है। 42 क्योंकि मैं तुसां जो जाणदा है की तुसां अपने मने च परमेस्वरे ताई प्यार नी रखदे न। 43 मैं अपने पिता परमेस्वर दे अधिकारे ने आया है, कने तुसां मिंजो अपनादे नी अगर कोई होर अपने ही अधिकारे ने ओऐ, तां उसयो तुसां अपनाई लेंदे न। 44 तुसां मिंजो पर भरोसा नी करी सकदे न, क्योंकि तुसां इकी दुज्जे ला अपनी आदर मान चांदे न, कने तुसां इकलोते परमेस्वरे ला आदर मान पाणे दी कोशिश नी करदे न। 45 ऐ मत समझा, की मैं पिता परमेस्वरे दे सामणे तुसां पर दोष लगा दा: मूसा, जिस पर तुसां आस रखियो है, उनी तुसां पर दोष लगाने न। 46 क्योंकि अगर तुसां मूसा दा भरोसा करदे, तां मेरा भी भरोसा करदे, इस ताई की उनी भी मेरे बारे च पबित्र शास्त्र च लिखया है। 47 क्योंकि तुसां उदियां लिखियां गल्लां दा भरोसा नी करदे, तां तुसां पक्का ही मेरियां गल्लां दा भी नी करी सकदे।”

6 इना गल्लां दे बाद यीशु गलील झिला च मतलब की तिबिरियासे दिया झिला बखे गिया। 2 कने बड़ी भरी भीड़ उदे पिच्छे चली पेई क्योंकि जडे अनोखे कम्म सै बिमारां पर दसदा था से उना जो दिखदे थे। 3 तालू यीशु पहाडे पर चढी करी अपणयां चेलयां सोगी ओथू बैठा। 4 कने यहूदियां दे फसह दा त्योहारे नेडे ही था। 5 तालू यीशुए नजरा चुकी करी मती भरी भिडा जो अपने बाल ओदे दिखया, कने फिलिप्पुस ने बोलया, “असां इना जो खाणे ताई रोटी कुथु ला खरदी लोणी?” 6 पर यीशुए ऐ गल्ल उसयो परखणे ताई बोली; क्योंकि से अपु जाणदा था की मैं क्या करणा है। 7 फिलिप्पुसे उसयो जबाब दित्ता, “इतणी रोतियां दी कीमत दो सो दिना दिया मजदूरिया दे बरबर होणी, से भी उना ताई पन नि होणी की उना चे हर इकी जणे जो थोडी-थोडी मिल्ली जा।” 8 उदे चेलयां चे शमौन पतरस दे भाई अन्धियासे उसयो बोलया, 9 “ऐथू लौक जागत है जिदे बाल जौ दिया पंज रोतियां न कने दो मछियां न, पर ऐ इतणे इँका ताई काफी नी है।” 10 यीशुए बोलया, “लोकां जो बठाई दिया।” उसा जगा पर मता घा था: तालू सै लोक बैठी गे, कने से गिणतिया च लगबग पंज हजार थे। 11 तालू यीशुए रोतियां लियां, कने धन्यवाद करिके जडे बैठयो थे उना जो बंडी दितियां: कने तियां ही मछियां जो भी जितणियां से चांदे थे बंडी दितियां। 12 जालू सै खाई करी रजी गे तां उनी अपने चेलयां ने बोलया, “बचयां टुकडयां जो गठेरी लियां, ताकि कुछ बर्बाद ना होऐ।” 13 उना सै रोतियां दे टुकडे गठेरे, कने सै पंज रोतियां दे टुकडे जडे खाणे बालयां ला बची गियो थे उना ने बाहरा टोकरियाँ भरियां। 14 तालू जडा अनोखा कम्म उनी करी के दसया उसयो दिखीकरी लोक बोलणा लगे; की सै परमेस्वरे दा संदेश देणेबाला है जडा संसारे च ओणे बाला था, सै पका ऐई है।

15 यीशु ऐ जाणी करी कने लोक मिंजो राजा बगाने ताई आई करी पकडना चांदे न, फिरी पहाडे पर किल्ला ही चली गिया। 16 फिरी जालू संज होई, तां उदे चले झिला कंडे पर आये, 17 कने किस्तिया पर चढी करी झिला पर कफनरहम शेहर जो जाणा लगे: उस बेले नेहरा होई गिया था, कने यीशु हले दीकर उना बाल नी पुजया था। 18 कने तुफाने दिया बजा ने झिला च लेहरां उठणा लगियां। 19 जालू सै चलदे-चलदे लगबग चार मील निकली गे, तां उना यीशुए जो झिला पर चलदे कने किस्तिया बखे ओदे दिखया, कने चले डरी गे। 20 पर यीशुए उना ने बोलया, “मै है; डरा मत।” 21 सै उसयो किस्तिया पर चढाणे ताई तैयार होऐ कने झट सै किस्ति उसा जगा जाई पुज्जी जिसा जगा सै चलयो है। 22 दुज्जे रोजे उना भिडा, जडी झिला पर खडोतियो थी, ऐ दिखया की ऐथू इकी जो छडी करी होर कोई लोक किस्ति नी करी, कने यीशु अपणयां चेलयां सोगी इसा किस्तिया पर नी चढया था, बस उदे चले ही गियो थे। 23 होर लोक किस्तियां तिबिरियास शेहरे ला उसा जगा पर आईयां, जिथु उना प्रभु दा धन्यवाद करणे बाद रोटी खादी थी। 24 जालू भिडा दिखया, की ऐथु ना यीशु है, ना उदे चले, तां सै भी लोकियाँ-लोकियाँ किस्तिया पर चढी करी यीशुए जो तोपदे कफनरहम शेहर च जाई पुज्जे। 25 कने झिला दे पार उसला मिली करी उसयो बोलया, “गुरु जी, तू ऐथु कालू आया?” 26 यीशुए उना जो जबाब दित्ता, “मै तुसां ने सच्च-सच्च बोलदा है, तुसां मिंजो इस ताई नी तोपा दे के। तुसां अनोखे कम्म दिखयो, पर इस ताई की तुसां रोतियां खाई करी रजी गे। 27 खतम होंगे बाले खाणे पिच्छे मेहनत मत करा, पर उस खाणें ताई करा जडा हमेशा दिया जिन्दगीया दित्ता खर रूँदा है, जडा मैं माणुए दे पुत्रे तुहांजो ऐ खाणा देणा है, क्योंकि पिता परमेस्वरे मिंजो ऐसा करणे दा हक दितया है।” (aiōnios g166) 28 उना यीशुए ला पुछया, “परमेस्वरे दा कम्म करणे ताई असां क्या करन?” 29 यीशुए उना जो जबाब दित्ता, “परमेस्वर चांदा है की तुसां उस पर भरोसा करन जिसयो उनी भेजया है।” 30 तालू उना उसला पुछया, “फिरि तू कुण दिया चमत्कार दसदा है, कि असां उसयो दिखीकरी तिजो पर भरोसा करन? तू कुण दिया कम्म दसदा है? 31 साडयां पूर्वजां सुनसान जगा च मन्ना खादा; जियां पबित्र शास्त्र च लिखया है, मूसा उना जो खाणें ताई स्वर्ग ला रोटी दित्ती।” 32 यीशुए उना बोलया, “मै तुसां ने सच्च-सच्च बोलदा है तुहांजो से रोटी स्वर्ग ला मूसा नी दितियो, पर मेरे पिता परमेस्वर तुहांजो स्वर्ग ला सच्ची रोटी दिन्दा है। 33 क्योंकि परमेस्वरे दी रोटी सेई है, जडी स्वर्ग ला उतरी करी संसारे दे लोकां जो जिन्दगी दिन्दी है।” 34 तालू उना उसला बोलया, “प्रभु जी, ऐ रोटी सांझो रोज ही दे कर।” 35 यीशुए उना ने बोलया, “रोटी जडी हमेशा दी जिन्दगी दिन्दी है से रोटी मैं है: जडा मेरे बाल ओगा उनी कदी भूखे नी होणा कने जडा मिंजो पर भरोसा करणा, से कदी तरिणा नी होणा। 36 पर मै तुसां ने पेहले ही बोलया था, की तुसां मिंजो दिखी भी लिया है तमी भरोसा नी करदे। 37 जडा कुछ पिता परमेस्वरे मिंजो दिन्दा है, से सब मेरे बाल ओणा है, कने जडा कोई मेरे बाल ओगा उसयो मैं कदी नी कडगा। 38 क्योंकि मैं अपनी इच्छा नी, पर अपने भेजणे बाले दी इच्छा पुरी करणे ताई स्वर्ग ला उतरया है। 39 कने मेरे भेजणे बाले दी इच्छा ऐ है की जडा कुछ उनी मिंजो दितया है, उदे चे मैं कुछ नी गबां पर उसयो आखरी रोजे इसयो फिरी ला जिन्दा करे। 40 क्योंकि मेरे पिता परमेस्वरे दी इच्छा ऐ है, की जडा कोई मिंजो दिखदा है, कने मिंजो पर भरोसा करे, उसयो हमेशा दी जिन्दगी मिल्ले; कने मै उसयो आखरी रोजे फिरी जिन्दा करी दिगा।” (aiōnios g166) 41 तालू यहूदी अणुवे उस पर बुडबडणा लगे, इस ताई की उनी बोलया था, “जडी रोटी स्वर्ग ला उतरियो है से मैं है।” 42 कने उना बोलया, “क्या ऐ यूस्फे दा पुत्र यीशु नी है, जिसदे माता-पिता जो असां जाणदे न? तां सै कजो बोलदा न की मैं स्वर्ग ला उतरया है?” 43 यीशुए उना जो जबाब दित्ता, “अपु चे मत बुडबुडा। 44 कोई मेरे बाल नी आई सकदा है, जालू दीकर पिता परमेस्वर, जिनी मिंजो भेजया है, उसयो अपने बाल लिखी नी ले; कने मै उसयो आखरी रोजे फिरी जिन्दा करी देणा है। 45 परमेस्वरे दा संदेश देणेबालयां लेखां च ऐ लिखया है, सै सारे परमेस्वरे दीया तरफा ला सिखाऐ होंगे न। जिनी कुनी पिता परमेस्वर ला सिखया कने सुणया है, सै मेरे बाल ओदा है। 46 कुनी भी पिता परमेस्वर जो नी दिखया। मै किल्ला ही है, जडा परमेस्वर दिया तरफा ला आया है, जिनी उसयो दिखया है। 47 मै तुसां ने सच्च-सच्च बोलदा है, की जडा कोई मिंजो पर भरोसा करदा है, हमेशा दी जिन्दगी उदी है। (aiōnios g166) 48 रोटी जडी जिन्दगी दिन्दी है सै मैं है। 49 तुहाडे पूर्वजां सुनसान जगा च मन्ना खादा

कने मरी गे। 50 ऐ जिन्दगी दी रोटी है जड़ी स्वर्ग ला उतरदी है ताकि माणु इसयो खा कने कदी मरे ना। 51 जिन्दगी रोटी जड़ी स्वर्ग ला उतरती सै मै है। अगर कोई इसा रोटिया चे खा, ता हमेशा जिन्दा रेंगा, कने जड़ी रोटी मै संसारे दिया जिन्दगिया ताई दिगा, सै मेरा मास है।” (aiōn g165) 52 इस पर यहदी अगुवे ऐ बोली करी अपु चे लडना लग्गे, “ऐ माणु सांझो कियं अपणा मास खाण्गे जो देई सकदा है?” 53 यीशुऐ उना ने बोलया, “मै तुसां ने सच्च-सच्च बोलदा है जाल दीकर मेरा, माणुऐ दे पुत्रे दा मास नी खाण्गे, कने उदा खत नी पीण्गे, तुसां च जिन्दगी नी है। 54 जडा मेरा मास खांदा है, कने मेरा खत पिदा है, हमेशा दी जिन्दगी उदी ही है, कने न्याये दे रोजे उसयो फिरी जिन्दा करणा। (aiōnios g166) 55 क्योकि मेरा शरीर सच्ची खाण्गे दी चीज है कने मेरा खत भी सच्ची पिण्गे दी चीज है। 56 जडा मेरा मास खांदा है कने मेरा खत पिदा है सै मिजो च टिकी रेंदा है, कने मै उदे च रेंदा है। 57 मेरा पिता परमेस्वर जिनी मिजो भेजया है, सै जिन्दगी दिन्दा है। जियां उनी मिजो जिन्दगी दितियो, तियां ही मै भी उस माणुऐ जो जिन्दगी देणी जडा मेरे शरीर जो खांदा है।” 58 ऐ सै रोटी है, जड़ी स्वर्ग ला उतरती होई है; पर त्हाडे पूर्वजां मन्ना खादा, कने मरी गे: जडा कोई ऐ रोटी खांगा, उनी हमेशा जिंदा रेंगा। (aiōn g165) 59 ऐ गल्ला उनी ककरनहम शेहरे दे इक यहदी जंज घर च उपदेश दिन्दे बेले बोलियां। 60 तांई तां यीशुऐ दे चेलयां चे मतयां ऐ सुणीकरी बोलया, ऐ समझणा बडा मुश्किल है; की कुण इसयो मन्नी सकदा है? 61 यीशुऐ अण्णे मने च ऐ जाणी करी की मेरे चले अपु चे इसा गल्ला दे बारे च बुडबुडा दे न, उना ला पुछया, “क्या ऐ गल्ल हत्वांजो मिजो पर भरोसा करणे ला रोकदी है? 62 कने अगर तुसां मिजो माणुऐ दे पुत्रे जो स्वर्ग जांदा दिख्णे, जिथ् सै पेहले था, तां क्या हांगा? 63 परमेस्वरे दी आत्मा तां जिन्दगी देणेबाली है, शरीर ने कोई फायदा नी है: जडियां गल्लां मै तुसां ने बोलियां सै पबित्र आत्मा ने बोलियां न, कने ऐ गल्लां माणुआं जो जिन्दगी दीदियां न। 64 पर तुसां चे कितणे ऐसे न जडे भरोसा नी करदे न।” क्योकि यीशु तां पेहले ही जाणदा था की जडे भरोसा नी करदे न, सै कुण न; कने कुनी उसयो पकडवाणा है। 65 कने यीशुऐ बोलया, इसी तांई मै तुसां ने बोलया था की जाल दीकर पिता परमेस्वर दिया तरफा ला ऐ बरदान न होऐ, ताल् दीकर सै मेरे बाल नी आई सकदा है। 66 इसी पर उदे चेलयां चे मते बापस फिरी गे कने उदे बाद कदी उस सोगी नी चले। 67 ताल् यीशुऐ उना बाहरा चेलयां ने बोलया, “क्या तुसां भी चली जाणा चांदा न?” 68 शमौन पतरसे उसयो जबाब दिता, प्रभु जी, असां कुसदे बाल जाणा? हमेशा दिया जिन्दगिया दियां गल्लां तां तरे बाल ही न। (aiōnios g166) 69 कने असां भरोसा कितया है, कने जाणी गियो न, की परमेस्वरे दा पबित्र जन कने मसीहा तू ही है जिसयो परमेस्वरे भेजया है। 70 यीशुऐ उसयो जबाब दिता, “क्या मै तुसां बाहरां चेलयां जो नी चुणयां है? तमी तुसां च इक माणु बुरा है।” 71 ऐ उनी शमौन इस्करियोती दे पुत्र यहदा दे बारे च बोलया, क्योकि ऐई जडा उना बाहरां च था, जिनी उसयो पकडवाणा था।

7 इना गल्लां बाद यीशु गलील प्रदेश च गुमदा रिया, क्योकि यहदी अगुवे उसयो मारणे दी कोशिश करा दे थे, इस तांई सै यहदिया प्रदेश च गुमणा नी चांदा था। 2 कने यहदी लोकां दा इक त्योहारे ओणे बाला था जिसयो झोपडियां दा त्योहार बोलदे थे। 3 इस तांई यीशुऐ दे भाईयां उसयो बोलया, “ऐथ् ला यहदिया प्रदेश जो चली जा, की जडे कम्म तू कर्दा है, उना जो तरे चले भी दिखन। 4 क्योकि कोई भी जडा प्रसिद्द होणा चांदा है सै लुकी करी कम्म नी करदा, अगर तू ऐ कम्म करदा है, तां अण्णे आपे जो संसारे च सबना दे सामणे कर।” 5 क्योकि यीशुऐ दे भाई भी उस पर भरोसा नी करदे थे। 6 ताल् यीशुऐ उना ने बोलया, “मेरा बकत हले नी आया है; पर त्हाडे तांई कोई भी बकत सही है। 7 संसारे दे लोक तुसां ने बेर नी करी सक्ते न, पर सै मिजो ने बेर करदे न, क्योकि मै उदे खिलाफ ऐ गवाई दिन्दा है, की उना दे कम्म बुरे न। 8 तुसां त्योहारे जो जा; मै हले इसी त्योहारे जो नी जाणा, क्योकि हले दीकर मेरा बकत पूरा नी होया है।” 9 सै उना ने ऐ गल्लां बोली करी गलील प्रदेश च ही रिया। 10 पर जाल् उदे भाई त्योहारे जो चली गे, तां सै बादे च लुकी करी ओथु गिया। 11 यहदी लोक त्योहारे च ऐ बोली करी यीशुऐ जो तोपणा लग्गे की सै कुथु है? 12 कने लोकां च उदे बारे च लुकी-लुकी करी मतियां गल्लां बोलियां: कुछ बोलदे थे की, “सै भला माणु है।” कने कितणे ही बोलदे थे, की नी सै लोकां जो भटकांदा है। 13 यहदी अगुवे दे उदे दिया बजा ने कोई भी माणु उदे बारे च खुली करी नी बोलदा था। 14 कने जाल् त्योहारे

दा अधा रोज होई गिया; तां यीशु मंदरे च जाई करी उपदेश देणा लग्गा। 15 ताल् यहदी लोक हेरान होईकरी बोलणा लग्गे, की ऐ माणु बिना पबित्र शाब् पढयो ज्ञानी कियं बणी गिया? 16 यीशुऐ उना जो जबाब दिता, “मेरा उपदेश मेरा अपणा नी है, पर परमेस्वरे दिया तरफा ला है जीनी मिजो भेजया है। 17 अगर कोई उदिया इच्छा पर चलणा चा, तां उनी जाणी लेणा की मेरी शिक्षा परमेस्वरे दिया तरफा ला ओदी है, पर उपदेशे दे बारे च जाणी लेणा की सै परमेस्वरे दिया तरफा ला है। 18 जडा अपणिया तरफा ला कुछ बोलदा है, सै अपणी ही इज्जत मान चांदा है; पर जडा अण्णे भेजणे बाले दा इज्जत मान चांदा है सै ही सच्चा है, कने उदे च धोखा नी है। 19 क्या मूसा परमेस्वरे दा संदेश देणेबाले तुहांजो व्यवस्था नी दितियो है? तमी तुसां चे कोई भी व्यवस्था पर नी चलदा है। तुसां कजो मिजो मारी देणा चांदा न? 20 लोकां जबाब दिता; “तिजो च बुरी आत्मा है! कुण तिजो मारणा चांदा है?” 21 यीशुऐ उना जो जबाब दिता, “मै इक कम्म सक्ते बाले दिने किता, कने तुसां सारे हेरान होई गे। 22 इसा बजा ने मूसा तुहांजो खतने दा हुकम दितया है, ऐ नी की सै मूसा दिया तरफा ला है पर ऐ पूर्वजां ला चली आईयो है, कने सक्ते दे रोजे तुसां माणुऐ दा खतना करदे न। 23 जाल् सक्ते दे रोजे माणुऐ दा खतना करदे न ताकि मूसा दिया व्यवस्था दा हुकम न टली जा, तां तुसां मिजो पर कजो इस तांई गुस्सा करदे न, की मै सक्ते दे रोजे इकी माणुऐ जो पूरी तरा ठीक किता। 24 तुसां बाहरी रूप दिखीकरी न्याय मत करा, पर सच्चाईया ने न्याय करा।” 25 ताल् कितणे यरूशलेम शेहरे दे रणेबाले बोलणा लग्गे, “क्या ऐ सै ही नी है, जिसयो साडे अगुवे मारणे दी कोशिश करा दे न? 26 पर दिख, तां सारे आम गल्लां करदा है कने कोई उसयो कोई कुथु नी बोलदा है; क्या होई सकदा की यहदी अगुवां सच्ची जाणी लिया है की, ऐई मसीह है? 27 इसयो तां असां जाणदे न, की ऐ कुथु दा है; पर मसीह जाल् ओणा है, तां कुसयो नी पता होणा है सै कुथु दा है।” 28 ताल् यीशुऐ मंदरे च उपदेश दिन्दे होऐ जौरे ने बोलया, “तुसां मिजो जाणदे न, कने ऐ भी जाणदे न की मै कुथु दा है: मै तां अपु ला नी आया है पर मिजो भेजणे बाला भरोसेमंद है, उसयो तुसां नी जाणदे न। 29 पर मै उसयो जाणदा है; क्योकि मै उदिया तरफा ला है कने मिजो उनी ही भेजया है।” 30 इसा गल्ला पर अगुवां उसयो पकडना चाया पर तमी कुनी भी उसयो गिरफ्तार नी किता, क्योकि उदा मरणे दा सही बकत हले दीकर नी आया था। 31 कने भिडा चे मतयां यीशुऐ पर भरोसा किता, कने बोलणा लग्गे, की जाल् मसीह ओणा है, तां उनी क्या इदे भी जादा अनोखे कम्म दसणे जडे इनी दसे न? 32 फरीसियां लोकां जो उदे बारे च ऐ गल्लां बल्ले-बल्ले करदे सुणाया; कने बड़े याजकां कने फरीसियां उसयो पकडने तांई मंदरे दे रखबाले भेजे। 33 इस पर यीशुऐ बोलया, “मै थोडिया देरा दीकर त्हाडे सोगी है; फिरी मै अण्णे भेजणे बाले दे बाल बापस चली जाणा है। 34 तुसां मिजो तोपणा है, पर मै मिलणा नी है; कने जिथ् मै है, ओथु तुसां आई नी सकदे।” 35 यहदी अगुवां अपु चे बोलया, इनी कुथु जाणा की सांझो इनी मिलणा ही नी है। क्या सै उना बाल जांगा जडे यूनान शेहरे च लग-लग जगा च रेंदे न, कने यूनान दे लोकां जो भी उपदेश दिया? 36 सै क्या बोलणा चांदा है, जडी उनी बोली, की तुसां मिजो तोपणा है, पर मै नी मिलणा है: कने जिथ् मै है, ओथु तुसां नी आई सकदे? 37 फिरी त्योहारे दे आखरी रोजे, जडा खास दिन है, यीशु खडोता कने जौरे ने बोलया, “अगर कोई त्रिणा है तां मेरे बाल ओऐ कने पाणी पिण्गे? 38 जडा मिजो पर भरोसा करणा, जियां पबित्र शाब् च लिख्या है, उदे मने चे पाण्णे दियां खड्डां जडियां जिन्दगी दिन्दियां सै चली पोणियां न।” 39 जाल् यीशुऐ ऐ गल्ल बोली, तां सै पबित्र आत्मा दे बारे च बोला दा था, सै उना सारयां जो मिलदा है जडे उस पर भरोसा करदे थे, क्योकि पबित्र आत्मा हल्ले दीकर नी उतरया था। क्योकि परमेस्वरे हले दीकर यीशु दी महिमा जो प्रगट नी कितया था। 40 ताल् भिडा चे केई लोकां ऐ सुणीकरी बोलया, “सच्ची ऐई है सै परमेस्वरे दा संदेश देणेबाला है, जिसदी असां उरमिंद रखियो है।” 41 लोकां बोलया, ऐ मसीह है, पर कुनी बोलया, “कजो? क्या मसीह गलील प्रदेश ला ओणा है? 42 पर पबित्र शाब् च लिख्या है, की मसीह दाऊदे दे बंशे ला कने बैतलहम शेहरे ला ओणा है, जिथ् दाऊद रेंदा था?” 43 इयां यीशुऐ दिया बजा ने लोकां च फूट पेई गई। 44 उना चे कितणे ही उसयो पकडणा चांदा थे, पर कोई भी उसयो गिरफ्तार नी करी सकया। 45 ताल् सगां बड़े याजकां कने फरीसियां बाल बापस ओऐ, कने उना सिपाईयां ला पुछया, “तुसां उसयो कनी लंदा?” 46 सिपाईयां जबाब दिता, की कुनी माणुऐ कदी भी ऐदिया गल्लां नी बोलियां। 47 फरीसियां उना जो जबाब दिता, “क्या

तुसां भी भटकी गियो न? 48 क्या सरदायां या फरीसियां चे कुनी भी उस पर भरोसा किता है? 49 पर ऐ लोक जडे मूसा दी व्यवस्था जो नी जाणदे, उना जो परमेस्वरे श्राप दितया है।” 50 नीकुदेसुसे, (जडा राती यीशुऐ बाल आया था कने उना चे इक था), उना ने बोलया, 51 “क्या साडी व्यवस्था कुसी माणुऐ जो जालू दीकर पेहले उदे बारे चे सुणीकरी समझी ना ले की सै क्या करता है, उसयो सजा दिन्दी है?” 52 उना उसयो जबाब दित, “क्या तुमी गलील प्रदेशे दा है? पबित्र शास्त्र च तोप कने तां तिजो पता चलणा, की गलील दे इलाके ला कोई परमेस्वरे दा संदेश देणेबाले प्रगत नी होंगा है।” 53 तालू सारे अपने-अपने घरे जो चली गे।

8 पर यीशु अपने चेलयां सोगी जैतून खां दे पाहडे पर गिया। 2 यीशु अगली ब्यागा तडके मंदरे दे अंगणे च बापस आया, कने मते सारे लोक उदे बाल आये; कने सै बेठी करी उना जो उपदेश देणा लग्गा। 3 जालू सै बोला दा ही था, तां धार्मिक व्यवस्था जो सिखाणे बाले कने फरीसी इक जनानिया जो लेई आये जडी व्यभिचर च पकड़ियो थी, कने उसा जो सामणे खरेडी करी यीशुऐ बोलया, 4 “गुरू-जी, ऐ जनानी व्यभिचर करदे पकड़ियो है। 5 व्यवस्था च मूसा सांझो हुकम दितया है की ऐसे माणुऐ जो पथर मारी करी मारी दितया: तां तू क्या बोलदा है की सांझो क्या करणा चाईदा?” 6 उना यीशुऐ जो परखणे तांई ऐ गल्ल बोली थी ताकि उना जो यीशुऐ पर दोष लाणे तांई कोई गल्ल मिल्ले, पर यीशु झुकी करी उंगलियां ने जमिना पर लिखणा लग्गा। 7 जालू सै उसला पछदे रे, तां उनी सिधे होईकरी उना ने बोलया, “तुसां चे जिनी भी कदी पाप नी कितया है, सै ही पेहले झसा जो पथर मारे।” 8 कने फिरी झुकी करी उंगलियां ने जमिना पर लिखणा लग्गा। 9 पर ऐ सुणीकरी बडयां ला लेईकरी छोटयां दीकर सारे इक-इक करी के निकली गे क्योकि सै जाणदे थे की सै पापी न, कने सिर्फ यीशु कने सै जनानी ओथु रेई गेई। 10 यीशुऐ सिधे होईकरी उना ने बोलया, “हे जनानी, सै कुथु गे? क्या कुनी तिजो सजा देणे दा हुकम नी दितो?” 11 उना बोलया, “प्रेभू जी, कुनी भी नी।” यीशुऐ बोलया, “मै भी तिजो सजा देणे दा हुकम नी दिन्दा; हण बापस घरे चली जा, कने हण दोवारा कदी जिंदगी च पाप मत करदी।” 12 तां यीशुऐ लोकां ने फिरी बोलया, “संसारे दी लौ मै है; जडा मेरियां गल्लां पर चलगा, उनी नेहरे च नी चलणा है, कने उसयो सै लो मिलणी जडी हमेशा दी जिन्दगी दिन्दी है।” 13 फरीसियां उसला बोलया; “तू अपणी गबाई अपु ही दिन्दा है, तेरी गबाई सच्ची नी है।” 14 यीशुऐ उना जो जबाब दित, “अगर मै अपणी गबाई अपु दिन्दा है, तमी मेरी गबाई ठीक है, क्योकि मै जाणदा है, की मै कुथु ला आया है कने कुथयो जांणा है; पर तुसां नी जाणदे की मै कुथु ला ओंदा है या कुथयो जांणा है। 15 तुसां लोक इन्तानी सोच ने बावकी लोकां दा न्याय करदे न; मै कुसदा भी न्याय नी करता है। 16 कने अगर मै न्याय करे भी तां मेरा न्याय सच्चा है; क्योकि मै किल्ला नी है, पर मै पिता परमेस्वरे सोगी है, जिनी मिजो भेजया है। 17 कने मूसा दितया व्यवस्था च लिखया भी है; दो जणया दी गबाई मिली करी ठीक होदी है। 18 इक तां मै अपु अपणी गबाई दिन्दा है, कने दूजा मेरा पिता परमेस्वर मेरी गबाई दिन्दा है जिनी मिजो भेजया है।” 19 उना यीशुऐ ला पुछया, तेरा पिता कुथु है? यीशुऐ जबाब दित, “ना तुसां मिजो जाणदे न, ना तुसां मेरे पिता परमेस्वर जो, अगर मिजो जाणदे होतें तां दिन्दा परमेस्वर जो भी जाणदे।” 20 ऐ गल्लतां उनी मंदरे दे अंगणे च उपदेश दिन्दे भंडार घरे च बोलियां, कने कुनी भी उसयो नी पकडया; क्योकि उदे मरणे दा बकत हले दीकर नी आया था। 21 यीशुऐ फिरी उना ने बोलया, “मै चली जाणा है, कने तुसां मिजो तोपणा है कने तुसां अपने पाप माफ होयो बिना ही मरी जाणा। जिथू मै जांदा है, ओथु तुसां नी आई सकदे न।” 22 इस पर यहदी अगुवां बोलया, क्या इनी अपने आपे जो मारी लेणा है, की ऐ बोला दा है, “जिथू मै जांदा है ओथु तुसां नी आई सकदे न?” 23 यीशुऐ उना ने बोलया, “तुसां इस संसारे च पैदा होयो न, पर मै स्वर्ग ला आया है, तुसां इस संसारे द न, मै संसारे दा नी है। 24 इस तांई मै तुसां ने बोलया, कि तुसां अपने पापां माफ होयो बिना ही मरी जाणा है, अगर तुसां भरोसा नी करदे की मै सै ही है जडा ओणे बाला है, तां तुसां मारी जाणा, कने तुहाडे पाप माफ नी किते जाणे न।” 25 यहदी अगुवां उसला पुछया, “तू कुण है?” यीशुऐ उना ने बोलया, जालू ला मै उपदेश देणा शुरू कितया है तालू ला मै दसदा आया है की मै सेई है। 26 मिजो तुहाडे न्याय दे बारे च तुसां जो मता कुछ बोलणा है, पर मिजो भेजणे बाला सच्चा है। कने जडा मै उसला सुणदा है, सै ही संसारे दे लोकां जो बोलदा है। 27 सै हले दीकर ऐ नी समझी सके थे की सांझो ने पिता परमेस्वर दे बारे च बोला दा

है। 28 तालू यीशुऐ बोलया, “जालू तुसां मिजो, माणुऐ दे पुत्रे जो उपर चढांगे, जालू ला मै उपदेश देणा शुरू कितया है तालू ला मै दसदा आया है की मै सेई है, कने अपने आपे ला कुछ नी करता है, पर जियां मेरे पिता परमेस्वरे मिजो सिखया है, तियां ही ऐ गल्लां बोलदा है। 29 कने मिजो भेजणे बाला मेरे सोगी है, उनी मिजो किल्ला नी छडया; क्योकि मै हमेशा ला ही कम्म करता है, जिस ने सै खुश होदा है।” 30 मतयां लोकां जिना यीशु जो ऐ गल्लां बोलंदे सुणया, उस पर भरोसा किता। 31 तालू यीशुऐ उना यहदी लोकां ने जिना उस पर भरोसा कितया था, बोलया, “अगर तुसां मेरी गल्लां च बणी रंगे, तां सच्ची मेरे चले न। 32 तुसां सच्च जो जाणना, कने सच्च ने तुहांजो अजाद करणा।” 33 उना उसयो जबाब दित, “असां तां अब्राहम दे बंशज न, कने कदी कुसदे गुलाम नी रे; फिरी तू कजो बोला दा, की तुसां अजाद होई जाणा?” 34 यीशुऐ उना जो जबाब दित, “मै तुसां ने सच्च-सच्च बोलदा है की जडा कोई पाप करा दा है सै पापे दा गुलाम है। 35 कने सेवक हमेशा घरे च नी रेंदा है; पर पुत्र हमेशा घरे च रेंदा है। (aiōn g165) 36 इस तांई अगर पुत्र तुहांजो अजाद करगा तां, तुसां सच्ची दे अजाद होणा है। 37 मै जाणदा है की तुसां अब्राहम दे बंशज दे न; तमी मेरे उपदेशां दा पालन नी करणा, तां तां तुसां मिजो मारी देणा चांदे न। 38 मै उना चिजा जो दसदा दा है जिना जो मै दिखया है जालू मै पिता परमेस्वरे सोगी था, कने तुसां सै ही करदे रेंदे न जडा तुसां अपने पिता ला सुणया है।” 39 उना उसयो जबाब दित, “साडा पूर्वज तां अब्राहम है।” यीशुऐ उना ने बोलया, अगर तुसां अब्राहम दे बंशज होंदे, तां जडा अब्राहम करता था सै कम्म तुसां भी करदे। 40 अब्राहमे जडा किता, सै करणे दितया बजाऐ तुसां मिजो मारणे दी कोशिश करा दे न, जिनी तुहांजो सच्चा बचन सुणया जडा परमेस्वरे ला सुणया ऐसा तां अब्राहमे नी कितया था। 41 तुसां अपने पिता सांई कम्म करदे न, उना उसयो बोलया, “असां व्यभिचारे ने नी जमयो न, साडा सिर्फ इक ही पिता है सै ही परमेस्वर है।” 42 यीशुऐ उना ने बोलया, “अगर परमेस्वर तुहाडा पिता होदा, तां तुसां मिजो ने प्यार रखदे; क्योकि मै परमेस्वरे दितया तरफा ला आया है; मै अपणिया इच्छा ने नी आया है, उनी ही मिजो भेजया है। 43 जडा मै कुछ बोलदा है सै तुसां कजो नी समझदे न? इस तांई तुसां मेरे संदेश जो मनणे तांई मना करदे न। 44 तुसां अपने पिता शैताने ला न, कने अपने पिता दियां जरस्तां जो पूरा करणा चांदे न। सै तां शुरू उना ही हत्यारा है, कने सै कदी भी सच्चा नी था, क्योकि सच्च उदे अंदर है ही नी: जालू सै जूठ बोलदा है, तां सै अपने सभावे ने जूठ बोलदा है; क्योकि सै जूठा है, बल्कि जूठ दा पिता है। 45 पर मै सच्च बोलदा है, इस तांई तुसां मेरा भरोसा नी करदे? 46 तुसां चे कुण मिजो पापी साबित करी सकदा है? अगर मै सच्चा है, तां तुसां मिजो पर भरोसा कनी करदे? 47 जडा कोई भी परमेस्वरे ने रिश्ता रखदा है, सै परमेस्वरे दियां गल्लां सुणदा है; कने तुसां इस तांई नी सुणदे क्योकि तुहाडा परमेस्वरे सोगी कोई रिश्ता नी है।” 48 ऐ सुणीकरी यहदी अगुवां उसयो बोलया, “क्या असां ठीक नी बोलंदे न, की तू सामरी है, कने तेरे अंदर बुरी आत्मा है?” 49 यीशुऐ जबाब दित, “मिजो च बुरी आत्मा नी है; पर मै अपने पिता परमेस्वर दा आदर करता है, कने तुसां मेरा निरादर करदे न। 50 मै अपणा आदर मान नी चांदा है, पर इक है जडा चांदा है मिजो आदर मान मिल्ले, कने सै सेई है जडा न्याय भी करता है। 51 मै तुसां ने सच्च-सच्च बोलदा है, अगर कोई माणु मेरियां शिक्षा पर चलगा, तां उनी कदी नी मरणा है।” (aiōn g165) 52 यहदी अगुवां उसयो बोलया, “हण सांझो पता लागी गिया की तिजो अंदर बुरी आत्मा है: अब्राहम मरी गिया है, कने परमेस्वरे दा संदेश देणेबाले भी मरी गियो न कने तू बोलदा है, अगर कोई मेरे संदेश जो मना तां उनी अनन्तकाल दीकर मरणा नी है।” (aiōn g165) 53 साडा पूर्वज अब्राहम तां मरी गिया है, क्या तू उसला भी बडा है? कने परमेस्वरे दा संदेश देणेबाले भी मरी गियो न, तू अपने आपे जो क्या समझदा है। 54 यीशुऐ जबाब दित, “अगर मै अपु अपणी तारीफ करे, तां मेरी तारीफ कुछ नी, पर जडा मिजो आदर मान दिन्दा है, सै मेरा पिता परमेस्वर है, कने जिसयो तुसां बोलंदे न, की सै तुहाडा परमेस्वर है। 55 कने तुसां तां उसयो नी जाणया, पर मै उसयो जाणदा है, कने अगर मै बोले की मै उसयो नी जाणदा है, तां मै तुहाडे सांई जूठा बगना: पर मै उसयो जाणदा कने उदे हुकम मनदा है। 56 तुहाडा पूर्वज अब्राहम मेरा दिन दिखणे दितया आसा च बडा मान था; कने उनी दिखया कने खुश होया।” 57 यहदी अगुवां उसयो बोलया, “हले दीकर तू पंजा सालां दा भी नी है, फिरी भी तू अब्राहम जो दिखया है?” 58 यीशुऐ उना ने बोलया, मै तुसां ने सच्च-सच्च

बोलदा है, अब्राहम पैदा होणे ला पेहले, मैं है। 59 तालू लोकां यीशुए जो मारणे ताई पथर चुके, पर यीशु लुकी करी मंदरे ला निकली गिया।

9 फिरी यीशुए जांदे बेले इक माणुए जो दिखया, जडा जमदा ही अन्ना था। 2 कने उदे चेलयां उसला पृछया, “गुरु जी, कुनी पाप कितया था की ऐ अन्ना जमया, इनी माणुए, या उदे माता पिता?” 3 यीशुए जबाब दिता, ना तां इनी पाप कितया था, ना तां इदे माता पिता: पर ऐ इस ताई अन्ना जमया, की परमेश्वरे दी शक्ति इदे च प्राप्त होए। 4 जिनी मिंजो भेजया है; सांझो झट ही उदे दितयो कम्मा जो पूरा करणा है: सै रात ओणे बाली है जिदे च कोई कम्म नी करी सकदा है। 5 जालू दीकर मैं संसारे च है, तालू दीकर संसारे दी लौ मैं है। 6 ऐ बोली करी उनी जमिना पर थक्या कने उसी थूके ने मिट्टी सेडी कने सेई मिट्टी उस अन्ने दिया हखी पर लगाई करी। 7 उसयो बोलया, “जा, कने अपना मु शीलोह दे कुण्डे च धोई ले” (शीलोह दे कुण्डे दा मतलब है भेजया है) तां उनी जाई करी घेता, कने जालू सै घरे जो बापस ओणा लग्गा तां उसयो मिलणा लगी पिया। 8 तालू उदे पडोसी कने होर लोक जिना उसयो पेहले भीख मंगदे दिखया था, इक दुज्जे ने बोलणा लग्गे, “क्या ऐ सै ही नी है, जडा बेईकरी भीख मंगदा था?” 9 केईयां लोका बोलया, ऐ सैई है, होरनी बोलया, नी, पर उदे सांई है उनी बोलया, “मैं सेई है जडा बेईकरी भीख मंगदा था।” 10 तां सै उसला पृछणा लग्गे, “तेरियां हखी दी लौ कियां बापस आई?” 11 उनी जबाब दिता, “यीशु नाऐ दे इकी माणुए मिट्टी सेडी, कने मेरियां हखी पर लगाई करी मिंजो बोलया, शीलोह दे कुण्डे च जाई करी मु धोई ले, मैं गिया कने धोई करी मिंजो मिलणा लगी पिया।” 12 उना उसयो पृछया, सै माणु कुथ है? उनी बोलया, “मैं नी जाणदा।” 13 लोक उस माणुए जो जडा पेहले अन्ना था उसयो फरीसियां बाल लेई गे। 14 जिस दिने यीशुए मिट्टी सेडी करी उदियां हखी ठीक कितियां थियां सै सब्दे दा रोज था। 15 फिरी फरीसियां भी उसयो पृछया; तेरी हखी कियां ठीक होईयां? उनी उना जो बोलया, “उनी मेरी हखी पर मिट्टी लाई, फिरी मैं धोई लेई, कने हुण मिंजो मिलणा लगी पिया।” 16 इस पर केई फरीसी बोलणा लग्गे, “ऐ माणु परमेश्वरे दिया तरफा ला नी है, क्योंकि सै सब्दे दे रोजे जो नी मंनदा है।” होरनी बोलया, इस सांई पापी माणु इस तरीके ने चमत्कार कियां दर्सी सकदा है? इसा गल्ला जो लेईकरी उना च फुट पेई गेई। 17 उना उस अन्ने ने फिरी बोलया, उनी तेरियां हखी ठीक कितियां न, तू उदे बारे च क्या बोलदा है? उनी बोलया, “सै परमेश्वरे दा संदेश देणेबाला है।” 18 पर यहूदी अगुवां जो भरोसा नी होया की ऐ अन्ना था कने हुण दिखणा लग्गी गिया है जालू दीकर उदे माता पिता जो सदया जितियां हखी ठीक होईयां थियां। 19 कने उना ला पृछया, “क्या ऐ तुहाडा पुत्र है, इसयो तुसां बोलदे थे की अन्ना जमया था? फिरी इसयो कियां मिलणा लगी पिया है?” 20 उदे माता पिता जबाब दिता, “असां तां जाणदे न की ऐ साडा पुत्र है, कने अन्ना जमया था। 21 पर असां ऐ नी जाणदे की हुण कियां करी इसयो मिलणा लगी पीया है; कने ना ऐ जाणदे की कुनी इसदियां हखी ठीक कितियां; सै अपने जबाब देणे तांई काफ़ी बडा है; उसी ला पृछी लिया; उसी ला पृछी लिया उनी अपने बारे च अपु बोली देणा है।” 22 ऐ गल्लां उदे माता पिता तां बोलियां क्योंकि सै यहूदी अगुवां ला डरदे थे; क्योंकि यहूदी अगुवे एका करी के बैठयो थे, की अगर कोई भरोसा करे की सै मसीह है, तै सै यहूदी जंज घर ला कडी देणा। 23 इसा बजा ने उदे माता पिता बोलया की सै सबालां दा जबाब देणे तांई बेतरा बडा है, उसला ही पीछी लिया। 24 तालू यहूदी अगुवां उस माणुए जो फिरी सदया जडा अन्ना था उसयो बोलया, “परमेश्वरे दे सामणे बायदा कर की तू सच्च बोलगा; असां तां जाणदे न की सै माणु पापी है।” 25 उनी जबाब दिता, “मैं नी जाणदा सै पापी है या नी: मैं तां बस इक गल्ल जाणदा है की मैं अन्ना था कने हुण दिखदा है।” 26 उना उसला फिरी पृछया, “उनी तेरे ने क्या किता? उनी तिजो कियां ठीक किता?” 27 उनी उना ने बोलया, “मैं तां तुसां ने बोली बैठया है, कने तुसां नी सुणया; हुण दुई बरी कजो सुणना चांदा न? क्या तुसां भी उदे चले बणना चांदे न?” 28 तालू उना उसयो बुरा भला बोलया कने बोलया, तू ही उदा चेला है; असां तां परमेश्वर दे संदेश देणेबाले मूसा दे चले न। 29 असां जाणदे न की परमेश्वरे मूसा ने गल्लां कितियां न, पर इस माणुए जो नी जाणदे न की कुथु ला आया है। 30 उनी उना जो जबाब दिता, ऐ तां हेरानिया दी गल्ल है की तुसां नी जाणदे कुथु दा है पर तमी उनी मेरियां हखी ठीक करी दितियां। 31 असां जाणदे न की परमेश्वर पापियां दी नी

सुणदा है पर अगर कोई परमेश्वरे दा भक्त हो, कने उदिया इच्छा पर चलदा है, तां सै उदी सुणदा है। 32 जालू ला इस संसारे जो बणया है तालू ला ऐ कदी नी सुणया, की कुनी भी जन्मे दे अन्ने दियां हखी ठीक कितियो होन। (aion g165) 33 अगर ऐ माणु परमेश्वरे दिया तरफा ला नी होंदा, तां उनी कुछ भी नी करी सकणा था। 34 उना उसयो जबाब दिता, तू तां बिलकुल पापां च जमया है, तू क्या सांझो सिखा दा है? तालू उना उसयो यहूदी जंज घर ला बाहर कडी दिता। 35 यीशुए सुणया, की उना उसयो यहूदी जंज घरे ला बाहर कडी दितया है; कने जालू उसला मिलया तां बोलया, “क्या तू परमेश्वरे दे पुत्रे पर भरोसा करदा है?” 36 उनी जबाब दिता, “श्रीमान जी, मिंजो दस की ऐ परमेश्वरे दा पुत्र कुण है, ताकि मैं उस पर भरोसा करी सके?” 37 यीशुए उसला बोलया, “तू मिंजो पेहले भी दिखया है कने मैं ही सै परमेश्वरे दा पुत्र है, जडा हुण तिजो ने गल्लां करा दा है।” 38 उनी बोलया, “प्रभु जी, मैं तिजो पर भरोसा करदा है।” कने उसयो एण्डवत किता। 39 तालू यीशुए बोलया, “मैं इस संसारे च इस न्याय जो करणे तांई आया है: ताकि अन्ने लोकां जो मिलणा लग्गी पोणा कने जिना लोकां जो मिलदा है सै अन्ने होई जाणे।” 40 जडे फरीसी उदे सोगी थे, उना ऐ गल्लां सुणीकरी उसला बोलया, “क्या तू बोला दा है की असां भी अन्ने न?” 41 यीशुए उना ने बोलया, अगर तुसां अन्ने होंदे तां पापी नी होणा था पर हुण बोलदे न, की सांझो मिलदा है, इस तांई तुहाडे पाप माफ नी किते जाणे न।

10 “मैं तुसां ने सच्च-सच्च बोलदा है, की अगर कोई भेडां दिया गुराला दे दरबाजे ला नी अंदर ओए, पर होर कुसी पासे ला चढी करी अंदर ओए, सै चोर कने डाकू है। 2 पर जडा दरबाजे च जांदा है सै भेडां दा पुआल है। 3 उदे तांई द्वारपाल दरबाजा खोली दिन्दा है, कने भेडां उदी अबाज पछेणदियां न, कने सै अपणियां भेडां जो ला लेई-लेईकरी सददा है कने बाहर लेई जांदा है। 4 कने जालू सै अपणियां सारियां भेडां जो चार की कडी बाँदा है, तां उना दे अग्ने-अग्ने चलदा है, कने भेडां उदे पिच्छे-पिच्छे बली पोंदिया न; क्योंकि सै उदी अबाज पछेणदियां न। 5 पर सै होरसी दे पिच्छे नी जांदियां, पर उना ला नठदियां न, क्योंकि सै होरसी दी अबाज नी पछेणदियां न।” 6 यीशुए उना ने ऐ कहाणी बोली, पर सै नी समझे की ऐ बोलणे दा क्या मतलब है। 7 तालू यीशुए उना ने फिरी बोलया, मैं तुसां ने सच्च-सच्च बोलदा है, की भेडां दा मैं ही दरबाजा है जिदे के भेडां अंदर ओदियां न। 8 जितणे मिंजो ला पेहले आये; सै सारे चोर कने डाकू न, पर मेरियां भेडां उना दी नी सुणी। 9 मैं ही दरबाजा है; अगर कोई मिंजो च अंदर जा तां परमेश्वरे उदा उद्धार करणा कने उनी अंदर बाहर ओंदे जांदे रेणा कने उसयो खाणे तांई मिलदी रेंणी। 10 चोर सिर्फ भेडां जो चोरणे कने मारणे कने खत्म करणे तांई ओदा है। 11 पर मैं इस तांई आया की उना जो सचकाई च जिन्दगी कने भरपूरी दी जिन्दगी मिल्ले। 11 खरा पुआल मैं है; खरा पुआल भेडां तांई अपणी जान देई दिन्दा है। 12 भाडे पर रखयो होया मजदूर जालू सै भेडिये जो ओंदे दिखणा तां उनी नठी जाणा। उनी भेडां जो छडी देणा क्योंकि सै उना दा पुहाल नी है कने भेडां उदियां नी न। इस तांई भेडिया उना पर हमला करदा है कने झुण्ड जो बखेरी दिन्दा है। 13 सै इस तांई नठी जांदा है की सै भाडे दा मजदूर है, कने उसयो भेडां दी चिंता नी है। 14 खरा पुआल मैं है, मैं अपणियां भेडां जो जाणदा है कने मेरियां अपणियां भेडां मिंजो जाणदियां न, 15 जियां पिता परमेश्वर मिंजो जाणदा है, कने मैं पिता परमेश्वरे जो जाणदा है। कने मैं भेडां तांई मरणे तांई तैयार है। 16 कने मेरियां होर भी भेडां न, जडियां इसा गुराला दियां नी न, मिंजो उना जो लोणा भी जस्की है, उना मेरी अबाज पछेणनी है; तां फिरी इक झुण्ड कने इक ही पुआल होंगा है। 17 मैं अपणियां मरजिया ने जान दिन्दा है, इस तांई पिता परमेश्वर मिंजो ने प्यार करदा है, ताकि मैं दोबारा जिन्दा होई जा। 18 कोई मेरिया जिन्दगिया जो मिंजो ला नी लेई सकदा है, इसयो मैं अपणिया इच्छा ने दिन्दा है। मिंजो अपणी जिंदगी देणे दा भी हक है, कने उना जो फिरी बापस लेणे दा भी हक है: क्योंकि ऐ सेई हुकम है जडा मिंजो मेरे पिता परमेश्वरे ला मिलया है। 19 इना गल्लां दिया बजा ने यहूदी लोकां च फिरी फुट पेई गेई। 20 उना च मते बोलणा लग्गे, इदे च बुरी आत्मा है, कने सै पागल है; इसदी मत सुणा। 21 होरनी बोलया, ऐ गल्लां ऐसे माणुए दियां नी न जिदे च बुरी आत्मा हो: इक बुरी आत्मा कदी भी नी इक अन्ने माणुए दी हखी ठीक करी सकदी है? 22 यक्षालेम शेर च यहूदी मंदरे दी स्थापना दा त्योहार था, कने सदियां दी रित थी। 23 यीशु मंदरे दे अंगणे च घुमा दा था, जिसयो लोक सुलैमान राजे दा ओसारा बोलदे न। 24 तालू यहूदी अगुवां

उसयो घरोटी लिया कने पुछ्या, “तू सांझो बडे लम्बे बकते दीकर दुबिधा च रख्या है। हण सांझो साफ-साफ दस। क्या तू मसीह है।” 25 यीशुए उना जो जबाब दिता, “मैं तुसां ने बोली दितया है, कने तुसां मेरा भरोसा करदे ही नी न, जडे कम्म मैं अपने पिता परमेश्वरे दे हके ने करदा है सै ही मेरे गबाह न। 26 पर तुसां इस ताई मेरा भरोसा नी करदे न क्योंकि तुसां मेरियां भेडां चे नी न। 27 मेरियां भेडां मेरी अबाज पछेणदियां न, कने मै उना जो जाणदा है, कने सै मेरे पिच्छे-पिच्छे चलदियां न। 28 मैं उना जो हमेशा दी जिन्दगी दिन्दा है, कने उना दा कदी नाश नी होणा, कने कोई उना जो मेरे हथां ला नी खोई सकदा है। (aiōn g165, aiōnios g166) 29 मेरा पिता परमेश्वर, जिनी उना जो मिंजो दितया है, सबना ला बडा है, कने कोई उना जो पिता परमेश्वरे दे हथे ला खोई नी सकदा। 30 मैं कने पिता परमेश्वर इक ही नी।” 31 यहूदी अगुवां उसयो मारणे ताई फिरी पथर चुके। 32 इस पर यीशुए उना ने बोलया, “मैं पिता परमेश्वरे दिया तरफा ला तुहांजो मते भले कम्म दसयो न, उना चे कुस कम्मे ताई तुसां मिंजो पथर मारा दे न?” 33 यहूदी अगुवां यीशुए जबाब दिता, “भले कम्म ताई असां तिजो पथर नी मारा दे न, पर परमेश्वरे दी निंदा करणे दिया बजा ने कने इस ताई की तू माणु होईकरी अपने आपे जो परमेश्वरे बोलदा है।” 34 यीशुए उना जो जबाब दिता, क्या पबित्र शास्त्र च ऐसा नी लिखया है की परमेश्वरे अपने लोकां दे अगुवां ने बोलया की, तुसां ईश्वर न? 35 तुसां जाणदे न की पबित्र शास्त्र च कुछ भी बदलया नी जाई सकदा। इस ताई अगर उदे लोकां दे अगुवां जो “ईश्वर” बोलया गिया हो। 36 तां जालू मैं बोलदा है, मैं परमेश्वरे दा पुत्र हूँ तां तुसां मिंजो कजो बोलदे न, “तू निंदा करा दा है।” मैं सै ही है जिसयो पिता परमेश्वरे लग कितया कने मिंजो संसार च भेजया है। 37 अगर मैं अपने पिता दा कम्म नी करदा तां, तुसां मेरा भरोसा मत करा। 38 पर अगर मैं करदा है, तां चाऐ मेरा भरोसा ना भी करा, पर उना कम्मा दा तां भरोसा करा, तालू तुसां जो पता चलणा कने समझणा की पिता परमेश्वर मिंजो च रेंदा है, कने मै पिता परमेश्वर च रेंदा है। 39 तालू उना फिरी यीशुए जो पकडने दी कोशिश किती पर सै उना दे हथे ला बची करी निकली गिया। 40 फिरी यीशु यरदने खड़ा दे पर उसा जगा पर चली गिया, जिथू यहून्ना पेहले बपतिस्मा दिन्दा था, कने ओथू रिया। 41 कने मते लोक उदे बाल आई करी उसला बोलदे थे, “यहून्ना तां कोई चमत्कार नी दसया, पर जडा कुछ यहून्ना इदे बारे च बोला दा सै सारा सच्च था।” 42 कने ओथू मतयां उदे पर भरोसा कित।

11 बैतनिय्याह ग्रां च इक लाजर नाऐ दा माणु बीमार था। मरियम कने मार्था उदियां बहेणा थियां। 2 ऐ सै ही मरियम थी जिना बादे च प्रभुऐ दे पैरा उपर इन्न नियोरी करी उदे पैरां जो अपने बाला ने पुंजया था, उसा दा ही भाई लाजर बीमार था। 3 उसा दिया बहेणा यीशुऐ जो बोली भेजया, “प्रभु जी, दिख, जिसयो तू प्यार करता है, सै बीमार है।” 4 ऐ सुणीकरी यीशुऐ बोलया, “ऐ बिमारी मौत ने नी मुक्करी, पर परमेश्वरे दिया महिमा ताई है, ताकि उसला मिंजो, परमेश्वरे दे पुने दी महिमा हो।” 5 कने यीशु मार्था कने उदी बहेण कने लाजरे ने प्यार करदा था। 6 पर उनी सुणाया, की सै बीमार है, जिसा जगा सै था, ओथू दो रोज होर स्की गिया। 7 फिरी दो दिन बाद उनी चेलयां ने बोलया, “ओआ, असां फिरी यहूदिया प्रदेश दे इलाके दे बैतनिय्याह शेहरे जो चलदे न।” 8 चेलयां उसयो बोलया, “गुरू जी, हुंणी तां यहूदी अगुवे तिजो पथर मारणा चांदे थे, क्या फिरी भी तू ओथू चलया है?” 9 यीशुऐ जबाब दिता, “क्या दिने दे बाहरा घटे नी होंदे न? अगर कोई दिने चले, तां उसयो ठोकर नी लगदी, क्योंकि सै इस संसारे दी लौईं ने मतलब की सूरजे दी लौईं ने दिखदे न। 10 पर अगर कोई राती जो चले, तां उसयो ठोकर लगणी, क्योंकि तालू उदे च लौ नी है।” 11 इदे बाद यीशुए उना ने बोलया, “साडा मित्र लाजर सोई गिया है, पर मै उसयो जगणा चलया है।” 12 तालू चेलयां उसयो बोलया, “प्रभु जी, अगर सै सोई गिया है, तां उनी ठीक ठाक होई जाणा।” 13 यीशुऐ तां उदिया मौता दे बारे च बोलया था: पर सै समझे की उनी निद्रां ने सोई जाणे दे बारे च बोलया। 14 तालू यीशुए उना ने साफ बोली दिता की, लाजर मरी गिया है। 15 कने मै तुहाडे फायदे ताई खुश है की मैं ओथू नी था जिसने तुसां भरोसा करन। पर हण ओआ, असां उदे बाल चलदे न। 16 तालू थोमा जिसयो दिद्रुसुस बोलदे न, अपने सोगी बाले चले ने बोलया, “ओआ, असां भी उदे सोगी मरणे ताई चलदे न।” 17 जालू यीशुए जो बैतनिय्याह ग्रां च आई करी ऐ पता चला की उसयो चार दिन पेहले ही कबरा च दफनाई दितया है। 18

बैतनिय्याह ग्रां यरुशलम शेहर दे नेडे लगणा कोई तिन किलो मीटर था। 19 कने मते यहूदी लोक मार्था कने मरियम बाल उदे भाईऐ दे बारे च शान्ति देणे ताई आयो थे। 20 जालू मार्था यीशुए दे ओणे दी खबर सुणीकरी यीशुए ने मिलणा गई, पर मरियम घरे बेई रेई। 21 मार्था यीशुए जो बोलया, “प्रभु जी, अगर तू ऐथू होंदा, तां मेरा भाई कदी नी मरदा। 22 कने हण भी जाणदी है, की जडा कुछ तू परमेश्वरे ला मंगणा, परमेश्वरे तिजो देणा।” 23 यीशुए उसा जो बोलया, “तेरा भाई फिरी जिंदा होई जाणा।” 24 मार्था उसयो बोलया, मैं जाणदी है, “न्याय दे रोजे जालू हर कोई जिन्दा होई जाणा तालू उनी भी जिन्दा होई जाणा।” 25 यीशुए उसा ने बोलया, “मैं सै है जडा मरयो लोकां जो जिन्दगी च बापस लोंदा है, जडा कोई मिंजो पर भरोसा करदा है सै अगर मरी भी जा तमी, उनी जी अणता। 26 कने जडा कोई मिंजो पर भरोसा करदा है सै जिन्दा है, कने उनी उनी अनंतकाल दीकर नी मरणा। मार्था तू क्या इसा गल्ला पर भरोसा करदी है?” (aiōn g165) 27 उनी उसयो बोलया, “हाँ, प्रभु जी, मैं भरोसा करी लिया है, की परमेश्वरे दा पुत्र मसीह जडा संसारे च ओणे बाला था, सै तू ही है।” 28 ऐ बोली करी सै चली गई, कने अपणी बहेण मरियम जो होले करी सदीकरी बोलया, “गुरू ऐथू ही है, कने तिजो सदा दा है।” 29 सै सुणदे ही झट उठी करी उदे बाल आई। 30 (यीशू हले दीकर भी ग्रांऐ ला बाहर ही था, पर उसा ही जगा च था जिथू मार्था उसला मिलली थी।) 31 तालू जडे यहूदी लोक मरियम सोगी उसा दे घरे थे, कने उसा जो दिलासा देदे थे, कने दिखया की मरियम झट उठी करी बाहर चली गई। इस ताई सै उसा दे पिच्छे-पिच्छे गे, ऐ सै समझीकरी की सै कबरा पर रोणे ताई जा दी है। 32 जालू मरियम ओथू पुजुजी जिथू यीशु था, तां उसयो दिखदे ही उदे पैरां च पेईकरी बोलया, “प्रभु जी, अगर तू ऐथू होंदा तां मेरा भाई नी मरदा।” 33 जालू यीशुए उसा जो कने उसा सोगी आयो यहूदी लोकां जो रोंदे दिखया, तां यीशुए बडा ही दुखी होईकरी उना ला पुछ्या, 34 कने बोलया, तुसां उसयो कुथू दफनाया है? उना उसयो बोलया, “प्रभु जी, चली करी दिखी ले।” 35 यीशुऐ दिया हखी चे आसू निकलना लग्ये। 36 तालू यहूदी लोक बोलणा लग्ये, “दिखा, सै उसने कदेया प्यार रखदा था।” 37 पर उना चे कितणे ही बोलया की, “इनी तां उस अने दियां हखी ठीक कितियां न, क्या ऐ लाजरे जो मरणे ला नी बचाई सकदा था?” 38 यीशू मने च बडा ही दुखी होया कने कबरा पर आया, सै इक गुफा थी, कने गुफा दे मुए पर इक पथर रखया होया था। 39 यीशुऐ बोलया, “पथरे जो हटा।” उस मरयो दी बहेण मार्था बोलणा लग्यी, “प्रभु जी, उदे चे तां हण मुस्क ओआ दी है, क्योंकि उसयो मरयो चार रोज होई गियो न।” 40 यीशुऐ उस जो बोलया, “क्या मैं तिजो ने बोलया नी था की अगर तू मिंजो पर भरोसा करगी तां तू परमेश्वरे दी महिमा जो दिखगी।” 41 तालू उना सै पथर हटाया, फिरी यीशुऐ स्वर्ग पसे दिखीकरी के बोलया, “पिता परमेश्वर जी, मैं धन्यावाद करदा है की तू मेरी सुणी लेई है।” 42 पर जडी भीड अखे बखे खडोतियो है, उना दिया बजा ने यीशुऐ जारे ने बोलया, “मैं जाणदा है, की तू हमेशा मेरी सुणदा है, जिसने की सै भरोसा करन, की तू मिंजो भेजया है।” 43 ऐ बोली करी उनी जोरे ने पुकारया, “हे लाजर बाहर निकली आ।” 44 जडा मरी गिया था, सै बाहर आया, कने उदा सारा शरीर पट्टियां च कने मु कपडे च लपेटया होया था कने यीशुऐ उना जो बोलया, “इसयो खोली करी जाणा दिया।” 45 तालू जडे यहूदी लोक मरियमा दे सोगी आयो थे, उना उदा ऐ कम्म दिखया कने उना चे मतयां उदे पर भरोसा कित। 46 उना चे कितणयां ही फरीसियां बाल जाई करी यीशुऐ दे कम्मा दी खबर दिती। 47 इस पर बड्डे याजकां कने फरीसियां दी मसलाभा दे लोकां जो गठेरी करी बोलया, “असां क्या करगे? ऐ माणु तां बडे चमत्कार दसदा है। 48 अगर असां इसयो हण भी नी रोक्दे न, तां सारयां उस पर भरोसा करी लेणा की सै ही मसीहा है, कने रोमी लोकां आई करी साडे मंदरे कने देशे पर कब्जा करी लेणा।” 49 तालू उना दिया सभा चे कैफा नाऐ दा इक माणु जडा उस साले दा महायाजक था, उनी बोलया, “तुसां कुछ भी नी जाणदे; 50 कने ना ऐ समझदे न, तुहाडे ताई ऐ ठीक है, की साडे लोकां ताई इक माणु मरे, नी की सारे इस्त्राएल देशे दे लोकां दा नाश होई जा।” 51 ऐ गल्ल उनी अपने आपे ला नी बोली, पर उस साले दे महायाजक दे स्पे च, उनी ऐ भविष्यवाणी किती, की यीशुऐ पूरे इस्त्राएल देशे ताई मरणा। 52 कने ना सिर्फ इना ताई ही नी। पर उनी परमेश्वरे दी होर ओलादी ताई भी मरणा जडे इस संसारे च बिखरयो न, ताकि उना जो गठेरी सके। 53 यहूदी अगुवे उस रोजे ला ही उसयो मारने दी सलाह करणा लग्यी पे। 54 इसा साजिशा दिया बजा ने

यीशुएे यहूदियां दे बिच सेरे आम घुमणा बंद करी दिता; यीशु ओथु ला सुनसान जगा दे नेडे बाले प्रदेश दे इक्वाम नापे दे इकरी शेहेर जो चली गिया, कने अपने चेलयाँ सोगी ओथु ही रेंगा लग्गा। 55 कने यहूदिया दे फसह दे त्योहारे दा बकत नेडे था, कने मते लोक फसह ला पेहले यरुशलेम शेहर जो गे ताकि मंदरे च अपने आपे जो शूद्र करन। 56 कने यीशुएे जो तोपदे कने मंदरे च खडोई करी अपु चे बोलणा लग्गे, “तुसां क्या समझदे न? क्या सै त्योहारे च नी ओगा?” 57 कने बड़े याजकां कने फरीसियां ऐ हुकम दितया था, की अगर कुस्यो पता लग्गे की यीशु कुथु है तां दसनयो, ताकि उसयो गिरफ्तार करी सकन।

12 फिरी यीशु फसह दे त्योहारे ला छे रोज पेहले बैतनिय्याह ग्रां च आया, जिथु लाजर जो मरयां चे जिन्दा किता था। 2 ओथु उना उदे ताई धाम तैयार किती, कने यीशुएे जो आदर मान देणे ताई मर्यां सेवा करा दी थी, कने लाजर भी उना चे इक था, जडे उदे सोगी रोटी खांणे ताई बैठयो थे। 3 तालू मरियमा जटमासी दा अथा सेर मेंगा इने लेईकरी यीशुएे दे पैरां पर नियोरया, कने अपने बालां ने उदे पैर पूजे, कने इने दिया खूशबुआ ने सारा धर सुगन्धित होई गिया। 4 पर उदे चेलयाँ चे यहूदा इस्करियोती नापे दा इक चेला था जडा उसयो पकड़वाणा चांदा था, बोलणा लग्गा, 5 “ऐ इर तिनसो दीनारां च बेची करी गरीबां जो कनी देई दिता?” 6 उनी ऐ गल्ल इस ताई नी बोली की, की उसयो गरीबां दी चिंता थी, पर इस ताई की सै चोर था कने उदे बाल उना दे पैसयां दी थेली रेदी थी, कने उसा च कोई कुछ पांटे थे, सै कडी लेंदा था। 7 यीशुएे बोलया, “इसा जो तंग मत करा, इना बकत ला पहले मिंजो दफनाणे दी तैयारी ताई ऐ करा दी है। 8 गरीबां तां तुहाडे सोगी हमेशा रेंगा है, पर मैं तुहाडे सोगी हमेशा नी रेंगा।” 9 जालू लोकां सुणया की यीशु ओथु था तां तालू लोकां दी बडी भीड़ ओथु आई। सै सिर्फ यीशु जो ही नी पर लाजर जो भी दिखणा आयो थे जिसयो दी मरयां चे जिन्दा किता था। 10 तालू बड़े याजकां लाजरे जो भी मारणे दी योजना बणाई। 11 क्योंकि उदिया बजा ने मते लोक उना जो नी अपनां दे, क्योंकि उना यीशुएे पर भरोसा कितया। 12 दुज्जे दिने मतयां लोका जडे त्योहरे च आयो थे, ऐ सुणीकरी, की यीशु यरुशलेम शेहर च ओआ दा है। 13 इस ताई उना खजूरी दियां डालियाँ लियां, कने उसला मिलणे ताई निकले, कने चिलाणा लग्गे, “होशाना। इसाएले दा राजा धन्य हो, जडा प्रभु दे नापे ने ओंदा है।” 14 जालू यीशुएे जो इक गधे दा बच्चा मिल्ला तां सै उस पर बैठी करी यरुशलेम शेहर च आया, ऐ तियां ही होया जियां की पबित्र शाब्ब च लिखया है। 15 “हे यरुशलेम शेहर दे लोकां, मत डरा; दिख तेरा राजा गधे दे बच्चे च सवार होईकरी ओआ दा है।” 16 यीशुएे दे चले, ऐ गल्लां पेहले नी समझे थे; पर जालू यीशुएे दी महिमा प्रगट होई, तां उना जो याद आया, की जडा कुछ भी यीशुएे ने होया सै ठीक तियां ही होया जियां की पबित्र शाब्ब च लिखया था; कने लोका उदे कने ऐदिया व्यवहार कितया था। 17 तालू भिडा दे लोकां जडे उस बेले यीशुएे सोगी थे, सै दुज्जे लोकां जो दसणा लग्गे की उनी लाजरे जो कबरा ला सदीकरी, उसयो जिन्दा करी दिता। 18 मते लोक यीशुएे ने मिलणे ताई आपे, क्योंकि उना इस चमकार दे बारे च सुणया था। 19 तालू फरीसियां अपु चे बोलया, “सोचा असां कुछ नी करी सकदे न, दिखा, संसार च हर कोई उदे पिच्छे होई चलया है।” 20 ओथु कुछ युनानी लोक थे जडे फसह दे त्योहारे बेले भक्ति करणे ताई यरुशलेम शेहर च आयो थे। 21 उना गलील प्रदेश दे बैतसेदा शेहेर दे रेणेबाले फिलिप्पुस दे बाल आई करी उसला बिनती किती, “श्रीमान असां यीशुएे ने मिलणा चांदे न।” 22 फिलिप्पुस आई करी अन्दियास ने बोलया; तालू अन्दियास कने फिलिप्पुस दोनो जाई करी यीशुएे जो बोलया। 23 इस पर यीशुएे उना जो बोलया, सै बकत आई गिया है, की मेरी, माणुएे दे पुत्रे दी महिमा हो। 24 मै तुसां ने सच्च-सच्च बोलदा है, की जालू दीकर कणका दा दाणा जमिना च पेईकरी मरी नी जांदा है, सै किल्ला ही रेंदा है पर जालू मरी जांदा है, तां मते फल दिन्दा है। 25 जडा अपने प्राणा ने प्यार करदा है, सै उना जो गबाई दिन्दा है; पर जडा इस संसारे च अपने प्राणा जो प्यार नी करदा है; तां उनी हमेशा दिया जिन्दगिया ताई उदी रखा करणी है। (aiōnios g166) 26 अगर कोई मेरी सेवा करे, तां मेरा चेला बणे; कने जिथु मै है ओथु मेरे सेवके भी होणा; अगर कोई मेरी सेवा करे, तां पिता परमेस्वरे उदा आदर करणा। 27 हुण मैं बडा बेचेन होआ दा है। इस ताई मै क्या बोले? पिता जी, मिंजो इस दुखे दिया घडिया ला बचाई ले? पर मैं संसार च इस ताई आया की दुख झेले कने मरी जां। 28 हे पिता परमेस्वर तू प्रगट कर की तू कितणा महिमाय है। तालू ऐ आकाशवाणी

होई, “मै प्रगट कितया है की मै कितणा महिमा बाला है कने मै ऐ फिरी प्रगट करणा।” 29 तालू सै लोक जडे खडोई करी अबाज सुणा दे थे, उना बोलया, की बदल गरजया, कने होरनी बोलया, “कोई स्वर्गदूत उसने बोलया।” 30 इसी पर यीशुएे बोलया, “ऐ अबाज तुहाडे भले ताई थी, मेरे ताई नी है। 31 हुण सै बकत है जालू परमेस्वरे संसारे दे लोकां दा न्याय करणा, कने हुण सै बकत है जालू यीशुएे इस संसारे दे सरदार शैताने दी शक्ति जो खत्म करणा। 32 कने अगर मै धरतिया ला उपर चढाया जांगा, तां सारयां जो अपने बाल लेई ओणा।” 33 इयां बोली करी उनी ऐ प्रगट करी दिता, की सै कियां मरणे बाला था। 34 इसा पर लोका उसला बोलया, “असां पबित्र शाब्ब दा है, की माणुएे उचने है, की मसीहे हमेशा जिन्दा रेंगा है, फिरी तू कजे बोला दा है, की माणुएे दे पुत्रे जो उचने पर चढाणा खरूरी है? ऐ माणुएे दा पुत्र कुण है?” (aiōn g165) 35 यीशुएे उना ने बोलया, “(लो) हुण थोडिया देरा दीकर तुहाडे बिच है, जालू दीकर लौ तुहाडे सोगी है तालू दीकर चली रिया; इयां ना होए की नेहेरा तुहांजो घेरी ना ले; जडा नेहेरे च चलदा है उसयो नी पता होंदा की कुथयो चलया है। 36 जालू दीकर लौ तुहाडे सोगी है, लौ पर भरोसा करा की तुसां लौ दी ओलाद बणन।” ऐ गल्लां बोली करी यीशु चली गिया कने अपने आपे जो उना ला लुकाई रखया। 37 कने यीशुएे उना दे सामणे इतणे चमत्कार दस्से, तमी उना उदे पर भरोसा नी किता; 38 ऐ इस ताई होया ताकि जडा यशायाह परमेस्वरे दा संदेश देणेबाले बोलया था सै सच्च होई जा; “प्रभु जी, साडे संदेश पर कुनी भरोसा किता है? कने परमेस्वर दी पराक्रमी शक्ति कुदे पर प्रगट होई?” 39 इसा बजा ने सै भरोसा नी करी सके, क्योंकि यशायाहे फिरी बोलया: 40 परमेस्वरे उनी दी हठी अनियां करी दितियां ताकि सै दिखी नी सकन, कने उना दे दिमाग बंद करी दिते ताकि सै समझी नी सकन। नितां उना मिंजो पर भरोसा करी लेणा कने मै उना जो ठीक करी दिन्दा। 41 यशायाहे ऐ गल्लां इस ताई बोलियां, की उनी बकते ला पेहले उदी महिमा दिखी, कने उदे बारे च गल्लां कितियां। 42 मते अगुवां भी उदे पर भरोसा किता, पर फरीसियां दिया बजा ने सबना सामणे नी मंन्दे थे, इस डरे ने नी की उना जो यहूदी जंज घर ला कडी दिगे। 43 क्योंकि उना जो परमेस्वरे दी तारीफ ला, माणुएे दी तारीफ जादा प्यारी लगदी थी। 44 यीशुएे भिडा जो पुकारी करी बोलया, “जडा मेरे पर भरोसा करदा है, सै सिर्फ मिंजो पर नी पर मिंजो भेजणे बाले परमेस्वरे पर भरोसा करदा है। 45 कने जडा मिंजो दिखदा है, सै मिंजो भेजणे बाले परमेस्वरे जो दिखदा है। 46 मै संसारे च इक लौ बणी करी आया है ताकि जडा मिंजो पर भरोसा करणा सै कदी नेहेरे च नी रेंगा। 47 अगर कोई मेरियां गल्लां सुणीकरी उना दा पालन नी करे, तां मै उसयो दोषी नी बोलणा है, क्योंकि मै संसारे दे लोकां जो दोषी ठहराणे ताई नी आया, पर संसारे दा उद्धार करणे ताई आया है।” 48 जडा मिंजो तुच्छ समझदा है कने मेरियां गल्लां जो नी मंन्दा है, उना दा न्याय करणे बाला तां इक ही है, मतलब की जडा बचन मै बोलया है, उनी उसयो आखरी दिना च दोषी बणाणा। 49 क्योंकि मै अपने हक ने ऐ गल्लां नी कितियां न, पर पिता परमेस्वर जिनी मिंजो भेजया है उनी मिंजो हुकम दितया है की क्या-क्या बोले? 50 कने मै जाणदा है, की उदे हुक्मा जो मनणा हमेशा दिया जिन्दगिया दा रस्ता है, इस ताई मै तुसां जो सेई बोलदा है जडा पिता परमेस्वर मिंजो बोलदा है। (aiōnios g166)

13 फसह दे त्योहारे ला पेहले जालू यीशुएे जाणी लिया, की मेरा सै बकत आई गिया है की मै संसारे जो छडी करी अपने पिता परमेस्वर बाल बापस चली जां, यीशु अपने चेलयां सोगी हमेशा प्यार करदा रिया, जडे संसार च यीशुएे सोगी थे, जदिया प्यार सै करदा था, आखरी दीकर सियुदा ही प्यार रखदा रिया। 2 यीशु कने उदे चले राती दा खाणा खा दे थे। शैताने पेहले ही यीशुएे जो धोखा देणे ताई शमीन दे पुत्र यहूदा इस्करियोती दे मने च ऐ पाई दितया था, की उसयो पकड़वाई दे। 3 जालू यीशु ऐ जाणदा था की पिता परमेस्वरे मिंजो हर चिजा पर हक दितया है कने मै परमेस्वरे दे बखे ला आया है, कने परमेस्वरे बाल बापस जाणा है। 4 खाणा खांटे बेले उठी करी यीशुएे अपने बाहरी कपडे खोली दिते, कने अंगोछा लेईकरी अपना लक्के च बनी लिया। 5 तालू भांडे च पाणी लेईकरी चेलयां दे पैर धोई करी कने जडा अंगोछा लक्के च लपेटया था उसला पुंजणा लग्गा। 6 जालू यीशु शमीन परतस दे बखे आया तालू परतसे उसयो बोलया, “प्रभु जी, तू कजे मेरे पैरां धोणा लगया है?” 7 यीशुएे उसयो जबाब दिता, “जडा मै करदा है, तू हुण इदा मतलब नी जाणदा है, पर कुछ बकते बाद जाणना है।” 8 परतसे उसयो बोलया, मै तुसां जो अपने पैरां जो कदी नी धोणा

देणा। ऐ सुणीकरी यीशुऐ उसयो बोलया, “अगर तू मिजो अपने पैर नी धोणे नी दिते, तां तू मेरा चेला नी है।” (aiōn g165) 9 शमौन पतरसे उसयो बोलया, “प्रभु जी, तां मेरे पैर ही नी बल्कि हथ कने सर भी धोई दे।” 10 यीशुऐ उसयो बोलया, “इक माणु जडा नोहोई बैठया है, सै बिलकुल साफ है, उसयो सिर्फ अपने पैरा जो धोणे दी जरूरत है। कने तुसां सारे शुद्ध न सिर्फ इकी जो छुडी करी।” 11 सै तां अपयों पकड़ाणे बाले जो जाणदा था तांई तां उनी बोलया, “तुसां सारे दे सारे शुद्ध नी ना।” 12 जालू यीशु उना दे पैरां जो धोई बैठा तां सै अपने बाहरे बाले कपडे पाई करी फिरी बेई गया कने उना ने बोलणा लग्गा, “क्या तुसां समझे की मैं तुहाडे सोगी क्या कितया है? 13 तुसां मिंजो गुरू, कने प्रभु, कने ठीक ही बोलदे न, क्योकि मैं तुहाडा गुरू कने प्रभु है। 14 अगर मैं प्रभु कने गुरू होईकरी तुहाडे पर धोते, तां तुहांजो भी ना बोलकी इक दुज्जे दे पैर धोई करी मिंजो ला सिखणा चाईदा। 15 क्योकि मैं तुहांजो इक नमना दुज्जे दितया है, की जियां मैं तुहाडे सोगी किता, तुसां भी तियां ही करा। 16 मैं तुसां ने सच्च-सच्च बोलदा है, नोकर अपने मालिके ला बडा नी होंदा, कने ना भेजया होया अपने भेजणे बाले ला बड्डा होंदा। 17 हुण तां तुसां इना गल्लां जो जाणदे न, तां इना जो करा ताकि तुसां भी धन्य होना। 18 मैं तुसां समना दे बारे च नी बोला दा है: जिना जो मैं चुणयां है, उना जो मैं जाणदा है: पर ऐ इस तांई होआ दा है ताकि पबित्र शाखां च जडा लिखया है सै पूरा हो, जिनी मेरे सोगी रोटी खादी, उनी मिंजो धोखा दिता है। 19 हुण मैं तुहांजो उदे होणे ला पहले दसी दिन्दा है ताकि जालू होई जांगा तां तुसां भरोसा करनयो की मैं सेई है। 20 मैं तुसां ने सच्च-सच्च बोलदा है, की जडा मेरे भेजयां जो अपनांदा है, सै मिंजो भी अपनांदा है, कने जडा मिंजो अपनांदा है, सै मेरे भेजणे बाले जो भी अपनांदा है।” 21 ऐ गल्लां बोलणे बाद यीशु बडा ही दुखी होया कने अपने चेलयां जो दसया, “मैं तुसां ने सच्च-सच्च बोलदा है, की तुसां चे इकी जणे मिंजो पकड़ाणा है।” 22 चले ऐ शक करदे होऐ, इकी दुरे पासे दिखणा लग्गे, ऐ कुसदे बारे च बोला दा है। 23 उदे चेलयां चे इक जिसने यीशु प्यार रखदा था, यीशुऐ दे बखे बैठया था। 24 तालू शमौन पतरसे उदे पासे इशारा करी के पुछया, “दसी दे तां, सै कुसदे बारे च बोला दा है?” 25 तालू उनी भी यीशुऐ दे बखे जाई करी पुछया, “प्रभु जी, सै कुण है?” 26 यीशुऐ जबाब दिता, “जिसयो मैं ऐ रोटीया दा टुकडा चटनिजा च डोबी करी दिगा, सै ही है।” कने उनी टुकडा चटनिजा च डोबी करी शमौने दे पुत्र यहदा इस्करियोती जो दिता। 27 कने जियां ही यहदा टुकडा खादा, यीशुऐ उसयो बोलया, “जडा तू हुण करणा जा दा है, सै झट कर, तालू ही शैतान उदे च बडी गया। 28 खाणा खाणे बालयां चे बाकी कुसियो भी पता नी था की यीशुऐ उसयो ऐसा कजो बोलया। 29 यहदा बाल पैरया दी थेली रेंदी थी, इस तांई कुनी-कुनी समझया, की यीशु उसयो बोला दा है, की जडा कुछ सांझो त्योहारे तांई चाईदा सै खरीदी ले, या गरीबां जो कुछ दे। 30 तालू सै रोटी दे टुकडे जो खाई करी झट बाहरे जो चली गया, कने राती दा बकत था। 31 जालू सै बाहर चली गया तां यीशुऐ बोलया, हुण मेरी, माणुऐ दे पुत्रे दी महिमा होई, कने परमेश्वरे दी महिमा मिंजो च होई; 32 कने परमेश्वरे अपने पुत्रे दी महिमा करणी, कने तोल्ल्ही ही करणी है। 33 हे प्यारे बच्चो, मैं होर थोडी देर तुहाडे बखे है; फिरी तुसां मिंजो तोपणा, कने जियां मैं यहदियां जो बोलया, जिथुं मैं जाणा, ओथुं तुसां नी आई सकदे न, तियां ही मैं हुण तुहांजो भी बोलदा है। 34 मैं तुहांजो इक नौआं हुकम दिन्दा है, इक दुज्जे ने तियां ही प्यार करा: जियां मैं तुसां ने प्यार करदा है, तियां ही तुसां भी इक दुज्जे ने प्यार करा।” 35 अगर तुसां इक दुज्जे ने प्यार करगे, तां हर कुसी जो पता चरणा की तुसां मेरे चले न। 36 शमौन पतरसे उसयो बोलया, “प्रभु जी, तू कुथुं जाणा है?” यीशुऐ जबाब दिता, जिथुं मैं जाणा है, ओथुं तू मेरे पिच्छे नी आई सकदा? पर बाद च तुसां मेरे पिच्छे ओणा। 37 पतरसे उसयो बोलया, “प्रभु जी, हुण मैं तेरे पिच्छे कनी आई सकदा है? मैं तां तेरे तांई अपनी जान देणे तांई प्यार है।” 38 यीशुऐ जबाब दिता, क्या तू मेरे तांई मरणा है? मैं तिजो ने सच्च-सच्च बोलदा है की सुर्गे जो बांग देणे ला पहले तू मिंजो तिन्न बरी बोलणा की तू मिंजो नी जाणदा।

14 “तुहाडा मन दुखी ना हो, तुसां परमेश्वरे पर भरोसा रखा कने मिंजो पर भी भरोसा रखा। 2 मेरे पिता परमेश्वर दे घरे रेहणे दियां मतियां जगा न, अगर नी हृदियां, तां मैं तुसां ने बोली दिन्दा क्योकि मैं तुहाडे तांई जगा तैयार करणा जांदा है। 3 मेरे जाणे कने तैयारी करणे बाद, तां मैं फिरी आई करी तुहांजो अपने सोगी लेई जांगा, ताकि जिथुं मैं ऐ ओथुं ही तुसां भी रेन। 4 उसा जगा दा रस्ता

जिथुं मैं जाणा है ओथुं दा रस्ता तुसां जाणदे न।” 5 थोमे उसला बोलया, “प्रभु जी, सांझो नी पता तू कुथुं जाणा है, तां सांझो रस्ता कियां पता होणा?” 6 यीशुऐ उना जो बोलया, “रस्ता कने सचाई कने जडा जिन्दगी दिन्दा है सै मैं ही है, मेरे बिना कोई भी पिता परमेश्वरे बाल नी पुज्जी सकदा है। 7 अगर तुसां मिंजो जाणया होंदा, तां मेरे पिता परमेश्वरे जो भी जाणदे, कने हुण उसयो जाणदे भी हेन, कने उसयो दिखया भी है।” 8 फिलिप्पुसे उसला बोलया, “प्रभु जी, पिता परमेश्वर दे दर्शन करवादे दे: इरणा ही साडे तांई काफी है।” 9 यीशुऐ उसयो बोलया, हे फिलिप्पुस, मैं इतणे रोजां ला तुहाडे सोगी है, क्या तू मिंजो नी जाणदा? जिनी मिंजो दिखया है उनी पिता परमेश्वर जो भी दिखया है: तू कजो बोला दा की पिता परमेश्वर दे दर्शन करवादे दे? 10 क्या तू भरोसा नी करता है, की मैं पिता परमेश्वर च है, कने पिता परमेश्वर मिंजो च है। ऐ गल्लां जडियां मैं तुसां ने बोला दा है, अपणिण्या तरफा ला नी बोला दा, पर पिता परमेश्वरे मिंजो च रेईकरी जडा चांदा है सै ही करता है। 11 मेरा ही भरोसा करा, की मैं पिता परमेश्वर च है; कने पिता परमेश्वर मिंजो च है; नितां जडे चमत्कार मैं कितयो न उना दिया बजा ने मेरे पर भरोसा करा। 12 मैं तुसां ने सच्च-सच्च बोलदा है, की जडा मिंजो पर भरोसा करदा है, ऐ कम्म जडे मैं करदा है उनी भी करणे, क्योकि मैं पिता परमेश्वर बाल जाणा है। 13 कने जडा कुछ तुसां मेरे नाऐ ने मंगणे, सेई मैं करणा ताकि पुत्रे दे जरिये पिता परमेश्वर दी महिमा होऐ। 14 अगर तुसां मिंजो ला मेरे नाऐ ला कुछ मंगणे, तां मैं सै पूरा करणा। 15 अगर तुसां मिंजो ने प्यार करदे न, तां मेरे हुकमा जो मनगणे। 16 कने मैं पिता परमेश्वर ने खिन्ती करणा, की सै तुहांजो इक होर मददगार दे, ताकि सै हमेशा तुहाडे सोगी रे। (aiōn g165) 17 सै सच्च दी आत्मा, जडी पबित्र आत्मा है, सै परमेश्वरे दे बारे च सच्च जो प्रगट करदा है, क्योकि संसार ना पबित्र आत्मा जो दिखदा है कने ना उसयो जाणदा है: तुसां पबित्र आत्मा जो जाणदे न, क्योकि सै तुहाडे सोगी रेंदा है कने उनी तुसां च होणा है। 18 “मैं तुहांजो अनाथ नी छडणा है, मैं तुहाडे बाल बापस ओणा। 19 थोडे ही बकते च संसारे दे लोकां मिंजो नी दिखणा, पर तुसां मिंजो दिखणा क्योकि मैं फिरी ला जिन्दा होणा है, इस तांई तुसां भी जिन्दा रेंणा है। 20 जिस रोजे मैं जिन्दे होईकरी बापस ओणा उसी दिने तुहांजो पता लगणा, की मैं अपने पिता परमेश्वर च है कने तुसां मिंजो च न, कने मैं तुसां च है। 21 जडे मेरे हुकमा जो जाणदा है, कने सै हुकमा जो मंनदा है, सै ही मिंजो ने प्यार करदा है, कने मैं भी उसला प्यार करणा है कने जडा मिंजो ने प्यार करदा है, उसला मेरे पिता परमेश्वरे भी प्यार करणा, कने मैं उसला प्यार रखणा, कने मैं अपने आपे जो उदे पर प्रगट करणा है।” 22 उनी यहदे जडा इस्करियोती नी था, उनी बोलया, “प्रभु जी, क्या होया की तू अपने आपे जो सांझो पर प्रगट करणा चांदा है, कने संसारे दे लोकां पर नी?” 23 यीशुऐ उसयो जबाब दिता, मैं अपने आपे जो ऐसे लोकां जो दसदा है जडे कोई मिंजो ने प्यार करदे न, कने मेरियां सिखाईयां गल्लां जो मदे न। कने मेरे पिता उसने प्यार रखणा कने असां आई करी उदे सोगी रेंणा है। 24 जडा मिंजो ने प्यार नी करता, सै मेरी सिखाईयां गल्लां जो नी मंनदा है, कने जडा मेरी शिक्षा तुसां सुणदे न, सै मेरियां नी न पर मेरे पिता परमेश्वर दी शिक्षा न, जिनी मिंजो भेजया है। 25 ऐ गल्लां मैं तुहाडे सोगी रेईकरी तुसां ने बोलियां न। 26 मददगार मतलब की पबित्र आत्मा जिसयो पिता परमेश्वरे मेरी जगा लेणे तांई भेजणा है, पबित्र आत्मा तुहांजो सारियां गल्लां सिखाणिंयां न, कने जडा कुछ मैं तुसां ने बोलया है, सै सब कुछ तुहांजो याद करणा है। 27 मैं तुहांजो शांति दिन्दा है, मैं अपनी शांति तुहांजो दिन्दा है; ऐ सै शांति नी है जडी संसार देई सकदा है। तुसां अपने मने जो दुर्वी कने डरया होया मत होणा दिया। 28 तुसां सुणया, की मैं तुहांजो ने बोलया, “मैं जाणा है। कने तुहाडे बाल फिरी बापस आई जाणा है अगर तुसां मेरे ने प्यार करदे न, तां इसा गल्लां ने खूश होंदे न, की मैं पिता परमेश्वर बाल जाणा है क्योकि पिता परमेश्वर मिंजो ला बडा महान है।” 29 कने मैं हुण ऐ सब गल्लां होणे ला पहले तुहांजो ने बोली दितियां न, की जालू सै होई जांगियां, तां तुसां मिंजो पर भरोसा करन। 30 हुण मेरे बाल तुसां ने तुहाडे सोगी गल्लां करणे तांई जादा बकत नी क्योकि इसी संसारे दे सरदारे शैताने ओणा है, कने मिंजो पर उदा कोई हक नी है। 31 मैं तियां ही करता है जियां पिता परमेश्वरे मिंजो हुकम दिता, ऐ इस तांई की संसार दे लोकां जो पता लग्गे की मैं पिता परमेश्वरे ने प्यार करदा है। कने जियां पिता परमेश्वर मिंजो हुकम दिन्दा, मैं तियां ही करता है उठा, ऐथुं ला चलदे न।

15 सच्ची दाखा दी बेल मैं है; कने मेरा पिता परमेश्वर किसान है। 2 हर इक डाली जड़ी मिजो ने लगिया है, कने नी फल्दी है, उस जो से बड़ी दिन्दे है, कने जड़ी डाली फल्दी है उसा जो से छांडदा है ताकि से होर जादा फले। 3 जड़ी शिक्षा मैं तुसां जो दितियो है, उसा दिया बजा ने तुसां शूद न। 4 तुसां मिजो च बणी रिया, कने मैं तुहांजो च: जियां कोई डाली अगर दाखा दिया बेला ला टूटी जा, तां सै अपु नी फली सकदी, तियां ही तुसां मिजो च बणी नी रेंगे तां, तुसां कुछ नी करी सकदे। 5 मैं दाख बेल है: कने तुसां डालियां न; जडा मिजो च बणी रेंदा है, कने मैं उदे च, सै मता फल्दा है, क्योकि मिजो ने लग होईकरी तुसां कुछ नी करी सकदे। 6 अगर कोई मिजो च बणी नी रें, तां उसा डालियां जो बड़ी करी फेकी दिन्दे न, कने जालू सै डालियां सुकी जादियां न; कने लोक उना जो गटेरी करी अग्गी च पाई दिन्दे न, कने सै फकुई जादियां न। 7 अगर तुसां मिजो ने बणी रेंन, कने मेरियां शिक्षा च तुसां बणी रेंगे तां तुसां जडा चांगे सै मंगा कने सै तुहाडे तां होई जाणा। 8 मेरे पिता परमेश्वर दी महिमा इसी ने होंदी है, की तुसां बडा जादा फल लोंगे, ऐई तुहाडा मेरे चेले होणे दा सबूत है। 9 जियां पिता परमेश्वरे मिजो ने प्यार रख्या, तियां ही मैं भी तुहांजो ने प्यार किता, मेरे प्यारे च बणी रिया। 10 अगर तुसां मेरे हुकमा जो मनगे, तां मेरे प्यारे च बणी रेणा जियां की मैं अपने पिता परमेश्वरे दे हुक्मा जो मनया है, कने उदे प्यारे च बणी रेंदा है। 11 मैं ऐ गल्लां तुहांजो इस तांई बोलियां न, ताकि तुसां च भी सेई खुशी हो जडी मिजो च है, कने तुहाडी खुशी पूरी होई जा। 12 मेरा हुकम ऐ है, की जियां मैं तुसां ने प्यार रख्या है तियां ही तुसां भी इकी दुज्जे ने प्यार रखा। 13 कुसी बाल ऐ दसणे तांई की सै अपने मित्रां ने प्यार करता है, इसला बडा होर कोई तरिका नी है की सै अपने मित्रां जो बचाणे तांई अपणी जान देई दे। 14 जडा भी हुकम मैं तुहांजो दिन्दे है, अगर तुसां उसयो करन, तां तुसां मेरे मित्र न। 15 हुण मैं तुहांजो सेवक नी बोलणा, क्योकि सेवक नी जाणदा है, की उदा स्वामी क्या करता है: पर मैं तुहांजो मित्र बोलया है, क्योकि मैं जडियां गल्लां अपने पिता परमेश्वरे ला सुणियां, सै सारियां तुहांजो दस्सी दितियां न। 16 तुसां मिजो नी चूंण्या है पर मैं तुहांजो चूंण्या है कने तुहांजो नियुक्त कितया है ताकि तुसां जाई करी फल देन; कने तुहाडा फल टिकाऊ रे, ताकि तुसां मेरे चेले न, इस तांई जडा कुछ तुसां मेरे ना ने मंगणे, सै तुहांजो है। 17 इना गल्लां दा हुकम मैं इस तांई दिन्दे है, ताकि तुसां इकी दुज्जे ने प्यार रखन। 18 अगर संसारे दे लोक तुहांजो ने बैर रखदे न, तां तुसां जाणदे न, की इना तुसां ला पेहले मिजो ने भी बैर रखया। 19 अगर तुसां संसारे दे लोकां सांई होंदे, तां संसारे दे लोक अपणयां ने प्यार करदे न, पर इसा बजा ने की तुसां इस संसारे दे लोकां ने रिशता नी रखदे, कने मैं तुहांजो इस संसारे ला चूंण्या है, इस तांई संसारे दे लोक तुहांजो ने बैर रखदे न। 20 जडा मैं तुसां जो दसया है, सेवक अपने मालिके ला बडा नी होंदा है, इसयो याद रखा अगर उना मिजो सताया, तां तुहांजो भी सताणां है; अगर उना मेरियां शिक्षा जो मनया, तां तुहाडी शिक्षा जो भी मनया। 21 पर ऐ सारा कुछ लोकां इसा बजा ने तुहाडे सोगी करणा क्योकि तुसां मेरे चेले न, कने से मेरे भेजणे बाले परमेश्वरे जो नी जाणदे न। 22 अगर मैं नी ओदा कने उना ने गल्लां नी करता, तां सै पापी नी बणदे पर हुण उना जो उना दे पापां तांई कोई भाना नी। 23 जडा मिजो ने बैर रखदा है, सै मेरे पिता परमेश्वर ने भी बैर रखदा है। 24 अगर मैं उना च सै चमत्कार नी करता, जडे कुनी होरनी नी किते तां सै पापी नी बणदे, पर हुण उना मिजो दिखी लिया है फिरी भी सै मिजो कने मेरे पिता परमेश्वरे दोनो ने बैर करदे न। 25 ऐ इस तांई होया की जडा उना दे पबित्र शास्त्र च लिखया है ऐ इना गल्लां जो पूरा करता है, उना बिना कुसी बजा ने मिजो ने नफरत किती। 26 पर जालू सै मददगार ओणा, जिसयो मैं तुहाडे बाल पिता परमेश्वरे दिया तरफा ला भेजगा, मतलब की सच्च दी आत्मा जडी पिता परमेश्वरे दिया तरफा ला निकलदी है, तां उनी मेरी गबाई देंगी। 27 कने तुसां भी गबाह न क्योकि तुसां शुरू ला मेरे सोगी न।

16 ऐ गल्लां मैं तुहांजो ने इस तांई बोलियां की कुथी तुसां भरोसा करणा ना छडी देन। 2 उना तुहांजो यहदी जंज पर ला कडी देणा, कने सै बकत ओणा है, की अगर कोई तुहांजो मारी दिगा, तां तुहाडे हत्यारे ऐ समझणा है की सै परमेश्वरे दी सेवा करा दा है। 3 कने उना ऐ इस तांई करणा क्योकि उना ना पिता परमेश्वर जो जाणया है कने ना ही मिजो जाणदे न। 4 पर मैं ऐ गल्लां इस तांई तुसां ने बोलियां, ताकि जालू उना दा बकत ओऐ तां तुहांजो याद आई जा, मैं ऐ सब तुसां

जो शुरू च इस तांई नी बोलया, क्योकि उस बकत मैं तुहाडे सोगी था। 5 हुण मैं अपने भेजणे बाले बाल जाणा है कने तुसां च कोई मिजो ला नी पछदा है, की मैं कुछु चल्या है? 6 पर मैं जडियां ऐ गल्लां तुसां ने बोलियां न, इस तांई तुहाडा मन बडा दुखी होया है। 7 तमी मैं तुसां ने सच्च बोलदा है, की मेरा जाणा तुहाडे तांई खरा है, क्योकि अगर मैं नी जांगा, तां उनी दिलासा देणेबाले तुहाडे बाल नी ओणा, पर अगर मैं जांगा, तां उसयो तुहाडे बाल भेजी दिगा। 8 कने उनी आई करी संसारे दे लोकां जो पाप कने धामिकता कने न्याय दे बारे च यकीन दिलाणा। 9 पापे दे बारे च यकीन दिलाणा की सै मिजो पर भरोसा करणे ने मना करदे न; 10 कने ऐ साबित करदा है की यीशु धर्मी था, इस तांई की मैं पिता परमेश्वर बाल चल्या है, कने तुसां मिजो फिरी नी दिखणा है, 11 कने न्याय दे बारे च भी यकीन दिलाणा की इस संसारे दे सरदार शैलाने जो दोषी ठहराया है। 12 मैं तुहांजो ने होर भी मतियां गल्लां बोलणा चांदा है, पर हले तुसां इना जो सेहन नी करी सकदे न। 13 पर जालू सै मतलब की सच्च दिया आत्मा ओणा है, तां आत्मा तुसां जो परमेश्वर दे बारे च जडा सच्च है सै समझणा है, क्योकि उनी अपने अधिकारे ने नी बोलणा है, पर जडा कुछ परमेश्वरे ला सुणगा, सै ही उनी बोलणा है, कने होणे बालियां गल्लां तुहांजो दसणियां। 14 उनी मेरी महिमा करणी, क्योकि उसयो मेरिया तरफा ला जडा मिलया है, उनी तुसां जो सै ही सिखाणा। 15 जडा कुछ पिता परमेश्वर दा है, सै सब मेरा है; तांई तां मैं बोलया था की, उनी मेरियां गल्लां च लेईकरी तुहांजो दसणा है। 16 “थोडे बकते च तुसां मिजो नी दिखणा, कने फिरी थोडी देरा च तुसां मिजो दिखणा है।” 17 तालू उदे कितणयां ही चेलयां अपु चे बोलया, “ऐ क्या है, जडा सै सांजो ने बोला दा है, थोडे बकते च तुसां मिजो नी दिखणा, कने फिरी थोडी देरा च तुसां मिजो दिखणा है? कने ऐ इस तांई की मैं पिता परमेश्वर बाल चल्या है?” 18 चले इकी दुज्जे ला पुख्दरे, “की सै क्या बोला दा है। क्या है ऐ थोडे बकत बाद जिसदे बारे च सै बार-बार बोला दा है।” 19 यीशु ऐ जाणी करी, की सै मिजो ला इना गल्लां दा मतलब पूछणा चांदे न, उना जो बोलया, क्या तुसां अपु चे मेरिया इना गल्लां दे बारे च पछा दे न, थोडे बकते च तुसां मिजो नी दिखणा, कने फिरी थोडी देरा च तुसां मिजो दिखणा है? 20 मैं तुसां ने सच्च-सच्च बोलदा है; मेरिया मौता दे बाद तुसां रोणा कने दुखी होणा है, पर संसारे दे लोकां खुश होणा है: तुसां जो दुख होणा, पर जालू मैं मरी की दुबारा जिन्दा होणा तालू तुहाडा दुख खुशी च बदली जाणा। 21 जालू जनानी बच्चे जो जमणा लगदी है तां उसा जो बड़ी पिढ होंदी है, क्योकि उसा दे दुखे दी घडी आईयो है, पर जालू सै बच्चा जम्मी बोदी है तां इसा खुशिया ने की संसारे च इक माणु पैदा होया है, उस दुखे जो फिरी कदी याद नी करदी। 22 इयां ही हुण तुहांजो भी दुख है, पर मैं तुसां ने फिरी मिलणा है कने तुसां खुश होणा; कने तुहाडी खुशी तुहांजो ला कुनी नी खोंपी। 23 जालू मिजो तुसां दोबारा दिखणा तालू मिजो ला कुछ नी पूछणा: मैं तुसां ने सच्च-सच्च बोलदा है, अगर पिता परमेश्वरे ला कुछ मंगणे, तां उनी मेरे चेले होणे दिया बजा ने तुहांजो देणा। 24 हले दीकर तुसां मेरे नाऐ ने पिता परमेश्वरे ला कुछ नी मंगया; पर मंगणे तां मिलणा ताकि तुहाडी खुशी पूरी होई जा। 25 “मैं तुहांजो ने ऐ गल्लां कहाणियां च बोलियां न, पर सै बकत ओणा है, की मैं तुसां ने होर कहाणियां च नी बोलणा है पर खुली करी पिता परमेश्वर दे बारे च दसणा। 26 उस बेले तुसां अपु मेरे नाऐ ने मंगणा, क्योकि तुसां मेरे चेले न कने मैं तुसां जो बोलदा है, की मैं तुहाडे तांई पिता परमेश्वर ने बिनती नी करणी। 27 क्योकि मेरे पिता परमेश्वर तां अपु ही तुसां ने प्यार करता है, इस तांई की तुसां मिजो ने प्यार रखया है, कने ऐ भी भरोसा किता की, मैं पिता परमेश्वर दिया तरफा ला निकलया है। 28 मैं पिता परमेश्वर ला निकली करी संसारे च आया है, फिरी संसारे जो छडी करी पिता परमेश्वरे बाल जाणा है।” 29 उदे चेलयां बोलया, “दिख, हुण तां तू खुली करी बोला दा है, कने कोई कहाणी नी बोली।” 30 हुण असां जाणी गियो न, की तू सारा कुछ जाणदा है, कने तिजो कुसी दी जरूत ही नी की कोई तिजो ला सबाल पुच्छे, इसला असां भरोसा करदे न, की तू परमेश्वरे ला निकलया है। 31 ऐ सुणीकरी यीशुऐ उना ने बोलया, “की क्या तुसां हुण भरोसा करदे न? 32 दिखा, सै बकत ओणा है बस आई रिया है की तुसां सारयां बख-बख होईकरी अपने-अपणे रस्ते जाणा है, कने मिजो किन्त्ला छडी देणा है, तमी मैं किन्त्ला नी क्योकि मेरा पिता परमेश्वर मेरे सोगी है। 33 मैं ऐ गल्लां तुसां ने इस तांई बोलियां न, ताकि तुसां जो अंदरूनी शांति मिल्ले क्योकि

तुसां मेरे सोगी रशता रखया, संसार च तहांजो दुख होणा है, पर सबर खा, मैं इस संसारे च राज करणे बाले शैताने जो हराई दीतया है।”

17 यीशुए अपने चेलयां ने ऐ गल्लां बोलणे बाद कने अपणियां नजरां स्वर्गे पासे करिके बोलाया, पिता परमेस्वर, सै बकत आई गिया है, की तू अपने पुत्रे दी महिमा कर, ताकि तू भी तेरी महिमा करे, 2 क्योंकि तू मिंजो सारयां लोकां पर हक दितया है, की जिना जो तू मिंजो दितया है, उना सबना जो सै हमेशा दी जिन्दगी दे। (aiōnios g166) 3 कने हमेशा दी जिन्दगी ऐ है कि लोक तिजो जाणी सकन यानी कि इकलते सच्चे परमेस्वरे जो। कने ऐ भी की सै मिंजो जाणन, यानी यीशु मसीह जो, जिसयो तू भेजया है। (aiōnios g166) 4 जडा कम्म तू मिंजो करणे जो दितया था, उसयो पूरा करिके मैं धरतिया पर तेरी महिमा किती है। 5 इस ताई पिता परमेस्वर तू मिंजो अपनी महिमा ने महिमित कर, महिमा जडी संसारे दे होणे ला पहले मेरी महिमा तेरे सोगी थी। 6 मैं तुसां जो उना चेलयां पर प्रगत कितया है, जडे तुसां मिंजो संसारे च दितयो न। सै तुहाडे थे, कने तू उना जो मिंजो दित। कने उना तेरे बचना जो मनया है। 7 हणु सै जाणी गियो न, की जडा कम्म तू मिंजो दितया है, सब कुछ तेरिया तरफ ला है। 8 क्योंकि जडा संदेश तू मिंजो दित, मैं उना जो उना बाल देई दित कने उना इन गल्लां पर भरोसा किता: कने सच्ची जाणी लिया है, की मैं तेरिया तरफ ला आया है, कने भरोसा करी लिया है की तू ही मिंजो भेजया है। 9 मैं उना ताई बिनती करदा है, सिर्फ उना ताई ही करदा है जडे तू मिंजो दितयो न क्योंकि सै तेरे न। पर जडे संसारे ने रशता रखदे न उना ताई बिनती नी करदा है। 10 कने जडा कुछ मेरा है सै सब कुछ तेरा है, कने जडा तेरा है सै मेरा है; इना ने मेरी महिमा प्राप्त होई है। 11 हणु मैं संसारे च नी रेंणा है, कने मैं तेरे बाल ओआ दा है पर मेरे चेलयां इस संसारे च रेणा है; हे पबित्र पिता, अपने नाए दिया शक्तिया ने उना दी रक्षा कर, ताकि उना दा इक ही मेरे जो जियां साडा इक ही मन है। 12 जालू मैं उना सोगी था, तां मैं तेरे उस नाए ने जडा तू मिंजो दितया है, उना दी रक्षा किती। मैं उना दी देख रख किती, कने बिनाशे दे पुत्रे जो छडी करी उना के कुसदा भी नाश नी होया, इस ताई की पबित्र शास्त्रे च लिखियो गल्ल पुरी हो। 13 पर हणु मैं तेरे बाल ओणा है, कने ऐ गल्लां मैं संसारे च रेंदे होए बोलदा है, ताकि उना जो मेरी खुशी भरपूर ने मिल्ले। 14 मैं तेरा संदेश उना बाल पुजाई दितया है, कने संसारे दे लोकां उना ने बैर किता, क्योंकि जियां मैं संसार दा नी है, तियां ही से भी संसारे दे नी न। 15 मैं ऐ बिनती नी करदा, की तू उना जो संसारे ला चुकी ले, पर ऐ की तू उना दी शैताने ला रक्षा कर। 16 जियां मैं संसारे दा नी है, तियां ही से भी इस संसारे दे नी न। 17 तेरा बचन सत्य है। उना जो सच्चाई च अपने ताई ला कर। 18 जियां तू मिंजो संसारे च भेजया, तियां ही मैं भी इना जो संसारे च भेजया है। 19 कने मैं उना दे फसदे ताई अपने आपे जो पबित्र करदा है ताकि सै भी सच्च ने पबित्र होन। 20 मैं बैर अपने चेलयां ताई ही बिनती नी करदा है, पर जडे इना दी शिक्षा ने मिंजो पर भरोसा करणे उना ताई भी बिनती करदा है। 21 की सै सारे इक होन; जियां पिता तू मिंजो च है, कने मैं तिजो च है, तियां ही से भी सांझो च होन, इस ताई की संसार दे लोक भरोसा कन, तू ही मिंजो भेजया है। 22 कने सै महिमा जडी तू मिंजो दिती, कने मैं उना जो दितियो है की सै तियां ही इक होन जियां असां इक न। 23 मैं उना च कने तू मिंजो च ताकि सै सिद्ध होईकरी इक होई जान, कने संसार जाणे की तू ही मिंजो भेजया है, कने जियां तू मिंजो ने प्यार रखया है, तियां ही उना ने भी प्यार रख। 24 पिता परमेस्वर, मैं चांदा है की जिना जो तू मिंजो दितयो है, जिथू मैं है, ओथु भी मेरे सोगी होन ताकि सै मेरिया उसा महिमा जो दिखन जडी तू मिंजो दितयो है, क्योंकि तू मिंजो संसारे दे बणने ला पहले ला ही मिंजो ने प्यार रखया है। 25 हे धार्मिक पिता, संसारे दे लोकां तिजो नी जाणया, पर मैं तिजो जाणदा है कने चेलयां भी जाणया की तू मिंजो भेजया है। 26 कने मैं तेरा ना उना जो दसया कने दसदे रेणा है ताकि जडा प्यार तिजो मिंजो ने था, सेई उना चे रे कने मैं उना च रेणा।

18 जालू यीशुए प्राथना करणे बाद अपने चेलयां सोगी किट्टोन दे नाल्ले पार गिया। ओथु इक बाग था, यीशु कने उदे चले उस बागे दे अंदर गे। 2 उसयो पकडबाणे बाला यहदा भी उसा जगा जो जाणदा था, क्योंकि यीशु ओथु अपने चेलयां सोगी जांदा था। 3 तालू यहदा, सिपाईयां दी इक टोलिया सोगी कने ढूँये याजकां कने फरीसियां दे सेवकां जो लेईकरी उस बागे च आया कने हथां च दिव्ये, मशांलां, कने हथिया लियो थे। 4 तालू यीशु, उना सबना गल्लां जो जाणी

की जडियां उसने होणे बालियां थियां, अगे आई करी उना ला पुछया, की कुसयो तोपा दे न? 5 उना उसयो जबाब दिता, “नासरत नगर ला यीशुए जो।” यीशुए उना जो बोलया, की मैं ही यीशु है। उसयो पकडबाणे बाला यहदा भी उना सोगी खडोतया था। 6 यीशुए जो ऐसा बोलदे ही, की मैं ही नासरत दा यीशु है, सै पिच्छे हटी करी धरतिया पर देई वे। 7 तालू यीशुए उना ला फिरी पुछया की, तुसां कुसयो तोपा दे न, “उना बोलया, नासरत नगर दे यीशु जो।” 8 यीशुए जबाब दिता, “मैं तां तुसां जो बोली बैडया है की हॉं मैं ही यीशु है, अगर तुसां मिंजो तोपा दे न तां इना लोकां जो जाणा दिया, ऐ मेरे चले न।” 9 ऐसा इस ताई होया की, यीशुए जडा पहले बोलया था सै सच्च होई जा: “जिना जो तू मिंजो दितया है उना चे मैं इकी जो नी गेला है।” 10 तालू शमौन पतरसे अपनी तलवार कडी कने, महायाजके दे इकी नोकरे पर चलाई दिती कने उस दा इक कन उडाई दित। उस सबके दा ना मलखस था। 11 तालू यीशुए पतरसे ने बोलया, “अपणिया तलवारा जो मयाना च रख। जडा कटोरा मेरे पिता परमेस्वरे मिंजो दितया है, क्या मैं उसयो नी पिये?” 12 तालू सिपाईयां कने उना दे सबेदारां कने यहदी अगुवां दे नोकरां यीशु जो पकडी करी बन्नी दिता, 13 कने पहले उसयो हन्ना बाल लेई गे, क्योंकि सै उस साले दे महायाजक कैफा दा सौरा था। 14 ऐ सेई कैफा नाए दा इक माणु था, जिनी यहदी अगुवां जो सलाह दिती थी की साडे लोकां ताई मरणा इक माणुए दा खरा है। 15 शमौन पतरस कने इक होर चेला भी यीशुए दे पिच्छे चली पे, इस चले जो महायाजक जाणदे पछेणदे थे। इस ताई सै यीशुए पिच्छे-पिच्छे महायाजक दे अंगणे दीकर गिया, 16 पर पतरस बाहर दरबाजे पर खडोई रिया, तालू सै दुज्जा चेला जिसयो महायाजक जाणदे थे सै बाहर आया, कने उनी दरबाजे पर खडोतियो नोकराणियां जो बोली करी पतरसे जो अंदर लेई ओंदा। 17 उना नोकराणिया जडी दरबाजे पर खडोतियो थी, पतरसे जो बोलया, “की तू भी इस माणुए दे चेलयां चे तां नी ऐ?” उनी बोलया, “मैं नी है।” 18 सर्दियां दिया बजा ने मंदरे दे रखबाले कने सिपाई अग बाली करी तपा दे थे, कने पतरस भी उना सोगी खडोई करी अग तपा दा था। 19 तालू महायाजके यीशुए ला उदे चले कने उदे उपदेशां दे बारे च पछताछ किती। 20 यीशुए उसयो जबाब दिता, “मैं सबना च खुली करी गल्लां कितियां, मैं यहदी जंज घर कने मंदरे च जाई करी हमेशा उपदेश दिता जिथू यहदी गिठे होंदे थे, कने कुछ भी लुकी करी कुछ नी बोलाया। 21 तू मिंजो ला ऐ सबाल कजो पूछा दा है? सुणने बालयां ला पुछ की मैं उना ने क्या बोलया है। सै जाणदे न की मैं क्या-क्या बोलया है।” 22 जालू यीशुए ऐसा बोलया, तां बखे खडोतयो मंदरे दे रखबालयां चे इकी रखबाले, यीशुए जो थपड मारी करी बोलया, “क्या तू महायाजक जो इयां जबाब दे दा?” 23 यीशुए उसयो जबाब दिता, अगर मैं गलत बोलया, तां साबित कर की मैं गलत बोलया; पर अगर खरा बोलया है तां मिंजो कजो मारा दा है। 24 यीशुए अजे भी बनाया ही था, कने हन्ने उसयो तियां ही कैफा महायाजक बाल भेजी दिता। 25 शमौन पतरस खडोई करी अग तपा दा था, तालू उस सोगी खडोतयो लोकां उसयो पुछया की, “कुधी तू भी तां उदे चेलयां चे तां नी है?” उनी बोलया, “मैं नी है।” 26 महायाजक दे नोकरां चे इकी नोकरे, जडा उदा रिशतेदारां चे था, कने उदा कन पतरसे बडी दितया था, उनी बोलया की तिजो तां मैं यीशुए सोगी बागे च नी दिखया था? 27 पतरसे फिरी मना करी दिता, कने तालू झट मुर्गे बांग देई दिती। 28 फिरी यहदी लोक यीशु जो कैफा बाल लेई आऐ कने किल्ले जो लेई गे, ऐ रोमी राज्यपाल पिलातस दा मेहल था, कने ब्यागा दा बकत था पर सै अपु किले अंदर नी गे अगर जांदे तां उना अशुद्ध होई जाणा था, क्योंकि पिलातस यहदी नी था। अगर अशुद्ध होई जांदे तां फसह दी रोटी नी खाई सकदे थे। 29 तालू पिलातस बाहर निकली करी उना बाल आया कने बोलाणा लगा, “तुसां इस माणुए पर कुसा गल्लां दा अरोप लगा दे न?” 30 उना उसयो जबाब दिता, अगर ऐ अपराधी माणु नी होदा तां असां इसयो तेरे बाल नी लौदे। 31 पिलातसे उना जो बोलया, “तुसां ही इसयो लेईजाई करी अपणिया व्यवस्था दे अनुसर इसयो सजा दिया।” यहदी अगुवां उसयो बोलया, “की सांझो कोई हक नी है की असां कुसी जो मौत दी सजा देई सकन।” 32 ऐ इस ताई होया की यीशु दी सै गल्ल पूरी हो जडी उनी ऐ इशारा करदे बोली थी मेरी मौत कियां कुस तरीके ने होणी है। 33 तालू पिलातस फिरी किल्ले दे अंदर गिया, कने यीशुए जो अंदर सर्दीकरी पुछया, “तू क्या यहदी लोकां दा राजा है?” 34 यीशुए जबाब दिता, “तू क्या ऐ गल्ल अपणिया तरफ ला बोला दा है, की कुनी होरनी ऐ गल्ल तिजो मेरे बारे च बोली है?” 35 पिलातसे

जबाब देता, “तू जाणदा है की मैं यहूदी नहीं है? तेरिया ही जाति कने बड़े याजकां तिजो मेरे हथे दितया है, तू क्या कितया है?” 36 यीशुए जबाब देता, मेरा राज्य इस संसारे दा नी है, अगर मेरा राज्य इस संसारे दा होंदा तां मेरे चेलयां लडणा था, कने मैं यहूदी अगुवां दे हथे गिरफ्तार नी होंदा: पर मेरा राज्य ऐथू दा नी है। 37 पिलातुसे उसयो बोलाया, तू क्या राजा है? यीशुए जबाब देता, “तू बोलदा है, की मैं राजा है, मेरा जन्म लेणा कने संसार च ओणे दी बजा ऐ है की मैं सच्च दे बारे च सिखाई सके। जडा कोई परमेखरे ने सच्चा प्यार करता है, कने मेरा बचन सगुदा है।” 38 पिलातुसे उसयो बोलाया, “सच्च क्या है?” ऐ बोली करी सै फिरी यहूदी अगुवां बाल चली गिया कने उना ने बोलाया, “मिंजो उदे च कोई भी दोष नी लग्गा दा है। 39 पर तुहाडा ऐ रिबाज है की मैं फसह दे त्योहारे च तुहाडे तांई इक कैदी छडी दे। तूसां क्या चांदे न की मैं तुहाडे तांई यहूदियां दे राजे जो छडी दे?” 40 तालू उना फिरी जौरे ने बोलाया, “इसयो नी, पर साडे तांई तू बरअब्बा जो छडी दे।” कने बरअब्बा इक डाकु था।

19 इसा गल्ला पर पिलातुसे सिपाईयां जो हुकम देता की यीशुए जो लेई जा कने कोडे मारा। 2 कने सिपाईयां कंडयां दा मुकट बणाया कने उदे सिरे पर रखया, कने उसयो बैगणी कपडे पेनारे, 3 कने उदे बखे आई करी बोलणा लागे, नमस्ते, यहूदियां दे राजा कने उसयो थपड मारे। 4 तालू पिलातुसे फिरी बाहर निकली करी लोकां ने बोलाया, “मैं उसयो तुहाडे बाल फिरी लोंदा है, ताकि तुहांजो पता लग्गे की मिंजो इदे च कुछ भी गलत नजर नी आया।” 5 तालू यीशुए जो कंडयां दा मुकट कने बैगणी कपडे पेनाई करी बाहर लांदा कने पिलातुसे उना ने बोलाया, “इस माणुए जो दिख।” 6 जालू बड़े याजकां कने मंदरे दे रखबालयां उसयो दिखया, तां चीलाई करी बोलाया, “इसयो सूली पर चढा, सूली पर चढा!” कपलातुसे उना जो बोलाया, “तूसां ही इसयो सूली पर चढा, क्योकि मिंजो इदे च कुछ भी गलत नी मिल्ला है।” 7 यहूदी अगुवां उसयो जबाब देता, “साडी भी व्यवस्था है कने उसा व्यवस्था दे अनुसार सै मारी देणे दे जोगा है क्योकि उनी अपने आपे जो परमेखरे दा पुत्र बोलाया है।” 8 जालू पिलातुसे ऐ गल्ल सुणी तां सै होर भी जादा डरी गिया। 9 कने फिरी किले दे अंदर गिया कने यीशुए जो बोलाया, “तू कुथु दा है? पर यीशुए उसयो कोई भी जबाब नी देता।” 10 पिलातुसे उसयो बोलाया, “मिंजो ने कर्नी बोला दा है? क्या तू जाणदा नी की तिजो छडणे दा हक मिंजो है कने तिजो सूली पर चढाणे दा हक भी मिंजो है।” 11 यीशुए जबाब देता, “अगर तिजो परमेखर दिया तरफ ला नी दितया होंदा, तां तेरा मिंजो पर कोई हक नी होंदा, इस तांई जिनी मिंजो तेरे हथे कपडया है, उदा पाप जादा है।” 12 ऐ जबाब सुणीकरी पिलातुसे उसयो छडणा चारा, पर यहूदियां चीलाई-चीलाई करी बोलाया, “अगर तू इसयो छडी दिगा तां तू महाराजा कैसरे दा मित्र नी है; जडा कोई भी राजा होणे दा दाबा करता है कने अपने आपे जो राजा बोलदा है सै महाराजा दा दुश्मन है।” 13 ऐ गल्लां सुणीकरी पिलातुस यीशुए जो बाहर लेई आया कने न्याय दे सिंहासने पर बैठा, कने सै जगा इक चबूतरा था जिसयो इब्रानी भाषा च गब्बता बोलंदे न। 14 ऐ फसह दे त्योहारे दे हफ्ते सबते दिया तयारियां दा रोज था कने दोपहर दे बकते: तालू उनी यहूदी लोकां जो बोलाया, “ऐ ही है, तुहाडा राजा।” 15 पर सै चिलाणा लागे, इसयो मारी दे, इसयो मारी दे! कने इसयो सूली पर चढा। पिलातुसे उना जो बोलाया, क्या मैं तुहाडे राजे जो सूली पर चढा? बड़े याजकां जबाब देता, “महाराजा जो छडी करी साडा होर कोई राजा नी है।” 16 तालू पिलातुसे यीशुए जो उना दे हवाले करी दिता ताकि सै उसयो सूली पर चढाण। 17 तालू सै यीशुए जो लेई गे। उना यीशुए ला अपणी सूली अपु चुकबाई कने उसयो यरुशलेम शेरहे दे बाहर खोपडी नाए दिया जगा जो लेई गे, कने जिसयो इब्रानी भाषा च गुलगुता बोलंदे न। 18 ओथु उना उसयो कने उदे सोगी दो माणुए जो सूली पर चढाया, इकी जो इक पासे कने, दुजे जो दुपे पासे, कने बिच यीशुए जो। 19 कने राज्यपाल पिलातुसे इक्की फटिया पर लिखी करी सुलिया पर लगाई दिती कने उसा पर ऐ लिखया था, “नासरत दा यीशु मसीह यहूदियां दा राजा।” 20 ऐ फटी मते यहूदियां पढी क्योकि जिथु यीशुए जो सूली पर चढाया था सै जगा यरुशलेम शेरहे दे बखे थी कने इब्रानी भाषा च कने लतीनी भाषा कने यूनानी भाषा च लिखियो थी। 21 तालू यहूदियां दे बड़े याजक पिलातुसे बोलाया, “यहूदियां दा राजा मत लिख पर ऐ की उनी बोलाया, मैं यहूदियां दा राजा है।” 22 पिलातुसे जबाब देता, “मैं जडा लिखी दितया है, सै नी बदलया जाणा है।” 23 जालू सिपाई यीशुए जो सूली पर चढाई बैठे, तां उदे कपडे लेईकरी उना

चार हिसयां च किते, चारो सिपाईयां तांई इक-इक हिसा कने कुरता भी लेई लिया, पर कुरते जो सितया नी था पर सै उपरे लेईकरी थले दीकर इक ही कपडे ने बणया था। 24 इस तांई उना अपु चे बोलाया, “असां ऐ नी फाडना, पर इदे पर पचियां पांटे न की ऐ कुसदा होणा।” ऐ इस तांई होया, ताकि पबित्र शाब्रे च लिखया गिया सच्च हो, “उना मेरे कपडे अपु चे बंडी ले कने मेरे कपडयां पर पचियां पाडियां, कने सिपाईयां इयां ही किता।” 25 पर यीशुए दे सूली बाल उदी माता कने उदिया माता दी बेहण, क्लोपास दी घरे बाली मरियम कने मगदल ग्रां दी मरियम खडोतियो थी। 26 यीशुए अपणिया माता जो कने उस चले जो जिसने सै प्यार रखदा था उसयो बखे खडोतया दिखीकरी अपणी माता ने बोलाया, “हे नारी, दिख, ऐ तेरा पुत्र है।” 27 तालू उनी चले बोलाया, “ऐ तेरी माता है।” कने उसी बेले सै चेला, उसा जो अपने घरे लेई गिया। 28 इदे बाद यीशुए ऐ जाणी करी की मेरा सारा कम्म खत्म होई गिया है, इस तांई की पबित्र शाब्रा दियां गल्लां सच्च साबित होन बोलाया, “मैं तरिणा है।” 29 ओथु इक सिरके ने बस्या बांडा रखया था, तां उना चे कुनकी सिरके ने सेडयो स्पंजे जो जुफे दे स्खे दे डंडे पर रखीकरी उदे मुपे ने लाया। 30 जालू यीशुए सै सिरका चखया, तां बोलाया, “पूरा होया,” कने सर झुकाई करी अपने प्राण छडी दिते। 31 हुण ऐ तैयारिया दा दिन था, कने अगले दिन सबत कने फसह दोनो ही थे। ऐ यहूदी लोकां तांई इक खास दिन था, सै नी चांदे थे इस दिने लाशा सूली उपर रेन। इस तांई उना पिलातुसे ने बोलाया की उना माणुआं दियां जंगा तोडी दिया ताकि उना दी मौत झट होई जा ताकि लाशां जो थले उतारया जाई सके। 32 तां सिपाईयां आई करी पहले बाले दियां जंगा तोडियां फिरी दुजे दियां भी, जडे यीशुए सोगी सूली पर चढायो थे। 33 पर जालू यीशुए बाल आई करी दिखया की सै मरी गिया है, तां उदियां जंगा नी तोडियां। 34 पर सिपाईयां चे इकी बरखे ने उदा पंजर बेधया कने उदे च खून कने पाणी निकलया। 35 जिनी माणुए ऐ सब दिखया, उनी ऐ गबाई दिती है, ताकि तूसां भी यीशुए पर भरोसा करी सकन। कने उदी गबाई सच्ची है, कने सै जाणदा है, की सच्च बोला दा है। 36 ऐ गल्लां इस तांई होईयां की पबित्र शाब्रे च जडा लिखया है सै सच्च होई जा, “उदी कोई हूदी नी तोडी जाणी।” 37 फिरी इक होर जगा पबित्र शाब्रे च लिखया है, “जिसयो उना बेधया है, उदे पर नजर करणी।” 38 इना गल्लां दे बाद अरिमतिया शेरहे दे यूसुफे, जडा यीशुए दा चेला था, (पर यहूदी अगुवां दे डरे ने इसा गल्ला जो लुकाई रखदा था), उनी पिलातुसे ने बिनती किती, की मैं यीशुए दिया लाशा जो लेई जां, कने पिलातुसे उदी बिनती सुणी, कने सै आई करी उदी लाशा जो लेई गिया। 39 नीकुदेसुस भी जडा पेहले यीशुए बाल राती गिया था कने लगबग तेती किलो गन्धरस कने एलवा लेई आया। 40 तालू इना दोनो यीशुए दी लाश लेई कने यहूदियां दे रिबाजे ने उस पर सै मुस्कना बालियां चिंजा लगाई करी कपडे दियां पटियां च लपेटया। 41 उसा जगा पर जिथु यीशु सूली पर चढाया था, ओथु इक बारी थी; कने उसा सो बारिया च इक नोई कबर थी, उसा च पेहले कदी कोई नी दफनाया था। 42 इस तांई उना यीशुए जो उसा कबरा दिया गुफा च रखी दिता क्योकि सै बखे ही थी कने सै यहूदियां दे सबत दी तैयारिया दा दिन भी था।

20 तुअरे ब्यागा तडके मरियम जडी मगदल ग्रां दी थी, सै कने उसा सोगी होर भी जनानियां कबरा पर आईयां, उना कबरा दे दरबाजे ला पथरे जो हटया दिखया। 2 तालू सै दोडी कने शमौन पतरसे कने उसी टुरे चले बाल जिसने प्रभु प्यार रखदा था, आई करी बोलाया, “सै प्रभु यीशुए दी लाशा जो कबरा ला कदी लेई गे; कने मैं नी जाणदी की उसयो कुथु रखया है।” 3 तालू पतरस कने सै दुज्जा चेला कबरा पासे चली पे। 4 कने दोनो सोगी-सोगी दोडयो थे, पर दुआ चेला पतरसे ला तेज दौडी करी पेहले कबरा पर पुज्जी गिया। 5 कने निठा होईकरी अंदर दिखया की ओथु कपडे दियां पटियां दा डेर लाया था: पर सै अंदर नी गिया। 6 तालू उदे पिच्छे-पिच्छे शमौन पतरस भी पुज्जी गिया कने कबरा दे अंदर गिया कने कपडे पियो दिक्खे। 7 कने सै अंगोछा जडा सिरे पर लपेटया था, सै कपडे सोगी नी पिया था पर सै इक लग जगा च मिल्ला। 8 तालू दुआ चेला भी जडा कबरा च पेहले पुजया था, अंदरे जो गिया कने दिखीकरी भरोसा किता कि यीशु मरयां चे जिन्दा होई गिया था। 9 पबित्र शाब्रां च यीशु दे बारे च ऐ लिखया था की उनी मरणे घरे जडा जिन्दा होणा है, पर सै हेले दीकर नी समझी पायो थे। 10 तालू सै चले अपने घरे जो बापस चली गे। 11 पर मरियम रौंदी होई

कबरा दे बाहर ही खडोई रेई कने रोदे-रोदे कबरा पाससे मिठे होईकरी, 12 दो स्वर्गदूतां जो चमकदे कपडे पाई करी इक्की जो सोदिया कने दुज्जे जो पोंदियां बैठया दिखया, जिथु यीशुए दी लाश रखियो थी। 13 स्वर्गदूतां मरियम ला पुछया, ओ जनानिये, तू कजो रोआ दी है? उनी उना जो बोलया, “सै मेरे प्रभु दिया लाशा जो चुकी लेई गे कने मिजो नी पता की उसयो कुथु रखया है।” 14 एे बोलणे दे बाद सै पिच्छे मुडी कने यीशुए जो खडोतया दिखया कने पछेणया नी की सै यीशु है। 15 यीशुए उसा ने बोलया, जनानिये तू कजो रोदी है? कुसयो तोषा दी है? उना माली समझीकरी उसयो बोलया, “श्रीमान जी, अगर तू उदे शरिर जो चुकया है तां मिजो दसी दे की कुथु रखया है कने मैं उसयो लेई जांगी।” 16 यीशुए उसा जो बोलया, मरियम। उना उस पासे मुडी करी उसला इब्रानी भाषा च बोलया, गुरु जी। 17 यीशुए उसा जो बोलया, “भेरे पैरां च पेईकरी मिजो मत रोक क्योकि मैं हले दीकर उपर पिता परमेस्वर बाल नी गिया है, कने मेरे चेलयां बाल जाई करी उना जो बोली दे, की मैं अपने पिता, कने तुहाडे पिता, कने अपने परमेस्वर, कने तुहाडे परमेस्वरे बाल उपर चलया है।” 18 मरियम जडी मगदल गां दी थी उना जाई करी चेलयां जो दसया, “मै प्रभु जो दिखया, कने उनी मिजो ने गल्लां कितियां।” 19 उसी तूआरे दिया संझा बेले सारे चले इक्की जगा मिठे होए, उना दरबाजे बंद करी ले क्योकि यहूदी अगुवां ला डरयो थे, तालू यीशु आया कने बिच खडोई करी उना जो बोलया, “तुहांजो शांति मिल्ले।” 20 कने एे बोली करी उनी अपने हथां कने पैरां दे जखम दस्से: तालू चले प्रभु जो दिखीकरी खुश होए। 21 यीशुए फिरी उना जो बोलया, “तुहांजो शांति मिले; जियां पिता परमेस्वरे मिजो संसार च भेजया है, तियां ही मैं भी तुहांजो संसारे च भेजा दा है।” 22 एे बोली करी उनी उना पर फुंक मारी कने बोलया, “पवित्र आत्मा जो अपनाओ। 23 अगर तुसां कुसी दे पाप माफ करगे, उना दे पाप माफ होए न, कने जिना दे पाप तुसां माफ नी करगे, उना अपने पापां च फसी रेणा है।” 24 पर बाहरां चेलयां चे इक माणु थोमा जिसयो दिदुमुस बोलंदे न, जालू यीशु आया तां सै उना सोगी नी था। 25 जालू होर चले उसला बोलणा लगगे, असां प्रभु जो दिखया है, तालू उनी उना जो बोलया, “जालू दीकर मैं उदे हथां च मेखां दे जखम कने उना मेखां दे छेदां च कने उदे पसलियां च हथ नी पाई लेंगा, तालू दीकर मैं भरोसा नी करणा की सै मरयां च जिन्दा होई गिया है।” 26 अठां रोजा बाद उदे चले फिरी घरे अंदर थे, कने थोमा उना सोगी था, कने दरबाजे बंद थे, तालू यीशुए आई करी कने बिच खडोई करी बोलया, “तुहांजो शांति मिल्ले।” 27 तालू उनी थोमा जो बोलया, अपणिया उंगलियां ने मेरे हथां जो ढूईकरी दिख कने अपने हथे जो अगगे करी के मेरियां पसलियां च पा; कने शक करणा बंद कर कने भरोसा कर की मैं मरयां चे जिन्दा होई गिया है। 28 एे सुणीकरी थोमे जबाब दित, “भेरे प्रभु जी, मेरे परमेस्वर।” 29 यीशुए उसयो बोलया, “तू तां मिजो दिखीकरी भरोसा कित्ता है। धन्य न सै जडे बिना दिखयो मिजो भरोसा करदे ना।” 30 यीशुए होर भी चमत्कार चेलयां दे सामणे दस्से, जडे इसा कताबां च नी लिखयो न। 31 पर एे इस तांई लिखयो न, ताकि तुसां भरोसा करन, की यीशु ही परमेस्वरे दा पुत्र मसीह है: कने उस पर भरोसा करी के उदे नाएे ने तुहांजो हमेशा दी जिन्दगी मिल्ले।

21 इना गल्लां दे बाद यीशुए अपने आपे जो तिबिरियास झिला दे बखे चेलयां जो दर्शण दिते कने इस तरीके ने दर्शण दिते। 2 शमौन पतरसे कने थोमा जिसयो दिदुमुस बोलंदे न, कने गलील प्रदेश दे काना शेहरे दा नतनएल कने जब्दी दे पुत्र, कने उदे चेलयां चे दो जणे होर मिठे होए थे। 3 शमौन पतरसे उना जो बोलया, मैं मछियां पकडना चलया है। उना उसला बोलया, “असां भी तैरे सोगी चलंदे न।” तां सै निकली करी किस्तिया पर चढी गे, पर उसा राती उना कुछ नी पकडया। 4 अगले दिने ब्याग होंदे ही यीशु कनारे पर खडोतया था, पर चेलयां उसयो पछेणया नी की एे यीशु है। 5 तालू यीशुए उना जो बोलया, हे मेरे प्यारो, क्या तुहाडे बाल कुछ खाणे जो है? उना जबाब दित, “नी।” 6 यीशुए उना जो बोलया, “किस्तिया दे सजे पाससे जाल फेंका, तां मिलणियां।” तालू उना जाल फेंकया, कने हुण मछियां जादा होणे दिया बजा ने उना ला जाल नी खिची होया। 7 इस तांई उस चले ने जिसने प्रभु प्यार रखदा था पतरसे जो बोलया, “एे तां प्रभु है।” जालू शमौने एे सुणया की प्रभु यीशु है, तां उनी अपने सै कपडे पाई ले जडे उनी कम्म करदे बेले उतारी दितयो थे कने पाणिये च छाल देई दित्ती। 8 पर होर चले डोंगिया पर मछियां ने भरूएे जाले जो खिज्जी लेई आए, क्योकि सै कनारे

ला जादा दूर नी थे, कोई सो मीटर दूर थे। 9 जालू सै कनारे पर पुज्जे, तां उना कोलयां दिया अग्गी पर मछियां कने उदे बखे रोटीयां रखियां दिखियां। 10 यीशुए उना जो बोलया, “जडियां मछियां तुसां हुण पकडिया न, उना चे थोडिया लेई ओआ।” 11 शमौन पतरसे डोंगिया पर चढी करी इकसो त्रियुंजा मछियां ने भरया जाल कनारे पर खिचया, कने इतणियां मछियां होणे ने भी जाल नी फटया। 12 यीशुए उना जो बोलया, “ओआ रोटी खाई लित्या।” कने चेलयां चे कुसयो भी होंसला नी होया, की उसला पुछन, तू कुण है? “क्योकि सै जाणदे थे की एे प्रभु ही है।” 13 यीशुए रोटी लेईकरी उना जो दित्ती, कने तियां ही मच्छी भी दित्ती। 14 एे तिजी बरी है की यीशुए मरी करी जिंदा होणे बाद चेलयां जो दर्शण दिते न। 15 रोटी खाणे बाद यीशुए शमौन पतरसे जो पुछया, हे यहून्ना दे पुत्र शमौन, क्या तू सच्ची इना बाकियां ला जादा मिजो ने प्यार करदा है? उनी यीशुए जो बोलया, हां प्रभु; तू तां जाणदा है, की मैं तिजो पर भरोसा रखदा है, उनी उना जो बोलया, “भेरे छेलां दी रखबाली कर।” 16 यीशुए फिरी दूजी बरी उसयो पुछया, “हे यहून्ना दे पुत्र शमौन, क्या तू मिजो ने प्यार रखदा है?” उनी उसयो बोलया, “हाँ, प्रभु तू तां जाणदा हे की मैं तिजो ने प्यार करदा है?” उनी उसयो बोलया, “मेरियां भेडां दा पुआल बग।” 17 यीशुए तीजी बरी उसयो पुछया, “यहून्ना दे पुत्र शमौन, क्या तू मिजो ने प्यार करदा है?” पतरस उदास होई गिया, की उनी उसयो तीजी बरी ऐसा बोलया, “क्या तू मिजो ने प्यार करदा है।” कने उनी बोलया, “प्रभु जी, तू तां सब कुछ जाणदा है की मैं तिजो ने प्यार करदा है।” यीशुए उसला बोलया, “मेरियां भेडां जो चुगा।” 18 “मैं तुसां ने सच्च-सच्च बोलदा है, जालू तू जवान था, तां अपने लक्के जो बन्नी करी जिथू चांदा था, ओथु गुमदा था; पर जालू तू बुडा होइ जाणा, तां तू अपने हथां जो फेलांगा, कने कोई तिजो बन्नी लेंगा कने तिजो ओथु लेई जाणा जिथू तू जाणा नी चांदा।” 19 यीशुए ऐसा एे दसणे तांई बोलया की पतरसे कियां मरणा कने परमेस्वरे दी महिमा करणी है; एे बोली करी, उसयो बोलया, “मेरा चेला बणी रे।” 20 पतरसे मुडी करी उस चले जो पिच्छे ओंदे दिखया जिसने यीशु प्यार रखदा था। एे सै ही है जिनी फसह दी रोटी खाणे बेले यीशुए बखे बेईकरी पुछया था, “प्रभु जी, तिजो पकडणे बाला कुण है?” 21 उसयो दिखीकरी पतरसे यीशुए जो बोलया, “प्रभु जी, इदे सोगी क्या होणा है?” 22 यीशुए उसयो बोलया, “अगर मैं चां की सै मेरे ओणे दीकर जिन्दा रे, तां तिजो क्या? तू मेरा चेला बणी रे।” 23 तांई तां भाईयां च एे गल्ल फेली गेई की उनी दुज्जे चले नी मरणा है; तमी यीशुए उसयो एे नी बोलया, की इनी नी मरणा है, पर एे की “अगर मैं चां की एे मेरे ओणे दीकर जिन्दा रे, तां तिजो इसला क्या?” 24 जिनी माणुएे एे सब कुछ दिखया, उनी एे गबाई दित्ती है, ताकि तुसां भी यीशु पर भरोसा करी सकन। कने उदी गबाई सच्ची है। कने असां जाणदे न की सै सच्चाईया ने बोलदा है। 25 यीशुए होर भी मते कम्म किते, अगर उना सारे कम्मा जो लिखया जांदा, तां मिजो लगदा की सारे संसार च इतणी भी जगा नी होणी थी की उना सारियां कताबां जो रखी सके।

प्रेरितां दे कम्म

1 प्रिय थियुफ्लस, मैं अपणिया पेलिया कताबा च उना सारियां गल्लां दे बारे च दसया है, जडियां यीशुए स्वर्गं च जाणे ला पेहेले करणा कने सिखाणियां शुरू कीतियां। 2 पर परमेश्वरे दे जरिये यीशुए जो स्वर्गं च चुकणे ला पेहेले, यीशुए दुख झेले कने मरी गिया। उनी मते पक्के सब्तां ला उनी अपने आपे जो जिन्दा दसया, कने चालियां रोजां दीकर सै उना चुकणां चेलयां जो मिलदा रिया, कने परमेश्वरे दे राज्य दियां गल्लां करदा रिया। यीशुए पबित्र आत्मा दिया सहायता ला प्रेरितां जो हुकम दिता कने उदे बाद परमेश्वरे उसयो स्वर्गं च चुकी लिया। 4 इक बरी यीशुए चेलयां ला मिली करी उना जो हुकम दिता की, “यस्शलेमे शेहरे ला बाहर मत जादे, पर उस दान दी नियाल रखा जडा मेरे पिता परमेश्वरे तुहांजो देणे दा बायदा कितया था, तुसां मिंजो उदे बारे च पेहेले भी बोलदे सुणया है। 5 यहन्ने तां पाणिए ला बपतिस्मा दितया है, पर थोडे रोजा बाद परमेश्वरे तुहाडे सोगी रेणे तांई पबित्र आत्मा जो भेजणा।” 6 बादे च जालू प्रेरित दोबारा यीशुए जो मिल्ले, तां उना यीशुए जो पुछया, “प्रभु जी, क्या तू हूण ही इस बकत इझापले जो रोमियां दी गुलामी ला अजाद करणे कने सांजे राज्य जो फिरी ला बसाने दी योजना बना दा है?” 7 यीशुए उना जो बोलया, “ऐ सारियां चिंजा कालू होणियां कने कुस बकत होणियां, ऐ सब कुछ तय करणे दा हक सिर्फ मेरे पिता परमेश्वर जो है, ऐ सब कुछ जापने दी तुहांजो जरूरत नी है। 8 पर जालू पबित्र आत्मा तुहाडे पर ओणा तालू तुहांजो शक्ति मिलणी; कने यस्शलेमे शेहरे च कने सारे यहदिया कने सामरिया प्रदेशां च, कने संसारे दियां हर जगा दे लोकां मेरे बारे च गबाही देणी है।” 9 ऐ बोली करी उना दे दिखदे-दिखदे ही परमेश्वर यीशुए जो स्वर्गं च लेई गिया, कने इक बदले दिया बजा ला सै उसयो दिखी नी सके। 10 उदे जांदे बेले जालू सै अम्बरे पासे दिखे दे थे, तां अचानक दो माणू चिट्टे कपडे पाई करी उना बखे प्रगत होए। 11 कने बोलणा लगे, “हे गलीली प्रदेशे दे माणूआं, तुसां कजो खडोई करी अम्बरे पाससे दिखे दे न? ऐई यीशु, जिसयो परमेश्वर स्वर्गं लेई गिया है, जियां तुसां उसयो स्वर्गं जांदे दिखया तियां ही उनी फिरी ओणा है।” 12 ऐ सारियां गल्लां जैतुन नांए दे पहाडे पर होईयां जडा यस्शलेमे शेहरे ला लगभग इक किलो मीटर दिया दुरिया पर था कने प्रेरित पहाडे ला यस्शलेमे शेहरे जो बापस आई गे। 13 कने जालू प्रेरित शेहरे च पुज्जे तां सै उपरे बाले कमरे च गे, जिथू सै रे दे थे। जडे प्रेरित ओथू मौजूद थे सै ऐ न पतरस कने यहन्ना कने याकूब कने अन्दियास कने फिलिप्पस कने थोमा कने बरतुल्यै कने मती कने हलफईरे दा पुत्र याकूब, शमीन जडा क्रान्तिकारी था कने याकूब दा पुत्र यहदा थे। 14 ऐ सारे हमेशा गिठे हांटे थे कने सारे इक मन होईकरी लगातार प्रार्थना करदे थे। उना चे यीशु दे भाई कने यीशुए माता मरियम कने कुछ जनानियां भी थियां जिना यीशुए दी सहायता कितियो थी। 15 कने उना रोजां च इक रोज, जालू लगभग इक सौ बी मसीह भाई बेहण गिठे थे, तां पतरस उना दे बिच खडोई करी बोलणा लग्गा। 16 हे मसीह भाईयो बेहण, पबित्र आत्मा बडे पेहेले राजा दाऊदे दे जरिये यहदा दे बारे च दसया था, जिनी यीशुए जो गिरफ्तार करणे बालयां दी अगुवाई कीती। ऐ जस्री था की यहदा दे बारे च पबित्र शास्त्रे च लिखया लेख पूरा हो। 17 बेशक यहदा सांजो चे इक था, कने इसा सेवकाईया च भी हिस्सेदार बणया। 18 जियां की तुसां जापने न की उस पेसे ला जडे यहदा यीशुए जो चलाकिया ला पकड़ाणे तांई लियो थे, उनी उस पेसे ला इक खेतार लिया। जालू यहदा फा लेई लिया तां सै थल्ले सिरे भार पेई गिया कने उदा पेट फटी गिया, कने उदियां सारियां आंठडियां बाहर आई गियां। 19 कने इसा गल्ला दे बारे च यस्शलेमे शेहरे दे सारे लोकां जो पता लगी गिया, इस तांई सै लोक उस जगा जो अपणी भाषा च हलकदमा मतलब की खूने दा खेतार बोलणा लगी पे। 20 क्योंकि राजा दाऊदे भजन संहिता दिया कताबा च लिखया है, “उदा घर उजडी जा कने उस घरे च कोई नी बसे,” कने राजा दाऊदे दुज्जी जगा च ऐ भी लिखया है की, “उदी जगा कोई होर लेई ले।” 21 इस तांई ऐ जस्री है की प्रभु यीशु जो मरयां च जिन्दे होणे दा, साडे सोगी गबाह बणने तांई इक माणूए जो चुणयां जा। सै माणू ऐसा होणा चाईदा जडा प्रभु यीशु दे सारे कम्मा दे बकते च माणे कने प्रभु यीशु जो यहन्ना ला बपतिस्मा लेणे ला लेईकरी उसयो स्वर्गं च जतणे दीकर साडे सोगी था। 23 तालू उना दौ जणयां जो खरेडया इक यूसुफे जो, जिसयो बरसबास बोलदे न,

जिदा दुआ ना यूसुतस है, कने दुआ मलियाह जो। 24 कने ऐ बोली करी प्राथना कीती, “प्रभु जी, तू तां सारयां दे मना जो जाणदा है, ऐ प्रगत कर की इना दौ जणयां चे तू कुण चुंणया है, 25 की सै इस सेवा दे कम्मे जो कने उस प्रेरित दी सै खाली जगा ले, जिसा जगा जो यहदा छडी करी चली गिया जिथू उसयो जाणा चाईदा।” 26 तालू उना दोनो दे बारे च चिठियां पाईयां, कने चिठी मलियाह दे नांए दी निकली, कने सै उना गयारां प्रेरितां दे सोगी गिणया गिया।

2 जालू यहदियां दे पिन्तेकुस्ते त्योहारे दा दिन अया, तां सारे भरोसा करणे बाले इकी जगा पर गिठे थे। 2 तालू अचानक अम्बरे ला इक अबाज सुणोई, सै अबाज तेज होआ सांई थी, कने उसा ने सारा घर जिथू सै बैठयो थे गूजी पिया। 3 तालू उना दे सामणे अग्गी सांई चीजां दा झण्ड प्रगत होया जडा जीभा दे अकारे दा लगा दा था, जडा लग होईकरी उना चे हर इक माणूए पर स्कदी गई। 4 कने सै सारे पबित्र आत्मा ला भस्ई गे, कने जियां ही पबित्र आत्मा उना जो बोलणे दी शक्ति दिती, सै होर-होर भाषा च बोलणा लगे। 5 उस बकत परमेश्वरे दा डर मनणे बाले केई यहदी थे, जडे की संसारे दे हर इक देशे ला त्योहारे मनाणे तांई आयो थे कने यस्शलेमे शेहरे च रेंदे थे। 6 जालू उस तेज होआ दी अबाज होई थी तां भीड लगी गई कने लोक हेरान होई गे, क्योंकि हर इक अपणी-अपणी भाषा च चेलयां जो बोलदे सुणा दे था। 7 कने सै सारे हेरान होईकरी बोलणा लगे, “दिखा, ऐ जडे लोक इस तरिके ला बोला दे न ऐ गलील प्रदेशे दे बासी ना।” 8 तां ऐ क्या होआ दा है, जडा सांजो चे हर इक जणा जो अपणी-अपणी बोली च गल्लां करदे होये सुणा दे है! 9 असां चे कुछ लोक पारथी इलाके ला न; कने कुछ मेदी कने कुछ लोक एलामी कने मेसोपोटामिया कने यहदिया प्रदेशे कने कपूदकिया कने पुन्तस कने आसिया प्रदेश, 10 कने फ्रूगिया कने पंफूलिया कने मिस्र देश कने लीबिया देशे कुछ इलाकयां दे न। जडे कुरेने शेहर दे बखे न, कने इना सारे देशां दे रेणेबाले कने रोम शेहर ला ओणे बाले लोक, 11 मतलब की क्या यहदी, कने क्या ही होर जातियां दे लोक जिना यहदी धर्म अपनाई लिया था, क्रेती टापू दे लोक कने अरबी देशे दे लोक भी न, पर अपणिया-अपणिया बोलिया च उना ला परमेश्वरे दे चमत्कारी कम्मा दी चर्चा सुणदे ना। 12 कने सै सारे हेरान होए, कने उना जो समझ नी ओआ दा था की क्या होआ दा है। 13 पर केईयां मजाक करदे होए बोलया, “सै तां नोईया शराबा दे नशे च न।” 14 पतरस उना गयारां प्रेरितां सोगी खडोता, कने जोरै ला बोलणा लग्गा, “तुसां लोक जडे साडे सांई यहदी न कने यस्शलेमे शेहरे दे बासियां, मेरियां गल्लां ध्याने ला सुणा मै तुहांजो दसदा है की इसा घटना दा क्या मतलब है। 15 तुहांजो लगदा है की असां नशे च न, पर असां नशे नी न क्योंकि हले तां ब्यागा दे नौ बजे न। 16 पर ऐ चमत्कार जडा साडे सोगी होया है, ऐ उसा गल्ला जो परा करता है, जडी योएल परमेश्वरे दा संदेश देणेबाले दे जरिये पबित्र शास्त्र च प्रमाणे बोलियो है। 17 परमेश्वर बोलदा है की, ‘आखरी दिना च ऐसा होण है, की मै अपणी आत्मा सारे माणूए जो देणी है कने तुहाडे पुत्रां कने कुडियां भविष्यवाणियां करणियां, कने तुहाडे जवाना दर्शन दिखणे कने तुहाडे बुडे मर्दां सुपने दिखणे।’ 18 उना दिना च मै अपने नोकरां कने नोकराणियां जो अपणी आत्मा देणी, कने उना भविष्यवाणी करणी। 19 कने मै उपर अम्बरे च अनोखे कम्म, कने थले धरतिया पर चमत्कार, मतलब की खन कने अग कने धोए दे बदल दसणे। 20 प्रभु दा दिन ओणे ला पेहेले सूरजे नेहरा होई जाणा कने चांदे खूने सांई होई जाणा। सै दिन महान कने तेजस्वी दिन होणा। 21 कने जडा कोई प्रभुए दा ना लेंगा, उदा उद्धार होण।” 22 हे इझापल दे लोको इना गल्लां जो सुणा: परमेश्वरे नासत दे यीशु मसीह। दे जरिये चमत्कार कने अनोखे कम्म किते कने तुसां अपु जाणदे न की ऐ सच्च है। इयां करिरी परमेश्वरे तुसां जो दसया की यीशु परमेश्वरे दा भेजया माणू है। 23 उसयो ही, जालू सै परमेश्वरे दी बणाईयो योजना कने पेहेले ला ही ज्ञाने दे अनुसार पकड़ाया गिया, तां तुसां उसयो बुरे लोकां दे हथां ला किल्लां ठोकी करी सुली पर चढाई करी मारी दिता। 24 फिरी भी परमेश्वरे उसयो मरणे दे बाद फिरी ला जिन्दा करी दिता। यीशु मरी गिया था पर परमेश्वरे उसयो मुर्दां रेणे ला बचाई लिया क्योंकि उदे तांई मरया रेणा संभव नी था। 25 क्योंकि राजा दाऊद यीशुए दे बारे च बोलदा है, “मै प्रभु जो हमेशा अपने सामणे दिखदा रिया क्योंकि सै मेरे सजे पाससे है, ताकि मै उना लोकां ला नी डरं जडे मिंजो चुक्सान पूजाणा चांदे न। 26 मेरा मन बडा खुश होया, कने मै खुशिया ला बोलदा है; कने मेरे शरीर जो भी

आस लग्गी रेंपी। 27 क्योंकि तू मिंजो मुर्दा नी रेंपा देणा। कने ना ही अपने पबित्र जण दिया लाशा जो सडना देणा। (Hadēs g86) 28 तू मिंजो जिन्दगिया दा रस्ता दसया है; तू मिंजो अपणिया मोजुदगी च खुशिया ला भरी देणा।” 29 “हे मसीह भाईयो, मैं उस कुलपति राजा दाऊदे दे बारे च पुरिया हिम्मत ला बोली सकदा है की सै मरी गया है कने दबया भी है कने उदी कबर अजे दीकर भी साडे बिच है। 30 सै परमेश्वरे दा संदेश देणेबाला भी था, कने सै जाणदा था की परमेश्वरे मिंजो ने कसम खाई करी बायदा कितया है, “मैं तेरे बंशे चे इकी माणुणे जो तेरे सिंहासने पर बटांगा।” 31 ऐ जाणी करी की भविष्य च परमेश्वर क्या करणा जा दा था, राजा दाऊदे यीशु मसीह जो मरणे बाद जिन्दा होणे दी गल्ल किति है। उनी बोल्या ना तां उनी उसयो मुर्दा रेंपा दिता, कने ना ही अपने पबित्र जण दिया लाशा जो सडना दिता। (Hadēs g86) 32 इसी यीशुणे जो परमेश्वरे जिन्दा कित्या, जिदे असां सारे गबाह न। 33 हुण सै स्वर्ग च परमेश्वरे दे सजे हथे सनना ला बड़े इज्जता दे पदे पर बैठया है। कने पिता परमेश्वरे जदिया उसला बायदा कितया था, उनी अपना पबित्र आत्मा यीशुणे जो दिता कने यीशुणे उदारता ला सै पबित्र आत्मा सांझो दिता है, जियां की तसां अज दिखदे कने सुणदे न। 34 क्योंकि राजा दाऊद यीशु मसीह सांई शरीर च स्वर्ग पर नी चढया; पर सै अपु ही बोलादा है, प्रभु परमेश्वरे भेरे प्रभु ला बोल्या; मेरे सजे पाससे बैठ, 35 जालू दीकर मैं तेरे दूशमणा जो तेरे पैरां थले दिया चौकिया सांई नी बनाई दे। 36 इस तांई इस्राएले दे सारे लोक इसा गल्ला दे बारे च पका ही जाणी लेन: की परमेश्वरे इसी यीशुणे जो जिसयो तसां सुली पर चढया, उसयो प्रभु भी कने मसीह भी बनाया। 37 जालू लोकां ऐ सुणया तां उना अपने आपे जो दोषी महसूस कित्या, कने सै पतरस कने बाकी प्रेरितां ला पूछणा लग्गे, “हे मसीह भाईयो, असां क्या करन?” 38 पतरसे उना जो बोल्या, “मन बदला, कने तसां सारे अपने-अपणे पापां दी माफी तांई यीशु मसीह दे नाऐ ला बपतिस्मा लिया; तां तसां जो पबित्र आत्मा दा दान मिलणा। 39 क्योंकि ऐ प्रतिज्ञा तसां, कने तुहाडिया ओलादा कने उना सारे दुरे-दुरे दे लोकां तांई भी है जिना जो साडे प्रभु परमेश्वरे अपने बाल सदया।” 40 पतरसे होर भी मतियां गल्लां दी गबाई देईकरी उना जो समझाया कने बिनती किति की अपने इस्राएली साथिया सांई मत बना जडे परमेश्वरे पर भरोसा नी करदे कने परमेश्वरे ला बिनती करा की सै तुहांजो बचाए। 41 कने जडा कुछ पतरसे बोल्या, उस पर जिना भरोसा कित्या कने उना बपतिस्मा लिया; कने उसी दिने लाभग तिन जार माणु उना ने शामिल होई गे। 42 कने सै प्रेरितां ला शिक्षा लेंगे च, उना सोगी संगती रखणे च, प्रभु भोज कने प्राथना करणे च लीन रेंपा लग्गे। 43 कने प्रेरित जडे अनोखे कम्म कने अनोखे चमकार करदे थे, इना ला यरूशलेम शेर दे लोक डरे कने हेरान होए। 44 कने सै सारे भरोसा करणे बाले गिठे रेंदे थे, कने जडा कुछ भी उना बाल होंदा था सै सब कुछ सांझा करदे थे। 45 कने सै अपणिया-अपणिया जगा जमिना कने समाने जो बेची करी जदेई जिसयो जरूरत होंदी थी उसयो बंडी दिन्दे थे। 46 कने सै हर रोज इक मन होईकरी मंदरे च गिठे होंदे थे, कने रोटी खाणे तांई कने प्रभु भोज तांई इक दुज्जे दे घरे साफ मने ला खुशिया ला गिठे होंदे थे। 47 कने परमेश्वरे दी स्तुति करदे थे, कने सारे लोक उना ला खुश थे; कने जिना दा उद्धार होंदा था, उना जो प्रभु हर रोज उना च मिलाई दिन्दा था।

3 इक दिन पतरस कने यहन्ना दोपहर दे तिन बजे प्राथना दे बेले मंदरे जो चलयो थे। 2 कने लोक इकी जन्म ला ही लंण्डे जो लोआ दे थे, जिसयो सै रोज ही मंदरे दे उस दरबाजे बाल बैठाई दिन्दे थे जिसयो सुंदर दरबाजा बोलेदे न, ताकि सै मंदर जाणे बालयां ला भीख मंगी सके। 3 जालू उनी पतरस कने यहन्ना जो मंदरे च जांदे दिखया, तां उनी उना ला भीख मंगी। 4 पतरसे कने यहन्ने उदे पाससे ध्याने ला दिखीकरी बोल्या, “साडे पाससे दिख।” 5 सै उना ला कुछ मिलणे दी आसा च उना पाससे दिखणा लग्गा। 6 तालू पतरसे बोल्या, “चांदी कने सोना तां साडे बाल है नी, पर जडा मेरे बाल है सै तिजो दिन्दा है; नासरत दे यीशु मसीह दे नाऐ ला उठ कने चल फिर।” 7 कने पतरसे उदा सजा हथ पकडी करी उसयो उठया; कने झट उदे पैरा कने गोडयां च जोर आई गिया। 8 कने सै उछली करी खडोई गिया, कने चलणा फिरणा लागी पिया; कने चलदा, कने छलांगणा मारदे परमेश्वरे दी स्तुति करदा होया उना सोगी मंदरे दे अंगणे च गिया। 9 सारे लोकां उसयो चलंदे फिरदे कने परमेश्वरे दी स्तुति करदे दिखीकरी, 10 उसयो पछेणी लिया की सै ही लंगडा भिखारी है, जडा मंदरे दे सुंदर दरबाजे पर बेईकरी भीख मंगदा था; कने इसा घटना ला जडी उदे सोगी होईयो थी, बडे हेरान होए। 11 सै

उस ओसारे च थे जिसयो सुलेमान दा ओसारा बोलेदे न, कने सै लंगडा भिखारी जडा ठीक होई गिया था सै पतरस कने यहन्ने दा साथ नी छडा दा था। सै सारे लोक उना पाससे दौडे कने उसयो दिखीकरी बडे हेरान होए। 12 ऐ दिखीकरी पतरसे लोकां जो बोल्या, हे इस्राएलियां, तसां इस माणुणे पर कजो हेरान होआ दे, कने साडे पाससे कजो घूरा दे न, जियां मन्ना की असां ही अपणिया भक्तिया कने शक्तिया ने इसयो चलणे फिरणे जोगा बनाई दिता है। 13 साडा परमेश्वर कने जडा अब्राहम, इसहाक, याकूब, कने साडे पूर्वजां दा भी परमेश्वर है उनी अपने सेवक यीशुए दी महिमा किति, पर तसां यीशुणे जो मरवाणे तांई रोमी अधिकारियां बाल पकडाई दिता, कने जालू पिलातसे उसयो छडणे दा बिचार कित्या, तालू तसां उदे सामणे यीशुणे जो नकारी दिता। 14 तसां यीशु मसीह जो नी अपनाया, जडा पबित्र कने धर्मी था। कने तसां पिलातसे ला चांटे थे की इक हत्यारे जो तुहाडे तांई छडी दिया। 15 कने तसां उसयो जडा हमेशा दी जिन्दगी दिन्दा है मारी दिता, पर परमेश्वरे उसयो फिरी ला जिन्दा कित्या, कने इसा गल्ला दे असां गबाह न। 16 यीशुए दे नाऐ पर भरोसा करणे दे जरिये ही इस माणुणे जो ताकत मिल्ली है, जिसयो तसां जाणदे न कने हुण तुहाडे सामणे है। ऐ यीशु दा ना है कने जडा भरोसा उदे जरिये ओदा है जिनी उसयो बिलकुल ठीक-ठाक करी दिता है, जियां की तसां अपु भी दिखी सकदे न। 17 कने हे भाईयो, मैं जाणदा है की जालू तसां कने तुहाडे अगुवां यीशु मसीह जो मारी दिता तालू तसां उदे बारे च अनजान थे की सै कुण था। 18 पर जिना गल्लां जो सारे परमेश्वरे अपने संदेश देणेबाले दे जरिये पेहले ही दसया था, की उदे मसीह जो दुख होणा कने सै मारी देणा है; तुहाडे जरिये परमेश्वरे इना गल्लां जो पूरा करी के दसया। 19 इस तांई मन बदला कने परमेश्वर बाल बापस ओआ ताकि तुहाडे पाप मिटी जान, तालू परमेश्वरे दिया तरफा ला आत्मिक शान्ति दा बकत ओणा। 20 कने उनी यीशुए जो भेजणा, जडा सै मसीह है जिसयो परमेश्वरे तुहाडे तांई चुनया है। 21 यीशुए दा स्वर्ग च रेंपा उस बेले दीकर जरूरी है जालू परमेश्वर उना सारियां चिंजा जो नोआ बनाई दींगा जडियां उनी बनाईयां न। बडे बकत पेहले परमेश्वरे लोकां जो ऐ दसणे तांई पबित्र परमेश्वरे दे संदेश देणेबाले दे जरिये ऐसा करणे दा बायदा कित्या। (aiōn g165) 22 जियां की मूसा बोल्या, “प्रभु परमेश्वरे तुहाडे भाईयां चे तुहाडे तांई मिंजो सांई इक परमेश्वरे दा संदेश देणेबाला भेजणा,” जडा कुछ सै तसां ने बोलागा, उदी सुणनयो। 23 पर हर इक माणु जडा उस परमेश्वरे दा संदेश देणेबाले दी नी सुणे, लोकां चे उदा नाश होई जाणा। 24 कने शमूएल ला लेईकरी उदे बाद बालयां दीकर जितणे भी परमेश्वरे दे संदेश देणेबालयां ऐ गल्ल बोली उना सारयां इना दिना दा संदेश दिता है। 25 तसां सारे परमेश्वरे दे संदेश देणेबालयां दी ओलादा कने उस बायदे दे हिस्सेदार न, जडा परमेश्वरे तुहाडे पूर्वजां ला कित्या, जालू उनी अब्राहमे जो बोल्या, “तेरे खानदाने ला धरतिया दे सारे घरानया जो आशीष मिलणी।” 26 जालू परमेश्वरे अपने सेवक यीशुए जो चुनया, कने उनी उसयो सनना ला पेहले तसां इस्राएली लोकां बाल भेजया, ताकि परमेश्वर तसां चे हर इक जणे जो पाप दे रस्ते ला दुरे कररी आशीष दे।

4 जालू पतरस कने यहन्ना लोकां जो ऐ बोला दे थे, तां याजक कने मंदरे दे रखबालयां दा सरदार कने सदूकी उना बाल आपे। 2 क्योंकि सै बडे गुप्सा होए की पतरस कने यहन्ना लोकां जो यीशुए दे बारे च सिखान्दे थे, की जडे लोक मरी गियो न परमेश्वरे उना जो फिरी जिन्दा करी देणा, जियां उनी यीशुए जो मरयां चे फिरी जिन्दा करी दिता। 3 कने उना पतरस कने यहन्ना जो गिरफ्तार करी आगले रोजे दीकर जेला चा रखया क्योंकि संज होई गियो थी। 4 पर संदेश सुणने बालयां चे मतयां यीशुए पर भरोसा कित्या, उना भरोसा करणे बाले माणुआं दी संख्या लगभग पंज हजार होई गेई। 5 अगले रोजे उना दे सरदार कने यहदी अगुवे कने व्यवस्था जो सिखणे बाले यरूशलेम शेर च इकी जगा पर गिठे होए। 6 कने जडे लोक ओथु गिठे होए उना चे महायाजक हन्ना कने सारे महायाजके दे घराने दे लोक, जिना चे कैफा, यहन्ना, सिकन्दर भी ओथु थे। 7 कने पतरस कने यहन्ना जो बिच खरेडी करी पूछणा लग्गे, “इस माणुणे जो ठीक करणे तांई कुनी शक्ति कने हक दिता?” 8 तालू पतरसे पबित्र आत्मा ला भई करी उना जो बोल्या, “हे लोकां दे सरदारो कने यहदी अगुवां, 9 असां इक कमजोर माणुणे दी भलाई किति है, कने अज सांझो ला इदे बारे च पूछताछ करा दे न, की सै कियां ठीक होया। 10 ता तसां सब कने सारे इस्राएले दे लोक जाणी लिया की ऐ नासरत

दे यीशु मसीह दे नाए ला ठीक होया है। इसी यीशुए जो तुसां सूली पर चढ़ाया था, पर परमेश्वरे उसयो मरयां चे जिन्दा किता। अज उसी दे नाए ने एे माणु त्हाडे सामणे भला चंगा खडोतया है। 11 यीशु मसीह से ही पथर है जिसयो तुसां मिश्रियाँ फेंकी दितया था कने सेई पथर कुणे दा सिरा बणी गिया। 12 यीशु जो छडी करी होर कुसी दुज्जे ला उद्धार नी है; क्योकि स्वर्ग दे हेठ माणुएे चे कोई होर दुआ ना नी दितया है, जिसला असां उद्धार पाई सकन।” 13 जालू उना पतरसे कने यहून्ना दी हिम्मत दिखी, कने उना जो एे पता लग्गा की एे पढयो लिखयो नी न कने आम माणु न, फिरी उना जो एेहसास होया, एे इस ताई है क्योकि एे यीशुएे सोगी थे। 14 पर उस माणुएे जो जडा खरा होया था, पतरस कने यहून्ना सोगी खडोतया दिखीकरी, सै सभा उना दे खिलाफ कुछ नी बोली सकी। 15 पर उना जो महासभा ला बाहर जाणे दा हुकम देईकरी, सै अपु चे बिचार बिमर्शं करणा लग्गे, 16 “असां इना माणुएे सोगी क्या करन? क्योकि एे तां साफ है की इना एे अदभुत चमत्कार कितया है कने सारे यरूशलेम शेहर दे रेणे बालयां जो पता है, कने असां एे दाबा नी करी सकदे की एे गल्ल नी होइयो है। 17 पर लोकां च एे गल्ल होर जादा नी फेलणा चाइदी, असां इना जो धमकाने, की एे इसी नाएे ला फिरी कुसी माणुएे ने गल्ल ना करन।” 18 तालू उना पतरस कने यहून्ना जो सदया कने चेतोबानी देईकरी बोलया, “यीशुएे दे नाएे ला कुछ नी बोलणा कने ना सिखाणा।” 19 पर पतरस कने यहून्ने उना जो जबाब दित, “तुसां ही न्याय करा, की क्या एे परमेश्वरे दिया नजरा च ठीक है, की असां परमेश्वरे दिया गल्लां ला बडी करी त्हाडियां गल्लां मनन? 20 क्योकि एे तां सांझो ला होई नी सकदा, की जडा असां दिखया कने सुणया है, सै ना बोलन।” 21 तालू उना पतरस कने यहून्ना जो दुबारा धमकाया कने छडी दित। एे प्रेरित लोकां बिच मशहूर थे इसा बजा ला उना जो इना प्रेरितां जो सजा देणे दा कोई तरिका नी मिला, इस ताई की जडी घटना होइयो थी उदिया बजा ला सारे लोक परमेश्वरे दी बडाई करदे थे। 22 सै माणु, जडा अदभुत चमत्कारे ला ठीक होया था, उदी उग्र चालीं सालां ला जादा थी। 23 पतरस कने यहून्ना छुटी करी अपने साथियां बाल आये, कने जडा कुछ बड़े याजकां कने यहूदी अगुवां उना ने बोलया था, उना जो सुणाई दित। 24 एे सुणीकरी, उना इक मन होईकरी उच्चिया अबाज ला परमेश्वरे ला प्राथना किती, “हे प्रभु, तू ही है पबित्र स्वर्ग कने धरती कने समुद्रे कने जडा कुछ उना च है बणाया है।” 25 तू पबित्र आत्मा ला अपने सेवक कने साडे पूर्वज राजा दाऊदे दे मुएे ला बोलया, “होरनी जातियां कजो गुस्सा किता? कने देशां-देशां दे लोकां कजो बेकार गल्लां सोचियां? 26 कने राजा दाऊदे एे भी बोलया था की, धरतिया दे राजयां अपने आपयो तैयार करणा, कने हाकिमा, प्रभु कने उदे मसीह दे बिरोध च गिठे होणा।” 27 कने एे गल्ल यरूशलेम शेहरे च सच्च होई की तरे पबित्र सेवक यीशुएे दे खिलाफ, जिदा तू अभिषेक किता, राजा हेरोदेसे कने पुन्तियस पिलातुस राज्यपाल भी होर जातियां कने झपाएलियां सोगी इसी शेहरे च गिठे होए, 28 उना सेई कितया जडा तेरिया शक्तिया कने इच्छा पेहेले ही तय करी लिया था की होणा चाइदी। 29 प्रभु जी हुण, उना दियां धमकियां जो सुण कने अपने दासां जो एे बरदान दे की तेरा बचन बडिया हिमतां ने सुणा। 30 कने ठीक करणे ताई अपना हथ गां कर ताकि चमत्कार कने अनेखे कम्म तरे पबित्र सेवक यीशु दे नाएे ला होन। 31 जालू सै प्राथना करी बैठे, तां सै जगा जिथु सै गठुयो थे हिली पेई, कने सै सारे पबित्र आत्मा ला भरई गे, कने परमेश्वरे दा बचन हिम्मत ने सुणादे गे। 32 भरोसा करणे बालयां दी मंडलीं इक चित कने इक मने दे थे, उना दा सब कुछ साझे दा था कने ऐथू दीकर की कोई भी अपणिया धन दौलता पर अपना होणे दावा नी करदा था। 33 कने प्रेरित बडिया शक्तिया ला प्रभु यीशुएे दे मरी करी जिन्दा होणे दी गवाई दिन्दे रे कने उना सारयां पर परमेश्वरे दा बडा अनुग्रह ला। 34 कने उना चे कोई भी गरीब नी था, क्योकि जिना बाल जमीन या घर थे, सै उना जो बेची करी, बिकियां चिजां दे पैसे लोदे थे कने उसयो प्रेरितां बाल जमा करवाई दिन्दे थे। 35 कने जदेई जिसयो भी जरूरत होदी थी उसयो बंडी दिन्दे थे। 36 कने यूसुफ नाएे दा इक माणु था, सै लेवी गोत्र दा था कने साइप्रस टापू ला था। जिदा ना प्रेरितां बरनबास रखया, जिदा मतलब ऐसा माणु जडा दुजयां जो प्रोत्साहित करदा है। 37 उदे बाल कुछ जमीन थी, जिसा जो उनी बेचया, कने सै पैसे लोकां जो बंडणे ताई प्रेरितां जो देई दिते।

5 हनन्याह नाएे दे इकी माणुएे, कने उदिया घरे बालिया सफरी अपणिया जमिना दा छोटा दिया हिस्सा बेचया। 2 कने हनन्याये जो जडे पैसे बेची करी मिल्ले

उदे चे उनी कुछ अपने ताई रखी लिया; कने एे गल्ल उदी घरे बाली भी जाणदी थी कने उना बाकी बचयो पैसे प्रेरितां जो देई दिते। 3 पर पतरसे बोलया, “हे हनन्याह! जडा शैताने तरे मने च पबित्र आत्मा ला झूठ बोलणे दा बिचार पाया है कने तू अपणी बेचियो जमिना दे पैसे चे इक हिस्सा अपने ताई रखी लिया है?” 4 क्या बेचणे ला पेहेले सै जमीन तेरी नी थी? कने जालू जमीन बिकी गेई तां उसा दी कीमत क्या तरे बशे च नी थी? तिजो इस बुरे कम्मे दे बारे च कदी नी सोचणा चाइदा था तू सांझो ला नी, पर परमेश्वरे ला झूठ बोलया। 5 एे गल्लां सुणदे ही हनन्याह जमिना पर पेई गिया, कने सै मरी गिया; कने जिना भी इस बारे च सुणया सै सारे डरी गे। 6 फिरी जवान माणु आणे कने उसयो कफन च लपेटया करी कने बाहर लेईजाई करी दबी दित। 7 लगबग तिन घंटे बाद उदी घरे बाली अंदर आई, ओथु जडा कुछ होया था उसा जो नी पता था। 8 तालू पतरसे उसा जो बोलया, “क्या तुसां दोना सै जमीन इतणे च ही बेचियो थी?” उना बोलया, “हॉ, इतणे च ही।” 9 पतरसे उसा जो बोलया, “एे क्या गल्ल है, की तुसां दोना प्रभुएे दिया आत्मा जो परखने ताई इक सलाह कितयो है? दिख, जिना जवान माणुआं तरे घरे बाले जो दबया है सै दरबाजे बार खडोतयो न, कने इना तिजो भी बाहर लेई जाणा।” 10 तालू सै झूठ जमिना पर पेई गेई, कने मरी गेई, कने उना जवान माणुआं अंदर आई करी दिखया तां सै मरी गियो थी, कने उना उसा जो बाहर लेईजाई करी उसा दे घरे बाले दे बखे दबाई दित। 11 कने कलीसिया दे सारे लोक कने जितणयां उना गल्लां जो सुणया सै बडे डरी गे। 12 प्रेरित मते चिन्न कने अदभुत कम्म लोकां दे बिच करदे थे, कने जेदेई मसीह च भरोसा करणे बाले थे। सै अक्सर सारे इक चित होईकरी सुलेमाने दे ओसारे च गिठे होदे थे। 13 पर जिना हल्ले दीकर यीशुएे पर भरोसा नी कितया था उना चे कुसयो भी एे हिम्मत नी होदी थी की, उना सोगी जाई मिलन; फिर भी लोक उना दी बडी इज्जत करदे थे। 14 कने प्रभु पर भरोसा करणे बाले मर्दा कने जनानियां दी गिणती बददी ही गेई। 15 जडा कुछ प्रेरित करा दे थे उसा बजा ला लोक बिमारां जो सडका पर आंणी करी, मंडे कने पन्दी पर सुआई दिन्दे थे, ताकि जालू पतरस उस रस्ते ला जांगा, तां उदा प्रछोंआ उना चे कुसकी पर पेई जा। 16 कने यरूशलेम शेहरे दे अखे बखे दे नगरां दे लोक भी गिठे होदे थे। कने सै बिमारां कने बुरियां आत्मा ला सताएे लोकां जो लोदे थे, कने सै सारे ठीक होई जादे थे। 17 तालू महायाजक कने सारे यहूदी अगुवां दी टोली जिना जो सटूकी बोलदे न दे, सै प्रेरितां ला जलन करणा लग्गे। 18 तां अगुवां मंदरे दे रखबालयां जो हुकम दित की प्रेरितां जो पकडी करी जेला च बंद करी दिया। 19 पर राती दे बकत प्रभु दे इकी स्वर्गदूते जेला दे दरबाजे खोली करी उना जो बाहर कडया कने प्रेरितां जो बोलया, 20 “जा कने मंदरे च खडे होईकरी, लोकां जो इस हमेशा दिया नोईया जिन्दगीया दा पूरा संदेश सुणा।” 21 कने प्रेरित बडी ब्यागा ही मंदरे च गे जियां उना जो स्वर्गदूते दसया था जाई करी सिखाणा शुरू किता। जालू महायाजक कने उदे साथी आणे कने उना महासभा जो कने झपाएलियां दे सारे यहूदी अगुवां जो गिठा किता, कने जेला च बोली भेजया की प्रेरितां जो लोआ। 22 पर मन्दरे दे रखबालयां ओथु पुजिकरी दिखया की सै जेला च नी न, कने उना बापस आई करी दसया, 23 “जेला ढगे ला बंद थी, कने बाहर दरबाजे पर पेहेदार खरेडयो थे, पर जालू असां दरबाजा खोलया, तां अंदर कोई नी था।” 24 जालू मंदरे दे रखबालयां दे सरदार कने बड़े याजकां एे खबर सुणी, तां हेरान होई गे कने उलझन च पेई गे की इदा क्या नतीजा होणा। 25 इणणे च कुनकी आई करी उना जो दसया, “दिखा, जिना जो तुसां जेला च बंद कितया था, सै माणु मंदरे च खडोई करी उपदेश देदे न।” 26 जालू उना एे सुणया, तालू मंदरे दे रखबालयां दा सरदार कुछ रखबालयां जो सोगी लेईकरी मंदरे च गिया, कने प्रेरितां जो पकडी करी महासभा च लेई आया, पर उना सोगी कोई जोर जबरदस्ती नी किती, क्योकि रखबाले लोकां ला डरा दे थे की लोक पथर मारी-मारी करी उना जो मारी ना दे। 27 जालू उना प्रेरितां जो महासभा दे सामणे खरेडया तालू महायाजके उना ला पुखया, 28 “क्या असां तुहांजो हुकम नी दितया था, की तुसां इस नाएे ला शिक्षा मत दिन्दे? फिरी भी, तुसां सारे यरूशलेम शेहरे जो अपणिया शिक्षा ला भरी दित है कने तुसां उस माणुएे दी हत्या दा दोष जबरदस्ती सांझो पर लाणा चांदि न।” 29 तालू पतरसे कने, बाकियां प्रेरितां जबाब दित, “माणुएे दे हुकमे ला बडीकरी परमेश्वरे दे हुकमे जो मनणा ही साडा कम्म है। 30 साडे पूर्वजां दे परमेश्वरे यीशुएे जो मरयां चे जिन्दा करी दित, जिसयो तुसां सूली पर लटकाई करी मारी दितया था। 31 उसयो ही परमेश्वरे प्रभु

कने उद्गार करणे बाला बणाया है, कने अपने सजे हथे ने सारयां ला उच्चे सिंहासने पर बैठाय्या है, ताकि इस्त्राएले दे लोक अपने बुरे सोच बिचार कने बुरे रस्तयां जो छडी करी परमेश्वरे बाल मुडी ओन कने उदे जरिये उना जो अपने पापां दी माफी मिल्ले। 32 असां कने पबित्र आत्मा भी इना गल्लां दे गबाह न, जिसा जो परमेश्वरे उना जो दितया है, कने जडे उदा हुकम मदे न।” 33 जालू महासभा दे लोकां ऐ सुणया तां उना जो बडा जादा गुस्सा आई गिया, कने प्रेरितां जो मारी देणा चांदे थे। 34 पर गमलीएल नापे दा इक फरीसी था, जडा व्यवस्था जो सिखाणे बाला कने सारे लोक उसयो बडा मदे थे, उनी महासभा च खडाई करी प्रेरितां जो थोडिया देरा तांई बाहर करी देंगे दा हुकम दिता। 35 तालू उनी महासभा दे लोकां जो बोलया, “हे इस्त्राएलियो, जडा कुछ भी इना माणुए ला करणा चांदे न सोची समझीकरी करनयो। 36 क्योकि इना रोजां ला पहले थियुदास ऐ बोलदा था, की मैं भी कुछ है; कने कोई चारसो माणु उदे सोगी होई गे, पर सै मारी दिता, कने जितणे लोक उदी मदे थे सारे तितर बितर होई गे कने खत्म होई गे। 37 उदे बाद जनगणना दे दिना च गलील प्रदेशे दा बासी यहदा आया, कने कुछ लोक अपने पासे करी ले, सै भी मरी गिया, कने जितणे लोक उदे चेले थे, सारे लोक तितर बितर होई गे। 38 इस तांई तां मैं हण तुसां जो बोला दा है, इना माणुए ला दूर ही रिया कने उना ला कोई कम्म मत रखा; क्योकि अगर ऐ कम्म कने योजना माणुए दिया तरफा ला होंदी तां इना अपने आप ही खत्म होई जाणा; 39 पर अगर परमेश्वरे दिया तरफा ला है, तां तुसां कदी नी मिटाई सकणा है, कुधी इयां ना हो की तुसां परमेश्वरे ला लहने बाले बंण।” 40 तालू महासभा गमालिएल दी गल्ल मनी लेई, कने इस तांई प्रेरितां जो सदीकरी मारया कुटया; कने उना जो ऐ हुकम दिता की सै हण यीशुए दे नापे च कुछ मत बोलदे कने फिरी उना जो छडी दिता। 41 कने जालू सै महासभा जो छडी करी चली गे, तालू प्रेरित इसा गल्ला ला खश होए की परमेश्वरे उना जो यीशुए तांई बेइजत होणे जोगे समझया। 42 कने हर रोज मंदरे च कने घरे-घरे च, प्रेरित लोकां जो सिखंदे रे कने शुभसमाचार दा प्रचार करदे रे की यीशु ही मसीह है।

6 उना रोजां च चेलयां दी गिणती लगातार बदा दी थी, तालू यूनानी बोली बोलणे बाले यहदी विष्वासी इब्रानी बोली बोलणे बाले यहदी विष्वासियां दे खिलाफ शिकायत करणा लगणे, की रोज खाणा कने पैसे बंडदे बकते यूनानी बिधवां जो सबना सांई खाणा कने पैसे नी दिन्दे। 2 तालू बाहरां प्रेरितां यरुशलेम शहर दे बाकी चेलयां दी मंडलिया जो अपने बाल सदीकरी बोलया, “असां प्रेरितां जो अपना बकत परमेश्वरे दा बचन सिखाणे च लाणा चाईदा, ना की खुआणे पियाणे दी सेबा करणे च। 3 इस तांई हे मसीह भाईयो, अपने घे सत ऐसे माणुआं जो चुणा जिना दे बारे च सब जानपे न की सै पबित्र आत्मा ने कने अकल्ला ने भस्थो न, ताकि असां ऐ जिम्मेदारी उना जो देई दें। 4 पर असां तां प्राथना, बचन दा प्रचार कने शिक्षा देणे च लगी रेन।” 5 ऐ गल्ल सारिया मंडलिया जो खरी लगगी, कने उना स्तिफनुस नापे दे इक माणुए जो जडा भरसे कने पबित्र आत्मा ला भरई गिया था, कने फिलिप्पुस कने प्रूवुस्स कने निकानोर कने तीमोन कने परमिनास कने अन्ताकिया बासी नीकुलाउस जो जडा यहदी धर्म च आई गिया था, इना जो चूर्णी लिया। 6 कने इना जो सै प्रेरितां दे सामणे लेई आये कने उना तांई प्राथना किती कने उना पर हाथ रखीकरी उस कम्मे तांई नियुक्त किता। 7 कने परमेश्वरे दा बचन फेलदा गिया कने यरुशलेम शहरे च चेलयां दी गिणती बवदी गई, कने केई यहदी याजकां भी यीशु मसीह पर भरसे दे इस संदेशे जो मन्नी लिया। 8 स्तिफनुस अनुग्रह कने शक्तिया ला भरई करी लोकां च बड़े-बड़े अनोखे कम्म कने चमत्कार दसदा था। 9 पर कुछ लोक जडे उस यहदी जंज घरे दे थे, जिसयो गुलाम मुक्त यहदी जंज घर बोलदे थे, सै स्तिफनुसे दे खिलाफ होई गे। कने इना चे कुछ लोक कुरेने कने सिक्ंदरिया दे शहरां ला आयो थे, कने कुछ लोक किलिकिया प्रदेश कने असिया प्रदेश ला आयो थे। ऐ लोक स्तिफनुसे सोगी बेहस करणा लगणे। 10 स्तिफनुसे जडा कुछ भी बोलया सै उदा जबाब नी देई सके क्योकि पबित्र आत्मा उसयो बडी ही समझा ला बोलणे च सहायता किती। 11 इस तांई गुलाम मुक्त लोकां छुपके ला केई मदीं जो रिश्त देईकरी स्तिफनुसे दे बारे च झूठ बोलणे तांई भडकाया, “की असां इसयो मूसा कने परमेश्वरे दे खिलाफ च निंदा करदे सुणया है।” 12 कने उना स्तिफनुसे दे खिलाफ लोकां जो, यहदी अगुवां जो, कने व्यवस्था जो सिखाणे बालयां जो भडकाया कने उना आई करी स्तिफनुसे जो पकडया कने उसयो महासभा दे सामणे लेई आये। 13 कने

ओथु जूठे गबाह पेश किते, जिना स्तिफनुसे पर ऐ इलजाम लाया, “ऐ माणु इस पबित्र मन्दिरे कने मूसा दिया व्यवस्था दे खिलाफ बोलणा नी छडदा है। 14 क्योकि असां इसयो ऐ बोलदे सुणया है, की नासरत बासी यीशुए इस मंदरे जो ढाई देणा है, कने रीती रिबाजां जो बदली देणा है जडे मूसा सांझो दितयो न।” 15 तालू सारयां लोकां जडे महासभा च बैठयो थे, उदे पासे घुरी करी दिखया तां उदा मु स्वर्गदूते दे मुए सांई चमका दा था।

7 तालू महायाजके स्तिफनुसे ला पृछया, “क्या ऐ इलजाम सच्च न?” 2 उनी बोलया, “हे भाईयो कने पितरो सुणा, साडे पूर्वज अब्राहम जो हारान गां च आई करी बसणे ला पहले जालू सै मेसोपोटामिया प्रदेशे च था; कने तेजोमय परमेश्वरे उसयो दर्शण दिते। 3 कने उसयो बोलया, ‘तू अपने देशे कने अपने रिश्तेदारां ला निकली करी उसी देशे जो चली जा, जिसयो मैं तिजे दसगा।’ 4 तालू सै कसदियों दे देशे ला निकली करी हारान गांए च जाई बसया; कने उदे पिता दिया मौता दे बाद परमेश्वरे उसयो ओथु ला आणी करी इस देशे च बसाया जिदे च हण तुसां बसदे न, 5 पर परमेश्वरे उसयो ऐथु विरासत च कुछ नी दिता, ऐथु दीकर की इक फुट जगा भी नी दिती, कने उस बेले उदी कोई ओलाद भी नी थी। फिर भी परमेश्वरे बायदा किता, की मैं ऐ देशे तरे कने तरे बंशे दे हथे दिंगा।” 6 कने परमेश्वरे ऐ भी बोलया, तरे बंशे दे लोक पराये देशे च परदेशीं होणे, कने उना लोकां उना जो गुलाम बणाई लेणा, कने चारसो सालां दीकर उना सोगी बुरा बताबि करणा। 7 फिरी परमेश्वरे बोलया, “जिसा जातियां दे उना गुलाम होणा है, उना जो मैं सजा देणी, कने उना उस देशे ला निकली करी इसी इस्त्राएल च मेरी भक्ति करणी।” 8 कने परमेश्वरे अब्राहम सोगी इक बायदा किता कने उसने बोलया की सै अपने घरे दे सारे मर्दां दा खतना बायदे दे चिन्ह दे तौर पर करबाए; कने बादे च जालू इसहाक पैदा होया, तां अठमे रोजे उदा खतना किता, कने इसला बाद ऐ परमपरा चलदी रेई कने इसहाक ला याकूब कने याकूब ला साडे बारा पूर्वज पैदा होऐ। 9 जलन दिया बजा ने यूसुफे दे भाईयां उसयो मिस्र देशे जाणे बालयां जो इक गुलाम दे स्पे च बेची दिता, पर परमेश्वर उदे सोगी था। 10 कने परमेश्वरे यूसुफे जो उदे सारियां मुसीबतां ला छडाई करी मिसरे दे राजा फिरौन दे अग्रे अनुग्रह कने अकल दिती, कने फिरौन राजे उसयो मिस्र देशे पर कने अपने सारे घरे दा अधिकारी बणाया। 11 जालू यूसुफ मिस्र देशे दा गवर्नर था तालू सारे मिस्र कने कनान देशे च अकाल पिया; जिसने बडा भरी क्लेश होया, कने साडे पूर्वजां जो खाणे जो नी मिलदा था। 12 पर याकूबे ऐ सुणया, की मिस्र देशे च अनाज है, उना साडे पूर्वजां जो अनाज लेणे तांई भेजया कने सै यूसुफे ने मिल्ले कने अनाज खरीदया पर उना यूसुफे जो नी पछेणया। 13 कने दुई बरी जालू सै अनाज लेणा गे, तां यूसुफ अपने भाईयां जो दसया की मैं तुहाडा भाई यूसुफ है, कने यूसुफे दे परिबार दे बारे च फिरौन जो पता लगणी गिया। 14 तालू यूसुफे अपने पिता याकूब कने अपने सारे रिश्तेदारां जो, जडे पचतर माणु थे, उना जो मिस्र देशे च ओणे तांई बुलाबा भेजया। 15 तालू याकूब मिस्र देशे गिया; कने ओथु कुछ बकते बाद सै कने साडे बाप दादे मरी गे। 16 कने उदे बंशज याकूब कने उदे पुत्रां दियां लाशां जो साडे देशे कनान च लेई गे, कने याकूब दिया लाशा जो उसा कबरा च दफनाया, जिसा जो अब्राहमे इक सही कीमता च खरीदया था, कने उना याकूब दे पुत्रां जो शकमे शहरे दिया उसा जमिना च दफनाया, जिसयो याकूबे हामौर दे पुत्रां ला खरीदया था। 17 पर जालू उस बायदे जो पूरा होणे दा बकत नेडे आया जडा परमेश्वरे अब्राहम ने कितया था, तां मिस्र देशे च लोक बदी गे, कने मते सारे होई गे। 18 तालू मिस्र देशे च दुआ राजा राज करणा लग्गा जडा यूसुफे जो नी जानदा था। 19 उनी साडिया जातियां सोगी चलाकी करिरी साडे पूर्वजां ला इसा हदा दीकर बुरा व्यवहार कितया की, उना दे माता पिता जो अपने बचयां जो फेंकणा पेई गिया ताकि सै मरी जान। 20 कने उस बेले मूसा पैदा होया, कने सै परमेश्वरे दिया नजरा च बडा ही छेल था; कने उसयो उना तिन मिहनयां दीकर उसयो उदे माता-पिता लुकाई करी पालया। 21 पर जालू सै उसयो होर जादा लुकाई नी सके, तां उना उसयो घरे बाहर रखी दिता कने तालू फिरौने दीया कुडिया उसयो गोद लेई लिया, कने उसयो अपने पुत्रे सांई पालया। 22 कने मूसा जो मिशियां दी सारी बिधा पडाई, कने सै बडा ही प्रभावशाली तरीके ने गल्लां कने कम्म करदा था। 23 जालू मूसा चालियां सालां दा होया, तां उदे मने च आया की अपने इस्त्राएली रिश्तेदारां ने मिल्ले। 24 कने उनी ओथु इक मिर्सी माणुए जो इक

इसाएली माणुऐ सोगी बदसलुकी करदे दिखया, कने उसयो बचाया, कने मिस्री माणुऐ जो मारी करी उदा बदला लिया। 25 उनी सोचया, की मेरे भाईयां समझणा की परमेश्वरे मेरे हथे ने उना जो गुलामी ला अजाद करदा, पर उना नी समझया। 26 दूऐ रोजे मूसा दो इस्राएलियां बाल आया जडे अपु च लडा दे थे, कने उना बिच सुला कराणे तांई ऐ बोलया, की हे मर्दां, तुसां तां भाई-भाई न, तुसां कजो इकी दूऐ जो मारा दे न? 27 पर जडा अपने पडोसीऐ जो मारा दा था, उनी मूसा जो धक्का दिता कने बोलया, तिजो कुनी सांझो पर राजा कने न्याय करणे बाला बणाया है? 28 क्या जियां कल तू मिस्र देशे दे माणुऐ जो मारी दिता क्या मिजो भी मारणा चांदा है? 29 ऐ गल्लां सुणीकरी, मूसा मिस्र देश ला नठया कने मिघान देशे च परदेसी बणी करी रेणा लग्गा: कने ओथु उदे दो पुत्र पैदा होए। 30 मिघान देशे च पूरे चाली साल रहणे बाद, मूसा जो परमेश्वरे इक स्वर्गदूते दे स्पे च सनि पहाडे दिया सुनसान जगा च जलदिया झाडिया दिया अग्गी बिच दर्शन दिते। 31 जालू मूसा उसा अग्ग लगियो झाडिया जो दिखया जडी भस्म नी होआ दी थी, तां सै हेरान होया, कने जालू दिखणे तांई बखे गिया, तां प्रभु दी ऐ अबाज सुणोई, 32 “मैं तैरे पूर्वज, अब्राहम, इसहाक कने याकूब दा परमेश्वर है, जिदी सै आराधना करदे थे।” तालू तां मूसा डरे ने कर्मी पिया, ऐथु दीकर की उसयो दिखणे दी हिम्मत नी रेई। 33 तालू प्रभुऐ उसयो बोलया, अपने पैरां ला जूतयां उतारी दे, क्योंकि जिसा जगा तू खडोतया है, सै पबित्र जगा है। 34 मैं सची अपने लोकां दी दुर्दशा जो दिखया है, जडी मिस्र देशे च है, कने उना दी तकलीफ कने उना दे रोणे जो सुणया है, इस तांई उना जो छुडणे तांई उतरया है। हूण अ, मैं तिजो मिस्र देशे च भेजणा। 35 ऐ सै ही मूसा है जिसयो इस्राएलियां नकारी दितरया था कने जिना बोलया, तिजो कुनी सांझो पर राजा कने न्याय करणे बाला बणाया है? उसयो ही परमेश्वरे राजा कने छुडणे बाला बणाई करी, उस स्वर्गदूते दे जरिये भेजया जिनी उसयो झाडिया च दर्शन दिते थे। 36 सै उना जो मिस्र देशे ला बाहर लेई आया कने उनी मिस्र देशे च कने लाल समुंद्रे पर कने सुनसान जगा च चालियां सालां दीकर अदभुत कम्म कने चिन्ह दर्से। 37 ऐ सै मूसा है, जिनी इस्राएली लोकां जो बोलया, परमेश्वरे तुहाडे भाईयां च तुहाडे तांई मिजो सांई इक परमेश्वरे दा संदेश देणेबाला बणाणा है। 38 मूसा इक अणुवे दे स्पे च साडे पूर्वजां दे सोगी था जालू सै सुनसान जगा च गिठे थे, तालू स्वर्गदूते सनि पहाडे पर मूसा ने गल्लां कितियां, कने ओथु मूसा जो जिन्दगी देणेबाले बचन मिल्ले कने उनी सै बचन सांझो दीकर पूजाऐ। 39 पर साडे पूर्वज उदी मनणा नी चांदे थे; सै मने-मने च ही मिस्र देशे जो बापस जाणा चांदे थे, 40 कने उना मूसा दे भाई हासन ने बोलया, साडे तांई ऐसा देवता बणा, जडा मिस्र देशे जो बापस जाणे तांई साडे अग्गे-अग्गे चले; क्योंकि ऐ मूसा जडा सांझो मिस्र देशे ला कडी लेई आया है, असां नी जाणुऐ उसयो क्या होया है। 41 उना रोजां च उना इक बछडे दी मूर्ति बणाई करी, उदिया मूर्तियां अग्गे बलि चढाई, कने अपने हथां दे कम्मा पर खूश होणा लग्गे। 42 फिरी परमेश्वरे उना जो अम्बरे दे तारे, चन्द्रमा, सूरजे जो अपने देवतयां दे स्पे च पूजणे तांई छडी दिता, जियां परमेश्वरे दे संदेश देणेबालयां दीया कताबा च परमेश्वरे बोलया है, हे इस्राएल दे लोको, क्या तुसां सिर्फ मेरे तांई ही चालियां सालां दीकर सुनसान जगा च पशु बलि कने अन्नबली चढादें रे? 43 नही, तुसां उस तम्बूऐ जो डोता जिदे च तुहाडे देवता मोलेक दी मूर्ति थी; कने तुसां अपने देवता रिफान दे तारे जो चुकया, मतलब की उना मूर्तियां जो जिना जो तुसां भक्ति करणे तांई बणाया था। इस तांई मैं तुहांजो बाबेल देशे च गुलाम बणाणा। 44 गबाई दा तम्बू रेगिस्तान च साडे पूर्वजां बिच था; जियां की परमेश्वरे मूसा जो बोलया, जडा अकार तू दिखया है, उदे सांई इसयो बणा। 45 बडे सालां बाद उसी तम्बूऐ जो साडे पूर्वज यहोशुऐ सोगी ऐथु लेई आये। उस बकत ऐ देशे होरनी जातियां दे हथे च था, पर परमेश्वरे उना जो साडे पूर्वजां दे सामणे ला कडी दिता, कने सै तम्बू राजा दाऊदे दे बकते दीकर रिया। 46 दाऊद पर परमेश्वरे अनुग्रह किता; दाऊदे याकूब दे परमेश्वरे जो रेहणे तांई मंदर बणाणे दी बीनती किती। 47 पर जिनी परमेश्वरे दे मंदरे जो बणाया सै दाऊदे दा पुत्र सुलेमान था। 48 पर परमेश्वर हथा ने बणायो मंदरा च नी रेंदा है, जियां की यशायाह परमेश्वरे दे संदेश देणेबाले बोलया की, 49 परमेश्वर बोलदा है, स्वर्ग मेरा सिहांसन है कने धरती मेरे पैरां थल्ले दी चौकी है, मेरे तांई तुसां कदिया मंदर बणां? कने मिजो आराम करणे दी कुण देई जगा होणै? 50 मैं खुद स्वर्ग कने धरती दोनो जगा पर सब कुछ बणाया है। 51 “हे जिदी लोको, तुसां परमेश्वरे दियां गल्लां मनणे कने सुनने ला मना करदे न, तुसां हमेशा पबित्र आत्मा दा

बिरोध करदे न। जियां तुहाडे पूर्वज करदे थे, तियां ही तुसां भी करदे न। 52 तुहाडे पूर्वजां परमेश्वरे दे संदेश देणेबालयां च हेर कुसी जो सताया कने जिना ऐ भविष्यवाणी किती की मसीह जडा धर्मी है ओणा है, उना जो भी मारी दिता, पर जालू मसीह आया, तां तुसां उसयो धोखा दिता कने उदी हत्या करी दिती। 53 तुहांजो स्वर्गदूते दी बणाईयो व्यवस्था तां मिली, पर उदा तुसां पालन नी किता।” 54 ऐ गल्लां सुणीकरी यहूदी अणुवे स्तिफनुसे पर बडे जादा गुस्सा होए कने स्तिफनुसे पर ददां जो पिणा लग्गे। 55 पर स्तिफनुसे पबित्र आत्मा ने भर्से करी स्वर्ग पासे दिखया कने परमेश्वरे दिया महिमा जो कने यीशुऐ जो परमेश्वरे दे सजे पासे खडोतया दिखीकरी, 56 बोलया, “दिखा, मैं स्वर्ग जो खुलया कने माणुऐ दे पुत्रे जो परमेश्वरे दे सजे पासे खडोतया दिखा दा है।” 57 जालू उना च पूरे सब सुणया तालू उना जोरे ला विलाया कने अपने कना पर हथ रखी ले, ताकि सै स्तिफनुसे दी नी सुणन कने गिठे होईकरी स्तिफनुसे पर टूटी पे। 58 कने उसयो यस्शलेम शेहरे दे बाहर कडी करी पथर मारणा लग्गे, कने स्तिफनुसे पर इल्जाम लगाणे बाले लोकां अपने बाहरे बाले कपडे खोली करी शाऊले नाऐ दे जवान आदमिये बाल रखी दिते। 59 कने सै स्तिफनुसे जो पथर मारदे रे, कने सै ऐ बोली करी प्राथना करदा रिया, “प्रभु यीशु, मेरिया आत्मा जो लेई ले।” 60 फिरी गडे भार बेईकरी जोरे ने पुकारया, “प्रभु जी, इस पापे तांई इना जो सजा मत दिन्दे।” कने ऐ बोली करी मरी गिया।

8 शाऊल स्तिफनुसे दिया हत्या च पूरा सहमत था। उसी रोजे ला यस्शलेम शेहरे दिया कलीसिया पर बडा जुल्म होणा लग्गा कने प्रेरितां जो छडी करी सारे दे सारे यहूदिया प्रदेशे च कने सामरिया प्रदेशां च तितर बितर होई गे। 2 कने कुछ मर्दां जडे परमेश्वरे दी इज्जत करदे थे उना स्तिफनुसे जो दफनाई दिता, कने उदे तांई मते रोये। 3 शाऊल कलीसिया जो सता दा था, कने घरे-घरे जाई करी विश्वासी मर्दां कने जनानिया जो घसीटी-घसीटी करी जेलां च पाई दिन्दा था। 4 जडे भरोसा कने बाले तितर बितर होयो थे, सै जिथु कुथु भी गे लगातर श्भसमाचार सुणादे गे। 5 कने फिलिप्पुस सामरिया प्रदेशे दे इक शेहरे च जाई करी लोकां च मसीह दा प्रचार करणा लग्गा। 6 जालू उना फिलिप्पुसे जो बोलदे सुणया कने उदे कितयो चिन्हा जो दिखया, तां उना सारयां मिलिकरी उदे संदेशे जो ध्याने ला सुणया। 7 क्योंकि जालू फिलिप्पुसे हुकम दिता तां मतयां चे बुरियां आत्मा जोरे ने चिलादियां होइयां निकली गियां कने मते लकवे दे रोगी कने लंगडे भी ठीक होए। 8 तां उस शेहरे दे मते सारे लोक खूश होऐ। 9 उस शेहरे च इक शमौन नाऐ दा माणु था, कने सै काफ़ी बकत ला सामरियां दे लोकां पर जादू टोणा कर दा था, सै उदी काबिलियत ला बडे हेरान था, कने सै दावा करदा था की सै इक महान आदमी है। 10 कने सारे छोटयां ला लेईकरी बडे दीकर उसयो इज्जता ने बोलदे थे, “ऐ माणु परमेश्वरे दी सै शक्ति है, जिसयो महान बोलदे ना।” 11 उनी मते रोजां ला उना जो अपने जादुऐ दे कम्मा ने हेरान करी रख्या था, तां तां सै उसयो बडे मंदे थे। 12 पर जालू लोकां परमेश्वरे दे राज्य कने यीशु मसीह दे ना दा श्भसमाचार फिलिप्पुस ला सुणया कने भरोसा किता, तालू सारे मर्दां कने जनानिया बपतिस्मा लिया। 13 तालू शमौने अपु भी फिलिप्पुसे दे श्भसमाचार पर भरोसा किता कने बपतिस्मा लेईकरी हेर जगा फिलिप्पुसे सोगी जाणा लग्गा कने चमत्कार कने बडे-बडे कम्म होदे दिखीकरी सै हेरान होदा था। 14 जालू यस्शलेम शेहरे च प्रेरितां सुणयां की सामरिया प्रदेशे दे लोकां परमेश्वरे दा बचन मननी लिया है तां पतरसे कने यहूना जो उना बाल भेजया। 15 कने उना ओथु जाई करी उना तां प्राथना किती ताकि उना जो पबित्र आत्मा मिल्ले। 16 क्योंकि पबित्र आत्मा हले दीकर उना च कुसदे पर भी नी उतरया था, उना तां बस यीशुऐ दे नाऐ ने बपतिस्मा लिया था। 17 तालू पतरसे कने यहूने तिना पर हथ रखे कने उना जो पबित्र आत्मा मिल्ली। 18 जालू शमौने दिखया की प्रेरितां दे हथ रखणे ने पबित्र आत्मा मिलदी है, तां उनी पेसे देईकरी बोलया, 19 “ऐ शक्ति मिजो भी दिया, ताकि मैं जिसदे पर हथ रखें, उसयो पबित्र आत्मा मिल्ले।” 20 पतरसे उसयो बोलया, “तू कने तैरे पैसे दोनों नाश होन, क्योंकि तू परमेश्वरे दा दान पेसयां ने खरीदणे दा बिचार किता। 21 इसा सेबा च ना तेरी हिस्सेदारी है, ना हिस्सा है; क्योंकि तेरा मन परमेश्वरे दे सामणे सच्चा नी है। 22 इस तांई तू अपने मने ला इसा बुरिया सोचा जो कडी दे कने प्रभु ने प्राथना कने, तां होई कसदा प्रभु तेरी इसा बुरिया सोचा तांई तिजो माफ करे। 23 तू अपने पापां ला पन्नाताप कर क्योंकि तू कडवाट ने भस्या है कने पापे ने जकडया होया है।” 24 शमौने जबाब

दिता, “तुसां मेरे तांई प्राथना करा ताकि जडियां गल्लां तुसां बोलियां न, ऐसा कुछ भी मेरे सोगी न हो।” 25 पतरस कने यूहन्या उर शेहरे च गबाईं दिती कने प्रभु दे बचना दा प्रचार किता कने फिरी यरुशलेम शेहरे जो बापस चलीं गे। कने जांदि-जांदि बेले सामरिया प्रदेशे दे मतयां ग्रां च श्भसमाचार दा प्रचार किता। 26 फिरी प्रभु दे इकी स्वर्गादूते फिलिप्पुसे जो बोलया, “उठी करी दक्षिणे पासे उर रस्ते पर जा, जडा यरुशलेम शेहरे ला गाजा शेहर जो जांदा है, ऐ रेगिस्तानी रस्ता है।” 27 फिलिप्पुस उठी करी चलीं पिया, कने उसयो रस्ते च इक माणु मिल्ला सै इक खोजा कने कृशिये दी राणी कन्दाके दा मंत्री कने खजांची था, कने भक्ति करणे तांई यरुशलेम शेहर आया था। 28 कने सै रथे पर अपने देशे जो बापस चलया था, कने परमेश्वरे दा संदेश देणेबाले यशायाह दी कताबा जो जौरे ने पढा दा था। 29 ताल् पबित्र आत्मा फिलिप्पुसे ने बोलया, “जेडे होईकरी इसी रथे ने चलीं पो।” 30 फिलिप्पुस दोडी करी उर रथे बखे आया कने उसयो परमेश्वरे दा संदेश देणेबाले यशायाह दी कताबां जो पढते सुणया, तां उसला पुछया, “तू जडा पढा दा है क्या उसयो समझदा भी है?” 31 उनी बोलया, “मैं इसयो नी समझी सकदा जाल् दीकर मिंजो कोई इसयो समझांगा नी।” कने उनी फिलिप्पुसे ने बीनती किती की, रथे पर चढी करी मेरे बखे बो। 32 पबित्र शाब्दे दा जडा अध्याय सै पढा दा था, सै ऐ था, “उसयो भेडां सांई मारणे तांई लेईं गे, कने जियां मेमना ऊन कतरने बाले दे सामणे चुपचाप रेंदा है, तियां ही जाल् लोकां उसयो दुख दिता तां उनी भी अपना मु नी खोलया, 33 उदिया दीनता दिया बजा ला उदी बेईजती किती कने उसयो न्याय नी मिल्ला, शायद कोई भी उदे बंशजाने दे बारे च नी दस्सी सकदा है, क्योंकि इदे ला पेहले की धरती पर उदा कोई बंश हौंदा, लोकां उसयो मारी दिता।” 34 इसी पर खोजे फिलिप्पुसे ला पुछया, “मैं तिजो ने बीनती करदा है, मिंजो ऐ दस की परमेश्वरे दा संदेश देणेबाला कुसदे बारे च बोला दा है, अपने या कुसी होरसी दे बारे च?” 35 ताल् फिलिप्पुसे बोलाणा शुरू किता, कने इस पबित्र शाब्दे ला शुरू करिरी उसयो यीशुदे दा श्भसमाचार सुणया कने उनी खोजे ऐ गल्लां समझी लियां कने यीशुदे पर भरोसा किता। 36 रस्ते च चलदे-चलदे सै कुसकी तलाबे बाल पुज्जे, ताल् खोजे बोलया, “दिख ऐथू तलाब है, हण मिंजो बपतिस्मा लेणे तांई क्या कमी है?” 37 फिलिप्पुसे बोलया, “अगर तू सारे मने ने भरोसा करदा है तां लेईं सकदा है।” उनी जबाब दिता “मैं भरोसा करदा है की यीशु मसीह ही परमेश्वरे दा पुत्र है।” 38 ताल् उनी रथ खरेडने दा हुकम दिता, कने फिलिप्पुस कने खोजा दोनो तलाबे दे पांगिणे च उतरीं गे, कने फिलिप्पुसे उसयो बपतिस्मा दिता। 39 जाल् सै तलाबे ला निकली करी उपर आये, तां प्रभुदे दी आत्मा फिलिप्पुसे जो चुकी लेईं गेईं, कने खोजे उसयो दोबारा नी दिखया, कने सै खुश होया की प्रभुदे उसयो बचाया है कने अपने देशे जो बापस चलीं गिया। 40 फिरी फिलिप्पुस अशदोह शेहर च प्रगत होया कने ताल् ओथू ला यात्रा शुरू किती कने ग्रां-ग्रां च कने नगरां-नगरां च श्भसमाचार दा प्रचार करदा रिया जाल् दीकर सै कैसरिया शेहरे च नी पूजी गिया।

9 शाऊल पर हले दीकर प्रभु यीशु दे चेलयां जो धमकाणे कने मारणे दा खून सवार था, इस तांई सै महायाजक बाल गिया। 2 कने उसला दमिशक शेहरे दे यहूदी जंज घरा दे नाए पर अधिकार पत्र मंगे, की कोई भी मर्द कने जनानी जडे यीशु मसीह दी शिक्षा जो मदे न उना जो बन्नी करी यरुशलेम शेहर जो लेईं ओए। 3 पर जाल् शाऊल कने उदे साथी दमिशक शेहरे बखे पुज्जे, तां अचानक अम्बरे ला शाऊले दे चारो पासे इक लोकी चमकी, 4 सै धरती पर पेईं गिया, कने अबाज सुणी, जडी उसयो बोला दी थी, “हे शाऊल, हे शाऊल मिंजो कजो सता दा है?” 5 शाऊले पुछया, “प्रभु जी, तू कुण है?” उनी बोलया, “मैं यीशु है, जिसयो तू सता दा है।” 6 पर हण उठी करी शहरे जो जा, कुनी तिजो दस्सी देणा, की तिजो क्या करणा है। 7 जडे माणु उदे सोगीं गे, चुपचाप रेंईं गे, क्योंकि उना जो अबाज सुणोदी थी, पर कोई मिलदा नी था। 8 ताल् शाऊल धरती ला उठया, पर जाल् हखी खोलियां तां उसयो कुछ भी नी मिल्ला दा था कने सै उदा हथ पकडी करी दमिशक शेहर लेईं गे। 9 कने सै तिन्ना रोजां दीकर दिखी नी सकया, कने ना उनी कुछ खादा कने ना पीता। 10 दमिशक शेहर च हनन्याह नाए दा इक चेला था, उसयो प्रभु यीशुदे दर्शण च बोलया, हे हनन्याह। उनी बोलया, “हांजी प्रभु जी।” 11 ताल् प्रभु यीशुदे उसयो बोलया, “उठी करी सीधा नाए दिया गलिया च जा, कने यहदा दे घरे शाऊल नाए दे इकी तरसु शेहरे दे बासिये जो पछी ले; क्योंकि सै प्राथना करा दा है, 12 उनी दर्शण च दिखया है की हनन्याह नाए दे इकी माणुए

आई करी उस पर हथ रखे ताकि सै दोबारा दिखणा लग्गी पोए।” 13 हनन्याह जबब दिता, “प्रभु जी, मैं इस माणुदे दे बारे च मतयां लोकां ला सुणया है, की इनी यरुशलेम शेहर च तैरे पबित्र लोकां सोगीं बडा बुरा कितया है; 14 कने ऐथू भी इसयो बडे याजकां दिया तरफा ला हक मिलया है, की जडे लोक तिजो पर भरोसा करदे न, उना जो बन्नी करी यरुशलेम शेहर जो लेईं जा।” 15 पर प्रभुदे उसयो बोलया, “तू चलीं जा; क्योंकि ऐ तां, मैं होनी जातियां, कने राजयां, कने इम्राएलियां दे सामणे मेरे बारे च प्रचार करणे कने मेरी सेवा करणे तांई चूंणया है। 16 कने मैं उसयो दसणा है, की लोकां जो मेरे बारे च प्रचार करणे दिया बजा ला उसयो कदिया-कदिया दुख झेलणा पोणा है।” 17 ताल् हनन्याह उठी करी उस घरे च आया, जिथू शाऊल रे दा था, कने उदे पर अपना हथ रखीकरी बोलया, “हे भाई शाऊल, प्रभु यीशुदे मिंजो तैरे बाले भेजया है, जडा तिजो उस रस्ते च मिलया था, जाल् तू ऐथू ओआ दा था। कने उनी मिंजो इस तांई भेजया ताकि तू फिरी दिखीं सके, कने पबित्र आत्मा ने भरईं जाऐ।” 18 कने झट उदियां हखी ला छिलकयां सांई कुछ पिया, कने उसयो मिलणा लग्गी पिया, कने सै उठया कने उनी बपतिस्मा लिया, 19 फिरी खांणा खाईं करी उसयो जोर आया। सै केईं रोजां दीकर उना चेलयां सोगीं रिया जडे दमिशक शेहर च थे। 20 कने झट दमिशक शेहरे दे यहूदी जंज घरां च यीशुदे दा प्रचार करणा लग्गी पिया, की यीशु ही परमेश्वरे दा पुत्र है। 21 कने सारे सुणनेबाले हेरान होईकरी बोलाणा लग्गे, “क्या ऐ सेईं माणु नी है, जडा यरुशलेम शेहरे च उना जो आया था, जडे लोक यीशु नाए दे बंदे पर भरोसा करदे थे, कने ऐथू भी तांई ही आया था, की उना लोकां जो बन्नी करी बडे याजकां बाल लेईं जाऐ?” 22 पर शाऊल प्रचार करणे च होर भी जादा सामर्थी हौंदा गिया, कने इसा गल्ला दा सबूत देईं-देईं करी की यीशु ही मसीह है, दमिशक शेहरे दे रेहणे बाले यहूदियां दा मु बंद करदा रिया। 23 जाल् शाऊले जो दमिशक शेहरे च रेंदे होए मते रोज होईं गे, तां यहूदियां मिली करी उसयो मारणे दी तरकीब बणाईं। 24 कने सै उसयो मारणे तांई दिन रात फाटकां पर इंतजार करदे रे, पर उना दी तरकीब शाऊले जो पता चलीं गेईं। 25 इक राती चले शाऊले जो पथरे दिया उचिया दिबारा पर लेईं आऐ, जडी शेहरे दे चारो पासे बाणियो थीं। ताल् उना दिबारां दे खुले हिस्से ला रस्सियां दे सहारे इक बडिया दिया टोकरिया च उसयो थले उतारीं दिता। इयां कतिरी सै दमिशक शेहरे ला बचीं करी निकलीं गिया। 26 शाऊल यरुशलेम शेहरे जो गिया कने ओथू पुज्जी करी उनी चेलयां सोगीं मिलणे दी कोशिश किती, पर सारे उसला डरदे थे, क्योंकि उना जो भरोसा नी हौंदा था, की सै भी चेला है। 27 पर बरनबासे उसयो अपने सोगीं प्रेरितां बाल लेईंजाईं करी उना जो बोलया, की इनी कियां दमिशक शेहर जाणे बाले रस्ते च प्रभु जो दिखया, कने प्रभु यीशुदे उसला गल्लां कितियां; कने फिरी दमिशक शेहरे च इनी कितणिया हिम्मता ला यीशुदे दे नाए दा प्रचार किता। 28 प्रेरितां बरनबास पर यकीन किता, इस तांई शाऊल स्की गिया कने उना सोगीं यरुशलेम शेहरे दियां हर जगा पर गिया कने बिना डरयो यीशु मसीह दे बारे च प्रचार करदा था। 29 कने युनानी बोलीं बोलणे बाले यहूदियां सोगीं गल्ल बात कने बेहस करदा था; पर सै उसयो मारणे दी कोशिश करणा लग्गे। 30 ताल् बाकी चेलयां जो इसा गल्ला दे बारे च पता चला तां सै शाऊले जो कैसरिया शेहरे च लेईं आये, कने ओथू उना उदे तांई जहाजे ला तरसुस शेहर जाणे दा इंतजाम किता, जडा उदा अपना शेहर था। 31 इयां सारे यहूदिया प्रदेश, कने गलील प्रदेश, कने सामरी प्रदेशां च कलीसिया जो चैन मिल्ला, कने सै मुजबूत हौंदे गे, कने सै प्रभु यीशु मसीह दे डरे च जिन्यां जिन्दे थे कने उना जो पबित्र आत्मा दे जरिये सहायता मिल्ली कने मतयां लोकां यीशु मसीह पर भरोसा किता। 32 फिरी इयां होया की पतरस हर प्रदेशे च फिरदा होया, इक रोज लुद्दा शेहरे च रेणेबाले पबित्र लोकां ला मिलणे तांई उना बाल पुज्जा। 33 ओथू उसयो ऐनियास नाए दा इक लकवे दा रोगी माणु मिल्ला, सै अठां सालां ला मंजे पर पिया था। 34 पतरसे उसयो बोलया, “हे ऐनियास। यीशु मसीह तिजो ठीक करदा है। उठ कने, अपना बछण चुक।” ताल् सै झट उठी खडोता। 35 उसयो ठीक होया दिखीकरी सारे लुद्दा कने शारोन शेहरां दे सारे रेहणे बालयां प्रभु यीशुदे पर भरोसा किता। 36 याफा शेहरे च इक तबीता नाए दी जनानी रेंदी थी, जडी यीशुदे पर भरोसा करदी थी, जिसा दा युनानी भाषा च ना “दोरकास” था। (जिदा मतलब की इक हिरणा) कने सै बडे भरी भले कम्म कने गरीबां दी सहायता करदी थी। 37 उना रोजां च ही जाल् पतरस लुद्दा शेहरे च था, ताल् तबीता बीमार होईकरी मरी गेईं, कने लोकां उसा जो नोहाईं करी उपरे बाले कमेरे

च रखी दिता। 38 लड़ा शेहर याफा शेहर दे नेडे था, चेलयां ऐ सुणीकरी की पतरस ओथु है तां दो माणु भेजी करी उसला बिनती किती की, “साडे बाल ओणे जो देर मत कर।” 39 तालू पतरस उठी करी उना सोगी चली पिया, कने जालू पुज्जी गया, तां सै उसयो उसी उपरे बाले कमेरे च लेई गे। कने सारियां बिधवा रोंदिया उडे बाल आईयां, कने जडे कपडे दोरकास उना सोगी रेंदे बणायो थे, उना जो दसणा लगियां। 40 तालू पतरसे सारयां जो बाहर करी दिता, गोडयां दे भार बेईकरी प्राथना किती, कने लाशा पासे दिखीकरी बोलया, “हे तबीता उठ।” तालू उना अपणिया हखी खोली दितियां, कने पतरसे जो दिखीकरी उठी बैठी। 41 उनी हथ देईकरी उसा जो उठया कने पबित्र लोकां कने बिधवां जो सदीकरी उसा जो जिन्दा करी दसया। 42 ऐ गल्ल सारे याफा शेहर च फेली गई, कने मतयां प्रभु यीशु पर भरोसा कित। 43 कने पतरस याफा शेहरे च शमौन नाऐ दे कुसकी चमडे दा धंधा करणे बाले दे ओथु मते रोजां दीकर रिया।

10 कैसरिया शेहरे च कुरनेलियुस नाऐ दा इक माणु था, सै इतालियानी नाऐ दिया पलटना दा सबेदार था। 2 सै परमेश्वरे दा भक्त था, कने सै कने उदा सारा खानदान परमेश्वरे ला डरदा था, कने सै गरीब यहूदी लोकां जो बडा दान दिन्दा था, कने हर बकत परमेश्वरे ला प्राथना करणा लगरी रेंदा था। 3 इक रोज, उनी दिने दे लगभग तिन बजे दे करीब इक दर्शन च बिलकुल साफ दिखया की परमेश्वरे दे इकी स्वर्गदूते उडे बाल अंदर आई करी बोलया, “हे कुरनेलियुस।” 4 कुरनेलियुसे स्वर्गदूते जो ध्याने ला दिखया कने डरीकरी बोलया, प्रभु जी क्या हुकम है? उनी उसयो बोलया, “तेरियां प्राथना कने तेरे दान याद तांई परमेश्वरे सामणे पुज्जे ना। 5 हुण याफा शेहर च माणु भेजी करी शमौन जो, जिसयो पतरस बोलदे न, सदी ले। 6 सै शमौन, चमडे दा धंधा करणे बाले दे ओथु परोणा है, जिसदा घर समुद्रे बखे है।” 7 जालू सै स्वर्गदूत जिनी उसला गल्लां कितियां थियां चली गया, तां उनी दो सेवकां कने इक भक्त सिपाइरे जो सदाया जडे उदी सेबा तांई ओथु रेंदे थे, 8 कने उसयो सारियां गल्लां दसी करी याफा शेहरे जो पतरसे जो लौणे तांई भेजया। 9 दूऐ रोजे कुरनेलियुस दे भेजयो सै तिन माणु चलदे-चलदे लगभग दोपेरा दे बकत शेहरे बखे पुज्जे, तां उसी बकत पतरस छती पर प्राथना करणा चढया। 10 उसयो भूख लगगी कने सै कुछ खांणा चांदा था, कने जालू सै खांणा तैयार करा दे थे, तां सै बेसुध होई गया। 11 कने उनी दिखया, की अम्बर खुली गया, कने इक बडिया चादरा सांई कोई चीच चारो कुंणा ला रसिया ला बनियो धरती पासे उतरा दी है। 12 जिसा च धरतिया दे सै चारा पैरां बाले कने रेंगेणबाले जानवर कने अम्बरे दे पंछी थे, जिना दे बारे च मूसा दिया व्यवस्था च लिख्या है की सै अशुद्ध कने अपबित्र न कने यहूदिया जो इना जो खाणे तांई मना है। 13 कने उसयो इक अबाज सुणोई, “हे पतरस उठ, माने कने ख।” 14 पर पतरसे बोलया, “नी प्रभु, कदी नी, क्योंकि मै कदी भी कोई अपबित्र या अशुद्ध चीज नी खादियो है।” 15 फिरी दूजी बरी उसयो अबाज सुणोई, “जडा कुछ परमेश्वरे शुद्ध करी दितया है, उसयो अशुद्ध मत बोल।” 16 तिन बरी इयां ही होया, तालू सै चादर अम्बरे जो बापस चली गया। 17 जालू पतरस अपने मने च परशानिया च था, की ऐ जडा मै दर्शन दिखया ऐ क्या है? उसी बकत सै माणु जिना जो कुरनेलियुसे भेजया था, शमौने दे घरे दा पता लगाई करी दरबाजे पर आई खडोते। 18 कने पुकारी करी पृथणा लगे, “क्या शमौन जिसयो पतरस बोलदे न, ऐथू प्रॉणा है?” 19 पतरस जडा उस दर्शने दे बारे च सोचा दा ही था, की पबित्र आत्मा उसयो बोलया, “दिख, तिन माणु तिजो तोपा दे न। 20 भले ही सै होर जाति दे न, उठी करी थले जा, कने बिना सोचया उना सोगी चली जा, मै ही उना जो भेजया है।” 21 तालू पतरसे थले उतरी करी उना माणुऐ जो बोलया, “दिखा जिसयो तुसां तोपा दे न, सै मै ही है, तुहाडे ओणे दी क्या बजा है?” 22 उना बोलया, कुरनेलियुस सबेदार जडा धर्मी कने परमेश्वरे ला डरने बाला कने सारिया यहूदी जाति च सुनाम माणु है, उसयो इक पबित्र स्वर्गदूते ऐ बोलया है, की तिजो अपने घरे सदीकरी तिजो ला उपदेश सुणे। 23 तालू उनी उना जो अंदर सदीकरी उना जो रेहणे तांई जगा दिती। कने दूऐ रोजे सै उना सोगी गया, कने याफा शेहरे दे मसीह भाईयां च कुछ उदे सोगी चली पे। 24 तिजे रोजे सै कैसरिया शेहरे च पुज्जे, कने कुरनेलियुस अपने रिशतेदारां कने प्यारे दोस्तां जो गिठे करिरी उना दा इंतजार करा दा था। 25 जालू पतरस अंदर ओआ दा था, तां कुरनेलियुस उसने मिल्ला, कने उदे पैरां च पेईकरी मतस्ते कित। 26 पर पतरसे उसयो चुकी

करी बोलया, “खडा हो, मेरी अराधना मत कर मै भी तां माणु ही है।” 27 कने उसने गल्लां करदे अंदर गया, कने मतयां लोकां जो गिठे दिखीकरी 28 पतरसे उसयो बोलया, तुसां जाणदे न, की होरनी जातियां दी संगती करणा या उना दे ओथु जाणा भी असां यहूदियां तांई साडिया व्यवस्था दे खिलाफ है। पर परमेश्वरे मिजो दसया है कुसी भी माणुऐ जो अपबित्र या अशुद्ध नी बोलणा। 29 इस तांई जालू मिजो सदया तालू मै बिना कुछ बोलयो चली आया। हुण मै पुछदा है की मिजो कुसी कम्मे तांई सदया है? 30 कुरनेलियुसे बोलया, तिन रोज पेहले, इसी बकत, मै अपने घरे च लगभग दोपेरा दे तिन बजे दे करीब प्राथना करा दा था, तां इक मर्द चमकीले कपडे पाई करी, मेरे सामणे आई खडोता। 31 कने उनी मिजो बोलया, “हे कुरनेलियुस, तेरी प्राथना सुणी लियो है कने तेरे दान परमेश्वरे दे सामणे याद किते गे न। 32 इस तांई कुसकी जो याफा शेहर भेजी करी शमौने जो जिसयो पतरस बोल्ते न, सद। 3 सै समुद्रे दे बखे शमौन जडा चमडे दा धंधा करणे बाले दे घरे च परोणा है, जालू उनी ओणा, तां उनी तिजो परमेश्वरे दिया तरफा ला इक संदेश दसणा। 33 तां मै झट तेरे बाल लोक भेजे, कने तू खरा कित। 34 तालू तू आई गया। हुण असां सारे ऐथू परमेश्वरे दे सामणे न, ताकि जडा कुछ परमेश्वरे तिजो बोलणे तांई बोलया है, असां उसयो सुणना।” 35 तालू पतरसे मु खोली करी बोलया, हुण मिजो पक्का यकीन होया, की परमेश्वर कुसदा भी पक्ष नी करदा, 35 हर जातियां च जडा परमेश्वरे ला डरदा है कने धर्मे दे कम्म करदा है, उसयो परमेश्वर अपनाई लेदा है। 36 तुसां उस संदेश जो जाणदे न जडा परमेश्वरे सांझो, मतलब की इझाएल दे लोकां जो भेजया। उनी शान्ति दे बारे च शुभसमाचार सुणया जडा लोकां जो यीशु मसीह पर भरोसा करणे ला मिली सकदी है। सै सारयां दा प्रभु है। 37 तुहांजो उस बचने दे बारे च पता है, जडा यहून्ना दे बपतिस्मा दे प्रचारे बाद गलीले प्रदेश ला शुरू होईकरी सारे यहूदिया प्रदेशे च फेली गया, 38 तुसां नासरत बासी यीशुऐ दे बारे च जाणदे न की परमेश्वरे क्रियां पबित्र आत्मा कने शक्तिया ला उदा अपिषेक कित; सै भलाई करदा कने जिना जो शैताने तंग कितया था, उना सारयां जो ठीक करदा गया, क्योंकि परमेश्वर उदे सोगी था। 39 कने असां प्रेरितां उना सारियां चीजां दे बारे च लोकां जो दसया, जडियां यीशुऐ साडे यहूदिया प्रदेश कने यरूशलेम शेहरे च कितियां, कने यरूशलेम शेहरे च यहूदी अणुवां उसयो सूली पर लटकाई करी मारी दिता। 40 पर उसयो परमेश्वरे तिजे मरयां च जिन्दा करी दिता, कने उसयो प्रगट भी कित। 41 सारयां लोकां उसयो नी दिखया, पर उना गवाहां जो जिना जो परमेश्वरे पेहले ही प्रेरित चुणी लिया था, मतलब की सांझो जिना मरयां च जिन्दा होणे बाद उदे सोगी खादा पीता। 42 कने उनी सांझो हुकम दिता की सारे लोकां जो शुभसमाचार दा प्रचार करा कने गबाई दिया, की यीशु सेई है जिसयो परमेश्वरे जिदे कने मरयां दा न्याय करणे तांई बणाया है। 43 उदी सारे परमेश्वरे दे संदेश देणेबाले गबाई दिन्दे न की जडा कोई उदे पर भरोसा करणा, उसयो जडा मसीहे सूली पर कित। उदिया बजा ला ही पापां दी माफी मिलणी है। 44 जालू पतरस ऐ गल्लां बोला दा ही था की सारे बचन सुणने बालयां पर पबित्र आत्मा उतरी आई। 45 कने जितणे भी यहूदी भरोसा करणे बाले पतरसे सोगी आयो थे, सै सारे हेतान होऐ की होरनी जातियां जो भी पबित्र आत्मा दा तोफा दिता है। 46 क्योंकि उना जो भाति-भाति दियां बोलियां कने परमेश्वरे दी बडाई करदे सुणया। इस पर पतरसे बोलया, 47 “क्या इना जो हुण कोई पाणिऐ ला रोकी सकदा है की इना जो बपतिस्मा ना मिल्ले, जिना जो साडे सांई परमेश्वरे दिया तरफा ला पबित्र आत्मा मिलियो है?” 48 कने पतरसे उना जो हुकम दिता जडे लोक कुरनेलियुस दे घरे गठयो थे की यीशु मसीह दे नाऐ न बपतिस्मा लिया। तालू उना पतरसे ला बिनती किती की थोडे रोज होर रेई जा साडे सोगी कने इस तांई सै कुछ रोजां तांई रेई पिया।

11 प्रेरितां कने चेलयां जडे यहूदिया प्रदेशे च थे, उना सुणया, की होरनी जातियां भी परमेश्वरे दा बचन मनी लिया है। 2 कने जालू पतरस यरूशलेम शेहर च आया, तां यहूदी विश्वासी उसला शिकायत करणा लगे, 3 “तू होर जातियां दे लोकां दे घरे जाई करी उना सोगी रोटी खादी।” 4 तालू पतरसे उना जो शुरू ला सारियां गल्लां सुणाईयां, जडियां ओथु होईयां थियां; 5 “मै याफा शेहरे च प्राथना करा दा था, कने बेसुध होईकरी इक दर्शन दिखया, की इक बडिया चादरा सांई कोई चीच चारो कुंणा ला रसियां ला बनईयो अम्बरे ला धरती पासे उतरी

करी मेरे बाल आई। 6 जालू मैं उस पर ध्यान दिता, तां मैं धरतिया दे चारा पैरां बाले जानवर कने जंगली जानवर कने रेंगणेबाले जीव कने अम्बरे दे पंछी दिखे; 7 कने मैं इक अबाज सुणी जडी मिंजो बोला दी थी की, हे पतरस उठ मार कने खा। 8 मैं बोलया, 'नी प्रभु जी! क्योंकि कोई अपबित्र या अशुद्ध चीज मेरे मुंघे च कदी नी गई।' 9 इहे जबाब च अम्बरे ला दुजी अबाज आई, जडा कुछ परमेश्वरे शुद्ध बागया है, उसयो अशुद्ध मत बोला। 10 तिन बरी ऐदिया होया, तालू सारा कुछ अम्बरे पासे दोबारा चर्ली गिया। 11 कने झट तिन माणू जडे कैसरिया शेहरे ला मेरे बाल भेजयो थे, सै घरे दे दरबाजे पर आई खडोते, जिस घरे च असां थे। 12 तालू पबित्र आत्मा मिंजो बेझिझक उना सोगी चली जाणे जो बोलया, कने ऐ छे भाई भी मेरे सोगी चली पे, कने असां उस माणूऐ दे घरे पुज्जी गे। 13 कने उनी दसया, की मैं स्वर्गदूते जो अपने घरे खडोतया दिखया, जिनी मिंजो बोलया, याफा शेहर जो इक माणू भेजी करी शमौने जो जिसयो पतरस बोल्ते न, सदी ले। 14 उनी तिजो ने ऐसिया गल्लां बोलणियां न, जिना ने परमेश्वरे तिजो कने तरे सारे घराने दे लोकां जो बचाणा। 15 जालू मैं गल्लां करणा लग्गा तां पबित्र आत्मा उना पर तियां ही उतरी, जिंयां शुरू च पिन्नेकुस दे त्योहारे दे बकत सांझो पर उतरियो थी। 16 तालू मिंजो प्रभु दा सै बचन याद आया, जडा उनी बोलया, यहून्ना तां पांणिए ला बपतिस्मा दिता, पर परमेश्वरे तुहाडे सोगी रेणे तांई पबित्र आत्मा जो भेजणा। 17 इस तांई ऐ साफ है की परमेश्वरे उना होर जातियां जो भी सेई दान दिता, जडा सांझो प्रभु यीशु मसीह दे नां पर भरोसा करणे ला मिल्ला, तां मैं कुण था जडा परमेश्वरे जो रोकी सकदा था।' 18 ऐ सुणीकरी, यहूदी किंवासी चुप रे, कने परमेश्वरे दी बडाई करी बोलणा लग्गे, 'तां परमेश्वरे होर जातियां जो भी हमेशा दी जिन्दगी अपने बुरे कम्मा जो छडी करी यीशु मसीह पर भरोसा करणे ने दान दिता है।' 19 स्तिफनुसे दे मारे जाणे बाद, केई यीशु मसीह पर भरोसा करणे बालयां यरूशलेम शेहरे जो छडी दिता कने तितर बितर होई गियो थे, सै चलदे-चलदे फनीके इलाके कने साइरस ट्रूप कने सीरिया प्रदेशे दे अन्ताकिया शेहर च पुज्जे, पर यहूदियां जो छडी करी कुसी होरसी जो परमेश्वरे दा बचन नी सुणां दे थे। 20 पर उना च कुछ विन्वासी साइरस बासी कने कुरेनबासी थे, जडे अन्ताकिया शेहरे च आए कने होर जातियां जो भी प्रभु यीशु दे शुभसमाचार दियां गल्लां सुणाणा लग्गे। 21 कने प्रभु उना कितो दान हाथ उना पर था, कने मते लोकां उना दे प्रचार पर भरोसा किता कने प्रभु यीशु मसीह पर भरोसा करणा लगी पे। 22 तालू इना होईयां गल्लां दी खबर यरूशलेम शेहरे दिया कलीसिया सुणी, कने उना बरनबास जो अन्ताकिया शेहर भेजया। 23 सै ओथु पुज्जी करी, कने परमेश्वरे दे अनुग्रह जो दिखीकरी खुश होया, सारयां जो उपदेश दिता की तन मन लाईकरी प्रभु सोगी लिपटी रिया। 24 बरनबास इक भला माणू था, कने पबित्र आत्मा कने भरोसे ने भरई गिया था, कने होर मते लोकां प्रभु यीशु मसीह पर भरोसा किता। 25 तालू बरनबास अन्ताकिया शेहर छडी करी शाऊल जो तोपणे तांई तरसूस शेहर जो चली गिया। 26 कने जालू उसने मिल्ला तां उसयो अन्ताकिया शेहर जो लेई आया, कने इयां होया की शाऊल कने बरनबास इक साले दीकर कलीसिया सोगी मिलदे कने मते लोकां जो यीशु मसीह दे बारे च सिखादे रे, कने चेलयां जो सारयां ला पहले अन्ताकिया शेहर च ही मसीही बोलया। 27 उना रोजां च केई भरोसा करणे बाले जडे परमेश्वरे दा संदेश देणेबाले थे, यरूशलेम शेहर ला अन्ताकिया शेहर जो आए। 28 उना चे अगबुसे नांए दे परमेश्वरे दा संदेश देणेबाले खडे होईकरी पबित्र आत्मा दिया प्रेरणा ला ऐ दसया, की सारे संसारे च बडा बड्डा अकाल पोणा है, कने सै अकाल सम्राट क्लौदियस दे बेले पिया। 29 तालू चेलयां यहूदिया प्रदेशे दे मसीह पर भरोसा करणे बालयां तांई अपनी पौं च दे साबे ला सहायता देणे दा फेसला किता। 30 कने उना इयां ही किता, कने बरनबास कने शाऊल दे हथे अगुवां बाल कुछ पैसे भेजी दिते।

12 उस बकत हेरोदेस राजे कलीसिया दे कुछ लोकां जो दुख देणे तांई बन्दी बनाई लिया। 2 कने उनी प्रेरित याक्बे जो तलवारा ला मरवाई दिता, जडा प्रेरित यहून्ना दा भाई था। 3 जालू उनी दिखया, की यहूदी लोक इसला खुश होंदे न, तां उनी पतरसे जो भी पकडी लिया। सै अखमीरी रोतिया दे त्योहारे दा बकत था। 4 कने राजा हेरोदेसे उसयो पकडी कर जेला च पाई दिता, कने उदी रखालिया तांई, चार-चार सिपाईयां दे चार दलां दा पेसरा लाइ दिता। कने सै चांदा था की फसह दे त्योहारे बाद लोकां सामणे उदा न्याय करे। 5 पतरसे जो

कुछ दिना तांई जेला च रखाया, पर कलीसिया उदे तांई मन लाईकरी परमेश्वरे ला प्रार्थना करा दी थी। 6 कने जालू राजा हेरोदेसे उदा न्याय करणे तांई उसयो लोकां सामणे लोंणे बाला था, उसला इक रात पहले पतरस दों सुंगला ला बनूया, दों स्पाईयां दे बिच सुतया था, कने पहरे दार दरबाजे पर जेला दी रखबाली करा दे थे। 7 तां अचानक प्रभु दा इक स्वर्गदूत पतरसे बखे आई खडोता कने उस कोठरी च इक चमकीली लौ होई गई, कने उनी पतरसे दियां पसलिया पर हथ मारी करी उसयो जगाया, कने बोलया, "उठ, जल्दी उठा!" कने उदे हथां ला सुंगल खुली करी पेई गे। 8 तालू स्वर्गदूते उसयो बोलया, "लके बन, कने अपने जुतयां पाई ले।" उनी तियां ही किता, फिरी स्वर्गदूते उसयो बोलया, "अपणे बाहरी कपडे जो पाई करी मेरे पिच्छे चली पो।" 9 सै निकली करी उदे पिच्छे चली पिया, पर सै ऐ नी जाणदा था की जडा कुछ स्वर्गदूत करा दा है, ऐ सच्च था, पर सै ऐ समझा दा था की मैं दर्शन दिखा दा है। 10 तालू सै चर्ली करी पहले कने दुंए पहरे ला निकली करी उस लोहे दे फाटके पर पुज्जे, जडा शेहरे पासे लेई जांदा था, सै फाटक उना तांई अपु ही खुली गिया, कने सै निकली करी इकी गलिया च होईकरी गे, इतणे च स्वर्गदूत उसयो छडी करी चली गिया। 11 तालू पतरसे होशा च आई करी बोलया, "हूण मिंजो सच्च पता लगी गिया है, की प्रभुऐ अपना स्वर्गदूत भेजी करी मिंजो राजा हेरोदेसे दे हथे ला छुड़ाई लिया है, कने यहूदी अगुवां दी सारी आस तोडी दिती।" 12 ऐ जाणी करी की परमेश्वरे उसयो बचाई लिया है, तां सै मरियम दे घरे गिया, जडी यहून्ना दी माला थी, कने उदा दुज्जा ना मरकुस भी था। ओथु मते चले गिठे होईकरी प्रार्थना करा दे थे। 13 जालू पतरसे बाहरे बाले दरबाजे जो खडोतया तां स्टे नांए दी इक दासी सुणने तांई आई। 14 कने पतरसे दी अबाज पछेणी करी, खुशिया दे मारे उना दरबाजा नी खोलया, पर दोडी करी अंदर गई, कने दसया की पतरस दरबाजे पर खडोतया है। 15 उना उसा जो बोलया, तू पागल है। पर सै अडी रेई की सै पतरस ही है, तालू उना बोलया, "सै पतरसे दा स्वर्गदूत होणा।" 16 पर पतरस दरबाजा खडकांदा रिया कने उना दरबाजा खोलया, कने उसयो दिखीकरी हेरान होई गे। 17 तालू पतरसे उना जो हथे ला इशारा किता की चुप रिया, कने उनी दसया की प्रभुऐ किया मिंजो जेला ला कडी लयोंदा है। फिरी बोलया, "याक्ब कने भाईयां जो ऐ लदस की दिनयो!" तालू पतरस निकली करी दुज्जी जगा जो चली गिया। 18 ब्यागा जेला दे सिपाईयां च बडा हल्ला पेई गिया की, पतरस कृथु गिया। 19 जालू राजा हेरोदेसे उसयो तोपणे दा हुकम दिता पर सै तोपी नी सके, तां पहरे दारां ला पछुताछ किती कने जालू सै जबाब नी देई सके तां उना जो मारणे दा हुकम देई दिता, कने पतरस यहूदिया प्रदेशे जो छडी करी कैसरिया शेहरे च जाई करी रणा लगा। 20 राजा हेरोदेस सू कने सैदा शेहरे दे लोकां ला बडा जांदा गुस्सा था। इस तांई उना शेहरां दे लोक राजा हेरोदेस ला मिलणे तांई इक मन होईकरी आये। सारयां ला पहले, उना बलास्तुस ला सहायता मंगी जडा राजे दा खास कर्मचारी था। तां उना राजा हेरोदेसे ला शान्ति स्थापना तांई बोलया क्योंकि सै अपने खांणे पिणे दियां जुस्तरतां तांई राजे दे देशे पर निर्भर थे। 21 जिस रोजे राजा हेरोदेसे उना शेहरे दे लोकां ने मिलणे दा फेसला किता, उस रोजे सै राज कपडे पाई करी सिहांसने पर बैठा, कने प्रजा जो भाषण देणा लग्गा। 22 कने लोक उदी बडाई करणे तांई ऐ बोलणा लग्गे कि, "ऐ तां माणूऐ दी नी, पर कुसी देवते दी अबाज है।" 23 उसी बेले प्रभुऐ दे इकी स्वर्गदूते आई करी राजा हेरोदेस पर वार किता क्योंकि उनी परमेश्वरे दी महिमा नी कितती कने उदे शरिरे च कीड़े पेई गे कने सै मरी गिया। 24 पर परमेश्वरे दा बचन फलदा गिया कने भरोसा करणे बालयां दी गिणती बददी गई। 25 जालू बरनबास कने शाऊले यहूदिया प्रदेशे च अपनी सेवा दे कम्मे जो पूरा करी लिया तां सै यरूशलेम शेहरे ला अन्ताकिया शेहरे जो मुडी आए। यहून्ना जिसयो मरकुस भी बोल्ते न सै सोगी था।

13 अन्ताकिया शेहरे दिया कलीसिया च परमेश्वरे दा संदेश देणेबाले कने गुरु थे; मतलब की बरनबास कने शमौन जिदा दुज्जा ना निगर भी था; कने लुकियस कुर्नी शेहर, कने चौथाई देशे दे राज हेरोदेसे दा दूध भाई मनाहम कने शाऊल। 2 जालू सै बरत रखीकरी प्रभु दी भक्ति करा दे थे, तां पबित्र आत्मा बोलया, "भेरे तांई बरनबास कने शाऊल जो मेरी सेवा करणे तांई लंग करा जिदे तांई मैं उना जो सदया है।" 3 तालू उना बरत कने प्रार्थना करिरी कने उना पर हथ रखीकरी उना जो परमेश्वरे दा कम्म करणे तांई भेजया। 4 शाऊल कने बरनबास

पबित्र आत्मा दे जरिये भेजे गे, सै अन्ताक्रिया शेहर ला सिलुकिया शेहरे दिया बन्दरगाह जो गे, कने ओथु ला जहाजे पर चढी करी साइप्रस टापू दी सलामीस बंदरगाह जो चली गे। 5 सलामीस शेहर च पुज्जी करी, उना परमेश्वरे दा बचन यहदी जंज घरां च सुणाया, कने यहना जिसयो मरकुस भी बोलदे थे सै उना दी सहायता करणे ताई उना सोगी था। 6 इदे बाद उना पुरे टापूए च इक शेहर ला दुज्जे शेहर दी यात्रा कित्ती कने आखिर च पाफुस शेहरे च पुज्जे। ओथु उना जो बार-यीशु नापे दा इक जादगार मिल्ला जडा यहदी कने झडा संदेश देणेबाला था। 7 सै टापूए दे राज्यपाल सोगी था, जिदा ना सिरगियुस पौलुस था, कने सै बडा बुद्धिमान माणु था। राज्यपाले बरनबास कने शाऊल जो परमेश्वरे दा बचन सुणने ताई अपने बाल सनया, 8 पर जादगार बार-यीशु, जिसया युनानी भाषा च एलीमास बोलदे न, उना दा बिरोध करदा रिया, उदी कोशिश थी की सै राज्यपाल जो यीशु मसीह पर भरोसा करणे ला रोके। 9 तालू शाऊले जिदा ना पौलुस भी है, पबित्र आत्मा ला भरई करी जादगारे पासे इक टक लाईकरी दिखीकरी बोलया, 10 “हे सारे कपट कने चलाकिया ला भरस्यो शैताने दी ओलाद, सारिया धार्मिकता दे दुस्रामन, क्या तू प्रभु दिया सचाइया जो भ्रष्ट करणा नी छडणा? 11 हुण दिख, प्रभु तिजो सजा देणे बाला है, कने तू थोडे बकते ताई अन्ना रेंणा कने तू सरजे जो नी दिखी सकणा।” तालू झट धुंधलापन कने उदे अगे नेहेरा होई गिया, कने सै रूमां प्रां टटोलणा लग्गा ताकि कोई उदा हथ पकडी करी उदी सहायता करे। 12 तालू राज्यपाले जडा कुछ होया था, दिखीकरी कने प्रभु दियां शिक्षा ला हेरान होईकरी उनी यीशु मसीह पर भरोसा किया, 13 पौलुस कने उदे साथियां पाफुस शेहरे ला समुदी यात्रा शुरू कित्ती कने सै पफुलिया प्रदेशे दे पिरागा शेहरे च जाई पुज्जे, कने यहना मरकुस उना जो छडी करी यरूशलेम शेहरे जो बापस आई गिया। 14 कने पिरागा शेहरे ला अगे चली करी गलातिया प्रदेशे दे पिसिदिया जिल्ले दे बखे अन्ताक्रिया शेहर च पुज्जे; कने सब्ते दे रोजे च यहदी जंज घर च जाई करी बैठी गे। 15 मूसा दी व्यवस्था कने परमेश्वरे दे संदेश देणेबालयां दी कताबां ला पढने बाद यहदियां दे जंज घरे दे सरदारान उना जो बोली भेजया, “हे भाईयो, अगर तुसां च कुसी बाल लोकां जो शिक्षा देणे ताई तुहाडे मने च कोई बचन है तां बोला।” 16 तालू पौलुस खडा होया कने उना जो हथे ला चुप रेणे दा इशारा करिरी बोलया, “हे इझ्राएलियां, कने परमेश्वरे ला डरने बाले होर जाति दे लोको, सुणा।” 17 इना इझ्राएली लोकां दे परमेश्वरे साडे पूर्वजां जो चूणी लिया है, कने जालू ऐ मिस्र देशे च परदेसी होईकरी रेंदे थे, तां उना जो गिणतिया च बदाई दिता; कने उना जो अपणिया शक्तिया ला उस देशे ला कडी लांदा। 18 कने सै कोई चालियां साला दीकर सुनसान जगा च उना दी सेहदां रिया, चाहे सै बार-बार परमेश्वरे दे हुकूम दे खिलाफ जादे थे। 19 कने कनान देशे च सत जातियां जो खत्म करिरी उना दा इझ्राएली लोकां जो बिरासत च देई दिता। 20 साडे पूर्वजां मिस्र देशे च पुज्जे बाद चार सौ पजां सालां बाद कनान देशे पर अधिकार करणा शुरू कित्ता, इदे बाद परमेश्वरे दे संदेश देणेबाले शमूएल दे ओणे दीकर परमेश्वरे इझ्राएल दे लोकां पर राज करणे ताई मुखिए नियुक्त किते। 21 जालू शमूएल हले दीकर उना दा अगुवा ही था, उना इक राजा मंगया, तालू परमेश्वरे बिन्यामीन दे गोर च इक माणुए जो मतलब की कीश दे पुत्र शाऊले जो उना दा राजा बणाया, उनी चालियां सालां दीकर इझ्राएल दे लोकां पर राज कित्ता। 22 फिरी परमेश्वरे शाऊल जो राजे दे पद ला हटाई करी उदिया जगा पर दाऊदे जो उना दा राजा बणाया, जिदे बारे च उनी गबाई दिती, मिजो इक माणु, थिसे दा पुत्र दाऊद, मेरे मने दिया इच्छा दा माणु मिली गिया है। उनी मेरियां सारियां इच्छा पुरियां करणियां। 23 उदे ही बंशे च परमेश्वरे अपने बायदे दे अनुसार इझ्राएल ताई इक उदारकर्ता, मतलब की यीशु भेजया। 24 जिदे ओणे ला पहले यहने प्रचार कित्ता की सारे इझ्राएली लोकां जो अपने पापां दा पश्चाताप करणे कने परमेश्वरे पासे फिरणे कने बपतिस्मा लेणे दी जरूरत है। 25 जालू यहना अण्णी सेबा पुरिया करणे पर था, तां उनी बोलया, तुसां मेरे बारे च क्या सोचदे न? मै मसीह नी है! दिहा, मेरे बाद इक ओणे बाला है, सै बडा जादा महान है, मै तां उदे जुतयां दे तस्मे खोलणे दे काबील भी नी है। 26 “हे मसीह भाईयो, तुसां जडे अब्राहमे दी ओलाद न कने परमेश्वरे ला डरणे बाले होर जाति दे लोको, परमेश्वरे साडे बाल यीशु दे बारे च ऐ संदेश भेजया है जडा लोकां जो बचांदा है। 27 यरूशलेम शेहरे दे लोकां कने उदे अगुवां मसीह जो पछेणया नी कने उना परमेश्वरे दे संदेश देणेबालयां दे बचना जो नी समझया जिना जो सै हर सब्ते दे रोजे पढदे थे। इस ताई उना उसयो दोषी बोली

करी परमेश्वरे दे संदेश देणेबालयां दे बचना जो पूरा कित्ता। 28 उना जो मौत दी सजा देणे दे लायक उदे च कोई दोष नी मिल्ला, फिरी भी उना राज्यपाल पितलुसे ला बिनती कित्ती, की उसयो मारी दे। 29 कने जालू उना सै सब कुछ कित्ता जडा पबित्र शान्न उदे बारे च बोलदा है, तां उदिया लाशा जो सुली ला उतारी करी कबरा च रखया। 30 पर परमेश्वरे उसयो मरयां चे जिन्दा कित्ता, 31 कने जडे चेले यीशुए सोगी गलील प्रदेश ला यरूशलेम शेहरे च आयो थे, उना जो बडे रोजां दीकर मिलदा रिया; सै हण लोकां सामणे उदे गबाह न। 32 असां तुहांजो उसा प्रतिज्ञा दे बारे च जडी पूर्वजां ला कितियो थी, ऐ शुभसमाचार सुणां दे न, 33 की परमेश्वरे यीशुए जो मरयां ला जिन्दा करिरी, साडे सोगी बायदे जो पूरा कितया, जडे उना दी संतान न; जियां दुज्जे भजन संहिता च परमेश्वरे मसीह दे बारे च बोलया है की, तू मेरा पुत्र है, अजर ही मै तेरा पिता बणी गिया है। 34 परमेश्वरे यीशुए जो मरयां चे जिन्दा करणे दा बायदा कितया था, कने उसयो कब्र च सडना नी दिता, परमेश्वरे ऐ बोलया है, मै तिजो सै पबित्र कने पक्की आशीष देणी जिना जो देणे दा बायदा मै राजा दाऊदे जो कितया था।” 35 राजा दाऊदे ऐ गल्ल होर भजन संहिता च भी बोलदा है की, “तू अपने पबित्र जन जो सडना नी देणा।” 36 क्योकि राजा दाऊद तां परमेश्वरे दिया इच्छा दे अनुसार अपने बकते ने सेबा करिरी मरी गिया, कने अपने पूर्वजां बाल जाई रिया, कने सडी भी गिया, इसला सांझो पता लगदा है की दाऊद इस भजन च अपने बारे च गल्ल नी करा दा था। 37 पर सै यीशु मसीह दे बारे च बोला दा है जिसयो परमेश्वरे मरयां चे जिन्दा कित्ता, कने सै सडया भी नी। 38 इस तां, हे यहदी भाईयो; मै चांदा है की तुसां ऐ जाणी कित्ता की यीशु मसीह दे जरिये ही तुहांजो पापां दी माफी मिलदी है। 39 तुसां कदी भी मूसा दिया व्यवस्था दे जरिये परमेश्वरे दिया नजरा च धर्मीं नी बणी सकदे। पर हर इक जणा जडा यीशु मसीह पर भरोसा करदा है, सै परमेश्वरे दिया नजरा च धर्मीं है। 40 इस तां ध्यान रखा, की जडा परमेश्वरे दे संदेश देणेबालयां बोलया है, सै तुहाडे सोगी ना हो: 41 हे निंदा करणे बालयो, दिहा, हेरान होआ, कने मिटी जा; क्योकि मै तुहाडे दिना च इक कम्म करदा है; ऐसा कम्म, की अगर कोई तुसां ला उदी चर्चा करे, तां तुसां कदी भरोसा नी करणा। 42 जालू पौलुस कने बरनबास यहदी जंज घरे ला बाहर निकला दे थे, तां लोक उना ला बिनती करणा लगे की, अगले सब्ते दे रोजे ऐ गल्लां सांझो जातियां साणानयो। 43 जालू सभा खत्म होई, तां मते यहदी कने मते होर जातियां दे लोक जडे यहदी मते च आयो थे पौलुस कने बरनबासे पिच्छे चली पे, कने उना जो गल्लां करिरी समझया, की परमेश्वरे दे अनुग्रह च बणी रिया। 44 अगले सब्ते दे रोज शेहरे दे लगभग सारे लोक परमेश्वरे दा बचन सुणने जो गिठे होई गे। 45 पर जालू यहदी अगुवां बडिया भिडा जो दिखया तां सै प्रेरितां ला जलना लगे, कने पौलुसे दे बचना दे बिरोध च बोलया कने उदी बेजर्ती कित्ती। 46 तालू पौलुस कने बरनबासे बिना डरयो बोलया, जरूरी था, की परमेश्वरे दा बचन पहले तुहांजो सुणाया जांदा, पर तुसां उसयो नकारी दिता, कने अपने आपे जो हमेशा दिया जिन्दगिया दे लायक नी समझदे न, तां हुण, असां होरनी जातियां बाल जाणा। (aiōnios g166) 47 क्योकि प्रभु यीशुए सांझो ऐ हुकूम दितया है, “मै तिजो होरनी जातियां ताई ज्योति बणाया है, तुहांजो संसार च हर जगा लोकां जो दसणा है की मै कियां उना जो बचाई सकदा है।” 48 ऐ सुणीकरी होर जातियां खुश होइयां, कने सै परमेश्वरे दे बचने दी बडाई करणा लगे, कने जितणे लोक हमेशा दिया जिन्दगिया ताई बणायो थे, उना भरोसा कित्ता। (aiōnios g166) 49 तालू प्रभु यीशु दा बचन उस इलाके च सारे पासे फेलणा लग्गा। 50 पर यहदियां दे अगुवां भक्त कने कुलीन जाननिया जो कने शेहरे दे बडे लोकां जो भडकाया, कने पौलुस कने बरनबास पर हमला करवाई करी उना जो सीमा दे बार कडी दिता। 51 तालू पौलुस कने बरनबासे उना सामणे अपने पैरां दी धुड झाडी, उना जो ऐ दसणे ताई की परमेश्वरे उनी जो ठुकराई दितया है कने उना जो सजा देणी। फिरी सै इकुनियुम शेहरे च चली गे। 52 कने चेले अन्ताक्रिया शेहरे च आनंद ला कने पबित्र आत्मा ने भरई गे।

14 इकुनियुम शेहर च ऐसा होया की पौलुस कने बरनबास यहदी जंज घर च सोगी-सोगी गे, कने ऐसियां प्रभावशाली गल्लां कितियां की, यहदियां कने होर जातियां दौना चे मतयां यीशु पर भरोसा कित्ता। 2 पर च भरोसा नी करणे बाले यहदियां होरनी जातियां दे मन मसीह भाईयां दे खिलाफ च भडकाए, कने उना दे मना च इना दे खिलाफ जहर भरी दिता। 3 कने पौलुस कने बरनबास मते रोजां

दीकर ओथुरे, कने प्रभु यीशु दे भरोसे पर हिम्मत ला गल्लां करदे रे: कने प्रभु यीशुए उना जो अदभुत चिन्तन चमत्कार करणे दी शक्ति दिती, ऐसा करी के यीशुए ऐ साबित किता की जिस अनुग्रह दे बारे च सै प्रचार करा दे न सै सच्चा है। 4 पर शेहरे दे लोकां च फुट पेई गियो थी, इसला कितणे ही तां यहूदियाँ पासे, कने कितणे ही प्रेरितां दे पासे होई गे। 5 तालू होर जातियां कने यहूदी लोकां अपने सरदारं सोगी मिली करी उना पर हमला कने पथर मारणे फेसला किता। 6 जालू पौलस कने बरनबास जो इसा गल्ला दे बारे च पता लग्गी गिया, कने सै लुकाउनिया प्रदेशे दे लुक्का कने दिखे शेहरां च, कने अखे बखे दे इलाके च नठी गे। 7 पौलस कने बरनबासे ओथु पुज्जी करी लोकां जो शुभसमाचार सुणाया। 8 लुक्का शेहर च इक माणू बैठया था, उदे पैर कमजोर थे। सै जन्मे ला ही लगाडा था, कने कदी नी चलया था। 9 सै पौलसु जो गल्लां करदे सुणादा था कने पौलसु दिखया की उनी भरोसा करी लिया है कने सै खरा होई सकदा है। 10 कने जौरे ला बोलया, “अपणे पैरां भार सीधा खडा हो।” तालू सै उछली करी चलणा फिरणा लग्गी पिया। 11 लोकां पौलस दा ऐ कम्म दिखीकरी लुकाउनिया बोलिया च जौरे ने बोलया, “देवता माणुए दे स्मे च साडे बाल आया है।” 12 कने उना बरनबास जो यूनानी देवता ज्यूस दा ना दिता कने पौलस जो हिर्मस दा ना दिता, क्योंकि पौलस मुख्य संदेश देणे बाला था। 13 कने ज्यूसे दे उस मंदरे दा पुजारी जडा उना दे शेहरे सामणे था, दांद कने फुलां दे हार फाटके पर लेई आया क्योंकि सै लोकां सोगी बलि चढाणा चांदा था। 14 पर बरनबास कने पौलसु प्रेरितां जालू सुणाया, तां सै बडे परेशान होऐ कने अपने कपडे फाडीं दिते, कने भिडा च चली गे, कने पुकारी करी बोलाणा लग्गे, 15 “हे लोके, तुसां क्या करदे न? असां भी तुहाडे सांई दुखे सुख भोगणे बाले माणू न, कने तुहांजो शुभसमाचार सुणादे न, ताकि तुसां इना बेकार दियां चीजां ला लग होईकरी जिदे परमेस्वरे पासे आई जा, जिनी स्वर्ग कने धरती कने समुंदे कने जडा कुछ उना च है बणाया है। 16 उनी होए युगां च सारियां जातियां जो अपणे-अपणे रस्ते च चलणा दिता। 17 सै हमेशा अपने होणे दा सबूत उना खरियां चीजां ला दिन्दा है जडा सै करदा है, कने अम्बरे ला बरखा कने फलां बाली रित देईकरी तुहाडे तांई खाणा कने तुहाडे मना जो खुशिया ला भरदा रिया।” 18 ऐ बोली करी भी उना लोकां जो बडीं मुशकिला ला रोकया की उना तांई बलिदान मत करा। 19 पर कितणे ही यहूदियाँ अन्ताकिया कने इकुनियम शेहरा ला आई करी लोकां जो अपने पासे करी लिया, कने पौलसु जो पथरा ने मारया कने उसयो मरया समझीकरी घसीटी करी शेहरे बाहर लेई गे। 20 पर जालू चले उदे चारो पासे आई खडोते, तां सै उठी करी शेहरे जो बापस मुडी गिया कने दुऐ रोजे बरनबासे सोगी दिखे शेहरे जो चली गिया। 21 पौलस कने बरनबास दिखे शेहरे दे लोकां जो शुभसमाचार सुणाई करी कने मते चले बणाई करी। तालू सै लुक्का शेहरे जो बापस चली गे। कने फिरी ओथु ला इकुनियम शेहरे जो गे, कने फिरी सै पिसिदिया प्रदेशे दे अन्ताकिया शेहरे जो गे। 22 कने हर शेहरे च चेलयां दे मना जो मजबूत करदे रे कने ऐ शिक्षा दिन्दे थे, की भरोसे च भागी रिया, कने ऐ बोलेदे थे, “सांझो मते दुख झेली करी परमेस्वरे दे राज्य च दाखल होणा पोणा।” 23 कने उना हर इक कलीसिया च उना तांई अगुवे बणाऐ, कने प्राथना कने बरत करिरी उना जो प्रभु जो सोंपया जिदे पर उना भरोसा कितया था। 24 कने पिसिदिया प्रदेशे ला होंदे होऐ सै पंफुलिया जिल्ले च जाई पुज्जे; 25 कने उना पंफुलिया जिल्ले दे पिरागा शेहरे च परमेस्वरे दे बचने दा प्रचार किता कने अन्तलिया शेहरे जो आई गे। 26 कने अन्तलिया शेहरे ला जहाजे पर अन्ताकिया शेहर जो मुडी आये, जिथु ला उना जो परमेस्वर दे अनुग्रह च सौपीकरी उस कम्मे तांई भेजया था जिसयो उना जो पूरा किता। 27 अन्ताकिया शेहरे च पुज्जी करी उना कलीसिया गठेरी कने दसया, की परमेस्वरे साडे सोगी होईकरी कदे बड़े-बड़े कम्म किते कने कियां परमेस्वरे होर जातियां जो यीशु मसीह पर भरोसा करणे दे काबिल बणाया। 28 ओथु पौलस कने बरनबास चेलयां सोगी मते रोज रे।

15 कुछ यहूदी मसीह पर भरोसा करणे बाले यहूदिया प्रदेशे ला अन्ताकिया शेहरे जो आए कने भरोसा करणे बालयां जो सिखाणा लग्गे: “अगर मूसा दिया व्यवस्था दे रिबाजे ला तुहाडा खतना नी होऐ तां तुहाडा उद्धार नी होई सकदा।” 2 जालू पौलस कने बरनबास दा उना सोगी झगडा कने बडीं बेहस होई तां कलीसिया दे अगुवां पौलस कने बरनबास जो कने उना सोगी कुछ होर चेलयां

जो यस्शलेम शेहरे जो जाणे तांई चुण्या, ताकि सै इसा गल्ला दे बारे च प्रेरितां कने कलीसिया दे अगुवां सोगी चर्चा करन। 3 कलीसिया उना जो यात्रा तांई पैसे कने रोटीयां दा इंतजाम कराई करी भेजया, कने सै फीनीके कने सामरिया प्रदेशां ला होंदे होऐ कने ओथु दे भरोसा करणे बालयां जो दसया की होर जातियां दे लोकां कियां अपने पापां जो मन्नी लिया कने गलत कम्मा जो छडी करी यीशु मसीह पर भरोसा किता है। ऐ शुभसमाचार सुणीकरी सारे भरोसा करणे बाले भाई बडे खुश होए। 4 जालू सै यस्शलेम शेहरे च पुज्जे, तां कलीसिया कने प्रेरित कने अगुवे उना सोगी खुशिया ला मिल्ले, कने पौलस कने बरनबासे दसया की परमेस्वरे उना सोगी होईकरी कदे-कदे कम्म किते थे। 5 पर फीरियां दे दले दे लोकां च जिना भरोसा कितया था, उना कने कितण्यां ही उठी करी बोलया, “होर जातियां जो खतना करणे कने मूसा दी व्यवस्था जो मरणे दा हुकम देणा चाईदा।” 6 तालू प्रेरित कने अगुवे इसा गल्ला दे बारे च बिचार करणे तांई गिठे होऐ। 7 तालू पतरसे बडी लम्बी बेहस होई जाणे बाद खडोई करी उना जो बोलया, “हे मसीह भाईयो, तुसां जाणदे न, कि मते रोज होऐ न, की परमेस्वरे तुसां चे मिंजो चुणी लिया है, ताकि मेरे जरिये होर जातियां शुभसमाचार दा बचन सुणीकरी भरोसा करन।” 8 कने मने जो जाणने बाले परमेस्वरे उना जो भी साडे सांई पबित्र आत्मा दिता, इयां करिके उनी दसया की उनी होर जातियां जो अपने लोक होणे तांई चुणी लिया है। 9 कने भरोसे दे जरिये उना दे मन शुद्ध करिरी सांझो च कने उना च कोई भी फरक नी रखया। 10 तां हण तुसां कजो परमेस्वरे जो परखदे न, की साडी यहूदी व्यवस्था कने रिती रिबाजां जो मणने तांई इना होर जातियां दे भरोसा करणे बालयां पर भारी बोज पान, जिसयो ना साडे बाप दादे चुकी सकदे थे कने ना असां चुकी सकदे न। 11 इयां करणा ठीक नी है, साडा भरोसा तां ऐ है कि जियां उना जो प्रभु यीशुए दे अनुग्रह ला उद्धार मिलणा, तियां ही सांझो भी मिलणा, ना की मूसा दिया व्यवस्था जो मन्नी करी। 12 तालू सारी सभा चुपचाप होईकरी बरनबास कने पौलसु दी सुणा लग्गी, जियां ही उना अदभुत चिन्तन चमत्कारां दे बारे दसया जडे परमेस्वरे उना दे जरिये होर जातियां च किते। 13 जालू उना बोलाणा बंद किता, तां याकूब बोलाणा लग्गा, “हे मसीह भाईयो, मेरी सुणा।” 14 शमौन पतरसे समझाया, कि परमेस्वरे पेहली बरी होर जातियां चे कुछ लोकां जो अपने लोक होणे तांई चुणी करी उना जो आशीष दिती। 15 कने होर जातियां दा परमेस्वरे दे लोक बणना ऐ उसा गल्ला ला सहमत होंदा है, जिदे बारे च परमेस्वरे दे संदेश देणेबालयां पबित्र शास्त्र च बडे पेहेले लिखया था। 16 “तालू मैं बापस ओणा कने दाऊद दे राज्य जो दुबारा बणाणा जडा उदे दुशमणा वरबाद करी दितया है, कने उसयो दुबारा बणाई देणा। 17 इस तांई होर सारे लोक कने सारियां होर जातियां दे लोक जिना जो मैं अपने लोक होणे तांई चुण्या है, उना प्रभु जो तोपणा, 18 ऐ सेंई प्रभु बोलदा है जडा बडे पेहेले ला इना गल्लां दा समाचार दिन्दा आया है। (aiōn g165) 19 इस तांई मेरा बिचार ऐ है, कि सांझो होर जातियां तांई परमेस्वरे बाल मुडना कठिन नी बणाणा चाईदा; 20 पर असां उना जो इक चिट्ठी लिखी भेजन, की सै उस खाणे जो ना खान जिसयो लोकां मूर्तियां जो चढाया हो, कने ना व्यभिचार करदे कने ना ही गल्लां घेटी करी मारयो जानकरां दा मांस खिदे कने ना ही खून खिदे। 21 क्योंकि पुराणे बकते ला शेहरे-शेहरे च मूसा दिया इस व्यवस्था दे प्रचार करणे बाले होंदे आये न, कने सै हर सन्ते दे रोजे यहूदी जंज घरां च पढी जांटी है।” 22 तालू यस्शलेम शेहरे दिया सारिया कलीसिया कने प्रेरितां कने अगुवां जो ऐ खरा लग्गा, कि अपने चे कुछ माणुआं जो चुणी करी पौलस कने बरनबासे सोगी अन्ताकिया शेहरे जो भेजन, उना इस तांई यहूदा जो, जिसयो बरअब्बा भी बोलदे न, कने सीलास जो चुण्या, कने ऐ दोनो कलीसिया च सारयां ला इज्जतदार अगुवे थे। 23 कने सै इसा चिट्ठिया जो अपने सोगी लेई गे जिसा च लिखया था की, “ऐ चिट्ठी प्रेरितां कने अगुवां दिया तरफा ला है जडे तुहाडे भाई न, असां अन्ताकिया शेहरे दे कने सीरिया कने फिलिकिया प्रदेशां दे होर जातियां दे लोकां जो जडे यीशु मसीह पर भरोसा करदे न, उना जो नमस्ते भेजदे न। 24 असां सुणाया है कि, साडे ऐथु यस्शलेम ला कुछ अगुवे ओथु गे कने उना दियां गल्लां ला तुहांजो बुरा लग्गा कने तुसां दुखी होऐ, पर असां उना जो हुकम नी दितया था। 25 इस तांई असां इक मन होईकरी यहूदा कने सीलास जो चुणने दा फेसला लिया, ताकि उना जो अपने प्यारे भाई बरनबास कने पौलसु सोगी तुहाडे बाल भेजन। 26 ऐ तां ऐसे माणू न, जिना अपने प्राण साडे यीशु मसीह दी सेवा तांई खतरे च पायो न। 27 कने असां यहूदा कने सीलास जो भेजया है, जिना तुहाडे सामणे अपने मूरे ला ऐ गल्लां

दस्सी देणियां न। 28 पबित्र आत्मा जो कने सांझो भी ऐ टीक लग्गा कि इना जरूरी गल्लां जो छडी करी, तुहांजो पर होर बोझ ना पान; 29 कि तुसां मूर्तियां अगगे चढायो खाणे जो मत खांदे, कने व्यभिचार कने गला घोट्टी करी मारयो जानवरां दा मॉस कने उना दा खून मत खांदे। अगर तुसां इना ला दूर रेंगे तां तुहाडा भला होणा। शुभकामना।” 30 फिरी कलीसिया उना जो ओथु ला भेजी दिता कने अन्ताकिया शेहरे च पुज्जे, कने सभा जो गटेरी करी उना जो चिट्ठी देईं दिती। 31 कने सै उस उपदेशे जो पढी करी बडे खुश होए। 32 कने यहदा कने सीलासे जडे अपु भी परमेवरे दे संदेश देणेबाले थे, मतिंयां गल्लां ला भरोसा करणे बाले भाईयां जो शिक्षा देईंकरी प्रोत्साहित कने मजबूत किता। 33 (यहदा कने सीलास थोडे हप्ते ओथु रे, कने मसीह भाईयां उना जो शांति ला आशीष देईंकरी यरूशलेम शेहरे दिया कलीसिया च बापस भेजी दिता।) 34 पर सीलासे अन्ताकिया शहर च रेणे दा फेसला किता, इस तांई यहदा किल्ला ही यरूशलेम शेहरे जो बापस चली गया। 35 कने पौलुसे कने बरनबास अन्ताकिया शेहरे च रेईं पे, कने होर मते लोकां सोगी प्रभु यीशु दे बचना दी शिक्षा कने शुभसमाचार सुणांदे रे। 36 थोडे बकत बाद पौलुसे बरनबासे जो बोलया, “जिना-जिना शेहरां च असां प्रभु दे बचन सुणायो थे, ओआ, ओथु बापस जाईं करी अपने विश्वासी भाईयां जो दिखदे न कि सै कदे न।” 37 तालू बरनबासे यहन्ना जो जिसयो मरकुस बोलदे न, सोगी लेईं जाणे दा बिचार किता। 38 पर पौलुसे बोलया यहन्ने हार मन्नी लियो है कने सांझो छडी करी चली गया है जालू असां पफूलिया इलाके च थे, इस तांई उसयो सोगी लेईं जाणा खरा नी समझया। 39 ऐसी बेहस होईं कि पौलुस कने बरनबास इकी दुज्जे ला लग होईं गे, कने बरनबास, मरकुस जो लेईंकरी जहाजे पर साइप्रस टापु जो चली गया। 40 पर पौलुसे सीलास जो चुंगी लिया, कने मसीह भाईयां उना जो परमेवरे दे अनुग्रह च सौपीं दिता कने फिरी सै दोनो ओथु ला अन्ताकिया शेहरे ला चली गया। 41 कने फिरी सै पुरे सीरिया कने किलिकिया प्रदेशां च गे कने कलिसियां दे भरोसा करणे बालयां जो प्रोत्साहित करदे गे।

16 फिरी पौलुस दिखे कने लुका शेहरे च भी गे, कने ओथु तीमुथियुस नापे दा इक चेला था। उदी माता यहदी विश्वासी थी, पर उदा पिता युनान देशे दा था। 2 सै लुका इकुनियुम शेहरां दे भरोसा करणे बाले भाईयां च इज्जतदार था। 3 पौलुसे दी इच्छा थी कि तीमुथियुस उदे सोगी चले, कने उनी तीमुथियुस दा खतना इस तांई करायो ताकि उस जगा दे यहदी लोक उदी सुणन, क्योंकि सै सारे जाणदे थे, कि उदा पिता युनानी था। 4 पौलुस कने उदे सोगी शेहरे-शेहरे जाईं करी सै उना नियमां जो जडियां यरूशलेम शेहरे दे प्रेरितां कने अगुवां बणाईयां थियां, उना जो विश्वासियां बाल पुजांदे थे ताकि सै उना नियम दा पालन करन। 5 इयां कलीसिया भरोसे च मजबूत होदी गेईं कने हर रोज गिणतियां च बददी गेईं। 6 कने सै फ्रुगिया कने गलतिया प्रदेशां च होईंकरी गे, क्योंकि पबित्र आत्मा उना जो आसिया प्रदेशे च बचन सुणणे तांई मना किता। 7 कने उना मुसिया प्रदेशे दे बखे पुज्जी करी, बितुनिया प्रदेशे जाणा चांदे थे; पर यीशुऐ दिया आत्मा उना जो जाणा नी दिता। 8 तां सै मुसिया प्रदेशे ला होईंकरी बंदरगाह बाले शहर त्रोआस जो आए। 9 ओथु पौलुसे राती इक दर्शण दिखया कि इक मकिदुनी प्रदेशे दा मर्द खडोतया, कने उसला बिनती करी के बोलदा है, “समुन्द्रे पार उतरी करी मकिदुनिया प्रदेशे च आ, कने साडी सहायता कर।” 10 जालू पौलुसे ऐ दर्शण दिखया, तालू असां झट मकिदुनिया प्रदेशे जो जाणे दी योजना बणाई, ऐ समझीकरी कि परमेवरे सांझो शुभसमाचार सुणणे तांई सदया है। 11 इस तांई असां त्रोआस शेहरे ला जहाजे जायेये समात्रके टापु च आए कने दुज्जे रोजे नियापुलिस शेहरे दिना बंदरगाह च आये। 12 ओथु ला असां फिलिप्पी शेहरे च पुज्जे, जडा मकिदुनिया प्रदेशे दा मुख्य शेहरे, कने रोमियां दी बस्ती है, कने असां उस शेहरे च थोडे रोजां दीकर रे। 13 सब्दे दे रोजे असां शेहरे दे फाटके बाहर खडा बखे ऐ सोची करी गे कि ओथु यहदियां दी प्राथना करणे दी जगा होणी, कने बेईंकरी उना जनानिया ने गल्लां करणा लग्गे, जडियां ओथु गठुइयां थियां। 14 कने ओथु इक लुदिया नापे दी जनानी उना दे बचन सुणा दी थी जडी थुआतीरा शेहरे ला बैजणी कपडे बेचदी थी, सै परमेवरे दी भक्त थी, कने परमेवरे उसा दा मन खोलया, ताकि सै पौलुसे दियां गल्लां पर ध्यान लगाए। 15 कने जालू उना अपने पुरे टब्बरे समेत बपतिस्मा लिया, तां उना बिनती किता, “अगर तुसां मिंजो बपतिस्मा करे परभोसा करणे बाली समझदे न, तां मेरे घरे रेंणा चला, ” “कने सै सांझो मनाई करी अपने घरे लेईं

गेईं।” 16 इक रोज जालू असां प्राथना करणे बालिया जगा जो चलयो थे, तां सांझो इक दासी मिली, जिसा च इक ऐसी बुरी आत्मा थी, जिदिया सहायता ला सै भविष्य दिखी लेदी थी, कने सै अपने स्वामियां तांई मतां कुछ कमाई लौदी थी। 17 सै पौलुसे कने साडे पिच्छे आई करी चिलाणा लगी, “ऐ माणू परम प्रधान परमेवरे दा दास है, सै तुसां जो दसा दे न कि किया बची सकदे न।” 18 सै मते रोजां दीकर इयां ही करदी रेईं, कने पौलुस दुखी होईं गया, कने मुडी करी बुरी आत्मा जो बोलया, “मै तिजो यीशु मसीह दे नापे ने हुकम दिन्दा है, कि इसा चे निकली जा, कने सै तालू ही निकली गेईं।” 19 जालू उसा दे मालिके दिखया कि, साडिया कमाईया दी आस तां चली गेईं, तां सै पौलुस कने सीलासे जो पकडी करी चौके च प्रधान बाल खिची लेईं गे। 20 कने उना जो फौजदारिया दे हाकिमा बाल लेईंजाईं करी बोलया, “ऐ लोक जडे यहदी न, साडे शेहरे च बडा हंगामा करा दे न, 21 कने ऐसे तरीके दसा दे न, जिना जो अपनाणा कने मनणा रोम देशे च रेणे बालयां तांई ठीक नी है।” 22 तालू लोकां दी भीड पौलुस कने सीलासे दे बोरोध च गिठी होईंकरी चडी आई, कने हाकिमा उना दे कपडे फाडी करी उतारी दिते, कने उना जो डंडे मारणे दा हुकम दिता। 23 कने मते डंडे मारी करी उना जो जेला च पाईं दिता, कने जेल अधिकारिये जो हुकम दिता कि साबधानी ला उना दी रखबाली करा। 24 कने ऐसा हुकम मिलणे ला उनी उना जो अंदरे बालिया कोठडिया च रखया कने उना दे पैरां जो लकडिया दियां बेडियां ला जकडी दिता। 25 लगबग अधिया राती पौलुस कने सीलास प्राथना करदे होए परमेवरे दे भजन गा दे थे, कने कैदी उनी दी सुणा दे थे। 26 कने इणणे च अचानक इक बडा बडा हिलण होया; ऐथु दीकर कि जेला दियां नियां भी हिली गेईयां, झट सारे दरबाजे खुलीं गे, कने सारयां दे बंधन खुलीं गे। 27 कने दरोगा उठी होया, कने जेला दे दरबाजे खुले दिखीकरी समझया कि सारे कैदी नठी गियो न, कने सै तलबारा कडी करी अपने आपे जो मारणा लग्गा। 28 पर पौलुसे जौरे ने पुकारी करी बोलया, “अपणे आपे जो कुछ मत करदा, क्योंकि असां सारे ऐथु ही न।” 29 तालू सै दिव्या मंगाईं करी अंदरे गया कने कमदा होया पौलुसे कने सीलासे अगगे पेईं गया, 30 कने उना जो बार आंगी करी बोलया, “हे सजने, उद्धार पाणे तांई मै क्या करे?” 31 उना बोलया, “प्रभु यीशु पर भरोसा कर, तां तेरा कने तैरे घराने दा उद्धार होणा।” 32 कने उना उसयो कने उदे सारे घरे दे लोकां जो प्रभु दे बचन सुणाए। 33 कने राती उसी बेले उना जो लेईंजाईं करी उना दे जखम धोते, कने उनी कने उदे लोकां उसी बेले बपतिस्मा लिया। 34 कने उनी उना जो अपने घरे लेईंजाईं करी, उना अगगे खांणा रखया, कने सारे घराने समेत परमेवरे पर भरोसा करिरी खुशी मनाई। 35 जालू अगलिया ब्यागा हकीमा सिपाईयां जो ऐ बोली भेजया कि उना माणुणे जो छडी दिया। 36 दरोगे ऐ गल्ले पौलुसे जो सुणाईं, “कि हाकिमा तुहांजो छडी देणे दा हुकम भेजी दितया है, इस तांई हुण निकली करी शांतिया ने चली जा।” 37 पर पौलुसे उना जो बोलया, “उना सांझो जडे रोम देशे च रेणेबाले माणू न, बिना दोष साबित कितयो सांझो लोकां दे सामणे मारया कने जेला च पाया, कने हुण क्या सै चुपचाप बाहर निकाली देणा चांदे न? ऐसा नी होणा, पर सै अपु आईं करी सांझो बार लेईं जान।” 38 सिपाईयां ऐ गल्लां हाकिमा ने बोली दीतियां, कने सै ऐ सुणीकरी की सै रोम देशे दे नागरिक न, सै डरी गे, 39 कने आईं करी उना ला माफी मंगी कने बार लेईंजाईं करी बिनती कि शेहरे ला चली जा। 40 सै जेला ला निकली करी लुदिया दे ऐथु गे, कने चेलयां ला मिली करी उना जो शांति दिती, कने चली गे।

17 फिरी पौलुस कने सीलास अम्फिपुलिस शेहरे कने अपुल्लोनिया शेहरे ला होईंकरी थिस्सलुनीके शेहरे च आए, जिथु यहदी जंज घर था। 2 कने पौलुस रोजे सांई उना बाल गया, कने तिन सकतां दे रोजां पर पबित्र शाबां ला उना सोगी चर्चा किती। 3 कने उना गल्लां दा मतलब खोली-खोली करी समझांदा था कि मसीह जो दुख होणा, कने मरयां च जिन्दा होणा जरूरी था; “ऐईं यीशु जिदे बारे च मै प्रचार करता है, सेईं मसिहा है।” 4 उना चे कुछ यहदियां, कने परमेवरे दा डर मनणे बाले युनानियां कने मतिंयां खास जनानिया भरोसा उना दे बचना पर भरोसा करी लिया, कने पौलुसे कने सीलासे सोगी जुडी गे। 5 पर यहदियां जलना ने भरईं करी बजास लोकां चे केईं बुरे माणुऐ जो अपने सोगी लेईं लिया, कने भीड लगाईं करी शेहरे च दंगे करणा लग्गे, कने उना यासोने दे घरे पर हमला किता, सै पौलुस कने सीलासे जो लोकां दे सामणे लोणा चांदे थे। 6 कने सै उना जो

नी मिल्ले, कने सै चिलांदे होए यासोन कने उदे कुछ मसीह भाईयां जो शेहरे दे हाकिमा सामणे स्थिची लेई आये, “ए लोक जिना सारियां जगा च परेशानी पावयो है, ऐथू भी आयो ना।” 7 कने यासोने उना दा अपने घरे च स्वागत किता, कने ऐ सारे महाराजा कैसरे दे हुकमा दा बिरोध करदे न कने बोल्दे न कि इक होर राजा है जिदा ना यीशू है। 8 जालू लोकां कने शेहरे दे हाकिमा ऐ गल्लां सुणियां तां सै परेशान होई गे। 9 कने उना यासोन कने बाकी लोकां जो जमानता पर छडीं दिता। 10 चेलयां झट रातो रात पौलुस कने सीलास जो बिरिया शेहरे च भेजीं दिता, कने सै ओथू पुज्जी करी यहूदी जंज घर च थे गे। 11 ऐ लोक तां थिस्सलूनीके शेहरे दे यहूदियां लोकां ला खुले दिले दे थे कने उना बडिया लालसा ला बचन जो अपनाया कने रोज बनित्र शांतां च इना गल्लां जो तोपेदे रेदे कि ऐ गल्लां ऐसियां हेन कि नी न। 12 इस ताई उना के मतयां, कने यूनान देशां दियां इज्जतदार जनानिया चे कने मदीं के मतयां भरोसा किता। 13 पर जालू थिस्सलूनीके शेहरे दे यहूदियां जो पता चला कि पौलुस बिरिया शेहरे च भी परमेश्वरे दा बचन सुणा दे है, तां सै ओथू आई करी भी लोकां जो भडकाणे कने हंगामा करणा लगे। 14 तालू चेलयां झट पौलुसे जो ओथू ला भेजीं दिता कि तू समुंद्रे कंडे चलीं जा; पर सीलास कने तीमथियुस बिरिया शेहरे च ही रेई गे। 15 सै लोक जडे पौलुसे जो लेई चलयो थे, सै उस सोगी एथेंस शेहरे दीकर गे, पर पौलुस दे इसी हुकमे सोगी सै बिरिया शेहरे जो मुडीं गे कि सीलास कने तीमथियुस जो झट ही उदे बाल भेजीं दिया। 16 जालू पौलुस एथेंस शेहरे च उना दा इंतजार करदा था, तां शेहरे जो मूर्तियां ला भक्ष्या पीछीकरी उदा मन बडा दुखी होया। 17 इस ताई था सै हर सन्त दे दिन यहूदी जंज घरे च यहूदियां कने परमेश्वर दा उर मनणे बाले होर जाति दे लोकां सोगी बाद-बिबाद करदा कने चौका पर जडे भी लोक मिलदे थे, उना ला हर रोज चर्चा करदा था। 18 तालू सै गुरू जडे इपिकरी कने स्टोईकी करी के जाणे जांते थे, इना चे कुछ उसला बेहस करणा लगे, कने केईयां बोलया, ऐ बकवास करणे बाला क्या बोलणा चांदा है? पर दुसयां बोलया, ऐ कुसी होरसी देशे दे देवतयां दा प्रचारक लग्ना दा है, क्योंकि सै यीशू दा कने मरयां चे जिन्दा होणे दा श्भमसाचार सुणांदा था। 19 तालू सै उसयो अपने सोगी अरियुपगुस नाये दे यहूदी महासभा जो लेई गे कने पुछया, “क्या असां जाणी सकदे न, कि ऐ जडीं नोई शिक्षा तू सिखा ले दा है, सै क्या है? 20 कयोकि तू सांझो अनोखियां गल्लां सुणांदा है, इस ताई असां जाणना चांदे न की इना सारियां गल्लां दा क्या मतलब है?” 21 इस ताई की सारे एथेंस शेहरे दे बासी कने परदेसी जडे ओथू रेदे थे, नोईयां-नोईयां गल्लां बोलणे कने सुणने दे सिवा होर कुसी कम्मे च बकत नी बितांते थे। 22 तालू पौलुसे अरियुपगुस नाये दी सभा दे बिच खडोई करी बोलया, हे एथेंस शेहरे दे लोके, मै दिखा दा है कि तुसां हर गल्ला च देवतयां जो बडा मंदे न। 23 कयोकि मै गुमदे होए तुहाडियां अराधना करणे बालियां चीजां जो दिखा दा था, तां इक ऐसी वेदी भी मिली, जिसा पर लिखया था, “अनजाणे ईश्वरे ताई।” इस ताई तां जिसयो तुसां बिना जाणयो अराधना करदे न, मै तुसां जो उदा समाचार सुणांदा है। 24 जनि परमेश्वरे धरतिया कने उदियां सारियां चीजां जो बनाया है, सै स्वर्ग कने धरतिया दा मालिक होईकरी हने ला बनायो मंदरा च नी रेदा है। 25 ना ही कुसी चीजा दिया ज़रूरता दिया बजा ला उसयो माणुऐ दिया सहायता दी ज़रूरत नी है, कयोकि सै तां अपु ही सारयां जो जिन्दगी कने सारयां प्राणियां जो सांस कने सब कुछ दिन्दा है जडा उना जो ज़रूरत है। 26 उनी शुरू च इक ही माणुऐ ला सारे माणुआं दियां सारियां जातियां सारिया धरतिया पर रेणे ताई बनाईयां न; कने उनी माणुऐ जो जिणे ताई उना दी उमर कने उना दिया जगा जो तय कितया, 27 परमेश्वरे इस ताई किता ताकि लोक उसयो तोपन, कने होई सकदा है। सै उना जो तोपदे-तोपदे मिली जाऐ, असल च सै सांझो ला कुसी ला भी दूर नी है। 28 कयोकि सै सेई है जडा साडे जिणे कने चलणे-फिरणे दी बजा बणदा है कने सै बनायां है जडे असां असल च हेन; कने ठीक तिया ही जदिया तुहाडे कवियां बोलया भी है, “असां तां उदे ही वंश भी न।” 29 इस ताई परमेश्वरे दी ओलाद होईकरी सांझो ऐ समझणा ठीक नी कि परमेश्वर, सोने या चांदी या पथरे साईं है, जडे माणुऐ दिया सोचा कने कारिगिरिया ला बनायो न। 30 इस ताई परमेश्वरे लोका दिया अज्ञानता दे युगां उपर ध्यान नी दिता, पर हवा हर जगा सारे माणुआं जो, अपने पापां जो मन्नी करी कने गलत कम्मा जो छडीं देणे दा हुकम दिन्दा है। 31 कयोकि उनी इक दिन तय कितया है, जिदे च उनी उस माणुऐ जरिये धार्मिकता ला संसारे दा न्याय करणा है, जिसयो उनी नियुक्त कितया है, कने उसयो मरयां चे जिन्दा करी के, इसा गल्ला

दा सबूत सारयां लोकां जो देई दिताया है। 32 कितणे ही लोक उस बकत मजाक उडगणा लगे, जालू उनी मरयां चे जिन्दे होणे दी गल्ल बोलती, पर कितणे ही बोलणा लगे, “ऐ गल्लां असां तिजो ला फिरी कदी सुणणे।” 33 ऐ सुणी करी पौलुस उना दे बीचे ला चली गया। 34 पर कुछ लोक उस सोगी मिली गे, कने प्रभु पर भरोसा किता; जिना च दियुनुसियुस जडा अरियुपगुस दा सदस्य था, कने दमरिस नाऐ दी इक जनानी थी, कने उना सोगी होर भी कुछ लोक थे।

18 इदे बाद पौलुस एथेंस शेहरे जो छडीं करी कुरिन्थुस शेहरे जो आया। 2 कने ओथू उसयो अक्विला नाए दा इक यहूदी मिल्ला, जिदा जन्म पन्तुस प्रदेश च होया था; कने अपनी घरे बाली प्रिस्किल्ला सोगी इतालिया प्रदेश ला थोडे बकत पेहले ही आया था, कयोकि महाराजा क्लौदियुसे सारे यहूदियां जो रोम देशे ला निकली जाणे दा हुकम दिताया था, उसी हुकमे दिया वजा ला सै कुरिन्थुस शेहरे जो आये। 3 पौलुस उना ला मिलणा गिया। पौलुस कने अक्विला दा इक ही कारोबार था; इस ताई तां सै उना सोगी रेईकरी कम्म करणा लग्ना, सै दोनो तम्बू बणाणे बाले थे। 4 कने पौलुस हर सन्ते दे रोजे यहूदी जंज घर च चर्चा करिरी यहूदियां कने युनानियां जो भी यीशू मसीह पर भरोसा करणे ताई समझांदा था। 5 जालू सीलास कने तीमथियुस मकिदुनिया प्रदेशे ला आये, तां पौलुसे तम्बूआं बणाणे दा कम्म छडीं दिता कने अपना सारा बकत बचन सुणाणे च कने यहूदियां जो गबाईं देणे च लाईं दिता कि यीशू ही मसीहा है। 6 पर जालू यहूदी पौलुस दी बेइज्जती कने बिरोध करणा लगे, तां उनी अपने कपडयां दी धूड झाडी करी ऐ दसया की परमेश्वरे उना ला खुश नी है कने बोलया, “परमेश्वरे दे संदेश जो नी मनणे दिया बजा ला तुसां अपु ही उसा सजा ताई जिम्मेवार न, जडा तुसां जो परमेश्वर दी तरफा ला मिलणा है। मै निर्दोष है। हुणे लां मै होर जातियां बाल जाणा कने उना जो परमेश्वरे दे संदेश दा प्रचार करणा।” 7 कने पौलुस होर जाति दे लोकां जो बचन दी शिक्षा देणे ताई यहूदियां दे जंज घरे ला चली करी तितुस युस्तुस नाऐ दे इक होर जाति दे माणुऐ दे घरे होर जातियां दे लोकां जो बचन दी शिक्षा देणा आया, कने सै माणु परमेश्वरे दी अराधना करदा था, कने उदा घर यहूदी जंज घरे ला नेडे ही था। 8 तालू यहूदियों दे जंज घरे दे सरदार क्रिसपुसे अपने सारे परिवारे समेत प्रभुऐ पर भरोसा किता; कने मतयां कुरिन्थुस शेहरे च रेणे बालयां लोकां पौलुसे जो सुणीकरी भरोसा किता कने बपतिस्मा लिया। 9 कने प्रभुऐ राती जो दर्शन देईकरी पौलुसे ने बोलया, “डर मत, बोली जा चुप मत रे; 10 कयोकि मै तेरे सोगी है, कने कोई तिजो पर हमला करी कि तेरा नुकसान नी करी सकदा है, कयोकि इस शेहरे च मते ऐसे लोक न जडे मेरे लोक न।” 11 ताई तां पौलुस ओथू डेढ सालां दीकर परमेश्वरे दा बचन सिखांदा रिया। 12 जालू गल्लियो अखया प्रदेशे दा हाकिम था तां यहूदी लोकां गिठे होईकरी पौलुसे दे खिलाफ खडे होई गे, कने उसयो कचेरी च लेई गे कने बोलणा लगे, 13 “कि परमेश्वरे दी भक्ति ऐसिया रितिया ला करा, जडा व्यवस्था ला बिलकुल उरटा है।” 14 जालू पौलुस बोलणा ही लग्ना, तालू ही गल्लिया यहूदियां ला बोलया, “हे यहूदियों, अगर ऐ कोई अन्याय या बुराईया दी गल्ल होंदी तां ठीक था कि मै तुहाडी सुणांदा। 15 पर अगर ऐ बाद-बिबाद अखरां कने ना दा है, कने तुहाडे यहूदी दी व्यवस्था दे बारे च है, तां तुसां ही जाणा; कयोकि मै इना गल्लां दा न्यायी नी बणना चांदा।” 16 कने गल्लियो हुकम दिता कि सै उना जो कडीं दे कने उनी उना जो कचेरिया ला कडीं दिता। 17 तालू सारे लोकां यहूदियों दे जंज घरे दे सरदार सोस्थेनेस जो पकडीं करी कचेरिया सामणे ही मारणा शुरू करी दिता। पर गल्लिया इसा गल्ला दी कोई भी चिंता नी किती। 18 पौलुस मते रोजां दीकर कुरिन्थुस शेहरे च रिया, फिरी मसीह भाईयां ला विदा लेईकरी क्रिष्णिया शेहरे दिया बंदरगाह च जहाज तोपणे ताई चलीं गिया। कने उसी शेहरे च पौलुसे अपना मुंडन कराई लिया, कयोकि उनी इक सुखण सुखियो थी। बादे च सै पाणिये दे जहाजे ला सीरिया प्रदेश जो चली गिया। उदे सोगी प्रिस्किल्ला कने अक्विला भी थे। 19 कने सै इफिसुस शेहरे च आये कने पौलुसे प्रिस्किल्ला कने अक्विला जो ओथू ही छडीं दिता। कने अपु इफिसुस शेहरे दे यहूदी जंज घर च जाई करी यहूदियां ने बाद-बिबाद करणा लग्ना। 20 उना उसला बिनती किती की, “साडे सोगी थोडे रोज होर रेई ले।” पर सै नी मनया; 21 पर पौलुस उना ला ऐ बोली करी विदा होया की, “अगर परमेश्वरे चाया तां मै तुहाडे बाल फिरी आंगा।” तालू सै इफिसुस शेहरे ला जहाजे पर चढी करी चलीं गिया; 22 कने सै कैसरिया शेहरे

च उतरी करी यरूशलेम शहरे जो गया कने ओथु सै कलीसिया दे लोकां ला मिली करी अन्ताकिया शहरे च आया। 23 फिरी थोडे हफ्ते ओथु रेईकरी अन्ताकिया शहरे ला चली गया, कने गलातिया कने फ्रूगिया इलाकयां ला जांढे बेले ओथु दे सारे चेलयां जो मजबूत करदा गया। 24 अपुल्लोस नाए दा इक यहूदी जिसदा जन्म सिक्ंदरिया शहरे च होया था, सै बडा अकला बाला माणु था कने पबित्र शाब्ज जो ढंगे ने जाणदा था, सै इफिससुस च आया। 25 उनी प्रभु दे रस्ते दी शिक्षा लियो थी, कने मन लाईकरी यीशुए दे बारे च सुणदा कने सिखांदा था, पर सै सिर्फ यहून्ना दे बपतिस्मे दी गल्ल जाणदा था। 26 सै यहूदी जंज घरां च बिना डरयो बोलणा लग्गा, जालु प्रिस्किल्ला कने अक्विला उदियां गल्लां सुणीकरी, तां उना उसयो अपने घरयो सदया कने परमेश्वरे दा रस्ता उसयो होर भी ढंगे ला दसया। 27 कने जालु अपुल्लोस अरखाया प्रदेशे जो जाणा चांदा था, तां मसीह भाईयां उसयो प्रोत्साहित करिरी चेलयां जो लिखया कि सै उसला अच्छे ला मिलन, कने उनी ओथु पुज्जी करी उना लोकां दी बडी सहायता किती जिना अनुग्रह दिया बजा ला भरोसा कितया था। 28 क्योकि सै सरेआम साबित करदा था की यहूदियां दी शिक्षा गलत है कने पबित्र शाब्ज ला इडे सबूत भी दिन्दा था कि यीशु ही सै मसीहा है।

19 कने जालु अपुल्लोस कुरिन्थसुस शहरे च था, तां पौलसुस सडका दे जरिये अंदरूनी इलाके ला होईकरी इफिससुस शहरे जो आया कने उदी मुलाकात कुछ चेलयां ला होई। 2 उनी बोलया, क्या तुहांजो भरोसा करदे बेले पबित्र आत्मा मिल्ली? उना उसयो बोलया, “असां तां पबित्र आत्मा दे बारे च सुणया भी नी है।” 3 तालु पौलसे उना जो पुछया, “तां फिरी तुहाडा बपतिस्मा कियां होया?” उना बोलया, “असां यहून्ना दा बपतिस्मा लिया।” 4 पौलसे बोलया, “यहून्ना उना लोकां जो बपतिस्मा दिता जिना पाप करणा छडी दितयो थे कने परमेश्वरे पासे मुकई गे, पर उनी इन्नाएल दे लोकां जो बोलया कि उसी इकी पर किन्वास करा जडा मेरे बाद ओणे बाला है, सै ही यीशु है।” 5 ऐ सुणीकरी उना प्रभु यीशु दे नाए दा बपतिस्मा लिया। 6 कने जालु पौलसे उना पर हथ रखया, तां उना पर पबित्र आत्मा उतरी, कने सै होर-होर बोलियां च बोलणा कने भविष्यवाणी करणा लग्गे। 7 सै सारे लगभग बारा मर्द थे। 8 कने तालु पौलसुस यहूदी जंज घरे च जाई करी बिना डरयो तिन् मिनयां दीकर बोलदा रिया, कने परमेश्वरे दे राज्य दे बारे च बेहस करदा कने समझांदा रिया। 9 पर उना बिचे ला कुछ लोक बडे जिदी थे उना भरोसा करणे ला मान करी दिता, कने लोकां सामणे यीशु मसीह दे इस रस्ते जो बुरा भला बोलणा लग्गे, इस तां पौलसुस अपने चेलयां जो सोगी लेईकरी ओथु ला चली गया, कने हर रोज तरानुस दे स्कुले च जाई करी भरोसा करणे बालयां जो परमेश्वरे दे बारे शिक्षा दिन्दा कने समझांदा था। 10 दो सालां दीकर ऐई होंदा रिया, कने आसिया प्रदेश दे रेहणे बाले सारयां यहूदियां कने सारे यूनानियां प्रभु दा बचन सुणी लिया। 11 कने परमेश्वर पौलसे दे जरिये अनोखे चमकार दसदा था। 12 ऐथु दीकर कि रूमालां कने तेलियां जो उदे शरिरी ला छुआई करी बिमारां पर रखदे थे, तां उना दियां बिमारियां खरियां होई जांदिया थियां; कने बुरियां आत्मा उना ला निकली जांदिया थियां। 13 पर कुछ यहूदी मर्द जडे जादू टोणा करिरी बुरियां आत्मा जो कडदे थे, सै यीशु दा ना बुरियां आत्मा जो कडणे तांई करदे थे, कने सै ऐ बोलदे थे की, “मै तुहांजो उस यीशु मसीह दे नाए ला जिदा प्रचार पौलसुस करदा है बाहर निकलने दा हुकम दिन्दा है।” 14 कने स्किक्वा नाए दे इक यहूदी बड़े याजके दे सत पुत्र थे, जडे इयां ही करदे थे। 15 पर बुरियां आत्मा जबाब दिता, “यीशुए जो मै जाणदी है कने पौलसे जो भी जाणदी है, पर तू कुण है?” 16 कने उनी माणुए जिदे च बुरी आत्मा थी; उना पर झपटी करी, उना जो काब करी लिया, कने उना दी ऐसी हालत किती, कि सै नगे कने जख्मी होईकरी उसी घरे ला नठी गे। 17 कने जालु ऐ गल्ल इफिससुस शहरे दे रेहणे बाले सारे यहूदी कने यूनानी जांणी गे, कने सै सारे डरी गे, कने प्रभु यीशुए दे नाए दी महिमा किती। 18 कने जिना भरोसा कितया था, उना चे मतयां लोकां आई करी सबना सामणे अपने गलत कम्मा जो मन्नी लिया। 19 कने जादू टोणा करणे बालयां चे मतयां अपणियां-अपणियां पोथियां गिठियां करिरी सारे सामणे फुकी दितियां; कने जालु उना दी कीमत जोडी, तां सै पंजा झार चांदिये दे सिक्कां बराबर निकली। 20 सै इयां मतयां लोकां प्रभु यीशु दे बचना दे बारे च सुणया, कने बचन शक्तिशाली तरिके ला उना दियां जिंदगियां जो बदलदा गया। 21 जालु ऐ गल्लां होई गियां तां पौलसे मकिदूनिया प्रदेश कने अरखाया प्रदेश दे भरोसा करणे बालयां ला मिलणे बाद

यरूशलेम शहरे जो जाणे दा फेसला किता, कने उनी बोलया, “यरूशलेम शहरे जो जाणे बाद मिजो रोम शहरे जो जाणा भी जरूरी है।” 22 इस तांई उनी अपने साथियां चे तीमथियसुस कने इरास्तुस जो मकिदूनिया प्रदेश अपु ला पेहेले भेजी दिता, कने अपु कुछ बकत आसिया प्रदेशे दे इफिससुस शहरे च रेई पिया। 23 उस बेले यीशु मसीह दे रस्ते दे बारे च बडा हंगामा होया। 24 क्योकि देमेत्रियसुस नाए दा इक चांदी दा कारीगर था, जडा अरतिमिस यूनानी देवी दे मंदरे दे चांदी दे ढांचे बणवादे था, कने कारीगरां जो उना बणणे तांई बडे पैसे दिन्दा था। 25 दिमेत्रियसुसे अपने कारीगरां जो सदया कने इयोदियां चीजां दे कारीगरां जो गिठे करिरी बोलया, “हे भाईयो, तुसां जाणदे न कि इसी कम्मे ला सांझो कितणा पैसा मिलदा है। 26 कने तुसां दिखदे कने सुणदे न कि सिर्फ इफिससुस शहरे च ही नी, बल्कि सारे आसिया प्रदेशे दे सारे ग्रां च, इनी पौलसे ऐ बोली करी मते लोकां जो समझाया कने भटकाया भी है, कि जडी हथां दी कारीगिरी है, सै इन्वर नी है। 27 कने सिर्फ इसा इकी गल्ला दा ही डर नी है, कि साडे इस कम्मे दी इज्जत मान चली जाणा; बल्कि ऐ की हुण लोकां महान देवी अरतिमिसा दे मंदरे जो भी महत्व नी देणा कने खुद देवी अरतिमिस जिसा जो पूरे आसिया प्रदेशे च कने सारे संसारे दे लोक पूजदे न उसा दी इज्जत मान नी होणा।” 28 सारे कारीगर ऐ सुणीकरी गुस्से च आई गे कने चीलाई-चीलाई करी बोलणा लग्गे, “इफिसियों दी अरतिमिस, महान है।” 29 शहरे दे केई होर लोकां चिल्लाणे दियां अबाजां सुणियां कने सै भी जाई करी भिडा सोगी मिली गे कने सारे शहरे च हंगामा होई गिया कने लोकां गयसुस कने अरिस्तार्खसुस कने मकिदूनिया प्रदेशे दे रेणे बालयां जो जडे पौलसे सोगी यानी थे, पकडी लिया, कने गिठे होईकरी रंगशाला च दोडी गे। 30 पौलसुस भी रंगशाला दे अंदर जाई करी लोकां ला गल्ल बात करणा चांदा था, पर चेलयां उसयो जाणा नी दिता। 31 आसिया दे हकीमा चे भी उदे दोस्तां उसयो बोली भेजया कने बिनती किती, की रंगशाला दे अंदर जाई करी अपणी जान खतरे च मत पांदा। 32 रंगशाला दे अंदर, सारे लोक चिल्ला दे थे, कोई कुछ बोला दा था कने कोई कुछ होर। सारा कुछ गड बड था, कने मते लोक तां ऐ जाणदे भी नी थे कि असां कजो गिठे होयो न। 33 तालु यहूदी लोकां सिक्न्दरे जो भिडा चे धक्का देईकरी अगो करी दिता, कने सिक्न्दरे लोकां जो चुप रेणे तांई हथे ला इशारा किता कने लोकां जो समझणे दी कोशिश किती कि क्या होआ दा है। 34 पर जालु उना जो पता लग्गा कि सै यहूदी है, कने जडे मसीही लोकां सांई मूर्तिपूजा नी करदे थे, तां सारे दे सारे इकी अबाजा च कोई दो घंटे दीकर चिलांदे रे, “इफिसियों दी अरतिमिस, महान है।” 35 तालु शहरे दे मंत्रिऐ लोकां जो शांत करिरी बोलया, “हे इफिसियों दे वासियों, सारे जाणदे न कि इफिससुस शहरे दे लोक महान देवी अरतिमिस दे मंदरे दी कने उदिया मूर्तिया दी रखबाली करदे न जडी अम्बरे ला पियो थी। 36 जालु कोई इना गल्लां ला इनकार नी करी सकदा है, तां ठीक है कि तुसां चुप रिया; कने बिना सोचया बिचारयो कुछ मत करा। 37 क्योकि तुसां इना माणुए जो लेईकरी आयो न, जडे ना ता मंदरे जो लटणे बाले न, कने ना ही साडिया देविया दी बुराई करणे बाले न। 38 इसी वजा ला अगर देमेत्रियसुस कने उदे साथी कारीगरां जो कुसी ला कोई दिक्कत है तां कचेरी खुली है, उना दे मुकदमे दा इन्साफ करणे तांई अधिकारी भी हेन; ओथु लोक इकी टुज्जे पर इलजाम लगाई सकदे न। 39 पर अगर तुसां कुसी होर गल्ला दे बारे च कुछ पुछणा चांदे न, तां शहरे दिया सभा च फेसला होणा। 40 क्योकि मिजो डर हे की राज्यपाले इस सारे हंगामे दे बारे च सुणना कने बोलणा कि असां रोमी सरकार दे खिलाफ विद्रोह करणे दी कोशिश करा दे थे। इस तांई कि इदी कोई बजा नी है, कि असां इसा भिडा दे गिठे होणे दा जबाब नी देई सकणा।” 41 कने ऐ बोली करी उनी सभा जो बीदा किता।

20 जालु हंगामा स्की गिया तां पौलसे चेलयां जो सदीकरी उत्साहित किता, कने उना जो अलविदा बोली करी मकिदूनिया प्रदेश जो चली गया। 2 सै उस सारे प्रदेशे चे होईकरी कने चेलयां जो बडा उत्साहित करिरी सै यूनान प्रदेश च आया। 3 तिन् महीने रेईकरी जालु सै ओथु ला जाजे पर सीरिया प्रदेश जो जाणा लगया था, पर उनी सुणया कि यहूदियां उसयो रस्ते चे मारणे दी सलाह बणाईयो है, इस तांई उनी फेसला किता की मकिदूनिया प्रदेशे ला बापस ओंदे होए सीरिया प्रदेशे जो जाए। 4 इसा यात्रा च बिरिया शहरे दे वासी पुरसर्स दा पुत्र सोपट्रस कने थिस्सलुनीकिया शहरे ला अरिस्तार्खसुस कने सिक्न्दुस कने दिरबे शहरे

दा गद्यस, कने तीमथियुस कने आसिया प्रदेशे दा तुखिकुस कने न्रुफिमूस उदे सोगी चली पै। 5 कने सोगी यात्री सांझो ला अग्रे चली गे कने त्रोअस शेहेर च पुज्जी करी सांझो नियालना लग्गे। 6 कने अखमरीी रोटीयां दे त्योहारे दे बाद फिलिप्पी शेहेर ला जाजे पर चडी करी उना बाल पंजा रोजां बाद त्रोअस शेहेर च पुज्जे, कने सत रोज ओथु ही रे। 7 हप्तदे दे पेहेले रोजे असां जालु प्रभु भोज खाणे तांई गिठे होए, तां पौलुसे जिनी दुगे रोजे चली जाणा था, उना ला गल्लां कितियां, कने अधिया राती दीकर उना जो उपदेश दिन्दा रिया। 8 जिस उपरे बाले कम्परे पर असां गिठे होयो थे, ओथु मते दिव्ये बल्यो थे। 9 कने युतुखस नाए दा इक जवान खिडकिया च बेईकरी निन्दा ने झुला दा था, कने जालु पौलुस बडिया देरा दीकर गल्लां करदा रिया, तां सै निन्दा दे झुटारे ने तिजिया मंजली ला पेई गिया, कने जालु कुछ लोकां आई करी उअयो चुकना तां तालु दिकर सै मरी गिया था। 10 पर पौलुस थले उतरया कने उदे बाल जाई करी उसयो गले ने लाईकरी बोलया, “घबरा मत; क्योंकि ऐ हल्ले भी जिंदा है।” 11 कने उनी दुबारा उपर जाई करी प्रभु भोज किता, कने अगली भयागा होणे दिकर गल्लां करदा रिया; कने फिरी सै चली गिया। 12 फिरी सै उस जवाने जो ओथु ला जिन्दा लेई गे, कने बडे खश होए। 13 पौलुसे अस्सुस शेहेर तांई जमिनी यात्रा करणे दा फेसला किता, बाकी असां लोक समुन्दी जाजे ला अग्रे चली गे, कने असां ओथु ला उसयो अपने सोगी जहाजे च लेई जाणे दी योजना बना दे थे। 14 जालु पौलुस अस्सुस शेहेर च सांझो मिल्ला तां असां उसयो जाजे पर चढाई करी मितुलेने शेहेर जो आये। 15 दुगे रोजे ओथु ला यात्रा करदे होये असां खियुस टापू च पुज्जे कने उसला आलले रोजे उदे बखे ला होईकरी सामुस टापू च पुज्जे कने उसला अगले रोजे मीलेतुस शेहेर जो आये। 16 क्योंकि पौलुसे इफिसुस शेहेर च नी जाणे दा फेसला किता क्योंकि सै आसिया प्रदेशे च होर जादा बकत नी बिताणा चांदा था, ताकि कुथी ऐसा ना होए कि, उसयो आसिया शेहेर च देर लग्गे; क्योंकि सै जल्दिया च था, कि अगर होई सके, तां सै पिन्नेकुस्त दे त्योहारे बाले रोजे यरुशलेम शेहेर च बकते पर पुज्जे। 17 कने जालु असां मीलेतुस शेहेर च उतरे, तालु पौलुसे इफिसुस शेहेर दिया कलीसिया दे अगुवां जो संदेशा गलाई भेजया की, सै आई करी उसयो मिलन। 18 जालु सै उदे बाल आये, तां उनी उना जो बोलया, “तुसां जाणदे न, कि मै कियां तुहाडे सोगी रिया, पेहेले ही रोजे ला जालु मै आसिया प्रदेशे च पुज्जा, तां मै सारा बकत तुहाडे सोगी ही बिताया। 19 मतलब की बडिया दीनता ला, कने रोई-रोई करी, कने उना परीक्षां च जडियां यहदी लोकां दिया साजिशा दिया बजा ला मिंजे पर आईयां, मै तमी प्रभु दी सेवा करदा रिया। 20 कने जडियां-जडियां गल्लां तुहाडे फायदे दियां थियां, उना जो दसणे तांई कने लोका दे सामणे कने घरे-घरे जाई करी सिखाणे ला भी कदी नी डरया। 21 कने यहदी लोकां कने होर जातियां सामणे गबाई दिन्दा रिया कि परमेश्वरे सामणे अपने पापां जो मनी लिया कने गलत कम्मा जो छडी दिया, कने साडे प्रभु यीशु पर भरोसा करा। 22 कने हुण, मै पबित्र आत्मा दे जरिये मजबूर होईकरी यरुशलेम शेहेर जो चल्या है, कने मिंजे नी पता कि ओथु मिंजे पर क्या-क्या बितणी है, 23 सिर्फ ऐई कि पबित्र आत्मा हर शेहेर च चेताबनी देईकरी मिंजे ला बोलदा है कि बंधन कने क्लेश तिजे तांई तैयार न। 24 पर मिंजे अपनी जिन्दगी ला कोई प्यार नी है, मै तां बस अपणिया उसा दोडा जो, कने उस सेवा जो पूरा करणा चांदा, जडी मिंजे परमेश्वरे दे अनुग्रह दे शुभसमाचार पर गबाई देणे तांई प्रभु यीशु ला मिलियो है। 25 कने मै तुसां सारयां बिच परमेश्वरे दे राज्य दा प्रचार किता, कने हुण मै जाणदा है तुसां चे कोई भी मिंजे दुबारा नी दिखणा। 26 इस तांई अजे दे दिन तुसां ला गबाई देईकरी बोलदा है, कि तुसां च अगर कोई भी यीशु पर भरोसा कितयो बिना मरी जादां है, तां से मेरी गलती नी है। 27 क्योंकि मै तुसां जो सै सब कुछ दसया है जडा परमेश्वर चांदा है कि तुसां जाणन। 28 इसी तांई अपनी कने अपने झुंड़े दी देखभाल करा; जिना च पबित्र आत्मा तुहांजो अगुवा बनाया है ताकि तुसां परमेश्वरे दिया कलीसिया दी रखवाली करन, क्योंकि परमेश्वरे उना जो अपने पुत्रे दा खून देईकरी खरीदया है। 29 मै जाणदा है, कि मेरे जाणे बाद तुसां बिच झुंटे गुरूआं ओणा है कने उना भरोसा करणे बालयां दा बडा नुकसान करणा। सै उना फाडने बाले भेडियां सांई होणे जडे भेडां जो मारी दिन्दे न। 30 ऐथु दिकर की तुहाडे अपने भरोसा करणे बालयां दे दले चे ऐसे लोक ओणे न, जिना चेलयां जो अपने पिच्छे खीचणे तांई उल्टियां सिदियां गल्लां करणियां न। 31 इस तांई ध्यान रखा, कने याद रखा कि मै तिन्ना सालां दीकर रात दिन रोई-रोई करी, हर इकी जो

चेताबनी देणा नी छडया। 32 कने हुण मै तुहांजो परमेश्वरे जो, कने उदे अनुग्रह दे बचना जो सोपी दिन्दा है; जडा तुसां दे भरोसे जो मजबूत करी सकदा है, कने परमेश्वरे तुसां जो सै बिरासत देणी जिना दा बायदा उनी उना सारयां लोकां ला कितया है जडे उदे जरिये पबित्र कितयो न। 33 मै कुदे भी सोने, चांदी या कपडे दा लालच नी किता। 34 तुसां तां अपु ही जाणदे न कि इना हथां ही मेरी कने मेरे साथियां दी जरूतां पुरियां कितियां न। 35 मै तुहांजो सब कुछ करिरी दसया है की, कडी मेहनत करिरी सांझो कमजोरां दी सहायता करणी चाईदी कने प्रभु यीशु दे बचना जो याद रखणा जरूरी है, प्रभुए अपु ही बोलया है: लेणे ला देणा धन्य है।” 36 ऐ बोली करी उनी घुटणे टेके कने उना सबना सोगी प्राथना किती। 37 तालु सै सारे बडे रोज कने पौलुसे दे गले लग्गी करी उसयो चुणणा लग्गे। 38 सै खासकर इस गल्ला तांई दुखी थे, जडी उनी बोली थी, तुसां मिंजे फिरी दुबारा नी दिखणा। कने उना उसयो जाजे दीकर पूजाया।

21 असां जालु उना ला विदा लेईकरी समुंद्री यात्रा शुरू किती, तां असां सीधे रस्ते ला कोस टापू च आये, कने दूगे रोजे स्टुस टापू च, कने ओथु ला पतरा शेहेर च पुज्जी गे; 2 कने पतरा शेहेर ला इक जाज सांझो फीनीक प्रदेश जो जांदा होया मिल्ला, कने असां उदे पर चडी करी यात्रा शुरू करी दीती। 3 असां खबे पासे साइप्रस टापू दिखया कने असां ओथु ला निकली करी सीरिया प्रदेशे दिया सीमा पासे अग्रे चली गे कने सर शेहेर च जाई पुज्जे क्योंकि ओथु जाजे ला समान उतारणा था। 4 कने ओथु असां कुछ चेलयां जो तोपया कने असां ओथु उना सोगी सत रोजां दीकर रे। उना पबित्र आत्मा दे जरिये हर बार पौलुसे ला यरुशलेम शेहेर जो नी जाणे दी विनती करदे रे। 5 सत रोज बाद जालु ओथु ला साडे जाणे दा बकत आया, कने सै सारे जनानिया कने बचयां समेत सांझो शेहेर ला बारे दीकर पुजाया कने असां समुंद्रे बखे घुटणे टेकी करी प्राथना किती। 6 तालु इकी दुज्जे ला विदा होईकरी, असां तां जाजे पर चडी गे, कने सै अपने-अपने घरे जो बापस चली गे। 7 जालु असां सर शेहेर ला शुरू कितियो यात्रा पुरी करिरी असां पतुलिमयिस शेहेर च पुज्जे, कने मसीही भाईयां जो नमस्ते करिके उना सोगी इक रोज रे। 8 दूगे रोजे असां ओथु ला चली करी कैसरिया शेहेर च आये, कने फिलिप्पुस शुभसमाचार प्रचार करणे बाले दे घरे जाई करी रे, सै उना सतां मर्दा चे इक था जिना जो यरुशलेम शेहेर च प्रेरितां विधवां दी देखभाल करणे तांई चुणयां था। 9 उदियां चार कुआरियां कुडियां थियां; जडियां भविष्यवाणी करदियां थियां। 10 जालु सांझो कैसरिया शेहेर च रेंदे होए मते रोज होई गे, तां ओथु अगबुसे नाए दा इक परमेश्वर दा संदेश देणे वाला यहदिया प्रदेशे ला आया। 11 उनी साडे बाल आई करी पौलुसे दा कम्मबंद लिया, कने उसयो अपने हथा पैरां च बन्नी करी बोलया, “कि पबित्र आत्मा ऐ बोलदी है, कि जिस माणुणे दा ऐ कम्मबन्द है, उसयो यरुशलेम शेहेर च यहदियां थया ही बनाणा है कने होर जातियां दे हथे देई देणा है।” 12 असां जालु ऐ गल्लां सुणियां, तालु असां कने ओथु दे लोकां पौलुसे ला बिनती किती कि, यरुशलेम शेहेर जो मत जांदा। 13 पर पौलुसे जबाब दिता, तुसां क्या करा दे न, रोई-रोई करी मेरा मन तोडा दे न? मै तां प्रभु यीशु दे नाए तांई यरुशलेम शेहेर च सिर्फ बनूणे तांई ही नी बल्कि मरणे तांई भी तैयार है। 14 जालु सै नी मनया तां असां ऐ बोली करी चुप होई गे, “प्रभुए दी इच्छा पुरी हो।” 15 थोडे रोजां बाद असां तैयारी किती कने यरुशलेम शेहेर जो चली पे। 16 कैसरिया शेहेर दे भी कुछ चले साडे सोगी चली पे, कने सै सांझो मनासोन नाए दे बंदे दे घरे लेई गे, जडा यरुशलेम शेहेर च रेंदा था कने साइप्रस टापू दा था, सै सबना ला पेहेले दे चेलयां चे इक था। 17 असां जालु यरुशलेम शेहेर च पुज्जे, तां भरोसा करणे बाले भाईयां साडा बडिया खुशिया ला स्वागत किता। 18 दूगे रोजे पौलुस सांझो सोगी याकूबे दे घरे गिया, जिथु सारे अगुवे गिठे होयो थे। 19 तालु पौलुसे उना जो नमस्कार किता, कने जडे-जडे कम्म परमेश्वरे पौलुसे दिया सेवकाईया दे जरिये होरनी जातियां च कितयो थे, सै सारे कम्म इक-इक करिरी उना जो दस्से। 20 अगुवां दे सूणीकरी परमेश्वरे दी महिमा किती, फिरी उना बोलया, हे भाई पौलुस, तू जाणदा है न, कि यहदियां चे केई हजारों लोकां भरोसा किता है; कने सै सारे मूसा दिया व्यवस्था दा पालन बडिया बफादारिया ला करदे न। 21 कने कुछ लोकां उना यहदियां जो दसया जिना दा तैरे बारे च ऐ शिवाबास है, कि तू होर जातियां च रोबोले यहदियां जो मूसा दी व्यवस्था जो छडी देणे तांई सिखांदा है, कने बोलदा है, कि ना बचयां दा खतना करा कने ना

ही इना यहदी रीती-रिवाजों पर चला। 22 तां फिरी क्या करना चाइँदा? उना जो पक्का ऐ पता लगगी जाणा है कि तू ऐथू आया है। 23 इस ताईं जडा असां तिजो बोलदे न, सै कर साडे ऐथू चार माणू न, उना जो सै मन्तन पूरी करणी है जडी उना परमेस्वर दे सामणे मनियो है। 24 उना जो लेईकरी उना सोगी अपने आपे जो शुद्ध करने दिया बिधिया जो पूरा कर; कने उना ताईं खचां दे, ताकि सै सिर मुंडवाईं सकन। तालू सारयां जो पता लगणा, कि जडियां गल्लां उना तैरे बारे च सुणियां न, सै गल्लां सच नी न, कने तू अपु भी मूसा दिया व्यवस्था जो मन्नी करी उदे अनुसार चलदा है। 25 पर उना होर जातियां दे बारे च जिना भरोसा कितया है, असां ऐ फेसला करिरी चिठ्ठी लिखी भेजी है, की सै उस खाणे जो ना खान जिसयो लोकां मृतियां जो चढाया हो, कने व्यभिचार मत करे कने गल्लां घोटी करी मारयो जाननरां दा मॉस कने खून मत खदे। 26 दूरे रोजे पौलुसे उना माणुआं सोगी जाईं करी अपु जो शुद्ध किता, तां सै मंदरे जो गे, कने ऐ घोषणा किती, कि शुद्धि दे रोज काल मुकणे न, मतलब की उना चे हर इकी ताईं भेंट चढाणे दे दिन काल पुरे होणे। 27 जालू सै सत रोज पुरे होणे बाले थे, तां आसिया प्रदेशे दे कुछ यहदियां पौलुसे जो मंदरे च दिखीकरी सारयां जो भडकाया, फिरी पौलुसे जो पकडी लिया कने चिल्लाणा लगे, 28 “हे इस्राएलियां, सहायता करा; ऐ सै ही माणू है, जडा हर जगा साडे यहदी लोकां दे, कने मूसा दिया व्यवस्था दे कने इसा जगा दे खिलाफ च सारे लोकां जो सिखांदा है, ऐथू दीकर की होर जाति दे लोकां जो भी इस मंदरे च आणी करी इस पबित्र जगा जो अपबित्र करी दिता है।” 29 उना ऐसा बोलया क्योकि इसला पेहले स्फिम्सु शेहरे दे वारी शुफिम्सु जो पौलुस सोगी शेहरे च दिखया था, कने समझे थे कि पौलुस उसयो मंदरे च लेई आया है। 30 तालू शेहरे च हल्ला पेई गिया, कने लोक दोडी करी गिठे होऐ, कने पौलुसे जो पकडी करी मंदरे बार घसीटी लेई आये, कने झट दरबाजे बंद करी दिते। 31 जालू सै पौलुसे जो मारी देणे दी कोशिश करा दे थे, तां रोमी सिपाइयां दे सरदारो जो खबर पुज्जी कि यरूशलेम शेहरे च मते सारे लोक हंगामा करा दे न। 32 तालू सै झट सिपाइयां कने सूबेदारां जो लेईकरी उना बाल आया; कने लोकां दिया भीडा सरदारो जो कने सिपाइयां जो दिखीकरी पौलुसे जो मारणा बंद करी दिता। 33 तालू पलटना दे सरदारो पौलुसे बाल आई करी उसयो पकडी लिया; कने दो सुंगला ला बनणे दा हुकम देईकरी पूछणा लग्गा, “ऐ कुण है, कने इनी क्या कितया है?” 34 पर भिडा चे कोई कुछ बोलणा लगे कने कोई कुछ, कने जालू रोले दिया बजा ला सचचाई पता नी लग्गी, तां उसयो किले च लेई जाणे दा हुकम दिता। 35 जालू सै पोडियां पर पुज्जा, तां इयां होया कि भिडा दिया बजा ला सिपाइयां जो उसयो चुकी करी लेई जाणा पिया। 36 क्योकि लोकां दी भीड ऐ बोली करी पिच्छे पियो थी, इसयो मारी दिया। 37 जालू सै पौलुसे जो किले च अंदर लेई जाणा लागयो थे, तां उनी पलटना दे सरदारो जो बोलया, क्या मिजो इजाजत है कि मैं तिजो कुछ बोलें? उनी बोलया, “क्या तू यूनानी भाषा जाण्दा है? 38 क्या तू सै मिश्र देशे दा माणू नी है, जिनी कुछ बकत पेहले सरकारा दे खिलाफ बिरोध कितया था कने चार जार आतकियां जो सुनसान जगा च लेई गिया था?” 39 पौलुसे बोलया, “नी, मैं तां इक यहदी है, कने किलिकिया प्रदेशे दे खास तरसुस शेहरे दा रेणे बाला है। कने मैं तिजो ला बिनती करदा है, कि मिजो लोकां ने गल्लां करणा दे।” 40 जालू उनी हुकम दिता, तां पौलुसे पथरे दिया पोडियां पर खडोई करी लोकां जो चुप रेणे ताईं हथे ला इशारा किता। तालू सै चुप होई गे, तां सै इब्रानी भाषा बोलणा लग्गा।

22 “हे भाईयो कने बजुर्गो सुणा, जडे इल्जाम मिजो पर लागयो न, उदे बचाव च मैं कुछ तहाडे सामणे बोलणा है।” 2 सै ऐ सुणीकरी कि सै सांझो ला इब्रानी भाषा च बोला दा है, सै होर भी चुप होई गे। तालू उनी बोलया: 3 मैं यहदी है, मेरा जन्म किलिकिया प्रदेशे दे तरसुस शेहरे च होया है; पर इस शेहरे च गमलीएल दे पैरां बाल बेईकरी शिक्षा लियो है, कने पूर्वजां दी व्यवस्था भी मिजो ठीक रीतिया ला सिखाई; कने हुण जदिया उसाह परमेस्वर ताईं तहाडा है, तदिया ही मेरा भी था। 4 मैं प्रभू यीशू मसीह दे रस्ते जो खत्म करणे ताईं देडे चेलयां जो बडा सताया। मैं मर्द कने जनानिया दोनो जो बन्नी करी, जेला च पाई करी, उना जो मरवाईं भी दिता। 5 खुद महायाजक कने अगुवां दी सारी सभा भी गबाह न कि, मैं उना ला यहदी भाईयां ताईं चिठियां लेईकरी दमिशक शेहरे जो चलया था, ताकि जडे ओथू न उना जो सजा देणे ताईं बन्नी करी यरूशलेम शेहरे जो

लेई ओऐ। 6 जालू मैं चलदे-चलदे दमिशक शेहरे बखे पुज्जा, तां इयां होया कि लग्बाग दोपहर दे बक्ते अचानक अक्बरे ला मेरे चारो पासे इक लौ चमकी। 7 कने मैं जमिना पर पेई गिया: कने ऐ अबाज सुणेई, हे शाऊल, हे शाऊल, तू मिजो कजो तंग करदा है? 8 मैं जबाब दिता, हे प्रभू जी, तू कुण है? उनी मिजो बोलया, मैं नासरत शेहरे दा रेणे बाला यीशू है, जिसयो तू तंग करदा है। 9 कने मेरे साथियां लौ चमकदी तां दिखी, कने जडा मिजो सोगी बोला था उना उदी अबाज सुणी, पर सै समझी नी सके की अबाजा मिजो ला क्या बोलया। 10 तालू मैं बोलया, प्रभू जी मैं क्या करे? प्रभूऐ मिजो ने बोलया, उठी करी दमिशक शेहरे जो जा कने जडा कुछ तू करणा है सै तिजो ओथू दसी देणा है। 11 जालू उसा लौई दिया चमका दिया बजा ला मिजो कुछ भी मिल्ला दा नी था, तां मैं अपने साथियां दा हथ पकडी करी दमिशके शेहरे जो आया। 12 तालू हनन्याह नाऐ दा व्यवस्था दे अनुसार इक धर्मी माणू जडा ओथू रेणेबाले सारे यहदियां च इज्जतदार था, सै मेरे बाल आया, 13 कने मेरे बखे खडोई गिया कने मिजो ला बोलया, हे भाई शाऊल, दुबारा दिखणा लग्गी पो। तालू ही मेरियां हखी खुली गियां कने मिजो दुबारा मिलणा लग्गी पिया। 14 तालू उनी बोलया, साडे बाप दादयां दे परमेस्वर तिजो इस ताईं चुण्या है ताकि तू उदिया इच्छा जो जाणे, कने उस धर्मी जन जो दिखे, कने उदी अबाज सुणे। 15 क्योकि तू उदिया तरफा ला सारे माणुआं सामणे इना गल्लां दा गबाह होणा, जडियां तू दिखियां कने सुणियां न। 16 हुण कजो देर करा दा है? उठ, कने बपतिस्मा ले, कने प्रभू दा न लेईकरी अपने पापां जो धोई ले। 17 तू जालू फिरी यरूशलेम शेहरे च आई करी मंदरे च प्राथना करा दा था, तां मैं बेसुध होई गिया। 18 कने मैं प्रभू जो दिखया कने उसयो ऐ बोलदे सुणया, “झट पट करिरी यरूशलेम शेहरे ला निकली जा; क्योकि जडे लोक ऐथू न उना मेरे बारे च तेरी गबाई नी मनणी है।” 19 मैं बोलया, प्रभू जी मिजो समझ नी आया की यरूशलेम शेहरे च यहदियां मिजो पर भरोसा कनी करणा क्योकि सै तां अपु ही जाण्दे न की मैं तिजो पर भरोसा करणे बालयां जो जेला च पांदा कने मारदे-मारदे यहदी जंज घरां ला लेई जांदा था। 20 कने जालू तैरे गबाह स्तिफनुसे जो मारा दे थे, तालू मैं भी ओथू खडोतया था, कने उसा गल्ला ला राजी था, कने उसयो मारणे बालयां दे कपडयां दी रखवाली करा दा था। 21 कने प्रभूऐ मिजो बोलया, तू चली जा: क्योकि मैं तिजो होरनी जातियां बाल दूर-दूर भेजणा है। 22 ऐथू दीकर तां लोक पौलुसे दिया गल्ला जो ध्याने ला सुणदे र पर, फिरी सै जोरे ला बोलणा लगे, “ऐसे माणुऐ जो मारी दिया, इदा जिन्दा रेणा ठीक नी।” उना ऐसा इस ताईं बोलया क्योकि सै नी मंदे थे की परमेस्वर यहदियां जो छडी करी कुसी होरसी जातिया जो बचाई सकदा है। 23 जालू सै चिलांदे कने अपने कपडे फेकंदे कने अपना मूसा दसणे ताईं होआ च धुड उडोदे थे; 24 तां पलटना दे सूबेदारो बोलया, “इसयो किले च लेई जा; कने कोडे मारी करी परखा, ताकि मैं भी जाणे कि लोक कुसा बजा ला इदे खिलाफ ऐसा बोला दे न।” 25 जालू सै उसयो कोडे मारणे ताईं बन्ना दे थे तां पौलुसे उस सूबेदारो ने बोलया जडा उदे बखे खडोतया था, “क्या ऐ ठीक कि तुसां इक रोमी माणुऐ जो, बिना दोष साबित होयो कोडे मारन?” 26 सूबेदारो ऐ सुणीकरी सरदारो बाल जाई करी बोलया, “तू ऐ क्या करा दा है? ऐ तां रोमी माणू है।” 27 तालू सरदारो उदे बाल आई करी बोलया, मिजो दस, क्या तू रोमी है? “उनी बोलया, हाँ।” 28 ऐ सुणीकरी सरदारो बोलया, मैं रोमी होणे दा पद मते पेसे देईकरी लिया है। पौलुसे बोलया, “मैं तां जमदा ही रोमी है।” 29 तालू जडे लोक उसयो परखा दे थे, सै झट उदे बखे ला हटी गे; कने सरदार भी ऐ जाणी करी कि ऐ रोमी है, कने मैं उसयो बनया है, सै डरी गे। 30 सूबेदार ऐ जाणना चांदा था कि यहदी लोक उदे पर कजो दोष ला दे न, इस ताईं उनी बहूे याजकां कने सारिया महासभा जो गिठे होणे दा हुकम दिता। उना जो रिहा किता, पौलुसे जो थले आणी करी उना दे सामणे खडा किता।

23 पौलुसे महासभा पासे ध्यान लाईकरी दिखया, कने बोलया, “हे भाईयो, मैं अजे दीकर परमेस्वर ताईं बिलकुल सच्ची अंतरात्मा ला जिन्दगी कटी है।” 2 पौलुसे जडा बोलया सै सुणीकरी हनन्याह महायाजके, उना जो जडे उदे बखे खडोतया थे, पौलुस दे मुऐ पर थप्पड मारणे दा हुकम दिता। 3 तालू पौलुसे उना जो बोलया, “है पाखंडी, परमेस्वर तिजो मारणा। तू मूसा दी व्यवस्था दे अनुसार मेरा न्याय करणे जो बैयया है, कने फिरी भी मिजो मारणे दा हुकम देईकरी व्यवस्था दे खिलाफ जा दा है?” 4 जडे बखे खडोतयो थे, उना बोलया, “क्या तू

परमेश्वरे दे महायाजक दी बेईजती करदा है?" 5 पौलसे बोलया, "हे भाईयो, मैं नी जाणदा था, कि ऐ महायाजक है; क्योंकि पवित्र शाश्व च लिखया है, अपणे लोकां दे प्रधाने जो बुरा मत बोला।" 6 ताल् पौलसे ऐ जाणी करी, कि कुछ सदकी लोक न कने कुछ फरीसी लोक न, महासभा च पुकारी करी बोलया, "हे भाईयो, मैं फरीसी कने फरीसियां दे बंशे दा है, कने मेरा मुकदमा इस तांई होआ दा है क्योंकि मिंजो आस है की परमेश्वरे मरयो लोकां जो दुबारा जिन्दा करणा।" 7 जाल् उनी ऐ गल्ल बोली तां फरीसियां कने सदकियां च होणा लग्गी, कने सभा च फुट पेई गई। 8 क्योंकि सदकी लोक ऐ भरोसा करदे न की लोकां मरणे बाद जिन्दा नी होणा, ना कोई स्वर्गदत्त न कने ना आत्मा है; पर फरीसी लोक इना सबले पर भरोसा करदे न। 9 ताल् दुबरा रोला पिया कने कुछ व्यवस्था जो सिखाणे बाने जडे फरीसी थे, उटी करी ऐ बोली करी बेहस करणा लग्गे, "सांझो इस माणुऐ च कोई बुराई नी मिली है; कने होई सकदा है की इक आत्मा या स्वर्गदूते उमला गल्ल किती हो।" 10 जाल् लडाई बडी बदी गई, तां पलटना दे सरदारो इसी डोे ला कि सै पौलसे दे टोटे-टोटे नी करी दें, इस तांई उनी पलटना जो हुकम दिता की सभा दे लोकां बीचे ला पौलसे जो बचाई करी कित्ते च लेई जा। 11 उसा ही राती प्रभु यीशुऐ पौलस दे बखे आई करी बोलया, "हे पौलस, हिमत रख; क्योंकि जियां तू यरूशलेम शेहे च मेरी गबाई दितियो है, तियां ही तिजो रोम शेहे च भी मेरी गबाई देंगी पोणी है।" 12 जाल् भ्याग होई तां कुछ यहूदी माणुआं गिटे होईकरी सलाह किती, कने कसम खादी कि जाल् दीकर असां पौलसे जो मारी ना दें, अगर असां खादा या पीता तां सांझो पर लानत है। 13 जिना ऐ कसम खादियो थी, सै चालियां जणयां ला जादा थे। 14 उना बड़े याजकां कने यहूदी अणुवां बाल आई करी बोलया, "असां ऐ कसम खादियो है कि जाल् दीकर असां पौलसे जो मारी नी दें, ताल् दीकर असां अगर कुछ भी चखन तां सांझो पर लानत है। 15 इस तांई हण तुसां कने महासभा मिलिकरी पलटना दे सरदारो जो समझा कि पौलसे जो तुहाडे बाल लेई ओऐ, भाना मारा कि तुसां उदे बारे च होर भी ठीक तरीके ला जांच करणा चांदे न, कने असां उदे पूज्णे ला पहले ही उसयो रस्ते च मारणे तांई तैयार रेंगे।" 16 पर पौलसे दे भांजे सुणाया कि यहूदी लोक उसयो मारणे दी योजना बणा दे न, तां उनी कित्ते च जाई करी पौलसे जो खबर दितयो। 17 पौलसे सुबेदारां चे इकी जो सदीकरी बोलया, "इसी जवाने जो पलटना दे सरदारो बाल लेई जा, ऐ उसला कुछ बोलणा चांदा है।" 18 इस तांई सुबेदार पौलसे दे भांजे जो पलटना दे सरदारो बाल लेईजाई करी बोलया, "केदी पौलसे मिंजो सदीकरी बिनती किती, कि ऐ जवान पलटना दे सरदारो ला कुछ बोलणा चांदा है, इसयो उस बाल लेई जा।" 19 पलटना दे सरदारो उसयो हथ पकडी करी, कने उसयो लग लेईजाई करी पुछया, "तू मिंजो ला क्या बोलणा चांदा है?" 20 उनी बोलया, "यहूदियां गिटे होईकरी योजना बणाईयो, कि तिजो ला बिनती करन कि कल पौलसे जो महासभा च लोऐ, कने ऐसा लग्गे कि तू होर ठीक ढंणे ला उदी जांच करणा चांदा है। 21 पर कृपा करिरी तू उना दिया बिनतिया पर ध्यान मत दिन्दा, क्योंकि उना चे चालियां ला जादा माणु पौलसे जो मारणे दिया ताका पर न, उना ऐ कसम खादियो है कि जाल् दीकर असां पौलसे जो नी मारो, ताल् दीकर ना खाणा है ना पिणा है, कने सै हण तैयार न कने तें बचने दा इंतजार करा दे न।" 22 ताल् पलटना दे सरदारो जवाने जो ऐ हुकम देईकरी भेजया, "कुसी ला मत बोलदा कि तू मिंजो ला ऐ गल्लां बोलियां न।" 23 ताल् पलटना दे सरदारो दो सुबेदारां जो सदीकरी बोलया, "अज राती नो बजे दीकर दो सो सपाई, सत्तर सवार, कने दो सो भाले बाले, कैसरिया शेहेरे जो जाणे तांई तैयार रखा।" 24 कने पौलसे दिया सवारिया तांई घोडे जो तैयार रखा ताकि उसयो फेलिक्स राज्यपाले बाल ठीक-ठाक पुजाई सकन। 25 पलटना दे सरदारो राज्यपाले जो इक चिट्ठी भी लिखी: "महाप्रतापी फेलिक्स राज्यपाले जो क्लौडियस लुसियास दिया तरफा ला नमस्कार; 27 इस माणुऐ जो यहूदी पकडी करी मारणा चांदे थे, पर जाल् मिंजो पता लग्गा कि ऐ रोमी है, तां पलटना भेजी करी छुड़ाई लांदा। 28 कने मैं जाणना चांदा था, कि सै इस पर कुसा बजा ला दोष लांदे न, इस तांई उसयो उना दी महासभा च लेई गया। 29 ताल् मैं जाणी लिया, कि सै अपणिया यहूदी व्यवस्था दे विवादां दे बारे च उदे पर दोष लगा दे न, पर ऐ कोई ऐसा दोष नी है, जिदे तांई उसयो मोत दी सजा या जेल होऐ। 30 कने जाल् मिंजो दसया कि सै इस माणुऐ जो मारणे दिया ताका पर न, तां मैं झूट उसयो तें बाल भेजी दित्ता; कने उना यहूदियां जो जिना उस पर दोष लाया है हुकम दिता, कि तें सामणे उदे पर दोष

लान।" 31 सिपाइयां जो जडा हुकम दितया था तियां ही सै पौलसे जो लेईकरी रातो रात अन्तिपत्सि शेहेरे च लेई आऐ। 32 दुऐ रोजे उना घुडसवारां जो पौलसे सोगी कैसरिया शेहर जाणे तांई छडी दित्ता कने सपाई अपु पैदल यरूशलेम शेहेरे दे कित्ते जो मुडी आऐ। 33 उना कैसरिया शेहेरे च पुज्जी करी राज्यपाले जो चिट्ठी दित्ती; कने पौलसे जो भी उदे सामणे खडा किता। 34 राज्यपाले चिट्ठी पढी करी पुछया, "ऐ कुसी देशे दा है? कने जाल् ऐ सब जाणी लिया कि सै किलिकिया प्रदेशे दा है।" 35 ता उसयो बोलया, "जाल् सै लोक ओगे जिना तिजो पर दोष लाया है, ताल् मैं तेरा मुकदमा सुणना है।" कने उनी पौलसे जो राजा हेरोदेसे दे कित्ते च पेहेरे च रखणे दा हुकम दिता।

24 पंजा रोजा बाद हनन्याह महायाजक केई यहूदी अणुवां कने तिरतुल्लस नाऐ दे बकित्ते जो सोगी लेईकरी कैसरिया शेहेरे च आया; उना राज्यपाल दे सामणे पौलसे पर दोष लाऐ। 2 जाल् पौलसे जो ओथु सदया, तां तिरतुल्लसे उस पर दोष लाईकरी बोलया, "हे महाप्रतापी फेलिक्स, तेरिया बजा ला असां बडिया शांतिया ला रे दे न, कने तें इंतजाम ला इसा जातियां तां किंतिणियां बुराइयां सुधरा दियां न। 3 इसयो असां हर जगा कने हर तरीके ला धन्याबाद सोगी मंदे न। 4 पर मैं तेरा जादा बकत नी लेंणा चांदा है, मैं तिजो ला बिनती करदा है, कि कृपा करिरी थोडी देर साडी सुणी ला। 5 ऐ माणु संसारे दे सारे यहूदियां बिच मतभेद कने मुसीबत पैदा करा दा है, कने ऐ इक ऐसे कुपंथे दे अणुवां च भी है, जिस पंथे जो लोक नासरत दे यीशुऐ दे पिच्छे चलणे बाला पंथ बोलंदे न। 6 उनी मंदे जो अशुद्ध करणा चाया, कने ताल् असां उसयो बंदी बणाई लिया। असां उसयो अपणिया व्यवस्था दे अनुसार सजा देणा चांदे थे; 7 पर पलटना दे सरदारो लुसियासे आई करी जबरदस्ती उसयो साडे हथा ला छुड़ाई लिया, 8 कने इदे पर दोष लाणे बालयां जो तें बाल ओणे दा हुकम दिता। इना सारियां गल्लां जो जिना दे बारे च असां उदे पर दोष ला दे न, तू अपु ही उसयो जाँची करी सच्चाईया जो जाणी लेंणा है।" 9 यहूदियां भी उदा साथ देईकरी बोलया, ऐ गल्लां बिलकुल ठीक न। 10 जाल् राज्यपाले पौलसे जो बोलणे तांई इशारा किता तां उनी जबाब दित्ता: "मैं ऐ जाणी करी कि तुसां इस देशे दा बडे सालां ला न्याय करा दा है, इस तांई मैं खुशिया ला अपना जबाब दिन्दा है।" 11 तू अपु ही पता लग्गाई सकदा है, कि जाल् ला मैं यरूशलेम शेहेरे च अराधना करणा मन्देरे च आया है, मिंजो बारा रोजां ला उपर नी होऐ न। 12 उना मिंजो ना मंदेरे च, ना यहूदी जंज घरां च, कने ना शेहेरे च कुसी ने बेहस करदे या ना भिडा जो गिठा करदे दिखया; 13 कने ना ही सै उना गल्लां जो, जिना दे बारे च सै हण मिंजो पर दोष ला दे न, तें सामणे सच्च साबित करी सकदे न। 14 पर मैं तें सामणे ऐ मनी लेंदा है, कि मैं मसीह दे पंथे दा चेला होईकरी अपणे पूर्वजां दे परमेश्वरे दी सेवा करदा है, जिसी पंथे जो ऐ माणु यहूदी झूठा पंथ बोलंदे न: कने जडियां गल्लां मुसा दिया व्यवस्था च कने परमेश्वरे दा संदेश देणेबालयां दियां कलावां च लिखियां न, उना पर भरोसा करदा है। 15 कने परमेश्वरे पर आस रखदा है, जडी सै अपु भी रखदे न, कि परमेश्वरे धर्मी कने अधर्मी दोनो जो मरयां चे जिन्दा करी देणा। 16 इस तांई मैं अपु भी परमेश्वरे कने लोकां सामणे अपणी अंतरात्मा जो निर्दोष रखणे दी पूरी कोशिश करदा है। 17 मतयां सालां बाद मैं अपणे गरीब लोकां जो दान कने परमेश्वरे जो बलिदान चडाणे तांई यरूशलेम शेहेरे च आया था। 18 उसी बकत उना मिंजो मंदेरे च शुद्ध होणे दे रिबाजां जो पूरा करदे दिखया। ओथु ना तां कोई भिड थी कने ना ही कोई हल्ला था। 19 पर ओथु आसिया प्रदेशे दे कुछ यहूदी लोक थे, जिना हंगामा किता। अगर मैं कुछ गलत कितया था, तां उना जो मिंजो पर दोष लाणे तांई ऐथु तें सामणे होणा चाईदा था। 20 या इना माणुआं जो अपु ही बोलणा चाईदा, कि जाल् मैं महासभा दे सामणे खडोतया था, तां उना जो मिंजो पर कुण दिया दोष मिल्ला? 21 सिर्फ इक दोष है जडा सै मेरे खिलाफ लाई सकदे न, सै ऐ है जाल् मैं अंगणे च जोरे ला बोलया था, "पर ऐ मुकदमा मेरे पर इस तांई चलया है क्योंकि मैं भरोसा करदा है की परमेश्वरे उना लोकां जो जडे मेरी गियो न दुबारा जिन्दा करणा।" 22 राज्यपाल फेलिक्स जडा इसी पंथे दियां गल्लां जो अच्छे ला जाणदा था, उनी सुणवाई जो ऐ बोली करी स्थगित करी दित्ता, "कि जाल् पलटना दा सरदार लुसियास ओणा, तां तुहाडिया गल्लां दा न्याय करणा।" 23 कने सुबेदार जो हुकम दिता, कि पौलसे जो थोडी छुट देईकरी उसयो पेहेरे च रखा, पर उदे दोस्तां चे कुसयो भी इदी सेवा करणे ला मत रोकंदे। 24 थोडे रोजां

बाद राज्यपाल फेलिक्स अपनी घरे बाली दूस्ल्ला जो, जडी यहदी थी, सोगी लेईकरी पौल्से ला मिलणा आया कने पौल्से जो सदया, कने उस भरोसे दे बारे च उसला सुणया जडा यीशु मसीह पर है। 25 जालू पौल्से धार्मिकता कने अपनी इच्छां पर काबू रखणा कने परमेश्वरे जरिये होणे बाले न्याय दे बारे च दसणा शुरू किता, तां फेलिक्स डरीकरी जबाब दित्ता, “इस बकत तां तू जा; जालू मेरे बाल बकत होंगा तां मैं तिजो दुबारा सदी लौंगा।” 26 हालांकि फेलिक्स उना गल्लां दे बारे च डरदा था जडियां पौल्से बोलियां थियां, फिरी भी सै पौल्से जो सददा था, कने उस सोगी गल्लां करदा था क्योकि सै सोचदा था की सै जेला ला छुटणे तांई उसयो कुछ पैसे दिगा। 27 पर जालू दो साल बीती गो, तां पुरकियुस फेस्तुस, फेलिक्स दिया जगा पर राज्यपाल बणी गिया, कने फेलिक्स यहदियां जो खुश करणे दिया इच्छा ला पौल्से जो केदी ही छडी गिया।

25 उना रोजां बाद राज्यपाल फेस्तुस दे स्पे च यहदिया प्रदेश च आया। फिरी सै कैसरिया शेहरे ला यरुशलेम शेहरे जो गिया। 2 तालू बड़े याजकां, कने यहदियां दे अगुवां, उदे सामणे पौल्से पर दोष लाऐ; 3 कने उसला बिनती कितती की उना दा समर्थन करे कि सै पौल्स जो यरुशलेम शेहरे च सदे, क्योकि उना उसयो रस्ते च ही मारी देणे थी योजना बणाईयो थी। 4 फेस्तुसे जबाब दित्ता, “पौल्स कैसरिया शेहरे च केदी है, कने मैं अपु जल्दी ओथु जाण हौं।” 5 फिरी बोलया, “तुसां ने जडे बड़े माणू नै, सै मेरे सोगी चलन, कने अगर उनी माणुऐ कुछ गलत कम्म कितया है, तां उस पर दोष लगान।” 6 यरुशलेम शेहरे च कोई अठ दस रोज रेईकरी सै कैसरिया शेहरे जो गिया: कने दुरे रोजे न्याय-आसने पर बेईकरी पौल्से जो लोणे दा हुकम दित्ता। 7 जालू सै आया, तां यहदी अगुवे जडे यरुशलेम शेहरे ला आयो थे, उना अछे बखे खडोई करी उदे पर बडे भरी दोष लाऐ, पर उना बाल इना दोषां जो सच्च साबित करणे तांई कोई सबत नी था। 8 पर पौल्से जबाब दित्ता, “मै ना तां यहदियां दिया व्यवस्था दे कने ना मंदरे दे, कने ना महाराजा कैसरे दे खिलाफ कोई अपराध कितया है।” 9 तालू फेस्तुसे यहदी अगुवां जो खुश करणे दिया इच्छा ला पौल्से जो पुच्छया, “क्या तू चांदा है की तेरे इना दोषां दी सुणवाई मेरे सामणे यरुशलेम शेहरे च हो?” 10 पौल्से बोलया, “मै महाराजा कैसरे दे न्याय-आसने सामणे खडोतया है: ठीक ऐई है की मेरे मुकदमे दी सुणवाई ऐथु ही होणा चाईदी। मै यहदी लोकां दे खिलाफ कोई भी अपराध नी कितया है, कने इसा गल्ला जो तू भी अछे ला जाणदा है। 11 अगर अपराधी है कने मौत दी सजा देणे जोगा कोई कम्म कितया है, तां मै मरणे ला नी म्करदा है; पर जिना गल्लां दा ऐ मिजो पर दोष ला दे न, अगर उना चे कोई गल्ल सच्च नी है, तां कुसी जो भी ऐ हक नी है की मिजो इना दे हथे देई दे। मेरी बिनती है की मेरा न्याय महाराजा दे हथे ला होणा चाईदी।” 12 तालू फेस्तुसे अपणिया सभा सोगी गिवा करिरी जबाब दित्ता, “तू महाराजा कैसरे दे हथे ला न्याय होणे दी मांग किती है, तां तिजो महाराजा कैसरे बाल ही भेजणा है।” 13 थोडे रोजे होणे बाद राजा अग्रिप्पे कने उदी छोटी बेहण बिरनीके कैसरिया शेहरे च आई करी राज्यपाल फेस्तुसे ला मिल्ले। 14 उना जो ओथु मते रोजे रहेणे बाद फेस्तुसे उना ने पौल्से दे बारे च दसया, “इक माणू है, जिसयो फेलिक्स केदी छडी गिया है। 15 जालू मै यरुशलेम शेहरे च था, तां बड़े याजकां कने यहदी अगुवां उस पर दोष लाऐ कने चांदे थे, कि उसयो मौत दी सजा हुकम मिल्ले। 16 पर मै उना जो जबाब दित्ता, कि रोमियां दा ऐ रिबाज नी है, कि कुसी माणुऐ जो सजा देणे तांई सौपी देन, जालू दीकर आरोपी जो अपने दोष लाणे बालयां सामणे खडे होईकरी दोषां दे जबाब देणे दा मोका ना मिल्ले। 17 इस तांई जालू यहदी अगुवे मेरे सोगी ऐथु कैसरिया शेहरे च आये, तां मै कोई देर नी कितती, कने दुरे ही रोजे न्याय-आसने पर बेईकरी, पौल्से जो अदालत च लाणे दा हुकम दित्ता। 18 जालू उस पर दोष लाणे बाले खडुते, तां उना ऐसिया बुरियां गल्लां दा दोष नी लाया, जदिया मै समजदा था। 19 पर उना बिच अपने धर्म जो लेईकरी कने यीशु नाऐ दे माणुऐ दे बारे च कुछ झगडा था, जडा मरी गिया था, पर पौल्स दाबा करदा था की यीशु जिन्दा है। 20 क्योकि मिजो नी पता था की इना गल्लां दी जांच पडताल कियां करे, इस तांई मै पौल्से जो पुच्छया, क्या तू यरुशलेम च शेहरे च मुकदमे दी सुणवाई तांई राजी है। 21 पर जालू पौल्से बिनती कितती की महाराजा कैसर ही मेरा न्याय करे, तां मै हुकम दित्ता, कि जालू दीकर मै उसयो महाराजा कैसरे बाल नी भेजे, उदी रखबाली कितती जाऐ।” 22 तालू अग्रिप्पे फेस्तुसे जो बोलया, “मै

भी उस माणुऐ दी सुणना चांदा है।” उनी बोलया, “तू कल सुणी लियां।” 23 दुरे रोजे, जालू अग्रिप्पे कने बिरनीके बडी धूम धाम ला आई करी पलटना दे सदारां कने शेहरे दे खास-खास लोकां सोगी दरबारे च पुज्जे। तालू फेस्तुसे हुकम दित्ता, कि सै पौल्से जो लेई ओआ। 24 फेस्तुसे बोलया, “हे राजा अग्रिप्पे, हे सारे लोक जडे ऐथु साडे सोगी न, तुसां इसी माणुऐ जो दिखा दे न, जिदे बारे च सारे यहदियां यरुशलेम शेहरे च कने ऐथु भी चिलाई-चिलाई करी मिजो ला बिनती कितती, कि इदा जिन्दा रेणा ठीक नी है। 25 पर मै जांणी लिया कि उनी ऐदिया कुछ नी कितया है कि इसयो मौत दी सजा मिल्ले; कने जालू की उनी अपु ही बिनती कितती की महाराजा धिराज मेरा न्याय करे, तां मै उसयो भेजणे दा फेसला कित्ता। 26 पर मिजो उदे बारे च कोई भी पक्की गल्ल नी लगी कि महाराजा जो लिखें, इस तांई तां मै उसयो तहाडे सामणे कने खास करिरी राजा अग्रिप्पे तैरे सामणे लांदा है, ताकि जांचणे बाद मिजो कुछ लिखणे जो मिल्ले। 27 क्योकि केदिये जो भेजणा कने जडे दोष उदे पर लायो न, उना जो नी दसणा, मिजो ठीक नी लग्गा दा है।”

26 राजा अग्रिप्पे पौल्से जो बोलया, “तिजो अपने बारे च बोलेणे दी इजाजत है।” तालू पौल्से हथ चुकी करी लोकां जो शांत कित्ता, तालू सै अपने बचाव च बोलेणा लग्गा, 2 हे राजा अग्रिप्पे, जितणियां गल्लां दा यहदी अगुवे मिजो पर दोष लांदे न, अज तैरे सामणे उना दा जबाब देणे तांई मै अपने आपयो जो धन्य समझदा है, 3 क्योकि तू यहदियां दे सारे रिबाजां कने समस्यां जो अछे ला जाणदा है। इस तांई मै बिनती करदा है, अछे ला मेरी सुणी ले। 4 जदिया मेरा चाल-चलण बचनन ला लेईकरी अजे दीकर अपने लोकां च कने यरुशलेम शेहरे च था, ऐ सब यहदी जाणदे ना। 5 सै मिजो तालू ला जाणदे न जालू मै बच्चा था, सै चांदे न तां इसा सच्चाईया दी गवाई भी देई सकदे न की, मै फरीसियां दा इक सदस्य रिया है, जडा साडे धर्म दा सारयां ला कट्टर पंथ है। 6 अज मै परमेश्वरे जरिये साडे पूर्वजां जो दितयो बायदे दिया आसा दिया बजा ला ऐथु दोषिदे दे स्पे च खडोतया है। 7 उसी बायदे जो पूरा होणे दी आसा च, साडे बारा गोत्र अपने सारे मने ला दिन रात परमेश्वरे दी सेवा करदे आये न। हे राजा, ऐ उसा आशया दिया बजा ला है की परमेश्वरे सेई करणा जडा उनी बायदा कितया था की ऐ यहदी मिजो पर दोष ला दे न। 8 तालू पौल्से सुणने बालयां चे सारे यहदियां जो बोलया, तुसां लोक भरोसा करदे न की परमेश्वर मरयां जो दुबारा जिन्दा करी सकदा है, तां तुसां इसा गल्ला पर भरोसा करणे जो कजो मना करदे न की उनी यीशु मसीह हो मरयां चे जिन्दा कित्ता? 9 “मेरा भी पक्का भरोसा था कि नासरत बासी यीशुऐ दे खिलाफ मिजो मता कुछ करणा चाईदी।” 10 कने मै यरुशलेम शेहरे च इयां ही कितया; कने बड़े याजकां ला हक पाई करी बडे पबित्र लोकां जो जेला च पाया, कने जालू उना जो मारी दिन्दे थे, तां मै भी उना दे खिलाफ अपनी सेहमती दिन्दा था। 11 कने मै हर यहदी जंज पर च उना जो उसा दिलादां कने उना जो यीशुऐ दी निंदा करणे तांई मजबूर करदा था, ऐथु दीकर गुस्से ला ऐसा पागल होई गिया था कि दूज्जे शेहरां च जाई करी उना जो तंग करदा था। 12 “इसी ही मकसदे सोगी जालू मै बड़े याजकां ला अधिकार कने हुकम दी चिठी लेईकरी दमिशके शेहरे जो चलया था; 13 तां हे राजा, रस्ते च लगभग दोपेप दे बेले मै अम्बरे ला सूरजे दिया चमका ला भी जादा चमकदी इक लौ अपने कने अपने सोगी चलणे बालयां दे चारो पासे चमकदी दिखी। 14 कने जालू असां सारे धरती पर डेई पे, तां मै इज्जानी भाषा च, मिजो ला बोलेदे इक अबाज सुणी, ‘हे शाऊल, हे शाऊल, तू मिजो कजो तंग करदा है? हरबरी जालू तू मिजो दुखी करणे दी कोशिश करदा है, तालू तू अपु जो ही दुखी करदा है।’ 15 मै बोलया, प्रभु जी, तू कूण है? प्रभुऐ बोलया, मै यीशु है जिसयो तू तंग करदा है। 16 पर तू उठ, अपने पैरां पर खडा हो; क्योकि मै तिजो दर्शन इस तांई दित्ता है ताकि तिजो उना गल्लां दा भी सेवक कने गबाह बणां, जडियां तू दिखियां न, कने उना दा भी जिना तांई मै तिजो दर्शन देणा है। 17 कने मै तिजो तैरे लोकां ला कने होर जातियां ला बचादा रेणा, जिना बाल मै तिजो इस तांई भेजणा है। 18 कि तू उना दियां हखी खोले, ताकि सै नेहेरे ला लौई पासे, कने शैताने दे अधिकारे ला परमेश्वरे पासे ओन; तां परमेश्वरे उना दे पाप माफ करणे, कने उना लोकां सोगी बिरासत मिल्ले, जडे मिजो पर भरोसा करणे ला पबित्र होयो न। 19 इस तांई हे राजा अग्रिप्पा, मै उस स्वर्गीय दर्शने दी गल्ला दा पालन कित्ता, 20 मै पहले दमिशके शेहरे दे, फिरी यरुशलेम शेहरे दे रेणे बालयां जो, फिरी सारे

यहदिया प्रदेश च कने होर जातियां जो प्रचार किता, कि पाप करणा छडी दिया कने परमेश्वरे पसे फिरी करी ऐसे कम्म करा ताकि त्हाडिया जिन्दगीया ला पता लगे की त्सां अपने पापां ला पञ्चाताप करी लिया है। 21 इसा गल्ला दिया बजा ला यहूदी मिंजो मंदरे च पकडी करी मारी देंगे दी कोशिश करा दे थे। 22 पर परमेश्वरे दिया सहायता ला मैं अजे दीकर ठीक है कने छोटे बड़े सारायां दे सामणे गबाई दिन्दा है। कने मैं इना गल्लां दे सिवा कुछ नी बोलणा है, सै परमेश्वरे दे संदेश देणेबालयां कने मूसा भी बोलया है कि होंगे बालियां न, 23 कि मसीह जो दुख झेलणा पोंणा है, कने सै मरायां चे जिन्दा होणेबाला पैला जन होणा, इस तरीके ला उनी यहदियां च कने होर जातियां च ज्योति दा प्रचार किता।” 24 जालू पौलसु इसा रीतिया ला जबब दे दा था, तां फेस्तुसे जेरे ला बोलया, “हे पौलस, तू पागल है। मतिया बिधा तिजो पागल करी दितया है।” 25 पर उनी बोलया, “हे मसप्रतापी फेस्तुस, मैं पागल नी है, पर सच्चाईया कने अकली दियां गल्लां बोला दा है। 26 राजा भी ए गल्लां जाणदा है जिदे सामणे मैं बिना डरयो बोला दा है, कने मिंजो भरोसा है इना गल्लां च कोई भी गल्ल उसला छुपियो नी है, क्योंकि जडा यीशुए सोगी होया सै गुप्त च नी होया है। 27 हे राजा अग्रिपे, क्या तू परमेश्वरे दा संदेश देणेबालयां दा भरोसा करता है? हां, मैं जाणदा है, कि तू भरोसा करता है।” 28 हण अग्रिपे पौलसे जो बोलया, “कि तू क्या थोडे दे समझणे ला मिंजो मसीही बणाणां चांदा है?” 29 पौलसे बोलया, “मेरी परमेश्वरे ला ए प्राथना है कि क्या थोडे च, कने क्या मते च, सिर्फ तू ही नी, पर जितणे भी लोक मेरी समुदे न, मेरे इना बंध्या जो छडी करी मेरे सांई मसीह पर भरोसा करणे बाले होई जाना।” 30 तालू राजा अग्रिप्या कने राज्यपाल फेस्तुस कने उडी छोट्टी बेहण बिरनीके कने उदे सोगी बैठयो सारे उठी होए कने चली गे; 31 जालू सै बाहर जा दे थे, सै इक दुज्जे ला बोलणा लगे, “इनी माणुए ऐसा कोई अपराध नी कितया है जिदिया बजा ला उसयो मौत दी सजा या जेल हो।” 32 राजा अग्रिपे राज्यपाल फेस्तुसे जो बोलया, “अगर एे माणु महाराजा कैसरे ला अपने न्याय दी मांग नी करता, तां छुटी सकदा था।”

27 जालू फेस्तुस राज्यपाले एे गल्ल पक्की किती कि असां जाजे पर इतालिया प्रदेशे जो जाणा है, तां उना पौलसे कने कुछ होर केदियां जो भी युलियुस नाए दे महाराजा ओगुस्तुसे दिया पलटना दे इक सरदारो दे हथे सौपी दित। 2 अद्रमुनियुम शेहरे दे इक जाजे पर जडा आसिया प्रदेशे दे कंठे दिया जगा जो जाणे तांई तैयार था, असां उस पर चढी करी समुंद्री यात्रा शुरू किती, कने अरिस्तार्खुस नाए दा इक माणु जडा मकिदूनी प्रदेशे दे थिस्सलूनीके शेहरे दा बासी था, सै साडे सोगी था। 3 दुजे रोजे असां सैदा शेहरे च पुज्जी गे कने युलियुसे पौलसे पर कृपा करिरी उसयो दोस्ताना बाल जाणा दित ताकि उना ला जरूरी चीजां लेई ओए। 4 ओथु ला असां दुबारा यात्रा शुरू किती कने होआ दा सख उल्टा होणे दिया बजा ला असां साइप्रस टापू दिया आडा च होईकरी चले; 5 कने असां समुंद्री यात्रा करदे होए किलिकिया प्रदेश कने पफुलिया शेहरे दे तट दे बखे ला होईकरी लसिया प्रदेशे दे मुरा शेहरे च पुज्जे। 6 ओथु सुबेदारो जो सिक्ंदरिया शेहरे दा इक जाज इतालिया प्रदेशे जो जांदा होया मिल्ला, कने उनी सांझो उस जाजे पर चढाई दित। 7 असां बडे रोजा दीकर बले-बले यात्रा किती। साडा कनिदुस शेहरे दीकर पुजणा मुशकिल होई गिया था क्योंकि होआ उल्टी दिशा च चलिया थी, इस तांई असां क्रेते टापू दिया आडा च, सलमोने दे इक छोटे दे टापू दे बखे ला होईकरी अगगे बडे। 8 कने मुशकिला ला उदे किनारे-किनारे चली करी शुभलंगरबासी नाए दिया इकी जगा च पुज्जे, जितु ला लसया शेहर नेडे था। 9 जालू मते रोज बिती गे थे, कने समुंद्री यात्रा हण बडी खतरनाख होई गियो थी क्योंकि सर्दियां दे मौसमे च होंगे बाला पञ्चाताप दी बलि दा त्योहारे होई गिया था, कने एे सेई मौसम था ऐसा मौसम शुरू होई गिया था जालू समुन्द्र च मौसम बडा तूफानी होई जांदा है, इस तांई पौलसे उना जो चेताबनी देईकरी बोलया, 10 “हे सज्जो, मिंजो ऐसा लग्गा दा है कि साडी एे यात्रा बडी नुकसानदायक है। ना सिर्फ जाजे कने समाने दा पर साडे प्राणा दा भी नुकसान होणेबाला है।” 11 पर सुबेदारों जाजे दे कपताने कने जाजे दे मालिके दियां गल्लां जो पौलसे दियां गल्लां ला बदीकरी मनया। 12 कने एे शुभलंगरबासी बन्दरगाह सर्दियां कटेणे तांई खरी नी थी; इस तांई मतयां दा बिचार होया कि ओथु ला अगगे चली करी कुसी तरिके ला होई सके तां फिनिक्स बन्दरगाह च पुज्जी करी सर्दियां कटन। एे तां क्रेते टापू दी इक बन्दरगाह है जिसा दा दरबाजा दक्षिण-पश्चिम कने उत्तर-पश्चिम दिशा च है। 13 जालू थोडी-थोडी

दक्षिण होआ चलणा लग्गी, तां उना सोचया की उना दी योजना पूरी करणे तांई ठीक बकत है, इस तांई उना लंगर चुकया कने क्रेते टापू दे किनारे ला होंदे होए अगगे बदणा लगे। 14 पर अचानक क्रेते टापू दिया जमिना ला इक बडा तूफान उठया, जिसयो उत्तरपूर्वी तूफान बोल्दे न। 15 जालू तूफान जाजे ला टकराया, तां जाज तूफाने अगगे नी टिकी सकया, इस तांई असां उसयो होआ दे साबे जाणा दित, कने इयां ही होआ सोगी चलदे गे। 16 तालू असां कौदा नाए दे इक टापूए दिया आडा च अगगे बदे कने बडिया मुशकिला ला जाजे दी जीवनरक्षक किस्तिया जो बचाया। 17 फिरी जाजे च कम्म करणे बालयां जीवनरक्षक किस्तिया जो चुकी करी ठीक किता, कने उना मजबूती तांई पतवार जो चमरो पासे ला रसियां ला बन्नी दित, कने सुरतिस दिया खाडिया दिया रेत च फसी जाणे दे डरे ला, उना लंगरे जो थोडा थले उतारी करी जाजे जो होआ दे बहाबे सोगी-सोगी रुदने तांई छडी दित। 18 कने जालू दुज्जे रोजे सांझो तूफाने दिया बजा ला धक्के लगे लग्णा, तां सै जाजे ला माल फेकणा लगे; 19 कने तरे एे रोजे उना अपने हथा ला जाजे दा साजो समान भी फेकी दित। 20 कने जालू मतयां रोजां दीकर ना सर्ज ना तारे मिल्ले, कने तूफान लगातार चलया था, तां आखरी च साडे बचणे दी सारी आस खत्म होदी गेई। 21 जालू उना मते रोजां दीकर कुछ नी खादा, तां पौलसे उना दे बिच खडोई करी बोलया, “हे लोको, त्हांजो मेरी सलाह मनणी चाईदी थी, क्रेते टापू ला अगगे नी जांदे, तां ना एे मुसीबत ओदी कने ना एे घाटा होंदा। 22 पर मैं हण तुसां जो समझांदा है कि हिम्मत रखा, क्योंकि तुसां च कुसी दे भी प्राण नी जाणे, पर सिर्फ जाजे दा नाश होणा। 23 क्योंकि परमेश्वर जिदा मैं है, कने जिदी सेबा मैं करता है, उदे स्वर्गदूते पिछली राती मेरे बाल आई करी बोलया, 24 हे पौलस, डर मत। तिजो महाराजा कैसरे दे सामणे खडा होणा जरूरी है। कने परमेश्वरे सबना जो बचाई लेणा है जडे तेरे सोगी यात्रा करा दे न। 25 इस तांई, हे भाइयो, हिम्मत रखा; क्योंकि मैं परमेश्वरे पर भरोसा करता है, कि जियां मिंजो ला बोलया है, जियां ही होणा है। 26 पर साडा जाज कुसी टापूए पर टकराई टूटी जाणा।” 27 जालू चौदही रात होई, कने असां अदिया समुदे च भटका दे थे, तां अधिया राती जाजे च कम्म करणे बालयां अणदाजा लाया कि असां कुसी देशे दे बखे पुजणे बाले न। 28 उना समुदे दी गेहराई नापी तां सेंती मीटर निकली कने थोडा अगगे जाई करी फिरी नापया तां सताईस मीटर निकलया। 29 तालू पथरीली जगा ला टकराणे दे डरे ला उना जाजे दे पिच्छे चार लंगर पाए, कने ब्याग होणे दी कामना करदे रे। 30 पर जाजे पर कम्म करणे बाले जाजे ला नठणा चांदे थे, कने उना जाजे दे सामणे लंगर पाणे दे बहाने जान बचाणे बाली किस्ती समुदे च उतारी दिती; 31 तां पौलसे सिपाइयां कने सुबेदारों जो बोलया, “अगर एे जाजे पर नी रे, तां तुसां भी नी बची सकदे।” 32 तालू सिपाइयां रसियां बडी करी सै किस्ती फेकी दिती। 33 जालू ब्याग होणे बाली थी, तां पौलसे एे बोली करी, सबना जो रोटी खाणे तांई बिनती किती, “अज चौदा रोज होए कि तुसां चिंता करिरी भूखे रे, कने कुछ नी खादा। 34 इस तांई त्हांजो ला बिनती करता है कि कुछ खाई लिया, जिसला तुसां बची सकन, क्योंकि तुसां चे कूसदा भी कोई बाल बांका नी होणा।” 35 कने एे बोली करी उनी रोटी लेईकरी सबना दे सामणे परमेश्वरे दा धन्यावाद किता कने तोडी करी खाणा लग्गा। 36 तालू उना सारायां जो हिम्मत मिल्ली कने रोटी खाणा लगे। 37 असां सारे मिली करी जाजे पर दो सो छिहतर जणे थे। 38 जालू सै रोटी खाई करी रजी गे, तां कणका जो समुदे च फेकी करी जाजे जो हलका करणा लगे। 39 जालू दिन निकलया, तां उना उसी देशे जो नी पछेणया, पर इक खाडी दिखी जिसा दा चौरस किनारा था, कने बिचार किता कि होई सके तां जाजे जो ओथु लेईकरी चलन। 40 तालू उना लंगरा जो खोली करी समुदे च छडी दित कने उसी बेले पाल दे रस्से खोली दिते, कने होआ दे सामणे अगला पाल चढाई करी किनारे सारे चले। 41 पर जाज रते दे डरे ला टकराई गिया कने जाजे दा अगला हिस्सा रते च फसी गिया, पर जाजे दा पिछला हिस्सा लेहरां दे जेरे ला टूटणा लगी पिया। 42 तालू सपाइयां दा एे बिचार होया कि केदियां जो मारी दें, ऐसा ना होए कि कोई तेरी करी नठी जा। 43 पर सुबेदारों पौलसे जो बचाणे तांई उना जो इस बिचार ला रोकया, कने एे बोलया, कि जडे तेरी सकदे न, सै पेहेले छाल देईकरी किनारे जो निकली जा। 44 कने बाकी कोई पटरां पर, कने कोई जाजे दियां होर चीजा दे सहारे निकली जा, कने इसा रीतिया ने सारे जमिना पर बची निकले।

28 जालू असां सारे सलामत बची करी किनारे पर पूजी गे, तालू सान्झो पता लग्ग कि इस टापूए दा ना माल्टा था। 2 कने ओथु रेणेबाले लोक बडे दयालु थे, क्योंकि उना बरखा कने ठंड दिया बजा ला अगग वाली करी साडा स्वागत किता। 3 जालू पौलसे लकडियां बटोली करी अग्गी पर रखियां, अग्गी दे सेके ला इक सप्प निकलया कने उदे हथे ने लिपटी गया। 4 जालू ओथु दे रेणे बालयां उस कीडे जो उदे हथे च लटकया दिखया, तां अपु चे बोलया, “सच्ची ऐ माणु हल्यारा है, कि समुद्रे च तां बची गया, पर साडी न्याये दी देवी नी चांदी की ऐ जिन्दा रे।” 5 तालू उनी कीडे जो अग्गी पर झटकी दिता, कने उसयो कोई नुकसान नी होया। 6 पर सै लोक नियाला दे कि उनी सूजी जाणा है, या इकदम थले पेई कि मरी जाणा है, पर जालू सै मतिया देरा दीकर दिखदे रे कने दिखया कि उसयो कुछ नी होया है, तां उना लोकां दे बिचार ही बदलुई गे कने बोलणा लग्गे, “ऐ तां कोई देवता है।” 7 उसा जगा दे अखे बखे उस टापूए दे प्रधान पुबलियुसे दी जमीन थी: उनी सांझो अपने घरे लेईजाई करी तिन रोज साडी खातिरदारी किती। 8 पुबलियुसे दे पिता जो बुखार कने पेचिश बिमारी थी। पौलसे उदे बखे जाई करी प्राथना किती, कने उदे पर हथ रखीकरी उसयो ठीक किता। 9 जालू इयां होया, तां उस टापूए दे बाकी बिमार लोक भी पौलसे बाल आये, कने ठीक होई गे। 10 उना साडी बडी इज्जत किती, कने तिन मिहने बाद जालू असां जाणा लग्गे, तां जडा कुछ साडे तांई जरूरी था, उना जाजे पर रखी दिता। 11 असां तीन मिहने बाद सिकंदरिया जाजे पर यान्ना शुरू किती। ऐ जाज सदियां दिया बजा ला इस टापूए पर स्कया था, कने जाजे दे अगले हिस्से पर इक जोडी देवतयां दा इक निशाण दिनुसकरी बणया था। 12 सुरकुसा शेहरे च लंगर पाई करी असां तिन्न दिन दीकर स्क्री रे। 13 असां ओथु ला अग्गे चली करी रेगियुम शेहरे च पुज्जे; इक दिन बाद दक्षिण होआ चली, तां असां दुज्जे रोजे पुतियुली शेहरे च पुज्जे। 14 ओथु सांझो कुछ मसीह भाई मिल्ले, उना दे बोलणे ला असां ओथु सत रोज रे; ओथु ला असां जमिनी रस्ते ला रोम शेहरे पासे चले। 15 रोम शेहरे दे कुछ मसीही भाईयां सुणया की असां ओथु ओआ दे न, सै सांझो ला मिललणा कने सांझो रोम शेहर लेई जाणे तांई अपियुस शेहरे दे बजार कने तीन-सराए शेहरे दीकर आए, उना जो दिखीकरी पौलसे परमेश्वरे दा धन्याबाद किता कने बडा खुश होया। 16 जालू असां रोम शेहरे च पुज्जे, तां पौलसे जो इक सपाईए सोगी जडा उदी रखबाली करदा था, किले रेणे दा हुकूम मिल्ली गया। 17 तिन्ना रोजां बाद उनी यहूदी अगवां दी इक सभा सदी, कने जालू सै गिठे होए तां उना जो बोलया, “हे यहूदी भाईयो, मै अपने लोकां दे या अपने पूर्वजां दे रीती रिबाजां दे खिलाफ च कुछ नी किता, फिरी भी मिजो केदी बणाई करी यरूशलेम शेहरे ला रोमी सरकार दे हथे देई दिता। 18 उना मिजो जाँची करी छडी देणा चाया, क्योंकि मिजो च मौत दी सजा देणे जोगा कोई दोष नी था। 19 पर जालू यहूदी अगुवे इदे खिलाफ च बोलणा लग्गे, तां मिजो बिनती करणा पेई की महाराजा कैसर मेरा न्याय करे; इस तांई नी कि मिजो अपने लोकां पर कोई दोष लांणा था। 20 इस तांई मै तुहांजो सदया है, ताकि तुसां ला मिल्ले कने गलबात करे; क्योंकि इस्राएले दिया आसा तांई जडी की मसीह है, मै इना जंजीरा ला जकडया होया है।” 21 उना उसयो बोलया, “ना सांझो कोई तरे बारे च यहूदिया प्रदेशे दे लोकां ला कोई चिट्ठी मिली, कने ना साडे भाईयां च कुनी भी आई करी तरे बारे च दसया, कने ना बुरा बोलया। 22 पर तेरा बचार क्या है? सेई असां सुणना चांदे न, क्योंकि असां जाणदे न, हर जगा इस मते दे बारे च लोक बिरोध करदे न।” 23 तालू यहूदी लोकां जडे पौलसे सोगी थे, उना उदे तांई इक दिन तय किता, कने मते भरी लोक उना बाल गिठे होए। कने पौलस ब्यागा ला लेईकरी संझा दीकर मसा दी व्यवस्था ला कने परमेश्वरे दा संदेश देणेबालयां दियां कताबां ला परमेश्वरे दे राज्य दी गबाई, कने यीशुदे दे बारे च समझाई-समझाई करी दसदा रिया। 24 तालू थोडे लोकां पौलसे दियां गल्लां पर भरोसा किता, कने केईयां भरोसा नी किता। 25 जालू सै अपु चे सेमत नी होए, तां पौलसे दिया इसा इकी गल्ला पर चली गे, “पबित्र आत्मा यशायाह परमेश्वरे दा संदेश देणेबाले दे जरिये तुहाडे पूर्वजां ला ठीक बोलया है, 26 जाई करी इना लोकां ने बोल: कि सुणदे तां रेणा, पर समझणा नी है, दिखदे तां रेणा है, पर जाणना नी है; 27 क्योंकि इना लोकां दा मन मोटा। कने उना दे कन भारी होई गियो न, कने उना अपणियां हखी बंद कितियां न, इयां ना हो कि सै हखी ला दिखन, कने कना ला सुणन, कने मने ला समझन कने बदली जान, कने मै उना जो ठीक करे। 28 इस तांई तुसां जाणा, कि परमेश्वरे दे इस उद्वारे दी

कथा होर जातियां बाल भेजइयो है, कने उना मनपी।” 29 जालू उनी ऐ बोलया तां यहूदी अपु चे बेहस करणा लग्गे कने ओथु ला चली गे। 30 कने सै पुरे दो साल अपने खर्च पर किराए दे घरे च रिया, उना सबना दा स्वागत करदा था जडे उसला मिलणा ओदे थे, 31 कने बिना रोक टोक कने बिना डरयो होईकरी परमेश्वरे दे राज्य दा प्रचार करदा कने प्रभु यीशु मसीह दियां गल्लां सिखांदा रिया।

रोमियो

1 ऐ चिड़ी पौलस दिया तरफा ला है, जड़ा प्रभु यीशु मसीह दा सेवक है, कने परमेख्वरे उसयो प्रेरित होणे तांई चुणया है, कने परमेख्वरे दा शुभसमाचार दा प्रचार करणे तांई नियुक्त कितया है। 2 पबित्र शास्त्र च परमेख्वरे अपने संदेश देणेबालयां दे जरिये बड़े पेहेले ही शुभसमाचार दा वायदा कितया था, 3 ऐ शुभसमाचार उदे अपने पुत्र, साडे प्रभु यीशु मसीह दे बारे च है, उदा जन्म इक इन्सान दे स्पे च राजा दाऊदे दे बन्धे च होया था, 4 कने पबित्र आत्मा दिया शक्तिया ला जालु सै मरयां च जिन्दा होया तालु उनी साबित कित्ता की सै परमेख्वरे दा पुत्र है। कने सै यीशु मसीह साड़ा प्रभु है। 5 मसीह दे जरिये मिंजो अनुग्रह कने प्रेरिताई परमेख्वरे ला मिली ताकि उदे नापे दिया बजा ने सारियां जातियां दे लोक मसीह पर भरोसा करन कने उदे हुक्मा जो मनन, 6 तुसां विक्वासी जडे रोम शहर च रेंदे न इना ही लोकां च शामिल न जिना जो परमेख्वरे यीशु मसीह दे होणे तांई चुणया है। 7 ऐ चिड़ी रोम शहर च रेणेबाले उना सारयां दे ना है जिना ने परमेख्वर प्यार करता है, कने अपने पबित्र लोक होणे तांई सदया है, साडे पिता परमेख्वरे कने प्रभु यीशु मसीह दिया तरफा ला तुसां जो अनुग्रह कने शांति मिलदी रे। 8 पेहेले मै तुसां सारयां तांई यीशु मसीह दे जरिये अपने परमेख्वरे दा धन्यवाद करता है, क्योंकि मती सारियां जगां दे लोक तुसां दे यीशु मसीह पर भरोसे दे बारे च गल्लां करा दे न। 9 परमेख्वर जिसदी सेबा मै अपने पुरे मने ने उदे पुत्रे दे बारे च शुभसमाचार दा प्रचार करता है, सेई मेरा गबाह है, की मै अपनी प्राथना च तुसां लोकां जो लगातार याद करता है, 10 कने हर रोज बिनती करता है, की परमेख्वरे दी इच्छा ने कुसी ना कुसी तरीके ने आखरी च तुसां ने मिलणे दा मौका मिलले। 11 क्योंकि मै तुसां ने मिलने दी बडी इच्छा है, ताकि मै तुसां जो कोई आत्मिक बदरान दे जिसने तुसां भरोसे च होर भी मजबूत होई जान, 12 मेरे बोलने दा मतलब ऐ की मै तुसां जो उत्साहित करी सके क्योंकि तुसां जाणदे न की मै कियां भरोसा कित्ता कने तुसां मिंजो उत्साहित करी सकन क्योंकि मै जाणदा है की तुसां कियां भरोसा कित्ता। 13 कने हे मसीह भाईयो, मै चांदा है की तुसां जाणी लिया की मै तुसां बाल बार-बार ओणा चांदा, की जियां मै होर जातियां च मसीह तांई चले बणापे, तियां ही तुसां च भी चले बणन, पर हले दीकर इदे च स्काबट ओदी रेई। 14 मेरी जिम्मेवारी सारयां लोकां जो शुभसमाचार सुणाणे दी है, चापे सै यूनानी भाषा जाणने बाले होन या नी जाणने बाले होन कने चाहे समझदार होन या नासमझ होन। इस तांई मेरी रोम शहरे च तुसां ने मिलणे दी बडी इच्छा है। 15 इस तांई मै तुसां जो भी जडे रोम शहरे च रेंदे न, शुभसमाचार सुणाणे जो भरपूर तैयार है। 16 क्योंकि मै मसीह दे शुभसमाचार च घमंड करता है, क्योंकि शुभसमाचार दी शक्ति ने ही परमेख्वरे शुरू ला यहूदियां जो बचाया कने हण सारे संसारे दे लोकां जो बचांदा है। 17 क्योंकि शुभसमाचार च परमेख्वर दी धार्मिकता दे बारे च दसया है, ऐ धार्मिकता शुरू ला लेईकरी आखरी दीकर भरोसे दे जरिये होंदी है, जियां पबित्र शास्त्र च लिखया है, “जड़ा माणु भरोसे दे जरिये परमेख्वरे सोगी सही बणी रेंदा है, उनी ही जिन्दा रेणा।” 18 परमेख्वरे दा गुस्सा तां, जडे बुराई कने अधार्मिक कम्म करदे न उना लोकां पर स्वर्ग ला प्रकट होंदा है, जडे बुरे कम्म करणे दे जरिये लोकां जो परमेख्वरे दिया सच्चाईयां जो जाणने ला रोक्ते न। 19 इस तांई की सै परमेख्वरे दे ज्ञाने दे बारे च असाना ने समझी सकदे न, क्योंकि परमेख्वरे ऐ ज्ञान उना पर प्राप्त कितया है। 20 क्योंकि परमेख्वरे दी हमेशा दी शक्ति कने चरित्र जो दिखी नी सकदे, पर संसार दी शुरूआत ला ही परमेख्वरे इना जो अपनी सृष्टियां ने दसया है, इस तांई उना बाल कोई भाना नी है की सै परमेख्वर जो नी जाणदे। (aidios g126) 21 इसा बजा ने की परमेख्वरे जो जाणने पर भी उना परमेख्वरे दे स्पे च इज्जत नी दिती, कने सोचणा लगे की ऐ बेकार गल्लां न, ऐथु दीकर की उना जो जियां सोचणा चाईंदा तियां नी सोचया पर बेकार गल्लां सोचदे रे। 22 सै अपने आपे जो बुद्धिमान जताई करी मुख बणी गे, 23 कने हमेशा जिन्दा रेणेबाले परमेख्वरे दिया महिमा जो हमेशा जिन्दा नी रेणेबाले, कने पछियां, कने चारां पैरां बाले, कने रेणेबाले जानवरां दियां मूर्तियां सांई बदलीं दित्ता कने इना दी पूजा करणा लगे। 24 इसा बजा ला परमेख्वरे उना जो उना दे मने दिया इच्छा अनुसार यौन अशुद्धता तांई छडी दित्ता, ताकि सै अपु चे बुरे कम्म करी के अपने शरीरां दी अनादर करन। 25 क्योंकि सै परमेख्वरे दे बारे दिया सच्चाईयां पर भरोसा करणे जो मना करदे न,

कने सै उसयो मंदे जडा जुठ है। कने उना संसारे दी पूजा कने सेबा कित्ती, कने ना की उस सृष्टिकर्ता दी सेबा कित्ती। उस सृष्टिकर्ता दी जिनी सारे संसारे दियां विजां जो बणया है, उदी महिमा सदा होंदी रे। आमीन। (aiōn g165) 26 इस तांई तां परमेख्वरे उना जो उना दे बुरे बिचारां दे बशे च छडी दित्ता; ऐथु दीकर उना दियां जनानियां मर्दां सोगी जायज रिशतयां जो दुजियां जनानियां सोगी नाजायज रिशतयां च बदलीं दित्ता। 27 तियां ही मर्द भी जनानियां सोगी जायज रिशता छडी करी अपु चे व्यभिचार करिरी बरबाद होणे लगे, कने मर्दां-मर्दां सोगी व्यभिचार करिके अपने ही शरीर च अपणियां इसा गलतियां दी ठीक सजा मिलली। 28 क्योंकि जालु उना परमेख्वरे जो अपनाणा मुखता समझया, तां परमेख्वरे भी उना जो सारे नकमे कम्म करणे तांई उना दे नकमे मने दे बशे च छडी दित्ता। 29 इस तांई सै हर तरा दे गलत कम्मा च, बुराई च, कने लालच, कने बैरभाव ने भरई गे; कने जलन, कने हत्या, कने लडाई झगडे, कने धोखा, कने जलन ने भरई गे, कने चुगलखोर, 30 गप्पां मारणे बाले, कने होरनी दी बेस्ती करणे बाले, लडाके, घमंडी, झूठे, डिगमार, बुरियाँ गल्लां करणे बाले, कने माता पिता दी गल्ल नी मनणे बाले, 31 बेअकले, धोखेबाज, दया भाव नी है कने निर्देयी होई गियो न। 32 सै तां परमेख्वरे दे नियम जो जाणदे न की ऐसा कम्म करणे बाले मौत दी सजा जोगे न, तमि ना सिर्फ अपु ऐसे कम्म करदे न कने करणे बालयां ने खुश भी होंदे न।

2 इस तांई तू सोचदा है की, तू ऐसे लोकां दी निंदा करी सकदा है, जडे दुज्यां पर दोष लांदे न; क्योंकि जिसा गल्ला पर तू दुज्जे पर दोष लांदा है, उसा ही गल्ला च तू अपने आपे जो दोषी बणांदा है, क्योंकि तू जडा दोष लांदा है सेई कम्म तू अपु करता है। 2 कने असां जाणदे न की परमेख्वर ऐसे बुरे कम्म करणे बालयां जो न्याय अनुसार सजा दिन्दा है। 3 कने तू जडा ऐसे-ऐसे कम्म करणे बालयां पर दोष लांदा है, कने अपु सेई कम्म करता है; तू क्या ऐ समझदा है की तू परमेख्वरे दिया सजा ला बची जाण है? 4 तू क्या परमेख्वर दी भलाई, कने सेहनशीलता, कने धीरज स्पी धने जो बेकार समझदा है? क्या ऐ नी समझदा की परमेख्वरे दी भलाई तिजो अपने पापां जो मण्णा कने गलत कम्मा जो छडणा सिखांदी है? 5 पर क्योंकि तू जिदी कने अपने पापां दा पच्चाताप करणे ला मना करी दित्ता, जिस रोज परमेख्वरे अपना गुस्सा दसणा, उस रोज सच्चा न्याय होणा, जालु परमेख्वरे न्याय करणा तालु परमेख्वरे होर भी जादा दर्दनाक सजा देणी। 6 परमेख्वरे हर इकी जो उदे कम्मा दे अनुसार इनाम देणा है। 7 जडे खरे कम्मा जो मेहनत करदे होऐ महिमा, कने आदर, कने अम्पता दीया तोपा च न, उना जो परमेख्वरे हमेशा दी जिन्दगी देणी है; (aiōnios g166) 8 पर जडे मतलबी न कने सच्च जो नी मंदे न, पर बुरे कम्मा जो करदे न, उना पर परमेख्वरे दा गुस्सा कने प्रकोप पोणा है। 9 दुख कने मुशकिलां हर इक उस माणुपे पर ओणियां न जडे बुरा करदे न, परमेख्वरे पेहेले यहूदियां दा न्याय करणा है कने बांदे च उना दा न्याय करणा जडे यहूदी नी न; 10 पर महिमा कने इज्जत कने शांती हर इकी जो मिलणी है, जडा भला करता है, परमेख्वरे सारयां ला पेहेले यहूदी लोकां जो देणा फिरी उना लोकां जो देणा जडे यहूदी नी न। 11 क्योंकि परमेख्वर सबना सोगी इकोदिया व्यवहार करता है। 12 इस तांई की होर जाति दे लोकां बिना मूसा दी व्यवस्था मिलयो ही पाप कित्ता, उना जो बिना व्यवस्था दे ही परमेख्वरे सजा देणी, कने जिना यहूदी लोकां मूसा दी व्यवस्था मिलणे बाद पाप कित्ता, उना जो परमेख्वरे मूसा दी व्यवस्था दे अनुसार सजा देणी; 13 क्योंकि परमेख्वरे दी नजरा च धर्मी लोक सै नी न, जडे मूसा दी व्यवस्था जो सुणनेबाले न, पर परमेख्वरे दी नजरा च धर्मी लोक सै न जडे व्यवस्था दा पालन करदे न। 14 फिरी जालु होर जातियां दे लोक जिना बाल मूसा दी व्यवस्था नी है, पर स्वभाव ने ही इना कम्मा जो करदे न जडे मूसा दी व्यवस्था च लिखयो न, तां उना बाल मूसा दी व्यवस्था नी होणे पर भी से साबित करदे न की उना दे मने च ही व्यवस्था है। 15 सै दसदे न की परमेख्वरे दी व्यवस्था उना दे मना च लिखियो है, क्योंकि उना दी अंतरात्मा भी ऐई गबाई दिन्दी है की ऐ सच्च है, क्योंकि उना दे बिचार ही उना जो दसदे न की सै सही करा दे न की गलत करा दे न। 16 ऐ सच्च उस रोज सामणे आई जाणा, जालु परमेख्वरे यीशु मसीह दे जरिये जिसदा मै शुभसमाचार सुणादा है सारे माणुआं दी गुण गल्लां दा न्याय करणा है। 17 अगर तू अपने आप जो यहूदी बोलदा है, कने व्यवस्था पर भरोसा रखदा है, कने घमंड करता है की तू परमेख्वर दा खास जन है, 18 कने तिजो परमेख्वर दी इच्छा पता है, तू खरियाँ-खरियाँ गल्लां दा साथ दिन्दा

है, क्योंकि तिजो इना दे बारे च मूसा दी व्यवस्था च सिखाया है; 19 कने तिजो इसा गल्ला दा पक्का पता है की, तू अन्ने लोकां जो परमेश्वर दा रस्ता दसदा है, कने तू उना लोकां ताई लौई साई है जडे नेहरे च रदे न, 20 कने बेअकलां जो सिखणे बाला, कने बचयां दा गुरू है। तिजो पक्का पता है क्योंकि मूसा दी व्यवस्था तेरे बाल है, कने तू पूरी तरा सब कुछ जाणदा है कने तू जडा बोलदा है सै सच्च है। 21 इस ताई तू जडा बाकियां जो शिक्षा दिन्दा है, सै शिक्षा अपने आपे जो कनी दिन्दा? तू जडा चोरी नी करणे दी शिक्षा दिन्दा है, कने अपु ही चोरी करदा है। 22 तू जडा ऐ सिखांदा है, “व्यभिचार मत करा,” अपु ही तां व्यभिचार करदा है! तू जडा मूर्तियां ने नफरत करदा है, अपु ही तां मंदरा जो लुटदा है! 23 तू कसा गल्ला पर घमंड करदा है की तेरे बाल परमेश्वरे दी व्यवस्था है, क्या तू अपु ही व्यवस्था जो नी मन्नी करी, परमेश्वरे दा अनाधर नी करदा? 24 “क्योंकि तुसां यहदियां दिया बजा ने, होर जाति दे लोक परमेश्वरे दे बारे च बुरियां गल्लां करदे न,” तुहाडे इना कम्मा दिया बजा ने पबित्र शास्त्र दियां गल्लां सच्च होइयां न। 25 मै तिजो समझांदा है, की तेरा खतना होणे दा फायदा तालू ही है अगर तू व्यवस्था जो पूरा करे, पर अगर व्यवस्था च जियां लिखया तू तियां नी करे, तां तुसां खतना होयो यहदी लोक भी होर जातियां साई न जिना दा खतना नी होया। 26 तां इदा मतलब है की अगर कोई माणु जिदा खतना नी होया कने सै व्यवस्था दे नियमा जो मनदा है, तां परमेश्वर ऐसे माणुए जो भी उस माणुए साई दिखदा है जिदा खतना होया है। 27 कने जडा माणु शारीरिक स्मे च बिना खतना रिया सै अगर व्यवस्था जो मनदा है, तां क्या उनी तिजो पर जिस बाल मूसा दी व्यवस्था है कने खतना होणे पर भी व्यवस्था जो नी मनदा है, दोष नी लाणा? 28 क्योंकि सच्चा यहदी सै नी जडा यहदी पैदा होया कने जिदा खतना होया। 29 क्योंकि इक सच्चा यहदी सै है जिदा मन परमेश्वरे सोगी सही है कने सच्चा खतना सिर्फ मूसा दे नियम-कानून मनणे नी है, पर मने दा बदलना है जडा की परमेश्वरे दी आत्मा ने होंदा है। ऐसे लोकां दी महिमा लोकां दे जरिये नी पर परमेश्वरे दिया तरफ ला होंदी है।

3 तां कोई बोली सकदा है की अगर खतना होई जाणे पर भी परमेश्वर यहदियां जो अपनांदा नी तां यहदी दा यहदी होणे दा क्या फायदा, कने खतने दा क्या फायदा? 2 हों, इदा बडा फायदा है। क्योंकि सारायां ला जरूरी गल्ल ऐ है की, परमेश्वरे दा बचन यहदियां जो दितया है। 3 अगर कुछ यहदी परमेश्वर सोगी बफादार नी भी निकले तां भी क्या है? क्या इदा मतलब ऐ है की परमेश्वरे भी अपने वायदे ला मुकरी जाणा जडा उनी यहदी लोकां ने किता? 4 नी बिलकुल भी नी! परमेश्वर हमेशा सच्च बोलदा है, कने हर इक माणु झूठा होऐ, जियां पबित्र शास्त्र च परमेश्वरे दे बारे च लिखया है, “जिसने तू अपणियां गल्लां च धर्मी होऐ कने न्याय करदे बेले तेरी जय होऐ।” 5 पर अगर साडे बुरे कम्म परमेश्वरे दी धार्मिकता दसदे न, तां असां क्या बोलणा? क्या ऐ मतलब है की परमेश्वर गुस्सा होई जाऐ कने सांझो सजा दे? (ऐ तां मै माणुए दिया रीतिया पर बोलदा है।) 6 नी बिलकुल भी नी! अगर परमेश्वर साडा यहदियां दा न्याय करणे च सही नी है, तां सै सारे संसारे दे लोकां दा न्याय कियां करणा? 7 कुछ लोक बोली सकदे न, “पर अगर मेरा झूठ परमेश्वरे दिया सच्चाईया जो उजागर करदा है कने उसयो होर जादा महिमा मिलदी है तां सै कियां मेरा न्याय करी सकदा है कने मिजो इक पापी दे स्मे च दोषी बणाई सकदा है?” 8 असां बोली सकदे न की “चला असां बुरे कम्म करन, ताकि इदे च कोई भलाई निकले?” जियां की सांझो पर ऐई दोष लगां दे भी न, कने थोडे बोलदे न की इना दा ऐई बोलणा है। पर जडे मेरे बारे च इयदियां गल्लां करदे न सै सजा दे काबिल न। 9 तां फिरी क्या होया? क्या असां यहदी लोक होर जातियां दे लोकां ला खरे न? नी बिलकुल भी नी! क्योंकि असां यहदियां कने होर जातियां दोनो पर ऐ दोष लाई बैठयो न की सै सारे लोक पाप दिया शक्तिया दे बसे च न। 10 जियां पबित्र शास्त्र च लिखया है: “परमेश्वर दे सामणे कोई भी धर्मी नी है, इक भी नी।” 11 ऐथू कोई भी माणु नी है जडा समझी सके की क्या सही है; कोई भी परमेश्वरे जो नी जाणना चांदा। 12 सारे परमेश्वरे ला दूर चली गे, कने सारे दे सारे परमेश्वरे तांई निकमे बणी गे; भलाई करणे बाला कोई भी नी, इक भी नी। 13 उना दा गला खलियो कबरा साई है जिसा ला बडी बद्बू ओदी है: क्योंकि सै अपणी जिबा ने बुरा बोलदे न, कने जडा बोलदे न सै सांणे दे जेहरे साई खतरनाख होंदा है। 14 कने उना दे भाषण श्राप कने कडवाट ने भस्यो न। 15 सै हत्या करणे तांई फुटीले न। 16 जिथू कुर्थी सै जां दे न

सै बुराई कने दुख जो लौई ओदे न। 17 सै नी जाणदे न की कियां शांति ने जि न। 18 उना च परमेश्वर दा डर है ही नी। 19 असां जांणे दे न, की व्यवस्था जडा कुछ भी बोलदी है सै उना ने ही बोलदी है, जडे व्यवस्था दे अधीन न, इस तांई की लोकां जो भाना बणने ला रोकया जाये, कने सारे संसारे दे लोक परमेश्वर दे सामणे हिसाब देणेबाले होई जान। 20 क्योंकि व्यवस्था च दितयो हुकमा जो मनणे ने कोई भी माणु परमेश्वरे सामणे धर्मी नी बणादा, क्योंकि मूसा दी व्यवस्था सांझो दसदी है की असां पापी न। 21 पर हुण बिना मूसा दी व्यवस्था दे हुकमा जो मनयो परमेश्वर दी धार्मिकता प्रकट होई है, ऐ मूसा की व्यवस्था कने परमेश्वरे दे संदेश देणेबालयां दिया कताबां च लिखया है की असां कियां परमेश्वरे दे जरिये धर्मी बणे, 22 मतलब की परमेश्वरे दे सामणे धर्मी तालू बणदे न जालू असां यीशु मसीह पर भरोसा करदे न। क्योंकि हुण यहदी कने होर जाति च कोई फरक नी है। 23 इस तांई की सारायां पाप कितया है कने परमेश्वरे दी उस महिमा ला दूर न जडी परमेश्वर दिदा है, 24 पर परमेश्वरे दे अनुग्रह ने उनी सांझो यीशु मसीह दे जरिये पाप दी सजा ला अजाद किता जडा यीशु मसीह च है, परमेश्वर सांझो बिना कुछ कितयो धर्मी घोषित करी दिन्दा है। 25 परमेश्वरे यीशु मसीह जो सूली पर चढ़ना दिता ताकि उदा खून लोकां दे पापां जो माफ करणे दा जरिया बणी सके, जडे उस पर भरोसा करदे न। परमेश्वरे ऐसा ऐ दसणे तांई किता की सै धर्मी है। पूराणे बकते च परमेश्वरे सबर रखीकरी लोकां दे पापां जो अणदिखा किता, पर हुण सै लोकां दे पापां ने निपटदा है, ताकि सै अपणी धार्मिकता दसरी सके। इयां परमेश्वर साबित करदा है की सै धर्मी है कने यीशु पर भरोसा करणे बालयां जो भी धर्मी बणादा है। 27 तां हुण ऐसा कुछ है जिस पर असां घमंड करणे? नी, ऐसा कुछ नी जिदे बारे च असां घमंड करी सकन। कुण दे नियमा दिया बजा ने? क्या साडे व्यवस्था दे कम्मा जो पूरा करणे ने? नी, पर यीशु मसीह पर भरोसा करणे दी दिया बजा ने। 28 इस तांई असां जाणदे न की परमेश्वरे सांझो यीशु मसीह पर भरोसा करणे ने धर्मी घोषित करी दितया है, ना कि मूसा दी व्यवस्था जो मनणे ने। 29 परमेश्वर सिर्फ यहदियां दा ही परमेश्वर नी है, पर होर जातियां दा भी परमेश्वर है। 30 क्योंकि इक ही परमेश्वर है, जिनी खतने बालयां जो भरोसे ने कने जिना दा खतना नी होया उना जो भरोसे दे जरिये धर्मी घोषित किता है। 31 तां क्या असां व्यवस्था जो भरोसे दे जरिये बेकार बणादे न? नी बिलकुल भी नी! पर असां तां व्यवस्था जो उसा दा सही महत्व देदे न।

4 तां असां यहदी होणे दे नाते अपने पूर्वज अब्राहमे दे बारे च क्या बोलन? की उसयो कुसा बजा ला धर्मी गिणया? 2 क्योंकि अगर अब्राहम भले कम्मा ने धर्मी बणादा, तां सै घमंड करी सकदा था, पर हुण सै परमेश्वरे सामणे अपने भले कम्मा पर घमंड नी करी सकदा। 3 पबित्र शास्त्र क्या बोलदा है? ऐ की “अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणया।” 4 कम्म करणे बाले दी मजदूरी देणा दान नी है, पर ऐ हक समझया जांदा है। 5 कुण परमेश्वर दा अनुग्रह पाणे तांई कम्म नी करदा है, पर जडा पापी लोकां जो धर्मी ठहराणे बाले परमेश्वरे पर भरोसा करदा है, उदा भरोसा उदे तांई धार्मिकता गिणया जांदा है। 6 जियां पबित्र शास्त्र च दाऊद उना आशीषां दे बारे च लिखदा है, जडियां उना लोकां जो मिलदियां न जिना जो परमेश्वरे धर्मी बणाई दिता, चाहे उना धर्मी बणने तांई कोई कम्म नी किता, दाऊद भी इना जो धन्य बोलदा है; 7 “धन्य सै न, जिना दे अधर्म परमेश्वरे माफ किते, कने जिना दे पाप भुलाई दिते। 8 धन्य न सै माणु परमेश्वर जीना दे पापां दा लेखा जोखा नी रखदा।” 9 तां क्या ऐ धन्य बचन खतने बालयां तांई ही है, या जिना दा खतना नी होया है उना तांई भी है? असां ऐ बोला दे न की पबित्र शास्त्र क्या बोलदा है, अब्राहमे परमेश्वरे दे वायदे पर भरोसा किता, कने इसी ने ही परमेश्वरे अब्राहमे जो धर्मी बणया। 10 तां सै धर्मी कालू बणया? क्या खतना होणे ला पेहले या खतना होणे बाद? अब्राहम खतना होणे ला बाद नी, पर खतना होणे ला पेहले धर्मी बणया। 11 परमेश्वरे उसयो पेहले ही अपनाई लिया था कने उसयो धर्मी घोषित करी दितया था, जबकि उदा हले भी खतना नी होया था, खतने दा निशाण उस अपनाणे दी मोहर है। इस तांई सै उना लोकां दा पूर्वज है जिना बाल भरोसा है पर उना दा खतना नी होया है। इना जो इना दे भरोसे दिया बजा ने धर्मी गिणया जांदा है। 12 कने अब्राहम उना खतना कितयो लोकां दा पूर्वज होया, जडे ना सिर्फ खतने पर आस रखदे न, पर उना बाल सियुदा ही भरोसा है, जडा साडे पूर्वज

अब्राहमे खतना करणे ला पेहले कितया था। 13 परमेश्वरे अब्राहम कने उदे बंशजा ने बायदा कित्ता की सै पुरे संसार दे वारिस होणे ने, परमेश्वरे ऐ बायदा इस ताई नी कित्ता की अब्राहमे मुसा दे हुकमा जो मनया, पर अब्राहमे जो भरोसे दिया बजा ने परमेश्वरे धर्मी बनाया। 14 क्योंकि अगर परमेश्वरे दा अब्राहम कने उदे बंशजा जो संसार देणे दा वायदा सिर्फ उना ही लोकां ताई है जडे मुसा दी व्यवस्था दे हुकमा जो मंटे न, तां भरोसा बेकार है कने परमेश्वरे दे बायदे दा भी कोई मतलब नी रिया। 15 परमेश्वर तां उना लोकां जो सजा दिन्दा जडे व्यवस्था जो पूर्ी तरा नी मंटे, पर जिथू व्यवस्था है ही नी, ओथू व्यवस्था दा उलंचन भी नी होंदा। 16 इस ताई लोकां जो परमेश्वरे दा बायदा उदे दे भरोसे दे जरिये मिल्ला। ऐ इस ताई होया की परमेश्वर दा वायदा अनुग्रह दे जरिये मिल्ले, तालू अब्राहम दे सारे बंशा बाल ऐ वायदा हो, ऐ सिर्फ उना ताई ही नी है जडे मुसा दी व्यवस्था पर चल्ते न, पर हर इक उस माणू ताई जडा अब्राहमे साईं भरोसे सोगी जिन्दगी जिंदा है, जडा असां सारयां दा पूर्वज है। 17 जियां पबित्र शाब्दां च लिखया है, “मै तिजो मतियां जातियां दा पूर्वज बनाया है” परमेश्वरे दे सामणे अब्राहम साडा पिता है। उना उस परमेश्वरे पर भरोसा कित्ता, जडा मरयां जो फिरी जिन्दा करदा है कने जडियां चीजां मोजूद भी नी न, उना दा ना इथा लेंदा है, की जियां की सै चीजां मोजूद न। 18 परमेश्वरे अब्राहम जो बोलया की सै तिजो मते सारे बंशज दिगा, पर अब्राहमे सोचया की मै बडा बुडा होई गिया है, क्योंकि उस बकत सै लगबग सौ सालां दा होई गिया था कने सारा भी बच्चे पैदा नी करी सकदी थी। तां ऐ पक्का ही था की अब्राहम कदी भी मतियां जातियां दा पिता नी बणी सकदा था, पर फिर भी अब्राहम अपने भरोसे च कमजोर नी होया कने सै लगातर भरोसा रखदा रिया कने उम्मीदा जो टूटना नी दिता। 20 कने ना ही अविश्वासी होईकरी परमेश्वरे दे बायदे पर शक कित्ता, पर भरोसे च मजबूत होईकरी परमेश्वरे दी महिमा कित्ती, 21 कने पक्का यकीन कित्ता की जिसा गल्ला दा परमेश्वरे वायदा कितया है, सै इस बायदे जो पूरा करणे दे भी काबिल है। 22 उदे भरोसे दिया बजा ने ही परमेश्वरे अब्राहमे जो धर्मी बनाया, 23 कने इस बचन कने भरोसे दिया बजा ने ही परमेश्वरे अब्राहमे जो धर्मी बनाया, “ना सिर्फ उदे ताई लिखया गिया,” 24 बल्कि साडे ताई भी जिना जो परमेश्वरे धर्मी घोषित करणा, मतलब की अगर असां परमेश्वरे पर भरोसा करणे, जिनी साडे प्रभु यीशु मसीह जो मरयां चे जिन्दा कित्ता, तां असां भी भरोसे दिया बजा ने धर्मी मन्ने जाणे। 25 यीशु मसीह साडे पापां ताई मरी गिया, कने परमेश्वरे उसयो दुबारा जिंदा कित्ता ताकि परमेश्वर सांझो धर्मी बनाए।

5 इस ताई असां भरोसे ने धर्मी बणे, क्योंकि जडा प्रभु यीशु मसीह साडे ताई कितया है, उदे जरिये असां परमेश्वरे सोगी शांति ने रेन, 2 क्योंकि साडे भरोसे दिया बजा ला यीशु मसीह सांझो इस अनुग्रह च लेईकरी आया जिथू असां हण न, कने असां पूरी हिम्मत कने खुशिया ने परमेश्वरे दी महिमा च हिस्सेदार होणा। 3 सिर्फ ऐ ही नी, बल्कि सांझो दुखां च भी खुश रेणा चाईदा, क्योंकि असां जाणदे न की दुख सेहणे ने असां होर जादा सहनशील बणदे न, 4 परमेश्वरे सांझो अपनाई लिया क्योंकि असां दुखां च सेहणा सीखी लिया है, कने परमेश्वर सांझो अपनांदा है इस ताई सांझो आस है; 5 कने आस ने सांझो शर्मिंदगी नी होंदी, क्योंकि पबित्र आत्मा जडी परमेश्वरे सांझो दितियो है उदे जरिये परमेश्वरे साडे मना जो प्यार ने भरी दितया है। 6 क्योंकि जालू असां कमजोर थे, तालू मसीह परमेश्वरे दे चुणयो बकत पर बुरे लोकां ताई मरया। 7 ऐ कुसी ताई कठिन है की कोई धर्मी माणू ताई अपनी जान देई दे, होई भी सकदा है की भले माणू ऐ ताई अपनी जान देणे दी इच्छा रखे। 8 पर परमेश्वर सांझो पर अपने प्यार दी भलाई इस तरीके ने प्रगट करदा है, की जालू असां पापी ही थे तालू मसीह साडे ताई मरया। 9 जालू असां हण धर्मी बणे क्योंकि यीशु मसीह साडे ताई मरया कने साडे पापां ताई अपना खून बहाया, तां सांझो यकीन है की मसीह सांझो परमेश्वरे दे गुस्से ला बचाणो? 10 क्योंकि जालू असां परमेश्वरे दे दुश्मन ही थे तमी उदे पुत्र यीशु दे मरणे ने साडा मेल परमेश्वरे सोगी होया, इस ताई सांझो पक्का पता है की हण साडा मेल शान्ति ने परमेश्वरे सोगी है, मसीह सांझो बचाणा क्योंकि मसीह जिन्दा है। 11 कने सिर्फ ऐ ही नी, पर हण तां साडे प्रभु यीशु मसीह दे जरिये परमेश्वरे ने साडा मेल होई गिया है, इस ताई असां परमेश्वर च खुश न। 12 इस ताई जालू इक माणू ऐ दिया बजा ने पाप संसार च आया, आदम पेहला माणू है जिसयो परमेश्वरे बनाया कने आदमे पाप कित्ता कने मरी गिया, कने जिसदी बजा

ने सै सारे लोक जडे इस संसार च पैदा होए, सै सारे मरे, क्योंकि सब पापी बणी गे। 13 मूसा दी व्यवस्था दिते जाणे ला पेहले ही लोकां पाप कित्ता, पर इसयो पाप नी गिणया क्योंकि तालू कोई व्यवस्था नी थी कने कोई नियम भी नी टूटया था। 14 तमी आदम ला लेईकरी मुसा दीकर सारयां लोकां पाप कित्ता कने सारे मरी गे, जिना आदम साईं कुसी तरा दे हुकम नी मणणे ने पाप नी कितया था। आदम दे पापे इना सारयां लोकां पर प्रभाव पाया, ठीक तियां ही जियां मसीह कित्ता जडा उदे बाद आया। 15 पर आदम दा पाप उस बरदान साईं नी है जडा परमेश्वर सांझो अपने अनुग्रह ला दिन्दा है, क्योंकि इक माणू ऐ दा पाप मते लोकां ताई मौत लेईकरी आया। पर परमेश्वरे दा अनुग्रह बडा महान है, जडा उनी सांझो दितया है, उदी कीमत मतयां लोकां ताई उसला बडी जादा है। यीशु मसीह इक माणू ऐ दे स्पे च अपने अनुग्रह ला जडा कित्ता, उनी इसयो संभव कित्ता। 16 जडा तोफा परमेश्वर सांझो दिन्दा है सै आदम दे पाप साईं नी है, क्योंकि इक पाप सजा लेईकरी आया, पर चाहे असां मते सारे पाप किते न, परमेश्वरे सांझो सै तोफा दिता जिसने असां धर्मी बणदे न। 17 क्योंकि जालू इक माणू ऐ दे पापां दिया बजा ने मौत सारे लोकां पर आई गेई, तां जिना लोकां जो अनुग्रह कने धार्मिकता दा वरदान मता सारा मिलदा है उना जो इक माणू ऐ दे, मतलब की यीशु मसीह दे जरिये हमेशा दी जिन्दगी मिलणी कने उना राज्य भी करणा। 18 इस ताई जियां इक पाप सारे माणूआं ताई सजा लेईकरी आया, तियां ही इक धार्मिकता दा कम्म भी सारयां लोकां ताई धर्मी बणने दी बजा बणी जडा जिन्दगी दिन्दा है। 19 क्योंकि जियां इक माणू ऐ दे हुकम नी मणणे ने मते लोक पापी बणे, तियां ही इक माणू ऐ दे हुकम मणणे ने मते लोकां धर्मी बणना है। 20 मूसा दी व्यवस्था दिती गेई ताकि सारे लोक जाणी सकन की सै कितणे पापी न, पर जालू लोकां पाप पर पाप किते, तां परमेश्वरे अपनी दया कने अनुग्रह होर भी जादा दसया, 21 जियां सारयां पाप कित्ता कने सारे मरी गे, तियां ही साडे प्रभु यीशु मसीह दे जरिये परमेश्वरे दे अनुग्रह ने उना जो धर्मी बनाणा कने उना जो हमेशा दी जिन्दगी देणी। (aiōnios g166)

6 तू सोचदा है, की अगर परमेश्वरे अपने अनुग्रह ने साडे पापां जो माफ करी दितया है, पर असां ऐसा ना सोचन, चला असां पाप करदे रेन ताकि अनुग्रह होर जादा हो। 2 नी बिलकुल भी नी! अगर असां पाप ताई इक बरी मरी गे तां सांझो लगातर पाप नी करणा है। 3 असां जाणदे न की जालू असां यीशु मसीह सोगी इक होंणे ताई बपतिस्मा लिया, तां असां यीशु मसीह सोगी मरी गे। 4 जालू असां बपतिस्मा लिया तां ऐ ऐसा था जियां असां मसीह सोगी मरी गे कने उस सोगी दफनाई दिते, ताकि जियां मसीहा पिता परमेश्वर दिया महिमा दे जरिये मरयां चे जिन्दा कित्ता, तियां ही असां भी नोई जिन्दगिया जो नोपे तरीके ने जिरा। 5 क्योंकि अगर असां बपतिस्मे जरिये यीशु दी मौता च उदे सोगी इक होई गे, तां पक्का है की असां उदे जिन्दे होंणे पर उदे सोगी इक होई जाणा। 6 क्योंकि असां जाणदे न की साडा पराणा पापी सभाब यीशु मसीह सोगी सूली पर चढाया गिया, ताकि शरीर दा पापी सभाब खत्म होई जाऐ, कने असां अणे जो पाप दे गुलाम नी रेन। 7 क्योंकि जालू असां मसीह सोगी मरी गे तां असां पाप दी शक्ति ला मुक्त होई गे। 8 इस ताई अगर असां मसीह सोगी मरी भी गे, तां साडा भरोसा ऐ भी है की उदे सोगी जीणा भी है, 9 क्योंकि असां जाणदे न की, मसीह मरी करी जिन्दा होया कने फिरी कदी नी मरणा है। मौत दा उस पर कोई हक नी है। 10 क्योंकि यीशु मसीहा जडा मरी गिया तां पाप ताई इक ही बरी मरी गिया; पर जडी जिन्दगी सै जी दा है, सै परमेश्वर दे आदर ताई जिंदा है। 11 इयां ही तुसां भी अपने आपे जो पापे दी शक्ति ताई मरया होया समझा, पर परमेश्वरे ताई यीशु मसीह जो इज्जत देणे ताई जिया। 12 इस ताई पापी इच्छां जो अपणिया जिन्दगिया पर राज करणा मत दिया, ताकि तुसां अपणियां पापी इच्छा दे अनुसार कम्म ना करन। 13 कने ना अपने शरीर दे अंगा जो बुरे कम्मा ताई इस्तेमाल कर, पर अपने आपे जो मरयां चे जिन्दा समझीकरी अपने आपे जो परमेश्वरे जो दिया, कने अपने शरीर दे अंगा जो धार्मिकता दे कम्मा जो पूरा करणे ताई अपनी जिन्दगी परमेश्वरे जो दिया। 14 तां तुसां पर पाप दी शक्तिया राज्य नी करणा, क्योंकि तुसां मूसा दी व्यवस्था दे अधीन नी पर परमेश्वर दे अनुग्रह दे अधीन न। 15 तां क्या होया? अगर हण असां व्यवस्था दे अधीन नी न पर परमेश्वरे दे अनुग्रह दे अधीन न, तां सांझो पाप नी करणा चाईदा। 16 तुसां ऐ जाणदे न की जालू तुसां अपने आपे जो कुसी दा गुलाम बनाई दिन्दे न, तां फिरी सै माणू तुहाडा मालिक है कने तुसां जो सै करणा चाईदा

जडा सै बोलदा है: तूसां पाप दे गुलाम बणी सकदे न, जडा तूसां जो मौता पासे लेई जांदा है, या तूसां परमेख्वे दे गुलाम बणी सकदे न, जडा तूसां जो धार्मिक जिंदगी जिणे च अगुवाई करदा है। 17 तूसां जडे पाप दे गुलाम थे, पर हुण तूसां उस शिक्षा जो मंदे न जडी तूसां जो मिल्ली है, इदे ताई मैं परमेख्वर दा धन्याबाद करदा है, 18 परमेख्वे तूसां जो पाप दी शक्ति ला अजाद करी दिता कने तूसां परमेख्वर दे गुलाम बणी गे, की सै करणे ताई जडा सही है। 19 मैं गुलामी दा ऐ उदाहरण तूसां जो इस ताई दिता ताकि तूसां असांनी ने समझी सकन की मैं क्या सिखा दा है। जियां तूसां अपने शरिर दे अंगा जो बुरे कम्म कने अपवित्रता दी गुलामी ताई देई दिता, तियां ही हुण अपने शरिर दे अंगा जो भले कम्म कने पवित्रता दे गुलाम होणे ताई देई दिया। 20 जालू तूसां पाप दे गुलाम थे, तां तूसां दी भले कम्मा जो करणे दी कोई इच्छा नी थी। 21 तूसां बुरे कम्म किते, कने तूसां हुण इना कम्मा ला शरमिदा होंदे न। तां तूसां जो क्या मिल्ला? ऐसे कम्म सिर्फ मौत लेईकरी ओदे न। 22 पर हुण पाप ला अजाद होईकरी कने परमेख्वे दे गुलाम बणी करी तूसां दे ऐसे कम्म जिन्दगी च पवित्रता लेईकरी ओदे न, कने उना दा अंत हमेशा दी जिन्दगी है। (aiōnios g166) 23 क्योंकि पाप दा नतीजा मौत है, पर सै बरदान जडा परमेख्वर सांझो दिन्दा है, सै हमेशा दी जिन्दगी है जडी सांझे प्रभु यीशु मसीह च है। (aiōnios g166)

7 हे मसीह भाईयो, तूसां जाणदे न (मैं व्यवस्था जो जाणने बालयां जो बोलदा है) की जालू दीकर माणू जिन्दा रेंदा है, तालू दीकर ही उस व्यवस्था दा अधिकार उस पर है? 2 उदाहरण ताई, व्यवस्था दे अनुसार इक माणूऐ दी घरे बाली उदी ही घरे बाली बणी की रे जालू दीकर उसा दा घरेबाला जिन्दा है, पर जालू उसा दा घरेबाला मरी गया, तां सै कुसी होरसी ने बियाह करणे ताई अजाद है, पर अगर सै अपने घरे बाले दे होंदे होए कुसी होरसी माणूऐ सोगी चली जाए, तां उसयो व्यभिचारणी बोलदे न। 4 तां हे मेरे मसीह भाईयो, जालू तूसां मसीह सोगी मरी गे, तां तूसां व्यवस्था दे अधिकार ताई भी मरी गे। हुण तूसां मसीह दे न जडा मरयां चे जिन्दा होई गया ताकि तूसां परमेख्वे ताई फलदायक जिन्दगी जी सकन। 5 क्योंकि जालू असां पापी सभाब दे बशे होंदे न, तां पापी इच्छां साडे अंदर कम्म करदियां न कने व्यवस्था इना पापी इच्छां जो जगाई दिदिया न कने मौत दा फल पैदा करणे ताई साडे शरिर च कम्म करदियां न। 6 पर असां व्यवस्था ताई मरी गे जिना सांझो गुलाम बनया था, पर हुण व्यवस्था ला अजाद होई गे न, हुण असां लिखियो व्यवस्था जो परमेख्वे दी सेबा मन्नी करी नी करदे न, पर आत्मा दियां गल्लां जो मनी करी नोए तरीके ने सेबा करी सकदे न। 7 तां असां क्या बोलणा? क्या व्यवस्था पाप है? नी बिलकुल भी नी! पर व्यवस्था ने मिंजो पता चला की पाप क्या है। मिंजो समझ आया की लालच करणा पाप है क्योंकि ऐ व्यवस्था च लिखया है, की लालच मत कर। 8 पर पापे इना हुकमा दा इस्तेमाल करिके मिंजो च हत तरह दा लालच पैदा कित, क्योंकि बिना व्यवस्था दे पाप मुर्दा है। 9 मैं तां व्यवस्था बिना जाणयो जिन्दा था, पर जालू मैं व्यवस्था जो जाणी लिया, तां पाप करणे दी इच्छां मेरे अंदर बदी गयां, कने मैं परमेख्वे ला लग होई गया। 10 कने सेई हुकम जिना जो परमेख्वे मिंजो जिन्दगी देणे ताई दितया था, इना ही मिंजो परमेख्वर ला लग करी दिता। 11 क्योंकि पापे इना हुकमा दा इस्तेमाल करिके मिंजो धोखा देई दिता, कने उनी ही मिंजो परमेख्वे ला लग करी दिता। 12 इस ताई व्यवस्था पाप नी पर पबित्र है, कने हुकम पबित्र, धर्मी कने सही है। 13 क्या व्यवस्था जडी खरी थी, मिंजो परमेख्वे ला लग होणे दी बजा बणी? सै जडी खरी थी, मिंजो परमेख्वे ला दूर करणे दी बजा बणी? नी बिलकुल भी नी। पर ऐ पाप था जिनी ऐ कित, पाप व्यवस्था जो इस्तेमाल कित जडी सही थी, ताकि सै मिंजो परमेख्वे ला लग करे, इस तरिके ने पापे दरसी दिता की सै सच्ची च क्या है, कने हुकम दरसी दिता की पाप बुरा है। 14 क्योंकि असां जाणदे न की व्यवस्था तां आत्मिक है, पर मैं शारीरिक माणू कने पाप दा गुलाम है। 15 कने जडा मैं करदा है उसयो नी जाणदा, क्योंकि जडा मैं चांदा है सै नी करदा, बल्कि सै ही करदा है, जिसला मैं नफरत करदा है। 16 कने अगर, जडा मैं नी चांदा है सेई बुरे कम्म मैं करदा है, तां मैं मनी लेंदा है की व्यवस्था खरी है। 17 तां ऐसी हालत च जडा बुरे कम्म करणे बाला है सै मैं नी, पर पाप है जडा मिंजो च बसया है। 18 क्योंकि मैं जाणदा है, की मेरे पापी सभाब च कुछ भी खरा नी है, भले कम्म करणे दी इच्छा तां मिंजो च है, पर भले कम्म मिंजो ला होंदे नी। 19 क्योंकि जिस खरे कम्मे दी

इच्छा मैं करदा है, सै तां नी करदा, पर जिना बुराईया दी इच्छा नी करदा, सेई करदा है। 20 पर अगर मैं सेई करदा है जिसदी इच्छा नी करदा है, तां इसयो करणे बाला मैं नी है, पर सै पाप है जडा मिंजो च बसया है। 21 ऐथू मिंजो इस सच दा अहसास होंदा है की जालू भी मिंजो खरा करणे दी इच्छा होंदी है, तां मैं सेई करदा है जडा बुरा है। 22 क्योंकि मैं अपने पुरे मने ला तां परमेख्वे दिया व्यवस्था ला बडा खुश रेंदा है। 23 पर मिंजो अपने शरिर दे अंगा च कोई होर ही व्यवस्था मिल्ला दी है, जडी मेरिया मने दिया व्यवस्था ला लडदी है कने ऐ शक्ति मिंजो पाप दा गुलाम बणादी है जडी हले भी मेरे शरिर दे अंगा च कम्म करदी है। 24 मैं कदिया अभागा माणू है! मिंजो इस शरिर ला कुण छुडागां, जडा मिंजो परमेख्वे ला लग करदा है? 25 मैं मने ला तां परमेख्वे दिया व्यवस्था जो मनदा, पर शरिर ला पाप दिया व्यवस्था जो मनदा है। मैं परमेख्वे दा धन्यबाद करदा है जिनी मिंजो प्रभु यीशु मसीह दे जरियो बचाई लिया।

8 इसा बजा ला हुण जडे यीशु मसीह च न, उना जो सजा दा हुकम नी है। 2 क्योंकि पबित्र आत्मा तूसां जो सै जिन्दगी दिन्दा है, जडी यीशु मसीह ला ओदी है कने सै तूसां जो पाप कने मौत ला अजाद करदी है। 3 क्योंकि जडा कम्म मुसा दी व्यवस्था साडा पापी सभाब होणे दिया बजा ने नी करी सकी, सै परमेख्वे कित, मतलब की अपने ही पुत्रे जो साडे पापी शरिर सांई बणाई करी साडे पापां ताई बलिदान होणे ताई भेजी दिता, परमेख्वे मसीह दे शरिर च पाप जो सजा दिती। 4 इस ताई की व्यवस्था जडी धर्मी होणे ताई जिना गल्लां दी मांग करदी है, पर असां पापी सभाब दे अनुसार नी पर पबित्र आत्मा दे अनुसार चली करी इना गल्लां जो पूरा करदे न। 5 क्योंकि जडे लोक पापी सभाब दे बशे च रेंदे न, सै पापी गल्लां दे बारे च सोचदे न, पर जडे पबित्र आत्मा दे बशे च रेंदे न सै उना गल्लां दे बारे च बिचार करदे न जडियां आत्मा जो खुश करदियां न। 6 अगर तूसां अपने मन जो पापी सभाबे दे बशे च रखदे न तां उदा नतीजा मौत है, पर अगर तूसां अपने मने जो पबित्र आत्मा दे बशे च रखणे तां उदा इनाम जिन्दगी कने शांति है। 7 क्योंकि पापी सभाब दे बशे च रेणा तां परमेख्वे ने बैर रखणा है, क्योंकि पापी सभाब ना तां परमेख्वे दिया व्यवस्था दे अधीन है, कने ना ही उदिया व्यवस्था दा पालन करी सकदा है। 8 कने जडे पापी सभाब दे बशे च न, सै परमेख्वे जो खुश नी करी सकदे। 9 पर जालू परमेख्वे दी आत्मा तूसां च बसदी है, तां तूसां पापी सभाब दे बशे च नी न, पर आत्मा दे बशे च न। अगर कुसी च मसीह दी आत्मा नी है तां सै मसीह दा नी है। 10 अगर मसीह तूसां च है, तां पाप दिया बजा ने शरिर मरया होणे पर भी धार्मिकता दिया बजा ने तुहाडी आत्मा जिन्दा है। 11 कने अगर परमेख्वे दी आत्मा जिना यीशुऐ जो मरी करी जिन्दा कित जडी तूसां च बलियो है; तां जिनी यीशु मसीह जो मरयां चे जिन्दा कित उनी तुहाडे मरणे बाले शरिर जो अपणिया आत्मा दे जरियो जिन्दा करे। 12 तां हे मसीह भाईयो, सांझो हुकम मनणा चांदा, पर सै नी जडा साडा पापी सभाब चांदा है की असां करन। 13 क्योंकि अगर तूसां पापी सभाब दे अनुसार जिन्दगी जीगे, तां तूसां परमेख्वे ला लग होई जाणा, अगर तूसां पबित्र आत्मा दिया शक्तिया ला सै सब करणा बंद नी करणे जडा तुहाडा पापी सभाब करणा चांदा है, तां तूसां जिन्दा रेणा। 14 इस ताई की जितणे लोक परमेख्वे दिया आत्मा दे चलणे ने चलदे न, सै ही परमेख्वे दे बच्चे न। 15 क्योंकि तूसां जो गुलामी दी आत्मा नी मिलियो है, की तूसां फिरी परमेख्वे ला डरन, पर तुहांजो परमेख्वे दी आत्मा मिल्ली है जालू उनी तूसां जो अपने बच्चे होणे ताई गोद लिया, जिसने असां हे बापू, हे पिता बोली करी पुकारदे न। 16 पबित्र आत्मा अणु ही सांडिया आत्मा सोगी गबाई दिन्दा है, की असां परमेख्वे दी ओलाद न। 17 कने अगर ओलाद न, तां वारिस न, बल्कि परमेख्वे दे वारिस कने मसीह सोगी वारिस न, अगर असां यीशु सांई दुखां जो सेहन करदे न। तां असां भी उदी महिमा च हिस्सा लेणा। 18 मिंजो पक्का यकीन है, की जिना दुख तकलिफां जो असां इस बकत सेहन करा दे न, ऐ दुख तकलीफ उस महिमा दे सामणे बडे घट न जडी सांझो परमेख्वर बादे च टेंणे बाला है, 19 क्योंकि सारी सृष्टि बाडिया आसा सोगी उस बकत दा इंतजार करा दी है, जालू परमेख्वे प्रगट करणा है की उदे बच्चे कुण न। 20 क्योंकि परमेख्वे जडा कुछ भी संसार च बनाया, सै बेकार होई गया, इस तां उनी ही होया की सै चांदे थे, पर ऐ इस तां ही होया की परमेख्वे ऐसा कित। पर फिर भी इक आस है। 21 की संसार उस दिने दा इंतजार करा दा है, जालू संसारो मौत कने बिनाश दी गुलामी ला

अजाद होई जिना कने परमेश्वरे दे बचयां दी महिमामय आजादी च हिसेदार होंगा। 22 क्योंकि असां जाणदे न, जालू ला आत्मे पाप किता, तालू ला लेइकरी हुणे दीकर जितणियां भी चीजां जो परमेश्वरे बणाया, सै पीडा ने इयां चिखदियां न जियां इक जनानी बच्चे जो जमणे बकत चिखदी है। 23 कने सिर्फ संसार ही नी जडा पीडा सेहन करा दा है, पर असां भी पबित्र आत्मा जरिये होणे बाली महिमा दा स्वाद चखणा है, हालांकि असां अंदर-अंदर ही पीडा सेहन करते न; पर असां ह्णु भी उस बकते दा इंतजार करते न जालू परमेश्वर सांझो अपने बच्चे होणे तांई उपर लेई जाणा है कने साडे शरिरे जो उना सारियां बुरियां चीजां ला छुटकारा देई देणा कने सांझो नोए शरीरां जो देईकरी साडे शरीरां जो अजाद करणा है। 24 परमेश्वरे जालू सांझो बचाया तालू सांझो ऐ आस दीती, की हल्ले दीकर सांझो सै सब कुछ नी मिलणा जिसदा परमेश्वरे वायदा कितया, इस तांई सांझो अजे भी आस है की सै सब कुछ मिलणा है। इस तांई हुण असां सब रखीकरी इंतजार करते न जालू दीकर सै मिल्ली ना जाऐ। क्योंकि कोई भी उसा चिजा जो पाणे दी इच्छा नी करता जडीं पेहेले ला ही उदे बाल है। 26 इयां ही पबित्र आत्मा भी साडी तालू सहायता करता है जालू असां अपने परमेश्वरे पर भरोसे च कमजोर होदे न, क्योंकि असां नी जाणदे की प्राथना कियां करणा चाईदी, पर पबित्र आत्मा अपु ही रोई-रोई करी साडे तांई बिनती करदी है, सै असां दस्सी नी सकदे न। 27 कने मना जो जाणने बाला परमेश्वर जाणदा है, की पबित्र आत्मा क्या बोला दी है? क्योंकि सै पबित्र लोकां तांई परमेश्वरे दिया इच्छा अनुसार बिनती करता है। 28 कने असां जाणदे न, की जडे लोक परमेश्वरे ला प्यार रखदे न, उना लोकां तांई सारियां गल्लां मिलिकरी भलाई जो ही पैदा करदियां न, मतलब की उना तांई जडे उदिया इच्छा अनुसार चुणयो न। 29 क्योंकि जिना जो उनी पेहेले ला ही चुणया है, उना तांई पेहेले ला ही निर्णय भी लिया है, की सै उदे पुत्रे सांई बणी जान ताकि सै मते भाईयां च जेटा पुत्र बणन। 30 फिरी जिना तांई परमेश्वरे पेहेले ला ही तय कितया है, उना जो ही चुणया भी, कने जिना जो चुणया है, उना जो धर्मी भी बणाया है, कने जिना जो धर्मी बणाया, परमेश्वरे अपनी महिमा उना सोगी बंडणी है। 31 तां असां इना गल्लां दे बारे च सोची करी इसी नतीजे पर ओदे न, अगर परमेश्वर साडे पासे है, तां कोई भी दुशमण सांझो हराई नी सकदा। 32 जिनी परमेश्वरे अपने इकलोते पुत्रे जो साडे तांई बलिदान करी दिता, कने साडे तांई उसयो दुशमणा दे हथे देई दिता, तां उनी सांझो सै सब कुछ भी देणा जिसदा उनी सांझो ने वायदा कितया है। 33 कोई भी परमेश्वरे दे सामणे सांझो पर दोष नी लगाई सकदा, क्योंकि सेई है जडा अपने सोगी सांझो धर्मी बणादा है। 34 कोई भी साडी बुराई नी करी सकदा, क्योंकि ऐ यीशू मसीह है, जडा साडे तांई मरी गया कने मरी करी जिन्दा होई गया था, कने जडा साडे तांई परमेश्वरे ला बिनती करता है। 35 कोई भी सांझो मसीह दे प्यार ला लग नी करी सकदा, ना ही दुख, ना ही मूसिबतां, ना ही सताया जाणा, ना ही अकाल, ना ही गरीबी, ना ही खतरा, कने ना ही तलवार इना चे इक भी नी। 36 जियां पबित्र शास्त्र च लिखया है, “परमेश्वरे तांई हर दिन लोक सांझो जानी ला मारणे दी धमकी दिन्दे। सांझो बलि देणे बालियां भेडां सांई समझया गया।” 37 पर इना सारे बुरे हालातां च उदे जरिये साडी पूरी जित है, जिनी सांझो ने प्यार किता है। 38 क्योंकि मै पक्का जाणदा है की, कुछ भी सांझो प्यार करणे बाले मसीह ला दूर नी करी सकदा, इसला कोई फरक नी पोंदा की असां जिन्दे न या मुर्दा, स्वर्गदूत, अधिकारी, कने अन्बरे दियां शक्तियां इस काबिल नी की उदे प्यार ला लग करी सकन कने जडा कुछ ह्णु होआ दा है कने जडा कुछ अग्गे होणा, कने सारे संसारे च जडा सब कुछ है इस काबिल नी है की सांझो परमेश्वरे दे प्यारे ला जडा साडे प्रभु यीशू मसीह च है लग करी सके।

9 हुण कुछ भी नी है जडा सांझो परमेश्वरे दे प्यार ला लग करी सकदा है, तां फिरी कजे इस्त्राएली लोक, मेरे यहदी भाई परमेश्वरे ला लग न? मेरा मन मेरे अपने लोकां तांई बडा दुखी होदा है, क्योंकि मै ऐशू दीकर चांदा की अपने लोकां दा उदार करणे तांई मै मसीह ला लग होई जां कने अरोपी बणी जां, मै ऐ करणे तांई तैयार भी है। मै मसीह जो गबाह मन्नी करी सच्च बोला दा है। पबित्र आत्मा कने मेरी अंतरात्मा भी ऐ जाणदे न की मै झूठ नी बोला दा है। 4 सै मेरे सांई इस्त्राएली लोक न, इना जो परमेश्वरे अपने गोद लियो बच्चे होणे तांई चुणया, महिमा, बाचा, मूसा दी व्यवस्था, परमेश्वरे दी भक्ति कने बायदा उना दी है। 5 अब्राहाम,

इसहाक कने याकूब उना दे पूर्वज न, जडे शरीरक तौर पर प्रभु यीशू मसीह दे भी पूर्वज न कने पिता परमेश्वर जडा सबना पर राज करता है, उदी महिमा युगां-युगां दीकर होंदी रे। आमीन। (aiōn g165) 6 पर ऐ नी की, परमेश्वरे अपने वायदे पुरे नी करी सकया, इस तांई होया की जडे इस्त्राएले दे बंशज न सै असल च सारे इस्त्राएली नी न; 7 कने अब्राहम दे बंशे च पैदा होणे ने ही सारे उदी सच्ची ओलाद नी बणदे, क्योंकि परमेश्वरे अब्राहम ने बोलाया “जडे इसहाक दे बंश च पैदा होदे न, सेई तेरे बंश मन्ने जाणे ना।” 8 मतलब की जडे शरिरे ने पैदा होदे न, सै परमेश्वरे दी ओलाद नी है, पर सिर्फ बायदा कितयो ओलाद ही अब्राहम दे बंश मन्ने जान। 9 क्योंकि बायदे दा बचन ऐ है, “मै अगले साल इस बकत दुबारा ओणा कने तालू सारा जो इक पुत्र होणा।” 10 कने सिर्फ ऐई नी, पर रिबका दे जुडवा जातां दा इक ही पिता था, साडा पूर्वज इसहाक। 11 कने ऐशू दीकर उना दे पैदा होणे ला पहले परमेश्वरे रिबका ने बोलाया, की उदे बडे जागते छोटे जागदे दी सेवा करणी। परमेश्वरे ऐसा इस तांई बोलाया की परमेश्वर अपनी इच्छा ने ही चुणदा है, ऐ इस तांई नी होया की इना बचयां चे कुनी कुछ कितया था, पर परमेश्वर ही है जडा ऐ चुनवा करता है। 13 जियां पबित्र शास्त्र च लिखया है, “मै याकूब ने प्यार किता, पर एसाब ने प्यार नी किता।” 14 तां असां इदे बारे च क्या बोलन? क्या परमेश्वरे उना लोकां जो चुणने च अन्याय करता है जिना जो सै चुणना चांदा है? नी बिलकुल भी नी! 15 क्योंकि परमेश्वरे मूसा ला बोलाया, “मै जिस पर दया करणा चांगा उस पर दया करणी, कने जिस कुसी पर कृपा करणा चांगा उस पर कृपा करणी।” 16 इस तांई परमेश्वर उसी जो ही चुणदा है जिस पर दया गल्ला चांदा है, परमेश्वरे दा चुणना इसा गल्ला पर निर्भर नी करता है की लोक क्या चांदा न या क्या करणे दी कोशिश करदे न। 17 क्योंकि पबित्र शास्त्र च परमेश्वरे मिस्र दे राजा फिरौन जो बोलाया, “मै तिजे इसी तांई राजा बणाया है, की तिजे पर अपनी शक्ति दस्से, कने मेरे नाए दा प्रचार सारे संसार दे लोकां च हो।” 18 कने सै जिसयो चांदा है, उस पर दया करता है, कने जिसयो चांदा है, उसयो जिदी बणाई दिन्दा है। 19 फिरी कुछ लोकां मिजे ने बोलाणा, “अगर ऐसा है तां परमेश्वर कियां बोली सकदा है की असां गलत न? क्योंकि कोई भी उसयो नी रोकी सकदा जडा सै करणा चांदा है।” 20 हे भाई, तू कुण है, जडा परमेश्वरे ने बेहस करादा है? क्या बणाई होई चीज बणाणे बाले पुच्छी सकदी है, “की तू मिजे ऐसा कजे बणाया?” 21 कुम्हारे जो क्या मीटिया पर हक नी, की सै इकी ही मीटिया ला, इक बांदा आदर तांई, कने दूजा अनादर तांई बणाऐ, 22 तां इदे च कुण देई हेरानी दी गल्ल है की परमेश्वरे अपना गुस्सा दसणे तांई कने अपनी शक्ति प्रगट करणे दिया इच्छा ला गुस्से दे भांडयां दी, जडे विनाश तांई तैयार कितयो थे, बडे सबर ने सेहन किती। 23 जिना लोकां पर परमेश्वर दया करणा, जिना जो उनी अपनी महिमा च हिस्सेदारी तांई पेहेले ही चुणया है, उना पर अपनीया बडी जादा महिमा दे धने जो प्रगट करणे दी इच्छा किती? 24 मतलब की असां पर जिना जो उनी ना सिर्फ यहदियां चे बल्कि होर जातियां चे भी चुणया। 25 जियां होर जातियां दे बारे च, परमेश्वर उदा संदेश देणेबाले होशे दिया कताबां च भी बोलदा है, “जडीं मेरी प्रजा नी थी, उना जो अपनी प्रजा बोलाणा, कने जडे मेरे प्यारे लोक नी थी, उना जो मै प्यारे बोलाणा; 26 कने इयां होणा की जिना जगा च परमेश्वरे उना जो ऐ बोलाया था, की तुसां मेरे लोक नी न, उसा ही जगा च जिन्दा परमेश्वरे उना जो अपनी संतान बोलाणा।” 27 कने परमेश्वरे दा संदेश देणेबाले यशायाह इस्त्राएल दे लोकां बारे च पकारी करी बोलदा है, “चाऐ इस्त्राएले दे लोक गिणतिया च समुद्रे दे कंडे दिया रता सांई मते भरी न, तमी उना चे थोडे ही बचना।” 28 क्योंकि प्रभुऐ जल्दी ही संसारे लोकां दा न्याय सच्चाईया ने करणा। 29 जियां परमेश्वरे दा संदेश देणेबाले यशायाह पेहेले भी बोलाया था, “अगर सबते शक्तिशाली प्रभु इस काबिल नी बणादां की साडे कुछ बंश होन, तां असां सदोम कने अमोरा शहरां दे लोकां सांई खटम होई जादे।” 30 तां असां इदे बारे च क्या बोलन? ऐ की होर जातियां अपने आप जो परमेश्वरे सोगी ठीक करणे दी कोशिश नी करदे थे, पर परमेश्वरे उना जो अपने सोगी धर्मी बणाया क्योंकि उना उस पर भरोसा किता; 31 पर इस्त्राएली लोक, जडे मूसा दी व्यवस्था जो मन्नी करी परमेश्वरे दे जरिये धर्मी होणा चांदा थे, पर सै धर्मी बणने च सफल नी होए। 32 ऐ कियां होई सकदा है? इस तांई की इस्त्राएली लोक भरोसे ने नी, पर भले कम्मा धर्मी होणा चांदा थे: उना मसीह जो नी अपनाया जिदी उस पथरे सोगी तुलना करी सकदे न जिसला लोकां जो ठोकर लगदी है। 33 जियां पबित्र शास्त्र च

लिखया है, "दिखा मै यस्शलेम शेहर च लोकां जो ठोकर लगणे तांइ इक पथर रखा दा है जिसला लोकां डेई पोणा है, कने जडा इस पर भरोसा करगा, उनी शरमिदा नी होणा।"

10 हे मसीह भाईयो, मेरे मने दी इच्छा कने इस्राएली लोकां तांइ परमेश्वरे ने ऐ मेरी प्रार्थना है, की परमेश्वर उना जो बचाई ले। 2 क्योंकि मै उना दी गबाई दिन्दा है, की सै परमेश्वरे तांइ उत्साहित रेंदे न, पर परमेश्वर दी सेवा करणे दी उना दी समझ सही नी है। 3 क्योंकि इस्राएली लोक परमेश्वरे दिया उसा धार्मिकता ला अनजाण होईकरी कने अपने ही तरीके ने धर्मी बणने दी कोशिश करदे न, उना अपने आपे जो परमेश्वरे दिया धार्मिकता दे अधीन नी किता। 4 क्योंकि व्यवस्था दा मकसद हण पूरा होई गया है की मसीह आई गया है। इस तांइ हर कोई जडा मसीह पर भरोसा करदा है, उसयो परमेश्वर धर्मी बनादा है। 5 क्योंकि मुसा व्यवस्था ला मिलियो धार्मिकता दे बारे च परमेश्वरे दे बचन च ऐ लिखया है, "की जडा माणु इना गल्लां जो मनदा है, उसयो इसी ने ही जिन्दगी मिलणी।" 6 पर जडी धार्मिकता सांझो मसीह पर भरोसा करणे ने मिलदी है, इदे बारे च पबित्र शास्त्र ऐ बोलदा है, "तू अपने मने च ऐ मत बोलदा की कुण स्वर्गे पर चढगा कने मसीह जो थले धरती पर उतारागा?" 7 यो कुण अधोलोक च उतरगा कने कुण मसीह जो मरयां चे जिन्दा करिरी उपर लेई आगा? (Abyssos g12) 8 क्या है इदा मतलब? "ऐ की परमेश्वरे दा बचन तरे बाल है, तरे मुरे कने तरे मेने च," ऐ सेई भरोसे दा संदेश है, जडा असां प्रचार करदे न। 9 इस तांइ अगर तू अपने मुरे ला यीशु मसीह जो प्रभु मन्नी लेदां है कने अपने मने ने भरोसा करे, की परमेश्वरे उसयो मरयां चे जिन्दा कितया है, तां पक्का परमेश्वरे तिजो बचाणा। 10 जालू असां अपने मने ला भरोसा करदे न तां असां परमेश्वरे असां परमेश्वर दी नकरा धर्मी बणदे न, कने जडा भरोसा असां अपने मने च कितया उसयो मुरे ला बोलदे न, तां असां बचाये जाणे न। 11 क्योंकि परमेश्वरे दा संदेश देणेबाले यशायाह पबित्र शास्त्र च मसीह दे बारे च ऐ लिखदा है, "जडा कोई उस पर भरोसा करगा उनी शरमिदा नी होणा।" 12 यहदियां कने होर जातियां च कोई फरक नी, क्योंकि परमेश्वर सारयां दा पबित्र है, कने जडे भी उसला सहायता मंगदे न, सै उना जो बचादां है। 13 क्योंकि पबित्र शास्त्र च ऐ लिखया है "जडा कोई भी उसला सहायता मंगदा है प्रभु उना जो बचादां है।" 14 पर इसला पेहले की लोक प्रभु ला सहायता मंगन, उना जो प्रभु पर भरोसा करणा है, इसला पेहले की सै प्रभु पर भरोसा करन, उना जो उदे बारे च सुणना है कने लोक प्रभु दे बारे च सुणन, तां कुसी जो उना जो यीशु मसीह पर भरोसा करणे दे बारे च दसणा है। 15 कने इसला पेहले कोई जाई करी उना जो बोले, की उस माणुऐ जो प्रचार करणे तांइ भेजणा चाईदा, इस तांइ पबित्र शास्त्र च लिखया है, "क्या ही छेल उना दे पैर न जडे शुभसमाचार लेईकरी ओदे नी।" 16 पर सारयां उस शुभसमाचार पर भरोसा नी किता। परमेश्वरे दा संदेश देणेबाले यशायाह बडिया हिम्माता ला ऐ बचन सुणया की, "जडे मिंजो नी तोपदे थे, उना मिंजो पाई लिया; कने जडे मिंजो पछडे भी नी थे, उना पर मै प्रगट होई गया।" 21 पर परमेश्वरे संदेश देणेबाले यशायाह दे जरिये इस्राएली लोकां दे बारे च बोलया है, "मै सारा दिन अपने हथ इक हुकम नी मनणे वाली कने बेहस करणे वाली प्रजा पासे फेलादां रिया की सै मेरे पासे मुडन।"

11 इस तांइ मै पछुदा है, क्या परमेश्वरे अपणिया प्रजा जो छडी दिता? नी बिलकुल नी मै भी तां इस्राएली है, अब्राहम दे बंस कने बिन्धामीन दे गोत्र दा है। 2 परमेश्वरे अपणिया उस प्रजा जो नी छडया, जिसा जो उनी पेहले ला ही चुणया था: तुसां जाणदे न की पबित्र शास्त्र परमेश्वरे दा संदेश देणेबाले एलिय्याह दे बारे च क्या बोलदा है: की सै इस्राएली लोकां दे खिलाफ परमेश्वरे ने बिनती करदा

है। 3 उनी बोलया "प्रभु जी, उना तरे संदेश देणेबालयां जो मारी दिता, कने उना तेरिया बेडिया जो डाई दितया है, मै ही सिर्फ किला बचया जडा तिजो पर भरोसा करदा है, सै मिंजो भी मारणे तांइ तोपा दे न।" 4 पर परमेश्वरे एलिय्याह ने बोलया, "मै अपने तांइ सत हजार माणुऐ जो रखया है, जडे बाल देवता दी मूर्तिया अगो नी झुके।" 5 इयां ही हण भी, परमेश्वर दे अनुग्रह ने ऐथ थोडे दे यहदी न जिना जो परमेश्वरे अपने सच्चे लोक होणे तांइ चुणया है। 6 परमेश्वरे उना जो अनुग्रह दे जरिये चुणया है, ऐ भले कम्म करणे ने नी होया है। अगर ऐ भले कम्मा ने है, तां अनुग्रह फिरी अनुग्रह नी रिया। 7 इदा नतीजा ऐ होया: की इस्राएली लोकां परमेश्वर दिया नजरा च धर्मी बणने दी कोशिश किती, पर कामयाब नी होया, जो जिना लोकां जो परमेश्वरे चुणया, सै परमेश्वरे दिया नजरा च धर्मी बणे। दुजयां जो जिडी बनाई दिता कने उना परमेश्वरे दी सुणने ला मना करी दिता। 8 जियां पबित्र शास्त्र च यशायाह लिखया है, "परमेश्वरे उना जो हले दीकर सुस्त दिमाग दितया है, उना दियां हखी तां हेन पर उना जो सच्चाई नी मिलदी कने कन्ना ला सुणदे तां हेन, पर समझदे नी न।" 9 कने राजा दाऊद बोलदा है, "मै विनती करदा है की उना लोकां दियां सारियां अशीयां उना जो खत्म होणे दी बजा बणी जा, ऐथु दीकर की सै उजडी जान कने उना जो सजा मिल्ले। 10 कने उना दियां हखी अनिया होई जान, ताकि सै दिखी नी सकन, कने हर बकत अपणी मुसीबतां च दबुई रेन।" 11 तां मै पछुदा है, की उना क्या इस तांइ: "क्या इस्राएली लोक ठोकर लगणे दिया बजा ने हमेशा तांइ खत्म होई गियो न? नी बिलकुल नी! पर उना दे अविश्वास दिया बजा ने होर जातियां जो उद्धार मिल्ला, ताकि इस्राएली लोकां जो होर जातियां ला जलन हो।" 12 अगर इस्राएली लोकां दा अविश्वास होर जातियां दी भलाई दी बजा बणदा है, तां इस्राएली लोकां दा परमेश्वरे बाल बापस ओणे पर बडा अच्छा होणा। 13 मै होर जातियां ने ऐ गल्लां बोलदा है। हण जालू मै होर जातियां तांइ प्रेरित है, मिंजो अपणी सेबकाई पर घमंड है। 14 ताकि मै कियां भी करिरी यहदी लोकां जो जलन करवाई करी उना चे केईयां जो बचाई सके। 15 क्योंकि जालू की उना दा परमेश्वरे जो छडी जाणे दिया बजा ने संसारे दे लोकां दा परमेश्वरे सोगीं मेल होया था, तां उना दा मसीह जो अपनाणा, इक मरयो होऐ माणुऐ सांइ होणा जडा दुबारा जिन्दा होई गया है। 16 मै इस्राएली लोकां दे बारे च तुसां जो इक उदाहरण दिन्दा है। ऐ साडा इस्राएली लोकां दा रिबाज है, असां जालू रोटी बणाने तांइ आटा मुनदे न, तां असां परमेश्वरे जो भेंट चढाणे तांइ मुठी भर आटा लेंदे न, अगर सै इक मुठी परमेश्वरे दी है, तां इदा मतलब है की पूरा आटा भी परमेश्वरे दा है। तियां अगर स्खे दी जड परमेश्वरे दी है, तां इदा मतलब है की स्खे दियां सारियां डालियां भी परमेश्वरे दियां न। 17 इस्राएली लोक इक अच्छे जैतून स्खे दियां डालियां सांइ न कने उना दे पूर्वज अब्राहम, इसहाक कने याकूब उन स्खे दियां जडा सांइ न। होर जातियां जंगली जैतून स्खे दियां डालियां सांइ न, जडियां कलम करी के उना बडियां डालियां दिया जगा च उस अच्छे जैतून स्खे च लाइयां न, हण सै डालियां उस स्खे दिया जडा दियां हिस्सेदार न। 18 तां तू अपने आप जो उना बडियां डालियां ला जादा मत समझदे। अगर तू जादा समझदा है, तां याद रख की तू जडा जो नी सम्भालदा, पर जड तिजो सम्भालदी है। 19 तां तू अपने मने च ऐ मत सोचदा की परमेश्वरे इस्राएली लोकां जो उना डालियां सांइ ठुकराई दिता जडियां इक स्खे ला तोडी दितियां जादियां, ताकि सै होर जातियां जो अपनाई सके, जडियां उना डालियां सांइ न जिना जो कलम कितया है। 20 ऐ सचच है, सै तां अविश्वास दिया बजा ने तोडियां, पर तू अपने भरोसे दिया बजा ने टिकी रेंदा है, इस तांइ घमंड मत कर, पर परमेश्वरे दा डर मन, 21 क्योंकि जालू परमेश्वरे असली डालियां पर दया नी किती, तां तिजो पर भी दया नी करणी। 22 इस तांइ तू परमेश्वरे दिया कृपा कने सकताई पर बिचार कर! पर जडे डेई पियो न उना पर सकताई कने तिजो पर दया, अगर तू उदिया दया च बणी रे, नी तां तू भी कटी करी लग करी देणा। 23 अगर इस्राएली लोक भी भरोसा करणा शुरू करगे तां उना जो फिरी ला कलम लगाई देणे न, क्योंकि परमेश्वर उना जो फिरी कलम करी सकदा है। 24 कुसी जंगली डालिया दा अच्छे स्खे दा हिस्सा बणना सभाभिक नी है। कने तुसां जडे यहदी नी न इक जंगली जैतून स्खे ला बडियां डालियां सांइ न कने इक अच्छे जैतून स्खे ने जुडी गियो न। पर सै यहदी इक डालिया सांइ न जडी अच्छे स्खे च बडूई थी, उना जो पक्का ही दुबारा ला अपने स्खे ने जोडया जाई सकदा है। 25 हे मेरे मसीह भाईयो, मै नी चांदा की तुसां इसा गल्ला ला अनजाण रिया, इयां ना हो की

तुसां अपणे पर घमंड करणा लगी पोन, ऐ सचच है की इस्लाम्ल दे केई लोक भरोसा करणे तांई तैयार नी न, पर जाल परमेस्वरे पर भरोसा करणे बाली होर जातियां दे लोकां दी संख्या पुरी होई जांगी, तां इस्लाम्ल दे लोकां भरोसा करणा कने परमेस्वरे बाल बापस आई जाणा। 26 इयां होणे बाद सारे इस्लामी लोकां दा उद्धार होणा, जियां पबित्र शास्त्र च लिखया है, “छुडाणे बाले यरुशलेम शेहर ला ओणा है, कने अभक्ति जो याकूबे दे बंश ला दू करणा। 27 कने उना सोगी मेरा ऐई बायदा होणा, जालू की मैं उना दे पापां जो माफ करी देणा।” 28 यहदी लोक परमेस्वरे दे दुगमण न, क्योंकि सै श्भसमाचार पर भरोसा नी करणा चांदे न, कने ऐ तुहाडे तांई फायदा बणी गया है। पर परमेस्वर उना ने प्यार करदा है क्योंकि परमेस्वरे उना जो अपनै तांई चुंगी लिया। इसा गल्ला दा परमेस्वरे उना पूर्वजां ने बायदा कितया था। 29 क्योंकि परमेस्वर अणु बरदाना ने, कने बुलाहाट ला कदी भी अणुणा मन नी बदलदे। 30 क्योंकि जियां होर जातियां दे लोकां पेहेले परमेस्वरे दा हुकम नी मनया पर इस्लामी लोकां दे हुकम नी मनणे दिया बजा ला हण तुसां पर दया होई है। 31 तियां ही उना भी हण हुकम नी मनया की तुसां पर जडी दया होदी है इसला उना पर भी दया हो। 32 क्योंकि परमेस्वरे सारायां जो हुकम नी मनणे दी आजदी दिन्दा है, ताकि परमेस्वर सारायां लोकां पर अपणी दया दस्की सके। (e1e8e9 g1653) 33 वाह, परमेस्वरे दे अनुग्रह दा धन कने अकल, कने ज्ञान कितणा ही गंभीर है! कोई भी उदे सोच बिचार जो नी जाणी सकदा, कने ना ही उदे रस्तयां जो जाणी सकदा है! 34 “प्रभु दे बिचारां जो कोई भी नी जाणी सकदा, ना ही कोई उदा सालाहकार बणी सकदा है।” 35 कने कुनी भी परमेस्वरे जो कुछ नी दितया की परमेस्वरे जो सै उसयो बापस करणा पोए। 36 क्योंकि सब कुछ परमेस्वरे ला ओदा है। उनी सब कुछ बणया है, सब कुछ उदा है। उदी महिमा युगां-युगां दीकर होदी रे। आमीन। (ai0n g165)

12 इस तांई हे मसीह भाईयो, मै तुसां ला परमेस्वरे दी दया याद करवाई करी बिनती करदा है, की तू अपणी जिन्दगीया जो जिन्दी, पबित्र, कने परमेस्वरे जो खुश करणे बाला बलिदान करिरी चढा; परमेस्वरे दी सेवा करणे दा ऐई सही तरिका है। 2 कने इस संसारे दे लोकां सांई मत बणा; पर तुहाडे सोचणे दे तरीके जो परमेस्वरे जो बदलना दे ताकि तुहाडा चाल चलण भी बदली जाए, इयां करिके तुसां जो पता लगी जाणा की परमेस्वर क्या चांदा है, कने उदिया नजरा क क्या भला, सिद्ध कने सही है। (ai0n g165) 3 क्योंकि मै उस अनुग्रह दिया बजा ला जडा परमेस्वरे ला मिंजो मिलया है, तुसां चे हर इकी जो बोलदा है, की जियां समझणा चाईदा, उसला बदीकरी कोई भी अपने आपे जो ना समझे; पर जियां परमेस्वरे हर इकी दे उदे भरोसे दे अनुसार बंडया है, तियां ही अच्छी समझा ने अपने आपे जो समझ। 4 क्योंकि जियां सांझे इक शरिरे क मते भरी अंग न, कने सारे अंगा दा कम्म इकोदिया नी है; 5 तियां ही, असां जालू मसीह पर भरोसा करदे न, असां सारे मसीह दे शरिरे दे अंग न, कने असां सारे इक दुज्जे ने जुडयो न। 6 कने जालू की उस अनुग्रह दे अनुसार जडा परमेस्वरे सांझे दितया है, सांझे लग-लग बरदान मिलयो न। तां जिसयो भविष्यदाणी दा बरदान मिलया हो, उसयो सै बोलणा चाईदा जिसदा उसयो भरोसा है की सै परमेस्वरे उसयो बोलया है। 7 अगर दुज्जयां दी सहायता करणे दा बरदान मिलया हो, तां इस कम्मे च लगी रे, अगर कोई सिखाणे बाला हो, तां सिखाणे च लगी रे; 8 अगर कुसी जो लोकां जो उत्साहित करणे दा बरदान मिलया हो, सै उत्साहित करणे च लगी रे, अगर कुसी जो दुज्जयां दी जरूरततां जो पूरा करणे दा बरदान हो, तां उस दान जो जादा ला जादे दे कर, अगर कुसी जो अणुवाई करणे दा बरदान मिलया हो, तां सै पुरी लगन ने करे, जडा दया करे, सै खुशिया ने दया करे। 9 दुज्जयां ने प्यार करणे दा दिखबा ना करे, बुराईया ने नफरत करा, जडा परमेस्वरे दिया नजरा क अच्छा है, उसयो करणे च लगी रिया। 10 परिवारे सांई इक दुज्जे ने प्यार करा; अपु चे इकी दुज्जे दी इज्जत बदीकरी करा। 11 सकत मेहनत करा कने आलसी मत बणा; उत्साह क बणी रिया, पुरे मने ने प्रभु दी सेवा करदे रिया। 12 तुहाडे बाल जडी आस है, उदे क खुश रिया; कला कलेश च सबर रखा, हर बकत प्राथना च लगी रिया। 13 पबित्र लोकां जो जडा कुछ जरूरी हो, उना दी सहायता करा; मेहमाना दा आदर सक्कार करदे रिया। 14 अपयों जो परेशान करणे बालयां जो आशीष दिया; आशीष दिया पर शप नी। 15 खुशी मनणे बालयां सोगी खुशी मना, कने रोंणे बालयां सोगी रोआ। 16 इक दुज्जे दा उतणा ही ध्यान रखा जितणा की

अपणा रखदे न; घमंड मत करा, पर गरीबां ने मिली जुली करी रिया; अपने आपे जो अकलमंत्र मत समझा। 17 बुराईया दे बदले कुसी ने बुराई मत करा; जडियां गल्लां सारे लोकां तांई खरियां न, उना दी चिंता करा। 18 जिथू दीकर होई सके, तुसां सबना लोकां सोगी मेल जोल रखा। 19 हे प्यारो अपना बदला मत लेंदे; पर परमेस्वरे जो अपने तांई बदला लेणा दिया, क्योंकि पबित्र शास्त्र च प्रभु बोलदा है, “बदला लेणा मेरा कम्म है, प्रभु बोलदा है मैं ही बदला देणा।” 20 पर पबित्र शास्त्र च ऐ भी लिखया है, “अगर तेरा दुगमण भूखा है तां उसयो खाणा दे, अगर प्यासा है तां उसयो पाणी पिया; क्योंकि इयां करणे ने तू उसयो शर्मिंदा करी देणा।” 21 बुराईया जो अपने पर जितणा मत दिया पर भलाईया ने बुराईया जो जीती लिया।

13 हर इक माणु शासन दे अधिकारियां दे अधीन रे; क्योंकि सारे अधिकार परमेस्वर दिया तरफा ला होंदे न; कने जडे अधिकार न, सै परमेस्वरे ही दितयो न। 2 इस तांई जडा कोई ऐसे लोकां दा बिरोध करदा है जिना बाल शासन करणे दा अधिकार है, सै परमेस्वरे दे नियमा दा बिरोध करदा है, कने बिरोध करणे बालयां जो सजा मिलणा। 3 क्योंकि अगर कोई अच्छे कम्म करदा है तां, उना जो अधिकारियां ला डरने दी जरूरत नी है; अगर सै बुरे कम्म करदा है तां उसयो डरने दी जरूरत है, अगर तुसां अधिकारियां ला उतणा नी करे न तां भले कम्म कम्म जिसला सै तुहाडी तरीफ करन। 4 क्योंकि अधिकारी लोक तेरिया सहायता तांई परमेस्वरे दे सेवक न। पर अगर तू बुराई करे, तां तू डर; क्योंकि अधिकारियां बाल तुसां जो सजा देणे दा हक है कने सै परमेस्वरे दे सेवक न, जिना जो इस तांई भेजया है की सै उना लोकां जो सजा देन जडे गलत कम्म करदे न। 5 तुसां जो ऐसा सिर्फ सजा ला बचणे तांई ही नी करणा चाईदा, पर इस तांई भी की तुहाडी अंतरात्मा साफ रे। 6 इस तांई करी भी दिया, क्योंकि शासन करणे बाले परमेस्वरे दे सेवक न, कने हमेशा अपणी जिम्मेबारियां जो निभाणे क अपणी जिन्दगी लाई दिन्दे न। 7 इस तांई जिसयो जडा मिलणा चाईदा, तुसां जो सै उसयो देणा चाईदा; जिसयो कर चाईदा, उसयो कर दिया, जिसयो चुंगी चाईदी, उसयो चुंगी दिया; जिसला डरणा चाईदा उसला डरा; जिसदी इज्जत करणा चाईदी उदी इज्जत करा। 8 तुसां सारायां जो सिर्फ इक ही गल्ला दा कर्जदार होणा चाईदा कने सै ऐ है, की तुसां सारे इक दुज्जे ने प्यार रखा; क्योंकि जडा दुज्यां ने प्यार रखदा है, उनी ही व्यवस्था पुरी कीती है। 9 क्योंकि मूसा दी व्यवस्था क मते हुकम न, “व्यभिचार नी करणा, हत्या नी करणी, चोरी नी करणी, लालच नी करणा,” इना जो छडी के होर कोई भी हुकम हो तां सारायां दा निचोड इस हुकम च है, “की जितणा अपने आपे ने प्यार करदे न, दुज्जयां ने भी उतणा ही प्यार करा।” 10 प्यार पडोसियां दी कुछ बुराई नी करदा, जडा प्यार करदा है, सै व्यवस्था जो पूरा करदा है। 11 तुसां चे हर इक जणे जो इक दुज्जे ने प्यार करदे रेणा चाईदा क्योंकि सै बकत नेडे है, जालू परमेस्वरे सांझे इसा बुरिया दुनियां ला बचणा है। जालू असां पैली बरी यीशु मसीह पर भरोसा किया, उस बकते ला तां ऐ होर भी नेडे है। इसयो समझीकरी तुसां जो अपणी निंदा ला जागणा कने साबधान रेणा चाईदा। 12 “इसा बुरी दुनिया च रेणे दा साडा बकत लगभग खत्म होई गया है इक रात सांई, जडी लगभग खत्म होई गेई है, कने सै बकत भी नेडे है जालू मसीहे बापस ओणा है।” सांझे उना चीजां जो भी करणा बंद करी देणा चाईदा जडियां बुराईया ने जुडियां न, कने सांझे लौई च इस्तेमाल होणे बाले हथियारां दा इस्तेमाल करणा चाईदा। 13 असां जो लौई च रेणेबाले लोकां सांई अपना चाल चलन ठीक करणा चाईदा, ना की खेलाणे कूदणे च, ना खाणां पीणे च, ना व्यभिचार क, ना लूचापन क, कने ना ही लडाई झगडे कने जलन च। 14 पर प्रभु यीशु मसीह तुहाडा कवच बणी जा, ताकि तुहाडी रक्षा करी सके, कने पापी सभाव दियां इच्छां जो पूरा करणे दी कोशिश मत करा।

14 जडा मसीह भाई भरोसे क कमजोर है उदियां मानयता दे बारे च कुसी भी शके दे विना ही अपनाई लिया, उदे सोगी बेस मत करा की क्या करणा चाईदा या क्या नी करणा चाईदा। 2 क्योंकि इकी जो भरोसा है, की सब कुछ खाणां ठीक है, पर जडा भरोसे क कमजोर है, सै सिर्फ साग पते ही खांदा है। 3 जडे मास खांदे न, सै मास नी खाणे बालयां जो नीच ना समझन कने मास नी खाणे बाला, मास खाणे बालयां पर दोष ना लाए; क्योंकि परमेस्वरे दोनो जो अपनांदा है। 4 इस तांई तिजो कुसी दे भी सेवके दा न्याय नी करणा चाईदा, उदा सफल होणा या नी होणा दोनो उदे मालिके ने ही सम्बन्ध रखदा है, उनी पक्का ही सफल

होई जाणा क्योंकि प्रभु उसयो सफल करी सकदा है। 5 इयां ही कोई तां इक दिने जो दुज्जे दिने ला बढिया मंदा है, कने कोई सारे दिना जो इकोदे मंदा है, हर इक जो यकीन होणा चाईदा की जडा सै सोचदा है सै सही है या नी। 6 जडा कोई कुसी दिने जो मनदा है, सै इस ताई करदा है क्योंकि सै प्रभु दी इज्जत करणा चांदा है, जडे मास खांदे न, सै भी प्रभु ताई खांदे न, क्योंकि सै परमेश्वरे दा धन्यवाद करदा है, कने जडा मास नी खांदा है, सै प्रभु ताई नी खांदा है कने परमेश्वरे दा धन्यावाद करदा है। 7 असां सारे प्रभु दे न। इस ताई साडी जिन्दगी च कने साडिया मौत च सांझो सिर्फ प्रभु जो खुश करणा चाईदा ना की अपु जो। 8 क्योंकि अगर असां जिंदे न, तां प्रभु ताई जिंदे न, अगर असां मरदे न, तां प्रभु ताई मरदे न; तां असां जिन या मरन, असां प्रभु दे ही न। 9 क्योंकि मसीह इसी ताई मरया कने फिरी जिन्दा होई गया क्योंकि सै सेई है, सै जिन्दे कने मरयो दोनो दा प्रभु है। 10 तु कजो अपने मसीह भाईए पर दोष लगांदा है? या तु कजो अपने मसीह भाई जो बुरा समझदा है? साडा सारयां दा परमेश्वरे न्याय करणा। 11 क्योंकि पबित्र शास्त्र च लिखया है, “प्रभु बोलदा है, मैं अपनी जिन्दगी दी कसम खांदा है की हर इकी माणुए मेरे सामणे गोडे टेकणे न, कने हर इक माणुए परमेश्वरे जो अपनाणा।” 12 असां चे हर इकी जणे जो अपणे-अपणे कम्मा दा लेखा परमेश्वरे जो देणा पोंणा। 13 तां असां अग्रे ला इकी दुज्जे पर दोष नी लान, पर तुसां ऐई ठांगी लिया की कोई भी अपने भाई या बेहणा दे पाप करणे दी बजा ना बणे। 14 मैं जाणदा है, कने प्रभु यीशु ला मिजो ऐ पक्का होया है, की सारे खाणे बालियां चीजां ठीक न, पर जडा उसयो अशुद्ध समझदा है, उदे ताई अशुद्ध है। 15 अगर तेरा भाई या बेहण तेरे खाणे दिया बजा ला उदास होंदा है तां तेरे अंदर प्रभु दा प्यार नी है, तां अपने खाणे दिया बजा ला उदा विनाश मत कर, जिंदे ताई मसीह मरी गया था। 16 इस ताई भले ही जडा तुसां करा दे न सै खरा है, पर अगर कोई उसयो बुरा मनदा है, तां उस कम्मे जो मत करा। 17 क्योंकि परमेश्वरे दा राज्य सिर्फ खाणे पिणे दे बारे च नी है, पर पबित्र आत्मा च धार्मिकता, शांति कने खुशी च है। 18 जडा कोई इस तरीके ने मसीह दी सेवा करदा है, परमेश्वर उसला खुश होंदा है कने लोक भी उदे बारे च खरा बोलदे न। 19 इस ताई सांझो हमेशा सेई करणे दी कोशिश करणी चाईदी जडा लोकां बिच शांति दी बजा बणे कने इक दुज्जे जो भरोसे च मजबूत करे। 20 तुहाडे खाणे पिणे दिया चिजां ला परमेश्वरे दा कम्म ना बिगडे, सब कुछ ठीक तां है, पर कुछ ऐसी चीज खाणा गलत है अगर सै दुज्जे माणुए जो पाप करणे दी बजा बणे। 21 खरा तां ऐ है, की तु ना मांस खाये, कने ना दाखरस पिऐ, कने ना कुछ ऐसा करे, जिसने तेरा भाई या बेहण पाप करे। 22 तुसां भरोसा करी सकदे न, की तुसां जडा करा दे न, उस सोगी कुछ भी गलत नी है, पर इसयो अपने कने परमेश्वरे दे बिच रखा। धन्य है सै, जडा उसा गल्ला च, जिसयो सै ठीक समझदा है, अपने आप जो दोषी नी बणादा। 23 पर साडे मने च कुछ भी खाणे दे बारे च शक है कने आखरी च अगर असां फिरी उसयो खाई लेंदे न, तां असां गलत न, क्योंकि सांझो जडा साडे मने च भरोसा है उदे अनुसार नी किता है, कने अगर तुसां कुछ सै करदे न जडा तुसां जो लगदा है की ठीक नी है, तां तुसां पाप करदे न।

15 असां जडे भरोसे च पक्के न, असां जाणदे न, की इना गल्लां ला कुछ खास फरक नी पोंदा है, पर असां सिर्फ अपने आप जो खुश करणे ताई ऐसा नी करी सकदे। सांझो उना लोकां दे शक कने कमियां दे बारे च बिचार करणा चाईदा जडे इना गल्लां जो गलत मंदे न। 2 असां चे हर इक जो ऐसा करणा चाईदा जडा साथी मसीह भाई या बेहणा जो खुशी दे कने दुज्जयां जो भरोसे च मजबूत करणे च सहायता करा। 3 क्योंकि मसीहे अपने आप जो खुश नी किता, पर जियां पबित्र शास्त्रां च लिखया है, “तेरी निंदा करणे बालयां मेरी निंदा भी किती।” 4 जितपियां गल्लां पेहले ला पबित्र शास्त्रां च लिखियां न, सै साडिया ही शिक्षा ताई लिखियां न ताकि असां सबर कने पबित्र शास्त्र ला मिलणे बाले होसले दे जरिये आस रखी सकन ताकि परमेश्वरे जडा बायदा कितया था, सै करणा। 5 मैं प्राथना करदा है की परमेश्वर तुसां जो सबर कने उत्साहित करे, की तुसां यीशु मसीह सांई बणी करी अपु च इक जुट होईकरी रेन। 6 ताकि तुसां सारे सोगी मिली करी साडे प्रभु यीशु मसीह दे पिता परमेश्वरे दी महिमा करन। 7 इस ताई इक दुज्जे जो अपनाई लिया जियां मसीहे तुसां जो अपनाई लिया है; ताकि लोक परमेश्वरे दी तारीफ करन। 8 मैं बोलदा है, की जडे बायदे पूर्वजां जो दितयो थे,

उना वायदयां जो सच्च करणे ताई कने ऐ दसणे ताई की परमेश्वर भरोसे दे लायक है, मसीहा यही लोकां दा सेवक बणया। 9 कने होर जातियां भी परमेश्वरे दी दया दिया बजा ने परमेश्वरे दी स्तुति करन, जियां पबित्र शास्त्र च लिखया है, “इस ताई मैं कने होर जातियां दे लोकां च तेरी स्तुति करांगा, कने तेरे भजन गांगा।” 10 पबित्र शास्त्र च ऐ भी लिखया है, “होर जातियां दे सारे लोक, परमेश्वरे दी प्रजा सोगी खुशी मना।” 11 कने फिरी ऐसा भी लिखया है, “हे होर जातियां दे सारे लोको, प्रभु दी स्तुति करा; कने हे राज्य-राज्य दे सारे लोको; उदी स्तुति करा।” 12 कने फिरी परमेश्वरे दा संदेश देणेबाला यशायाह भी बोलदा है, “यिंशे दी इक जड पैदा होणी है, कने होर जातियां पर शाशन करणा, उस पर होर जातियां दे लोकां आस रखणी की उनी सांझो बचाणा।” 13 मैं प्राथना करदा है की परमेश्वर जडा साडा दाता है, तुसां जो पूरे तरीके ला खुशी कने शांति दा आनंद लेणे ताई सहायता करी सके, ताकि पबित्र आत्मा दिया शक्तियां ने तुहाडी आस बढदी जा। 14 हे मेरे मसीह भाईयो; मैं अपु भी तुसां दे बारे च पक्का जाणदा है, कने तुसां भी अच्छे ने जाणदे न की परमेश्वर क्या चांदा है, की तुसां जो क्या करणा चाईदा कने इक दुज्जे जो सिखाई सकदे न। 15 तमी मैं कुथी-कुथी तुसां जो याद दिलाणे ताई तुसां जो बडी हिम्मत करिके लिखया है, ऐ उस अनुग्रह दिया बजा ने होया है, जडा परमेश्वरे ला मिजो मिलया है। 16 ताकि मैं होर जातियां ताई मसीह यीशु मसीह दा सेवक होईकरी मैं इक याजक सांई परमेश्वरे ला मिलियो शुभसमाचार सुणयो दी सेवा करदा है; ताकि होर जातियां जो परमेश्वरे दे सामणे भेट दे स्पे च दिलाया जाऐ जिसने सै खुश है, कने जिना जो पबित्र आत्मा पबित्र बणाया है। 17 मैं यीशु मसीह दिया बजा ने हर इक उसा गल्ला दे बारे च जडी परमेश्वरे दी सेवा ने जुडियो है उसा पर घमंड करी सकदा है। 18 क्योंकि जडा मसीह मेरे ताई कितया है, इसा ही बजा ने मैं ऐ हिमता ने बोली सकदा है की मैं होर जाति दे लोकां जो परमेश्वरे दे हुक्मा दा पालन करबाणे दे काबिल है। जालू सै मेरियां गल्लां जो सुणदे न कने मेरे कम्मा जो दिखदे न तां सै यीशु मसीह पर भरोसा करदे न। 19 पबित्र आत्मा दे जरिये मिजो दितियो शक्ति ने मैं अनोखे कम्म कने चमत्कार करदा है, इस ताई जिथू भी मैं यरूशलेम ला इलिरिकम दीकर गया है, ओथू मैं सारे लोकां जो, यीशु मसीह दे बारे च शुभसमाचार सुणादा है। 20 पर मेरे मने दी इच्छा ऐ है, की शुभसमाचार दा प्रचार उना जगां च हो, जियथू यीशु मसीह दे बारे च हले दीकर सुणया ना हो; मैं ओथू शुभसमाचार दा कम्म नी करी सकदा जिथू कुनी होरनी पेहले ही शुरू करी दितया हो। 21 मैं उसा गल्ला जो पूरा करणा चांदा है जडा पबित्र शास्त्र च लिखया है, “जिना जो शुभसमाचार दे बारे च दसया ही नी है, उना दिखणा है कने जिना कदी उदे बारे च सुणया नी है, उना भी समझणा।” 22 ऐ सेई बजा है की तुसां ने मिलणे ताई मेरे ओणे च मुशकिल ओंदी रेई। 23 पर हुण इना प्रदेशां च, मैं अपना कम्म पूरा करी लिया है, कने बडे सालां ला मिजो तुहाडे बाल ओणे दी इच्छा है। 24 इस ताई जालू मैं इसपानिया देश जो जांगा तां तुहाडे बाल होंदा जांगा क्योंकि मिजो आस है, की उस यात्रा च तिजो ने मिलले, कने तुहाडे सोगी संगती करिके खुश होई जां, मैं चांदा है की तुसां मिजो मेरी इसपानिया देश दी यात्रा ताई सहायता करन। 25 पर हुण तां मैं परमेश्वरे दे पबित्र लोकां ने मिलणे ताई यरूशलेम शहर जो चलया है। 26 क्योंकि मकिदूनिया कने अरखाया प्रदेशे दे लोकां ऐसा करणा इक खरी गल्ल समझी, की जडे यरूशलेम शहर दे परमेश्वरे दे लोक न कने गरीब न उना ताई कुछ चंदा भेज न। 27 उना ऐ खुशिया ने कितया है, सै यरूशलेम शहरे दे लोकां दे कर्जदार न, क्योंकि होर जातियां जो यरूशलेम शहर च रेणेबाले विश्वासियां ला खुशाखबरी दी आत्मिक आशीषां मिलियां न, इस ताई उना जो लगदा है की इदे बदले च उना दी कुछ चंदा देईकरी सहायता करी सकदे न। 28 इस ताई मैं सबते पेहले यरूशलेम शहर चलया है ताकि उना जो ऐ गेटेरया चंदा देई सके। उदे बाद, फिरी मैं रोम देश च आई करी तुसां ने मिलणे बाद इसपानिया देश जो जाणा। 29 कने मैं जाणदा है, की जालू मैं तुहाडे बाल ओणा, तां मसीह दी खास आशीष जो तुहाडे सोगी बंडगा। 30 कने हे मसीह भाईयो; प्रभु यीशु मसीह च साडे भरोसे कने पबित्र आत्मा सांझो जडा प्यार दितया है उदिया बजा ने, मैं तुसां ने बिनती करदा है की तुसां मेरे ताई परमेश्वरे ला बडी इमानदारियां ने प्राथना करा। 31 की मैं यहूदिया प्रदेशे दे अविश्वासियां ला बची रे, कने इस ताई भी प्राथना करा की ओथू दे विश्वासी भी मेरे इस तोफे जो ग्रहण करी लेन जडा मैं अपने सोगी यरूशलेम शहर जो लेई चलया है। 32 कने मैं परमेश्वरे दिया इच्छे ने तुहाडे बाल खुशिया ने आई करी तुहाडे सोगी अराम करे।

33 मैं प्राथना करता हूँ की परमेश्वर, जड़ा शांति दिन्दा है, तुसां सारयां सोगी हो।
आमीन।

16 मैं तुसां ने फीबे ताई बिनती करता हूँ, जड़ी साडी साथी विश्वासी बेहण
है कने क्रिखिया शेहर दिया कलीसिया दी सेविका है, मैं चांदा है की तुसां
इसा दी इज्जत करा। 2 जड़ा प्रभु दा है, उदा स्वागत करा; कने जिसा गल्ला च
उसा जो तुहाडी सहायता चाईदी होगी, तां उसा दी सहायता करा; कयोकि उना
मतयां दी सहायता कितियो है कने मेरी भी। 3 बेहण प्रिस्का कने उसा दे घरे बाले
अक्विला जो मेरी तरफा ला नमस्कार जडे यीशु च मेरे सोगी प्रभु दी सेवा करदे
न। 4 उना मेरी जान बचाणे ताई अपनी जान खतरे च पाई थी, कने सिर्फ मैं ही नी
पर होर जातियां दियां सारियां कलीसियां भी उना दा धन्यवाद करदियां न। 5
कने उसा कलीसिया जो भी नमस्कार जड़ी उना दे घरे च गिठी हौदी है। मेरे
प्यारे इपेनितुस जो नमस्कार जड़ा आसिया प्रदेश ला मसीह पर भरोसा करणे
बाला पेहला माणु है। 6 मरियम जो नमस्कार, जिना तुहाडे ताई बडी मेहनत
कितियो है। 7 भाई अन्दस्निकुस कने बेहन युनियास जो नमस्कार, जडे मेरे
यहदी विश्वासी भाई न, कने जडे मेरे सोगी जेला च थे, कने प्रेरित उना जो अच्छे
ने जाणदे न, कने मिजो ला पेहले मसीह पर भरोसा करदे थे। 8 अम्पलियातुस
जो नमस्कार, जड़ा प्रभु च मेरा प्यारा भाई है। 9 उरबानुस जो नमस्कार, जडे
मसीह च साडे सोगी प्रभु दी सेवा करता है, कने मेरे प्यारे भाई इस्तखुस जो भी
नमस्कार। 10 अपिल्लेस जो नमस्कार, जड़ा परखे जाण बाद भी मसीह पर
भरोसा करता रिया। अरिस्तुबुलुस दे परिवारे जो नमस्कार। 11 मेरा रिशतेदार
यहदी भाई हेरोदियोन जो मेरा नमस्कार। नरकिस्सुस दे परिवारे दे लोकां जो मेरा
नमस्कार, जडे प्रभु यीशु मसीह जो मंदे न, 12 बेहण त्रुफेना कने बेहण त्रुफोसा जो
मेरा नमस्कार, जडियां प्रभु दी सेवा ताई मेहनत करदियां न। प्यारी बेहण पिरसिस
जो मेरा नमस्कार जिना प्रभु च बडी मेहनत किती। 13 स्कुस जो जिसयो प्रभुए
अपणी सेवा ताई चुणया है, कने उदी माता जो भी जड़ी मेरे ताई भी माता साई है,
दोनो जो मेरा नमस्कार। 14 असुंक्रितुस कने फिलगोन कने हिर्मस कने पत्रुबास
कने हिमास कने उदे सोगी दे विश्वासी भाईयां जो मेरा नमस्कार। 15 फिल्लुगुस
कने यूलिया कने नेर्युस कने उदी बेहन, कने उलुम्पास कने उदे सोगी दे सारे
परमेश्वरे दे लोकां जो मेरा नमस्कार। 16 अपु चे इक दुज्जे जो गले लाईकरी
नमस्कार करा: तुसां जो मसीह दी सारी कलीसियां दिया तरफा ला नमस्कार। 17
हुण हे मसीह भाईयो, मैं तुसां ने बिनती करता हूँ, की जडे लोक कलीसिया च इक
दुज्जे ने लडाई झगडा करदे न कने जिना दिया बजा ने दुज्जयां लोकां दा भरोसा
खत्म होई जांदा है, ऐ लोक उसा सच्ची शिक्षा दे खिलाफ चलदे न जड़ी तुसां जो
मिलियो है, ऐसे लोकां ला साबधान कने दूर रिया। 18 कयोकि ऐसे लोक साडे
प्रभु यीशु मसीह दी नी पर अपने आप दी सेवा करदे न; सै छेल-छेल गल्लां करी
के लोकां दी चापलूसी करदे न, इयां करी के सै सीधे-साधे लोकां जो धोखा दिन्दे
न। 19 हर कोई जाणदा है की तुसां कितणे अच्छे ला प्रभु दे हुकम मंदे न; इस ताई
मिजो तुहाडे बारे च खुशी हौदी है; पर मैं ऐ चांदा है, की क्या खरा है ऐ जाणने
ताई बुद्धिमान न, पर बुराईयां ताई भोले बणी रिया। 20 शांति दे परमेश्वरे शैताने
जो तुहाडे अधीन करी देणा। मैं प्राथना करता हूँ की साडे प्रभु यीशु मसीह दा
अनुग्रह हमेशा तुसां सबना पर हौंदा रे। 21 तीमुथियुस मेरे सोगी कम्म करणे
बाले दा, कने लुकियुस कने यासोन कने सोसिपतुस मेरे यहदी भाई दा, तुसां जो
शुभकामनाए दे दा है। 22 मैं तिरितियुस जड़ा पौलुस ताई ऐ चिडी स्तिखा दा है,
अपणी शुभकामनाए तुसां जो भेजा दा है। मैं भी प्रभु दा इक सेवक है। 23 गयुस
भी तुसां जो अपनी शुभकामनाए भेजा दा है। मैं भी इदे घरे रेंदा है जिथु कलीसिया
गिठी हौदी है। इरास्तुस जड़ा इस शेहरे दा भण्डारी है, कने साडे भाई वचारतुस
भी तहांजो अपनी शुभकामनाए भेजदा है। 24 मैं प्राथना करता हूँ की साडे प्रभु
यीशु मसीह दा अनुग्रह तुसां पर रे। 25 हुण सारी महिमा परमेश्वरे जो मिल्ले जड़ी
तुसां जो मजबूत बणाणे च काबिल है कने जिस शुभसमाचार दा मैं प्रचार करता हूँ,
इस संदेश च यीशु मसीह अपनी उस योजना जो होर जातियां ताई प्रगट कितया है,
जडी शुरू ला गुप्त थी। (aiōnios g166) 26 पर हुण प्रगट होईकरी हमेशा दे
परमेश्वरे दे हुकमे ने परमेश्वरे दे संदेश देणेबालयां दियां कताबां दे जरिये सारियां
होर जातियां जो दसया है, की सै भरोसे ने हुकम मनणे बाले होई जान। (aiōnios

g166) 27 उसी इकमात्र बुद्धिमान परमेश्वरे दी यीशु मसीह दे जरिये युगां-युगां
दीकर महिमा हौदी रे। आमीन। (aiōn g165)

1 कुरिन्थियों

1 मैं, पौलस जडा प्रभु यीशु दा प्रेरित होणे ताई परमेश्वरे दिया इच्छा ला चुणया है कने मैं ऐथु साडे मसीह भाई सोस्थिनेस सोगी है। **2** मैं ऐ चिट्ठी परमेश्वरे दिया कलीसिया जो लिखा दा है, जडी कुरिन्थुस शहर च है, मतलब की उना लोकां जो जिना जो परमेश्वरे यीशु मसीह सोगी इक करिरी अपने लोक होणे ताई लग कितया है कने उनी तुहांजो अपने पबित्र लोक होणे ताई सदया है; उनी तुहांजो तियां ही पबित्र कितया है, जियां सै हर जगा दे लोकां जो पबित्र करदा है जडे यीशु मसीह पर भरोसा करदे न, जडा साडा सारयां दा प्रभु है। **3** मैं प्रथना करदा है की साडे पिता परमेश्वरे कने प्रभु यीशु मसीह तुहांजो अनुग्रह कने शांति दे। **4** मैं तुहाडे बारे च अपने परमेश्वरे दा हमेशा धन्यवाद करदा है, क्योंकि उनी अपने अनुग्रह ला तुसां जो यीशु मसीह च इक करी दिता कने मतियां सारियां आशीषां दितियां। **5** मसीह सोगी इक करणे दा मतलब ऐ है, की परमेश्वरे तुसां जो सै बडा जादा दिता जिदी तुहांजो जरूरत थी, खासकर, उदा संदेश सुणाणे कने उदे बचन दे ज्ञान दिया कने ई आत्मिक आशीषां दितियां। **6** इना आत्मिक आशीषां ला जडियां परमेश्वरे तुहांजो दितियां न, तुहांजो साबित किता की मसीह दे बारे च संदेश सच्चा है। **7** कने इसा बजा ला पबित्र आत्मा तुहांजो सै सारे हुनर दिते जिना दी तुहांजो जरूरत थी, क्योंकि तुसां प्रभु यीशु मसीह दे मुडी ओणे दा इंतजार करा दे थे। **8** कने परमेश्वरे तुसां जो आखरी दीकर भरोसे च मजबूत करणा, की तुसां साडे प्रभु यीशु मसीह जो धरती पर मुडी ओणे दीकर निर्दोष बणी रेन। **9** परमेश्वरे ऐसा करणा, क्योंकि जडा सै बोलदा है उसयो पूरा करणे ताई सै भरोसे दे काबिल है, कने उनी तुहांजो अपने पुत्र यीशु मसीह सोगी रिशता बनाणे ताई सदया है। **10** हे प्यारे भाईयो, मैं साडे प्रभु यीशु मसीह दे अधिकारे ला तुहांजो ला बिनती करदा है, की तुसां सब इक दुजे सोगी सेहमती रखा, कने तुसां च फूट ना होऐ, पर इक ही मन कने इक ही सोच च होईकरी मिली करी रिया। **11** क्योकिं ताई भेरे मसीह भाईयो, खलोऐ दे परिबारे दे लोकां मिंजो तुहाडे बारे च दसया है, की तुसां च झगडे होआ दे न। **12** मेरे बोलणे दा मतलब ऐ है, की तुसां चे कोई अपने आपे जो बोलदा है की मैं "पौलस दा चेला है," कोई बोलदा, "अपुल्लोस दा चेला है," कोई बोलदा, "केफा दा," कोई बोलदा, "मसीह दा चेला है।" **13** ऐ गल्ल खरी नी है, क्योंकि मसीह लग-लग टोलियां च नी बंड्या है। शायद तुसां गलतिया ला ऐ सोचदे न की मैं, पौलस तुहांजो अजाद करणे ताई सूली पर चढया था। कने शायद तुसां गलतिया ला ऐ भी सोचा दे न की तुहांजो इस ताई बपतिस्मा दितया है ताकि तुसां मेरे चेले बणन। **14** मैं परमेश्वरे दा धन्यवाद करदा है, की क्रिस्पुस कने गसस इना दोनो भाईयां जो छडी करी, मैं तुसां चे कुसी भी बपतिस्मा नी दितया है। **15** इस ताई कोई ऐसा नी बोली सकदा की तुसां मेरे चेले बणने ताई बपतिस्मा लिया है। **16** कने मिंजो हुणी याद आया, की मैं स्तिफनास दे परिबारे जो भी बपतिस्मा दितया; इना जो छडी करी, मैं नी जाणदा कि मैं कुसी होरसी जो भी बपतिस्मा दितया है। **17** क्योंकि मसीह मिंजो बपतिस्मा देणे ताई नी, पर शुभसमाचार सुणाणे जो भेजया है, जालू मैं शुभसमाचार सुणांदा है, तालू बोलणे च मैं अपने हुनर दा इस्तेमाल नी करदा है, अगर लोक सिर्फ मेरे हुनर दिया बजा ला मिंजो मंदे न, तां सै सूली पर मसीह दी मौत दी शक्ति जो नी जाणदे न। **18** क्योकिं जडे लोक परमेश्वरे ला लग होई जाणे, उना जो सजा मिलणी, सै सूली पर मसीह दी शिक्षा दी कोई कीमत नी समझदे, पर साडे ताई जडे बचयो न, असां जाणदे न की ऐ परमेश्वरे दिया शक्तिया दा सबूत है। **19** क्योकिं पबित्र शास्त्र च परमेश्वर बोलदा है, "मैं दसणा है की जिना लोकां दे बिचारां जो संसारे दे लोक बुद्धिमानि बोलदे न, असल च सै बिचार मुर्खता दे न। मैं साबित करणा है की असल च सै बिलकुल भी समझदार नी न।" **20** तां फिरी, असां बुद्धिमान लोकां दे बारे च क्या बोली सकदे न? कने असां व्यवस्था जो सिखाणे बालयां दे बारे च बोली सकदे न? कने असां उना लोकां दे बारे च क्या बोली सकदे जडे बोलणे च बडे चलाक न? परमेश्वरे उना सारयां जो मुर्ख बणाई दितया है, कने उना दी बुद्धिमानि जो बेकार कने बकवास दसया है। (aiōn g165) **21** मैं ऐसा इस ताई बोलदा है क्योकिं परमेश्वरे समझदारिया ला ऐ फेसला लिया की इस संसारे दे लोक अपणी काबलिया ला उनी मसीह नी जाणी सकदे न, इस ताई परमेश्वर उना जो बचांदा जडे शुभसमाचार पर भरोसा करदे न जिदा असां प्रचार करदे न, चाहे कोई

भरोसा नी करणे बाला बोले की ऐ मुर्खता दिया गल्लां न। **22** यहदियां ताई ऐ इस ताई मुर्खता है, क्योकिं सै इसयो सच्च साबित करणे ताई स्वर्ग ला कोई निशाण मंगदे न, कने होर जातियां ताई भी जडे इन्सानी ज्ञान दिया तोपा च रेदे न। **23** पर असां तां ऐ प्रचार करदे न की मसीह साडे पापां ला सांझो छुडाणे ताई सूली पर मरया, जडा यहदियां ताई ठोकर दी बजा है, कने होर जातियां दिया ताई मुर्खता है; **24** पर जिना जो परमेश्वरे अपने लोक होणे ताई सदया है, क्या यहदी, क्या होर जातियां दोना ताई ऐई मसीह परमेश्वरे दी शक्ति, कने परमेश्वरे दा ज्ञान है। **25** ऐ परमेश्वरे दी मुर्ख योजना बुद्धिमान माणुआं दी योजना ला जादा बुद्धिमान है, कने परमेश्वरे दी कमजोरी भी माणुआं दी सबना ला बडी ताकत ला भी बदीकरी ताकतबर है। **26** हे मसीह भाईयो, अपने उना हालतां जो याद रखा जालू परमेश्वरे तुसां जो मसीह दे पिच्छे चलणे ताई सदया, अगर असां इन्सानी सोचा ला सोचन, तां तुसां चे मते बुद्धिमान नी थे, कने तुसां चे कोई भी राजा महाराजे दे खानदान ला नी थे। **27** पर बुद्धिमान लोकां जो शरमिन्दा करणे ताई, परमेश्वरे उना लोकां जो चुणया जडे संसारे दिया नजरा च मुर्ख न कने ताकतबर लोकां जो शरमिन्दा करणे ताई, परमेश्वरे उना लोकां जो चुणया जडे संसार दिया नजरा च कमजोर न। **28** कने परमेश्वरे उना जो चुणया जडे संसारे दे लोकां दिया नजरा च निच न, कने जिना दी संसार च कोई कीमत नी है उना जो चुणी लिया ताकि जडे अपने आप जो कीमती समझदे न उना जो बेकार करी दे। **29** परमेश्वरे ऐसा इस ताई कितया ताकि कोई भी माणु परमेश्वरे सामणे घमंड ना करे। **30** पर परमेश्वरे तुहांजो यीशु मसीह सोगी इक किता, कने मसीह दे जरिये सांझो बुद्धि दिन्दा है। परमेश्वर सांझो धर्मी बणांदा है, कने मसीह दे जरिये सांझो पबित्र, कने पापां ला छुडांदा है। **31** ताकि जियां पबित्र शास्त्र च लिखया है, तियां ही हो, "जडा घमंड करे सै उस पर घमंड करे जडा परमेश्वरे कितया है।"

2 हे मसीह भाईयो, जालू मैं तुहांजो परमेश्वरे दे बारे च संदेश सुणाया, तां मैं बड़े-बड़े ज्ञान दे अखरां दा इस्तेमाल नी किता कने ना ही समझदार लगणे दा दिखाबा किता। **2** क्योकिं मैं तुहाडे बिच ऐ फेसला करी के आया था, की मैं यीशु मसीह कने उदी सूली पर मौत दे बारे दे इलाबा होर केसी दे भी बारे च गल्ल नी करणी है। **3** कने जालू मैं तुहाडे बाल था, तां मैं अपने आप जो मसीह दा कम्म करणे दे काबिल नी समझदा था, इसा बजा ला मैं बडा कमजोर कने डरदा होया तुहाडे सोगी रिया। **4** कने मेरी शिक्षा कने मेरे प्रचार च संसारिक ज्ञान कने लोकां जो खुश करणे बालियां गल्लां नी थियां; पर पबित्र आत्मा बडिया शक्तिया ला प्रगट किता की जडी शिक्षा मैं तुहांजो दिती सै सच्ची है, **5** इस ताई की तुहाडा भरोसा माणुऐ दे ज्ञान पर नी पर परमेश्वरे दिया शक्तियां पर निर्भर हो। **6** फिरी भी मैं उना लोकां जो, जडे भरोसे च मजबूत न, ज्ञान भरी शिक्षा दिन्दा, पर तां नी संसारिक ज्ञान कने ना ही इस संसारे दे हाकिमा दा ज्ञान, जिना दा नाश होणेबाला है। (aiōn g165) **7** पर असां परमेश्वरे दे उस ज्ञान दी गल्ल करदे न जडा गुप्त था। हल्ले दीकर इसयो कोई नी जाणदा था, परमेश्वरे धरती बणाणे ला पेहेले ही फेसला लिया था, की उदे ज्ञान ला सांझो महिमा मिल्ले। (aiōn g165) **8** परमेश्वरे दिया इसा योजना जो संसारे दे हाकिमा चे कुनी भी नी समझया, क्योकिं अगर जाणदे, तां महिमामय प्रभु जो सूली पर नी चढांदा। (aiōn g165) **9** पर जियां पबित्र शास्त्र च लिखया है, "ना कदी कुनी दिखया है, ना कदी कुनी सुणया, कने ना कदी कुनी उना बली चीजां दे बारे च सोचया, जडियां परमेश्वरे उना लोकां तां तैयार कितियां न जडे उदे न प्यार करदे न।" **10** परमेश्वरे ऐ गल्लां पबित्र आत्मा जरिये असां प्रेरितां जो दसियां; क्योकिं ऐसा कुछ नी है जडा परमेश्वरे दी आत्मा नी जाणदा हो। ऐथु दीकर की सै परमेश्वरे डुगे बिचारां जो भी अच्छे न जाणदा है। **11** तुसां सेई न जडे जाणदे न की तुहाडे अपने मने च क्या है, तियां ही परमेश्वरे दिया आत्मा दे सिबाये कोई भी परमेश्वरे दे बिचारां जो नी जाणी सकदा। **12** पर साडी सोच कने बिचार संसारे दे माणुआं सांई नी न, पर परमेश्वरे सांझो अपणी आत्मा दितियो है, ताकि असां उना गल्लां जो जाणन, जडियां परमेश्वरे अपने अनुग्रह ला दितियां न। **13** कने इस ताई असां इना गल्लां जो दुजे लोकां जो दसदे न तां असां ऐसे अखरां दा इस्तेमाल नी करदे, जडे माणुआं दे ज्ञाने ला मिलंदे न, पर असां उना अखरां दा इस्तेमाल करदे न जडे परमेश्वरे दिया जरिये मिलंदे न, जडा आत्मिक ज्ञाने दे जरिये आत्मिक गल्लां जो समझांदा है। **14** पर सै माणु जिसयो परमेश्वरे दी आत्मा नी मिलियो है, सै परमेश्वरे दिया आत्मा दियां गल्लां

जो नी मंदा, क्योंकि सै उदिया नजरा च मुखता दियां गल्लां न कने सै इना गल्लां दी कीमत नी समझदा। 15 जिना जो पबित्र आत्मा मिलया, सै उना चीजां जो समझी सकदे न, जडा पबित्र आत्मा सिखांदी है। पर जिना लोकां बाल पबित्र आत्मा नी है सै उना लोकां दे बिचारां जो नी समझी सकदे जिना बाल पबित्र आत्मा है। 16 ऐ सचच है क्योंकि पबित्र शास्त्र च लिखया है की, “कोई भी ऐ नी जाणी सकदा की परमेश्वरे दे मने च क्या है कने कोई भी उसयो सिखाई नी सकदा।” पर असां भरोसा करणे बाले समझदे न की मसीह दे मने च क्या है।

3 हे मसीह भाईयो, मैं जालू तुहाडे सोगी था, तालू मैं तुसां जो गेहरी गल्लां नी सिखाईयां, जिजां की मैं आत्मिक लोकां जो सिखांदा है, मैं तुसां लोकां ला इयां गल्लां कितियां जिजां की तुसां इसा दुनिया दे लोकां साईं न, या इयां जिजां की तुसां मसीह जिन्दगी च बच्चे न। 2 मैं तुहाजो परमेश्वरे दे बचने ला सिर्फ बुनियादी शिक्षा दीती, कने गेहरी शिक्षा नी दीती, क्योंकि उस बकत तुसां इसा शिक्षा जो पाणे ताई तैयार नी थे, 3 क्योंकि तुसां हल्ले दीकर भी संसारे दे लोकां साईं जिन्दगी जिया दे न। इस ताई की जालू तुसां च इक दुज्जे सोगी जलन कने झगडा होदा है, तां ऐ साबित करदा है की तुसां संसार दे लोकां साईं न। कने तुसां उना लोकां साईं जिन्दगी जिन्दे न जडे लोक प्रभु दे लोक नी न। 4 इस ताई की जालू इक बोलदा है की, “मैं पौलस दा है,” कने दुज्जा बोले कि, “मैं अपुल्लोस दा है,” तां क्या तुसां संसार दे लोकां साईं नी करदे न? 5 तां फिरी सोचा की अपुल्लोस कुण है? कने मैं पौलस कुण है? असां तां सिर्फ परमेश्वरे दे सेवक न, जिना दे जरिये तुसां मसीह पर भरोसा किता, असां चे हर इक जणे सेईं कम्म किता जडा परमेश्वरे सांझो करणे ताईं दिता। 6 अगर मैं तुसां दी तुलना खेतेरे सोगी करे, तां मैं उस माणूऐ साईं है जिनी पेहले तुसां च श्भसमाचार दा बी राया, कने अपुल्लोस उस माणूऐ साईं है जिनी उस बटे जो खाद पाणी दिता ताकि सै बदी संके, पर परमेश्वर ही है जडा तुसां जो आत्मिक रूप ला बदांदा है, जिजां परमेश्वर उस बटे जो बदांदा है। 7 इस ताईं ना तां बटे जो लागणे बाला कुछ है, कने ना ही सै कुछ है जिनी खाद पाणी दिता, पर परमेश्वर ही सब कुछ है जिनी उस बटे जो बदाया। 8 मैं तुहाजो श्भसमाचार सुणया कने परमेश्वरे दे बचना जो सिखाणा शुरू किता कने अपुल्लोस तुहाजो सिखांदा रिया पर साडा दोनो दा इक ही मकसद है, कने हर इक माणूऐ जो उदिया मेहनता दे साबे ला परमेश्वरे इनाम देणा। 9 क्योंकि असां परमेश्वरे दे सहकर्मी न; कने तुसां सारे मसीह लोक परमेश्वरे दिया खेतिया साईं न, कने मैं तुहाडी तुलना इक घरे साईं करी सकदा है, जिसयो परमेश्वर बणांदा है। 10 परमेश्वरे जडा बदरान मिजो दिता, उदे जरिये मैं इक खरे राज मिश्रीऐ साईं इस घरे दिया नियां पाईयां कने होर दुज्जे लोकां इक नियां पर घर बणाया। पर हर इक माणू ध्यान रहे की सै कितियां घर बणांदा है। 11 क्योंकि नि जडी पहले ला ही रखियो है, सै यीशु मसीह है, कने होर कोई भी दुज्जी नी रखी सकदा। 12 कने अगर मसीह सेवक खरियां गल्लां सिखाऐ जडियां परमेश्वरे उना जो दीतियां, सै उना घर बणाणे बालयां साईं न जडे उसा नियां पर होर चीजां न जिजां सोना या चांदी या कीमती पथरां ला घर बणांदा है। पर अगर सै झुठियां गल्लां सिखाऐ तां सै उना घर बणाणे बालयां साईं है जडे घटिया चीजां न जिजां लकडी, भू कने घांऐ ने घर बणांदा, 13 पर न्याय बाले रोजे अग्गी हर कुसी दे कम्म प्रगट करणे न की कुदे कम्म खरे थे कने कुदे कम्म बुरे थे; कने अग्गी दसणा है की उस माणूऐ दे कम्मा दी कोई कीमत है की नी। 14 अगर कुसी घर बणाणे बाले दा कम्म जडा उनी उसा नियां पर घर बणांदा बकत किताया हो, कने अगर सै नी फकुंजा तां मसीह उसयो इनाम देणा है। 15 पर अगर कुसी घर बणाणे बाले दा कम्म फकुईं जांगा तां मसीह उसयो इनाम नी देणा। पर उसयो हमेशा दी जिन्दगी मिली जाणी जडी परमेश्वरे उस ताईं रखियो है। 16 तुसां जो पक्का पता है, की तुसां परमेश्वरे दा मन्दिर न, कने परमेश्वरे दी दितियो आत्मा तुहाडे बिच वास करदी है। 17 तुसां परमेश्वरे दे मंदरे साईं न, अगर कोई माणू तुहाजो मिली जूली करी रेणा नी दिन्दा है। तां परमेश्वरे उसयो सकत सजा देणी, क्योंकि परमेश्वरे दा मंदर पबित्र है, कने सै मन्दिर तुसां न। 18 कोई अपने आपे जो धोखे च ना रखे। अगर तुसां चे कोई अपने आप जो इस संसारे दे लोकां सामणे ज्ञानी समझे, तां सै उना दिया नजरां च मुखे बणी जाऐ, ताकि तुसां परमेश्वरे दिया नजरां च ज्ञानी बणी सकन। (aiōn g165) 19 क्योंकि इस संसारे दे लोक जिना गल्लां जो ज्ञान समझदे न, सै सारियां गल्लां परमेश्वरे दिया नजरां च मुखता है, जिजां पबित्र शास्त्र च लिखया है की,

“परमेश्वर ज्ञानी लोकां दी चलाकियां च उना जो फसाईं दिन्दा है।” 20 कने पबित्र शास्त्र ऐ भी लिखया है की, “प्रभु ज्ञानी लोकां दे बिचारां जो जाणदा है की सारे बेकरा न।” 21 इस ताईं तुसां घमंड मत करा की तुसां कुसी खास माणूऐ दे चेले न, मैं पौलस, अपुल्लोस, पतरस, सारे तुसां दे न, ऐथू दीकर की सारा कुछ तुसां दा है मतलब की संसारे दियां चीजां, अगर तुसां जिन्दे न या मरी गियो, अज या भविष्य सब कुछ तुहाडा है। 23 कने तुसां मसीह दे अधिकारे दे अधीन न, कने मसीह परमेश्वरे दे अधिकारे अधीन न।

4 तुसां सांझो मसीह दे सेवक समझा जिना जो परमेश्वरे श्भसमाचार दे भेदां दी सचचाईं जो समझाणे दा कम्म दितया है। 2 परमेश्वरे जिसयो ऐ कम्म करणे जो दितया, जरूरी है की सै भरोसे लाइक हो, ताकि दितयो कम्मे जो पूरा करी सके। 3 पर मैं इसा गल्ला दी फिकर नी करदा की, तुसां या होर कोई भेरे बारे च ऐ बोले की ऐ भरोसे दे लायक है की नी है, सचच तां ऐ है की मैं अपने बारे च भी नी बोलदा की मैं भरोसे दे लायक है की नी। 4 क्योंकि मेरी अंतरात्मा मिजो कुसी भी गल्ला च दोषी नी बणांदा, पर इसला मैं निर्दोष नी बणांदा, क्योंकि परमेश्वर मिजो परखणेबाला है कने सेईं मिजो बेकस्पर साबित करदा है। 5 इस ताईं साडे प्रभु यीशु मसीह दे बापस ओणे दीकर कोई कुसी दा न्याय ना करे, क्योंकि परमेश्वरे साफ तरीके ला उना सारे बिचारां जो दसणा जडे लोकां दे मना च न, जिना दे बारे च कोई नी जाणदा है, उनी उना दे मने दे सारे इरादयां जो प्रगट करणा है, तालू परमेश्वरे दिया तरफा ला हर इकी दी तारीफ होणी। 6 हे मसीह भाईयो, मैं अपुल्लोस कने अपने बारे च तुहाजो इस ताईं दसया ताकि तुसां सांझो इक उदाहरण साईं लेईं सकन, “पबित्र शास्त्र च जडा लिखया है, उसला अग्गे मत बदा।” ऐ खरा नी है की तुसां कुसी इकी जो इज्जत देईंकरी बढा बणा, कने दुज्जे दी बेजती करिरी निचा दस्सा। 7 कुण बोलदा है की तू दुज्जे ला खरा है? कने जडा कुछ तरे बाल है सै परमेश्वरे तिजो दितया। कने जालू परमेश्वरे ही सब कुछ तिजो दितया, तां तिजो कोई हक नी है की तू कुसी गल्ला च घमंड करे। 8 तुहाजो लगदा है की तुहाडे बाल आत्मिक रूप च सारियां चीजां न। कने तुहाजो लगदा है की पेहले ही सारे बदरान तुहाजो मिली गियो न, जडे पबित्र आत्मा अपने लोकां जो दिन्दी है, कने तुहाजो लगदा की तुसां साडे बिना राजयां साईं शाशन करणा लगगी पियो न, मैं खुश होईं जांदा अगर तुसां सचची राजयां साईं राज करणा लगगी पियो होंदे ताकि असां भी तुहाडे सोगी शाशन करी सकन। 9 मिजो ऐसा लगना दा की परमेश्वरे असां प्रेरितां जो जित दिया यात्रा च सारयां ला आखरी जगा च उना केदियां साईं रखया है जिना जो मौत दी सजा मिलियो हो। असां सारी दुनिया, स्वर्गदतां कने माणूआं सामणे तमाशा बणी गियो न। 10 लोक सांझो मुख समझदे न क्योंकि असां मसीह दा प्रचार करदे न, पर तुसां गलत सोचदे न की तुसां बुद्धिमान मसीह न! मते लोक मंदे न की साडे बाल कोई हक नी है। पर तुसां घमंड ला बोलदे न की तुहाडे बाल परमेश्वरे दी शक्ति है। लोक साडी इज्जत नी करदे पर लोक तुहाडी इज्जत करदे न। 11 असां उस रोजे दीकर भूखे प्यासे कने फटयो कपडे पायो न, कने लोकां सांझो मारया कृत्या, कने साडे ताईं रेणे जो घर नी था। 12 कने अपने ही हथां ला कम्म करिके मेहनत करदे न, लोक बुरा बोलदे न, असां आशीष दिन्दे न, सै सतादे न असां सेहन करदे न। 13 जालू लोक बदनाम करदे न, तां असां उनो जो बडे प्यारभाव ला जबाब दिन्दे न। अजे भी लोक साडी इज्जत नी करदे कने सै बोलदे न की साडी कोई कीमत नहीं है। 14 मैं तुहाजो शर्मिंदा करणे ताईं ऐ गल्लां नी लिखदा है, पर मेरा मकसद तुहाजो सुधारणा है क्योंकि तुसां मेरे बचयां साईं न जिना जो मैं बडा प्यार करदा है कने चेताबनी दिन्दा है। 15 भले ही तुहाडे बाल सिखाणे ताईं हजारो गुरु होन, सिर्फ मैं ही तुहाडे पिता साईं है, क्योंकि मैं पेहला माणू है, जडा तुहाडे ताईं श्भसमाचार लेईंकरी आया, जिसदी बजा ला तुहाजो मसीह यीशु पर भरोसा होया। 16 इस ताईं मैं तुहाजो बिनती करदा है, की जिजां मैं मसीह च जिन्दगी जिया दा, तियां ही तुसां भी जिन्दगी जिया। 17 इस ताईं मैं तीमथियुस जो तुसां बाल भेजया है, जडा प्रभु यीशु च मेरा प्यारा कने भरोसे बाला पुत्र है, उनी तुहाजो दसणा की मैं क्या करदा है कने यीशु मसीह दा चेला बणी करी जिया दा, ठीक ऐईं गल्लां मैं हर जगा कने सारी कलीसियां जो सिखांदा। 18 तुहाडे बिच कुछ लोक सोचदे न की तुहाजो मिलणा नी ओणा, इस ताईं सै घमंडी होईं गियो न। 19 पर प्रभुऐ दी इच्छा होईं तां मैं तुहाडे बाल जल्दी ओणा है, कने उना घमंडियां दियां सिर्फ शिक्षा जो ही नी, पर

उना दिया शक्तिया जो भी जाणी लेणा है। 20 क्योंकि परमेस्वरे दा राज्य सिर्फ बडियां भरी गल्लां करणा ही नी, पर ऐ परमेस्वरे दिया शक्तिया ला जीणा है। 21 जालु मैं तुहाडे बाल ओगा तां तुसां क्या चांदे न की मैं करा? अगर तुसां अपणियां बुरियां गल्लां ला नी सुधरयो होंगे, तां मैं तुहांजो अपणे तरीके ला सुधारगा, पर अगर सुधरी गियो होंगे तां मैं तुसां पर दया दसणी, कने दसणा की मैं तुहांजो ने किताणा प्यार करता है।

5 मैं लोकां जो तुहाडे बारे च बोलदे सुणया है, की तुसां च कुछ लोक व्यभिचार करदे न, कने ऐसा व्यभिचार तां होर जाति दे लोकां च भी नी होँदा। से ऐ है की इकी माणुऐ अपणी सौतेली माऊ सोगी नाजायज रिशता रखया है। 2 कने तुसां जो तां इसा गल्ला दा दुख होणा चाईदा था, पर इदे बजाये तुसां इसा गल्ला च घमंड करदे न। तुहांजो इयुदे माणुआं जो कलीसिया ला कडी देणा चाईदा। 3 भले ही मैं ओथु तुहाडे सोगी नी है, पर ऐसा लगदा है कि मने ला मैं ओथु ही है, कने मैं इयुदे कम्म करणे बालयां दे खिलाफ फेसला करी दितया है। 4 कने तुहांजो ऐसा करणा चाईदा की तुसां सारे भरोसा करणे बाले होणे दे नाते गिठे होन, ऐ जाणदे होऐ की तुहाडे बाल असल च साडे प्रभु यीशु मसीह दा हक है। 5 उस पाप करणे बाले माणुऐ जो अपणी कलीसिया ला कडी दिया, कने बापस उस जो शैतान दे बशे च देई दिया। क्या पता से पाप करणा छडी दे। क्योंकि अगर से पाप करणा छडी दिगा, तां जिस दिन प्रभुऐ न्याय करणा पक्का उस दिन उनी बची जाणा। 6 तुहाडा घमंड करणा बिलकुल भी ठीक नी है, क्या तुसां नी जाणदे की थोडा दिया खमीर पुरे गुनयो आटे जो खमीर करी दिन्दा है? अगर कुसी माणुऐ जो पाप करणे दी इजाजत मिलदी है, तां इट सारयां पाप करणा लगी पोणा। 7 जियां यहदी लोक अपणे घरां ला फसह दा त्योहार मणुऐ ला पहले सारा खमीर कडी दिन्दे न, तियां ही तुसां भी इस पापी माणुऐ जो कलीसिया ला कडी दिया, तां तुसां इक ताजी रोटिया साई होणा, जडी बिना खमिरे ला बणियो है, कने असल च तुसां सेई न। क्योंकि साडे फसह दा त्योहार असल च मसीह दे बलिदाने दे जरिये पूरा होया है। 8 इस ताई ओआ की असां अपणे फसह दा त्योहार मनान। जियां यहदी खमीर बाहर कडया, तियां अपणे पापी मसबाब जो छडी दिया, कने जियां यहदी खमिरे बाली रोटी खांदे थे, सांझो भी परमेस्वरे दे लोकां साई जीणा चाईदा, जिना च कोई बुराई नी होँदी, मतलब की अपणे मने ला चलाकिया दियां गल्लां जो कडी करी कने सच्चाईया कने यीशु मसीह सोगी चला। 9 मैं अपणिया पिछलिया चिठिया च तुहांजो लिखया था, की व्यभिचारियां सोगी संगती मत करदे। 10 ऐ नी की तुसां बिलकुल ही इस संसारे दे व्यभिचारियां, या लोभियां, या दुज्जयां जो धोखा देणेबाले, या मूर्तिपूजा करणे बालयां दी संगती नी करणी, क्योंकि इयां तां तुहांजो इस संसारे ला निकलना पेई जाणा। 11 पर मेरे बोलणे दा मतलब ऐ है, ऐसे माणुऐ सोगी कोई रिशता मत रखा जडा अपणे ओणे जो मसीही बोलदा है, पर व्यभिचार, या लालची, या मूर्तिपूजक, या गाली देणे बाला, या शराबी, या दुज्जयां जो धोखा देणेबाला हो, तां उस माणुऐ सोगी संगती मत करदे। 12 क्योंकि कलीसिया ला बाहर बालयां दा फेसला करणा मेरा कम्म नी है, पर तुहांजो उना जो जरूर सुधारणा चाईदा जडे तुहाडे कलीसिया दे लोक न। 13 पर कलीसिया ला बाहर बालयां दा फेसला परमेस्वर करता है: पर जियां पबित्र शाश्र च लिखया है, की कुसी भी बुरे कम्म करणे बाले माणुऐ सोगी रिशता मत रखा।

6 अगर तुहाडा कुसी दुज्जे मसीह भाई या बेहणा सोगी झगडा होँदा है, तां तुसां जो कचेरी च नी जाणा चाईदा। तुहांजो अपणी कलीसिया च कुसी जो बोलणा चाईदा की, से तुहाडे झगडे दा फेसला करे की कुण सही है कने कुण गलत है। 2 तुसां जाणदे न की, ओणे बाले दिना च परमेस्वरे दे लोकां इस संसारे दे लोकां दा न्याय करणा। इस ताई जालु तुसां बिच छोटे मोटे झगडे होन तां तुसां जरूर फेसला करी सकन की कुण गलत है कने कुण सही है। 3 तुसां जाणदे न की, ओणे बाले दिना च असां शैताने दे दूतां दा न्याय करणा, तां असां जरूर इसा जिन्दगिया च होणे बालियां छोटियां-छोटियां गल्लां दा फेसला करी सकदे न। 4 अगर एसियां गल्लां सामणे ओदियां न, तां उना दा फेसला करणे ताई ऐसे लोकां बाल नी जाणा चाईदा, जिना दी कलीसिया दे लोक इज्जत नी करदे होन। 5 मैं ऐ गल्लां तुहांजो शर्मिदा करणे ताई बोला दा है, क्या सच्ची तुसां च कोई भी समझदार नी है, जडा अपणे मसीह भाईयां कने बेहणा दा न्याय करी सके? 6 बल्कि इक मसीह भाई दुज्जे मसीह भाई दे खिलाफ मुकदमे जो लेईकरी भरोसा नी करणे बाले बाल

जाऐ। 7 पर सच्ची गल्लत तां ऐ की तुसां बिच मुकदमे चलणे दा मतलब है की तुसां इक मसीही जिन्दगी जिये च हारी गियो न। इस ताई अगर कोई होर मसीह भाई या बेहण तुहाडे सोगी गलत करे, कने धोखे ने तुहाडा कुछ लेई ले, तां तुसां इदे बदले च कुछ मत करा। 8 पर तुसां तां अपु ही गलत करा दे न कने धोखा दे न कने से भी अपणे ही मसीह भाई बेहणा जो। 9 तुसां पक्का जाणदे न की, बुरे कम्म करणे बाले लोक परमेस्वरे दे राज्य दे हकदार नी होणे न। कोई तुसां जो ऐ गल्ल बोली करी धोखा ना दे, की तुसां बुरे कम्म करी के भी परमेस्वरे दे लोक बणी रेई सकदे न। इस धोखे च मत रेंदे की, वेश्यागामी, मूर्तिपूजा करणे बाले, परस्रगीगामी, लुच्चे, पुस्रगीगामी, 10 चोर, लालची, शराबी, गाली देणेबाले, दुज्जयां जो धोखा देणेबाले परमेस्वरे दे राज्य दे हकदार नी होणे न। 11 कने तुसां च कुछ लोक फेहेले ऐसे ही थे, पर प्रभु यीशु मसीह दे नाऐ ला कने साडे परमेस्वरे दिया पबित्र आत्मा तुहाडे पाप धोई दितयो न, ताकि तुसां पबित्र कने परमेस्वरे दिया नजरा च धर्मी बनन। 12 तुसां बोली सकदे न की, मैं सारियां चीजां करी सकदा है क्योंकि मैं इक मसीह पर भरोसा करणे बाला है; पर सारियां चीजां मेरे फायदे दियां नी न। पर मैं कुसी भी गल्ला दे बशे नी होणा। 13 तुसां बोली सकदे न की, खाणा पेटे ताई, कने पेट खाणे ताई है, ऐ तां सच्चे है पर परमेस्वरे ऐ दोनां खत्व करी देणा। साडे शरीर व्यभिचार ताई नी न, बल्कि प्रभु ताई है, कने इसला प्रभु दी सेवा करणी चाईदी। 14 पर साडा शरीर इस ताई भी खस है क्योंकि जियां परमेस्वरे अपणिया शक्तिया ला प्रभु जो मरयां च जिन्दा किता, तियां ही उनी सांझो भी मरयां च जिन्दा करणा। 15 तुसां जाणदे न की, तुहाडे शरीर मसीह दे अंग न। तां क्या इक माणुऐ अपणे शरीर जो लेईकरी, बेश्या सोगी जोडना चाईदा? नी बिलकुल भी नी। 16 तुसां जाणदे न की पबित्र शाश्र च लिखया है, “उना दोनां इक बणी जाणा।” इस ताई तुहांजो पता होणा चाईदा की जडा कोई बेश्या ला जुडी जांदा है से बेश्या सोगी इक बणी जांदा है। 17 कने जडा प्रभु सोगी जुडी जांदा है, उदी आत्मा कने प्रभु दी आत्मा इक होई जादियां न। 18 व्यभिचार ला बची रिया; माणुऐ दे कितयो होर पाप उदे शरीर जो उतणा प्रभावित नी करदे जितणा ऐ करता है, पर व्यभिचार करणे बाला अपणे ही शरीर दे खिलाफ पाप करता है। 19 तुसां जाणदे न की, तुहाडा शरीर से मंदर है जिते च पबित्र आत्मा बसदी है; जडी परमेस्वरे तुहांजो दितियो है, कने हुण तुसां अपणे नी न, पर परमेस्वरे दे न। 20 क्योंकि जालु परमेस्वरे प्रभु यीशु मसीह जो भेजया, तालु उनी तुहाडे ताई बडी बड्डी कीमत चुकाई है, इस ताई अपणे शरीर ला परमेस्वरे दी महिमा करा।

7 हुण जडे सबाल तुसां मिंजो ला चिठिया च पछयो थे हुण मैं उना दा जबाब दिन्दा है। तुसां पछया था कि, “क्या असां लोकां ताई ऐ खरा है की असां बियाह ना करन?” 2 क्योंकि ऐ आम गल्ल है की लोक नाजायज रिशते बणाई लेंदे न, इस ताई मैं सलाह दिन्दा है की हर इक मर्द बियाह करे, कने अपणी घरे बालिया सोगी बफादार रहे। 3 इक माणु पति होणे दे नाते अपणिया जिम्मेबारियां पुरियां करे; कने तियां ही इक जनानी भी घरे बाली होणे दे नाते जिम्मेबारियां पूरी करे, कने दोनां इक दुज्जे दियां जरूतां जो पूरा करन। 4 घरे बालिया जो अपणे शरीर पर हक नी है, पर उसा दे घरे बाले जो है; तियां ही घरे बाले जो भी अपणे शरीर पर हक नी है, पर उदी घरे बालिया जो है। 5 तुसां इकी दुज्जे ला लग मत रिया; पर सिर्फ कुछ बकत दीकर अपु च सलाह करिके लग रिया, ताकि प्राथना करणे ताई कुछ बकत मिलली सके, कने फिरी दुबारा सोगी रिया, इयां ना हो की अपणे पर काबू नी रखणे दिया बन्ना ला शैतान तुसां जो नाजायज रिशता रखणे ताई परखे। 6 पर मैं जडा कुछ बोला दा है से मेरी सलाह है ना की मेरा हुकमा। 7 मैं ऐ चांदा है, की जियां की मैं बियाह नी कितया, तियां ही तुसां सारे भी बियाह मत करा, पर परमेस्वरे कुछ लोकां जो खस बरदान दितया है। परमेस्वरे कुछ लोकां जो बियाह करणे दा बरदान दितया, कने कुसी जो बगेर बियाये रेणे दा बरदान दितया है। 8 पर कुआरयां कने बिधवां जो मेरी सलाह ऐ है की, उना ताई ऐई खरा है की से बगेर बियाह कितयो रिया, जियां मैं है। 9 पर अगर से सबर नी रखी सकन, तां उना जो बियाह करी लेणा चाईदा, क्योंकि शरीर दिया इच्छा ला लडने ला खरा है की बियाह करी लिय। 10 जिना दा बियाह होई गिया है, उना जो मैं नी, बल्कि प्रभु यीशु मसीह हुकम दिन्दा है, की घरे बाली अपणे घरे बाले जो तलाख ना दे। 11 कने अगर तलाख होई भी जा, तां से दुज्जा बियाह ना करे; या अपणे घरे बाले सोगी दुबारा मिली करी रे। कने ना घरेबाला अपणिया घरे बालिया

जो तलाख दे। 12 पर हुण ऐ प्रभु दा हुकम नी है, पर मै उना भरोसा करणे बाले लोकां जो बोलणा चांदा है, जिना दा बियाह भरोसा नी करणे बाले लोकां ने होई गिया है; अगर कुसी मसीह भाई ऐ दी घरे बाली मसीह पर भरोसा नी करदी है, कने उदे सोगी रेणा चांदा है, तां से उसा जो तलाख ना दे। 13 कने जिसा मसीह जनानिया दा घरेबाला भरोसा नी करदा हो, कने उसा सोगी रहेणे च खुश हो, तां से अपने घरे बाले जो तलाख ना दे। 14 क्योंकि इक मसीह पर भरोसा करणे बालिया दे घरे बालिया दिया बजा ला परमेस्वरे उसा दे घरे बाले जो अपनाई लेणा है, अगर ऐ सच्च नी होंदा की तुहाडा भरोसा नी करणे बाला घरेबाला या घरे बाली परमेस्वरे दे न, तां तुहाडे बाल बच्चे परमेस्वरे दे नी होंदे, पर हुण तां तुहाडे बाल बच्चे भी परमेस्वरे दे न। 15 अगर कोई भरोसा नी करणे बाला भाई या बेहण तलाख देणा चांदा है, तां से ऐसा करी सकदा है। ऐसे हालातां च इक भरोसा करणे बाले घरे बाले या घरे बालियो जो इस रिशते जो निभाणे दी जरूरत नी है, क्योंकि भरोसा नी करणे बाला ऐ तलाख दे दा है; परमेस्वरे सांझो शांति ला जिन्दगी जिणे तांई सदया है। 16 हे घरेबालियो तुहांजो याद रखणा चाईदा की तुहाडिया बजा ला तुहाडे घरे बाले दिया जिन्दगिया भी बची जान कने हे घरे बालियो तुहांजो भी याद रखणा चाईदा की तुहाडिया बजा ला तुहाडे घरे बालियां दी जिन्दगी बची सके। 17 मेरा इतणा सब कुछ बोलणे दा मतलब ऐ की जियां प्रभुऐ हर इकी जो जिना हालातां च रखया है, से उना ही हालातां च अपनी जिन्दगी जिये, जिस तांई परमेस्वरे उना जो अपने लोक होणे तांई सदया है। कने ऐई गल्ल मै सारियां कर्त्तिसियां दे लोकां जो सिखांदा है। 18 इक उदाहरण तांई, अगर कोई यहदी माणु प्रभु यीशु मसीही भरोसा करदा है, तां उसयो उदी यहदी होणे दी पछेण नी छडणी चाईदी, कने तियां ही अगर कोई होर जाति दा माणु यीशु मसीह पर भरोसा करे तां उसयो यहदी बणने तांई खतना करबाणे दी जरूरत नी है। 19 इक माणु दा खतना होया हो या नी होया हो इसला कोई फर्क नी पोंदा। पर परमेस्वरे दे हुकमा जो मणगा ही सारयां ला जरूरी है। 20 परमेस्वरे जिस माणुऐ जो जिना हालातां च अपने लोक होणे तांई सदया है, से माणु उना ही हालातां च ही अपनी जिन्दगिया जो जिये। 21 अगर तू नोकर होंदे होऐ परमेस्वरे पर भरोसा किता है, तां तू इस बारे च चिंता मत कर; अगर तेरा मालिक बोले की तू अजाद है, तालू तू जाई सकदा है। 22 क्योंकि जिसयो नोकरे दिया हालातां च प्रभु दे लोक होणे तांई सदया हो, से अजाद माणुऐ सांई है, क्योंकि प्रभु यीशु मसीह उसयो उदे पापां ला आजादी देई दितियो है। कने इयां ही जिसयो आजादी दिया हालातां च सदया हो, से मसीह दे सेवक बणी रे। 23 क्योंकि परमेस्वरे तुसां तांई बडी बड्डी कीमत चुकाईयो है, जालू उनी यीशु मसीह जो सूली पर बलिदान किता; इस तांई माणुआं दे गुलाम नी पर परमेस्वरे दे गुलाम बणा। 24 हे मसीह भाईयो, परमेस्वरे जिस माणुऐ जो जिना हालातां च अपने लोक होणे तांई सदया है, से उना ही हालातां च अपनी जिन्दगी जिये। 25 कुआरियां दे बारे च मिंजो प्रभुऐ दा कोई हुकम नी मिलया, पर प्रभुऐ अपनी दया ला मिंजो भरोसे दे काबिल ज्ञान दितया, उदी बजा ला मै तुहांजो अपनी सलाह दिन्दा है। 26 क्योंकि इना रोजां च भरोसा करणे बाले लोकां सोगी हर जगा बडियां पेशानिया बालियां गल्लां होआ दियां न, इस तांई मिंजो लग्गा दा है की ऐ खरा है की कुआरे लोक कुआरे ही रेन। 27 अगर तेरी घरे बाली है, तां उसा जो तलाख देणे दी कोशिश मत कर; कने अगर तेरी घरे बाली नी है, तां तू बियाह करणे दी कोशिश मत कर। 28 अगर तू बियाह भी करे, तां कोई पाप नी है; कने अगर कुआरियां दा बियाह होई जा, तमी कोई पाप नी है; पर बियायो लोकां जो इस संसारे च रेंदे होयो दुखां दा सामणा करणा पोणा, कने मै चांदा है की तुसां इना दुखां ला बची रिया। 29 हे मसीह भाईयो, मै तुहांजो ऐ बोलदा है, की इस संसार च साडे बाल जादा बकत नी है, इस तांई तुहाडे बाल घरे बाली है या नी, इस बारे च जादा फिकर मत करा; पर प्रभु दी सेवा करणे दे बारे च सोचदे रिया। 30 कने जडे लोक दुखी नी, से अपना दुख ना दसन; जडे खुश न, उना दी खुशी लुकी रे, कने जडे खरीदारी करणे बाले न, से ऐसे होई जान की उना बाल कुछ ना हो। 31 कने जडा कुछ इस संसारे च साडे बाल है, सांझो इना चिंजा जो जादा कीमत नी देणी चाईदी, क्योंकि इस संसारे च जडा कुछ साडे बाल है, से जल्दी ही खत्म होणेबाला है। 32 इस तांई मै चांदा है, की तुसां संसारिक जिन्दगी दी इच्छां ला अजाद रिया। कुआरा माणु परमेस्वरे दे बारे च सोचदा रेंदा है की से कियां प्रभु जो खुश करे। 33 पर बियाया माणु संसारे दियां गल्लां दे बारे च सोचदा रेंदा है, की अपनीया घरे बालिया जो कियां खुश रखे। 34 इस तांई से दो गल्लां दे

बारे च सोचदा रेंदा, इक तां अपनी घरे बालिया जो खुश करणा कने दुज्जा प्रभु जो खुश करणा। बियाइयो कने नी बियाइयो च भी फरक है; कुआरी प्रभु दी सेवा दे बारे च सोचदी रेंदी, ताकि से कियां शरीर कने आत्मा ला परमेस्वरे जो खुश करी सके; पर बियाइयो जनानी संसारे दियां चीजां दे बारे च सोचदी रेंदी, की से अपने घरे बाले जो कियां खुश करी सके। 35 मै ऐ गल्लां तुहाडिया भलाईया तांई बोला दा है, ना कि तुसां जो बियाह करणे ला रोकणे तांई। पर इस तांई की तुसां ढंगे ला जिन्दगी जी सकन; ताकि तुसां इक मन होईकरी परमेस्वरे दी सेवा च लगी रेन। 36 कने अगर कुसी पिता जो ऐ लगे की से अपनीया कुआरिया कुडिया दा बियाह बडा बादे च करणे ला उसा सोगी अन्याय करा दा है, क्योंकि उसा दी उमर जादा होआ दी है, तां उस पिता जो सैई करणा चाईदा जडे उसयो खण लगे। तां से पिता अपनीया कुडिया दा बियाह करी सकदा है, इदे च कोई पाप नी है। 37 अगर से अपने मने च पक्का करी ले की, उदिया कुडिया तांई कुआरा रेणा ही खरा है, कने ऐसा करणे तांई उस पर कुसी दा दबाब न होऐ, तालू जडा फेसला उनी लिया है, तां उस पिता बाल ऐसा करणे दा पूरा हक है। कने अगर उनी अपनीया कुडिया जो कुआरा रखणे दा फेसला करी लिया है, तां से परमेस्वरे दिया नजरा च खरा करदा है। 38 इस तांई जडा अपनीया कुआरिया कुडिया दा बियाह करी दिन्दा है, तां से खरा करदा है, कने जडा उसा दा बियाह नी करदा है, से होर भी जादा खरा करदा है। 39 जालू दिकर कुसी जनानिया दा घरेबाला जिन्दा है, तालू दीकर उसा उसो सोगी बियाह दा रिशता निभाणा पोणा, पर जालू उसा दा घरेबाला मरी जाऐ, तां से अज्याद है, कने जिस्ला बियाह करणा चांदाई उसला करी सकदी है, पर उस सोगी ही जडा मसीह पर भरोसा करदा है। 40 पर मेरे बिचार ला, अगर से दुबारा बियाह ना करे, तां उना होर भी जादा खुश रेणा, कने मै समझदा है, की जालू मै इशुदियां गल्लां बोलदा है, तां परमेस्वरे दी आत्मा मिंजो जरिये बोलदी है।

8 तुसां दी चिठिया च तुसां मिंजो ला मूर्तियां दे सामणे बलि कितियां चीजां दे बारे च पृछया था। हां, असां इना गल्लां दे बारे च कुछ ना कुछ जाणदे न। पर जालू ऐई ज्ञान लोकां जो घमंड करणे बाला बणाई दिन्दा है, तां प्यार च अगे बढणे च असां इक दुज्जे दी सहायता करी सकदे न। 2 अगर कोई माणु ऐ समझे की, से बडा बुदिमान है, तां से असल च हल्ले दीकर सियुदा जाणी नी सकया है, जदिया जाणना उस तांई जरूरी है। 3 पर अगर कोई परमेस्वरे ला प्यार रखदा है, तां उसयो परमेस्वर जाणदा है। 4 हुण खाणे दे बारे च तुहांजो जबाब देणा चांदा है। मूर्तियां दे सामणे बलि दीतिया खाणे दे बारे च असां जाणदे न, की इस संसारे च कुशी भी मूर्तियां च परमेस्वर नी है, कने सिर्फ इक ही सच्चा परमेस्वर है। 5 पर स्वर्ग कने धरतिया पर मूर्तियां चीजां जो, जिना जो लोक ईश्वर कने प्रभु बोलदे न। पर साडा तां इक ही परमेस्वर है: कने से साडा पिता है; कने उनी ही सारियां चीजां बणाईयां न, कने असां उदे जरिये ही जिन्दे न, तियां ही साडा इक ही प्रभु है, कने से यीशु मसीह है। उदे जरिये सारियां चिजां बणाईयां गियां थियां, कने उदे जरिये असां जिन्दे न। 7 पर साडे भरोसा करणे बाले लोकां जो हल्ले दीकर ऐ नी पता की मूर्तियां बाल कोई शक्ति नी है। क्योंकि से पहल्ले मूर्तियां दी पूजा करदे थे, कने हुण जालू से मूर्तियां जो चढाया खाणा खांदे न, तां से गलत सोचदे न की से हल्ले भी मूर्तियां दिया पूजा च करदे न। कने से ऐ सोची करी दुखी होंदे न की अगर से मूर्तियां च चढाया खाणा खांदे न, तां से पाप करदे न। 8 पर खाणा खाणे ला असां परमेस्वरे दे नेडे नी होंदे। कने खाणे जो खाणे तांई मना करणे ला असां परमेस्वरे जो घट खुश नी करदे न, कने खाणा खाणा सांझो परमेस्वरे दिया नजरा च कुछ खास नी बणांदा। 9 पर ध्यान रखा की, ऐसा ना हो की, तुहाडी ऐ अजादी कुशी घट भरोसे बाले लोकां तांई उदे पाप करणे दी बजा ना बणी जाऐ। 10 तुसां जाणदे न की असल परमेस्वर नी न, इस तांई तुसां मूर्तियां दे मंदरे च खाणा खाई सकदे न। पर जडा कोई भरोसे च कमजोर है, से तुसां जो ओथुं खाणा खांदे दिखदा कने मूर्तियां पर बलि कितियां चीजां जो खाणे तांई हिम्मत करे, पर ऐ सोचे की ऐसा करणा पाप है। 11 इस तांई तू जिना गल्लां जो जाणदा है, उसा बजा ला जडा मसीह भाई भरोसे च कमजोर है उनी माणुऐ मसीह पर भरोसा करणा छडी देणा, जिस तांई यीशु मसीह अपनी जान दिती। 12 कने अगर साडे इस कम्मे जो करणे दिया बजा ला साडे साथी मसीही भाई अपने आप जो पापी महसूस करदे न, तां असां उना दे खिलाफ कने यीशु मसीह दे खिलाफ पाप करदे न। 13 इस तांई अगर मूर्तियां दे सामणे बलि चढाया खाणा खाणे दिया बजा ला कुसी भरोसा करणे

बाले भाई या बेहणा दा भरोसा कमजोर होई जांदा है, तां मै कदी भी ऐसा खाणा नी खाणा जिसदी बजा ला उस माणु दा भरोसा कमजोर होई जाऐ। (aiōn g165)

9 जडा कुछ मिजो खरा लगदा है, सै खाणे तांई मै अजाद है। मै प्रेरित है। मै प्रभु यीशु मसीह जो दिखया है। प्रभुए जडी सेबा मिजो करणे तांई दितियो है तूसां उस सेबा दा नतीजा न। 2 भले ही लोक ऐ नी मंदे की मै प्रभु यीशु दा प्रेरित है, पर तुहांजो ऐ गल्ल मनणा चाइदी न। क्योंकि मै ही तूसां बाल सारयां ला पहल्ले शुभसमाचार लेईकरी आया था, तूसां दा भरोसा जडा यीशु मसीह पर है, सै इसा गल्ला दा सबूत है की मै सच्ची तूसां तांई परमेश्वरे दा चुण्या चेला है। 3 जडे लोक मेरे प्रेरित होणे पर सबाल करदे न उना तांई मेरा ऐई जबाब है। 4 मेरा कने बरनबास दा पूरा हक है की, असां तूसां लोकां ला पैसे कने खाणे तांई सहायता लेई सकदे न। 5 जियां पतरस कने होर चेले कने प्रभु दे भाई जालू सेबा करणे तांई अपणी घरे बालियां सोगी जांदे न, तियां ही मेरे बाल ही हक है की मै ऐसा करूं। 6 मिजो कने बरनबास जो भी होर प्रेरितां सांई आर्थिक सहायता लेणे दा हक है, कने अपणियां जुस्तरां जो पूरा करणे तांई कम्म करणे दी जरूरत नी है। 7 कोई भी माणु अपणे खर्च पर सिपाई दा कम्म नी करदा। इक माणु जडा अंगूरा दा बाग लांदा है सै भी उदा फल खाणे दी उम्मीद रखदा। भेडां दी रखबाळी करणे बाला भी उना दा दूध पिणे दी उम्मीद रखदा। 8 मै ऐ सारियां गल्लां माणुआं दिया सोचा दे मुताबिक नी बोलदा है। 9 मूसा दी व्यवस्था भी ऐई बोलदी है। क्योंकि मूसा दिया व्यवस्था च लिखया है, “गांण गांटे बकते दांटे दा मु मत बनदो।” क्या तुहांजो लगदा है की परमेश्वरे जो दांदा दी ही चिंता है? नी बिलकुल भी नहीं! 10 परमेश्वरे ऐ खासकर सांझो तांई ही बोलया है। कने ऐ साडे तांई ही लिखया है, क्योंकि हल बांणे बाला आस रखीकरी ही खतरां जो बांदा है, कने गांणे बाला फसल मिलणे दी आस रखीकरी ही फसल गांदा है। 11 असां तुहांडे बिच आत्मिक बी राया है, इस तांई ऐ उम्मीद करणा बडी बड़ी सहायता है, की तूसां साडे खर्च तांई पैसे देन। 12 अगर तूसां दुज्जे लोकां दी गल्लया किती है जिना तूसां बाल आस आस करी प्रचार किता, तां बरनबास कने मेरा जादा हक बणदा है की तूसां साडियां जुस्तरां जो पूरा करा। क्योंकि असां सारयां ला पहल्ले तुहांजो शुभसमाचार सुणया, पर असां इसा गल्ला तांई तूसां पर भोज नी पाया। इदे बजाऐ असां सब कुछ सेहन करणे तांई तैयार थे, ताकि साडे मसीह दे बारे च शुभसमाचार पर भरोसा करणे ला कुसी जो भी परेशानी ना होऐ। 13 तूसां जाणदे न की, जडे लोक मंदरा च सेबा करदे न, उना जो उना दा खाणा मंदरा ला ही मिलदा है, कने जडे वेदी पर बलि चढांदे न, उना जो उस बलि दे चढाबे चे ही हिस्सा मिलदा है। 14 इस तांई प्रभुए हुकम दितिया है की शुभसमाचार सुणणे बालयां दी रोजी रोटी उना लोकां ला मिलणी चाइदी जडे शुभसमाचार सुणदे न। 15 पर इना हकां चे मै कदी कुसी दा भी इस्तेमाल नी किता। कने ऐ गल्लां मै इस तांई नी लिखियां की, हण तूसां मेरे तांई ऐसा करा। नी बिलकुल भी नी! मेरे तांई मरणा ठीक है, इदे बजाऐ की मै तूसां ला सहायता मंगे, अगर मै तूसां ला मुजदुरी लेई तां फिरी मै इसा गल्ला पर घमंड नी करी सकदा, की मै बिना कुछ लियो तूसां तांई कम्म किता। 16 इस तांई अगर मै शुभसमाचार सुणा, तां इदे च घमंड करणे बाली कोई गल्ल नी है; क्योंकि प्रभु यीशुए मिजो ऐ कम्म करणे दा हुकम दितया है, अगर ऐ कम्म मै नी करे तां मिजो बदा दुख होणा। 17 क्योंकि अगर मै अपणिया इच्छा ला ऐ कम्म करदा है, तां मिजो मजदुरी मिलणी। कने अगर ऐ कम्म बिना इच्छा ला करदा है, तां ऐ सिर्फ परमेश्वरे दी दितियो जिम्मेबारियां जो पूरा करदा है, तां मै कोई भी मजदुरी दी उम्मीद नी करी सकदा। 18 तां क्या है मेरी मजदुरी? मेरी मजदुरी ऐई है की मै बिना मजदुरी लियो मुफ्त च शुभसमाचार दा प्रचार करूं। होर कुछ नी मिजो इदे च ही खुशी है की मै मुफ्त च ही शुभसमाचार दा प्रचार करूं, हालांकि मिजो बाल पूरा हक है की मै अपणी मजदुरी इना ला मंगी सके। 19 इदा मतलब ऐ है की मै लोकां दियां गल्लां जो मणणे तांई मजबूर नी है, सिर्फ इस तांई की सै मेरी सहायता करदे न, फिरी भी मै सारयां दा सेबक बणया, ताकि मै उना जो मसीह च लेई ओऐ। 20 जालू मै यहूदी लोकां सोगी था, तां मै उना सांई जिन्दगी जिन्दा था ताकि मै उना जो मसीह च लेई ओऐ; जालू मै यहूदी व्यवस्था जो मणणे बालयां सोगी रेंदा था, तां मै अपु भी उस व्यवस्था दे अधीन रेंदा था, हल्ले की मिजो उस व्यवस्था जो मणणे दी जरूरत नी है, पर मै सै इस तांई मनदा है ताकि मै व्यवस्था दे अधीन रेणे बालयां जो मसीह च लेई ओऐ। 21 ठीक तियां ही होर जातियां सोगी

था, तां उना सांई जिन्दगी जी, ताकि उना जो भी मसीह च लेई ओऐ, पर मै जाणदा की मै परमेश्वरे दी व्यवस्था दे बौर नी जिन्दा था, क्योंकि मै, मसीह दी व्यवस्था दे अधीन ही है। 22 जालू मै उना लोकां सोगी होंदा है, जिना दा भरोसा कमजोर है, तां मै उना सांई व्यवहार करदा है, ताकि मै उना जो मसीह दे पिच्छे चलणे च सहायता करी सकूं, मै हर इक माणुए तांई कुछ न कुछ बणया है ताकि कुसी न कुसी तरीके ला कुछ लोकां दा उद्धार होई सके। 23 कने मै सारा कुछ मसीह दे बारे च शुभसमाचार जो सुणणे तांई करदा है, ताकि मिजो शुभसमाचार दी आशीषां च हिस्सा मिली जाऐ। 24 तूसां जाणदे न की, दौडा च तां सारे दौडदे न पर इनाम इकी जो ही मिलदा है। तूसां इयां दौडा की इनाम तुहांजो मिल्ले। इयां ही सांझो सै सब कुछ करणा चाइदा जिदे ला असां परमेश्वरे जो खुश करी सकन। ताकि सांझो सै इनाम मिली सके जडा परमेश्वरे ओणे बाले बकत च सांझो देणा। 25 कने जडे लोक दौडा च हिस्सा लेणा चांदे न, सै पहल्ले इदी तैयारी करदे न, अपणी इच्छां पर काबू रखदे न, सै ऐसा इस तांई करदे न ताकि जिती सकन कने इज्जत मिल्ले। उना दी इज्जत करणे तांई पतयां दी बणियो माला दिन्दे न, जडी जल्दी सुकी जांती है। पर असां जडे यीशु मसीह पर भरोसा करदे न, साडी इज्जत होणी है जडी, कने सांझो ऐसी आशीष मिलणी है, जडी युगां-युगां तांई बणी रेणी है। इस तांई सांझो होर भी जादा सबर रखणा चाइदा। 26 इस तांई मै अपणी मसीह जिन्दगी जो इक पक्के मकसद सोगी जी दा है, जियां इक कुशती लडने बाला पलबाण लडदा है कने सै होआ च मुक्के नी मारदा है। 27 मै अपणे शरीर जो काबू च रखदा है, ताकि मै शरीर दियां इच्छां पर काबू करी सकूं; इयां ना हो की मै होरां जो शुभसमाचार दा प्रचार करूं, मिजो अपु जो ही इनाम नी मिल्ले।

10 हे मसीह भाईयो, मै चांदा है, की तूसां इसा गल्लां जो याद रखा की बडे पहल्ले साडे बाप दादयां सोगी जंगला च क्या होया था। परमेश्वरे इक बदल भेजी करी अणुबाई किती, जडा उना दे अग्ने-अग्ने चलदा था। कने उना जो लाल समुंद्र ला निकाली करी सुक्की धरतिया पर लेई आया। 2 जियां असां प्रभु यीशु दे चेले बणने तांई बपतिस्मा लेंदे न, तियां ही सै भी सारे बदला दिया छांआ च थे कने मूसा दे चेले बणने तांई लाल सागरे चे गे। 3 कने सारयां सेई रोटी खादी, जडी परमेश्वरे उना जो स्वर्ग ला दिती। 4 कने उना सबना सेई पाणी पीता जडा परमेश्वरे उना जो दिता था, उना इक चट्टान ला निकलने बाले पाणिए जो पीता, कने उस चट्टाना दी तुलना मसीह सोगी करी सकदे न जिना उना सोगी रेईकरी उना जो जिन्दगी दिती। 5 पर परमेश्वर उना चे मतयां ला खुश नी था, इस तांई तां सै सुनसान जगा च मरी गे। 6 ऐ सारियां गल्लां साडे बाप दादयां न इस तांई होईयां ताकि सांझो चित्तबननी मिल्ले की अगर असां भी इना सांई बुराई करणे दी इच्छा करगे, तां जडा उना सोगी होया सै साडे सोगी भी होई सकदा है। 7 कने तूसां मृतियां दी पूजा मत करा, जियां उना चे मते लोकां किता था, ऐ ठीक तियां है जियां पबित्र शास्त्र च लिखया है, “लोक धामा च खांणा पीणा बैठे, कने रंगरलियां मणणे तांई उठे।” 8 कने शरमिदा होणेबाला कम्म कोई मत करा; जडा साडे बाप दादयां चे केईयां किता; कने इक ही रोजे तेरेई हजार लोक मरी गे। 9 कने प्रभु जो मत परखा; जियां उना चे मते लोकां किता, कने जहरीले सपां सै डस्से कने सै मरी गे। 10 बुडबुड मत जियां उना चे मते लोकां किता, कने परमेश्वरे इक स्वर्गदूते जो भेजी करी सै मारी दिते। 11 पर ऐ सारियां गल्लां, जडियां साडे बाप दादयां सोगी हुईयां, सै इस तांई हुईयां ताकि ऐ सारे लोकां तांई उदाहारण बणे, कने ऐ गल्लां सांझो चेतानबी देणे तांई लिखियां न, जडे इस संसारे च इना आखरी दिना च रे दे न। (aiōn g165) 12 इस तांई अगर ऐथु कोई ऐसा माणु है जडा बोलदा है की, परमेश्वरे पर उदा भरोसा मजबूत है, तां सै ध्यान रखे की, कुथी ऐसा ना हो की सै अचानक भरोसे ला भटकी जा कने पाप करी ले। 13 पाप करणे दियां इच्छां साडे बाल जस्त्र ओदियां न, पर परमेश्वर भरोसे दे लायक है; क्योंकि सै तूसां जो कदी एसियां परखा च नी पोणा दिन्दा, जिसदा तूसां सामणा नी करी सकदे, पर इदे बजाऐ उनी तूसां जो शक्ति देणी, जिसदी तूसां जो जरूरत है, ताकि तूसां पापां ला बची सकन। 14 इस तांई, हे मेरे प्यारे भाईयो, मृतियां दियां पूजा करणे ला बची रिया। 15 मै तुहांजो समझदार समझीकरी गल्लां बोलदा हा है, इस तांई इना गल्लां पर ध्याने ला सोचो बिचार करा जडियां मै हण बोलाणा लागया की सै सही न या गलत न। 16 जालू असां प्रभु भोज च इस्तेमाल होणे बाले कटोरे ला अंगूरा दा रस्स पिंदे न, कने जिस तांई असां परमेश्वरे दा धन्यवाद करदे न, तालू असां सच्ची मसीह दे खने जो साझा करदे न। कने जालू असां रोटी तोडदे न कने

खांटे न, तां असां सच्चे मसीह दे शरीर जो साझा करते न। 17 इस ताई की, इक ही रोटी है जडी की मसीह है, भले ही असा केई न, असां इक शरीर बणी जादे न; क्योंकि असां सारे उसा इकी रोटिया चे खांदे न। 18 इस्राएल देशे दे लोकां दे बारे च सोचा, जालू सै परमेश्वरे जो चढाणे बाले खाणे जो खांदे न, तां परमेश्वरे दी पूजा च हिस्सा लेंदे न, इयां ही जडे लोक मूर्तियां जो चढाणे बाले खाणे जो खांदे न, सै भी उना मूर्तियां दिया पूजा च हिस्सा लेंदे न। 19 मेरे बोलणे दा मतलब ऐ नी की मूर्ति या मूर्तियां सामणे चढाईयां बलियां दी कोई कीमत है। 20 पर मै ऐ बोला दा है की, जडे लोक उना मूर्तियां ताई चीजां दियां बलियां चढांदे न, सै परमेश्वरे ताई नी पर बुरियां आत्मा ताई चढांदे न, मै ऐ नी चांदा की तुसां बुरियां आत्मा दे हिस्सेदार बणा। 21 ऐ होई नी सकदा की तुसां प्रभु दे कटोरे चे पीया कने बुरियां आत्मा दे कटोरे चे भी पीया; इयां ही ऐ भी नी होई सकदा की तुसां प्रभु दी मेज च हिस्सेदार होआ कने बुरियां आत्मा दे मेज च भी। 22 अगर असां ऐसा करते न तां असां प्रभु दे गुरसे जो भडकांदे न। याद रखा असां परमेश्वरे ला जादा शक्तिमान नी न। 23 तुसां बोलंदे न की, साडे बाल सारियां चीजां करणे दी अजादी है, हां पर सारियां चीजां साडे फायदे ताई नी न। असां सब कुछ करणे ताई अजाद, पर सारियां चीजां परमेश्वरे पर भरोसे जो नी बददिया। 24 तुसां चेर कुसी जो अपने बारे च ही नी सोचना चाईदा, पर दुज्जे दिया भलाईयां ताई भी सोचना चाईदा। 25 पर जालू तुसां बजारां च मास खरीदंदे न, तां उसयो खरीदी करी खाई लिया, ऐ मत पुच्छा की ऐ मूर्तियां सामणे बलि कितया था की नी, तां तुसां दिया अंतरात्मा परेशान नी होणा। 26 तुसां इसयो खाई सकंदे न, क्योंकि पबित्र शास्त्र च लिखया है की, “धरती कने जडा कुछ उसा च है; सै सब कुछ प्रभु दा है।” 27 कने अगर कोई भरोसा नी करणे बालयां चे तुहांजो खांणे ताई सदे, कने तुसां जाणा चान, तां जडा कुछ तुहाडे सामणे खाणे ताई रखणे तां उना ला ऐ मत पुच्छे की ऐ खाणा बलि कितया है की नी, ताकि अगर सै बलि कितया होंगा, तां उस खांणे दिया बजा ला तुसां दिया अंतरात्मा तुहांजो दोषी नी बणाणा। 28 पर अगर कोई तुसां जो बोले, “ऐ तां मूर्तियां जो चढाया खांणा था,” तां तुसां उस खांणे जो मत खांदे, अपनी अंतरात्मा दिया बजा ला नी, पर उदिया अंतरात्मा दिया बजा ला जिनी तुहांजो ऐ गल्ल दस्सी थी। क्योंकि मेरी अपनी खाणे दी अजादी जो कुसी होसरी माणुऐ दिया अंतरात्मा जरियो न्याय नी कितया जाणा चाईदा। 30 अगर मै धन्यबाद करिरी मूर्तियां सामणे बलि कितियां चीजां खाई लेंदा है, तां उस ताई मिंजो पर कजो दोष लगांदे न, जिस खांणे ताई मै परमेश्वरे दा धन्यबाद कित्या? 31 कने इदा जबाब ऐ है, चाऐ तुसां खा, या पिया, चाहे जडा कुछ करा, पर सारा कुछ परमेश्वरे दिया महिमा ताई करा। 32 मै जडा कुछ भी करता है, उदे च मै सारयां जो खुश करणे दी कोशिश करता है; मै अपनी भलाई नी सोचदा पर सारयां दी भलाई सोचदा है ताकि सारे बची सकन। इस ताई तुसां भी इस तरीके ला जिया की तुसां यहदी लोकां ताई, या होर जाति दे लोकां ताई, या परमेश्वरे दिया कलीसिया दे लोकां ताई कोई परेशानी खडी ना होऐ, जिसा बजा ला सै मसीह पर भरोसा करणा छडी देन।

11 जियां मै मसीह सांई जिन्दगी जिंदा है, तियां ही तुसां भी मेरे सांई जिन्दगी जिया। 2 हे मसीह भाईयो, मै तुहाडी तारीफ करता है, क्योंकि तुसां मिंजो सारियां गल्लां च याद करंदे न, कने जडियां शिक्षा मै तुसां जो दीतियां न, उना दा ध्याने ला पालन करा दे न। 3 पर इक गल्ल है जडी मै चांदा है की तुसां ऐ जाणी लिया की, हर इक मर्द दा मुंड मसीह है, कने इक घरे बालियो दा मुंड उदा घरेबाला है, कने मसीह दा मुंड परमेश्वर है। 4 इस ताई अगर कोई मर्द कलीसिया च प्राथना करंदे बकत या परमेश्वरे दा संदेश सुणांदे बकत अपना सिर ढकदा है, तां सै मसीह दा अनादर करता है जडा उदा सिर है। 5 पर जडी जनानी कलीसिया च बिना सिर ढक्यो प्राथना या परमेश्वरे दा बचन सुणा दी है, इदा मतलब ऐ है की सै अपने घरे बाले दा अनादर करदी है जडा उसा दा सिर है। सै उसा जनानिया सांई है जिसा जो शर्मिंदा करणे ताई उसा दा मुंडन करी दिन्दे न। 6 अगर सै जनानी मुंड नी ढकणा चांहादी, तां सै अपने बाल कटाई दे; पर अगर जनानिया ताई बाल कटवाणा सरमा दी गल्ल है, तां सै प्राथना या भविष्यवाणी करंदे बकत सिर ढकी ले। 7 मरदे ताई अपना सिर ढकणा खरा नी है, क्योंकि मर्द परमेश्वरे दी महिमा है, जिसयो परमेश्वरे अपने रूपे च बणाया है; पर जनानियां मर्दा दिया महिमा जो जाहिर करदियां न। 8 क्योंकि पहला मर्द जनानिया ला नी आया

था, पर पैली जनानी मरदे ला आईयो थी। 9 परमेश्वरे पेहले मरदे जो जनानिया दिया सहायता ताई नी बणाया, पर जनानिया जो मरदे ताई बणाया। 10 इसा बजा ला कने स्वर्गदांता दिया बजा ला भी, इक जनानिया जो अपने सिर जो ढकणा चाईदा, अपने अधिकारे दे चिन्न दे स्पे च। 11 तमी अगर असां भरोसा करणे बाले लोकां दी गल्ल करंदे न, तां ना जनानियां मरदा ला अजाद न, कने ना ही मरद जनानिया ला अजाद न। 12 हालांकि परमेश्वरे पैली जनानी मरदे ला बणाई, पर हुण जनानियां ही मर्दा जो जमादियां न; कने सै दोनो परमेश्वरे दिया तरफ ला न जिनी सारयां जो बणाया है। 13 मै चांदा है की तुसां अपु ही फेसला करा, की क्या इक जनानिया जो उघडे सिर सभा च परमेश्वरे दी प्राथना करणा सही है? 14 कुदरती तुसां ऐ जाणंदे नी, की अगर कोई मर्द लम्बे बाल रखे, तां उदे ताई ऐ सरमा दी गल्ल है। 15 अगर जनानी लम्बे बाल रखे तां उदे ताई शोभा है, कने उना जो अराधना च सिर ढकणा चाईदा। 16 पर अगर कुसी जो लंगा दा है मै गलत बोला दा है, तां तुसां ऐ जाणी लिया की साडी कलीसिया कने परमेश्वरे दियां कलीसियां दे ऐई रिबाज न। 17 जिना गल्लां दे बारे च हुण मै तुहांजो बोल्णा लगया, उना दी मै तारीफ नी करी सकदा है, क्योंकि कलीसिया च तुहाडे गिठे होणे ला तुहाडी भलाई नी पर बुराई ही होई है। 18 क्योंकि सारयां ला पैली गल्ल तां ऐ है, मै ऐ सुणया है, की जालू तुसां कलीसिया च अराधना ताई गिठे होंदे न, तां तुसां बिच अपु चे बणदी नी, कने मिंजो भरोसा है की उना दियां गल्लां च कुछ सच्चाई है। 19 तुसां जो क्या लगदा, की तुसां बिच जालू बटबारा होणा, तालू ही पता लगणा है की कुण परमेश्वरे दे चुणयो लोक न? नी कसे बिलकुल न? 20 जालू तुसां इक जगा च गिठे होंदे न, तां तुहांजो इसा गल्ला दी चिंता नी है, कि प्रभु यीशू मसीह दी मौत जो याद करणे ताई प्रभु भोज कियां खांणा चाईदा। 21 क्योंकि मिंजो पता लगया की तुसां चे केई लोक दुज्जयां सोगी बंडणे ला पेहले अपना खांणा खाई लेंदे न, जिसा बजा ला कुछ लोक भूखे ही चली जांदे न, कने केई शराबी होई जांदे न। 22 तुसां अपने घरां च खाई पी सकंदे न! तुसां परमेश्वरे दिया कलीसिया दा निरादर कने गरीबां दी बेईजती करंदे न। क्या मै इस कम्मो ताई तुहाडी तारीफ करां? मै ऐसा करणे ताई तुहाडी तारीफ नी करणी। 23 जडी शिक्षा मै तुहांजो दितियो थी, सेई शिक्षा है जडी मिंजो प्रभु ला मिलियो है, की प्रभु यीशू मसीह जिस राती पकडबाया गिया, तां उनी रोटी लोई, 24 कने परमेश्वरे दा धन्याबाद करिरी तोडी, कने बोल्या, “ऐ मेरा शरीर है, जडा तुहाडे उद्गार ताई बलिदान कितया जाणा, कने मिंजो याद करणे ताई इयां ही करंदे रिया।” 25 कने जालू सै रोटी खाई बैठे तां यीशूऐ अंगरा दे रसे ला भ्रम्या कटोरा लिया, कने बोल्या, “ऐ कटोरा मेरे खूने च नोई बाचा है, जालू कदी तुसां इसयो पीगे, तां मेरी याद ताई इयां ही करंदे रिया।” 26 क्योंकि जालू भी तुसां इसा रोटिया चे खांणे, कने इस कटोरे चे अंगरा दा रस पीगे, तां जालू दीनकर प्रभु मुडी नी ओऐ तां उदिया मौता दा प्रचार करंदे रिया। 27 इस ताई जडा कोई इस तरीके ला जडा मसीह दा निरादर करदा है प्रभु दी रोटी खा, या उस कटोरे चे पिऐ, तां सै प्रभु दे शरीर कने खूने दे खिलाफ पाप करदा है। 28 इस ताई हर इक माणु इसा रोटिया जो खाणे कने इस कटोरे चे अंगरा दा रस पीणे ला पेहले अपने आपे जो जांजी परखी ले की उदे अपने बिचार सही न। 29 क्योंकि जडा कोई रोटी जो खांणे कने कटोरे च पिंदे बेले प्रभु दे शरीर दी इज्जत ना करे, तां सै इस तरीके ला खाई पी करी अपने उपर सजा लेई ओंदा है। 30 ऐई बजा है की तुसां चे केई बीमार न, कने तुसां लोकां बाल कमजोर शरीर भी है कने केई लोक मरी भी गियो न, क्योंकि ऐ परमेश्वरे दी सजा है। 31 इस ताई अगर असां पेहले अपने आपे जो परखी लेंदे न, तां परमेश्वरे सांझो सजा नी देणी। 32 पर अगर परमेश्वर इस तरीके ला सांझो सजा दिन्दा है, तां सै सिर्फ सांझो सुधारदा है, ताकि सांझो न्याय बाले दिने संसारे दे लोकां सोगी सजा ना मिल्ले। 33 इस ताई, हे मेरे मसीह भाईयो, जालू तुसां प्रभु भोज खाणे ताई गिठे होंदे न, तां इक दुज्जे ताई स्का करा ताकि सोगी रोटी खाई सकन। 34 अगर कोई भूखा हो, तां अपने घरे खाई ले ताकि जालू तुसां गिठे होंदे न तां सही ढंगे ला व्यवहार करी सकन, ताकि परमेश्वर तुहांजो सजा ना दे, कने बाकि गल्लां दे बारे च जडियां तुसां लिखियां थियां, सै मै ओथु आई करी समझाई दिंगा।

12 हे मसीह भाईयो, तुसां मिंजो ला पबित्र आत्मा दे बरदाना दे बारे च पछया था, मै चांदा की तुसां इना बरदाना दे बारे च अच्छे ला जाणी लिया। 2 तुसां जाणंदे न, की परमेश्वरे पर भरोसा करणे ला पेहले कियां जिन्दगी जिन्दे थे।

तुम्हें भटकाई दितोये थे की तुम्हें बेजान मृतियों दी पूजा करन। 3 इस ताँई मैं चाँदा है तुम्हें इसा गल्ला जो जाणी लिया की परमेश्वरे दी दितियो पबित्र आत्मा दे जरिये कोई भी माणु ऐसा नी बोलदा की यीशु श्रापित है, कने पबित्र आत्मा दे जरिये ही सै बोली सकदा है की “यीशु ही प्रभु है।” 4 कने हुण केई किस्मा दे बरदान न, पर इना जो सारे बरदाना जो देणेबाला सिर्फ इक ही है, कने सै पबित्र आत्मा है। 5 कने लग-लग तरीके ला असां प्रभु दी सेवा करी सकदे, पर असां सारे इक ही प्रभु दी सेवा करते न। 6 कने परमेश्वर भी केई तरीके ला साड़िया जिन्दगिया च कम्म करदा है, पर ऐ सेई परमेश्वर है जडा असां सारयां दे जरिये कम्म करदा है। 7 परमेश्वरे सांझो सारयां जो इक दुज्जे विव्वासी भाई बेहणा दी सहायता ताँई ऐसा बरदान दितया है, जडा पबित्र आत्मा दी हाजरी जो प्रकट करदा है। 8 क्योँकि पबित्र आत्मा कुसी इकी माणुए जो अकली दियां गल्लां बोलणे दा बरदान दिन्दी, कने होर कुसी माणुए जो ज्ञान दियां गल्लां बोलणे दा बरदान दिन्दी है। 9 कने कुसी माणुए जो मसीह पर बडा जादा भरोसा करणे दा बरदान दिन्दा, कने कुसी जो ऐई पबित्र आत्मा दुज्जे माणुआं जो ठीक करणे दा बरदान दिन्दी है। 10 पबित्र आत्मा कुसी जो चमत्कार करणे दी शक्ति दिन्दी; कने कुसी जो परमेश्वरे दा संदेश देणे दा बरदान दिन्दी, कने कुसी जो ऐ परखणे दी समझ दिन्दी की पबित्र आत्मा दिया तरफा ला कने बुरियां आत्मा दिया तरफा ला मिलणे वाले बरदाना च क्या फर्क है। कने कुसी जो लग-लग भाषा बोलणे दा बरदान दिन्दी, जडी उना कदी नी सिखियो हो; कुसी जो इना भाषा दा मतलब दसणे दा बरदान दिन्दी। 11 पर ऐ सारे बरदान इक ही पबित्र आत्मा दे कम्म न, सै सारे मसीह पर भरोसा करणे बालयां जो बरदान दिन्दा है जदिया पबित्र आत्मा चाँदा है। 12 क्योँकि जियां माणुए दा शरीर ताँ इक है पर उदे अंग मते न, कने मते सारे अंग मिली करी इक शरीर बणादे न, इयां ही मसीह भी कने उस पर भरोसा करणे वाले भी इक न। 13 क्योँकि असां सारयां जडे यहदी न, या होर जाति न, या गुलाम न, या अजाद न, इक ही पबित्र आत्मा जरिये इक शरीर होणे ताँ बपतिस्मा लिया, कने सांझो सारयां जो इक ही आत्मा मिलीईयो, जियां असां सारयां इक ही कटोरे चे पिंटे न। 14 साडे शरीर च इक ही अंग नी है, पर मते सारे अंग न। 15 सोचा, अगर पैर बोले की, “मैं हथ नी है, इस ताँई मैं शरीर दा अंग नी है,” ताँ क्या उदे ऐसा बोलणे दिया बजा ला सै शरीर दा अंग नी है? 16 कने अगर कन बोले, “मैं हथ नी है, इस ताँई मैं शरीर दा अंग नी है,” ताँ क्या सै कन्ना दा ऐसा बोलणे दिया बजा ला सै शरीर दा अंग नी है? 17 अगर सारा शरीर हथ ही होदी ताँ सुणना कुथु ला था? अगर सारा शरीर कन ही होदा ताँ सिंघणा कुथु ला था? 18 पर परमेश्वरे अपनी इच्छा अनुसार शरीर दे सारे अंगा जो इक-इक करिरी ठीक जगा च रखया है। 19 अगर सारे इक ही अंग होदे, ताँ कोई शरीर नी होणा। 20 इस ताँई, भले ही शरीर दे मते अंग होदे न, पर शरीर इक ही है। 21 हथी हथां ला नी बोली सकदियां की, मिंजो तेरी जरूरत नी है, कने ना सिर पैरां जो बोली सकदा है की, “मिंजो तेरी जरूरत नी है।” 22 पर शरीर दे सै अंग जिना जो असां कमजोर समझदे न, सै बडे जन्ना नी। 23 कने शरीर दे जिना अंगा जो असां आदर दे काबिल नी समझदे न उना जो असां बडे ध्याने ला ढकी करी रखदे न। इस ताँई उना अंगा दी रक्षा करते न जिना जो दुज्जयां जो नी दस्सी सकदे, जालू की जादा आदर दे काबिल अंगा जो खास देखभाल दी जरूरत नी होदी। इस ताँई परमेश्वरे शरीर जो इस तरीके ला बणाया है की उना अंगा जो जादा आदर कने देखभाल होऐ जडे घट इज्जत दे काबिल न। 25 परमेश्वरे दे इस ताँई किता की शरीर दे सारे अंग इक दुज्जे ला मिल्ली करी रेन, कने शरीर दे सारे अंग इक दुज्जे दी देखभाल करन। 26 अगर साडे शरीर दा इक अंग बीमार है, ताँ उस सोगी शरीर दे सारे अंग दुखी होदे न, कने इयां ही साडे शरीर दे इक अंगे दी अच्छे ला देखभाल होदी है, ताँ पूरा शरीर खुश है। 27 इयां ही तुसां भी सारे मिली करी मसीह दे शरीर न, कने तुसां सारे उदे शरीर दे अंग न। 28 ताँ कने मसीह दे इस शरीर च जडी कलीसिया है, परमेश्वरे लग-लग लोकां जो लग-लग कम्म दितया है। पेहेले सै लोक जडे उदे प्रेरित न, दुज्जे परमेश्वरे दे संदेश देणेबाले, तीजे सै लोक न जडे सिखांदे न। उदे बाद सै लोक न जिना जो उनी चमत्कार करणे दा हक दितया है, कने सै लोक न जिना जो लोकां जो ठीक करणे दा हक दिता, फिरी सै न जिना जो दुज्जयां दी सहायता करणे दी ताकत मिलियो, फिरी सै न जडे अण्वे न, फिरी सै न जिना जो पबित्र आत्मा जरिये लग-लग भाषा बोलणे दा बरदान मिलिया, जडियां उना कदी सिखियां नी थियां। 29 हर कोई प्रेरित नी होदा। हर कोई परमेश्वरे दा संदेश

देणेबाला नी होदा। कने हर कुसी बाल चमत्कार करणे दा हक नी होदा। 30 हर कुसी जो लोकां जो ठीक करणे दा बरदान नी मिलिया होदा। कने हर कुसी जो लग-लग भाषा बोलणे दा बरदान नी मिलिया होदा, जडियां उनी कदी भी नी सिखियां होन। 31 हर कुसी जो लग-लग भाषा दा मतलब दसणे दा बरदान नी मिलिया, जडियां उनी कदी नी सिखियां। इस ताँई पबित्र आत्मा ला बडे ला बडा बरदान पाणे दी इच्छा रखा! पर मैं हुण तुसां जो दसणा की इदे ला भी खरा क्या है।

13 अगर मैं माणुआं, कने स्वर्गदूतां दी भाषा बोले, कने मैं लोकां सोगी प्यार ना करे, ताँ मेरा बोलणा ठण-ठण करदी पितल कने छण-छण करदी झांझ साँई है। 2 कने अगर मैं परमेश्वरे दा संदेश देई सके, कने सारे भेदां कने हर तरा दे ज्ञाने जो समझीं सके, कने ऐथू दीकर की मेरा परमेश्वरे पर पूरा भरोसा हो की, मैं पहाडे जो हटाई दे, पर दुज्जे सोगी प्यार नी करे, ताँ मेरी कोई कीमत नी। 3 कने अगर मैं अपनी सारी जमीन जायदाद गरीबां जो बंडी दे, या उना जो अपना शरीर फुकणे ताँई देई दे, कने दुज्जे सोगी प्यार नी करे, ताँ इदे ला मिंजो कोई फायदा नी। 4 जडे लोक दुज्जयां सोगी प्यार करदे न, सै सबर रखणेबाले कने दयालू होदे न, सै लोक जलन नी करदे; कने ना सै अपनी बंडी करदे न कने न अपने बारे च घमंड करदे। 5 सै लोक कुसी सोगी भी बुरा व्यवहार नी करदे, सै अपनी ही खुशी दे बारे च ही नी सोचदे, सै झट गुस्सा नी करदे, कने सै उना बुरियां गल्लां जो याद नी रखदे, जडियां उना दे खिलाफ कृतियां होन। 6 जालू लोक बुरे कम्म करदे न ताँ सै खुश नी होदे, पर सै तालू खुश होदे जालू लोक सही कम्म करदे न। 7 सै कदी हार नी मदे, प्यार सांझो हर तरा दे हालातां च परमेश्वरे पर भरोसा करणा कने आस रखणे दे काबिल बणादा है, ऐ दुख कने परेशानियां च सबर रखणा सिखांदा है। 8 सै बकत ओणा जालू लोकां परमेश्वरे दे संदेश दा प्रचार होर-होर भाषा च नी करणा, कने परमेश्वरे दे बारे च खास ज्ञाने दी जरूरत नी होणी, पर प्यार हमेशा ताँई बणी रेणा। 9 क्योँकि साडां खास ज्ञान कने परमेश्वरे दे संदेश दे बारे च प्रचार करणे दी शक्ति, दोनों अधुरियां न। पर जालू उनी ओणा है जडा पूरा कने सिद्ध है, तालू जडा अधुरा है उदी जरूरत नी रेणी। 11 ऐ इक माणुए दे बडे होणे साँई। जालू मैं इक बच्चा था, ताँ मैं बच्चे साँई बोलदा कने सोचदा समझदा था, पर जालू मैं बडा होई गिया, ताँ मैं बचपने दे तरीके छडी दिते। 12 इसा जिन्दीयां च असां सब कुछ पूरी तरा नी समझदे न। ऐ तियां है जियां कोई माणु अपनी शकल धुन्दले सीसे च दिखदा है। पर जालू असां स्वर्ग च जांदे न, तालू असां सब कुछ साफ-साफ समझणा। ऐ कुसी सोगी आमणे सामणे गल्ल करणे साँई होणा। हुण असां सब कुछ जाणदे न जडा परमेश्वर सांझो सिखाणा चाँदा है। तालू असां सब कुछ जाणी जाणा, जियां परमेश्वर सांझो जाणदा है। 13 इस ताँई हुण असां तिन गल्लां जो करदे न: परमेश्वरे पर भरोसा रखा, परमेश्वरे दे बायदे पर आस रखा। पर इना गल्लां च सारयां ला बडी गल्ल इक दुज्जे ला कने परमेश्वरे ला प्यार करणा।

14 इक दुज्जे ला प्यार करणे दी कोशिश करा, कने पबित्र आत्मा दे बरदान पाणे दी बडी इच्छा रखा, खासकर परमेश्वरे दा संदेश देणे दा बरदान पाणे दी इच्छा रखा। 2 क्योँकि जडा होर-होर भाषां च गल्लां करदा है, उसा भाषा जो कोई नी समझी सकदा, सै माणुए ला नी, पर परमेश्वरे ला गल्लां करदा है। इस ताँई कोई भी नी समझदा की सै क्या बोला दा है, क्योँकि सै पबित्र आत्मा दिया शक्तिया ला गुन गल्लां बोलदा है। 3 पर जडा भविष्यवाणी करदा है, सै भरोसा करणे वाले लोकां जो उना दे भरोसे च मजबूत करदा, कने उना दे मना जो हौसला कने तसल्ली देणे ताँई सहायता करदा है। 4 होर-होर भाषां च गल्लां करणे बाला माणु अपने आप दा भरोसा मजबूत करदा है, पर जडा भविष्यवाणी करदा है, सै कलीसिया दे सारे भरोसा करणे वाले लोकां दे भरोसे जो मजबूत करदा है। 5 मैं चाँदा है, की तुसां सारे होर भाषा च गल्लां करा, पर इसला बडिया गल्ले दे की तुसां भविष्यवाणी करा। क्योँकि सै जडा भविष्यवाणी करदा है, उस होर भाषा च बोलणे वाले ला, जडा मतलब दसयो बिना होर भाषा च बोलदा है, बेहतर है क्योँकि मतलब पता लगणे ला ही कलीसिया दे लोकां दी तरक्की होई सकदी है। 6 इस ताँई हे मसीह भाईयो, अगर मैं तुहाडे बाल आई करी होर भाषा च गल्लां करे, कने इदा मतलब नी समझाईं सके ताँ इदे ला तुहांजो क्या फायदा होणा? इदे बदले अगर मैं तुहांजो सै दस्से जिदा परमेश्वरे मिंजो प्रकाशन दितया, या सच्चाईया दा ज्ञान, भविष्यवाणियां, या उपदेश दियां गल्लां दस्से, इदे ला तुहांजो जादा

फायदा होणा। 7 इयां ही अगर कोई बिणया या बंसरी बजांदा है, कने अगर इना दिया अबाजा च कोई फकं नी है, तां बाकियां कियां पछणना की ऐ बिणया या बंसरी है? 8 कने अगर लडाई दे बकन तुरही दी अबाज साफ नी सुणुऐ, तां सिपाई लडाईऐ तांई तैयार नी होई सकदा। 9 इयां ही, जालू तसां ऐसे शब्द बोलदे न जिना जो लोक समझी नी सकदे न, तां ऐ होआ च गल्लां करणे सांई है कने जडा तसां बोला दे न उदी कोई कीमत नी होणी। 10 इस ससारे च मतियां लग-लग भाषां न कने हर भाषा दा अण्णा मतलब है। 11 पर अगर असां उस भाषा दा मतलब नी समझदे न, जडे दुज्जे बोलदे न, तां ऐ ऐसा होणा मन्ना की सै साडे तांई परदेसी न, कने असां उना तांई परदेसी न। 12 इस तांई जालू तसां आत्मिक वरदान पाणे दी इच्छा रखदे न, तां पबित्र आत्मा तुहांजो वरदान दिन्दा, तां उना वरदाना ला इस्तेमाल करणे तांई कोशिश करदे रिथा ताकि इना वरदाना ला कल्लीसिया दे लोकां दा भरोसा होर जादा मजबूत हो। 13 इस तांई जडे होर भाषा च परमेश्वरे ला गल्लां करदे न, सै प्राथना करन की जडा सै बोला दे न उदा मतलब दुज्जयां जो समझाई सकन। 14 क्योंकि जालू मै होर भाषा च प्राथना करे, तां मेरी आत्मा प्राथना करदी है, पर मेरा मन इसयो नी समझदा है। 15 कने इसा बजा ला जालू मै प्राथना करे तां मै पबित्र आत्मा दी अगुवाई च प्राथना करे, पर मै ऐ भी चांदा है की दुज्जे लोक समझी सकन की मै क्या बोला दा है। कने जालू मै भजन गां तां सै भी पबित्र आत्मा दी अगुवाई च हो, पर ऐ भी जरूरी है की जडा मै भजन गा दा है सै भी दुज्जे लोक समझन। 16 मना की कोई आम बन्दा तुहाडिया अराधना च है कने तसां अपणी आत्मा ला परमेश्वरे दी अराधना करा दे न। अगर सै तुहाडियां गल्लां जो नी समझदा, तां तुहाडा परमेश्वरे जो धन्याबाद देणे बादा, उसयो कियां पता लगणा की अमीन कालू बोलणा जिस बारे च तसां बोलया। 17 त् तां सही ढंगे ला परमेश्वरे दा धन्याबाद करदा होंगा, पर इदे ला दुज्जे लोकां दा भरोसा मजबूत नी होंदा। 18 मै अपने परमेश्वरे दा धन्याबाद करदा है, की मै तसां ला जादा होर भाषा च गल्लां करदा है। 19 पर जालू मै कल्लीसिया दे लोकां च होंदा है, तां मेरे तांई ऐई खरा है की उना जो सिखाणे तांई समझणे दे पंज अखर बोले जडे सै समझी सकन। ना कि इदे बजाए होर भाषा च दस हजार गल्लां बोले, जिना जो कोई नी समझे। 20 हे मसीह भाईयो, तसां इना गल्लां जो समझणे तांई बचयां सांई मत बणा; पर बुराईया तांई बचयां सांई मासूम बणा, पर इना गल्लां जो समझणे तांई सियाणे बणा। 21 पबित्र शास्त्र च लिखया है, की प्रभु बोलदा है की, “मै बिदेशी कने अजनबी लोकां दे जरिये अपने लोकां ला गल्लां करणियां, जिना अजीब या लग भाषा बोलणियां, तमी उना मेरियां गल्लां नी सुणनियां।” 22 इस तांई होर भाषां भरोसा करणे बालयां तांई नी, पर भरोसा नी करणे बालयां तांई इक निशाण है, कने परमेश्वरे दे संदेश दसणा भरोसा नी करणे बालयां तांई नी, पर भरोसा करणे बालयां तांई इक निशाण है। 23 इस तांई अगर कल्लीसिया दे लोक इक जगा गिठे होन, कने सारे होर भाषा च परमेश्वरे ला गल्लां करन, कने कोई जडे ऐ भाषा नी समझदे होन या कोई भरोसा नी करणे बाले अंदर आई जान तां उना पक्का सोचणा की तसां पागल होई गियो न। 24 पर अगर सारे परमेश्वरे दे संदेश दसणा लगमे, कने अगर कोई भरोसा नी करणे बाला या इस बरदान दे बारे च अनजाण माणु अंदर आई जा, तां उसयो ऐहसास होई जाणा की सै पापी है, कने उनी अपणी जिंदगी तसां दे बोलणे दिया बजा ला बदली देणी। 25 परमेश्वरे दे शुभसमाचार दिया बजा ला उसयो उदी बुराई कने उदे मने दे बुरे बिचारां दा ऐहसास होणा, कने उसयो ऐहसास होणा की सै पापी है कने उनी पापां दा पश्चाताप करणा, कने गोडे भार बेईकरी परमेश्वरे दी अराधना करणी। कने मन्नी लेणा की, सच्ची परमेश्वर तुहाडे बिच है। 26 इस तांई हे मसीह भाईयो, सुणा तुहांजो क्या करणा चाईदा? जालू तसां अराधना तांई गिठे होंदे न, तां तसां च इकी माणुऐ प्रभु दे भजन गाए, कने इक ही परमेश्वरे दे दितयो प्रकाशन दसे, कने इक ही होर भाषा च परमेश्वरे ला गल्लां करे, कने होर दुज्जे इदा मतलब दसन। ऐ सारा कुछ तुहांजो भरोसा करणे बाले लोकां जो मजबूत करणे तांई करणा चाईदा। 27 अगर होर भाषा च परमेश्वरे सोगी गल्लां करणियां चांदे न, तां सिर्फ दो या तिन जणे बारी-बारी बोलन, कने इक माणु इना भाषा दा मतलब दसणे बाला होणा जरूरी है। 28 पर अगर होर भाषा दा मतलब दसणे बाला कल्लीसिया च कोई नी है, तां सै माणु कल्लीसिया च चुप रे, कने अपने मने च परमेश्वरे ला गल्लां करे। 29 परमेश्वरे दा संदेश देणेबालयां च दो या तिन ही परमेश्वरे दा संदेश देन, कने बाकी लोक ऐ दीखन की जडा सै बोला दे न सै पबित्र शास्त्रे अनुसार ठीक है की नी है। 30 पर

अगर कुसी दुज्जे माणुऐ जो जडा कल्लीसिया च बैठया हो, उसयो परमेश्वरे दिया तरफा ला कोई संदेश मिलले, तां जडा पेहले बोलणा लगया हो सै चुप होई जाऐ कने उसयो बोलणा दे। 31 क्योंकि तसां सारे परमेश्वरे दा संदेश देई सकदे न, पर इक-इक करिरी, ताकि हर कोई सिखे कने सारयां जो हिम्मत मिलले। 32 कने परमेश्वरे दा संदेश देणेबाला अपने आप पर काबू रखे; सै अपणिया इच्छा ला बोली सके कने अपणिया इच्छा ला बोलणा बंद भी करी सके। 33 क्योंकि परमेश्वर गडबडी दा नी पर शांति दा परमेश्वर है। इसी नियमे जो परमेश्वरे दियां सारियां कल्लीसियां मंदियां न। 34 जनानिया कल्लीसिया च चुप रेन, क्योंकि उना जो गल्लां करणे दा हुकम नी है, पर अधीन रेणे दा हुकम है। जियां मूसा दिया व्यवस्था च भी लिखया है। 35 अगर सै कुछ सिखणा चादिया न तां सै कल्लीसिया च जादा सबाल जबाब ना करन, पर धरे जाई करी अपने धरे बाले ला पछन, क्योंकि जनानिया दा कल्लीसिया च गल्लां करणा सही नी है। 36 ऐसा क्या है की तसां च कुछ लोक पेहले दसियो व्यवस्था जो नी मण्णा चांदे? क्या तुहांजो लगदा है की तसां पेहले न जिना जो परमेश्वरे दा बचन दितया है? या सिर्फ ऐ तुहांजो ही दितया था? 37 अगर कोई माणु अपने आप जो परमेश्वरे दा संदेश देणेबाला या ऐसा माणु समझे जिसयो पबित्र आत्मा बरदान दितया हो, तां ऐ समझी लिया की, जडियां गल्लां मै तुहांजो लिखियां न, सै प्रभु दा हुकम है। 38 अगर कोई माणु मेरियां लिखियां गल्लां जो ना मन्ने, तां तसां भी उदियां बोलियां गल्लां मत मन्ना। 39 हे मसीह भाईयो, परमेश्वरे दा संदेश देणे दी इच्छा रखा कने होर भाषा च परमेश्वरे ला गल्लां करणे तांई कुसी जो भी मना मत कर। 40 पर जडा कुछ भी तसां अराधना करदे बकत करदे न, उना सारियां गल्लां जो पुरे सभ्य तरीके ला करण।

15 हे मसीह भाईयो, मै तुहांजो सै ही शुभसमाचार याद करांदा है, जडा मै पेहले सुणाई बैठया है, जिस पर तसां पेहले भरोसा भी कित्ता था कने जिदे च तसां टिकयो भी न। 2 अगर तसां उस शुभसमाचार पर जिदा मै प्रचार कित्ता, तुहाडा भरोसा उस पर बणी रेगा तां परमेश्वरे तुहाडा उदार करणा; अगर तुहाडा भरोसा कमजोर होई जांगा तां उदी कोई कीमत नी कने सै बेकार है। 3 इसा बजा ला मै तुहांजो सारयां ला जरूरी संदेश दसया, जडा मिंजो प्रभु यीशु मसीह ला मिलया। कने सै संदेश ऐ है पबित्र शास्त्रे दे बचने अनुसार यीशु मसीह साडे पापां तांई मरी गिया। 4 कने धरती च दबया; कने पबित्र शास्त्रे दे अनुसार त्रिऐ रोजे मरयां चे जिन्दा भी होई गिया। 5 कने फिरी सै पतरस जो मिल्ला कने उदे बाद सै बारां चेलयां जो मिल्ला। 6 फिरी उदे बाद सै पंज सौ ला जादा चेलयां जो मिल्ला, जिना चे मते लोक हले दीकर जिदे न पर केई मरी गियो न। 7 फिरी उदे बाद याकूबे जो मिल्ला कने सारे चुणयो प्रेरितां जो भी मिल्ला। 8 कने सारयां ला बादे च उनी अपने आप जो मिंजो पर प्रेत कित्ता, जडा उस बच्चे सांई है जिदा जन्म सही बकत पर नी होया हो। 9 क्योंकि मै प्रेरितां च सारयां ला घट खास है, बल्कि प्रेरित बणने जोगा भी नी है, क्योंकि मै परमेश्वरे दिया कल्लीसिया दे लोकां जो सतया था। 10 पर अगर अज मै प्रेरित है तां सै परमेश्वरे दा अनुग्रह है: कने उनी जडा अनुग्रह मिंजो पर कितया है, सै बेकार नी होया। पर मै उना दुज्जे प्रेरितां ला जादा बदीकरी मेहनत कित्ती; तमी ऐ मेरिया तरफा ला नी होया, पर परमेश्वरे दे अनुग्रह मेरी बडी सहायता कित्ती की मै उदा कम्म करी सकें। 11 इस तांई अगर चाऐ मै है, या दुज्जे प्रेरित न, असां सारे मसीह दे बारे च प्रचार करदे न, कने इसी पर तसां भरोसा कित्ता। 12 हुण मै तुहांजो ऐ बोलणा चांदा; क्योंकि असां सारयां तुहाडे बिच ऐई प्रचार कित्ता की जालू मसीहा मरया तां परमेश्वरे उसयो जिन्दा कित्ता, तां तसां चे कोई भी ऐ ना बोले की परमेश्वरे भरोसा करणे बाले दे मरणे बाद उना जो जिन्दा नी करणा। 13 अगर मरणे बाद जिन्दा होणा नी होंदा, तां फिरी मसीह भी मरयां चे जिन्दा नी होया। 14 कने अगर मसीह मरयां चे जिन्दा नी होया, तां जिस संदेश दा असां प्रचार करदे न कने मसीह पर तुहाडा भरोसा करणा दोनो बेकार न। 15 इसला भी बदीकरी ऐ की असां परमेश्वरे दे इठे गबाह साबित होआ दे न क्योंकि असां उदे बारे च ऐ गबाई दीतियो है की उनी मसीह जो मरयां चे जिन्दा कितया है, पर अगर मरयो असल च जिन्दे नी होंदे न तां परमेश्वरे मसीह जो भी जिन्दा नी कितया है। 16 अगर मरयो लोक मौत ला बाद जिन्दा नी होंदे न, तां मसीह भी मौत ला बाद जिन्दा नी होया है। 17 कने अगर मसीह जिन्दा नी होया, तां मसीह पर तुहाडा भरोसा करणा बेकार है; कने

तुसां हले दीकर भी अपने पापां च जिया दे न। 18 अगर मसीह मरयां चे जिन्दा नी होया है, तां जडे मसीह च भरोसा करणे बाले लोक मरी गियो न, सै बचावयो नी न, बल्कि नाश होई गियो न, मतलब की ऐ की हमेशा तांई परमेख्वरे ला लग होई गियो न। 19 अगर असां सिर्फ ऐथू दी जिन्दगिया तांई मसीह पर आस रखदे न, तां इस संसारे दे माणुऐ ला साडी हालत जादा बुरी है। 20 पर सच्चाई ऐ की परमेख्वरे मसीह जो सारां ला पेहेले मरयां चे जिन्दा कितया है, सै इसा गल्ला दा सबूत है उनी सै जिन्दे करणे जडे मरी गियो न। 21 इस तांई जियां इक माणु आदम दे जरिये मौत इस संसारे च आई कने हण मरयां दा जिन्दा होणा भी इक माणुऐ जरिये है मतलब की यीशु मसीह जरिये शुरू होया है। 22 जियां आदम दिया बजा ला सारां दी मौत होंदी है, क्योकि असां उदे बंश न, तियां ही जडे माणु मतलब की मसीह सोगी जितणे भी लोक जुडयो न, उदा सारां मरयां चे जिन्दे होई जाणा है। 23 पर हर इक जणा अपणिया-अपणिया बारिया पर जिन्दा होणा; इदा सबूत ऐ है की मसीह सारां ला पेहेले जिन्दा किता, फिरी जालू मसीहे मुडी करी ओणा है, तां जडे लोक उदे सोगी मजबूत रिरता रखदे न उना जो मरयां चे जिन्दा करणा है। 24 कने फिरी जालू मसीहे परमेख्वरे दा बिरोध करणे बालियां सारियां बुरियां शक्तियां दा नाश करी देणा उदे बाद संसारे दा अंत होई जाणा। तालू मसीहे अपने पिता परमेख्वरे जो अपना राज्य सौंपी देणा ताकि सै उस परे तरीके ला राज्य करे। 25 पर जालू दीकर परमेख्वर उदे सारे दुशमणा जो पूरे तरीके ला राई नी दे, तालू खत्म मसीहा जो उस राज्य पर राज करणा चाईदा। 26 सारां ला आखरी दुशमणा दीकर करी देणा है, सै मौत है। 27 पबित्र शाश्व च भजनकार लिखदा है की, “परमेख्वरे सब कुछ मसीह दे अधिकारे थले करी देणा है,” पर इदे च परमेख्वर अपु शामिल नी है क्योकि सै ही है जिनी मसीह जो अधिकार दितया था। 28 कने जालू सारा कुछ मसीह दे मतलब की पुत्रे दे अधीन होई जाणा, तां पुत्रे भी अपु जो परमेख्वरे दे अधीन करी देणा। ताकि परमेख्वर जिनी अपने पुत्रे जो सारियां चीजां पर हक दितया है, ताकि परमेख्वर ही सारां तांई सारा कुछ होणा। 29 अगर मरयो लोक जिन्दे नी होंदे तां उना दा क्या होणा, जडे मरयो लोकां तांई बपतिस्मा लेंदे न? अगर परमेख्वर मरयो लोकां जो जिन्दा नी करदा तां लोक हण भी ऐसा कजो करदे न? 30 अगर मरयो लोकां दा जिन्दा होणा नी होदा है, तां ऐ साडे तांई मुर्खता दी गल्ल है की असां अपने आपे जो बार-बार कजो खतरे च पांदे रेंदे? 31 हे मसीह भाईयो, जियां ऐ गल्ल पक्की है की तुसां दे यीशु मसीह ला जुडने दिया बजा ला मै घमंड करदा है, तां ऐ गल्ल भी पक्की है की मिजो हर रोज मरणे दा खतरा है। 32 ऐथू इफिसस शेहरे च जिना लोकां मेरा जंगली जानवरां सांई बिरोध किता, कने जडे दुख उना मिजो दिते उना जो सेहन करणे दा क्या फायदा होया? कुछ भी नी! अगर ऐ सच्च होदा की मरयो लोक दुबारा जिन्दा नी होंदे न, तां खरा होदा की मै उना लोकां दी गल्ल मन्नी लेंदा जडे ऐ बोल्दे न की, “ओआ असां खांदे-पिंदे क्योकि अगर असां कल मरी गे तां सब कुछ खत्म होई जाणा।” 33 जडे इशुदियां गल्लां करदे न उना ला मुर्ख मत बणदे, “बुरी संगती खरे चरित्र जो बिगाडी दिन्दी है।” 34 तुसां होसा च ओआ कने पाप करणा छडी दिया; मै तुहांजो ऐ गल्ल शरमिदा करणे तांई बोला दा है, क्योकि तुसां बिच केई ऐसे न जिना दा परमेख्वरे सोगी रिरता ठीक नी है। 35 उदारण तांई अगर तुसां चे कोई पुच्छे की, “कियां परमेख्वर मरयां जो जिन्दा करदा या उना दा शरीर कदिया होणा,” 36 जडा भी इस तरीके दे सबाल पुछदा है तां सै मुर्ख है। तुसां जाणदे न की इक बी जालू उसयो जमिना च रांदे न, तां सै जालू दीकर सडी नी जांदा है, अंकुरित नी होदा है। 37 अगर तुसां धान या कोई होर बी रांदे न, तां तुसां पेहेले ला ही उगया बूटा नी लांदे न, बल्कि सिर्फ इक बी रांदे न। 38 पर परमेख्वर अपणिया इच्छा अनुसार उसयो बूटे दा रूप दिन्दा है; कने हर किसमा दे बी अपने स्पे च बददे न। 39 संसार च सारे प्राणियां दा शरीर इकोदिया नी हंदा, माणुआं दा शरीर डगरां सांई नी हंदा; चिडुआं पखेस्त्रां दा शरीर मछियां सांई नी हंदा। 40 कने जियां संसार दे प्राणियां दे शरीर केई तरा दे होंदे न, तियां ही अम्बरे च भी है, जियां की सूरज, चाँद कने तारे। आसमाने दियां चीजां दी सुन्दरता इको देई होंदी, कने धरती दियां चीजां च इक होर तरा दी सुन्दरता होंदी है। 41 सूरजे दी सुन्दरता लग है, चन्द्रमे दी सुन्दरता लग है, कने तारां दी सुन्दरता लग है, क्योकि इक तारे ला दुज्जे तारे दी सुन्दरता च फरक है। 42 इस तांई जालू मरयां लोकां दुबारा जिन्दे होणा, तालू उना सोगी भी ऐसा होणा। जिस शरीर जो सै दफनांदे न, सै ऐसा शरीर है जडा सडी जांदा है, पर जालू ऐ दुबारा जिन्दा होदा है, तां ऐ ऐसा शरीर

होणा है जडा सडी नी सकदा है। 43 जालू असां मरी जांदे न, तालू साडा शरीर बदसूरत कने कमजोर होदा है, पर जालू उना मरयां चे जिन्दा होणा, तां उना छेल कने ताकतबर होणा। 44 जियां साडे बाल मास कने खूने दा शरीर है, इयां ही ऐसे शरीर भी न जिना जो परमेख्वरे दी आत्मा जरिये जिन्दगी मिलदी है; साडे ऐ मास कने खूने दे शरीर उना शरीर च बदलूई जाणा जिसयो परमेख्वर दी आत्मा जरिये जिन्दगी मिलदी है। 45 पबित्र शाश्व च भी लिखया है, “पेहला माणु, मतलब की आदम, जिन्दा माणु बणया” कने आखरी आदम, मतलब की यीशु मसीह हमेशा दी जिन्दगी देणेवाला बणया। 46 सारां ला पेहला मांस कने खूने दा शरीर आया, फिरी सै शरीर आया जिसयो परमेख्वरे दिया आत्मा जिन्दगी दीता। 47 पेहला माणु आदम था धरतिया ला मतलब की मीटिया दा बणया था। दुज्जा माणु मसीह है जडा स्वर्ग ला आया है। 48 संसारे दे पेहेले माणु आदम सांई न तालू मीटिया दा बणया था, पर जडे स्वर्ग दे लोक न, सै स्वर्ग ला आयो माणु मतलब की मसीह सांई न। 49 असां सारां बाल आदम दा रूप है जिसयो मीटिया ला बणया था, इयां ही इक रोज सांझो मसीह दा रूप भी मिलणा, जडा स्वर्ग ला आया था। 50 हे मसीह भाईयो, मै तुसां जो बोल्दा है, इसा धरती पर साडे शरीर मांस कने खूने ला बणयो न; असां स्वर्ग च परमेख्वरे दे राज्य च अरणे इस शरीर सोगी नी रेई सकदे जडा मरी सकदा है, क्योकि ओथू कोई भी मौत नी है। 51 इस भेद दिया गल्लां जो सुणा, साडे चे कुछ भरोसा करणे बालयां केई लोकां नी मरणा। ऐ सारियां गल्लां पलक झपकदे ही होई जाणियां न। जालू आखरी तरुही बजाई जाणी, तां जडे लोक मरी गियो न, सै हमेशा दी जिन्दगी तांई दुबारा जिन्दे करणे न कने असां जडे जिन्दे न, साडे शरीर बदलूई जाणे। 53 क्योकि साडा शरीर जडा तोल्ली ही मरणे बाला कने सडने बाला है, जरूरी है की ऐ इक ऐसे शरीर च बदलूई जा जडा कदी नी मरदा कने सडदा हो। 54 कने जालू ऐसा होणा तालू ऐ गल्ल पूरी होई जाणी जडी परमेख्वरे पबित्र शाश्व च लिखियो की, “मौत जो हराई देणा कने उना कदी नी रेणा।” कने इयां पबित्र शाश्व च लिखया पूरा होई जाणा। 55 “हे मौत तेरी जित क्युतु है? हे मौत तेरा डंक क्युतु रिया?” इस तरीके ला पबित्र शाश्व च जडा लिखया था सै पूरा होया। (Hades g86) 56 क्योकि पाप ऐसा डंक है जिदा नतीजा मौत है, कने व्यवस्था दिया बजा ला पाप दी शक्ति साडिया जिन्दगिया च ओंदी है। 57 पर परमेख्वरे दा धन्यवाद हो, जडा सांझो साडे प्रभु यीशु मसीह दे मरणे जरिये पाप कने मौत पर जितांदा है। 58 इस तांई हे मेरे मसीह भाईयो, अपने भरोसे च मजबूत रिया कने कोई तुसां जो न भडकाए, कने प्रभु दे कम्मा च हमेशा बददे जा, क्योकि तुसां ऐ जाणदे न की तुसां प्रभु तांई मेहनत करदे न कने सै बेकार नी है।

16 यरूशलेम शेहरे दे परमेख्वरे दे पबित्र लोकां दी सहायता तांई जडा चंदा तुसां गटेरया, इदे बारे च तुसां मिजो ला सुआल पूछया था, कने हण मै इदे बारे च बोल्णा चांदा है, इदे बारे च जडियां गल्लां मै गलातिया प्रदेशे दिया कलतीसिया दे लोकां जो करणे तांई बोल्या था तुसां भी इयां ही करा। 2 हर तुआरे बाले रोजे तुसां चे हर इक माणु अपणिया कमाईया चे कुछ पैसे कडी करी लग रखी ले, ताकि जालू मै ओणा तां उस बकत तुसां जो दान गिटा करणे च परेशानी ना हो। 3 कने जालू मै ओथू रेणा तां मै उना लोकां जो भेजणा जडे तुहाडिया नजरा च भरोसेमंद न की सै यरूशलेम शेहरे जो दान लेईकरी जान। मै उना सोगी इक चिड्डी भी भेजी दिंगा ताकि ओथू दे भरोसा करणे बाले लोकां ने उना दी पछेण कराई सके। 4 अगर तुसां जो लग्गा दा है की मिजो जाणा चाईदा, तां सै मेरे सोगी जाई सकदे न। 5 कने मै मकिदूनिया प्रदेशे च जाणे बाद आई करी तुहांजो ने मिलणा है। क्योकि मै मकिदूनिया प्रदेशे जो जाणे दी योजना बणा दा है। 6 पर होई सकदा की कुछ लम्बे बकते दीकर मै तुहाडे सोगी रें, या होई सकदा की सर्दियां तुहाडे बाल कटें, कने उदे बाद मेरिया अगलिया यात्रा तांई तुसां मिजो भेजी सकदे न। 7 मै नी चांदा की मकिदूनिया प्रदेशे च जांदा बेले सिर्फ कुछ बकते तांई तुसां सोगी रें। अगर प्रभु दी इच्छा होई तां मै आस रखदा है की कुछ लम्बे बकते दीकर ओथू तुसां सोगी रें। 8 पर मै पेन्तिकुस्त त्योहारे दे रोजे दीकर इफिसस शेहरे च ई रेणा। 9 क्योकि हल्ले भी ऐथू मते लोक न जडे परमेख्वरे दा बचन सुणना चांदे न, मेरा ऐथू रेणा बडा जरूरी है। हालांकि ऐथू मते लोक ऐसे न जडे मेरा बिरोध करदे न। 10 अगर तीमथियुस तुहाडे बाल कुरिन्थुस शेहरे च ओणा, तां उदी खातिरदारी इज्जता ला करनयो, क्योकि सै मेरे सांई प्रभु दा कम्म करदा है। 11 इस तांई कोई

उदी बेईजती ना करे, पर यात्रा ताई जुस्सतां दियां चीजां देईकरी बिदा करा, ताकि सै मेरे बाल आई जा; क्योंकि मै उदी कने दुज्जे भरोसा करणे बाले भाईयां जो भी नियाला दा जडे उना सोगी आयो न। 12 कने मै मसीह भाई अपुल्लोस ला बडी बिनती किती है की सै भी होर भरोसा करणे बालयां सोगी तुहांजो ला मिलणा ओए, पर सै इस बकत नी ओणा चांदा, पर जाल् उसयो खरा मोका मिलगा, ताल् उनी आई जाणा। 13 साबधान रिया, लगातार भरोसा करदे रिया, साहसी माणु बणा, कने परमेखरे सोगी अपने रिशते जो मजबूत रखा। 14 तुसां जडा कुछ भी करदे न सै प्यारे ला करा। 15 हे मसीह भाईयो, तुसां स्तिफनास जो कने उदे परिबारे जो जाणदे न की, उना अखाया प्रदेशे च उना ही सारयां ला पेहले मसीह पर भरोसा कितया था, कने सै परमेखरे दे लोकां दी सहायता ताई तैयार रेदे न। 16 इस ताई मै तुहांजो ने बिनती करदा है की ऐसे अगुवां दियां गल्लां मन्ना, बल्कि ऐसे सारे लोकां दी सुणा जडे प्रभु दी सेबा जो बडी मेहनता कने बडी भक्ति ला करदे न। 17 कने मै स्तिफनास फूरतनातुस कने अखईकुस मसीह भाईयां दे मेरे बाल ओणे ला खुश है, क्योंकि उना मेरी सै सहायता किती, जिसा जो करणे ताई तुसां ऐथू नी थे। 18 कने उना मेरे मने जो हिम्मत दिती ठीक तियां ही जियां उना तुहाडे ताई भी करणा जाल् उना तुहाडे बाल ओणा। इस ताई तुहांजो भी ऐदे लोकां दी इज्जत करणी चाईदी। 19 आसिया प्रदेश दिया कलीसिया दे लोकां दिया तरफा ला तुहांजो नमस्कार; अक्चिला कने उदी घरे बाली प्रिस्का दा कने उना दे घरे च गिठी होणे बाली कलीसिया दे मसीह भाई बेहणा दिया तरफा ला भी तुसां जो प्रभु च नमस्कार। 20 ऐथू ला जितणे भी मसीह भाई बेहणा न, उना सारयां दिया तरफा ला तुहांजो नमस्कार। गले लग्गी करी इक दुज्जे जो नमस्कार करा। 21 कने हुण मै पौलुस, इसा चिठिया दे आखरी च अपने हथां ला इस नमस्कार जो लिखा दा है। अगर कोई प्रभु ला प्यार नी करे, तां सै श्रापित हो। 22 हे साडे प्रभु, आई जा! 23 मै प्राथना करदा है साडा प्रभु यीशु मसीह तुहांजो पर अपना अनुग्रह करदा रे। 24 मै तुसां सारयां ला प्यार करदा है, जिना दा यीशु मसीह सोगी गेहरा रिशता है। आमीन।

2 कुरिन्थियों

1 मैं, पौलस, परमेश्वर दिया इच्छा ला यीशु मसीह दा प्रेरित है, कने साडा मसीह भाई तीमूथियुस मेरे सोगी है। मैं ऐ चिट्ठी कुरिन्थुस शेरह च परमेश्वर दिया कलीसिया जो, कने अखाया प्रदेशे दे सारे परमेश्वर दे लोकां जो लिखा दा है। **2** मैं प्राथना करता की साडा पिता परमेश्वर कने प्रभु यीशु मसीह तुहांजो पर अनुग्रह करे कने तुहांजो शांति दे। **3** साडे प्रभु यीशु मसीह दे पिता कने परमेश्वर दा धन्यवाद हो, जडा सांझो पर दया कने सांझो हमेशा तसल्ली दिन्दा है। **4** सै सांझो साडे सारे दुखां च तसल्ली दिन्दा है; ताकि असां दुज्जयां दे दुखां च उना जो इयां ही तसल्ली देई सकन जियां परमेश्वर सांझो दुखां च तसल्ली दिन्दा है। **5** जितणा जादा असां यीशु मसीह तांई दुख सेहन करदे न, परमेश्वर मसीह दे जरिये उतणी ही जादा तसल्ली सांझो दिन्दा है। **6** असां दुख सेहन करदे न, ताकि परमेश्वर तुहांजो तसल्ली दे कने तुहाडा उद्धार करे। क्योंकि परमेश्वर सांझो तसल्ली दिन्दा है इस तांई उनी तुहांजो भी तसल्ली देणी क्योंकि तुसां बडे सबर सोगी साडे सांई दुख सेहन किते। **7** कने साडी आस तुहाडे बारे च पक्की है, क्योंकि असां जाणपे न, की जियां तुसां साडे दुखां च साथी थे, तियां ही तुसां साडिया तसल्लिया च साथी होणा, जडी परमेश्वर सांझो देणी। **8** हे मसीह भाईयो, मैं चांदा की तुसां साडिया उना मुसीबतां दे बारे च जाणा, जडियां आसिया प्रदेशे च सांझो होईयां। असां ऐसे बोझे ला दबुई गियो थे, जडा साडे सेहणे ला बाहर था, असां तां जिणे दी पूरी उम्मीद ही छडी दितियो थी। **9** असां तां अपने मने च ऐ सोची लिया था, की असां मरणे बाले न। ऐ इस तांई होया की असां अपने आपे पर नी पर परमेश्वर पर भरोसा रखन, जडा मरयां जो जिन्दा करता है। **10** परमेश्वर ही सांझो इतणिया बडिया मुसीबता ला बचाया, कने बचाणा भी; कने सांझो ऐ आस है की उनी अग्रे भी बचादे रणा है। **11** जियां तुसां साडे तांई प्राथना करीरौ साडी सहायता करदे न, तियां ही मते लोकां दियां प्राथना ला सांझो परमेश्वर दियां आशीषां मीलियां न, उदिया बजा ला साडिया तरफा ला परमेश्वर दा धन्यवाद करनयो। **12** क्योंकि असां अपनी अंतरात्मा दिया सच्चाईया पर घमंड करदे न। संसार च कने खासकर तुसां लोकां बिच साडी जिन्दगी पबित्र कने सच्ची थी, जडा परमेश्वर दिया तरफा ला सांझो मिलया था। असां माणुआं दे ज्ञान पर भरोसा नी रखया है, पर परमेश्वर दे अनुग्रह पर भरोसा रखया है। **13** असां हमेशा तुहांजो अपनी चिठियां च उना ही गल्लां जो लिखदे न जडियां तुसां पढी कने मन्नी सकन। भले ही तुसां हुण इना गल्लां जो अच्छे ला नी समझदे, पर मिंजो आस है की प्रभु यीशु मसीह दे दुबारा तुडी ओणे दीकर तुसां इना गल्लां जो अच्छे ला समझणा कने मनणा ताकि उस रोजां साडे पर तियां ही घमंड करन, जियां असां तुहाडे पर घमंड करदे न। **15** मिंजो इना गल्लां दा भरोसा था की तुसां सांझो समझणा, इस तांई हुण मैं चांदा है की मैं सारयां ला पहले तुहाडे बाल ओऐ ताकि तुहाडे बाल दो बरी ओणे ला तुहांजो दो गुणी आशीष मिलले। **16** मैं सोचा दा था की तुहाडे बाले ला होईकरी मकिदुनिया प्रदेशे जो जां, कने मकिदुनिया प्रदेशे ला बापस मुडदे फिरी तुहाडे बाल ओऐ, कने तुसां मिंजो यहूदिया प्रदेशे दीकर सफर करणे तांई समान देईकरी मेरी सहायता करनयो। **17** मेरी योजना ऐसी थी। तां, क्या मैं बिना कुसी बजा दे ही अपना बिचार बदली दिता? क्या मैं संसारिक माणुआं सांई योजना बणादां हे? क्या मैं इक बकर च, हां कने बादे च ना बोलता है? **18** परमेश्वर पर भरोसा करी सकदे न, तियां ही तुसां भी सांझो पर भरोसा करी सकदे न, हालांकि असां तुहाडे बाल ओणे दा बायदा करा दे न। **19** क्योंकि परमेश्वर दा पुत्र यीशु मसीह जिदा प्रचार मैं, सिलवानुस कने तीमूथियुस दे जरिये तुहाडे बिच होया, सै प्रभु यीशु मसीह सच्चा है, क्योंकि उदे च कदी हां कने कदी ना बाली कोई गल्ल नी है, उदे च सिर्फ हां ही है। **20** क्योंकि पिता परमेश्वर दे जितणे भी बायदे न, सै सारे बायदे मसीह च पुरे होंदे न कने इस तांई असां “आमीन” बोलदे, की साडे जरिये पिता परमेश्वर दी महिमा हो। **21** परमेश्वर ही है, जडा तुहाडे सोगी सांझो मसीह च मजबूत करता है। परमेश्वर सांझो पर अपनी मोहर लाईकरी ब्याने दे स्ने च अपनी आत्मा साडे मना च रडीकरी सांझो अपने तांई चुणया। **23** परमेश्वर मेरिया इसा सच्चाईया दा गबाह है की मैं हले दीकर कुरिन्थुस शेरह च इस तांई नी आया की, मैं तुहांजो दुख देणा नी चांदा था। **24** इका मतलब ऐ नी की, असां तुहाडे भरोसे पर अपना हक

जतान, क्योंकि तुसां अपने ही भरोसे च टिकयो न। असां तां तुहाडिया खुशिया तांई तुहाडे सोगी न।

2 मैं अपने मने च ऐई ठाणी लिया था की मैं इक बरी दुबारा ओथु आई करी तुहांजो दुख ना दे। **2** क्योंकि अगर मैं ओथु आई करी तुहांजो दुखी करे, तां तुसां दे सिवा मिंजो खुशी देणे बाला होर कोई नी है, सिर्फ तुसां ही न जिना जो मैं दुखी किता है। **3** कने मैं ऐई गल्ला तुहांजो इस तांई लिखी, की कुथी इयां ना हो, की मेरे ओणे पर जिना ला मिंजो खुशी मिलणा चाईदी, सेई मेरे दुखी होणे दी बजा न बणी जान। क्योंकि मिंजो तुसां पर इसा गल्ला दा भरोसा है की, जडी मेरी खुशी है, सेई तुसां सारयां दी भी खुशी है। **4** बडे दुखी मने ला, कने रोई-रोई करी ऐ चिट्ठी मैं तुहांजो लिखी है, इस तांई नी की, तुसां दुखी होई जा, पर इस तांई की तुसां उस बडे प्यार जो जाणी लिया, जडा मिंजो तुसां सोगी है। **5** अगर कोई दुखे दी बजा है, तां सै ऐ की जिनी माणुऐ ऐ सारियां पेशानियां खडियां कीतियां, उनी मिंजो दुखी करणे ला जादा तुसां सारयां जो दुखी किता है। मैं इदे बारे च इसला जादा होर कुछ नी बोलणा चांदा। **6** ऐसे माणुऐ तांई ऐ सजा काफ़ी है, जडी तुसां के मते किचासी लोकां उसयो दितौ। **7** इस तांई इदे बजाए तां ऐ खरा है की उदिया गलतिया जो माफ करी दिया कने उसयो तसल्ली दिया। अगर तुसां उसयो माफ नी किता तां शायद सै इतणा दुखी होई जाऐ कने परमेश्वर पर भरोसा करना बिलकुल ही छडी दे। **8** इसा बजा ला मैं तुसां ला बिनती करता है, की उसयो यकीन दिला की तुसां हले भी सच्ची उसला प्यार करदे न। **9** क्योंकि मैं ऐ इस तांई भी लिखया था की, तुसां जो परखी लें की, तुसां मेरे सारे हुक्मा जो मदे न की नी। **10** जिसयो तुसां माफ करदे न उसयो मैं भी माफ करता है, क्योंकि जालू मिंजो माफ करणे दी जरूरत होंदी है, तां मैं तुहाडे फायदे तांई मसीह दे हके सोगी ऐसा करता है। **11** ताकि शैतान साडे हालाता दा फायदा ना लेई सके, क्योंकि असां उदे बुरे इरादे जो जाणपे न। **12** कने जालू मैं मसीह दा शुभसमाचार सुणणे तांई त्रोआस शेरह च आया, तां परमेश्वर मिंजो शुभसमाचार दा प्रचार करणे दे बडे मौके दिते। **13** तां मेरा अपना मसीह भाई तीतुस तुहाडी खबर लेईकरी मेरे बाल नी आया, जिदे ला मेरे मने जो चैन नी मिला। इस तांई मैं तीतुस जो तोपणे तांई त्रोआस शेरहे दे मसीह लोकां ला बिदा लेईकरी मकिदुनिया प्रदेशे जो चली गया। **14** पर परमेश्वर दा धन्यवाद हो, जडा मसीह सोगी साडे रिशते दिया बजा ला हमेशा साडे सोगी चलदा है, कने सांझो जितांदा है। इदा मतलब है की असां जिथू भी जांदे न, असां शुभसमाचार दी खुशबू फेलांदे न, ताकि सारे लोक परमेश्वर जो जाणन कने सुणन। **15** क्योंकि असां परमेश्वर तांई मसीह दे जरिये बखायो धुणे सांई न। कने साडे जरिये प्रचार कितया संदेश सारे लोकां च फेलियो खुशबू सांई है, जडी उद्धार पाणे बाले, कने नाश होणे बाले लोकां बिच बिखरदी है। **16** पर ऐ खुशबू नाश होणे बालयां लोकां तांई तां मौता दी मुस्क है, जडी उना जो मौत दिया तरफा लेई जादी है; पर उद्धार पाणे बाले लोकां तांई ऐ जिन्दगी दी ऐसी खुशबू है, जडी उना जो हमेशा दिया जिन्दगिया पासे लेई जादी है। असल च कोई भी अपने आप ला इसा खुशबूआ जो फेलाणे दे काबिल नी है। **17** क्योंकि असां उना सांई नी न, जडे पैसायां तांई परमेश्वर दे बचना दा प्रचार करदे न; पर असां सच्चाईया ला परमेश्वर दे बचना दा प्रचार करदे न, ऐ जाणी करी की परमेश्वर सांझो दिखा दा है।

3 मैं अपने बारे च इना गल्लां जो लिखी करी अपनी बडाई नी करा दा है। या कुछ होर माणुऐ सांई सांझो भी तुहाडे बाल सिफारिश दियां चिठियां लियोणे कने या तुहाडे ला लेंणे दी जरूरत नी है। **2** तुसां अपु ही इक चिठिया सांई न जडी साडे तांई सिफारिश करदी है, जडी साडे दिले च लिखियो है, तुहाडी बदलुइयो जिन्दगी तुहाडे बिच साडे कम्मा दिया बजा ला है, जडा इक चिठिया सांई है जिसा जो हर कोई पढी सकदा है। **3** उ ते तां मिलदी गल्ल है, की तुहाडी बदलुइयो जिन्दगी इक चिट्ठी है जडी मसीह लिखियो है, कने ऐ चिट्ठी साडे कम्मा दा नतीजा था। सै स्याईया ला या पथरे दियां पटियां पर नी, पर जिन्दे परमेश्वर दिया आत्मा जरिये साडे दिले दियां पटियां पर लिखियो है। **4** असां ऐसा इस तांई बोलदे न क्योंकि असां मसीह दे जरिये परमेश्वर पर भरोसा रखदे न। **5** असां ऐ नी बोलदे न की साडे बाल अपु ला कुछ करणे दी काबलियत है। पर परमेश्वर ही ऐ जडा सांझो इस काबिल बणादां है। **6** जिनी सांझो नोई बाचा दे सेवक होणे दे काबिल किता, कने मुसा दी व्यवस्था दे सेवक नी पर पबित्र आत्मा दे सेवक न,

क्योंकि मूसा दी लिखियो व्यवस्था जो नी मणने दी सजा मौत है, पर पबित्र आत्मा हमेशा दी जिन्दगी दिन्दी है। 7 मूसा दी व्यवस्था जालू इस्त्राएल दे लोकां जो दिती जडी पथरां दियां पट्टियां पर लिखियो थी, उस बकत परमेश्वरे दी महिमा प्रगट होई। इस्त्राएल दे लोक लम्बे बकते दीकर मूसा दे मूरे पाससे नी दिखी सके क्योंकि सै चमका दा था, हालांकि सै जादी देर दीकर नी चमकदा रिया। अगर मौता पाससे लेई जाणे वाली मूसा दी व्यवस्था पर आधारित सेबा इत्थी तेजोमय थी, तां नोई बाचा पर आधारित सेबा होर भी जादा तेजोमय होणी। 9 क्योंकि जालू दोषी बणाणे वाली मूसा दी व्यवस्था तेजोमय थी, तां नोई बाचा जडी सांझो परमेश्वरे सामणे धर्मी बणांदि है तां सै होर भी जादा तेजोमय कनी होणी। 10 कने मूसा दी व्यवस्था जडी बडी तेजोमय थी, पर हुण उस नोई बाचा दे तेज सामणे मूसा दी व्यवस्था दा कोई तेज नी रिया क्योंकि ऐ नोई बाचा दे मुकबले जादा तेजोमय नी है। 11 व्यवस्था उस तेज सोगी दितियो थी जडी घटदी जांदि थी, पर नोई बाचा दा तेज होर भी जादा बडी करी है क्योंकि ऐ हमेशा दीकर बणी रेंगी है। 12 इस तांई ऐसी आस रखीकरी असां हिम्मत सोगी बोलदे न। 13 कने असां मूसा सांई नी न, जिनी अपने मूरे पर परदा पाया था ताकि इस्त्राएली लोक उसा घटदी चमका जो गायब होंदे ना दिखी लेन। 14 पर इस्त्राएल दे लोकां दे मन कठोर होई गियो थे, क्योंकि अजे दीकर पुराणे नियम जो पढ़ने ला उना दे मने च सै ही पडदा पिया रेंदा है; पर सै परदा मसीह च भरोसा करणे ला उठी जांदा है। 15 कने अजे दीकर भी जालू कदी मूसा दी व्यवस्था पढी जांदि है, तां उना दे मने च परदा पेरें रेंदा है इस तांई सै इसयो पुरे तरीके ला नी समझदे। 16 पर जालू सै प्रभु यीशु मसीह पर भरोसा करणे, तालू सै परदा उठी जाणी। 17 प्रभु तां आत्मा है: जिथु कुथी प्रभु दी आत्मा है, ओथु मूसा दी व्यवस्था ला अजादी है। 18 क्योंकि असां सारे इक सीसे सांई परमेश्वरे दे तेज जो ऐसे चेरयां ला दसदे न जिना पर परदा नी पिया है, तां परमेश्वर सान्झो लगातरा बदा दे तेज च जादा ला जादा अपने सांई बणा दा है। ऐ तेज प्रभु ला ही मिलदा है, जडा पबित्र आत्मा है।

4 इस तांई जालू सांझो पर परमेश्वरे दी ऐसी दया होई की, सांझो परमेश्वरे दे शुभसमाचार दा प्रचार करणे दी सेबा मिलली, तां असां हिम्मत नी छडदे न। 2 पर असां सरमा बाले गुप्त कम्मा जो भी करणा छडी दिता, कने ना असां चलाकी करदे न, कने ना ही परमेश्वरे दे बचना च मिलावट करदे न, बल्कि असां परमेश्वरे दे सामणे सिर्फ सच्च सिखादे न। कने हर इक माणु इसा गल्ला दी गबाई देई सकदा है की ऐ सच्च है। 3 अगर लोक उस शुभसमाचार जो नी समझी सकदे न जिदा असां प्रचार करदे न, तां ऐ सै लोक न जडे खत्म होणे बाले न। 4 कने उना भरोसा नी करणे बाले लोकां तांई, जिना दिया अकला जो इस संसारे दे ईश्वर शैताने अन्ना करी दिताया है, इस तांई सै मसीह कने उदी महिमा दे बारे च शुभसमाचार जो नी समझी पांदे की परमेश्वरे दा रूप है। (aiōn g165) 5 क्योंकि असां अपने आपे दा नी, पर यीशु मसीह दा प्रचार करदे न की, यीशु मसीह ही प्रभु है। कने उनी ही सांझो तुहाडे सेवक होणे तांई भेजया है। 6 इस तांई परमेश्वरे बोलया की, "नेहे च लौ चमके," कने परमेश्वरे लौई सांई साडे मना च समझ दिती, ताकि असां परमेश्वरे दिया महिमा जो पछेणी सकन, जडी यीशु मसीह दे मूरे च मिलदी है। 7 असां उसा मीटिया दे भांडयां सांई न जिना च ऐ खजाना रखया है। इसला ऐ गल्ल साफ होई जांदि है की, ऐ असीम शक्ति साडिया तरफा ला नी है, पर परमेश्वरे दिया तरफा ला है। 8 असां चारो पासे ला पेशानियां ला थिरयो रेंदे न पर कदी हार नी मंदे; घबरादे तां हेन, पर हिम्मत नी छडदे। 9 असां सतयो तां जांदे न, पर परमेश्वर सांझो छडदा नी है; डापे तां जांदे न पर, पर परमेश्वर सांझो खत्म नी होणा दिन्दा। 10 असां हमेशा उना दुखां जो अपने शरीर च महसूस करदे न, जडे दुख यीशुऐ मरदे बकत महसूस किते थे; ताकि जडा कम्म असां करदे न उदे जरिये लोक यीशु दी जिन्दगी जो दिखी सकन। 11 क्योंकि असां जिंदि जी यीशु दिया बजा ला मौत दे खतरे च रे, ताकि यीशुऐ दी जिन्दगी भी साडे मरणे बाले शरीर पर प्रगट होऐ। 12 इस तांई असां मौत दे खतरे च रेंदे न, पर इदिया बजा ला तुहांजो हमेशा दी जिन्दगी मिली। 13 पर असां प्रचार करदे रे क्योंकि सांझो च सेई भरोसा था, जदिया भजन लिखणे बाले च था, जालू उनी पबित्र शास्त्र च ऐसा लिखया की, "मैं भरोसा कित्ता, इस तांई मैं बोलया।" असां भी भरोसा करदे न, इस तांई बोलदे न। 14 क्योंकि असां जाणदे न, जिनी प्रभु यीशु मसीह जो मरयां च जिन्दा कित्ता, उनी ही सांझो भी यीशु

मसीह सांई जिन्दा करणा, कने परमेश्वरे सामणे खडे होणे तांई सांझो तुहाडे सोगी लेव ओणा है। 15 क्योंकि जडे दुख असां सेहन किते, सै तुहाडे फायदे तांई न, ताकि परमेश्वरे दा अनुग्रह जादा ला जादा मतयां लोकां जो मिल्ले, कने मते सारे लोक परमेश्वरे दिया महिमा तांई धन्यवाद करन। 16 इस तांई असां हिम्मत नी छडदे; भले ही साडे शरीर दी ताकत घटदी जा दी है, पर साडी अंदरूनी आत्मा रोज-रोज नोई होंदी जा दी है। 17 क्योंकि साडा ऐ हुणे दा घट कने थोडे बकते दा दुख साडे तांई ऐसी हमेशा दी महिमा जो पैदा करता है, जिंदि बारे च असां सोची भी नी सकदे। (aiōnios g166) 18 कने असां दिखियां चीजां जो नी पर अणदिखियां चीजां जो दिखदे रेंदे न, क्योंकि दिखियां चीजां थोडे ही दिना दियां न, पर अणदिखियां चीजा सदा बणी रेंदियां न। (aiōnios g166)

5 क्योंकि असां जाणदे न, की धरतिया पर साडे शरीर इक तम्बूऐ सांई न जिंदि च असां रेंदे न। कने जालू असां मरी जाणा, तां परमेश्वरे दिया तरफा ला सांझो स्वर्ग च इक ऐसा शरीर मिलणा है, जडा माणुआं दे हथां ला नी बणया पर स्वर्गीय स्वर्ग च हमेशा तांई होणा है। (aiōnios g166) 2 इस शरीर च तां असां रेंदे न, कने बडी इच्छा रखदे न, की सांझो इक ऐसा शरीर मिल्ले जडा साडे स्वर्ग दे धरे सांई हो। 3 जालू सांझो सै स्वर्ग दा शरीर मिलणा, तां असां नगे नी रेणा। 4 कने असां इस धरे च रेंदे होऐ भोजे हेठ दबुई करी रेंदे रेंदे न; क्योंकि असां इना संसारिक शरीरां जो नी छडणा चांदे न, पर असां चांदे न की परमेश्वरे सांझो स्वर्ग दा शरीर दे ताकि ऐ मरी जाणे बाले शरीर, नी मरणे बाले शरीर च बदलूई जान। 5 कने परमेश्वरे सांझो अपु नोऐ शरीर देणे तांई तैयार कितया है कने उनी ही सान्झो बयाने दे स्पे च पबित्र आत्मा भी दितियो है, जडा ऐ यकीन दुआंदा है की परमेश्वरे उसयो जरू पूरा करणा। 6 इस तांई असां हमेशा सबर रखदे न कने ऐ जाणदे न; की जालू दीकर असां शरीर च रेंदे न, तालू दीकर असां प्रभु ला दूर न जडा स्वर्ग च रेंदा है। 7 क्योंकि असां प्रभु यीशु मसीह दे रूप जो दिखीकरी नी, पर उस भरोसे करणे दिया बजा ला जिन्दे न। 8 इस तांई असां सबर रखदे न, कने शरीर दे धरे जो छडी करी परमेश्वरे सोगी रेणा जादा खरा समझदे न। 9 इस बजा ला साडे मने दी इक ही इच्छा है की, चाहे असां उदे सोगी स्वर्ग च होन, या असां इसा धरती पर होन, असां प्रभु जो खरे लगदे रेंदे न। 10 क्योंकि जरूरी हे, की मसीह साडा सारयां दा न्याय करे, कने हर इक माणुऐ जो उदे अपने भले बुरे कम्मा दा इनाम मिल्ले जडे उनी शरीर दे जरिये कितयो न। 11 सांझो पता है की परमेश्वरे दा इर क्या है, इस तांई असां सच्च पर भरोसा करणे तांई लोकां जो समझांदे न कने परमेश्वर सांझो पुरे तरीके ला जाणदा है कने मिंजो उम्मीद है की तुहाडिया अंतरात्मा भी सांझो ढंगे ला पछेणी लिया है। 12 असां फिर भी अपनी प्रशंसा तुहाडे सामणे नी करदे बल्कि असां तुहांजो अपने बारे च धमंड करणे दा मोका दिन्दे न, ताकि तुसां उना जो जबाब देई सकन, जडे मने पर नी, बल्कि दिखवटी गल्लां पर धमंड करदे न। 13 अगर कोई बोलदा है की असां पागल न, तां सै परमेश्वरे तांई न; अगर कोई बोले की साडे दिमाग खरे न, तां सै तुहाडे भले तांई न। 14 क्योंकि मसीह दा प्यार सांझो मजबूर करी दिन्दा है, इस तांई की असां ऐ भरोसा करदे न, की जालू इक माणु सारयां तांई मरी गिया, तां सारे मरी गियो न। 15 कने मसीह इस तांई सारयां तांई मरया, ताकि जडे जिंदि न, सै अगो जो सिर्फ अपु जो खुश करणे तांई ना जीन पर उना जो उदे तांई जीणा चाईदा। मसीह उना तांई मरया कने परमेश्वरे उसयो जिन्दा करी दिता। 16 इस तांई हुणे ला असां कुसयो भी संसारिक नजरा ला नी दिखणा, अगर असां पेहेले मसीह जो भी संसारिक नजरा ला दिखया था, पर हुण नी दिखणा क्योंकि हुण उसयो जीणी गियो न। 17 इस तांई, अगर कोई मसीह पर भरोसा करता है, तां उसयो इक नौआ सभाब मिलया है, पुराणा सभाब खत्म होई गिया है; कने हुण नौआ सभाब होई गिया है। 18 कने सारियां गल्लां परमेश्वरे दिया तरफा ला न जिनी मसीह दे जरिये सांझो अपने बाल बापस लौंदया है, कने लोकां जो परमेश्वरे सोगी मेल मिलाप कराणे दी सेबा सांझो देई दिती है। 19 परमेश्वर सारे लोकां तांई इक रस्ता बणा दा था की जडा कुछ मसीह कितया है, उदे जरिये परमेश्वरे सोगी मेल मिलाप करी सकन। परमेश्वरे लोकां दे पापां दा दोष उना पर नी लाया कने उनी शान्ति दे बारे च संदेश बंडणे दा कम्म सांझो देई दिता है। 20 इस तांई असां मसीह दे राजदूत न। परमेश्वर उदा दे संदेश जो अपनणे तांई साडे जरिये लोकां ला बिनती करता है। असां मसीह दिया तरफा ला बिनती करदे न की परमेश्वरे बाल आई जा। 21 मसीह जडा पाप ला अनजान था, उसी जो ही

परमेश्वरे साडे ताई पाप बागाया, ताकि असां परमेश्वरे दिया नजरा च धर्मी बणी जान क्योकि मसीहे साडे पापां दी सजा अपने उपर लेई ली।

6 परमेश्वरे सोगी कम्म करणे बाले होणे दिया बजा ला असां तुसां ने बिनती करदे न, की परमेश्वरे दा अनुग्रह जडा तुसां पर होया है, उसयो तुसां बेकार मत जाना दिया। 2 क्योकि पबित्र शास्त्र च परमेश्वर बोलादा है, "सही बकत पर मै तेरी सुणी, कने उद्धार दे रोजे मै तेरी सहायता कित्ती।" सुणा; हण ही सही बकत है; सुणा, ऐ ही है उद्धार दा दिन। 3 परमेश्वरे सोगी कम्म करदे होऐ साडा व्यवहार कुसी ताई कोई भी स्काबट नी बणदा है, ताकि ऐसा ना हो की कोई साडिया सेबा पर दोष लाऐ। 4 असां हर इक तरीके ला दसदे न की असां परमेश्वर दे सच्चे सेवक न। क्योकि असां बडा सबर रखीकरी कलेशां जो, दरिद्रता कने मुसीबतां जो सेहन करिरी, 5 असां कोडे खादे, जेला च गे, कने दोगे फसादां च चोटां लगियां, असां बडी मेहनत कित्ती, बगर सोऐ कने बगर खादे-पिते रे, 6 पर असां अपु जो बडा पबित्र रखया, दे हुकम ला कम्म किते, सबर रखया कने दुज्जयां पर दया कित्ती, पबित्र आत्मा दे हुकम मने, 7 सच्चा प्यार कित्ता, असां सच्चाई दा संदेश सुणया, परमेश्वरे दिया शक्तिया साडे च कम्म कित्ता। असां सच्चे हथे च धार्मिकता दे हथियोरे जो हमला करणे ताई कने खबे हथे जो बचाब ताई इस्तेमाल करदे न, 8 चाहे लोकां साडी इज्जत कित्ती या बेइज्जती कित्ती, तारीफ या बुराई कित्ती, पर असां इमानदार न, पर सै बोल्दे न की असां झूठे न। 9 भले ही लोक सांझो अनजान समझदे न, पर फिरी भी असां प्रसिद्ध न; भले ही लोक सांझो मरयां सांई समझदे न, पर फिरी भी असां जिंदे न; सांझो सजा तां मिलदी है पर जानी ला नी मारी सके। 10 सांझो बडे दुख थे, पर असां हमेशा खुश रहे थे। असां अपु तां गरीब थे, पर बाकियां जो आत्मिक स्पे च अमीर बणाई दिन्दे न। इयां न जियां साडे बाल कुछ नी फिरी भी साडे बाल सब कुछ है। 11 हे कुरिन्थुस शेहर दे मसीह लोको, असां खुली करी तुसां जो सच्चियां गल्लां बोलदे न, असां पुरे दिले ला तुहांजो प्यार करदे न। 12 तुहांजे ताई साडा प्यार कदी घट नी होया, पर तुसां दा प्यार साडे ताई घटी गया है। 13 पर अपने बाल बच्चे समझीकरी मै तुहांजो बोलदा है, की तुसां भी साडे प्यार दे बदले च साडे सोगी पुरे दिले ला प्यार करा। 14 भरोसा नी करणे बाले लोकां सोगी कोई रिशता मत रखा, क्योकि धार्मिक कम्मा दा कने बुरे कम्मा दी कोई बराबरी नी। लौई दा कने नेहरे दा कोई रिशता नी। 15 कने मसीह दा शैताने सोगी कोई रिशता नी है। कने भरोसा करणे बाले लोकां दा भरोसा नी करणे बाले लोकां सोगी कोई रिशता नी। 16 कने मूर्तियां दी परमेश्वरे दे मंदरे च कोई जगा नी। क्योकि असां तां जिंदे परमेश्वरे दे मंदर न; जियां परमेश्वरे पबित्र शास्त्र च बोलाया है, "मै इना लोकां सोगी रेंगा कने उना बिच ही चलणा फिरणा; कने मै उना दा परमेश्वर होणा, कने सै मेरे लोके होंगे।" 17 इस ताई प्रभुऐ सांझो ला पबित्र शास्त्र दे जरिये बोलाया है की, "उना लोकां ला लग होई जा जडे परमेश्वरे पिच्छे नी चलदे। कने गंदिया चीजां सोगी कोई रिशता मत रखा, तां मै तुहांजो अपनाणा।" 18 "कने मै तुहाडा पिता होणा कने तुसां मेरे बेदे कने बेटीयां होंगे: ऐ सारयां ला शक्तिशाली प्रभु परमेश्वर दा बचन है।"

7 हे प्यारो भाईयो, क्योकि परमेश्वरे सांझो अपने बच्चे दे स्पे च अपनाणे दा बायदा कितया है, इस ताई ओआ असां अपने शरिर दे सारे बुरे कम्म कने आत्मा दे गंदे बिचारां जो करणा बंद करी देन कने परमेश्वरे दा डर मन्नी करी कने उदी इज्जत करा। कने सांझो पुरे तरीके ला पबित्र जिन्दगी जिणे ताई मेहनत करणी चाईदी। 2 तुसां सांझो ला अपने पुरे दिले ला प्यार करा, असां ना कुसी ने अन्याय कित्ता, ना कुसी दा कुछ बिगाडया, ना कुसी सोगी बेईमानी कित्ती। 3 मै ऐ तुसां पर दोष लाणे ताई नी बोला दा है, क्योकि मै पहले ही बोली बैठया है की, असां तुसां सोगी पुरे दिले ला प्यार करदे न कने असां लग नी होणा है चाहे असां जिन्दे रेन या मरी जान। 4 मै तुसां ला बडे भरोसे सोगी बोला दा है, मिंजो तुसां पर बडा घमंड है: मिंजो बडी तसल्ली मिली; कने मै अपने सोरे दुखां च भी बडा जादा खुश रेदा है। 5 क्योकि जाल असां त्रोएस शेहर जो छडी करी मकिदूनिया प्रदेश च आये, ओथु सांझो कोई अराम नी मिल्ला, बल्कि हर पासे ला पेशानियां झेलदे थे; कने हर पासे लडाई-झगडे थे कने साडे मना च डर था। 6 पर उदास लोकां जो तसल्ली देणेबाले परमेश्वरे तीतुस जो साडे बाल भेजी करी सांझो तसल्ली दिती। 7 ऐ सच्चे है की तीतुस सोगी मिली करी असां खुश होऐ। पर झसला भी जादा असां इसा गल्ला पर खुश होऐ की तुसां लोकां उसयो बडी हिम्मत दिती। कने उनी

मिंजो दसया की तुसां मिंजो ला मिलणे दी कितणी इच्छा रखदे न, मेरे ताई दुखी न कने मेरे ताई कितणी लगन रखदे न, इना गल्लां ला मिंजो होर भी खुशी होई। 8 मिंजो कोई पछताबा नी है की मै तुहांजो ऐ सकत चिट्ठी लिखी, चाहे तुसां इसा दिया बजा ला दुखी होए। पर पेहले मिंजो पछताबा होया जाल मै दिखया की इसा चिट्ठिया जो पढी करी तुहांजो थोडे बकते ताई दुख तां होया पर ऐ थोडिया देरा ताई था, 9 पर हण मै खुश है इस ताई नी की तुहांजो बडा जादा दुख देईकरी बल्कि इस ताई की तुसां उस दुखे दिया बजा ला पाप करणा बंद करी दिता कने परमेश्वरे बाल मुडी आऐ, क्योकि ऐ उस तरीके दा दुख है जडा परमेश्वर चांदा है की उदे लोकां जो हो, ताकि तुहांजो साडिया बजा ला कुसा भी गल्ला च तकलीफ ना हो। 10 क्योकि सै दुख जडा परमेश्वर चांदा है की असां अनुभव करन, सै लोकां दे पन्नाताप करणे दी बजा बणदा है, जिंदे ला उना दा उद्धार होँदा है, कने फिरी उसला पछताणा नी पोंदा: पर संसारे दे दुख लोकां जो हमेशा दिया मौता पासे लेई जांदे न। 11 ध्यान दिया की परमेश्वरे दिया तरफा ला आयो दुखां ला तुहाडे च क्या-क्या बदलाब आया है, इदे ला तुहाडी हिम्मत बदी गई, अपने आप जो बेकसूर साबित करणे दी इच्छा, अन्याय ताई तुहाडा गुस्ता, पेशानिया ताई ऐसी साबधानी, मिंजो ला मिलणे दी इगणी जादा इच्छा, परमेश्वरे दी सेबा ताई तुहाडी फिकर, कने गलत माणुऐ जो सजा देणे ताई तैयार रेणा, इना कम्मा दे जरिये तुसां साबित करी दितया है की सब कुछ ठीक-ठाक करणे च तुसां कोई भी कमी नी छडी है। 12 हालांकि ऐ सकत चिट्ठी मै तुहांजो इस ताई नी लिखी थी की मिंजो उना दी चिंता थी, जडे अन्याय करदे न कने ना ही उना ताई जडे अन्याय संदे न, पर इस ताई लिखी की तुसां अपु ही परमेश्वरे सामणे दिखी लेन की तुसां साडे ताई कितणे सच्चे न। 13 इस ताई सांझो इना गल्लां ला हिम्मत मिलली; कने साडी हिम्मत कने खुशी तीतुस जो दिखीकरी होर भी बदी गई; क्योकि सै तुहाडिया बजा ला बडा खुश होई गया था। 14 क्योकि अगर तीतुसे सामणे मै तुहाडे बारे च घमंड कित्ता है, तां मै शर्मिदा नी होया, पर जियां असां तुसां सोगी सारियां गल्लां सच्च-सच्चे बोली दितियां थियां, तियां ही साडा घमंड दसणा तितुसे सामणे भी सच्च साबित होया। 15 कने जालु सै याद करदा है की तुसां सारयां उदी गल्ल मन्नी कने डरदे कने कमेदे उसयो अपनाया तां उदा प्यार तुहाडे ताई होर भी बदी गया है। 16 मिंजो इसा गल्ला दी भी खुशी होँदी है की, हण मै हर गल्ला च तुसां पर भरोसा करी सकदा है।

8 हे मसीह भाईयो हण, मै तुहांजो उस अनुग्रह दे बारे च दसणा चांदा है, जिसयो परमेश्वरे मकिदूनिया प्रदेश दिया कलीसिया जो दितया है। 2 जालु बडियां भरियां पेशानियां ला उना दी परिक्षा होई, तां सै बडे खुश होऐ कने हालांकि सै बडे गरीब थे, फिरी भी उना होर भरोसा करणे बालयां दिया सहायता ताई उदरता रहे देसै दिते। 3 कने उना दे बारे च मेरी ऐ गबाई है की, उना ना सिर्फ जितणा होई सकदा था, बल्कि उना उसला भी जादा बदीकरी दिता, कने उना ऐ कम्म अपनी इच्छा ला कित्ता। 4 उना लोकां साडे ला बडी बिनती करिरी इजाजत मंगी की यरुशलम शेहरे दे परमेश्वरे दे पबित्र लोकां दी सहायता करणे दा सांझो मौका दिया। 5 असां इदी उम्मीद बिलकुल भी नी कितियो थी। उना अपने आपे जो पेहले प्रभु जो कने फिरी सांझो देई दिता, ठीक बिलकुल तियां ही जियां परमेश्वर चांदा था की सै करन। 6 इस ताई असां तीतुस ला बिनती कित्ती की, जियां उनी पेहले दान गिठा करणे दा कम्म शुरू कितया था, तियां ही तुहाडे बिच इस दान दे कम्मा जो पूरा करी ले। 7 पर जियां तुसां सारियां गल्लां च मतलब की भरोसे च, परमेश्वरे दे बचने दा प्रचार करणे च, ज्ञान कने तुसां दुज्जयां दी सहायता करणे ताई कोशिश करणे च, कने उस प्यार च जडा सांझो ला करदे न, इना गल्लां च बददे जांदे न, तियां ही हण इना भरोसा करणे बाले गरीब लोकां जो दान देणे दिया सहायता ताई भी बदे जा। 8 मै तुहांजो कोई हुकम नी देणा लगया, मै सिर्फ दुज्जे लोकां दी हिम्मता दी तुलना तुहाडे प्यार ला करा दा है, ताकि तुहाडे प्यारे दिया सच्चाईया जो परखी सके। 9 तुसां साडे प्रभु यीशु मसीह दे अनुग्रह जो ढंगे ला जाणुदे न की, सै अमीर होईकरी भी तुहाडे ताई गरीब बणी गया ताकि उदे गरीब होणे ला तुसां अमीर होई जान। 10 पिछले साल तुसां दान देणे कने ऐसी इच्छा रखणे च भी सारयां ला अग्ये थे। इस बारे च तुहाडे ताई क्या खरा है, उदे बारे च मेरी ऐ सलाह है की; हण जडा तुसां शुरू कितया है, उसयो पूरा करा। शायद तुसां भी इस कम्मे जो खत्म करणे ताई उणो ही उत्साही न जितणे तुसां इसयो शुरू

करणे च थे। 12 क्योंकि अगर तुहाड़े मने च दुज्जयां जो दान देणे दी इच्छा है तां जडा उदे बाल है, उदे मुताबिक ही उदा दान ग्रहण होणा, ना की उदे मुताबिक जडा उदे बाल नी है। 13 मैं नी चांदा है की दुज्जयां दी जिन्दगी असान बणाणे तांई तुहाड़ी जिन्दगी मुशकिल होई जा। पर सारयां बाल इक बराबर होणा चाईदा। 14 पर इस बकत तुहाड़ी बढोतरी उना दी जरूरत पूरी करणे तांई भोतरी है, पर कदी ऐसा भी होई सकदा है की तुहांजो जरूरत पेई जा, तालू सै तुहाड़ी सहायता करन, तालू दोनों इक बराबर होई जाणा। 15 जियां पबित्र शाब् च लिखया है, “जिनी बडा जादा गठेरया, उसयो जादा नी मिलया कने जिनी घट गठेरया, उसयो कुसी चिजा दा घाटा नी होया।” 16 कने परमेश्वरे दा धन्याबाद हो की, जडी फिकर मिजो तुहाड़े बारे च है, ठीक सियुदी ही फिकर परमेश्वरे तुहाड़े बारे च तीतस दे मने च पाई दिती है। 17 जालू असां तीतसे जो तुहाड़े बाल जाणे तांई बोलया, तां उनी खुशिया ला साडी बिनती मन्नी लेई कने बडा उत्साही होईकरी अपणिया मरजिया ला तुहाड़े बाल आया है। 18 कने असां तीतस सोगी इक होर मसीह भाईए जो भेजया है, कने सारियां कलीसियां दे भरोसा करणे बाले लोक उदी तारीफ करदे न क्योंकि सै शुभसमाचार दा प्रचार बडे अच्छे ला करदा है; 19 कने सिर्फ इतणा ही नी, पर उसयो कलीसिया दे लोकां ही चुणया है, ताकि इस दान देणेबाले कम्मे तांई साडे सोगी चले। असां ऐ दान दी सेबा इस तांई करदे न, ताकि प्रभू दी महिमा हो, कने ऐ दसणे तांई की असां यरूशलेम शेहरे दे भरोसा करणे बालयां दी सहायता करणा चांदे न। 20 तीतस सोगी उस मसीह भाईये जो भेजणे जरिये असां इसा गल्ला दा ध्यान रखदे न, की इस दान देणे दिया सहायता दे बारे च जिदी सेबा असां करदे न, कोई सांझो पर दोष ना लाई सके। 21 क्योंकि असां सिर्फ उना गल्लां पर ही ढंगे ला ध्यान नी दिन्दे न, जडियां परमेश्वरे दिया नजरा खरियां न, पर उना पर भी दिन्दे न जडियां माणुआं दिया नजरा च खरियां न। 22 कने असां इना सोगी अपने इक होर मसीह भाईए जो भेजया है, असां उसयो बडी बरी बडियां गल्लां च परखया है कने सै सच्चा निकलया है। पर हुण तुसां पर उसयो बडा भरोसा है, इसा बजा ला सै होर भी जादा उत्साही है। 23 अगर कोई तीतस दे बारे च पुच्छे, तां सै मेरा साथी, कने तुहाड़े तांई मेरा सहकमी है, कने अगर साडे मसीह भाईयां दे बारे च कोई पुच्छे, तां सै कलीसिया दे भेजयो होए न कने उना दी जिन्दगी मसीह दी महिमा तांई है। 24 इस तांई अपना प्यार कने साडा सै घमंड जडा असां तुहाड़े बारे च करदे न, कलीसिया दे सामणे उना जो साबित करिरी दसा।

9 हुण यरूशलेम शेहरे दे भरोसा करणे बाले लोकां जो दान देणेबाली सेबा दे कम्मे दे बारे च मिजो तुसां जो लिखणा जरूरी नी है। 2 क्योंकि मैं तुहाड़े मने दिया इच्छा जो जाणुदा है। कि तुसां उना दी सहायता करणे तांई तैयार न, इस तांई मैं तुहाड़े बारे च मकिदूनिया शेहरे दे भरोसा करणे बाले लोकां सामणे घमंड दसदा है की, तुसां अखाया प्रदेशे दे लोक पिछले इक साले ला तैयार थे, कने तुहाड़े उत्साह दिया बजा ला होर भी लोक उत्साहित होई गे। 3 मैं तीतस कने दो होर मसीह भाईयां जो तुहाड़े बाल इस तांई भेजा दा है, ताकि असां जडा घमंड तुहाड़े बारे च दसया, सै इसा गल्ला च बेकार ना होई जाऐ; पर जियां मैं बोलया तियां ही तुसां यरूशलेम शेहरे दे भरोसा करणे बाले लोकां तांई दान देणे तांई तैयार रिया। 4 इयां ना हो की, अगर कोई मकिदूनिया शेहरे दा मसीह भाई मेरे सोगी ओए, कने तुहाडा दान तैयार ना होए, तां साडा जडा तुसां पर भरोसा है, उदिया बजा ला असां बेईजत होणा, पर तुसां इदे ला भी जादा बेईजत होणा। 5 इस तांई मैं मसीह भाईयां ने बिनती करणा जरूरी समझया की सै पहिले ही तुहाड़े बाल चली जान, कने जडा दान देणे दा बायदा तुसां कितया था, उसयो तैयार रखन, जडा तुसां प्यारभाव ला देणा है ना की कुसी मजबूरिया च। 6 पर इसा गल्ला जो याद रखा, की जडा थोडा रंदा है सै बडदा भी थोडा है; कने जडा जादा रंदा है, सै जादा ही बडदा है। 7 इस तांई जिनी अपने मने च जितणे भी देणे दा फेसला कितया है, सै उतणा ही दे, बिना इच्छा या मजबूरिया ला ना दे। क्योंकि परमेश्वर खुशिया ला देणेबालयां ला प्यार करदा है। 8 परमेश्वर तुहांजो तुहाडिया जरूतां ला भी जादा हर तरा दा अनुग्रह देई सकदा है। जिदे ला हर गल्ला च कने हर बेले, सब कुछ, जडा तुहांजो जरूरी हो, सै तुहाड़े बाल रे, ताकि तुहाड़े बाल हर भले कामां तांई जरूरत ला जादा हो। 9 जियां की पबित्र शाब् च लिखया है, “परमेश्वर जरूरतमंदा जो उदारता ला दिन्दे है, कने जडे कम्म सै करदा है, सै सही न कने हमेशा होई

रेणे।” (aiōn g165) 10 परमेश्वर हमेशा किसाना जो राणे तांई बी दिन्दा है, कने खाणे तांई रोटी दिन्दा है। देया ही परमेश्वरे दे इतनाम करणा की तुहाड़े बाल हमेशा इतणी धन दौलत हो ताकि तुसां होर जादा उदारता ला गरीब लोकां दी सहायता करी सकन। 11 परमेश्वरे तुहांजो हर तरीके ला आशीर्वाद देणा ताकि तुसां हमेशा उदारता ला दान देई सकन। कने जालू असां तुहाड़े दाने जो जरूरतमंद लोकां जो देणा, तां उना परमेश्वरे जो धन्याबाद देणा। 12 क्योंकि इसा सेबा जो पूरा करणे ला, ना सिर्फ परमेश्वरे दे लोकां दियां जरूरतां पुरियां होईदिया न बल्कि लोकां दिया तरफा ला परमेश्वरे दा बडा जादा धन्याबाद होदा है। 13 क्योंकि दुज्जयां दी सहायता करणे तांई दान देणे दी ऐ सेबा दसदी है की तुसां अपना बायदा पूरा किता है, क्योंकि तुसां मन्या है की मसीह दा शुभसमाचार ही सचच है कने खुद अपने बचना दा पालन किता है। कने गरीब भरोसा करणे बाले कने सोगी ही बाकरी भरोसा करणे बालयां दी सहायता करणे च उदारता दसदे न। 14 कने उना तुहाड़े तांई परमेश्वरे ला प्रार्थना करणी। सै तुहाड़े ने प्यार करदे न, क्योंकि सै जाणदे न की परमेश्वरे तुहांजो बडा जादा अनुग्रह दिताया है। 15 ओआ असां परमेश्वरे दे उस दाने तांई धन्यबाद करन, जिसयो शब्दां च बयान नी करी सकदे।

10 मैं सेई पौलस है, जडा तुहाड़े सामणे डरफोक लगदा है, पर तुहांजो ला दूर जाणे पर हिम्मत बाला होई जांदा है। तुहांजो ला मसीह दिया उदारता कने कोमलता दिया बजा ला बिनती करा दा है की, 2 कुछ लोक बोलदे न असां इस संसारे दे लोकां सांई कम्म करदे न। इस तांई जालू मैं ओणा है तां मिजो उम्मीद है की मिजो उना सोगी सकत होणा पोणा। मैं हथ जोडी करी बिनती करदा है की जालू मैं तुहाड़े बाल ओणा तां मिजो तुहाड़े सोगी ऐसा बतांब ना करणा पोए। 3 क्योंकि असां इस संसार च रेंदे जरूर न, पर असां अपने दुशमणा सोगी संसारे दे लोकां सांई नी लडदे। 4 क्योंकि जिना हथियारां ला असां लडदे न सै संसारे दे लोकां दे हथियारा सांई नी न, पर किलयां जो ढांणे तांई परमेश्वरे दे शक्तिशाली हथियार न। 5 जना दे जरिये असां उस हर इक विरोध जो कने उस हर इक घमंड करणे बालिया गल्ला जो, जडी परमेश्वरे दे ज्ञान दे खिलाफ खडी होदी है, उना उच्चिया गल्लां जो असां डाई दिन्दे न, कने साडे हर इक बिचार जो काबू करिरी उना जो मसीह दा हुकम मनणे बाला बणाई दिन्दे न। 6 कने जालू तुसां मसीह दा हुकम मनणे बाले बणी जांदे न, तां असां सारे हुकम नी मनणे बालयां जो सजा देणे तांई तैयार रेंदे न। 7 तुसां सिर्फ बाहरी दिखावे जो ही दिखदे न, अगर कुसी जो अपने उपर ऐ भरोसा हो, की मैं मसीह दा है, तां सै ऐ भी जाणी ले, की जियां सै मसीह दा है, तियां ही असां भी मसीह दे न। 8 क्योंकि अगर मैं उस हके दे बारे च होर भी घमंड दसरे, जडा तुहाड़े भरोसे जो खत्म करणे तांई नी, पर तुहांजो भरोसे च बढणे तांई दिताया, तां इदे च मिजो कोई शर्म नी होणी। 9 मैं नी चांदा की तुहांजो ऐ लग्ये की मैं ऐ चिठी तुहांजो डरणे तांई लिखा दा है। 10 क्योंकि तुहांजो चे कुछ लोक बोलदे न, “पौलसे दियां चिठियां गंभीर कने प्रभावशाली न; पर जालू दिखदे न, तां बोलदे न सै कम्मजोर माणू है कने उदियां गल्लां बेकार न।” 11 इस तांई ऐसा बोलणे बालयां जो ऐ समझणा चाईदा की, जियां असां दूर रेईकरी चिठिया दे जरिये तुसां सोगी गल्लां करदे न, तियां ही तुहाड़े सोगी रेणे पर साडे कम्म भी होणे। 12 क्योंकि सांझो ऐ हिम्मत नी है की असां अपने आपे जो उना सोगी गिणन, या उना जो अपने ला मिलान, जडे अपना तारीफ करे न, कने अपने आप जो अपु चे ही नापदे न, कने अपना तुलना अपने आपे ने ही करदे न। तां सै अपने आपे जो मुर्ख बणांदि न। 13 असां उस कम्म ला बाहर जडा परमेश्वरे सांझो दिताया है कदी घमंड नी करदे, पर उसा ही मर्यादा दीकर असां घमंड करणा जडी मर्यादा परमेश्वरे साडे तांई बणाईये है, कने उदे च ही तुसां भी आई गियो न कने उस मर्यादा दे अनुसार ही घमंड भी करणा। 14 क्योंकि असां अपने आपे जो मर्यादा ला बाहर नी बदाणा चांदे, जियां की तुहांजो दीकर पुज्जणे दिया हालता च होदा, बल्कि तुहांजो मसीह दा शुभसमाचार सुणाणे तांई कुरिन्थुस शेहर दीकर यात्रा करणे बाले असां पहिले माणू थे। 15 कने असां मर्यादा ला बाहर होरनी दिया मेहनता पर घमंड नी करदे न; पर सांझो उम्मीद है, की जियां-जियां तुहाडा भरोसा बढदा जाणा तियां-तियां असां अपणिया मर्यादा अनुसार तुहाडिया बजा ला तुहाड़े अखे-बखे दे कने मते लोकां बाल पूजी सकन दे न। 16 की असां तुहाड़े इलाके ला बाहर दूर-दूर जना च भी शुभसमाचार सुणाण, कने ऐ नी की असां दे द्यावे अंदर बणयो कम्मे पर घमंड करन। 17 पर जियां पबित्र शाब् च लिखया है की, “अगर

कोई घमंड करना चांदा है, तां सै प्रभु पर घमंड करे।” 18 क्योंकि जडा अपनी बड़ाई करता है, सै नी, पर जिदी बड़ाई प्रभु करता है, सै ही प्रभु दिया नजरा च खरा है।

11 अगर तसां उना दी सुणी लेंदे न जालू सै अपने बारे च खरियां गल्लां करदे न। इस तांई मिंजो उर्मीदा है की तसां मिंजो भी बरदाश करी लेणा है जालू मै थोडा बेवकूफां सांई गल्लां करणा। 2 क्योंकि मै तुहाडे ला तियां ही प्यार करदा कने तुहाडी चिंता करदा है जियां परमेस्वर करदा है, इस तांई की मै तुहांजो सिर्फ यीशु मसीह जो देणे दा बायदा कितया है, जियां इक पिता अपणिया कुआरिया कुडिया जो उसा दे लाडे जो देई दिन्दा है, जालू उना दा बियाह होंदा है। 3 पर मै डरदा है की जियां शैताने सपे दे स्मे च अपणिया चलाकिया ला पैली जनानी हव्वा जो बेहकाई दिता, तियां ही शैतान तुहाडे मना जो उस सीधेपन कने पबित्रता ला मसीह दी सेवा ला दूर ना करी दे। 4 जालू कोई तुहाडे बाल आई करी कुसी होर यीशु दे बारे च दसदा है, तां तसां उस नोए माणुऐ जो अपनाणे तांई बडे उनाबले रेंदे न। ऐ यीशु सै नी है जिदे बारे च असां तुहांजो प्रचार कितया था। कने तसां खुशिया ला उस पर ध्यान दिन्दे कने सुणदे न जालू तुहांजो इक ऐसी आत्मा कने संदेश मिलदा है, सै यीशु दे शुभसमाचार कने आत्मा सांई नी होंदा जडा असां तुहाडे बाल लेईकरी आयो थे। 5 मै अपने आपे जो उतणा ही खरा समझदा है जितणा की सै प्रेरित जडे अपने आपे जो सारां ला महान प्रेरित समझदे। 6 मै बोलणे च इतणा माहिर नी है, पर मै मसीह कने शुभसमाचार दे बारे च अच्छे ला जाणदा है; मै अपना ज्ञान उना सारियां गल्लां जरिये साबित कितया है जडियां मै सिखाईयां न। 7 मै तुहाडे बिच परमेस्वरे दा शुभसमाचार मुफ्त च प्रचार किता कने अपने आपे जो नम्र किता ताकि तुहाडी इज्जत हो। मै क्या ऐसा करिरी पाप किता? 8 तुहाडी सेवा करणे तांई मै होर कलीसियां ला सहायता लेई। तुहांजो ऐ नी बोलणा चाईदा की ऐसा करणा गलत है। 9 कने जालू मै तुहाडे सोगी था, कने मिंजो पैसायां दी कमी होई, तां मै कुसी पर भी भोजन नी बणया, क्योंकि मसीह भाईयां मकिडूनिया प्रदेश ला आई करी मेरिया कमिया जो पुरा किता: कने मै कुसी भाई च अपने आपे जो तुसां पर भोजन नी बणना दिता, कने ना अग्रे जो बणना देणा है। 10 मसीह दी सचाई मिंजो च है, इस तांई मिंजो घमंड है की मै अखाया प्रदेशे च कुसी ला भी पैसे नी ले। 11 मै तुहाडे पैसे कनी ले? क्या मै ऐ इस तांई किता की, मै तुहांजो ला प्यार नी करदा? ऐ तां परमेस्वर जाणदा है की मै तुहांजो ने प्यार करदा है। 12 पर जडा मै करदा है, सेई करदे रेणा है, ताकि मै उना लोकां जो रोकी सके, जडे इस गल्ला पर घमंड करणे तांई इक मोका तोपदे न की परमेस्वरे तांई उना दा कम्म साडे कम्मे सांई है। 13 क्योंकि ऐसे लोक झूठे प्रेरित, कने धोखे ने कम्म करणे बाले, कने मसीह दे प्रेरित होंणे दा झूठा दाबा करदे न। 14 कने ऐ कोई हेरानिया बाली गल्ल नी है, क्योंकि शैतान अपु भी परमेस्वरे दी महिमा दे स्वर्गदूत दा रूप धारण करिरी धोखा दिन्दा है। 15 इस तांई अगर शैताने दे सेवक भी परमेस्वरे दे सेवकां दा रूप धारण करन, तां इदे च कोई बडी बडी गल्ल नी है, पर उना दा अंत उना दे कम्मा दे अनुसार होणा। 16 मै फिरी बोलदा है, कोई मिंजो मुख ना समझे; नी तां मुख ही समझीकरी मिंजो अपनाई लिया, ताकि थोडा दिया मै भी घमंड करी सके। 17 बेधडक होईकरी मै जडा कुछ बोलदा है, ऐ मै तियां नी बोलदा जदिया प्रभु यीशु मसीह चांदा है, पर मन्ना मुखता दिया बजा ला बोलदा है। 18 जालू की बडे लोक इस संसारे दे लोकां सांई घमंड करदे न, तां मै भी घमंड करणा। 19 तसां तां समझदा होईकरी भी खुशिया ला मूर्खी दी सेहन करी लेंदे न। 20 क्योंकि जालू तुहांजो कोई नोकर बणाई लेंदा है, या तुहाडा सब कुछ लेई लेंदा है, या तुहांजो धोखा दिन्दा है, या अपने आपे जो तुहांजो ला उपर रखदा है, या तुहाडे मुपे पर थप्यड मारदा है, तां तसां सेहन करी लेंदे न। 21 मिंजो ऐ सब करणे च शर्मिंदगी होंदी; पर जिसा कुसी गल्ला पर कोई घमंड करदा है, मै मुखला ला बोलदा है तां मै भी घमंड करदा है। 22 क्या सै ही इब्रानी न? मै भी इब्रानी है, क्या सै इस्राएली न? मै भी इस्राएली है, क्या सै अब्राहम दे बंशे दे न? अब्राहम दा बंशज मै भी है। 23 क्या सेई मसीह दे सेवक न? मै पागला सांई बोलदा है, मै उना ला बदीकरी है। मै उना ला जादा मेहनत कीतियो है, उना ला जादा बार जेला गिया है, बडी बरी कोडे खादे न, बडी बरी मेरिया जानी जो खतरा होया। 24 यहूदी अगुवां मिंजो पंज बरी उनातली-उनातली कोडे मारे। 25 तिन बरी मै बेता ने मार खादी; इक बरी पथरा ने मार खादी; तिन बरी

मेरा जाज समुद्रे च टूटी करी डूबी गिया, इक रात दिन मै समुद्रे च कटी। 26 बार-बार मिंजो सभर करणा पिया; कदी खड़ा च, कदी खुखार डाकुआं दे, कदी अपने देशे दे लोकां दे, कने कदी होर जातियां दे लोकां दे, कदी शेहरां च, कदी बणा च, कदी समुद्रे दे खतरयां दा कने कदी झूठे मसीह भाईयां दे खतरयां दा सामणा करणा पिया। 27 मै केई रातां जागी करी, भूखा प्यास रेईकरी, सर्दियां च थोडे कपडयां च रेईकरी बडी मेहनत किती कने बडियां मुसीबतां झेलियां। 28 कने इना सारियां गल्लां दे इलाबा मिंजो हर रोज सारियां कलीसियां दी भलाई दी चिंता दा भोजन बणी रेंदा है। 29 जालू कोई कमजोर होंदा था तां मै भी अपने आपे जो कमजोर महसूस करदा था। जालू कोई पाप करदा है, तां मै बडा परेशान होंदा है। 30 अगर घमंड करणा जरूरी है, तां मै भी अपणिया कमजोरियां दिया गल्लां च घमंड करणा। 31 परमेस्वर, जडा साडे प्रभु यीशु मसीह दा पिता, जडा हमेशा धन्य है, सै जाणदा है, की मै जूठ नी बोलदा। (1aion 1615) 32 जालू मै दमिशक शेहरे च था, राजा अरितास दे राज्यपाले मिंजो पकडने तांई शेहरे च पैरा बठाई दितया था। 33 पर दोस्तां मिंजो इक टोकरीया च इक लम्बा रस्सा बन्नी करी उदे च बैठया कने उसयो दिबारां दे इक सुराखे ला बाहर जमिना पर उतारी दिता कने इयां करिरी मै राज्यपाले दे हथे ला बची के निकली गिया।

12 घमंड करणा मेरे तांई ठीक नी है, पर तमी करणा पोंदा है; तां मै प्रभु दे दितयो दर्शन कने प्रकाशना दी चर्चा करणी। 2 मै इक ऐसे माणुऐ जो जाणदा है, जडा मसीह पर भरोसा रखदा है, मसीह जो चौदा साल पेहले स्वर्ग जो चुकी लिया जिथू परमेस्वर रेंदा, मै नी जाणदा की सै अपने शरीर च था, या सिर्फ आत्मा च था, ऐ सिर्फ परमेस्वर ही जाणदा है। 3 मै दुबारा बोलदा है, मै जाणदा है की ऐ माणू स्वर्ग जो चुकी लिया (फिरि भी मिंजो नी पता की ऐ सच्ची होया की या इक सुपना था, ऐ तां परमेस्वर ही जाणदा) कने ऐसियां गल्लां सुणियां जिना दा शब्दां च बखाना नी करी सकदे कने जिना दे बारे च दुज्जयां जो दसणे दी लोकां जो इजाजत नी है। 5 ऐसे माणुऐ पर तां घमंड करणा, पर अपने आपे पर अपणियां कमजोरियां जो छडी करी, अपने बारे च घमंड नी करणा। 6 क्योंकि अगर मै घमंड करणा चांगा भी तां मै मुख नी होणा, क्योंकि मै सच्च बोलणा; पर मै अपने आप जो घमंड करणे ला रोकदा है, इयां ना हो की, जियां कोई मिंजो दिखदा है, या मिंजो सुणदा है, मिंजो उसला बदीकरी समझे। 7 पर मिंजो उना अलोखी चीजां दे बारे च घमंड नी करणा चाईदा जडियां परमेस्वरे मिंजो दसियां न। इस तांई मेरे शरीर च कंडा चुभाया मतलब की मिंजो बडी बडी मुसीबत दितियो है। शैताने दिया तरफ ला इक दूत मिंजो मारणे कने मिंजो घमंडी होणे ला रोकणे तांई दितया है। 8 इदे बारे च मै प्रभु ला तिन बरी बिनती किती की, मिंजो ला ऐ दूर होई जा। 9 कने उनी मिंजो ने बोलया, “मेरा अनुग्रह तेरे तांई काफी है; क्योंकि मेरी शक्ति कमजोरिया च सिद्ध होंदी है।” इस तांई मै बडिया खुशिया ने अपणियां कमजोरियां पर घमंड करणा है, ताकि मसीह दी शक्ति मिंजो मिलदी रे। 10 इसा बजा ला मसीह तांई मै कमजोरियां च, कने निंदा च, कने दरिद्रता च, कने लडाई झगडयां च, कने मुसीबतां च खुश है, क्योंकि जालू मै कमजोर होंदा है, तालू मै मसीह दी शक्ति ने शक्तिशाली होंदा है। 11 मै मुख तां बणया, पर ऐ तुसां ही न जिना मिंजो ऐसा करणे तांई मजबूर किता: तुहांजो तां मेरी प्रशंसा करणी चाईदी थी, क्योंकि अगर मै कुछ भी नी है, तमी उना महान प्रेरितां ला कुसी भी गल्ला च घट नी है। 12 मै तुहाडे बिच रेईकरी इक सच्चा प्रेरित होंणे दे सबूत दिते, मै सबर रखया, चिन्न चमत्कार, अलोखे कम्म, कने शक्ति दे कम्म दस्से। 13 तसां कुसा दिया गल्ला च होर कलीसियां ला घट थे, सिर्फ इक ही गल्ल की जडी मै बाकियां कलीसियां सोगी किती कने तुहाडे सोगी नी किती की, मै तुहाडे ला अपणियां जरूरतां तांई पेसे नी मंगे, तुहाडा ऐ सोचणा गलत है की मै ऐसा करिरी तुहाडे बिरोध च गलत कितया है। 14 दिखा मै तीजी बरी तुहाडे बाल ओणे तांई तैयार है, कने मै इस बरी भी तुहाडे ला कोई सहायता नी लेणी; क्योंकि मै तुहाडिया संपतिया जो नी, पर तुहांजो चांदा है। क्योंकि बचयां जो अपने माता-पिता तांई धन नी गठेरणा चाईदा, पर माता-पिता जो बचयां तांई धन दौलत गठेरणी चाईदी। 15 मै तुहाडे तांई बडिया खुशिया ला अपना सब कुछ देई देणा बल्कि अपने आप जो भी देई देणा; क्योंकि मै तुहांजो ने बडा प्यार करदा है, पर ऐसा लगदा है की तसां मिंजो ने घट प्यार करदे न। 16 कुछ भी हो, मै तुहांजो पर भोजन नी बणया, पर दुज्जयां जो लगदा है की मै चलाक है कने मै तुहांजो धोखा दिता है, पर ऐ झूठ है। 17 मै तीतुस जो कने होर मसीह भाईयां जो कदी भी तुहांजो बाल

भेजी करी पैसे दी सहायता नी मंगी। 18 मैं तीतुस जो कने उदे सोगी अपने मसीह भाईए जो भेजया था, तां क्या तितुसे थोखा देईकरी तहांजो ला कुछ लिया? नी! क्योंकि साडा इक ही मकसद है कने साडा इक ही कम्म है। 19 मेरे प्यारे मसीह भाईयो, तुसां अपने मने च ऐ सोचा दे होंगे न की असां ऐ सब अपने बचाव ताई बोला दे न। पर असां ऐ सब परमेश्वरे दे सामणे यीशु मसीह च तुहाडे भरोसे जो मजबूत करणे ताई बोला दे न। 20 क्योंकि मिंजो डर है, कुथी इयां ना हो, की मैं तुहाडे बाल ओऐ कने मैं जदेई उम्मीद कितियो है, तुसां सियुदे ना होन, कने जदेई उम्मीद तुसां मिंजो ला कितियो कने मैं भी सियुदा नी होंऐ। मिंजो डर है, की ओथु झगडा, जलन, गुस्सा, मतलबीपन, चुगली, घमंड कने बखेडे ना पियो होन। 21 कने ऐसा ना हो की जालू मैं दुबारा बापस ओऐ, तां मेरा परमेश्वर मिंजो बेइज्जत करे। कने फिरी मिंजो केईयां ताई रोणा पोऐ, जिना पेहले गंदे कम्मा ला, कने व्यभिचार, कने लुचपन ने, कने जडे पाप उना कितया होन, उना ला पञ्चाताप नी कितया हो कने पाप करणा नी छडया हो।

13 पबित्र शास्त्र च लिखया है की, “हर इक गल्ल जो साबित करणे ताई दो या तिन गबाह दी जरूरत होंदी है,” जालू मैं दुज्जी बरी तुहाडे बाल आया था, तालू मैं कुछ लोकां जो चेताबनी दिती थी, जडे पाप करदे थे। हण मैं इसा चिठिया दे जरिये सारयां जो दुबारा चेताबनी दिन्दा है, जियां मैं पेहले भी दितियो थी। हण मैं तिजी बरी तुहाडे बाल लगया ओणा कने हण भी उना लोकां पाप करणा नी छडया, तां कोई भी उना जो सजा ला नी बचाई सकदा। 3 मैं ऐ बोलदा है क्योंकि तुसां इदा सबूत चांदे न, की मसीह मेरे जरिये बोलदा है, कने मसीह तहांजो सुधारदा है, तां ऐ साबित होंदा है की सै कमजोर नी है; पर तुहाडे बिच शक्तिशाली है। 4 सै कमजोरिया दिया बजा ने सूली पर तां चढाया गया, पर परमेश्वरे दिया शक्तिया ला जिन्दा है, असां भी तियां ही कमजोर न, जियां मसीह था; पर परमेश्वरे दिया शक्तिया ने जडी तुहाडे ताई है, असां उदे सोगी जीणा। 5 अपने आपे जो परखा, की तुहाडा भरोसा सच्चा है की नी; क्या तहांजो ऐ अनुभव नी होंदा है की यीशु मसीह तुसां च है। अगर नी होंदा है तां तुसां निक्कमे निकलयो न। 6 पर मेरी आस है, की तुसां जाणी लेंणा है की असां निक्कमे नी न। 7 कने असां अपने परमेश्वरे ला प्राथना करदे न, की तहांजो ला कोई गलती ना हो। ऐ दसणे ताई नी की साडी सेबकाई सफल रेई है, पर असां चांदे न की तुसां खरे कम्म करन, चाहे असां अपु निक्कमे ही लगन। 8 क्योंकि असां सचाइया दे खिलाफ कुछ नी करी सकदे न, पर सचाइया ताई ही करी सकदे न। 9 असां अपने कमजोर होंगे कने तुहाडे भरोसे च ताकतबर होंगे पर असां खुश होंदे न। कने ऐ प्राथना भी करदे न की, तुसां भरोसे च सिद्ध होंदे जा। 10 इसा बजा ला मैं तुहाडे बाल ओणे ला पेहले तहांजो ऐ गल्लां लिखा दा है, ताकि मिंजो तहांजो सजा देणे दे हके जो इस्तेमाल करणे दी जरूरत ना पोऐ, जडा मिंजो प्रभुऐ दितया है। पर मैं इना हका दा इस्तेमाल तुहाडे भरोसे जो मजबूत करणे ताई करणा चांदा है ना की नाश करणे ताई। 11 हे मसीह भाईयो, खुश रिया, सिद्ध बणदे जा, सबर रखा, इक दुज्जे जो उत्साहित करा, इक ही मन रखा, मिल्लीं जुली करी रिया कने शांति देणेबाले परमेश्वरे तुहाडे सोगी रेणा। 12 इक दुज्जे जो गल्ले लग्गी करी मसीह दे प्यार च नमस्कार करा। 13 सारे पबित्र लोक तहांजो नमस्कार करदे न। 14 मैं प्राथना करदा है की प्रभु यीशु मसीह दा अनुग्रह कने परमेश्वरे दा प्यार कने पबित्र आत्मा दा साथ तुहाडे सोगी रे।

गलातियों

1 मैं, पौलस, तुहांजो ऐ चिठी लिखा दा है, कने मैं इक प्रेरित है, मिंजो प्रेरित होणे तांई कुनी खास समूह या कुनी माणुए नी चुणया, पर यीशु मसीह कने परमेश्वर पिता दे जरिये चुणया है, जिनी यीशु मसीह जो मरयां के जिन्दा कित। 2 कने मैं ऐ चिठी गलातिया प्रदेशे दिया सारिया कलीसिया जो उना सारे मसीह भाईयां दिया तरफा ला लिखा दा है जडे मेरे सोगी न। 3 मैं प्रार्थना करता है की साडा पिता परमेश्वर कने प्रभु यीशु मसीह तुहांजो अनुग्रह कने शांति दे। 4 साडे पिता परमेश्वर दी इच्छा दे अनुसार यीशु मसीह अपने आपे जो साडे पापां दिया बजा ने बलिदान करी दिता ताकि असां इस संसार दे लोकां दे बुरे प्रभाव ला बचाई सके। (aiōn g165) 5 मैं प्रार्थना करता है की परमेश्वर दी महिमा युगां-युगां दीकर होंदी रे। आमीन। (aiōn g165) 6 मिंजो इसा गल्ला दी हेरानी होंदी है, जिनी परमेश्वर तुहांजो मसीह दे अनुग्रह दे जरिये अपने लोक होणे तांई सदया है, उसला तुसां इतणी जल्दी फिरी करी कुसी होर ही शिक्षा जो मणया लगी पे। 7 पर सिर्फ इक ही सच्चा शुभसमाचार है, पर असल गल्ल ऐ है की कुछ लोक मसीह दे शुभसमाचार दी शिक्षा जो बिगाडना चांदे न कने उना लोकां ही तुहांजो भटकाई दिता है। 8 पर अगर असां के कोई या स्वर्गदांते के कोई भी इस शुभसमाचार जो छडी करी जडा असां तुहांजो सुणया है, कोई होर शिक्षा दा प्रचार करे तां, परमेश्वर उसयो सजा देणी। 9 जियां असां पेहेले ही बोलया है, तियां ही मैं हुण फिरी बोलादा है, की उस शुभसमाचार जो छडी करी जिसयो तुसां अपनाया है, कोई होर शिक्षा दा प्रचार करे तां, परमेश्वर उसयो सजा देणी। 10 मैं पक्के तौर पर लोकां दी नी मंदा है पर परमेश्वर दी मंदा है, मैं लोकां जो खुश करणे दी कोशिश नी करा दा है, पर परमेश्वर जो खुश करणा चांदा है। अगर मैं हले दीकर माणुए जो खुश करता रेंदा तां मैं मसीह दा सेवक नी होंदा। 11 हे मसीह भाईयो, मैं तुहांजो दसी दिन्दा हे की, जडा शुभसमाचार मैं सुणया है, सै माणुए दा बणया नी है। 12 क्योंकि मैं ऐ अपने पूर्वजां या धार्मिक गुरूआं ला नी सिखया है, बल्कि खूद यीशु मसीह शुभसमाचारे जो मिंजो पर प्रगट कितया है। 13 तुसां जाणदे न की मैं यहूदी धार्मिक नियमा दे अनुसार जिन्दगी जिन्दा था, तां मेरे मते साथी जडे मेरिया उमरा दे थे, सै भी यहूदी नियमा दा पालन करते थे, पर मैं उना सारयां ला जादा बदीकरी कने पुरे दिले ला अपने पूर्वजां दे रीती रिबाजां जो मंदा था। कने उस बकत मैं यीशु मसीह पर भरोसा करणे बालयां जो सतांदा था कने उना जो मारणे दी कोशिश करता रेंदा था। 15 पर ताल परमेश्वर ऐ फेसला कित की अपने पुत्रे जो मिंजो पर प्रगट करे, ताकि मैं होर जातियां बिच यीशु मसीह दा प्रचार करी सके। परमेश्वर ही है जिनी मिंजो मेरे पैदा होणे ला पेहेले ही चुणी लिया कने अपने अनुग्रह ने मिंजो अपनी सेवा तांई सदया। जालू यीशुए अपने आप जो मिंजो पर प्रगट कित, तालू मैं सलाह लेणे तांई कुसी बाल नी गया, 17 कने ना ही जडे मिंजो ला पेहेले प्रेरित थे, उना जो मिलणे तांई यरूशलेम गया, पर झट अरब नाए दे इलाके जो चलती गया, कने फिरी ओथु ला दमिश्क शेरहे च दुबारा बापिस आई गया। 18 फिरी तिन्ना सालां बाद मैं पतरसे ने मिलणे तांई यरूशलेम शेरहे जो आया, कने उदे बाल पन्द्रा रोज रिया। 19 कने मैं प्रभु यीशु दे भाई याकूब जो छडी करी कने कुसी भी होर प्रेरिते ने नी मिल्ला। 20 परमेश्वर मेरा गबाह है की तुहांजो जडियां गल्लां मैं लिखदा है, उस च कुछ भी झूठ नी है। 21 यरूशलेम शेरहे च मैं उना प्रेरितां ला मिलणे बाद सारिया कने किलिकिया प्रदेशां च आया। 22 पर यहूदिया प्रदेशे च मसीह पर भरोसा करणे बाले लोकां मिंजो कदी नी दिखया था। 23 पर उना भरोसा करणे बालयां मेरे बारे च ऐंई सुणया था, की जडा पेहेले सांझो मसीह पर भरोसा करणे ने सतांदा था, सै हुण इसी भरोसे दा प्रचार करता है, इसला पेहेले सै उना लोकां जो मारणे दी कोशिश करता था जडे मसीह पर भरोसा करते थे। 24 इस तांई सै परमेश्वर दी महिमा करते न क्योंकि उनी मिंजो इक सताणे बाले ला मसीह दा इक चेला बणाई दिता।

2 चौदा साल बाद मैं बरनबास सोगी यरूशलेम शेरह गया कने तीतस जो भी सोगी लेई गया। 2 मैं ओथु गया क्योंकि परमेश्वर मिंजो जाणे तांई बोलया कने जालू मैं ओथु था, तां मैं कुछ बड़े अगुवां ने एकतां च मिलया कने उना जो उस शुभसमाचार दे बारे च दसया जिसदा मैं होर जातियां च प्रचार करा दा था। ताकि इयां ना हो, की मेरी इस बकते दी, या पिछली मेहनत बेकार होए। 3 मेरा साथी

तीतस कने सै इक यूनानी है; उदा खतना कदी नी होया। पर यरूशलेम शेरहे दी कलीसिया दे अगुवां उसयो अपनाई लिया कने उना उसयो खतना करणे तांई मजबूर भी नी कित। 4 तीतस दा खतना नी होणे दा ऐ मामला कुछ झूठे भाईयां तांई इक मुदा बणी गया, जडे साडिया मंडलिया च चोरिया ला आई गियो न कने उसा अजादिया जो खत्म करणे दी कोशिश करा दे थे जडे साडे उधारकर्ता यीशु मसीहे दितियो है, ताकि सै सांझो फिरी ला यहूदी व्यवस्था दा गलाम बणाई सकन। 5 पर असां थोडे बकते तांई भी उना दियां गल्लां ने सेहमत नी होए, ताकि तुसां लगातार सच्चे शुभसमाचार दी सचाई पर भरोसा करते रेन। 6 यरूशलेम शेरहे दिया कलीसिया दे उना बड़े अगुवां मेरी शिक्षा च कुछ भी नी जोडया, मैं इसा गल्ला दी कोई चिंता नी करता की सै अगुवे कुण न कयोकि परमेश्वर बाहरी रूप दिखीकरी न्याय नी करता। 7 पर जालू कदया दिखया की, जियां परमेश्वर यहूदी लोकां तांई शुभसमाचार प्रचार करणे दा कम्म पतरसे जो दितया है तियां ही होर जातियां जो शुभसमाचार प्रचार करणे दा कम्म मिंजो दितया है। 8 कयोकि जिनी परमेश्वर पतरसे जो यहूदी लोकां बिच प्रेरित होणे तांई चुणया, उनी ही मिंजो भी होर जातियां बिच प्रेरित होणे तांई चुणया है। 9 कने जडे लोक कलीसिया दे खम्बे समझे जांते थे, मतलब की पतरस, याकूब, कने यहून्ना, उना अनुग्रह दे उस बरदान जो पछेणी लिया जडा मिंजो मिलया है। उना मिंजो कने बरनबास जो अपना साथी समझीकरी सांझो हिस्सेदार बणया। सै इसा गल्ला तांई राजी होए की असां होर जातियां बाल जान कने सै यहूदियां बाल जान। 10 उना सांझो ने ऐंई विनती कित की यरूशलेम शेरहे दे गरीब विधवासियां दी सहायता करनयो, कने ऐ सेई कम्म था जिसयो मैं करणा चांदा था। 11 पर जालू इक दिन पतरस अन्ताकिया शेरह च आया, तां मिंजो लोकां सामणे उसयो फटकार लाणा पेई कयोकि सै सही कम्म नी करा दा था। 12 पतरस पेहेले होर जातियां सोगी खाणा खांदा था पर जालू याकूब दे भेजयो कुछ विधवासी यरूशलेम शेरह च आये तां उना सोगी मिलणा-जुलणा कने खाणा खाणा बंद करी दिता कयोकि सै उना यहूदियां ला डरदा था, जडे चांदे थे की सारियां होर जातियां दा खतना होणा चाईदा। 13 कने उदे सोगी अन्ताकिया शेरह दे कुछ यहूदी विधवासी भी ऐथू दीकर की बरनबास भी उना ला डरदा था कने उनी भी होर जातियां सोगी मिलणा-जुलणा बंद करी दिता। 14 पर जालू मैं दिखया, की उना दा चाल चलण सियुदा नी है, जदिया शुभसमाचार सिखांदा है, तालू मैं सारयां सामणे पतरसे जो फटकार लाईकरी बोलया, “तू इक यहूदी होईकरी भी, होर जातियां दे रीती रबाजां जो मन्ना दा है,” कने यहूदियां दे रीती रबाजां जो नी मन्ना दा है, अगर तू इक यहूदी होईकरी ऐसा कितया है। तां तू फिरी होर जातियां जो असां यहूदियां दे रीती रबाजां जो मणणे तांई कजो मजबूर करता है? 15 असां जडे जन्म ला ही यहूदी न कने होर जाति नी न जिना जो यहूदी पापी बोलदे न। 16 असां यहूदी विधवासी जाणदे न की मूसा दी व्यवस्था जो मन्नी करी कोई भी माणु धर्मी नी बणदा है, इस तांई असां भी यीशु मसीह पर भरोसा कित, असां मूसा दी व्यवस्था दा पालन करी के नी पर यीशु मसीह च भरोसा करणे ने धर्मी होए; इस तांई की मूसा दी व्यवस्था दे कम्मा ने कोई भी माणु धर्मी नी होदा। 17 कुछ यहूदी सोचदे न की असां पाप कितया है, कयोकि असां व्यवस्था दा पालन करणे दिया बजांए, धर्मी होणे तांई मसीह पर भरोसा करते न, इदा मतलब ऐ है की मसीह सांझो पापी बणादा है, नी बिलकुल भी नी। 18 पर असल च मैं पाप करणा अगर मैं इसा गल्ला जो दुबारा ला अपनाई लेंदा है की इक माणु व्यवस्था जो मणणे ने ही परमेश्वर दिया नजरा च सही होंदा है। 19 मैं समझदा है की मिंजो मूसा दिया व्यवस्था जो मणणे ने मैं धर्मी नी बणी नी सकदा। इस तांई मैं ऐसा मनदा है की मैं व्यवस्था दे बारे च मरी गया ताकि मैं परमेश्वर तांई जिन्दा रेई सके। 20 ऐ इयुदा है जियां जालू मसीह सली पर मरी गया, तां मैं भी मसीह सोगी सली पर मरी गया। हुण मैं जिन्दा नी है, पर मसीह मेरे अंदर जिन्दा है। हुण मैं परमेश्वर दे पुत्रे पर भरोसा करिरी ही दा है, जडा मिंजो ने इतना प्यार करदा है की उनी मेरे तांई अपनी जान देई दिती। 21 मैं इसा गल्ला ला मना नी करी सकदा की परमेश्वर अपनी दया दिया बजा ने सांझो बचाया। कयोकि अगर लोक मूसा दी व्यवस्था जो मन्नी करी धर्मी बणी सकदे, तां मसीह जो मणणे दी जरूरत नी थी।

3 हे गलातिया शेरहे दे लोकों, तुहाडे दिमाग खराब होई गियो न, तुहांजो कुनी भटकाई दितया है, कयोकि मैं तुहांजो बडे अच्छे तरीके ने समझाया की यीशु

मसीह सूली पर कजो मरया कने उनी कुस कम्मे जो पूरा कित्ता। 2 मिंजो इक गल्ल दस्सा, त्हांजो पबित्र आत्मा कियां मिलया? क्या मूसा दी व्यवस्था जो मन्नी करी त्हांजो पबित्र आत्मा मिलया? नि बिलकुल भी नी! त्हांजो पबित्र आत्मा इस ताई मिलया क्योकि तुसां शुभसमाचार सुणी कने उस पर भरोसा कित्ता। 3 क्या त्हाडा दिमाग खराब होई गया की, तुसां पबित्र आत्मा दे जरिये नोई जिन्दगी शुरू करिरी क्या अपणिया ताकता ला इदा अंत करणा चांदे न? 4 विच्चासी बणने बाद तुसां बडे दुख झेले। मै सच्ची आशा करता है की ऐ सब कुछ बेकार नी था। 5 जडा त्हांजो उदारता ला पबित्र आत्मा दिन्दा है कने त्हांजो च चमत्कार दे कम्म करता है, क्या ऐ इसा बजा ने है की तुसां मूसा दी व्यवस्था दा पालन कित्ता या मसीह दे बारे च शुभसमाचार सुणया कने उस पर भरोसा कित्ता? 6 “हुण अब्राहम दे बारे च ही सोचा, उनी परमेश्वर पर भरोसा कित्ता, कने इस्ती ने ही परमेश्वर अब्राहमे जो धर्मी बणाया।” 7 तां त्हांजो ऐ समझणा चाईदा की जडे लोक अब्राहम साईं परमेश्वर पर भरोसा करते न, सै अब्राहम दे सच्चे बंशज न। 8 कने परमेश्वर पबित्र शास्त्र च बडे पहेले बोलया की, परमेश्वर होर जातियां जो भरोसे करणे ने धर्मी बणाणा, परमेश्वर पहेले ही ऐ शुभसमाचार अब्राहमे जो सुणाई दितिया था, की “तेरे जरिये सारे देशां दे लोकां जो आशीष मिलणी।” 9 परमेश्वर अब्राहमे जो उडे भरोसे दिया बजा ला आशीष दिती, तियां ही जडा कोई भी मसीह पर भरोसा करता है उसयो पक्का ही अब्राहमे सोगी परमेश्वर आशीष देणी। 10 पर मूसा दी व्यवस्था च लिखया है, जडा कोई धर्मी होणे ताई व्यवस्था दे नियमा पर भरोसा रखदा है, परमेश्वर दा श्राप उस पर होंदा है। इस ताई उनी सारे लोकां पर श्राप आई गया जडे व्यवस्था जो मन्नी करी परमेश्वर सामणे धर्मी बणने दी कोशिश करते न। क्योकि कोई भी हर बकत उस व्यवस्था दा पूरी तरीके ने पालन नी करी सकदा। 11 पर ऐ गल्ल सच्च है, की मूसा दी व्यवस्था दा पालन करणे ने कोई भी परमेश्वर दिया नजरा च धर्मी नी बणी सकदा, क्योकि पबित्र शास्त्र च लिखया है, “पर अगर कोई भी परमेश्वर पर भरोसा करता है, तां परमेश्वर उसयो धर्मी बनाणा कने हमेशा दी जिन्दगी देणी।” 12 मूसा दी व्यवस्था दा पालन करिरी जिणा कने परमेश्वर पर भरोसा करिरी जीणा दोनो इकोदिया नी है, पर जियां की पबित्र शास्त्र च लिखया है की, जडा कोई इसा व्यवस्था दा पालन करता है, उनी जिन्दा रेणा। 13 पर मसीह सांझो उस श्राप ला छुडायो है जडा व्यवस्था नी मन्णे दिया बजा ने होंदा है, जालू सूली पर मसीह दी मौत होई तां उनी साडे पापां दिया बजा ने अपने उपर श्राप जो लेई लिया। क्योकि पबित्र शास्त्र च लिखया है की जडा कोई सूली पर मरदा है, सै श्रापित है। 14 मसीह ऐसा इस ताई कित्ता, की अब्राहम दी सारी आशीष यीशु मसीह दे जरिये होर जातियां दे लोकां दीकर पुजे, कने मसीह पर भरोसा करणे ने सांझो परमेश्वर दी पबित्र आत्मा मिल्ले, उसा जो देणे दा बायदा परमेश्वर कितया है। 15 हे मसीह भाईयो, मै इक आम जिन्दगी ला उदाहरण दिन्दा है, जालू दो लोक इक समझौता करते न, कने दोनो उस समझौते पर हस्ताक्षर करते न, तां ऐसा कोई माणू नी जडा उसयो बदली सके। 16 परमेश्वर अब्राहम ने बायदा कित्ता की हर कुसी जो तेरे इक बंश दे जरिये आशीष मिलणी, पबित्र शास्त्र च ऐ नी लिखया, की “तेरे बंशजो को” जियां की मते लोकां ताई बोलया, पर ऐ इक माणू दे बारे च गल्ल करता है, जालू ऐ बोलदा है की “तेरे बंश जो” कने ऐ माणू यीशु मसीह है। 17 मै जडा त्हांजो समझणा चांदा है सै ऐ है; की परमेश्वर अब्राहम सोगी बायदे दे 430 साल बाद मूसा दी व्यवस्था दिती। पर असां ऐ नी बोली सकदे की क्योकि हुण व्यवस्था है इस ताई परमेश्वर दे बायदे दी कोई कीमत नी। परमेश्वर दा बायदा हुण भी अटल है कने परमेश्वर इसयो पूरा करणा। 18 क्योकि अगर परमेश्वर लोकां जो मूसा दी व्यवस्था दा पालन करणे दिया बजा ने आशीष दितियो होंदी, तां उनी वायदे जो हटाई देणा था, पर परमेश्वर अब्राहम जो सै आशीष इस ताई दिती क्योकि उनी पहेले उसला बायदा कितया था। 19 तां फिरी व्यवस्था दा क्या कम्म है? मूसा दी व्यवस्था जो तालू दीकर बणी रेणा था, की जालू दीकर की अब्राहम दा बंशज नी आया, जिसदे बारे च परमेश्वर बायदा कितया था, परमेश्वर व्यवस्था स्वर्गदूतां दे जरिये मूसा जो दिती, जडा परमेश्वर कने लोकां दे बिच बिचोला था। 20 जालू दो लोकां बिच समझौता होंदा है, तालू समझौता करणे बाले दी जरूरत होंदी। पर परमेश्वर इक ही है, कने जालू उनी अब्राहमे ला बायदा कित्ता तां उडे बिच कोई भी बिचोला नी था। 21 तां क्या इदा मतलब ऐ है की मूसा दी व्यवस्था परमेश्वर दे बायदे दे खिलाफ है? नी कदी भी नी! क्योकि अगर व्यवस्था सांझो हमेशा दी

जिन्दगी देई सकदी, तां असां इदा पालन करिरी परमेश्वर सामणे धर्मी होई सकदे थे। 22 पर पबित्र शास्त्र ऐ बोलदा है की इस संसारे दे लोक पाप दी शक्ति दे गुलाम न, ताकि परमेश्वर जडा बायदा कितया है, सै उना लोकां जो देई सके जडे यीशु मसीह पर भरोसा रखदे न। 23 पर मसीह दे ओणे ला पहेले कने उस पर भरोसा करणे ला पहेले असां यहदी लोक मूसा दिया व्यवस्था दे अधीन थे, कने मूसा दे नियम कानून साडी रखबाली करते थे, कने मूसा दे नियम कनुना सांझो तालू दीकर जेला च रखया जालू दीकर की परमेश्वर सांझो पर मसीह जो प्रगट नी कित्ता। 24 मसीह दे ओणे दीकर व्यवस्था साडा मार्गदर्शन करणे ताई कने साडी देखभाल करणे ताई दितियो थी, ताकि असां यीशु मसीह च भरोसा करणे ने परमेश्वर सामणे धर्मी बणी सकन। 25 पर हुण जालू असां मसीह पर भरोसा करते न, तां हुण सांझो मार्गदर्शन ताई मूसा दे नियम कनुना दी जरूरत नी है। 26 क्योकि तुसां सारायां मसीह च बपतिस्मा लिया कने मसीह दी जिन्दगी दे अन्तार चलदे न। इस ताई तुसां सारे यीशु मसीह च भरोसा रखणे ला परमेश्वर दे पुत्र बणी गियो न। 28 मसीह च इक यहदी या होर जाति या इक गुलाम या इक अजाद माणू ऐ कोई अंतर नी। कने ना कोई मर्द है, ना कोई जनानी है। 29 अगर तुसां सारे यीशु मसीह च इक न, तां हुण तुसां अब्राहम दे परिबारे दा हिस्सा न कने तुसां जो सै सब कुछ मिलणा जिदा परमेश्वर अब्राहम ने बायदा कित्ता।

4 मेरे बोलणे दा मतलब ऐ है, की पुत्र अपने पिता दिया धन दौलत दा मालिक होंदा है, पर जालू दीकर सै इक छोटा बच्चा ही है तालू दीकर उदे च कने इक गुलाम च कोई फर्क नी होंदा। उदा हले दीकर इस पर हक नी है पर उनी सारे केसी दा मालिक बनाणा जडा उडे पिता दा है। 2 सै तालू दीकर घरे बालयां कने देखभाल करणे बालयां दे अधिकारां दे थले रेंदा है जालू दीकर सै उसा उमरा दीकर नी पुज्जी जांदा जालू उनी मालिक बणी जाणा। सै उमर उदा पिता तय करता है। 3 तियां ही असां भी, परमेश्वर जो जाणने ला पहेले जालू असां बचयां सांई थे, तालू असां इस संसारे दे कुछ रीती रिबाजां दा पालन गुलामा सांई करी दे थे। 4 पर जालू सै सही बकत आई गया जिसदी परमेश्वर योजना बणाईयो थी, तां परमेश्वर अपने पुत्रे जो इस संसार च भेजया, कने इकी जनानिया उसयो पैदा कित्ता, सै इक यहदी दे रूप च पैदा होया था कने मूसा दी व्यवस्था जो मनदा था। 5 ताकि सै सांझो अजाद करी सके, जडे मूसा दी व्यवस्था दे गुलाम थे। कने उनी सांझो गोद लेईकरी अपने बच्चे बणाई लिया। 6 असां उडे बच्चे न, क्योकि परमेश्वर अपने पुत्रे दी पबित्र आत्मा जो साडे दिले च भेजया है, जडी आत्मा परमेश्वर जो “मेरा पिता” बोली करी पुकारदा है। 7 इस ताई हुण असां गुलाम नी न, पर असां परमेश्वर दे बच्चे बणी गियो न; क्योकि तू परमेश्वर दा बच्चा है, तां तिजो सै सारा कुछ मिलणा है जडा परमेश्वर अपने बचयां जो देणे दा वायदा कितया है। 8 जालू तुसां परमेश्वर दे ही जाणदे थे, उस बकत तुसां उना दे गुलाम थे जडे असल च परमेश्वर है ही नी। 9 पर हुण जालू तुसां परमेश्वर जो जाणी लिया है या मिंजो ऐ बोलणा चाईदा की परमेश्वर सांझो अपने बच्चे दे रूप च अपनाया है, तां फिरी तुसां कजो कमजोर कने उना बेकार पूर्णगी शिक्षां दे गुलाम होणे ताई बापस जा दे न? क्या त्हांजो दुबारा उना दे ही गुलाम बणने दी इच्छा है? 10 मै ऐ सुणया की, तुसां जडे होर जातियां दे भरोसा करणे बाले न, यहदी लोकां दे खास दिना च, मिनयां, मौसमा कने सालां जो ऐ सोची करी मंदे न की इना ला परमेश्वर खुश होंदा है। 11 जडा कुछ तुसां करा दे न उदिया बजा ने चिंता करा दा है, की तुहाडे बिच सेबा कितियो है सै बेकार ना होई जाऐ। 12 हे मसीह भाईयो, मै त्हांजो ने बिनती करदा है, तुसां सियुदा ही व्यवहार करा जदिया व्यवहार मै करता है, क्योकि मै व्यवस्था ला तियां ही अजाद है जियां तुसां होर जाति दे लोक न; तुसां मेरी अच्छे ने देखभाल किती। 13 पर त्हांजो याद होणा, ऐ इक बिमारिया दिया बजा ला था कि मै पैली बरी तुहाडे बाल शुभसमाचार दा प्रचार करणा आया। 14 मेरी बिमारी तुहाडे ताई इक पेशानी थी, पर फिरी भी तुसां मिंजो ला नभरत नी किती कने ना ही मिंजो दूर जाणा दिता। तुसां मिंजो उसी तरीके ने अपनाया जियां तुसां परमेश्वर दे इक स्वर्गदूत जो या यीशु मसीह जो अपनादे न। 15 उस बकत तुसां बडे खुश थे! तुहाडी सै खुशी हुण कुछ है, मिंजो पूरा यकीन है की, तुसां मेरे ताई सब कुछ बलिदान करी दिन्दे, “ऐयू दीकर की अपणी हखी भी कडी करी मिंजो देई दिन्दे।” 16 तां क्या तुसां सोगी सच्च बोलणे दिया बजा ला मै त्हाडा दुशमण बणी गिया? 17 झूठे गुरु त्हांजो अपने सोगी

शामिल करने दी पूरी कोशिश करा दे न, पर ए भले मकसद ताँदी ही है; उना दा मकसद तहाँजो मिंजो ला लग करणा है, ताकि तूसां उना दे चले बणी जान। 18 हमेशा ही खरे मकसद ताँदी उत्साही होणा खरा होंदा है कने सिर्फ उस बकत ही नी, जालू मैं तूहाडे सोगी होंदा है। 19 हे भरे बचचयो, जियां इक जनानी बच्चा जमदे बकत पीड महसूस करदी है, तियां ही मैं इक बरी फिरी तूहाडे ताँदी दुख झेला दा है। तूहांजो मसीह च मजबूत होई जाणे दीकर, मैं इसा पीडा च रेणा चांदा है। 20 मेरी बडी इच्छा है की हुण तूहाडे सोगी मैं ताकि मैं तूसां ने प्यारे ने गल्ल करी सके, क्योंकि मैं असल च नी जाणदा की मैं तूसां जो क्या बोलें। 21 जडे मूसा दी व्यवस्था दे गुलाम रेणा चांदा न, बिचार करा की मूसा दे लेख सांझो क्या दसने दी। 22 पबित्र शात्र च लिखया है, की अब्राहम दे दो पुत्र थे, उदा इक बच्चा हाजिरा ला पैदा होया, सै इक नेकराणी थी। कने दुज्जा बच्चा सारा ला पैदा होया था, सै उदी घरे बाली थी। 23 अब्राहम दा पुत्र, जडा उसयो नेकराणी हाजिरा ला पैदा होया था, सै सिर्फ माणुऐ दिया योजना ने पैदा होया था। पर अब्राहम दा दुज्जा पुत्र जडा सारा ला पैदा होया था, उदा जन्म परमेश्वरे दे बायदे जो पूरा करणे ताँदी होया था। 24 इना दोनो जनानियां दी तुलना दो बाचां ने करी सकदे न, सै बायदा जडा परमेश्वरे इझाएल दे लोकां सोगी सीने पहाडे च किता था, सै हाजिरा साँदी है। सै उना बचयां जो पैदा करदी है जडे गुलाम बणदे न। 25 हाजिरा सीने पहाड जो दशांदी है जडा अरब देश च है। सै अज दे यस्त्रालेम शेर साँदी है जिदे लोक अपने बचयां समेत मूसा दिया व्यवस्था दे गुलाम न। 26 पर स्वर्गीय यस्त्रालेम अब्राहम दी घरे बाली सारा साँदी है, कने उदे बच्चे मूसा दिया व्यवस्था दे गुलाम नी न। ए यस्त्रालेम साडी मां साँदी है, जडी भरोसा करदी है। 27 क्योंकि पबित्र शात्र च लिखया है, “हे जनानियो तूसां जिना दे कदी बच्चे नी होऐ,” कने जिना कदी बच्चे जमणे दी पीडा जो कदी महसूस नी किता, चिल्ला कने खुश होआ! क्योंकि छडियो जनानिया दे बच्चे, उसा जनानिया दे बचयां ला जादा न जडी अपने घरे बाले सोगी रेंदी है। 28 हे मसीह भाईयो, असां भी अब्राहम दे पुत्र इझाक साँदी न, जडे परमेश्वरे दे बायदे दे अनुसार पैदा होयो न कने परमेश्वरे दी ओलाद बणी गे। 29 पर हुण तूहांजो सै लोक सतांदा न जडे लोक चांदा न की तूसां व्यवस्था जो मन्ना, तियां ही जियां शरीर दिया इच्छा ने पैदा होऐ इझाएले आत्मा दी इच्छा ने पैदा होऐ इझाक जो सताया था। 30 पर पबित्र शात्र च लिखया है, “गुलाम जनानी कने उदे पुत्रे जो दूर भेजी दे, क्योंकि गुलाम जनानिया दे पुत्रे जो पिता दी धन दौलत चे कुछ नी मिलणा चाँदा; ऐ पिता दी घरे बालिया दे पुत्रे जो मिलणा चाँदा।” 31 इस ताँदी हे मसीह भाईयो, असां गुलाम जनानिया दे बच्चे नी न, जिना जो मूसा दे नियम कनुना जो मणणा जरूरी है। पर असां उसा जनानिया दे बच्चे न, जडी पिता दी घरे बाली है।

5 मसीहे सांझो बचाई लिया है ताकि सांझो मूसा दिया व्यवस्था दा पालन करणे ताँदी गुलामा साँदी जिणे दी जरूरत नी है। इस ताँदी अजाद बणी रिया कने व्यवस्था जो मणणे ताँदी अपने आप जो दुबारा ला गुलाम बणना मत दिया। 2 मैं पौलुस तूहांजो जडा बोलदा है, उसयो सुणा की परमेश्वरे दे सामणे धर्मी होणे ताँदी अगर खतना करांगे, तां मसीहे जडा कुछ कितया है, उसला तूहांजो कोई फायदा नी होणा। 3 मैं दुबारा चेताबनी करी बोलदा है, की हर इक माणु जडा ऐ सोची की खतना करवांदा है, की परमेश्वरे दिया नजरा च धर्मी बणी सके, तां उसयो मूसा दिया व्यवस्था दे हर इक हुकमे जो मणणा चाँदा। 4 तूसां जडे मूसा दी व्यवस्था जो मन्नी की धर्मी बणना चांदा न, तां तूसां अपने आप जो मसीह कने उदे अनुग्रह ला लग करा दे न, जिसला परमेश्वर तूहांजो बचाई सकदा है। 5 क्योंकि सांझो पबित्र आत्मा दिया तरफा ला पूरी उम्मीद है, की परमेश्वरे सांझो धर्मी दे स्पे च अपनाई लेणा क्योंकि असां परमेश्वरे पर भरोसा करते न। 6 अगर तूसां यीशु मसीह दे चले न, तां इसा गल्ला ला कोई फर्क नी पौंदा की तूहाडा खतना होया है या नी, जडी गल्ल मायने रखदी सै ऐ है की असां मसीह पर भरोसा कने परमेश्वरे कने दुज्जे लोकां ताँदी प्यार रखदे न। 7 तूसां तां मसीह सोगी अपने रिशते च अच्छे ने अग्रे बदा दे थे, हुण तूसां जो मसीह दी सच्ची शिक्षा पर भरोसा करणे ला कुसी जो भी रोकणा नी देणा चाँदा था। 8 ऐसी झूठी शिक्षा परमेश्वर नी दिन्दा, जिनी तूहांजो अपने बच्चे होणे ताँदी चुणया है। 9 ऐसी झूठी शिक्षा इयां फेला दी है, जियां की इक कहाबत है, “की थोडा दिया खमीर पूरे गुनयो आटे जो खमीर करी दिन्दा है।” 10 मैं परमेश्वरे पर भरोसा करदा है की उनी तूहांजो झूठी शिक्षा पर भरोसा करणे ला बचाई रखणा है। बल्कि तूसां मेरियां शिक्षां जो मणणा

है। क्योंकि जडे तूहाडे ताँदी परेशानी खडी करदे न सै कोई भी कनी हो परमेश्वरे उसयो सजा देणी। 11 पर हे मसीह भाईयो, मैं ऐ प्रचार करदा है, की खतना जरूरी नी है, कने इसा बजा ने ही यहदी लोक मिजो सतांदा न, अगर मैं ऐ प्रचार नी करे की उद्धार सिर्फ यीशु मसीह दी सूली ने ही है, तां कुनी भी नराज नी होणा। 12 खरा होंदा, की जडे तूसां जो झूठी शिक्षा दिन्दे न, सै अपने आपे जो नामद बणाई लेंदे। 13 हे मसीह भाईयो, तूहांजो परमेश्वरे दे जरिये अजाद होणे ताँदी चुणया था, इस ताँदी सांझो मूसा दी व्यवस्था जो मणणे दी जरूरत नी है। पर अपनी आजादी जो शरीर दियां इच्छा जो पूरा करणे दा जरिया मत बणा, पर इक दुज्जे ने प्यार कने सेबा करा। 14 क्योंकि सारी व्यवस्था दा निचोड इकी ही हुकमे च पूरा होई जाँदी है, “तू अपने पडोसियां ने अपने साँदी प्यार रखा।” 15 पर अगर तूसां इकी दुज्जे जो डंगरा साँदी मारदे बडदे न, तां तूसां जो ध्यान देणा चाँदा की कुथी तूसां इक दुज्जे दा सत्यानाश नी करी देन। 16 पर मैं तूहांजो बोलदा है, की तूहांजो पबित्र आत्मा दी अगुवाई ने जिणे दी जरूरत है, तालू तूसां सै बुरे कम्म नी करणे जिना कम्मा जो तूहाडा पापी सभाव करणा चांदा है। 17 क्योंकि सै कम्म जडे साडा पापी सभाव सांझो ला करबाणा चांदा है, ऐ सेई चीचां न जडी पबित्र आत्मा नी चांदा की असां नी कन, क्योंकि ऐ दोनो इक दुज्जे दे दुश्मण न; इस ताँदी हमेशा उना खरे कम्मा जो नी करी सकदे जडे असां करबाणा चांदा न। 18 कने अगर तूसां पबित्र आत्मा दी अगुवाई ला जिन्दगी जिन्दे न, तां तूसां मूसा दिया व्यवस्था दे गुलाम नी न। 19 तूसां दिखी सकदे न की पापी सभाव क्या-क्या करदा है, मतलब की व्यभिचार, गंदे कम्म, लुचपान। 20 मूर्तिपूजा, टणा, बैर, लडाई, जलन, गुस्सा, बिरोध, फूट, अधर्म। 21 डाह, नशे च मतवाले टणा, ऐश मस्ती, कने ऐसे होर भी बडे कम्म करदे न, इना कम्मा दे बारे च मैं चिताबनी दे दा है जियां मैं पेहेले भी तूहांजो दिती थी, की ऐसे कम्मा करणे बालयां जो परमेश्वरे दे राज्य दे वारिस नी होणे। 22 सै गणु जडे परमेश्वरे दी आत्मा दे जरिये पैदा होंदे न, सै न प्यार, खुशी, शांती, सबर, कने दया, भलाई, दुज्जया ताँदी भरोसेमंद, 23 दीनता, कने संयम; ऐसे व्यवहार पर रोक लागे ताँदी कोई भी व्यवस्था नी है। 24 सै लोक जडे यीशु मसीह ने रिशता रखदे न, उना अपनी पाप भरी जिन्दगीया दियां बुरियां इच्छां जो सूली पर चढाई दितया है। 25 क्योंकि परमेश्वरे दिया पबित्र आत्मा सांझो इक नोई जिन्दगी दितियो है, इस ताँदी सांझो पबित्र आत्मा दी अगुवाई ने जिणा चाँदा। 26 सांझो घमंड नी करणा चाँदा, कने इक दुज्जे ला जलन नी करणी चाइदी।

6 हे मसीह भाईयो, अगर कुनी माणुऐ कोई पाप किता है, तां तूसां जडे पबित्र आत्मा दी अगुवाई ने चलदे न, उसयो प्यारे ने सही रस्ते पर बापस लोणे ताँदी उदी सहायता करा, ध्यान रखा की कुथी तूसां अपु ही उस पाप च ना पेई जान। 2 मुशकिलां दा सामणा करदे बकत इक दुज्जे दी सहायता करा। इयां करिरी तूसां मसीह दी व्यवस्था जो मदे न। 3 अगर तूहांजो लगदा है कुसी दी सहायता करणे ताँदी तूसां बडे जरूरी न तां तूसां सिर्फ अपने आप जो मुर्ख बणा दे न। तूसां इतणे भी जरूरी नी न। 4 पर हर इक माणु अपने कम्मा जो परखे की क्या सै खरे न, अगर खरे न तां अपने कम्मा पर घमंड करी सकदा है। पर उसयो अपने कम्मा दी तुलना दुज्जे लोकां दे कम्मे सोगी नी करणी चाइदी। 5 सांझो चे हर इक जणा अपने कम्मा दा अपु जिम्मेवार है। 6 ऐ जरूरी है की जडे लोक परमेश्वरे दे बचन जो सिखांदा न, उना दे लोकां जो उना ला खाणे कने पैसे दी सहायता मिलणी चाइदी। 7 अपने आप जो धोखा मत दिया, कोई भी कदी भी परमेश्वरे जो धोखा नी देई सकदा है क्योंकि माणु जडा रांदा है सेई बडदा है। 8 क्योंकि अगर कोई माणु सै करदा है जडा उदा पापी सभाव चांदा है, उसयो हमेशा दी मौत मिलणी है पर जडा माणु पबित्र आत्मा दी इच्छा जो पूरा करदा है, उसयो पबित्र आत्मा हमेशा दी जिन्दगी देणी। (aiōnios g166) 9 असां खरे कम्म करणे च हिम्मत ना छडन, क्योंकि अगर असां कदी हार नी मणणे, तां परमेश्वरे अपने बकते पर सांझो इनाम देणा। 10 इस ताँदी जालू भी सांझो मोका मिल्ले सारे लोकां सोगी भलाई करणी चाइदी; खासकर विवासी भाई बेहणा सोगी। 11 ध्यान दिया की कियां बडे-बडे अखरां च मैं तूहांजो अपने हथां ला ऐ लिखया है। 12 इस ताँदी की यहदी तूहांजो अपनाई लेने, सै तूहांजो खतना करबाणे ताँदी बोलदे न, सै ऐसा इस ताँदी करदे न ताकि लोक उना जो ऐ प्रचार करणे दिया बजा ने तंग ना कन की परमेश्वर लोकां जो सिर्फ इस ताँदी बचांदा है क्योंकि सै भरोसा करदे न की मसीह सूली पर मरया।

13 क्योंकि ऐशु दीकर की यहदी विश्वासी भी मूसा दी व्यवस्था जो नी मंदे, पर सै चांदे न की तुहाडा खतना होऐ ताकि सै दुज्जे यहदियां सामणे घमंड ने ऐ बोली सकन की तुहाडा खतना उना दिया बजा ने होया है। 14 अगर मै घमंड करदा तां मै इसा गल्ला पर घमंड करदा की साडा प्रभु यीशु मसीह साडे तांई सूली पर मरया। जडा कुछ भी उनी कितया है, उदी बजा ने संसार दियां कुसी भी चिजा दा बश नी रिया, कने मिंजो च हुण धरती दे कम्मा जो करणे दी कोई इच्छा नी है। 15 क्योंकि ना खतना, कने ना जिसदा खतना नी होया कुछ मायने रखदे न, जस्री ऐ की क्या असां इक नोई सृष्टि च बदल्यो न। 16 परमेश्वर उना सारे लोकां पर दया करे कने अपणी शांति दे, जडे इस नियम जो मंदे न, कने उना जो आशीष देणी क्योंकि सै परमेश्वर दे चुणयो लोक न। 17 अगो जो मिंजो कोई दुख ना दे, क्योंकि मेरे शरीर च जडे दाग न सै दसदे न की मै यीशु दा सच्चा सेवक है। 18 हे मसीह भाईयो, मै प्राथना करदा है की साडे प्रभु यीशु मसीह दा अनुग्रह हमेशा तुसां सबना पर होदा रे। आमीन।

इफिसियों

1 मैं पौलस, परमेश्वर दिया इच्छा ने यीशु मसीह दा प्रेरित है, ऐ चिड़ी इफिसस शहर च रहेबाले परमेश्वर दे पबित्र लोकां जो लिखा दा है। **2** मैं प्रार्थना करता है की साडा पिता परमेश्वर कने प्रभु यीशु मसीह तहांजो पर अनुग्रह कने शांति बणाई रखे। **3** साडे परमेश्वर कने प्रभु यीशु मसीह दे पिता दी महिमा हो, जिनी सांझो मसीह दे जरिये स्वर्ग ला मिलणे बालियां हर तरा दियां आत्मिक आशीषां दीतियां न। ऐ साडी मसीह सोगी एकता दिया बजा ला होया है। **4** मसीह सोगी इक होई जाणे दिया बजा ने परमेश्वर सांझो इस संसारे जो बणाणे ला पेहले ही चुणी लिया है, ताकि असां उदे सामणे पबित्र कने निर्दोष होई सकन। **5** क्योंकि परमेश्वर सांझो ला प्यार कित्ता इस तांई परमेश्वर बडे पेहले फेसला लिया की यीशु मसीह दे जरिये सांझो परमेश्वर दी ओलाद होणे तांई गोद ले। परमेश्वर ऐ अपणिया इच्छा ला कने खुशिया ला कित्ता। **6** परमेश्वर ऐसा इस तांई कित्ता की असां उदे अदभुत अनुग्रह तांई उदी स्तुति करन, जडा उनी सांझो मुफ्त च देई दिता क्योंकि असां उदे प्यारे पुत्रे ने जुडयो न। **7** यीशु मसीह दे खून बहाणे दिया बजा ने असां अजाद होयो न। मतलब की साडे पाप माफ किते न, परमेश्वर दा अनुग्रह बडा महान है जडा उनी सांझो पर दसया। **8** जिसयो परमेश्वर अपने ज्ञान कने समझ ने सांझो पर दसया। **9** परमेश्वर सेई कित्ता, जडा उनी गुप्त रखया था, कने उस गुप्त योजना दे बारे च दसया जडी उनी पेहले ला ही मसीह दे जरिये पूरा करणे दा फेसला लिया था। **10** जालू इस योजना जो पूरा करणे दा सही बकत ओगा, तालू परमेश्वर स्वर्ग कने धरती दी सारियां चीजां जो मसीह दे अधीन करणा, ताकि सब कुछ मसीह दे हक च हो। **11** परमेश्वर असां यहदियां जो भी मसीह सोगी जोडी करी अपने लोक होणे तांई चुणी लिया क्योंकि शुरू ला उदी ऐई योजना थी। परमेश्वर सब कुछ अपणिया इच्छा ने ही करता है। **12** असां यहदी पेहले लोक न, जिना मसीह पर आस रबी, कने सांझो इस तांई चुणया था की असां परमेश्वर दी महिमा कने स्तुति करन। **13** तसां सचचा संदेश सुणया है, जडा इस बारे च दसदा है की परमेश्वर कियां तुहाडा उद्धार कित्ता जालू तसां यीशु मसीह पर भरोसा कित्ता था, तां परमेश्वर तहांजो पबित्र आत्मा दिती जडा उनी अपने लोकां जो देणे दा वायदा कित्ता था। ऐ दसणे तांई की तसां परमेश्वर दे न। **14** परमेश्वर सांझो पबित्र आत्मा दिता, जडा इसा गल्ला जो पक्का करता है की परमेश्वर जडियां होर अच्छी चीजां दा वायदा कित्ता है, सै भी सांझो देणियां, ऐ तालू होणा जालू परमेश्वर अपने लोकां जो पूरी तरहा ने छुटकारा करणा, परमेश्वर दी महिमा कने स्तुति हो। **15** इसा बजा ने, जालू ला मैं यीशु मसीह पर तुहाडे भरोसे कने परमेश्वर दे लोकां तांई तुहाडे प्यार दे बारे च सुणया, **16** तालू ला मैं तुहाडे तांई परमेश्वर दा धन्यावाद करता है कने अपणिया प्रार्थना च तहांजो याद करता है। **17** मैं प्रार्थना करता है की परमेश्वर जडा साडे प्रभु यीशु मसीह दा महिमामय पिता है, तहांजो आत्मिक ज्ञान कने समझ दे जिसने तसां परमेश्वर जो अच्छे ने जाणी सकन। **18** कने मैं ऐ भी प्रार्थना करता है की सै सचच जो समझणे तांई तुहाडी सहायता करे ताकि तसां उस आस दे बारे च जाणी सकन जडी तहांजो दिती थी जालू परमेश्वर तहांजो चुणया था, कने तसां उना महिमामय आशीषां जो समझी सकन जिसदा वायदा परमेश्वर अपने लोकां ने कित्ता था। **19** मैं चांदा है की तसां उदी महानता कने उदी शक्तियां दे बारे च जाणी सका, जडी परमेश्वर बाल सांझे तांई है जडे यीशु मसीह पर भरोसा रखते दे। ऐ सेई महान शक्ति है। **20** जिनी मसीह जो मरयां चे जिन्दा कित्ता कने स्वर्गीय जगा च सजे कने आदर बालियां जगा च बठया। **21** ओशु परमेश्वर उसयो हर तरा दी प्रधानता, हक कने शक्ति, कने प्रभुता, कने उदी उपादी हर इक अधिकारिये दिया उपादिया ला उपर है, जडी ना सिर्फ इस लोक च पर ओणे बाले लोक च भी उपर ही रणी। (aiōn g165) **22** कने परमेश्वर इना सारियां चीजां जो यीशु मसीह दी शक्ति दे अधीन करी दिता कने ऐ सेई है जिसयो परमेश्वर सारे भरोसा करणे बालयां पर अगुवा बणाई दिता। **23** असां भरोसा करणे बाले मसीह दे शरिर् दे अंगा सांई न, कने मसीह सांझे बिच पूरी शक्ति दा इस्तेमाल करता है, जिचां सै अपनी शक्तियां दा इस्तेमाल पूरी दुनिया च करता है।

2 जालू तुहाडे बाल परमेश्वर दिया तरफा ला नोई जिन्दगी नी थी, तालू तसां बुरे कम्मा कने पापां दिया बजा ने मरयो लोकां सांई थे। **2** उस बकत तसां संसारे

दे लोकां सांई चलते थे, जडे परमेश्वर जो नी जाणदे थे कने तसां शैताने दे हकम्मा जो मंदे थे, मतलब की उस प्रधान दा जडा अम्बरे च बुरियां आत्मा पर शासन करता है, जडा हण भी उना लोकां दे मने च कम्म करा दा जडे परमेश्वर दे हकम्मा जो नी मंदे। (aiōn g165) **3** असां भी उना सांई ही जिन्दे थे कने अपने पापी सभाब दिया इच्छा जो पूरा करते थे कने जडियां भी सांझे शरिर् दिया इच्छां कने बुरे बिचार सांझो ला करबाणा चांदे थे, असां सेई करदे थे कने बाकी सारयां सांई असां भी बुरे थे कने परमेश्वर दी सजा दे अधीन थे। **4** पर परमेश्वर बडा दयालू है। अपने उस बडे प्यार दिया बजा ने जिसने उनी सांझो ने प्यार कित्ता; **5** जालू असां मसीह पर भरोसा नी कित्ता था, तालू असां बुरे कम्मा कने पापां दिया बजा ने मरयो लोकां सांई थे। तालू परमेश्वर सांझो जिन्दगी दिती जालू उनी मसीह जो मरयां चे जिन्दा कित्ता; परमेश्वर दे अनुग्रह ने ही तुहाडा उद्धार होया है। **6** क्योंकि यीशु मसीह सोगी जुडे होणे दिया बजा ने, परमेश्वर सांझो मरयां चे जिन्दा कित्ता, कने सांझो स्वर्गीय जगा च मसीह सोगी बेठया। **7** परमेश्वर ऐसा इस तांई कित्ता ताकि ओणे बाले दिना च संसारे दे लोकां जो दस्सी सके की उदा अनुग्रह कित्ता महान है, उस कम्मे दिया बजा ने जडा यीशु मसीह सांझे तांई कित्ता है। (aiōn g165) **8** क्योंकि जालू तसां भरोसा कित्ता तां परमेश्वर अपने अनुग्रह ने तहांजो बचाई लिया है, कने तसां अपने आप जो नी बचाया पर ऐ परमेश्वर दा दान है; **9** कने ना ही तुहाडे किते भले कम्मा दिया बजा ने है कने इस तांई तुहाडे बाल घमंड करणे दी कोई बजा नी है। **10** क्योंकि सांझो परमेश्वर नोऐ लोकां दे रूप च बणया है ताकि असां यीशु मसीह दे उना भले कम्मा जो करन जिना जो परमेश्वर पेहले ला साडे तांई तैयार कित्ता है। **11** इसा बजा ने याद रखा, की तसां होर जातियां दे रूप च पैदा होयो न, कने यहदी लोक तहांजो ऐ बोली करी मजाक उडया की तसां खतना नी करबांदे न कने असां करबांदे न। पर उना दा ऐ रिबाज सिर्फ उना दे शरीरां करदे न। **12** तसां लोक उस बकत यीशु मसीह जो नी जाणदे न कने परमेश्वर दे चुणयो होयो इस्लामी लोकां च शामिल नी थे कने तसां उना चीजां दे हिस्सेदार नी थे, जिना दा वायदा परमेश्वर यहदियां ने कित्ता था, कने तुहाडे बाल कोई आस नी थी कने इस संसारे च बिना परमेश्वर दे रेंदे थे। **13** पर हण तसां मसीह सोगी इक न कने यीशु मसीह च उदे खून बहाणे दे जरिये नेडे आयो न। **14** क्योंकि यीशु मसीह दिया बजा ने सांझे बिच शांति होई। पेहले ऐसा जियां इकी दिबारा यहदियां कने होर जातियां जो लग करी दितया था। सै इक दुज्जे ला नफरत करदे थे, पर हण मसीह उसा दिबारा जो डाई दितया है कने यहदियां कने होर जातियां जो इक करी दितया है। **15** अपनी मौत दे जरिये उनी मूसा दी व्यवस्था दे सारे नियमा कने रिबाजां जो खत्म करी दिता है ताकि सै यहदियां कने होर जातियां दे बिच शांति करी सके ताकि इक नोआ झूठ बणाई सके, **16** कने अपनी मौत दे जरिये मसीह यहदियां कने होर जातियां जो इक करी दिता कने उना जो परमेश्वर मिलाई दिता, इयां करिके इना दोनो जातियां दिया नफरता जो खत्म करी दिता। **17** कने मसीह आई करी होर जातियां जो जडे परमेश्वर ला दूर थे, कने यहदियां जो जडे उदे नेडे थे, उना जो मेल जोल दा शुभसमाचार सुणया। **18** यीशु मसीह दिया बजा ने ही असां सारे इक ही पबित्र आत्मा ने पिता परमेश्वर बाल आई सकदे न। **19** इस तांई होर जातियो, तसां हण परदेसी या मुसाफिर नी रे, पर हण तसां परमेश्वर दे लोकां सांई स्वदेसी कने परमेश्वर दे परिबारे दे लोक बणी गियो न। **20** कने प्रेरितां कने परमेश्वर दे संदेश देणेबालयां दी नियां पर तसां इक घरे सांई न जिसदा कुणे दा पश्र यीशु मसीह अपु ही है। **21** यीशु मसीह ही है जडा घरे जो इक सोगी जोडी करी रखदा है कने इसयो परमेश्वर तांई इक पबित्र मंदिर दे रूप च बणांदा है, **22** हे होर जाति दे विक्वासियो क्योंकि तसां मसीह सोगी इक न, इस तांई तहांजो भी होर लोकां ने जोडया जा दा है। ताकि तसां इक ऐसा घर बणी जान जिशु परमेश्वर दी आत्मा रेदी है।

3 इसा बजा ने, मैं पौलस तुहाडे तांई प्रार्थना करता है। मैं जेला च कैद है क्योंकि मैं होर जातियां च प्रभु यीशु मसीह दा शुभसमाचार दा प्रचार कित्ता। **2** तसां पक्का सुणया है की परमेश्वर अपने अनुग्रह दे जरिये तहांजो शुभसमाचार दा प्रचार करणे दी जिम्मेदारी मिजो दितियो है। **3** जियां की मैं पेहले तहांजो थोडे अखरां च लिखया था, की परमेश्वर मिजो अपु ही उस गुप्त योजना जो दसया है। **4** जियां ही तसां चिड़ी पढणे, तालू ही तहांजो पता लगणा की मैं उस गुप्त योजना जो कित्ती अच्छे तरिके ने समझदा है। **5** इसा गुप्त योजना दे बारे च पुराणे बकते

दे लोकां जो नी दसया था, पर हण परमेश्वरे पबित्र आत्मा दे जरिये अपने प्रेरितां कने परमेश्वरे दे संदेश देणेबालयां जो खुल्सा कित्ता है। 6 परमेश्वरे दी गुण योजना ऐ है, की यीशु मसीह दे शुभसमाचार दे जरिये होर जातियां भी उसा ही विरासत च हिस्सेदार होणा जडी बिरासत यहूदियां बाल होणी, कने सै इक ही शरिर दे हिस्से कने परमेश्वरे दे उना वायदयां दे हिस्सेदार होणे जुडे उनी यहूदियां ने किते। 7 कने परमेश्वरे जडा मिंजो मुफ्त अनुग्रह दा तोफा दितया है, जिसने मिंजो सौभाग्य मिलया की मै उदे शुभसमाचार सुणाने दी सेवा करे। 8 मै परमेश्वरे दे सारे लोकां च सारयां ला घट काबिल है, पर परमेश्वरे दे अनुग्रह ने मिंजो ऐ सौभाग्य मिलया की मै होर जातियां जो मसीह दी उस हमेशा दी आशीषा दा शुभसमाचार सुणाई सके जडा साडी सोच ला बाहर है, 9 कने हर कुसी जो ऐ गुण योजना समझाई सके, जिसयो परमेश्वरे जडा सारियां चिंजां जो बणाने बाला है, शुरू ला ही गुण रखया था। (aiōn g165) 10 परमेश्वरे दा मकसद था, की हण कलीसिया दे जरिये परमेश्वर दी अनन्त बुद्धि दा ज्ञान उना प्रधाना कने अधिकारियां पर प्रगट हो जुडे अम्बरे दे अणदिरियां जगां च राज करदे न। 11 परमेश्वरे संसार जो बणाने ला पहले इसदी योजना बणाईयो थी, जिसयो उनी यीशु मसीह दे जरिये पूरा कित्ता। (aiōn g165) 12 मसीह सोगी जुडने दिया बजा ला कने उस साडे भरोसे दिया बजा ला हण असां परमेश्वरे दिया हजुरी च हिम्मत कने भरोसे ला आई सकदे न। 13 इस ताई मै बिनती करदा है की जुडे दुख मिंजो तुहाडे ताई होआ दे न, उना दिया बजा ला सांजो होसला नी छडणा चाईदा क्योकि ऐ सब कुछ तुहाडे फायदे ताई है। 14 इस ताई मै पैतूस गोडे भार बेईकरी तुहाडे ताई पिता परमेश्वर दा प्राथना करदा है। 15 सै सेई है जडा मसीह पर भरोसा करणे बाले परिबारां दा पिता है, जडा स्वर्ग च है कने धरती पर है, 16 मै प्राथना करदा है की सै अपणिया महिमामय आशीषां चे तुहांजो ऐ दान देई सके की उदिया आत्मा दिया शक्तिया ने तुसां अपणी आत्मा जो मजबूत करन, 17 भरोसे दे जरिये मसीह तुहाडे अंदर बसे। मै प्राथना करदा है की परमेश्वर कने तुहाडा इक दुज्जे ताई प्यार तुहांजो मजबूत बणाए कने तुहांजो पोणे ला बचाये। 18 कने परमेश्वरे दे सारे लोकां सोगी, तुहांजो ऐ पता लगणा की मसीह सांजो ने कितलणा प्यार करदा है, जिसदी कोई सीमा नी। 19 कने मै प्राथना करदा है की तुहांजो मसीहे दे उस प्यारे दा पता लगणे जडा माणुआं दिया समझा ला बाहर है, ताकि तुहाडा चरित्र परमेश्वरे दे चरित्र सांई बांधी सके। 20 परमेश्वरे दी शक्ति सोगी जडा सांजो च कम्म करदा दा है, साडे मणणे या सोचणे ला भी जादा परमेश्वर करी सकदा है। 21 उदी महिमा कलीसिया च कने मसीह यीशु च हमेशा कने केई पिढियाँ-पिढियां दीकर होंदी रे। आमीन। (aiōn g165)

4 इस ताई मै जडा प्रभु यीशु दी सेवा करणे दिया बजा ला जेला च केदी है, तुहांजो ने बिनती करदा है, की जिसा बुलाहट सोगी परमेश्वरे तुहांजो अपने लोक बणने ताई सदया है, उसा दे काबिल अपणी जिन्दगी जीन, 2 मतलब की सारिया दया ने कने प्यारे ने, कने सबर रखीकरी इकी दुज्जे दे व्यवहार जो सेहन करा, 3 ऐसा करणे दी कोशिश करदे रिया ताकि तुसां लगातार इक दुज्जे ने मिली झूली करी रेन, क्योकि तुसां परमेश्वरे दिया आत्मा जरिये इक कितयो न। 4 असां सारे विश्वासी इक ही शरिर दे अंगा सांई न, कने असां सारयां जो इक ही पबित्र आत्मा मिलया है। जियां तुहांजो इक आस दिती थी, जालू तुहांजो परमेश्वरे दे लोक बणने ताई चुणया था। 5 असां सबना दा इक ही प्रभु है, असां सिर्फ यीशु मसीह पर ही भरोसा करदे न, असां सारयां जो इक ही बपतिस्मा मिलया है, 6 कने इक ही परमेश्वर है जडा सब लोकां दा पिता है, सै असां सारयां पर राज करदा है, सै असां सारयां दे जरिये कम्म करदा है, कने सै असां सारयां च रेदा है। 7 पर मसीहे सांजो चेर हर इकी जो उदे माफ दे अनुसार या उदारता दे कम्म करणे ताई लग-लग कने खास काबलियातं दितियां न। 8 इस ताई पबित्र शाश्रु च लिखया है, “सै उचिया जगा च चढया, कने सै अपने सोगी केई कैदियां जो लेई गिया, कने माणुए जो दान दिते।” 9 जालू पबित्र शाश्रु बोलदा है की, सै उचिया जगा च चढया, इदा मतलब सिर्फ ऐ है की, सै धरतिया दे सबते निचलिया जगां च उतरया भी था। 10 इस ताई मसीह जडा थले आया, कने सै सेई है जडा स्वर्ग च सबना ला उच्छी जगा पर जाई करी बेई गिया। ताकि सै हर जगा होई सके। 11 ऐ मसीह था जिनी ऐ जिम्मेदारी कलीसिया जो दिती: उनी थोडयां जो प्रेरित बणया, कने केईयां जो परमेश्वरे दा संदेश देणेबाला बणया, कने केईयां जो शुभसमाचार सुणाने बाला, कने केईयां जो रखबाला, कने शिक्षक बणया। 12 इना दी जिम्मेदारी ऐ है, की सै परमेश्वरे दे लोकां जो उदा कम्म करणे ताई तैयार करन

कने मसीह दा शरिर जडा विश्वासायां नी मंडली है, सै मजबूतिया ला बददी जाए। 13 ऐ तालू दीकर होदा रेणा जालू दीकर की असां अपने भरोसे कने परमेश्वरे दे पुत्रे दे बारे च अपणी समझ च इक होई जांदे न। तालू असां काबिल होई जाणा, जियां की मसीह है कने असां पूरी तरा ने उदे सांई होई जाणा। 14 ताकि असां हण बचयां सांई नी रेन, हण असां उना किस्तियां सांई नी होन जिना जो लेहरां अंगे पिच्छे धकेलदियां कने जिस पासे होआ चलदी उस पासे चली पोंदिया न। इदा मतलब है की सांजो धोखेबाज लोकां दी उना झूठी शिक्षा च नी फकणा चाईदा, जडियां सच्च लगदियां न। 15 पर प्यारे ने सच्च बोली करी कने सांजो हर तरहा ने काबिल होणा चाईदा ताकि असां मसीह सांई होई जान, जडा अपणा शरिर दे न, मतलब की कलीसिया दा सार है। 16 असां सारे जडे मसीह पर भरोसा करदे न, उदे शरिरे दे अंगा सांई न। जियां इक माणुए दे शरिरे उदे सारे जोडा ने इक सोगी जुडी करी रेदा है, कने जालू शरिर दा हर इक अंग ठीक तरीके ने कम्म करदा है तां शरिर बड्दा कने मजबूत होदा है; तियां ही जालू सांजो चेर हर इक उस कम्मे जो करदा है जडा मसीहे सांजो दितया है तां असां मजबूत कने काबिल बणना कने इक दुज्जे ने होर जादा प्यार करणा। 17 इस ताई उस अधिकारे सोगी जडा मिंजो प्रभुए दितया है, मै तुहांजो ऐ दसदा है, की भरोसा नी करणे बाले लोकां सांई, तुसां बेकार बिचारां सोगी अपणी जिन्दगी मत जिया। 18 क्योकि सै समझणे दे काबिल नी न, कने उना दी नासमझी दिया बजा ने जडी उना च है कने सुणने ला मना करणे दिया बजा ने है उस जिन्दगी ला लग होई गियो न जडा परमेश्वर दिन्दा है; 19 क्योकि उना जो ह्यू शर्म नी ओदी, इस ताई उना बुरे कम्म करणे ताई अपु जो बदली लिया है, सै लगातार हर तरा दे बुरे कम्म करदे रेदे न, कने सै कांई भी इना चीजां जो छडणा नी चांदे न। 20 पर तुसां इस तरा दा व्यवहार करणा नी सिखया जालू तुसां मसीह दे बारे च सिखया। 21 जडा कुछ तुसां यीशु मसीह दे बारे च सुणया है कने जडा कुछ तुहाडे गुस्सां तुहांजो सिखाया है, सै पक्का ही उदा सच्चा संदेश है। 22 तुहाडे गुस्सां तुहांजो उस तरीके जो छडणे दी शिक्षा दिती, जिसदे अनुसार तुसां व्यवहार करदे थे। तुहाडियां बुरियां इच्छा तुहांजो धोखा दित कने तुहाडी जिन्दगी खराब करी दिती। 23 हण तुहांजो परमेश्वरे जो तुहाडे सोचणे दे तरीके बदलना देणा चाईदा, 24 कने परमेश्वरे तुहांजो इक नोआ माणू बणया है। इस नोए माणुए जो परमेश्वरे सांई बणने ताई बणया है। मतलब की उसयो असल च अर्पी कने पबित्र होणे ताई बणया है। 25 इसा बजा ने झूठ बोलणा छडी करी हर इक अपने साथी विश्वासी ने सच्च बोले, क्योकि असां सारे इक ही शरिर दे अंग न। 26 अगर गुस्सा होई जान, तां ध्यान रखा की तुसां पाप ना करन: दिन मुकणे ला पहले तुसां गुस्सा होणा बंद करी दिया। 27 कने तुसां शैताने जो धोखा देणे दा मौका मत दिया। 28 चोरी करणे बाला फिरी चोरी न करे; पर उसयो अपने हथां ने इमानदारिया ने कम्म करणा चाईदा, ताकि गरीब लोकां दी सहायता करणे ताई उस बाल कुछ हो। 29 कोई गंदी गल्ल तुहाडे मुए ला ना निकले, पर उना गल्लां जो बोला जडियां लोकां ताई जस्री न, जडियां की उना जो भरोसे च मजबूत करणे च सहायता करन। तालू तुसां जडा कुछ भी बोलणे उनी तुहाडे सुणने बालयां दा भला करणा। 30 अपने कम्मा दे जरिये परमेश्वरे दिया पबित्र आत्मा जो दुखी मत करा जडा तुहाडे छुटकारे ताई बयाने दे संचे च दितया है। 31 हर तरा दी कडवाट कने कोप कने गुस्सा, रोष, कने बैरभाव, कने निंदा तुहांजो ला दूर होई जा। 32 इक दुज्जे पर कृपा कने दया करा, कने जियां परमेश्वरे मसीह च तुहाडे पाप माफ किते, तियां ही तुसां भी इक दुज्जे दे पाप माफ करा।

5 तुसां परमेश्वरे दे प्यारे बच्चे न, इस ताई तुसां उदे सांई बणने दी कोशिश करा। 2 तुहाडा सभाब दुज्जयां ताई प्यार भरया हो जियां यीशु मसीहे तुहांजो ने प्यार कित्ता कने तुहाडे पापां दी माफी ताई अपने आपे जो बलिदान करी दिता। परमेश्वर इस बलिदान ला खुश था, क्योकि ऐ बलिदान उदे ताई खुशबू बाले इत्र सांई था। 3 जदिया की परमेश्वरे दे लोकां ताई सही है, तियां तुसां भी व्यभिचार, कने कुसी भी तरा दे बुरे कम्म, या लालचे दियां गल्लां दी चर्चा मत करदे। 4 कने ना ही अशलील गल्लां करा, कने ना बेकार गल्लां, कने ना ही अशलील मजाक करा, क्योकि ऐ गल्लां शोभा नी दिदिया कने सही नी न, पर सिर्फ तुहाडे मुए ला धन्याबाद ही निकले। 5 क्योकि तुसां ऐ अच्छी तरा ने जाणदे न की कुसी व्यभिचारी दी, बुरे या लालची माणुए दी, जडा मति पूजणे बाले सांई है, जडा इस संसारे दी चीजां दी अराधना करदा है। इना मसीह कने परमेश्वरे दे राज्य दा

हिस्सा नी बणना। 6 उना लोकां दियां गल्लां ने मुर्ख मत बणा जडे इना पापां जो करणे ताई बहाने बणणे दी कोशिया करदे न; क्योंकि इना ही कम्मा दिया बजा ने परमेस्वर दे गुस्सा हुकम नी मनणे बालयां पर भडकदा है। 7 इस ताई तूसां इना पाप भरे कम्मा जो करणे च उना सोगी मत जुडा। 8 तूसां अंधे च रेणेबाले लोकां साईं होदे थे, पर हण तूसां लौईं च रेणेबाले लोक न, क्योंकि तूसां प्रभु दे लोक न। इस ताई लौईं च रेणेबाले लोकां साईं कम्म करा। 9 क्योंकि अगर कोई माणु लौईं च है, तां उदा चाल चलन अच्छा कने धार्मिक होदा है कने उस पर भरोसा करी सकदे न, 10 कने ऐ सिखणे दी कोशिया करा की प्रभु जो क्या खुश करदा है। 11 कने तूसां इना पाप भरे कम्मा जो करणे च उना सोगी मत जुडा, बल्कि लोकां जो दुस्सा की ऐ कम्म बुरे न। 12 क्योंकि अविश्वासी लोकां दे गुण कम्मा दी चर्चा भी सरदा दी गल्ल है। 13 पर जालू कुसी चिजा पर लौ चमकदी है तां हर कोई दिखी सकदा है, की सै चीज कदेई है क्योंकि जालू कुसी चिजा पर सै पोंदी है, तां चीज खुद लौ बणी जांदी है। 14 इसा बजा ने लोक बोलेदे न, “हे सोणे बालयो जागी जा कने मरयां ला जिन्दे होई जा; मसीह तूहांजो पर लौ चमकाणी।” 15 इस ताईं ध्याने ने दिखदे रिया की तूसां कदेई जिन्दगी जी दे न। बेअकलयां साईं नी पर ज्ञानिया साईं जिन्दगी जिया। 16 कने भलाई करणे दे हर इक मौके दा अकला ने इस्तेमाल करा क्योंकि दिन बुरे न। 17 इस बजा ने अज्ञानी मत बणा, पर ध्याने ने समझा की प्रभु तूहांजो ला क्या करवाणा चांदा है। 18 कने शराब पी करी मतबाले मत बणी रिया, क्योंकि इसला लोक असभ्य कने दुज्यां ने बुरा व्यवहार करते न, पर पबित्र आत्मा जो अपने आप पर काबू करणा दिया, 19 अगर तूसां पबित्र आत्मा दे काबू च न, तां तूसां इयां ही करणा; जालू तूसां अणु चे गिठे होगे तां भजन कने स्तुति करा कने उना होर गाणयां जो गा जडा पबित्र आत्मा तूहांजो दिन्दा है। 20 कने जडा कुछ साडे प्रभु यीशु मसीह किता उदी बजा ने हमेशा सारियां गल्लां ताईं साडे पिता परमेस्वर दा धन्यावाद करदे रिया। 21 असां मसीह ताईं श्रदा कने भक्ति रखणे दिया बजा ने इक तुज्जे दे अधीन रिया। 22 हे घरे बालियां, अपने-अपने घरे बालयां दे अधीन रिया, जियां तूसां प्रभु दे अधीन रदियां न। 23 क्योंकि घरेबाला तां घरे बालिया दा सिर है, जियां की मसीह कलीसिया दा सिर है; मसीह कलीसिया दा उद्धारकर्ता है, जडी उदा अपना शरीर है। 24 जियां कलीसिया मसीह दे अधीन न, तियां ही घरे बालियां भी हर गल्लां च अपने-अपने पति दे अधीन रें। 25 हे पतियो, अपणिया-अपणिया घरे बालिया ने प्यार रखा, जियां मसीह कलीसिया ने प्यार करिके साडे ताईं अपनी जिन्दगी देई दिती। 26 ताकि उदा बचन कलीसिया दे लोकां पर प्रगट होईकरी उना जो पाप ला शुद्ध करे, जियां कोई माणु कुसी चिजा जो धोई करी शुद्ध करदा है; 27 सै अपने लोकां ताईं मरी गिया ताकि सै अपने लोकां जो सिद्ध बणाईं सके, कने सै सांडो अपनी ऐसी महिमामय कलीसिया बणाई करी पेश करी सके, जिना च कोई दोष या पाप या होर कोई बुरी गल्ल नी होणी बल्कि सै पबित्र कने सिद्ध होणे। 28 इयां होणा चाईंदा, की पति अपणिया-अपणिया घरे बालिया ने अपने शरीर साईं प्यार करे, जडा अपणिया घरे बालिया ने प्यार करदा है, सै अपने आप ने प्यार करदा है। 29 क्योंकि कुनी भी अपने शरीर ने बैर नी किता बल्कि उदी देखभाल करदा है, जियां मसीह कलीसिया दी देखभाल करदा है, तियां ही इक माणु खुद दी देखभाल करदा है। 30 क्योंकि असां सारे मसीह दे शरीर दे अंगा साईं न। 31 जियां की पबित्र शास्त्र च लिखया है, “इसा बजा ने माणु अपने माता पिता जो छडी करी अपणिया घरे बालिया ने मिल्ली के रेणा, कने उना दोनो इक तन होणा।” 32 ऐ इक कीमती कने गेहरी शिक्षा है, कने मै इदी तुलना मसीह कने उस पर भरोसा करणे बालयां सोगी करदा है। 33 पर तूसां पर भी लागू होदा है, की हर इक अपणिया घरे बालिया ने अपने साईं प्यार करे, कने घरे बाली भी अपने घरे बाले दी इज्जत करे।

6 हे बच्चो, पबित्र शास्त्र च लिखया है; “अपणे माता पिता दी इज्जत करा, तालू तरे सोगी सब भला होणा कने धरती पर तू जादा दिन जिणा।” ऐ पेहला हुकम है जिसयो परमेस्वर इक वायदे सोगी दितया है। इस ताईं हे बच्चो तूसां जडे प्रभु पर भरोसा करदे न, तूसां ताईं ऐईं ठीक है की तूसां अपने माता पिता दी गल्ल मन्ना। 4 हे माता पिताओं, अपने बचयां जो अपने व्यवहार ने गुस्सा ना चढा पर प्रभु दी शिक्षा, कने चेतानवी देईकरा, उना दी देखभाल करा। 5 हे नोकरो, जडे लोक संसारे दे अनुसार तुहाडे मालिक न, उना दा इमानदारी कने सच्चाईं ने हुकमा जो

मन्ना, जियां यीशु मसीह दा मंदे न। 6 ऐ सब सिर्फ दिखाबे ताईं कने लोकां जो खुश करणे ताईं मत करा, तूसां मसीह दे सेवक न, इस ताईं तूहांजो अपने घरे मने ने सेईं करणा चाईंदा जडा परमेस्वर चांदा है की तूसां करा। 7 तूसां खुशिया ने अपने सेबा दे कम्मा जो करदे रिया, जियां मन्ना तूसां लोकां दी नी पर प्रभु दी सेबा करा दे न। 8 क्योंकि तूसां जाणदे न, की जडा कोई जदिया खरा कम्म करगा, चाऐ सै नोकर हो, चाहे सै अजाद हो, प्रभुऐ उसयो उदा इनाम देणा है। 9 इयां ही हे मालिको, तूसां उना जो धमकिया नी देणिया चाईंदियां, पर तूहांजो अपने नोकरां सोगी सियुदा ही व्यवहार करणा चाईंदा, जियां मै उना ने बोल्या है की सै तूसां ने करन। क्योंकि तूसां जाणदे न की, उना दा कने तुहाडा दोनो दा मालिक स्वर्ग च है, कने सै कुसी दा पक्ष नी लेंदा। 10 आखरी च, आत्मिक रूप च प्रभु दी अपार शक्तिया ने मजबूत बणा। 11 असां माणुआं दे खिलाफ लडाईं नी लडा दे न। असां प्रधाना कने अधिकारियां कने अंधेरे दे हाकिमा ने कने आत्मिक संसारे दिया शक्तिया दे खिलाफ लडा दे न। इस ताईं सारे हथियार पेहनी लिया जडा परमेस्वर दिदा है कने जालू सै बुरा दिन ओणा है तालू तूसां शैतान दियां चालां ने अपने आप जो बचाईं सकदे न। कने जालू ऐ लडाईं खत्म होई जाणी तालू भी तूसां मजबूतिया ने खडे रेईं सकणा। (aiōn g165) 14 इस ताईं जियां की इक सिपाईं लडाईं ताईं तैयार होणे ताईं अपनी कम्मा च बेल्ट बनदा है, तियां ही परमेस्वर दी सच्चाईया जो बेल्टा साईं बन्नी लिया, कने जियां झिलम सिपाइये दी लडाईया च रक्षा करदी है, तियां ही जालू शैतान तूहांजो पर हमला करदा है तालू तुहाडा धार्मिक व्यवहारे तुहाडी रक्षा करणी है। 15 कने परमेस्वर दी शांति दा शुभसमाचार सुणणे ताईं तुहाडी इच्छा ठीक तियां ही होणी चाईंदी, जियां की इक सिपाईं लडाईं ताईं तैयार होणे ताईं जूते पेहनदा है; 16 कने इक होर गल्ल है, जियां इक सिपाईं दूशमणे दे तीरां ला बचणे ताईं ढाल लेंदां है, तियां ही मसीह पर पक्का भरोसा रखा ताकि मसीह तूहांजो शैतान दे नुकसान करणे बाले जल्दे तिरां ला बचाईं रखे। 17 जियां इक सिपाईं अपने सिरे जो लडाईं च बचणे ताईं टोपी लगाईं रखदा है, तियां ही परमेस्वर तूहांजो शैताने ला बचाणा। जियां इक सिपाईं अपने बचाब ताईं इक तलबार पकडदा है, तियां ही अपने बचाब ताईं परमेस्वर दे बचने दा इस्तेमाल करा। 18 कने हर बकते जियां पबित्र आत्मा अगुवाई करदा है तियां प्राथना करा कने बिनती करदे रिया, कने जागदे रिया कने हमेशा पबित्र लोकां ताईं प्राथना करदे रिया, 19 कने तूसां मेरे ताईं भी प्राथना करा की परमेस्वर मिंजो बोलणे ताईं शब्द दे, ताकि मै हिम्मत ने शुभसमाचार दे बारे च जडा सारे लोकां ताईं है, उदियां गुण गल्लां उना जो समझाईं सके, 20 इस ताईं मै जजिरा च जकडयो होऐ राजदूत साईं सेबा करा दा है। प्राथना करा की जियां मिंजो बोलणा चाईंदा तियां ही हिम्मत ने शुभसमाचार दा प्रचार करी सके। 21 कने तुखिक्स जडा प्यारा भाई कने प्रभु च भरोसे झोगा सेवक हे, उनी तूहांजो सारियां गल्लां दुस्सी देणियां ताकि तूसां जाणी सकन की मेरी हालत क्या है कने क्या करा दा है। 22 उसयो मै तुहाडे बाल इस ताईं भेजया हे, की तूसां साडिया हालता जो जाणन, कने सै तूहांजो उत्साहित करी सके। 23 मै प्राथना करदा है की पिता परमेस्वर कने प्रभु यीशु मसीह तूसां भरोसा करणे बालयां जो शांति दे, ताकि इसा बजा ने तूसां इक तुज्जे ने प्यार करन कने लगातार प्रभु यीशु मसीह पर भरोसा करन। 24 परमेस्वर तूसां सारयां पर अनुग्रह करे जडे उस प्यार ने प्रभु यीशु मसीह जो प्यार करदे न जडा प्यार कदी खत्म नी होदा।

फिलिपियों

1 मैं पौलस तीमथियस सोगी ऐ चिट्ठी लिखा दा है कने असां यीशु मसीह दे सेबक न। मैं ऐ चिट्ठी फिलिप्पी शोहरे च रेणे बाली कलीसिया दे अगुवां जो कने सेबकां समेत परमेस्वर दे पबित्र लोकां तांई लिखा दा है। **2** मैं ऐ प्राथना करता है कि, साडे पिता परमेस्वर कने प्रभु यीशु मसीह दी तरफा ला तुहांजो अनुग्रह कने शांति मिलदी रे। **3** पहले दिने ला तुसां यीशु मसीह दे श्भसमाचार पर भरोसा किता, कने श्भसमाचार जो फेलाणे च साडे हिस्सेदार रे। इसा बजा ला मैं जालू भी तुहाडे बारे च सोचदा है, तां परमेस्वर दा धन्यवाद करता है, कने मैं खुशिया सोगी तुहाडे सारयां तांई उदी सहायता तांई प्राथना करता है। **6** मिंजो इसा गल्ला दा भरोसा है की परमेस्वर तुसां च खरा कम्म शुरु कितया है, उनी यीशु मसीह दे दुबारा मुडी ओणे दीकर उसयो पूरा भी करणा। **7** ठीक है कि मैं तुसां सारयां तांई ऐसा ही बिचार करे, क्योंकि मेरे मने च तुहाडे तांई खास जगा है, क्योंकि जालू मैं केद च है, ऐ श्भसमाचार दी सच्चाईया ला जबाब देणे तांई तुसां मेरे सोगी परमेस्वर दे अनुग्रह च साथी न। **8** इंदे च परमेस्वर केद च गणाह है कि मैं यीशु मसीह सांई प्यार करिरी तुसां सारयां जो मिलणे दी इच्छा करता है। **9** मैं ऐ प्राथना करता है, की तुसां पूरी समझ कने ज्ञान ला इक दुज्जे सोगी लगातार प्यार च बदे दे जा, **10** इस तांई की तुसां जडियां खरियाँ गल्लां न उना जो अपनाई करी योग्य बणी जा, ताकि मसीह दे मुडी ओणे दीकर सच्चे कने निर्दोष बणी रेई सकन। **11** कने मसीह यीशु दे जरिये पैदा होणे बाले धार्मिकता दे कम्मा ला अपने जो भरी लिया, जिसला परमेस्वर दी महिमा कने स्तुति होंदी रे। **12** है मसीह भाईयो, मैं चांदा है, की तुसां सारे भी ऐ जाणी लिया जडा मिंजो पर बितया है, उसने मतयां लोकां श्भसमाचारे पर भरोसा किता है। **13** ऐथू दीकर की महाराजा कैसरे दे राज्य दी सारी सेना कने बाली सारे लोकां जो भी ऐ पता चली गिया कि मैं मसीह दे श्भसमाचार तांई जेला च है। **14** कने हुण मेरे किं हणे दिया बजा ला, प्रभु यीशु च जडे भाई न, उना चे केई पुरे भरोसे सोगी परमेस्वर दा बचन बिना कुसी डरे दे कने हिम्मत ला सुणा दे न। **15** कुछ लोक तां जलन कने लडाईया दिया बजा ला मसीह दा प्रचार करते न कने कुछ भली सोच ला प्रचार करणे च मेरी सहायता करते न। **16** जडे भली सोचा सोगी प्रचार करते न, सै ऐ इस तांई करते न क्योंकि सै मिंजो सोगी प्यार करते न कने सै जाण्दे न कि मैं श्भसमाचारे दे जबाब देणे तांई जेला च रखया है। **17** पर जडे लोक जलन रखदे न, सै अपनी मतलबी इच्छा दिया बजा ला मसीह दा प्रचार करिंये न पर इमानदारिया ला नी करदे, ऐ समझणी की सै जेला च मेरी परेशानियां जो बधाई सकन। **18** तौं क्या होया? बस झण्णा ही, की हर तरीके ला चापे झुटिया बजा ला चापे सच्चाईया ला, मसीह दा श्भसमाचार सुणया जांदा है, कने मैं इसला खुश है, कने हमेशा खुश रेणा। **19** क्योंकि मैं जाण्दा है की तुहाडिया प्राथना ला, कने पबित्र आत्मा ला जडी यीशु मसीह भेजियो है, उदी सहायता न कैदा ला अजाद होई जाणा। **20** मेरी दिले दी इच्छा कने आस है, की कदी भी मैं कुसी भी हालात च शर्मिंदा ना होऐ, पर मिंजो मसीह दे बारे च बोलणे दी हिम्मत होंदी है, जियां मैं पहले किता था, चापे मैं जिंदा रे या मरी जां, मैं अपनी पूरी जिन्दगी ने मसीह दा आदर करते रे। **21** क्योंकि अगर मैं जिंदा रे, तां सिर्फ मसीह तांई है, कने अगर मरी जां तां ऐ मेरे तांई होर जादा ठीक होणा क्योंकि तालू मैं मसीह सोगी रेणा। **22** पर अगर शरि च जिन्दा रे तां मैं मसीह तांई कम्म करी सकदा है, पर मैं नी जाण्दा की कुसयो चुणे। **23** मन तां करता की मरी जां, कने मसीह बाला जाई करी रे, क्योंकि ऐ बडा ही अच्छा है। **24** पर मेरा जिन्दा रेणा होर भी जरूरी है, क्योंकि तुहांजो मेरी सहायता दी जरूरत है। **25** कने इस तांई की मिंजो इदा भरोसा है। की मिंजो पता है की मैं जिंदा रेणा है, कने तुसां सबना सोगी रेणा, मैं तुहांजो भरोसे च मजबूत होणे च कने खुश रेणे च तुहाडी सहायता करणा। **26** कने जालू मैं दुबारा आंगा, तां मेरिया बजा ने तुहाडे बाल यीशु मसीह पर घमंड करणे दी होर भी बजा होणी। **27** ध्यान रखा की तुहाडा सभाब मसीह दे श्भसमाचार दे अनुसार हो। चापे मैं आई करी तुहांजो ने मिल्ले या नी, मैं तुहाडे बारे च ऐई सुणे की तुसां इक ही भाव च, कने इक मन होईकरी श्भसमाचार दे भरोसे तांई सोगी मेहनत करदे न। **28** कने कुसी भी गल्ला तांई अपने विरोधियां ला डरने दी। तुहाडी हिम्मत उना तांई खाल्मे दा साफ चिन्ह है, पर तुहाडे तांई उद्दारे दा, कने ऐ परमेस्वर दिया तरफा ला है। **29**

क्योंकि परमेस्वर तुहांजो ऐ मोका दितया है, की ना सिर्फ तुसां मसीह पर भरोसा करा, पर उस तांई दुख झेलणे तांई बरदान भी मिलया है। **30** कने तुहांजो तियां ही मेहनत करणी है, जियां तुसां मिंजो फिलिप्पी शोहरे च करदे दिखया है, कने जिना दुखां दे बारे च तुसां सुणदे न जडे मिंजो जेला च हुण भी न।

2 अगर तुसां मसीह च होणे दिया बजा ला उत्साहित न, या उदे प्यार ला अराम मिलया हो, पबित्र आत्मा सोगी संगती हो क्योंकि मसीह तुहाडे तांई कम्पामय कने दयालू है। **2** तां मेरी ऐ खुशी पूरी करा की इक मन रिया, कने इक ही प्यार, इक ही चित, कने इक ही इच्छा रख। **3** मतलब कने घमंड सोगी कुछ मत करा, पर दीनता ला इक दुज्जे जो अपने ला खरा समझ। **4** हर कोई अपने ही फायदे दी नी, पर दुज्यां दे फायदे दी भी चिंता करा। **5** जदेया यीशु मसीह दा सबाब था तदिया ही तुहाडा भी हो; **6** यीशु मसीह पूरी तरहा ला परमेस्वर था, पर उनी इस प्रभुता पर अपना हक नी रखणा चाया। **7** पर उनी अपना सारा ईश्वरीय हक छडी दिता कने इक दास सांई बणी गिया, कने इक आम माणू बणी गिया। **8** कने माणू बणी करी अपने आपे जो दीन किता कने सै परमेस्वर दा इतना आजाकारी रिया कि सै मरणे तांई भी तैयार होई गिया, हां, उनी सूली दी मौत जो भी इक अपराधी सांई सेहन करी लिया। **9** इसा बजा ला परमेस्वर उसयो सारयां ला उच्चे आदर दिया जगा च बैठया कने उसयो सै ना दिता जडा सारयां ना ला बदिया है, **10** कि जडे स्वर्ग च कने धरतिया पर न कने जडे धरतिया दे थले न; सै सारे यीशुऐ दे ना जो आदर देणे तांई गोडे टेकन, **11** कने परमेस्वर पिता दी महिमा तांई हर कोई मनी ले की यीशु मसीह ही प्रभु है। **12** इस तांई हे मेरे प्यारो, जालू मैं तुहाडे सोगी था तालू तुसां हमेशा परमेस्वर दे हुकमा जो मनया है। हुण जालू मैं तुहांजो ला दूर होई गिया है, तां तुहांजो होर भी गल्ल मनणा चाईदी। डरदे कने कमदे होए तुसां सारयां जो उना चीजां जो करणा चाईदा जडियां उना लोकां तांई सही न जिना जो परमेस्वर बचाया है। **13** क्योंकि परमेस्वर ही है, जडा तुहांजो च कम्म करा दा है, कने तुहांजो करणे दी इच्छा कने शक्ति दे दा है, जडा उसयो खुश करता है। **14** सारे कम्म बिना बूड-बूडाए कने बिना बेहसा ला करा, **15** ताकि तुसां इस बुरे कने पापी संसारे च परमेस्वर दी सिद्ध आलादी सांई पबित्र कने निर्दोष जिन्दगी जिया, इस संसारे दे लोकां बिच तुसां अम्बरे दे तारयां सांई चमका, जियां तुसां उना जो बचन सुणादे न जडा अनन्त जिन्दगी दिन्दा है। **16** कने जालू यीशु मसीह दुबारा मुडी करी ओणा तां मिंजो घमंड होणा की मेरी कोशिश कने मेरी मेहनत बेकार नी गेई। **17** कने जालू मैं तुहांजो श्भसमाचार सुणया, तुसां प्रभु यीशु पर भरोसा किता कने तुसां सेबा तांई अपनी जिन्दगी देई दिती है। इस तांई, भले ही मिंजो श्भसमाचार सुणणे दिया बजा ला मारी रिया, तमी मैं तुहाडे सोगी खुश रेणा। **18** मेरी विनती है की तुसां भी इयां ही खुश रिया कने मेरिया खुशिया च शामिल होई जा। **19** मिंजो प्रभु यीशु मसीह च आस है की मैं तीमथियस जो तुहाडे बाल तोल्ली भेजणा, ताकि तुहाडा हाल सुणीकरी मिंजो उत्साहित होई जां। **20** क्योंकि मेरे बाल ऐसे सबाभे दा कोई नी है, जडा सच्चे मने ला तुहाडी चिंता करे। **21** क्योंकि सारे अपने-अपने फायदे दे बारे च सोचते रेदे न, ना की यीशु मसीह दे बारे च। **22** पर तुसां जाण्दे न की तिमथियोसे कियां दसया की सै बफादार है, उनी श्भसमाचार दे प्रचार च मेरा इस तरिके ला साथ दिता, जियां इक पुत्र अपने पिता दा साथ दिन्दा है। **23** इस तांई मिंजो आस है की जियां ही मिंजो पता लगगा की मेरी क्या हालत होणी, तियां ही मैं उसयो तोल्ली भेजी दिगा। **24** कने मिंजो प्रभु च भरोसा है की मैं अपु भी तोल्ली ओणा है। **25** पर मैं इफ्रुदित्स जो तुहाडे बाल भेजणा जरूरी समझणा। जडा मेरा भाई है, कने साथी कने सोगी लडणे बाला, तुहाडा संदेश मेरे बाल पुजाणे बाला, कने जरूरी गल्लां च मेरी सेबा दहल करणे बाला है। **26** उदा मन तुसां सारयां च लगया था, इस तांई सै बेचेन रेदा था, क्योंकि तुसां उदिया बमारिया दा हाल सुणया था। **27** कने पक्का ही सै बिमार तां होई गिया था, ऐथू दीकर की मरणे वाला भी था, पर परमेस्वर उस पर दया करिके उसयो ठीक किता। परमेस्वर सिर्फ उस पर ही नि, पर मिंजो पर भी दया किती ताकि मैं पहले ला भी जादा दुख सेहन ना करे। **28** इस तांई मैं उसयो भेजणे तांई होर भी जादा उत्सुक है कि तुसां उसयो दुबारा दिखीकरी खुश होई जान कने तुहाडे बारे च मेरी चिंता भी घटी जा। **29** इस तांई तुसां प्रभु च उस सोगी बडिया खुशिया ला मिलनयो, कने तुहांजो उदा कने ऐसे लोकां दा आदर करणा है। **30** क्योंकि सै मसीह दे कम्मा तांई अपने प्राण खतरे च पाई करी मौत दे इतणे नेडे

आई गिया था, ताकि से मेरी सहायता करी सके, क्योंकि तुसां मेरी सहायता दूर होणे दिया बजा ला नी करी सकदे न।

3 इस ताई हे मेरे मसीह भाईयो, प्रभु यीशु च खुश रिया। सेई गल्लां तुहांजो बार-बार लिखणे च मिजो कोई तकलीफ नी होंदी, पर मैं तुहांजो झूठे गुरूआं ला बचाणा चांदां हे। 2 बुरे लोकां ला साबधान रिया जडे बोलदे न की उद्धार ताईं तुहांजो खतना करणा जस्री है। 3 क्योंकि से बोलदे न की असां ही परमेश्वरे दे सच्चे लोक न, जडे परमेश्वरे दी भक्ति उदी आत्मा ला करदे न, कने अपणी जिन्दगी च यीशु मसीह सोगी इक होईकरी खुश होंदे न, कने अपणियां खुद दियां कोशियां पर भरोसा नी करदे न। 4 पर मिजो बाल अपणियां खुद दी कोशियां पर भरोसा रखणे दी खरी बजा है, अगर कोई इयां सोचदा है, की उदे बाल अपने आपे पर भरोसा रखणे दी खरी बजा है, तां मेरे बाल उसला भी बदीकरी बजा है। 5 जालू मैं अंठां रोजां दा होया तां परमेश्वरे दे हुकमा ला मेरा खतना होया, मैं जमीदा ही झ्पाएली है, कने बिन्यामीन दे गोत्र दा हे, मेरे माता पिता इब्रानी थे; मैं भी पक्का इब्रानी है; फर्सी होणे दिया बजा ने मैं सकती ला मूसा दी व्यवस्था जो मनया। 6 अगर मैं अपणी जलन दे बारे च बोले, तां मैं कलीसिया जो तंग करणे बाला था; कने यहदी व्यवस्था दा पालन करणे च, मैं इक धार्मिक माणु था कने सारी व्यवस्था दा पालन करदा था। 7 पर जडियां गल्लां मेरे फायदे दियां थियां, मैं उना जो मसीह दिया बजा ला नुक्सान समझया। 8 क्योंकि प्रभु यीशु मसीह जो जाणना बाकी सारियां चीजां जो जाणने ला बदीकरी है, कने मैं बाकी सारियां चीजां जो बेकार समझदा है। जडिया बजा ला मैं सब कुछ छडी दिता कने मैं उना जो कूडा समझदा है, ताकि मसीह जो होर भी गहराई ला जाणे। 9 ताकि मैं उसी सोगी एकता च रेई सके, मेरी धार्मिकता मूसा दी व्यवस्था दे हुकमा पर, अधारित नी है, पर एे सै धार्मिकता है, जडा सिर्फ परमेश्वर उना जो दिन्दा है, जडे मसीह पर भरोसा करदे न, 10 मैं एे चांदां है की मसीह जो होर जाणी लें कने उदे मरयां चे जी उठणे दी शक्ति जो जाणी सके कने उदे दुखे च शामिल होईकरी उदी मौत च उदे सांई बणी जां, 11 ताकि मैं भी मरयां चे फिरी जिन्दा होणे दा अनुभव करी सके। 12 मैं एे दाबा नी करदा की, मिजो एे सब पेहले ही मिल्ली गिया है, पर मैं कोशिया करी के अग्रे बदा दा है, की मिजो सै मिल्ली जाणे, जिस ताईं प्रभु यीशु मसीह मिजो चुण्या है। 13 मेरे मसीह भाईयो, मैं एे दाबा नी करदा की मिजो मेरा लक्ष्य मिल्ली गिया है; पर एे इक ही कम्म करदा है, की जडियां गल्लां होई गियां न, उना जो भुली करी अग्रे क्या होणा उस मकसदे ताईं बडी मेहनत करा दा है, 14 कने निशाने पासे दोडदा जान्दा है, ताकि मैं स्वर्ग जाणे दा इनाम पाई सके, जिदे ताईं परमेश्वरे मिजो प्रभु यीशु दे जरिये स्वर्ग जो सदया है। 15 इस ताईं असां चे जितणे भी आत्मिक स्पे च समझदार न, सै सारे इक मन रखन, कने अगर कुसी गल्ला च तुहाडा होर ही बिचार हो, तां परमेश्वरे उसयो भी तुहांजो पर प्रगट करी देणा। 16 इस ताईं जिथू दीकर परमेश्वरे सांझो पर सच्चाई जो प्रगट कितया है, उसी दे अनुसार ही सांझो चलणा भी चाईदा। 17 हे मसीह भाईयो, तुसां मेरे सांई व्यवहार करा कने उना लोकां पर ध्यान दिया जडे मेरे सांई व्यवहार करदे न, कने जडिया व्यवहार तुसां सांझो करदे दिखया जालू असां तुहाडे सोगी थे। 18 क्योंकि मते न जिना दे बारे च मैं पेहले भी अच्छे ने दसया है, कने हुण भी रोई-रोई करी दस्सा दा है, की ऐथू केई लोक न जडे ऐसी जिन्दगी जिन्दे न, जिसने पता चलदा है की सै मसीह दी सूली पर मौत दे खिलाफ न। 19 नाश होणा ही उना दा अंत है, सै शरि दियां इच्छा जो पूरा करणे ताईं जिन्दे न, कने अपने शर्मनाक कम्मा पर घमंड करदे न कने हमेशा संसारे दियां चीजां दे बारे च सोचदे रेंदे न। 20 पर असां स्वर्ग दे निबासी न, कने असां अपने उद्धारकर्ता प्रभु यीशु मसीह ही स्वर्ग ला बापस ओणे दा इंतजार करा दे न। 21 यीशु मसीह अपणियां उसा शक्तिया ने, हर इक चीजा जो अपने बसे च कितया है, कने साडे कमजोर, संसारिक शरिरे दा रूप बदली कर, अपणी महिमा दे शरिरे सांई बणाई देणा है।

4 इस ताईं हे मेरे प्यारे मसीह भाईयो, मिजो तुसां लोकां ने मिलणे दी बडी इच्छा है। तुसां, जडे मेरी खुशी कने मुकूट न, प्रभु च लगातार टिकी रिया। 2 मैं यहदिया कने सुन्तुखे दोनां बेहणा ला विनती करदा है, की प्रभु च इकी दृज्जे ला मिल्ली जूली करी रिया। 3 हे सच्चे साथी सुन्तुखे, मैं तिजो ला भी विनती करदा है, कि तू उना जनानिया दी सहायता कर की सै मेल मिलाप करी लेन, क्योंकि

उना मेरे सोगी शुभसमाचार प्रचार करणे च, क्लेमस कने मेरे उना होर साथियां सोगी बडी मेहनत किती, जिना दे ना जिन्दगी दी कताबां च लिखयो न। 4 प्रभु च हमेशा खुश रिया; मैं फिरी बोलदा है, खुश रिया। 5 सारे लोक तुहाडे कोमल सभाब जो जाणी सकन। प्रभु यीशु दा ओणा नेडे है। 6 कुसी भी गल्ला दी चिंता मत करा; पर हर इक हालात च तुहाडे निवेदन, प्राथना कने विनतिया दे जरिये धन्याबाद सोगी परमेश्वरे सामणे रखे जान। 7 तालू परमेश्वरे दी शांति, जडी माणुआं दी समझा ला परे है, तुहाडे दिले कने तुहाडे बिचारां जो मसीह यीशु च संभाली करी रखगी। 8 इस ताईं हे मसीह भाईयो, अंत च, जडियां-जडियां गल्लां सच्च न, कने जडियां-जडियां गल्लां आदरणीय न, कने जडियां-जडियां गल्लां धर्मी न, कने जडियां-जडियां गल्लां पबित्र न, कने जडियां-जडियां सुंदर न, कने जडियां-जडियां गल्लां प्रशंसा दे काबिल न, जडियां-जडियां गल्लां उत्तम कने आदर दियां गल्लां न, उना पर ही तुहाडा मन लगी रे। 9 जडियां गल्लां तुसां मिजो ला सिखियां, कने ग्रहण कितियां, कने सुणियां, कने मिजो च दिखियां उना दा ही पालन करा, तां शांति दे परमेश्वरे तुसां लोकां सोगी रेणा। 10 मैं प्रभु च बडा खुश है, की हुण तुहांजो इतणे दिना बाद मिजो पैसे भेजणे दे बारे च फिरी बिचार आया है; पक्का तुहांजो शुरू च भी इदा बिचार था, पर तुहांजो मौका नी मिल्ला। 11 एे नी की मिजो कुसी जरूरत दिया चिजा दी कमी है क्योंकि मैं हर तरा दे हालतां च खुश रेणा सिखया है। 12 मैं बडे थोडे च भी जीणा जाणदा है, कने जरूरत ला जादा च भी रेणा जाणदा है; हर इक गल्ला च कने सारे हालतां च मैं रजणा कने जालू मेरे बाल खाणे ताईं बडा कुछ होंदा है, कने जालू मेरे खाणे ताईं बडा घट होंदा है, तां मैं दोनां हालतां च रेणा सीखी लिया है। 13 मसीह दे जरिये, जडा मिजो शक्ति दिन्दा है, उदे च मैं सब कुछ करी सकदा है। 14 तमीं तुसां खरा कित्ता कि मेरे इना मुखिकलां दे दिना च पैसे भेजी करी मेरी सहायता कित्ती कने मेरे उना दुखां च मेरे साथी होए। 15 हे फिलिप्पी शहर दे लोकां, तुसां तां अपु ही जाणदे न जालू मैं तुहांजो यीशु मसीह दा शुभसमाचार सुणया था कने जालू मैं तुहाडी जगा ला मकिन्दुनिया प्रदेश जो गिया, तालू तुहांजो छडी होर कुनी भी कलीसिया च लेणे-देणे दे बारे च मेरी सहायता नी कित्ती। 16 इयां ही जालू मैं थिस्सलूनीके शहर च था, तालू भी तुसां मेरी सहायता जो पूरा करणे ताईं इक बरी नही पर दो बरी मिजो पैसे भेजे थे। 17 मैं एे इस ताईं नी बोलदा की मैं पैसा चांदा है की इसयो उना अच्छी चिजां दी सूची च शामिल करा, जिना जो तुसां पेहले ही करी बैठयो न, कने जिस ताईं परमेश्वरे तुहांजो इनाम देणा। 18 मेरे बाल सब कुछ है, कने बडा जादा भी है; जडियां चीजां तुसां इपफूदित्सा दे हथे ला भेजियां थियां उना जो पाई करी मैं रजी गिया है, एे इक तोफे सांई है, जिदे च मिटी खुशबु ओआ दी है, जिसयो सै ग्रहण करदा है कने एे परमेश्वर जो खुश करदा है। 19 मेरा परमेश्वर भी उस धने दे अनुसार जडा महिमा सोगी यीशु मसीह च है, तुहाडी हर इक घाटे जो पूरा करणा। 20 साडे पिता परमेश्वरे दी महिमा युगां-युगां दीकर होंदी रे। आमीन। (aiōn g165) 21 यीशु मसीह च सारे पबित्र लोकां जो मेरा नमस्कार बोला। जडे मसीह भाई मेरे सोगी न, तुहांजो नमस्कार बोलेदा न। 22 सारे पबित्र लोक, खासकर जडे महाराजा कैसरे दे घराने दे न, तुहांजो नमस्ते करदे न। 23 मैं प्राथना करदा है की साडे प्रभु यीशु मसीह दा अनुग्रह हमेशा तुसां सारयां सोगी रे।

कुलस्सियों

1 मैं, पौलस ए चिट्ठी लिखा दा है, जडा परमेस्वरे दी इच्छा ने चुणया होया यीशु मसीह दा प्रेरित है कने मसीह भाई तीमुथियुस दिया तरफा ला, **2** मसीह च उना पबित्र कने भरोसे दे काबिल मसीह भाईयां दे ना जडे कुलुम्से शेहर च रेंदे न। साडे पिता परमेस्वरे दिया तरफा ला तुसां सारायां जो असुग्रह कने शांति मिलदी रे। **3** जाला असां तुहाडे ताईं प्राथना करदे न, असां अपने प्रभु यीशु मसीह दे पिता मतलब की परमेस्वरे दा धन्यवाद करदे न। **4** क्योकि असां सुणया है, की यीशु मसीह पर तुहाडा भरोसा है, कने सारायां पबित्र लोकां ला प्यार करदे न; **5** क्योकि तुसां उम्मीदा दिया बजा ला ऐसा करदे न, जडी परमेस्वरे स्वर्गं च तुहाडे ताईं रखया है। जिदे बारे च तुसां पेहले ही सुणीं बैठयो न जालू लोक पैलीं बरीं तुहाडे बाल आये कने तुहांजो यीशु मसीह दे बारे च शुभसमाचार सुणया, जडा की परमेस्वरे दा सच्चा संदेश है। **6** ए शुभसमाचार सारे संसार च फेला दा है कने मेते भरी लोक यीशु मसीह पर भरोसा करा दे ना। ए हर जगा जिन्दगी बदला दा है, ठीक तियां ही जियां तुसां पैलीं बरीं सुणया था, कने सच्चाई जो समझया था की परमेस्वर उना लोकां दे पापां जो माफ करादा है, जडे यीशु मसीह च भरोसा करदे न। **7** उदी ही शिक्षा तुसां साडे प्रिय साथी इप्रास ला सीखी है, जडा साडे ताईं मसीह दा भरोसे दे लायक सेवक है। **8** उनी सान्द्रो दुज्जे लोकां ताईं तुहाडे प्यार दे बारे च दसया है, जडा पबित्र आत्मा तुहांजो दितया है। **9** इस ताईं जिस दिने ला ऐ सुणया है, असां भी तुहाडे ताईं हमेशा प्रार्थना किती, की परमेस्वरे दी आत्मा तुहांजो अकल कने समझ दे, की उदी इच्छा जो पुरे तरिके ला समझी सकन। **10** असां ऐ प्राथना करदे न ताकि तुसां ऐसी ही जिन्दगी जी न जदिया परमेस्वरे दे लोकां दा होणा चाईदी, कने तुसां परमेस्वरे जो खुश करी सकन कने तुसां लगातार भले कम्मा जो करदे रिया जिसने तुसां परमेस्वर जो जाणने च बन्दे जा। **11** कने असां ऐ भी प्रार्थना करदे न की परमेस्वर अनेखी शक्तिया ला बडा जादा मजबूत बणाए, ताकि तुसां सबर कने खुशिया ला मुशकिलां जो सेहन करी सकन। **12** कने पिता परमेस्वर दा धन्यवाद करदे रिया, जिनी सांझो अपणी विरासत च हिस्सेदार होणे दे काबिल बनाया, जिसयो उनी अपने पबित्र लोकां ताईं स्वर्गं च तैयार कितया है। **13** क्योकि ओई सांझो शैताने दिया शक्तिया ला छुडाई करी अपने प्यारे पुत्रे दे राज्य च लेई करी आया है। **14** परमेस्वरे अपने पुत्रे दा बलिदान करिरी सांझो शैताने दिया शक्तिया ला अजाद कित्ता कने साडे पापां जो माफ कित्ता। **15** कोई भी परमेस्वरे जो नी दिखी सकदा है, जालू उदा इकलोता पुत्र माणू बणी गिया उते, उनी लोकां दे सामणे परमेस्वर जो प्राट कित्ता कने सारा कुछ बणाणे ला पेहले से मौजूद था कने परमेस्वरे जडा कुछ बणाया उस पर उदा सारायां ला बडा हक है। **16** क्योकि सै मसीह था जिनी सारा कुछ बणाणे ताईं परमेस्वरे सोगी कम्म कित्ता, स्वर्ग दी हो, या धरती दी हो, दिखियो हो या अणदिखियो हो, क्या सिंहासन, क्या प्रभुताएँ, क्या प्रधानताएँ, क्या हक, सारियां चिजां उनी ही बनाईयां कने उदे ताईं ही बणियां न। **17** कुछ भी बणने ला पेहले, मसीह पेहले ला ही था, कने सारियां चीजां उदी बनाईयो व्यवस्था ला ही कम्म करदियां न। **18** मसीह कलीसिया दी अगुवाई करदा है, जियां सर माणुए दे शरीर जो काबू च रखदा है; सैई आदि है कने मरी के जी उठणे बालयां लोकां च पेहला है, कने सारियां गल्लां च सैई प्रधान बणे। **19** क्योकि पिता परमेस्वर दी खुशी इसी च ही है, की परमेस्वर दा पूरा सभाब यीशु मसीह च हो। **20** परमेस्वरे अपना पुत्रे जो भेजणे दा फेसला लिया, जिनी अपना खुश बहाना कने सूली पर उदी मौत होई। परमेस्वरे ऐ अपने कने सारियां चीजां बिच मेल मिलाप करणे ताईं कित्ता, इयां करणे ला उनी अपने कने स्वर्गं च शामिल कने धरती च शामिल सबना च शांति बनाई। **21** इसला पहले तुसां परमेस्वरे ला बडे दूर थे। तुसां परमेस्वरे दे दुःखमण थे क्योकि तुहाडे बिचार कने तुहाडे कम्म बुरे थे। **22** पर हण पिता परमेस्वरे अपने पुत्रे जो माणू बनाई करी मरणे ला तुहाडा भी मेल करी लिया है, ताकि तुहांजो अपने सामणे पबित्र, निष्कलंक कने निर्दोष बनाई करी पेश करी सके। **23** तुहाडा भरोसा मजबूत रेणा चाईदा, जियां की घर इक पक्की नी पर बनाया जांदा है, हण साडे बाल आस है क्योकि असां शुभसमाचार पर भरोसा करदे न, जिसदा प्रचार सारी धरतिया पर कितया है, कने जिस शुभसमाचार दा सेवक मैं, पौलस बणया। **24** हण मैं तुसां लोकां ताईं दुख झेलदा है, इदी बजा ला खुश है। कने मैं लगातार

अपणे शरीर च दुख सेहन करा दा है, जियां यीशु मसीह सेहन किते थे, कने ऐ दुख मैं मसीह दी कलीसियां ताईं अपने शरीर च सेहन करा दा है, जडा उदा शरीर है। **25** इसा कलीसिया ताईं तुहाडे ताईं परमेस्वरे दी दितियो सेबा ताईं सेबक चुणया है, ताकि मैं परमेस्वर दे शुभसमाचार जो पुरे तरिके ने प्रचार करी सके। **26** मतलब की उस भेद जो जडा पिछली पीढियां दे लोकां ला गुप्त रिया, पर हण परमेस्वरे दे उना पबित्र लोकां पर प्रकट होया है। (aiōn g165) **27** जिना पर परमेस्वरे प्रकट करणा चाया क्योकि परमेस्वर चांदा की इस भेद जो जाणन की मसीह दी महिमा दी क्या कीमत है, जडा सारायां ताईं है, ऐ भेद यीशु मसीह खद है, जडा तुसां च है, ऐई साडी इकलोती आस है जिसने महिमा होणी। **28** असां मसीह दे बारे च सारायां जो दसदे न, सारायां जो चेताबनी दिन्दे कने सारायां जो पुरिया समझा ला सिखाईं जडा परमेस्वरे सांझो दितया है, ताकि ऐ पक्का करी सकन की हर कोई मसीह च सिद्ध होई सके जालू सै परमेस्वरे दे सामणे खडे होंगे। **29** ऐई बजा है की मैं इतणी मेहनत करदा है। मैं ऐसा करणे ताईं परेशानियां दा सामणे करदा है जडा की मसीह दिया शक्तिया ला ही होंदा है, जडा मेरे अंदर कम्म करदा है।

2 मैं चांदा है की तुसां जाणी लिया की तुहाडे कने उना दे जडे लौदीकिया शेहरे च न, कने उना सबना ताईं जिना ला मैं नी मिलया है, मैं कडी मेहनत इस ताईं करदा है, **2** मैं ऐसा इस ताईं करदा है क्योकि मैं उना जो तेरे भरोसे च मजबूत करणा चांदा है, सै इक सोगी प्यार च शामिल होई जान, कने मैं चांदा है की उना जो पूरा भरोसा हो क्योकि उना जो परमेस्वर दे भेद दी योजना दे बारे च पूरी समझ है, जडा अपु मसीह है। **3** ऐ से है जडा परमेस्वरे दी अकल कने ज्ञान जो जाणदा है, जडा की उस खजाने सांई है, जिसयो लुकाया गिया था। **4** ऐ मैं इस ताईं बोला दा है, की कोई भी माणू तुहांजो उना दी झूटी शिक्षा पर भरोसा करणे ताईं राजी करी के धोखा ना दे। **5** क्योकि मैं तुहाडे सोगी नी है, फिरी भी मैं लगातार तुहाडे बारे च सोचदा है, मिंजो खुशी है की तुसां इक न कने तुसां अपने भरोसे च जडा मसीह पर है, जिन्दगी जिरै रिया। **6** इस ताईं, जियां तुसां प्रभु यीशु मसीह जो प्रभु मन्नी करी अपनाई लिया, तियां ही उदे पिछले हतुहाडा है। **7** तुसां मसीह दे भरोसे च मजबूत बणी रिया, जियां इक रूख जड चकडदा कने इक पर इक नीयां पर मजबूत रेंदा है, इयां ही तुसां भी अपने भरोसे च बन्दे जा, कने जादा ला जादा धन्यवाद करदे रिया। **8** साबधान रिया की कोई तुहांजो संसारिक ज्ञान कने बेकार गल्लां ने मुख नी बगाई ले, ऐ गल्लां सुणने जो तां ज्ञान बालियां लगदियां न, पर ऐ गल्लां सिर्फ संसार दे लोकां दिया तरफा ला न, ना की मसीह दिया तरफा ला। **9** इयां ना हो की ऐ लोक तुहांजो धोखा देन, क्योकि जालू मसीह माणू बणया, तालू भी सै पूरी तरह परमेस्वर था। **10** यीशु मसीह ही सारी शक्तियां कने अधिकारां दा प्रधान है, इस ताईं अगर तुसां मसीह सोगी जुडयो न तां तुसां उदे च सिद्ध बना। **11** जालू तुसां मसीह पर भरोसा कित्ता, तालू तुहाडा खतना कुसी माणू ऐ ला नी होया है, जियां यहूदी लोक करदे न, पर मेरे तुहाडे दे जरिये तुहाडा सै खतना होया है, जडा तुहाडे पाप करणे बाले सभाब जो दूर करदा है। **12** कने तुसां बपतिस्मा लिया, ऐ इसा गल्ला जो दसदा है की तुहाडा पापी सभाब मसीह सोगी कबरा च दबीं दिता है कने जालू तुसां नोए सभाबे ने पाणिऐ ला बाहर आये। ऐ इस ताईं होया क्योकि तुसां भरोसा कित्ता की परमेस्वरे अपणी शक्तिया ने मसीह जो मरयां चे जिन्दा कित्ता। **13** जालू परमेस्वरे तुहांजो भी मसीह सोगी जिन्दा कित्ता, जडे अपने अपराधां कने अपने पापी सभाबे ला अजाद नी थे, कने साडे सारे अपराधां जो माफ कित्ता। **14** ऐ इयां था जियां परमेस्वरे साडे पापां दे दस्ताबेज जो खत्म करी दिता, जिना च साडे खिलाफ दोष लिखयो थे। जालू मसीह जो सूली पर चढाया तालू उनी उस दस्ताबेज जो पुरे तरिके ने खत्म करी दिता। **15** परमेस्वरे मसीह दे सूली पर मरणे ने संसार दी सारी शक्तियां कने अधिकारां जो हराई करी उना जो सबना सामणे बेइज्जत कित्ता, कने उना जो हराई करी खुशी मनाई। **16** इस ताईं तुहांजो कोई धोखा ना दे, कने कोई तुहाडे खाने पीणे जो लेई करी, या त्योहारे, या नोआ चंद्रमा, या सब्ब दे दिना दे बारे च तुहाडा कोई न्याय ना करे। **17** क्योकि ऐ सारे नियम कने कानून इक छोआं दे सांई है, पर हकीकत मसीह च ही है। **18** कलीसिया इक शरीर है यीशु मसीह उस शरीर दा सर है, उसी ने ही शरीर दे सारे हिस्सायां दी देख रेख होंदी है कने जालू इना जो इक सोगी जोडदे न, तां सै बन्दे न जियां परमेस्वर चांदा है की सै बदे। कोई माणू दीनता कने स्वर्गदूतां दी भक्ति करिके तुहांजो दौड दे इनामे च दूर ना करे। ऐसे माणू दिखियां गल्लां दा दाबा

करने न, जिसने सै घमंड न भयो रेंदे न, कने जडे मसीह जो छडी दिन्दे न। 20 जालू तूहाडा पापी सभाब मसीह सोगी मरी गिया, तां तूहांजो होर भी जादा इस संसारे दियां शिक्षां जो नी मनणा पोणा। इस तांई कजो अजे भी इस संसारे दे नियमा जो मंदे न जियां अजे भी संसार तूहांजो काबू करा दा है। 21 सै ऐसे नियम बणादें न की तूसा ऐ मत छुंदे, ऐसा मत खांदे, ऐ मत खांदे। 22 क्योकि ऐ सारे नियम कुसी कम्मे दे नी, क्योकि ऐ माणुआं दे हुकमा कने शिक्षा दे अनुसार न। 23 इना शिक्षां च अपणी इच्छा दे अनुसार बणाईं भक्ति दे रिबाज, कने जूटी दीनता, कने अपणे शरिर सोगी कठोर बर्ताब करणा ही इक ज्ञानी होणे दा डोंग करदा है, पर हकीकत च ऐ नियम लोकों जो उना दिया बुरियां जो रोकणे च मदद नी करदे।

3 जियां परमेश्वरे यीशु मसीह जो मरयां चे जिन्दा किता तियां ही तूहांजो जिन्दा किता है, इस तांई उना चीजां दिया तोपा च लगी रिया जडियां स्वर्ग च रखियां न जिशू मसीह परमेश्वरे दे बखे सबते आदर बालिया जगा पर बैठया है। 2 धरतिया दियां चीजां नी स्वर्ग दियां चीजा पर ध्यान ला, 3 क्योकि तूसां अपणे पाप बाले सभाबे तांई मरी गियो न, कने तूहाडी नोई जिन्दगी मसीह सोगी परमेश्वरे च लुकियो है। 4 जालू मसीह जडा तूहांजो नोई जिन्दगी दिन्दा है, बापस इसा धरती पर ओगा, तालू तूसां भी उदे सोगी कने उदी महिमा च भागिदार होई जाणा। 5 इस तांई तूसां बुरे कम्मा जो छडी दिया जडे तूहाडे पापी सभाब ला जुडया न। जियां, व्यभिचार, अश्रुता, दुष्कामना, बुरी लालसा, कने लालच जो जडा मूर्तिपूजा दे बराबर है। 6 क्योकि लोक इना बुरे कम्मा जो करदे न कने परमेश्वर उना जो सकत सजा देणी। 7 कने तूसां भी, जालू इना बुराइयां च जिन्दगी कटदे थे, तां तूसां भी ऐ कम्म करदे न। 8 पर हण तूसां भी इना सबना जो मतलब की गुस्सा, रोष, बैरभाव, निंदा, कने गालियाँ बकणा, तूसां ऐ कम्म करणा छडी दिया। 9 इक दुज्जे सोगी झूठ मत बोला क्योकि तूसां पुराणे पापी सभाब कने हण सारे बुरे कम्मा जो छडी दितया है। 10 हण तूसां इक नोए माणू बणी गियो न, ऐ नोआ सभाब जडा अपणे सृष्टिकर्ता सांई जादा ला जादा बणदा जांदा है ताकि तूसां उसयो होर भी अच्छे ला समझी सकन। 11 इसा बजा ला नोईया जिन्दगिया च ना तां कोई होर जाति दा रिया, ना यहूदी, ना खतना, ना बिना खतने बाला, ना जंगली, ना विदेशी, ना गुलाम कने ना अजाद बस मसीह ही है जडा सब कुछ है कने तूसां सारयां दे अंदर रेंदा है। 12 इस तांई परमेश्वर तूहांजो प्यार करदा है कने उनी तूहांजो अपणे पबित्र लोक होणे तांई चुणया है, इस तांई तूसां लोकां जो, कम्णा, भलाई, दीनता, कने नम्रता, कने सेहनशीलता बाला बणना चाईदा। 13 अगर कुसी जो कुसी पर दोष लागे दी कोई बजा हो, तां इक दुज्जे दी सेहन करी लिया, कने इक दुज्जे दे अपराध माफ करा: जियां प्रभुऐ साडे अपराध माफ किते, तियां ही तूसां भी माफ करा। 14 कने इना सारयां ला जरूरी गल्ल ऐ है की इक दुज्जे ला प्यार करा, इयां करणे ला तूसां पुरे तरीके ला इक जूट होई जाणा। 15 मसीह तूहाडे मना च शांति दे, तूसां सब इक ही शरिरि दे हिस्से न, इस तांई तूसां इक दुज्जे सोगी जडी शान्ति मसीह दिंदा है उसा शांतिया ला रोणे तांई सदयो न, कने तूसा धन्यवादी बणी रिया। 16 मसीह दे बचना दे बारे च हर बकत सोचा, ताकि ऐ सब केसी जो काबू करे जडा तूसां सोचदे कने करदे न; सिद्ध ज्ञान ला इक दुज्जे जो सिखा, कने चेताबनी दिया, कने अपणे-अपणे मने च धन्यवाद सोगी परमेश्वरे तांई भजन, स्तुतिगान कने आत्मिक गीत गा। 17 जडा भी तूसां बचना ला बोलदे न या जडा भी कम्म करा सब प्रभु यीशु दे नाए ला करा, कने उसला प्रभु परमेश्वरे दा धन्यवाद करा। 18 हे पत्रियां, अपणे-अपणे घरे बालयां दे अधीन रिया क्योकि मसीह दे पिच्छे चलणे बालयां तांई ऐ ही ठीक है। 19 हे घरे बालयो, अपणी-अपणी लाडियां ने प्यार राखा, कने उना सोगी प्यारे ला बर्ताब करा। 20 हे बच्चो, सबना गल्लां च अपणे-अपणे माता-पिता दे हुकमा जो मन्ना करा, क्योकि प्रभु इसला खुश होंदा है। 21 हे माता पिताओं, अपणे बचयां जो बार-बार डांटी करी तंग मत करा, इयां ना हो की उना दा दिल टूटी जा। 22 हे सेबको, जडे इस संसारे च तूहाडे मालिक न, सारियां गल्लां च उना दे हुकमा दा पालन करा, माणुआं जो खुश करणे बालयां सांई दिखवे तांई नी, पर मने दिया सच्चाई कने परमेश्वरे दे डरे ने करा। 23 जडा कुछ तूसां करदे न, पुरे मने ने करा, ऐ सोची करी की माणुआं तांई नी पर प्रभु तांई करा दे न। 24 क्योकि तूसां जाणदे की तूसां जो इदे बदले च प्रभु ला सै आशीष मिलणी है जडी परमेश्वरे तूहाडे तांई रखियो है। तूसां जिस मालिक दी सेवा करा दे

न, सै मसीह है। 25 क्योकि जडा कोई बुरा करदा रेंदा है, उसयो परमेश्वरे ला सजा मिलणी क्योकि परमेश्वर कुसी दा पक्षपात नी करदा।

4 हे मालिकों, स्वर्ग च तूहाडा भी मालिक है, ऐ समझी करी, अपणे-अपणे दासां सोगी न्याय कने इकोदिया व्यवहार करा। 2 लगातार प्राथना करदे रिया, कने जालू तूसां प्राथना करन तां सतक रिया कने हमेशा परमेश्वरे दा धन्यवाद करदे रिया। 3 कने इदे सोगी-सोगी साडे तांई भी प्राथना करदे रिया, की परमेश्वर साडे तांई बचन दा प्रचार सुणाने दा मोका दे, की असां मसीह दे उस भेद जो पुरे तरीके ला सुणाई सकन, इसा ही बजा ला मै जेला च है। 4 कने प्राथना करा दा की मै साफ तरीके ला कने खुलेआम मसीह दे बारे च दर्से। 5 हर मोके दा अच्छे ला इस्तेमाल करा ऐ दसणे तांई की तूसां विश्वासी न, कने जडे लोक यीशु मसीह पर भरोसा नी करदे उना सोगी समझदारिया ला बर्ताब करा। 6 उना ला हमेशा प्यारभाव ला गलबात करा, कने एसियां गल्लां करा जिसला सै तूहाडियां गल्लां च रूची लेन, अगर तूसां ऐसा करदे न, तां तूहांजो पता लगणा की उना जो किया जबाब देणा है, जडे तूहाडे भरोसे दे बारे सबाल च उठादें न। 7 प्यारे मसीह भाई कने भरोसे दे लाइक सेवक, तुखिकूस जडा प्रभु यीशु मसीह कने मेरा साथी है, मेरियां सारियां गल्लां उनी तूहांजो दर्सी देणियां न। 8 उसयो मै इस तांई तूहाडे बाल भेजया है, ताकि तूहांजो पता लगी सके की साडे क्या हलात न, कने सै तूहांजो भरोसे च मजबूत करी सके। 9 उदे सोगी उनेसिमस जो भी भेजया है; जडा भरोसे दे लाइक कने प्यारा मसीह भाई कने सै तूहाडे ही शेहरे दा है, उना तूहांजो ऐथू दियां सारियां गल्लां दे बारे च दर्सी देणा। 10 अरिस्तर्खूस जडा मेरे सोगी कैदी है, कने बनबास दा भांजा मरकुस तूहांजो नमस्कार बोलदा है। जिदे बारे च तूहांजो पेहले ही चिठी मिली बेठियो है की अगर से तूहाडे बाल ओए, तां उसला ढंगे ला व्यवहार करनयो। 11 कने यीशु जिसयो युस्तुस बोलदे न, तूहांजो नमस्कार करदा है। यहूदी लोकां च बस ऐं तिन परमेश्वरे दे राज्य तांई मेरे साथी कने मिजो उत्साहित करणे बाले न। 12 इपफ्रास जडा तूहाडे ही शेहरे ला है, कने मसीह यीशु दा दास है, तूहांजो नमस्कार करदा है। कने हमेशा तूहाडे तांई प्राथना करदा है, ताकि परमेश्वर तूहांजो भरोसे च मजबूत कने सिद्ध करे की तूसां परमेश्वरे दी इच्छा दा पालन करा। 13 मै उदा गबाह है, कि सै तूहाडे तांई कने लौदीकिया शेहरे कने हियरापुलिस शेहरे दे लोकां तांई लगातार प्राथना करदा है। 14 प्यारे वैघ लूका कने देमास दा तूहांजो नमस्कार बोलदे न। 15 लौदीकिया शेहर दे मसीह भाईयां कने बेहणा जो कने नुमफास कने उदी घरे दी कलीसिया जो नमस्कार बोलनयो। 16 जालू ऐ चिठी तूहाडे ऐथू पढी जांगी, तां ऐसा करनयो की लौदीकिया शेहरे दिया कलीसिया च भी इसयो पढनयो, कने जडी चिठी लौदीकिया ला ओणी उसयो तूसां भी पढनयो। 17 फिरी अरखिप्पुसे ला बोलनयो की “जडी सेवा प्रभु च तिजो दितियो है, उसा सेवा जो अच्छे तरीके ने पूरी करनयो।” 18 मै, पौलुस तूहांजो नमस्ते करणे तांई चिठी दा ऐ हिस्सा तूहांजो अपणे हथे ने लिखा दा है, याद रखणा की मै जेला च है, कने मेरे तांई प्राथना करनयो, तूसां पर परमेश्वरे दा अनुग्रह होंदा रें। आमीन।

1 थिस्सलुनीकियों

1 ऐ चिड़ी मैं पौलुस, सिलवानुस कने तीमूथियुस दिया तरफा ला थिस्सलुनीकिया शेहर दिया कलीसाया दे ना लिखा दा है, जडे पिता परमेस्वर कने प्रभु यीशु मसीह च ना मैं प्राथना करता है की पिता परमेस्वर तुहांजो पर अपना अनुग्रह कने तुहांजो शांति दे। **2** असां अपणियां प्राथना च तुहांजो याद करदे कने हमेशा तुसां सबना दे बारे च परमेस्वरे दा धन्यवाद करदे न, **3** कने जालु असां अपने पिता परमेस्वरे ने प्राथना करदे न, तालु असां तुहाडे उना कम्मा जो याद करदे न, जडे तुसां भरोसे दिया बजा ला करदे न, कने जडिया सकत मेहनता ने तुसां मसीह भाईयां दी सहायता करदे न क्योंकि तुसां उना ने प्यार करदे न कने दुख तकलिफा जो सेहन करदे न क्योंकि तुहांजो आस है, की प्रभु यीशु मसीह जल्दी बापस ओणे बाला है। **4** हे मेरे मसीह भाईयो, तुहांजो ने परमेस्वर बड़ा प्यार करता है, असां जाणदे न, की परमेस्वरे तुहांजो अपने लोक होणे ताई चुणया है। **5** क्योंकि प्रभु यीशु मसीह दा शुभसमाचार तुहाडे बाल सिर्फ अखरां च ही नी पर पबित्र आत्मा दिया शक्तिया, कने पूरी मजबुतिया ने तुहाडे बाल पूचया है, तुहांजो पता है की तुहाडे द्वाार ताई तुसां बिच साडा चाल चलन कदिया था। **6** तुसां बडे भरी दुखां च थे पर तुसां पबित्र आत्मा दी दीतियो खुशिया सोगी शुभसमाचार जो अपनाई करी साडे उदाहरण कने प्रभु दे उदाहरण दा अनुसरण किता। **7** ऐथु दीकर की तुसां मकिदुनिया प्रदेश कने अखाया प्रदेशे दे सारे विश्वासियां ताई आदर्श बणी गे। **8** क्योंकि तुहाडे ऐथु ला ना सिर्फ मकिदुनिया प्रदेश कने अखाया प्रदेशे च प्रभु दा बचन सुणया, पर तुहाडे भरोसे दी चचां हर पासे फेली गेई जडा परमेस्वरे पर है, हर जगा जिथु असां गे, ओथु सांझो लोक मिल्ले जिना सांझो तुहाडे भरोसे दे बारे च दसया, जडा परमेस्वरे पर है, इस ताई सांझो तुहाडे बारे च कुछ बोलणे दी जरूरत नी है। **9** क्योंकि सै लोक अपु ही दुज्जयां जो दसदे ने की तुसां साडा स्वागत किता जालु असां तुहाडे बाल आणे, कने तुसां कजो मूर्तियां ला दूर होईकरी परमेस्वरे बाल आये ताकि तुसां जिन्दे कने सच्चे परमेस्वरे दी सेवा करन। **10** कने तुसां स्वर्ग ला परमेस्वरे दे पुत्रे दे ओणे दी आस रखा दे न, जिसयो परमेस्वरे मरयां चे जिन्दा किता, मतलब की यीशुऐ जो, जडा सांझो परमेस्वरे दे ओणे बाले गुस्से ला बचादां है।

2 हे मसीह भाईयो, तुहांजो अपु ही पता है, साडा तुहाडे बाल ओणा फायदेमंद होया। **2** तुसां अपु ही जाणदे न की तुहाडे बाल ओणे ला पेला असां फिलिपी शेहरे च कितणे दुख झेले। फिर भी परमेस्वरे सांझो इतणी हिम्मत दिती, की तुहाडे शेहरे दे लोकां ला साडा इतणा बिरोध होणे बाद भी असां परमेस्वरे दा शुभसमाचार तुहांजो सुणया। **3** क्योंकि साडा उपदेश ना तां धोखा था, कने ना ही गलत इरादे ने, कने ना ही छलावा है। **4** परमेस्वरे सांझो काबिल समझीकरी शुभसमाचार दितया है, इस ताई असां माणुआं जो नी, पर असां मना जो परखणे बाले परमेस्वरे जो खुश करणे ताई उपदेश दिन्दे न। **5** तुहांजो पता है, की असां कदी भी चापलूसी दियां गल्लां नी करदे थे, क्योंकि असां ना ही कदी पैसे दे लालचे दे इरादे ने कुछ किता, परमेस्वर इसा गल्ला दा गबाह है की असां ऐसे नी थे। **6** असां ना माणुऐ ला, ना ही तुहाडे ला कने ना ही कुसी होरसी ला आदर नी चांदि थे। पर मसीह दे प्रेरित होणे दिया बजा ला तुसां ला सहायता मंगणा साडा हक था। **7** पर जियां माता-पिता अपने बचयां जो पालदे न, तियां ही असां भी तुहाडे बिच रेई के इयूदी दीनता दसियो है। **8** असां तुहांजो सोगी इतणा प्यार करदे न की सिर्फ परमेस्वरे दा शुभसमाचार सुणने ताई ही नी पर तुहाडे ताई अपणी जान देंगे ताई भी तैयार थे। इस ताई की असां तुहाडे सोगी बडा प्यार करदे थे। **9** हे मसीह भाईयो, तुसां साडी मेहनत कने प्यारे जो याद रखदे न, की असां इस ताई रात दिन कम्म धंधे करदे होये परमेस्वरे दे शुभसमाचारे दा प्रचार तुहाडे च किता, ताकि असां अपणी जरूरत ताई तुसां कुसी पर भी कोई बोझ ना बणन। **10** तुसां अपु भी कने परमेस्वर भी गबाह है, तुसां विश्वासियां सोगी साडा सभाव कितणा सच्चा, धर्मी कने निर्दोष था। **11** तुहांजो पता है, की जियां पिता परमेस्वर अपने बचयां सोगी बर्ताब करता है, तियां ही असां भी तुसां सबना जो उपदेश, कने प्रोत्साहित करदे, कने समझांदि थे। **12** की तुसां अपणी जिन्दगी इस तरीके ला जिया जडी परमेस्वरे जो खुश करे, जडा तुहांजो अपने राज्य कने माहिमा च हिस्सेदार होणे ताई सददा है। **13** इस ताई असां भी हमेशा परमेस्वरे दा धन्यवाद करदे न; की जालु तुसां परमेस्वरे दा

संदेश सुणया जडा असां प्रचार किता, तां तुसां उसयो माणुऐ दा नी पर परमेस्वरे दा सच्चा संदेश समझी के अपनाया, सै ही संदेश तुसां च कम्म करता है, जडे यीशु मसीह पर भरोसा रखदे न। **14** हे मसीह भाईयो, इस ताई तुसां भी परमेस्वरे पर भरोसा करणे बाले लोकां साई न, जडे यहूदी प्रदेशे च रेंदे न कने मसीह च न, क्योंकि तुहांजो भी अपने लोकां ला तदिया ही दुख मिल्ला जदिया यहूदी मसीह लोकां जो यहूदियां ला मिल्ला था। **15** उना यहूदियां जिना प्रभु यीशुऐ जो, कने परमेस्वरे दे संदेश देणेबालयां जो मारी दिता कने सांझो तंग किता, कने परमेस्वर उना ला खुश नी है, कने सै सारे माणुआं दा बिरोध करदे न। **16** सै सांझो होर जातियां जो ऐ दसणे ला रोकणे दी कोशिश करा दे थे की परमेस्वर उना जो किया बचाई सकदा है कने सै अपने पाप पर पाप जोड़े जांदि जांदि न; कने हण अंत च परमेस्वर उना जो पक्का सजा देणेबाला है। **17** हे मेरे प्यारे मसीह भाईयो, जालु असां थोडी देरा ताई मने ला नी पर, असां शारीकर रूप ला तुहाडे सोगी नी थे, तां असां बडी इच्छा ला तिजो दिखणे ताई होर भी जादा कोशिश किती। **18** इस ताई असां (मतलब की मैं पौलुसे) इक बरी नी, पर केई बरी तुहाडे बाल ओणे दी सोची, पर शैतान सांझो तुहाडे बाल ओणे ताई रोकदा था। **19** साडी आस, खुशी या बडाई दा मुकट कुण है? ऐ तुसां ही होणे जालु साडे प्रभु यीशु मसीह फिरी मुडी करी ओणा है। **20** साडी बडाई कने खुशी तुसां ही न।

3 आखरी च जालु असां तुहांजो मिलयो बिना नी रेई सके, तां मैं पौलुस कने सिलासे एथेंस शेहरे च किल्ले रेणे दा फेसला किता। **2** कने असां तीमूथियुस जो जडा मसीह दे शुभसमाचारे च साडा भाई है, कने परमेस्वरे दा सेवक है, उसयो इस ताई तुहाडे बाल भेजया की सै तुहांजो प्रोत्साहित करे कने तुहाडे मसीह पर भरोसे जो मजबूत करे। **3** ताकि कोई इना दुखां दिया बजा ला भरोसे च कमजोर ना होई जाऐ; क्योंकि तुसां अपु ही जाणदे न, की सांझो मसीह च दुख झेलणे पोणे न। **4** जालु असां तुहाडे ओथु रेंदे थे, उस बकत तुहांजो बोलदे थे कि, सांझो लोकां ला दुख झेलणे पोणे न, कने इयां ही होया, कने तुसां जाणदे भी हेन। **5** इसा बजा ला जालु मिजो ला तुहांजो मिलयो बिना नी रिया गिया, तां मैं तुसां लोकां दे भरोसे दा हाल जाणने ताई तीमूथियुस जो भेजया, क्योंकि असां डरदे थे, कुथी इयां ना हो की परिक्षा करणे बाले शैताने तुहाडी परिक्षा लेई हो, कने साडी मेहनत बेकार होई गेई हो। **6** पर हण तीमूथियुसे तुहाडे बखे ला आई करी तुहाडे भरोसे कने प्यार दा शुभसमाचार सुणया। कने ऐ भी सुणया, की तुसां हमेशा प्यारे ला मिजो याद करदे न, कने सांझो दिखणे दी इच्छा रखदे न, जियां असां तुहांजो दिखणे दी इच्छा रखदे थे। **7** इस ताई हे मसीह भाईयो, असां अपणी सारी दुख तकलिफां च जालु तीमूथियुस ला सुणया की तुसां भरोसे च मजबूत न, तां सांझो बडी शांति मिलली। **8** क्योंकि हण तुसां प्रभु च टिकी रगे, तां इसला सांझो नोई जिंदगी मिलली है। **9** कने जदेई खुशी तुहाडियां बजा ला सांझो अपने परमेस्वरे सामणे है, इसा खुशिया ताई तुहाडे बारे च असां कियां परमेस्वरे अग्गे धन्यवाद करन? **10** असां लगातार ऐई प्राथना करदे रेंदे न, की तुहांजो सोगी दुबारा मिली सकन, कने जडा जरूरी है तुहांजो सिखाई सकन, ताकि तुसां पुरे तरीके ला प्रभु यीशु मसीह पर भरोसा करी सकन। **11** साडी ऐ प्राथना है, की साडा पिता परमेस्वर कने प्रभु यीशु मसीह, तुहाडे ऐथु ओणे ताई साडी सहायता करे की असां आई सकन। **12** असां ऐ भी प्राथना करदे न की प्रभु यीशु मसीह ऐसा करे कि, जियां असां तुहांजो ने प्यार करदे न, तियां ही तुसां भी इक दुज्जे ने प्यार करा, कने सारयां लोकां सोगी तुहाडा प्यार होर भी बदे कने बददा ही जा, **13** कने असां प्राथना करदे न ताकि सै तुहाडे मना जो ऐसा मजबूत करे, की जालु साडा प्रभु यीशु अपने सारे पबित्र लोकां सोगी बापस ओणे, तां सै साडे पिता परमेस्वरे सामणे पबित्रता च निर्दोष साबित होन।

4 आखरी च हे मेरे मसीह भाईयो, असां प्रभु यीशु मसीह दे नाए ला तुहांजो ला बिन्ती करदे न, की तुसां इस तरीके ला जिंदगी जिया, जडी परमेस्वरे जो खुश करे, जियां असां तुहांजो सिखाया, कने तुसां तियां जिंदगी जिंदे भी हेन कने असां तुहांजो ऐसा करणे ताई होर भी उत्साहित करदे न। **2** तुसां जाणदे न कि प्रभु यीशु मसीह सांझो जडा अधिकार दितया है, उदे जरियो असां तुहांजो निर्देश दितयो न। **3** परमेस्वरे दी इच्छा ऐ है, की तुसां पबित्र बणन कने व्यभिचार मत करा, **4** तुसां चे हर इक माणु अपने शरीर पर काबू रखणा सीखी करी अपने शरीर जो पबित्र बणाई रखे कने उदी इज्जत करे। **5** कने तुसां जो ऐ कम्म होर जातियां साई

वासना दी इच्छा ला नी करणे चाइदे, जडियां परमेश्वरे जो नी जाणदियां न। 6 ऐसे कम्म करणे ला सै अपने मसीह भाई दे खिलाफ पाप करदा है, कने ना ही कोई उस सोगी चलाकी करा, क्योकि प्रभुये इना सारयां जो सजा देणी है, जडे इशुदियां चीजां करदे न; जदिया असां तुहांजो पेहले भी बोलया कने समझाया था। 7 क्योकि परमेश्वरे सांझो अपबित्र जिन्दगी जिणे ताई नी पर पबित्र जिन्दगी जिणे ताई सदया है। 8 इस ताई जडा इना हुकमा जो नी मनदा है, सै साडे हुकमा जो नी, पर परमेश्वरे दे हुकमा जो नी मनदा है, जिनी अपणी पबित्र आत्मा तुहांजो दितियो है। 9 पर मसीह भाईयां दे प्यारे दे बारे च ऐ जरूरी नी है, कि मै तुहांजो कुछ लिखें, क्योकि इक दुज्जे सोगी प्यारे ला रेणा तुसां अपु ही परमेश्वरे ला सिखया है; 10 कने सारे मकिदुनिया प्रदेशे दे मसीह भाईयां सोगी प्यार रखया है, पर हे मसीह भाईयो, असां तुहांजो ला ऐ विनती करदे न की तुसां होर भी अगे बदे जा, 11 कने जदिया असां तुहांजो समझाया है, तियां ही शान्ति ने जिन्दगी जिया कने ना ही दुज्जयां दे कम्मा च दखल दिया कने अपने हथां ला कमाणे दी कोशिश करा। 12 ताकि जडे लोक यीशु मसीह पर भरोसा नी करदे, सै दिखी सकन की तुहाडा व्यवहार कदिया है, कने लोक तुहाडी इज्जत करन, कने तुहांजो कुसी भी जरूरतां ताई दुज्यां पर निर्भर ना होणा पोए। 13 हे मसीह भाईयो, असां चांटे न, की तुसां ऐ जाणी लिया की जडे मसीह च मरी गियो न, इना सोगी क्या होणा; इयां नी हो की तुसां दुज्यां सांई शोक करा जिना जो आस नी है की मरणे बाद भी जिन्दगी है। 14 असां भरोसा करदे न की यीशु मरया, कने जिन्दा होया, तां तियां ही परमेश्वरे उना जो भी जडे यीशु च सोई गियो न, यीशु मसीह सोगी बापस लेई ओणा है। 15 असां प्रभु यीशु मसीह दे बचना दे अनुसार तुहांजो ऐ बोलंदे न, की असां जडे जिदे न, कने प्रभु यीशु मसीहे दे बापस ओणे दीकर बची रेंगे, तां जडे लोक पेहले यीशु मसीह च मरी गियो न, उना पेहले यीशु मसीह ने मिलणा। 16 क्योकि प्रभु यीशु मसीहे अपु ही स्वर्गे ला उतरणा; उस बकत प्रभु यीशुऐ जोरे ने हुकम देणा, कने प्रधान स्वर्गदत्तां जोरे ला बोलणा, कने परमेश्वरे दी तुरही बजाणी; कने उस बकत जडे पेहले यीशु मसीहे पर भरोसा करदे होए मरी गियो न, उना मरयां चे जी पोणा है। 17 तालू इदे बाद असां जडे जिन्दे कने बचयो रेंगे, उना सोगी बदला च चुकी लेई जाणे, ताकि बदलां च प्रभु यीशु मिलन, कने उस बकते ला असां हमेशा प्रभु सोगी रेणा। 18 इना गल्लां ला इक दुज्जे जो दिलासा दिया करा।

5 हे मेरे मसीह भाईयो, तुहांजो ऐ दसणे दी जरूरत नी है, की प्रभु यीशु मसीहे कालू ओणा है। 2 क्योकि तुसां अपु जाणदे न की जियां राती जो चोर अचानक आई जांदा है, तियां ही प्रभु यीशु मसीहे दा आगमन भी अचानक होणा। 3 जालू लोक बोलगे, ठीक ठाक है, कने कोई डर नी, तालू उना जो इकदम दुख तकलिफां दा सामणा करणा पोणा है, जियां गर्भवती जो इकदम पीड पौदी; तालू सै कुथी भी नठी नी सकदी, तियां ही सै उसा बडिया मुसीबता ला कुसी भी तरीके ला नी बची सकणा। 4 पर हे मसीह भाईयो, तुसां जडे नेहरे च नी न कने सै दिन तुहाडे पर चोरां सांई आई पोए जिस दिन यीशु मसीहे बापस ओणा। 5 क्योकि तुसां सारे जडे ज्योति ने रिशता रखदे न, कने दिने दी ओलाद न, असां ना तां राती ने, कने ना ही नेहरे ने रिशता रखदे न। 6 इस ताई सांझो अविश्वासियां सांई सोंदे नी रेन, पर जागदे कने सावधान रिया। 7 क्योकि जडे सोंदे न, सै राती ही सोंदे न, कने जडे मतवाले होंदे न, सै राती ही मतवाले होंदे न। 8 पर असां तां दिने दी ओलाद न, इस ताई सांझो अपने पर काबू रखणा चाईदा। साडी भरोसा कने प्यार साडी रक्षा करे जियां कबच इकी सिपाइये दी रक्षा करदा है, कने साडे बाल उद्वारे दी आस है, कि असां हमेशा दिया सजा ला बची गियो न, जियां टोप सिपाइये जो बचादां है। 9 क्योकि परमेश्वरे सांझो सजा देणे ताई नी चुणया है, पर इस ताई रखया की असां अपने प्रभु यीशु मसीहे ला उद्धार पाई सकन। 10 प्रभु यीशु मसीह साडे ताई इस बजा ने मरया, की असां चाऐ जिन्दे रेन, या मरी जान, जालू प्रभु यीशु मसीहे बापस ओणा तालू असां हमेशा उदे सोगी रेई सकन। 11 इसा बजा ने इक दुज्जे जो प्रोत्साहित करा, कने इक दुज्जे जो भरोसे च मजबूत होणे ताई सहायता करा, कने ऐसा तुसां करदे भी हेन। 12 हे मसीह भाईयो, असां तुसां ने विनती करदे न, की जडे तुहांजो चे बडी मेहनत करदे न, कने प्रभु च तुहाडे अगुवे न, कने तुहांजो शिक्षा दिन्दे न, उना दे हुकम मन्ना। 13 क्योकि जडा सै तुहाडे ताई करदे न, उस ताई उना दी अच्छे ने इज्जत कने प्यार करा कने अपु चे मिली झुली की रिया। 14 हे मसीह भाईयो, असां तुहांजो ने विनती करदे न, उना जो चेतावनी दिया, जडे बडे आलसी न, डरफोकां जो होंसला दिया, जडे कमजोर न उना दी

सहायता करा, सबना जो सेहनशीलता दस्सा। 15 ऐ ध्यान रखा! कोई कुसी ने बुराईया दे बदले बुराई ना करे; तुसां हमेशा इक दुज्जे कने सारयां ताई भले कम्म करणे च लगी रिया। 16 हमेशा खुश रिया। 17 लगातार प्रार्थना करदे रिया। 18 अपने हर हालातां च परमेश्वरे दा धन्यावाद करा; क्योकि यीशु मसीह च तुहाडी ताई परमेश्वरे दी ऐई इच्छा है। 19 पबित्र आत्मा दे कम्मा जो लोकां दी जिन्दगी च होणे ला मत रोका। 20 ऐ मत सोचा की जडियां भविष्यवाणियां परमेश्वरे अपने लोकां जो दितियां सै कुसी कम्मे दियां नी न। 21 पर हर इक गल्ला दी परख करा ऐ जाणने ताई की सै परमेश्वरे दा संदेश है की नी, जडियां गल्लां खरियां न उना गल्लां जो ही अपना। 22 सारियां बुराईयां ला बची के रिया। 23 परमेश्वर जडा शांति दिन्दा है, तुहांजो हर तरा ने पबित्र करे; कने तुहाडी आत्मा, प्राण कने शरीर साडे प्रभु यीशु मसीह दे बापस ओणे दीकर पूरे निर्दोष कने ठीक रेन। 24 तुहांजो सदणे बाला भरोसे दे काबिल है, क्योकि सै तुहांजो पबित्र होणे ताई सददा है, कने उनी पबित्र बणेने दे काबिल भी बणाणा है। 25 हे मसीह भाईयो, साडे ताई प्रार्थना करा। 26 सारे मसीह भाईयां जो प्यारे ने नमस्ते करा। 27 मै तुहांजो प्रभु दा हुकम दिन्दा है, की ऐ चिट्ठी सारे मसीह भाईयां जो पढी करी सुणा। 28 मै प्रार्थना करदा है की साडे प्रभु यीशु मसीह दा अनुग्रह हमेशा तुसां सारयां पर होदा रे।

2 थिस्सलुनीकियों

1 ऐ चिठी मैं पौलस सिलवानुस कने तीमथियुस दिया तरफा ला थिस्सलुनीकिया शेहरे दिया कलीसिया दे ना लिखा दा है, जड़े पिता परमेश्वर कने प्रभु यीशु मसीह च न, 2 असां प्राथना करदे न की परमेश्वर तुसां पर अनुग्रह करे कने तुसां जो शांति दे। 3 हे मसीह भाईयो, तुहाड़े बारे च सांझो लगातार परमेश्वरे दा धन्यवाद करणा चाईदा। कने ऐ साडे ताई ठीक भी है, की तुहाडा भरोसा यीशु मसीह पर बददा जा दा है, कने तुहाडा प्यार भी इक दुज्जे ताई बददा जा दा है। 4 इस ताई परमेश्वरे दिया कलीसिया च तुहाडे बारे च घमंड करदे न, की चाहे तुसां पर जितणे दुख तकलीफ आये, पर तुसां लगातार सबर ने उना दा सामणा किता कने प्रभु यीशु मसीह पर भरोसा करदे रे। 5 तुहाडा दुखां जो सेहणा तुसां जो इस काबिल बणादा है की तुसां परमेश्वरे दे राज्य जा जाई सकन, ऐ ही सच्चा सबूत है, की परमेश्वर सच्चा न्याय करदा है। 6 क्योंकि परमेश्वर हमेशा सही न्याय करदा है, परमेश्वरे उना जो जरूर दुख देणे, जड़े तुहांजो दुख दिन्दे न। 7 कने उनी तुसां जो सुख देणा जड़े हुण दुखे च न, कने सांझो भी सुख चैन देणा, ऐ उस बकत होणा जालू प्रभु यीशु मसीह अपणे शक्तिशाली स्वर्गदूतां सोगी स्वर्ग ला धधगती होई अग्गी के प्रगत होणा। 8 कने जड़े परमेश्वरे जो नी पछेणदे, कने जिना साडे यीशु मसीह दे शुभसमाचारे जो नी मनया, परमेश्वरे इना जो सजा देणी। 9 परमेश्वरे उना जो अपनी मोजूदगी ला बाहर कडी देणा कने परमेश्वरे उना जो अपणिया शक्तिया कने महानता जो जाणने दी अनुमति नी देणी, कने उना जो हमेशा दी सजा देणी। (aiōnios g166) 10 ऐ उस रोजे होणा, जालू यीशु मसीह अपने पबित्र लोकां च महिमा कने इज्जत पाणे ताई बापस ओणा, जड़े लोक उस पर भरोसा रखदे न, तुसां उना लोकां सोगी होणा है जिना प्रभु यीशु दी महिमा करणी है, क्योंकि तुसां साडी गबाइया पर भरोसा किता। 11 इस ताई असां लगातार तुहाडे ताई रोज प्राथना भी करदे न, की परमेश्वर तुहांजो उसा जिन्दगी जो जिणे दे काबिल बणाए जिस ताई तुहांजो सदया है, कने सै तुहाडी हर इक भली इच्छा जो पूरा करे, कने हर उस कम्मे जो सफल करे जडा तुहाडे भरोसे दा नतीजा है। 12 असां ऐ प्राथना करदे न की लोक तुहाडिया बजा ने प्रभु यीशु मसीह दी महिमा करन, कने तुसां जो भी इज्जत मिलणी क्योंकि तुसां उदे न। ऐ सब कुछ परमेश्वरे कने यीशु मसीह दे अनुग्रह ने होणा।

2 हे मसीह भाईयो, असां प्रभु यीशु मसीह दे बापस ओणे दे बारे च कुछ बोलणा चांदा न, जालू असां सबना उसला मिलणा है। 2 कोई भी भविष्यवाणी, या बचन, या उसा चिठिया दिया बजा ने अपने मना जो दुखी कने बेचेन मत होणा दिन्दे, जिना चिठिया जो साडी लिखियो समझदे होन, कने उसा च दसया हो की प्रभु यीशु मसीह बापस आई गिया है, कने तुसां गबरारदे मत। 3 उना लोकां दा कोई भरोसा मत करदे जड़े इना चीजां दे बारे च बुरा बोलदे न, क्योंकि प्रभु यीशु मसीह दे बापस ओणे ला पहिले लोकां परमेश्वरे दा बिरोध करणा है, कने सै पापी माणू जिसयो परमेश्वरे नरक च नाश करणा, उनी जरूर प्रगत होणा। 4 उनी परमेश्वरे दा कने उना सारियां मूर्तियां दा कने बाकी सारियां चिजां दा जिना जो लोक पूजदे न कने प्रभु बोलदे न, बिरोध करणा है, कने उनी सारयां ला बडा होणे दा दाबा करणा, ऐशु दीकर की उनी पापी माणू परमेश्वरे मंदरे च जाई करी बेई जाणा कने अपने आप जो परमेश्वर होणे दा दाबा करणा। 5 तुहांजो याद होणा है, जालू मैं तुहाडे सोगी था, तां तुहांजो मैं केई बार ऐ गल्ल बोलती थी। 6 हले दीकर सै बुरा माणू प्रगत नी होया है, क्योंकि कुछ ऐसा है जिनी उसयो रोकी रखया है, कने तुहांजो जरूर याद होणा सै क्या है जिनी उसयो रोकया है, फिरी जालू परमेश्वरे दा तय कितया बकत होणा तालू सै बुरा माणू प्रगत होणा। 7 क्योंकि बुरे माणू ऐ दी शक्ति होले ला ही इस संसारे च कम्म करा दी है, पर कोई इक है जडा उदी शक्तिया जो रोक्ता है। कने उनी इसयो लगातार रोकी रखणा जरूर बाद प्रभु यीशु मसीह ओणा है, कने यीशु मसीह उसयो अपने हुकमे ने जडा यीशु ऐ दे मुए ने निकलदा है कने अपने तेज ने भस्म करी देणा है। 9 बुरे माणू ऐ शैतान दिया शक्तिया सोगी ओणा है, कने उनी हर तरा दे झूठे चमत्कार, कने अनोखे कम्म करणे न, कने इना चमत्कारां जो दिखीकरी लोकां सोचना की ऐ सारे परमेश्वर करा दा है। 10 कने उनी बुरे माणू ऐ हर तरा दे बुरे कम्म करणे न कने उना सारयां लोकां जो धोखा

देणा जड़े हमेशा दी मौत दे रस्ते पर चलदे न; क्योंकि उना उसा सच्चाईया पर भरोसा नी किता जिना ने उना जो हमेशा दी जिंदगी मिलणी थी। 11 इसी बजा ला परमेश्वरे उना च भ्रम पैदा करी देणा ताकि सै बुरे माणू ऐ दियां गल्लां पर भरोसा करन जडा उना जो सचाई ला भटकाई दिता। 12 परमेश्वरे उना सारयां जो सजा देणी, जिना प्रभु यीशु मसीह दे संदेश पर भरोसा नी किता कने बुराई दे रस्ते पर चले। 13 हे मसीह भाईयो, तुहाड़े ताई परमेश्वरे सामणे सांझो हमेशा धन्यवाद देणा चाईदा, तुसां प्रभु दे प्यारे न, क्योंकि परमेश्वरे शूरू ला पबित्र आत्मा दे जरिये तुहांजो पाप ला लग करी के कने सच्चाई पर तुहाडे भरोसे दिया बजा ने तुहांजो उद्धार ताई चुणी लिया है। 14 परमेश्वरे तुसां जो बचाणे ताई शुभसमाचारे दा इस्तेमाल किता जिसदा असां प्रचार करदे न, ताकि तुसां प्रभु यीशु मसीह दी महिमा च हिस्सेदार होई सकन। 15 इस ताई हे मसीह भाईयो, टिकी रिया; कने लगातार साडी शिक्षा पर भरोसा करा, जडी असां तुसां जो दिती जालू तुहाडे सोगी थे कने जडी चिठिया च लिखी करी भेजी। 16 असां अपने प्रभु यीशु मसीह ला प्राथना करदे न, कने साडे पिता परमेश्वरे जडा सांझो ला प्यार करदा है, उना दे अनुग्रह ला सांझो हमेशा शांति, प्रोत्साहन कने सच्ची आस मिलली है। (aiōnios g166) 17 मैं प्राथना करदा है की परमेश्वर तुहाडे मना जो हिम्मत दे कने तुसां जो भले कम्मा कने बचन च मजबूत बणाए।

3 आखरी च मेरे मसीह भाईयो, साडे ताई प्राथना करा की, प्रभु यीशु मसीह दा बचन जल्दी ही सारियां जगा च फैली जाए, कने जडा इसयो सुणे सै इसयो मन्ने जियां तुसां बचन जो मनया। 2 कने ऐ भी प्राथना करा की परमेश्वर सांझो ठेठे कने बुरे लोकां ला बचाये, क्योंकि मते सारे लोक न जड़े यीशु मसीह दे बचना पर भरोसा नी करदे। 3 पर प्रभु सच्चा कने भरोसे लायक है; उनी तुहांजो शक्ति देणी कने उस शैताने ला तुहांजो बचाणा। 4 सांझो प्रभु च तुहाडे पर पूरा भरोसा है, कने असां जडा-जडा कुछ तुहांजो करणे जो बोलाया है, तुसां सियुदा ही करा दे न कने करदे रेणा है। 5 असां प्राथना करदे न की परमेश्वर तुसां जो इस काबिल बणाई दे की तुसां समझी सकन की परमेश्वर अपने लोकां ने कितणा प्यार करदा है कने किया बचांदा है। 6 हे मसीह भाईयो, असां तुहांजो हुकम दिन्दे न जडा सांझो प्रभु यीशु मसीह दितया है; कने अपने उना मसीह भाई बेहणा ने कोई रिशता मत रखा, जड़े सुस्त कने उना शिक्षा जो नी मंदे जडियां असां तुहांजो दीतियां। 7 क्योंकि तुसां अपु ही ढंगे ने जाणदे न, की तुसां जो तियां ही जिंदगी जिणा चाईदी जियां असां जिया दे न; क्योंकि असां तुहाडे सोगी रे दे थे, तां असां सुस्त नी पर कम्म करदे थे। 8 कने कुसी ला रोटी मुफ्त नी खादी, पर मेहनत कने तकलिफा ने रात दिन कमादे थे, ताकि असां अपनी कुसी भी जरूरतां ताई तुसां पर निर्भर नी होणा पोए। 9 असां जादा मेहनत, इस ताई नी किती, की सांझो तुसां ला कुछ मंगणे दा कोई हक नी है; पर इस ताई किती की असां अपने आपे जो तुहाडे ताई आदर्श बणाई सकन, जिसने तुसां साडे सांझे जिन्दगी जीन। 10 कने जालू असां तुहाडे सोगी रे दे थे, तां तालू भी तुहांजो ऐई हुकम दिन्दे थे, की अगर कोई कम्म नी करणा चांदा, उसयो खाणां भी ना मिलले। 11 असां सुणदे न, की कितणे ही लोक तुहाडे बिच सुस्त कने कोई कम्म नी करदे न, कने होरनी दे कम्मा च दखल दिन्दे रेदे न। 12 ऐसे लोकां जो असां उस हक ने हुकम दिन्दे न, जडा प्रभु यीशु मसीह सांझो दितया है, की चुपचाप ने अपना कम्म करिके अपनी रोटी खा। 13 कने हे मसीह भाईयो, चाहे तुसां जो कितणे भी दुख तकलीफ होन तुहांजो भले कम्म करणे दी कोशिश नी छडणी चाईदी। 14 अगर कोई साडिया इसा चिठिया दे संदेश जो नी मने, उना पर नजर रखा की सै कुण है, कने उदे सोगी सगती लडी दिया, जिसने उसयो शर्मिंदगी महसूस हो। 15 उसने इयां बर्ताब मत करा की जियां सै तुहाडा दुशमण है, पर उसयो समझा जियां तुसां अपने भाईऐ जो समझांदे न। 16 असां प्राथना करदे न की प्रभु यीशु मसीह जडा शांति दा दाता है, अपु ही तुहांजो हमेशा कने हर तरा ने शांति दे, प्रभु हमेशा तुसां सारयां सोगी रे। 17 मैं पौलस अपने हथे ने नमस्ते लिखदा है, हर चिठिया दे आखरी च इयां ही लिखदा है, इस ताई की सारयां जो पता चली जाए की ऐ चिठी मेरिया तरफा ला है। 18 मैं प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होदा रे।

1 तीमथियुस

1 मैं पैलुस जडा साडे उद्धारकर्ता परमेस्वर दे हके ला, प्रभु यीशु मसीहे, जिस पर साडी आस है, जिना मिंजो प्रेरित होणे ताई चुणया, **2** तीमथियुस मैं ऐ चिट्ठी तिजो लिखा दा है, तू मेरे अपने पुत्रे सांई है क्योंकि तू भी प्रभु यीशु मसीह पर भरोसा करदा है। मैं ऐ प्राथना करदा है की पिता परमेस्वर, कने साडा प्रभु यीशु मसीह, तिजो हमेशा अनुग्रह, दया कने शांति दिन्दे। **3** तीमथियुस जियां की तू जाणदा है, की इफिसुस शेहरे च कुछ ऐसे लोक न जडे झूठी शिक्षा दिन्दे न, सै लगातार झूठी कहाणियां कने पूर्वजां दियां लम्बियां सूचियां दे बारे च सिखांदे न। जालू मैं इफिसुस शेहरे ला मकिदूनिया प्रदेश दिया जगा जो जाणे जो तैयार था, तां मैं तिजो इफिसुस शेहरे च ही रूकणे तांई बोलया ताकि तुसां उना लोकां जो बोली सकन की ऐसी शिक्षा मत दिया। जालू सै ऐसी शिक्षा दिन्दे न, तां लोक बेहस करदे न, जिसदा नतीजा ऐ निकलदा है, की सै गुरू सै नी करदे जडा परमेस्वर उना जो करणे तांई बोलया है, जिसयो सै परमेस्वर पर भरोसे करणे ने ही करी सकदे न। **5** तिजो हुकम देणे दी बजा ऐ है की तू हर इक जगो तांई भले मने ने, खरी अंतरात्मा ने, कने सच्चे भरोसे ने प्यार पैदा हो। **6** झूठे गुरूओ इना सारियां चीजां जो करणा बंद करी दितया है, जडे बेकार दियां गल्लां बोलदे न, **7** ऐ झूठे गुरू उना व्यवस्था जो सिखाणे बालयां सांई बणना चांदे न, जडे मूसा दिया व्यवस्था जो अच्छे ला जाणदे न, पर सै असल च कुछ भी नी जाणदे न कि सै दुज्जयां जो क्या सिखाणे दी कोशिश करा दे न कने इतणे आत्मविश्वास सोगी उस पर अड्डी रेंदे न। **8** असां जाणदे न की मूसा दी व्यवस्था अच्छी है अगर कोई इसा जो ढंगे ने सिखाए तां। **9** सांझो पता है की मूसा दी व्यवस्था धर्मी लोकां तांई नी पर अधर्मियां, निरंकुशां, भक्तीहीनां, पापियां, अपबिन्न कने अशुद्ध लोकां, माता-पिता जो मारणे बाले, हत्यारे, **10** व्यभिचारियां, पुरुषगामिणों, माणुऐ जो बेचणे बाले, कने झूठ बोलणे बाले, कने झूठी कामियां बाले, कने इना जो छडी करी खरे उपदेशां दे सारे विरोधियां तांई बणाइयो है। **11** ऐ शिक्षा धन्य परमेस्वर दी महिमा दे श्भसमाचारो पर आधारित है, जिनी मिंजो दुज्यां जो सुणाने तांई श्भसमाचार दितया है। **12** मैं अपने प्रभु यीशु मसीह दा धन्यावाद करदा है, जिना मिंजो शक्ति दिती, कने मिंजो भरोसे दे काबिल समझीकरी अपनी सेवा तांई चुणया। **13** मेरे विश्वासी बणने ला पेहले, मैं यीशु मसीह दी बुराई करदा था, विश्वासियां जो मारदा कुटदा था, कने उना ने बडा बुरा बर्ताब करदा था; तमी मिंजो पर दया होई, क्योंकि मैं तालू दीकर यीशु मसीह पर भरोसा नी कितया था, इस तांई नी समझदा था की जडा मैं करा दा है सै गलत है। **14** कने साडे प्रभुऐ लगातार अपना अनुग्रह मिंजो पर कित्ता, कने उनी मिंजो भरोसा कने प्यार दित्ता क्योंकि मैं यीशु मसीह सोगी इक होई गिया था। **15** ऐ गल्ल सच्च है कने मनणे कने भरोसे दे काबिल है, की प्रभु यीशु मसीह पापियां दा उद्धार करणे तांई इस संसारे च आया, कने उना चे सारयां ला बढा पापी मैं है। **16** पर यीशु मसीहे दया मिंजो पर इस तांई कित्ती, क्योंकि सै दसणा चांदा था की मिंजो माफ करणे ला सै कितणा सेहनशील है, जिनी सबना ला जादा पाप कितयो थे, मेरी जिन्दगी दुज्जयां तांई उदाहरण है, जिना बादे च यीशु मसीह पर भरोसा करणा है, कने हमेशा दी जिन्दगी जो हासिल करणी है। (aiōnios g166) **17** हुण युगां-युगां दे राजा दी, कदी नी नाश होणे बाले कने कदी नी दिखयो कने इकलोते सच्चे परमेस्वर दी इज्जत कने महिमा युगां-युगां दीकर हौदी री। आमीनी। (aiōn g165) **18** हे पुत्र तीमथियुस, मैं तिजो ऐ हुकम दिन्दे-दा है, की तू उना भविष्यवाणियां जो याद कर जडियां परमेस्वर दे संदेश देणेबालयां तेरे तांई कितियां थियां, तू इना गल्लां जो झूठे गुरूआं दे खिलाफ हथियारे सांई इस्तेमाल कर। **19** तुसां जो लगातार यीशु मसीह पर भरोसे च बणी रेणा कने साफ अंतरात्मा रखणी चाईदी। पर केई लोकां अपनी अंतरात्मा जो खराब करी दितया है कने उना मसीह पर भरोसा करणे दी काबलियत जो खत्म करी दितया है, टीक तियां ही जियां इक जाज कुसी चिजा ने भजी करी डूबी जांदा है। **20** उना चे ही हुमिनयुस कने सिक्ंदर न, मैं उना जो कलीसिया ला बाहर कडी दित्ता कने शैताने दिया शक्तिया दे हवाले करी दित्ता, की सै परमेस्वर दी बुराई करणा ना सिखन।

2 सारयां ला जरूरी बिनती ऐ है की, प्राथना, निवेदन कने धन्यावाद सारे माणुऐ तांई करत। **2** कने राजयां कने सारे उच्चे पदां दे अधिकारियां तांई प्राथना करा, की असां सुख शान्ति कने सुरक्षा ने अपनी जिन्दगी जी सकन, ताकि असां

परमेस्वर दी भक्ति करी सकन कने साडा बर्ताब दुज्जयां तांई अच्छा होई सके। **3** लोकां तांई इयुदियां प्राथना करणा साडे उद्धारकर्ता परमेस्वर जो खरा लगदा है, **4** क्योंकि परमेस्वर चांदा है, की सारयां लोकां दा उद्धार हो कने सै यीशु मसीह दी सच्ची शिक्षा दा ज्ञान पाई सकन। **5** क्योंकि सिर्फ इक ही परमेस्वर है, कने इक ही माणु है जडा परमेस्वर कने माणुऐ जो मिलतां है, सै माणु प्रभु यीशु मसीह है जडा माणुऐ दे स्मे च पैदा होया, **6** यीशु मसीहे अपने आपे जो सारयां लोकां दे पापां कने हमेशा दी मौत छुटकारे तांई बलिदान करी दित्ता, ऐ करिरी परमेस्वर सही बकते पर साबित कित्ता की, सै चांदा है की सारे लोक बच्ची जान। **7** इसा बजा ने, परमेस्वर मिंजो श्भसमाचार दा प्रचारक कने इक प्रेरित होणे तांई चुणया है। उनी मिंजो होर जातियां तांई भरोसे दा सच्चा संदेश देणे तांई चुणया, मैं झूठ नी बोलदा, सच्च बोलदा दा है। **8** मैं चांदा है की, जालू तुसां परमेस्वर दी आराधना करणे तांई गिठे होंदे न, कने सै मर्द जडे पबित्र जिन्दगी जिन्दे न, बिना गुस्से कने पूरी शरदा ने अपने हथ उपर चुकी करी प्राथना करा। **9** इयां ही मसीह जनानिया जो भी सही ढंगे दे कपडे पांणा चाईदे, जडे तुहाडे शरीर जो ढंगे ने ढकी सकन, ना की ऐसे होन की सै मर्दो जो आकर्षित करन; कने तुहाडे बालां दा अंदाज ऐसा ना हो की लोकां जो आकर्षित करे, **10** पर अपने आपे जो दुज्जयां तांई भले कम्म करी के छेल बणा, क्योंकि परमेस्वर दी भक्ति करणे बालियां जनानिया तांई ऐई सही है। **11** जालू मर्द विश्वासी लोकां जो सिखा दे होन, तां सारी जनानियां जो चुपचाप कने बडी इज्जता ने सुणना कने सिखणा चाईदा। **12** मैं बोलदा है, की जनानिया मर्दो जो शिक्षा ना देन कने ना ही उना पर हुकुम चलान जालू सै यहूदी जंज घर च गिठे होंदे न, पर जनानिया चुपचाप रेन। **13** ऐ मैं इस तांई बोलदा है क्योंकि परमेस्वर पेहले मर्द बणया जिसदा ना आदम था, उदे बाद जानानी बणाई जिसा दा ना हव्वा था। **14** कने इक होर बजा ऐ है, सै हव्वा ही थी जिसयो शैताने बहकाया था, आदम नी था। ऐसा करिके हव्वा परमेस्वर दे नियम तोडया। **15** पर परमेस्वर जनानिया जो बच्चे पैदा करणे दित्या बजा ने बचाई लेणा है, अगर उसा दा मन शुद्ध है कने मसीह च अपने भरोसे ला भटकदी नी है, होर लोकां ने प्यारभाव रखदी, कने इक निर्दोष जिन्दगी जिन्दियां न।

3 ऐ गल्ल सच्ची कने भरोसे दे काबिल है, की जडा कलीसिया दा अगुवा बणना चांदा है, तां सै इज्जतदार कम्मा दी इच्छा रखदा है। **2** इस तांई ऐ जरूरी है की अगुवा निर्दोष हो, इक ही घरे बाली हो, सेहनशील, अच्छा हो, इज्जतदार हो, परोणया दा इज्जत करणे बाला, कने परमेस्वर दा बचन सिखाणे च काबिल हो। **3** शराबी या मारुटाई करणे बाला ना हो; पर दयालू हो, शान्तिप्रिय हो, कने ना पैसै दा लालची हो। **4** अपने घर परिवार जो ढंगे ने सम्भालदा हो, कने अपने बचयां जो आदर ने अपना केहणा मनणा सिखांदा हो। **5** अगर कोई अपने ही घर परिवारो जो सम्भालना नी जणाना हो, तां सै परमेस्वर दी कलीसिया जो भी नी सम्भाली सकदा है। **6** कने ऐसा ना हो की जिननी नौआ-नौआ भरोसा कितया हो, सै घमंडी होई जाऐ कने उसयो शैताने सांई सजा मिल्ले। **7** कने संसारिक लोकां च भी उदी अच्छी इज्जत हो, इयां ना हो की लोक उदी बुराई करदे होन कने शैताने दे फंदे च फंसी जा। **8** इयां ही कलीसिया च सेवक भी इयोदे होन जिना दी लोक इज्जत करन, कने इमानदार होऐ, शराबी नी होऐ, सै ऐसा माणु नी होणा चाईदा जडा पैसे तांई कुछ भी करे; **9** कने उस बाल साफ अंतरात्मा हो, जिसने सै लगातार ऐ भरोसा करे की परमेस्वर जडी शिक्षा दितियो है सै सच्ची है। **10** कने ऐ भी सेवक बणने ला पेहले परखणे चाईदे, अगर कोई भी इना अंदर दोष नी तोपी सके, तां सै सेवकां दे कम्म करन। **11** इयां ही सेवका दियां घरे बालियां भी इयुदियां होणा चाईदियां जिना दी लोक इज्जत करन, दोष नी लागे बाली हो, अकली ने कम्म करणे बाली हो कने सारियां गल्लां च भरोसे दे काबिल होणी चाईदी। **12** कलीसिया दे सेवक अपनी घरे बालिया ला बफादार हो कने अपने बाल-बचयां कने अपने परिवारे जो ढंगे ने सम्भालने बाला हो। **13** क्योंकि जडे सेवके दा कम्म अच्छे ने करी सकदे न, उना जो लोकां ला अच्छी इज्जत मिलदी है, सै हिम्मताने यीशु मसीह पर भरोसे दे बारे च बोली सकदे न। **14** मैं तेरे बाल तोल्ले ओणे दी आस रखीकरी भी ऐ गल्लां तिजो इस तांई लिखा दा है, **15** अगर मेरे ओणे च देर होईया तां तिजो इसा गल्ला दी जानकारी रे की, परमेस्वर दे परिवारे दे लोकां दा बर्ताब कदिया होणा चाईदा। परमेस्वर दा प्यार जिन्दे परमेस्वर दी कलीसिया है, ऐ इयां ही सच्ची शिक्षा दा साथ दिन्दे न कने

बणाई रखदे न, जियां इक मजबूत नि कने खम्बे घरे जो मजबूत करदे न। 16 इदे च कोई शक नी की जडी शिक्षा परमेश्वरे प्रुट किती सै सच्ची है, जिसयो मना नी करी सकदे मतलब की, यीशु मसीह माणू बणी करी आया कने, पबित्र आत्मा ला साबित होया की परमेश्वरे दा पुत्र है, कने स्वर्गदूतां जो मिल्ला, कने महिमा दे स्वर्ग च चुकी लिया, कने चेलयां उदा श्भसमाचार हर जगा प्रचार किता कने, मते सारे संसारे दे लोकां उस पर भरोसा किता।

4 पबित्र आत्मा साफ-साफ बोलदी है, की आखरी बकते च कुछ लोकां मसीह शिक्षा पर भरोसा करणा छडी करी उना बुरियां आत्मा दियां शिक्षा पर भरोसा करी के अपनाई लेणा जिना उना जो भटकवाई देणा। 2 झूठे गुरु धोखेबाज न, उना जो नी पता लगणा की सै जडा करा दे न सै सही है की नी, क्योंकि उना दी अंतरात्मा जडी सही कने गलत च फेसला करदी है, सै मरी गियो है, जियां कि इक गम लोहे ला उना जो पकुरी दितया हो, 3 इयोंदे लोक सिखंदे न की बियाह करणा कने खाणे दियां केई-केई चिंजा खाणा गलत है, पर परमेश्वरे हर तरा दा खाणा मसीह पर भरोसा करणे बालयां तांई बणाया है, जडे प्रार्थना दे बाद धन्यवाद करिके खाणे दी सच्ची शिक्षा जो जाणदे न। 4 क्योंकि परमेश्वरे दी बणाईयो हर इक चीज खरी है, अगर असां परमेश्वरे जो धन्यवाद करी के खान तां असां हर तरा खाणा खाई सकदे न, 5 क्योंकि परमेश्वरे दे बचन कने प्रार्थना ला हर तरा दा खाणा शुद्ध होई जांदा है। 6 अगर तू मसीह भाई बेहणा जो लगातार ऐ शिक्षा याद दिलांदा रे, की जडी शिक्षा मैं तिजो दिती, कने तू मनी भी है कने तू भरोसे दे संदेश कने अच्छी शिक्षा ला मजबूत होया है, तां तू यीशु मसीह दा अच्छा सेबक है कने इसला तेरा पालन-पोषण हमेशा होंदा रे। 7 बणी बणाईयां कहाणियां च बकत खराब मत करा, जिना ला परमेश्वरे जो इज्जत नी मिलदी, तुहांजो अपने आपे जो लगातार सिखंदे रेणा चाईदा की अपनी जिन्दगी ने कियां परमेश्वरे जो इज्जत देई सकदे न। 8 क्योंकि व्यायाम करणे ने शरिर जो घट फायदा होंदा है, पर परमेश्वरे दी भक्ति सारियां गल्लां तांई फायदेमंद है, क्योंकि ऐ माणूऐ जो इनाम देणे दा बायदा करदा है जालू सै इसा धरती च जिन्दा रेंदा है कने मरणे बाद भी ऐ इनाम मिलणा। 9 ऐ गल्ल सच्च कने भरोसा करणे दे काबिल है। 10 असां जादा मेहनत कने कोशिश इसी तांई करदे न की असां उसा जिन्दगी जो पाई सकन, जिदे तांई साडी आस जिन्दा परमेश्वरे पर है, जडा सारयां दा परमेश्वर है कने जडे उस पर भरोसा करदे न उना दा उद्धारकर्ता है। 11 भरोसा करणे बालयां जो इना गल्लां दा हुकम देईकरी सिखा की सै इना गल्लां जो मनन। 12 इस हणे ने जिन्दगी जिया की कोई भी तेरी बेजती न करे; पर तुसां दे बचन, तुहाडा बर्तव, तुहाडा दुज्जयां तांई प्यार, तुहाडा मसीह पर भरोसा कने तुहाडी निर्दोष जिन्दगी उना भरोसा करणे बालयां तांई इक आदर्श बणना चाईदी, जडे तुसां जो अगुवा मंदे न। 13 जालू दीकर मैं तुहाडे बाल नी ओंदा तालू दीकर पबित्र शाश्र लोकां जो पढने, कने मतलब दसणे च कने सिखाणे च लगी रे। 14 उना गल्लां जो याद रख जालू अगुवां तिजो पर हथ रखे, कने परमेश्वरे उना जो इक संदेश दितया है की तिजो तेरी खास योग्यता दे बारे च दस्से, जडी परमेश्वरे तिजो दितियो है, इसा योग्यता जो भुलदा मत। 15 इना गल्लां पर लगातार ध्यान ने अभ्यास कर, कने अपने आपे जो इना गल्लां तांई पुरे तरीके ने समप्रित करी दे, ताकि हर कोई दिखी सके की तुसां अपने भरोसे च बदा दे न। 16 ध्यान रखा की तुसां कियां जिया दे न कने क्या सिखा दे न, इना गल्लां पर टिकी रिया, क्योंकि अगर तू ऐसा करदा रेगा, तां तू खुद जो कने जडे तिजो सणदे न दोनां जो न्याय बाले दिने बचाई लेणा है।

5 कुसी भी सियाणे माणूऐ दी बेजती करणे दे इरादे ने मत झिडकां दिन्दे; उसयो इज्जता ने समझा जियां की सै तेरा अपना पिता है, कने अपने ला छोटयां जो इयां समझा जियां की सै तेरा अपने भाई है; 2 बजुरी जनानिया जो इयां समझा जियां की सै तेरी अपनी माता है, कने जवान बेहणा जो पूरी पबित्रता ने समझा जियां की सै तेरी अपनी बेहण है। 3 उना विधवां जनानियां दी इज्जत कने उना दी देखभाल करा जिना दी देखभाल करणे बाले कोई नी है। 4 अगर कुसी विधवा दे बच्चे, या नाती-पोते होन, तां सै पेहेले अपने घर परिवारे दी जिम्मेदारी पूरी करे, जियां इक मसीह भरोसा करणे बालयां जो करणा चाईदा, कने अपने माता-पिता जो उना दा हक देणा सिखे, क्योंकि ऐ सब परमेश्वरे जो पसंद है। 5 जिसा विधवा दा कोई देखभाल करणे बाला नी है, सै परमेश्वरे पर ही आस रखदी है, कने दिन रात बिनती कने प्रार्थना करिरी परमेश्वरे ला सहायता मंगदी है। 6 पर जडी विधवा

अपणा सारा बकत एशो अराम च करदी है, सै शरीरिक स्पे च तां जिन्दा न, पर आत्मिक रूप च मरी गियां न। 7 भरोसा करणे बालयां जो इना गल्लां दा हुकम दे, ताकि उना पर कोई दोष नी लाई सके। 8 अगर कोई अपणयां रिशतेदारां दी, कने खासकर अपने परिवारे दी देखभाल ना करे, तां उनी अपना भरोसा छडी दितया है, कने भरोसा नी करणे बालयां ला भी बुरा बणी गिया है। 9 उना ही विधवा दे नां दर्ज करा जडियां सठा सालां ला जादा उमरा दिया होन, कने सै अपने घरे बाले ला बफादार रियो हो, 10 कने अपने भले कम्मा दिया बजा ला उदा ना हो, जिना अपने बाल बचयां दा अच्छे ने पालन-पोषण कितया हो; कने प्रोणयां दी ठीक ठाक सेवा कीतियो हो, कने भरोसा करणे बालयां दी सेवा इक दासिया सांई किती हो, दुखी लोकां दी सहायता कितियो हो, कने हर इक भले कम्मा च मन लाया हो। 11 पर जवान विधवां दे ना दर्ज मत करे, क्योंकि जालू उना दी शारीरिक इच्छां इक विधवा दे स्पे च मसीह दी सेवा करणे दे वायदे ला जादा बदी जांदिनां न, तां सै मसीह ला दूर होईकरी के दुज्जा बियाह करणा चांदिना न, 12 दुज्जा बियाह करिके सै अपने आपे जो दोषी बणाई दिन्दी है, क्योंकि उना अपना पेहेला बायदा परा नी किता। 13 इदे सोगी सै घरे-घरे फिरी करी सुस्त होणा सिखदिनां न, कने सिर्फ सुस्त होणा ही नी, पर दुज्जयां दे बारे च चुगली निदा करदिनां न कने दुज्जयां दे कम्मा च दखल भी दीदिनां न, कने बुरियां गल्लां बोलदिनां न, कने ऐसियां गल्लां करदिनां जडियां इना जो नी करणा चांदिनां। 14 इस तांई मैं ऐ सलाह दिन्दा है, की जवान विधवां जो बियाह करी लेणा चाईदा; कने बच्चे जमन कने घरबार संभालन. कने कुसी भी दुशमणे जो, इना जो बदनाम करणे दा मौका नी दे। 15 मैं ऐ इस तांई बोलदा है क्योंकि केई बिधवां एसियां न जिना परमेश्वरे दे हुकमा जो मनणा छडी दीतिया है, कने तियां ही करदिनां न जियां शैतान चांदा है की सै करन। 16 अगर कुसी मसीही परिवारे च कोई विधवा हो, तां सेई उसा दी सहायता करन ताकि उसा दा भोज कलीसिया पर ना ओए, ताकि कलीसिया ऐसी विधवां दी देखभाल करी सके जिना दी देखभाल करणे बाला कोई नी है। 17 जडे अगुवे अपना कम्म अच्छे ने करदे न, सै दो गुणा इज्जत कने मजदूरी दे काबिल समझे जान, खासकर सै जडे परमेश्वरे दे बचन जो मेहनता ने सिखांदे कने प्रचार करदे न। 18 ऐ पबित्र शाश्र लिखया है, की गांण गांदे बेले दांदा दा मुं मत बनदे, होर ऐ भी लिखया है, “की इक मजदूरे जो उदी मेहनत दी मजदूरी लेणे दा हक है।” इस तांई कलीसिया जो अपने अगुवे जो मजदूरी देणी चाईदी। 19 अगर अगुवे पर कोई दोष लगांदा है तां तुसां तालू दीकर उस दोषे जो मत मन्ना जालू दीकर दो या तिन गबाह बोलन की असां इसयो खुद गलत कम्म करदे दिखया है। 20 तुसां जो उस भरोसा करणे बालयां जो जडा पाप करदा है, सारयां सामणे डांटी करी समझाई दिया, ताकि होर भरोसा करणे बाले लोक पाप करणे ला भी डरन। 21 परमेश्वर, कने मसीह यीशु, कने स्वर्गदूतां दी मोजदगी च, मैं तिजो चेतावनी दिन्दा है, की तू कुसी इकी दा पक्ष मत ले, सबाना ने इकोदिया बर्ताब कर। 22 कुसी पर भी तालू दीकर हथ रखीकरी अगुवा नियुक्त मत करा जालू दीकर सै साबित नी करे की सै प्रभु यीशु सोगी बफादार है, अगर तू इयां करदा है तां तू भी उदे पापां दा हिस्सेदार है; अपने आपे जो पापां ला दूर रखा। 23 भविष्य च बस पाणी ही पिणे बाला मत बणदा, पर अपने पटे तांई कने बार-बार बीमार होणे दिया बजा ने थोडा कदी-कदी दाखरस दवाई सांई पी लिया करा। 24 मैं, जल्दबाजी च कुसी जो अगुवा नी बणाणे तांई इस तांई बोलाया क्योंकि कुछ लोकां दे पाप तां जल्दी सामणे आई जांदे न, कने न्याय होणे ला पेहेले ही सै सारे भरोसा करणे बालयां सामणे दोषी न, पर कुछ लोकां दे पाप बडे बकते बाद सामणे ओंदे न। 25 तियां ही कुछ भले कम्म करदे न, सै कम्म दुज्जे भरोसा करणे बालयां दे सामणे ओंदे न, अगर ऐ कम्म भरोसा करणे बालयां सामणे नी ओंदे न, फिरी भी उना इना कम्मा जो जाणी लेणा।

6 जितणे भी भरोसा करणे बाले गुलाम न, इना जो अपने-अपणे मालिकां दी इज्जत करणी चाईदी, ताकि दुज्जे लोक परमेश्वर दी कने साडी शिक्षा दी बुराई ना करन। 2 जिना दे मालिक भरोसा करणे बाले न, उना जो मसीह भाई होणे दिया बजा ला पूरी इज्जत दिया, कने उना दी होर भी जादा सेवा करा, क्योंकि जडे सेवा ला फायदा लेंदे न, सै उना ला मसीह भाई सांई प्यार करदे न। इना गल्लां दा उपदेश करदे रिया कने लोकां जो भी करणे जो बोला। 3 अगर कोई झूठी शिक्षा दिन्दा है, कने साडे प्रभु यीशु मसीह दे संदेश कने परमेश्वरे दी भक्ति

दी शिक्षा जो नी मनदा है, 4 तां सै घमंडी है, कने सै कुछ नी समझदे न, पर सै अखरां दे मतलब जो लेईकरी तुजयां सोपी बेहस कने झगडा करणा चांदे न, जिसा बजा ने जलन, लडाई, दुजयां दी निंदा, 5 कने दिमागे च बेकार शक भरई जांदा है, कने जडे सच्च ला भटकी गियो न उना माणुआं च लडाईयां होई जांदियां न, कने ऐ सै न, जडे परमेश्वरे दी भक्ति जो कमाईया दा जरिया समझदे न। 6 पर साडे तांई ऐई खरा है की, असां सै कम्म करन जडे परमेश्वरे जो खुश करदे न, कने उस च खुश रिया जडा परमेश्वरे सांझो दितया है। 7 क्योकि असा इस संसारे च कुछ भी लेईकरी नी आयो न, इस तांई ना ही कुछ लेईकरी जाई सकदे न। 8 अगर साडे बाल खाने पीणे कने पाणे तांई है, तां इसी पर सांझो खुश रेणा चाईदा। 9 कने जडे बडे अमीर होणा चांदे न, सै लोक असानिया ला पाप दे जाले च फसी जांदे न, जियां इक जानवर फंदे च फसी जांदा है, सै ऐसियां चीजां करणा चांदे न जडियां बेकार कने नुकसानदायक न, इना इच्छा उना जो बर्बाद कने खत्म करी देणा। 10 क्योकि पैसयां दा लालच सारियां बुराईयां दी जड है, केई लोक मसीह दियां शिक्षा पर भरोसा करणा छडी दिन्दे न, क्योकि सै बडे जादा अमीर होणा चांदे न, कने सै बडे दुखां च पेई जांदे न, जियां इकी माणुऐ अपने आपे जो हथियारे ने बिनी लियो हो। 11 पर तू, तीमुथियुस जडा परमेश्वरे दा सेवक है, तू इना सारियां गल्लां ला दूर रे; कने धर्म, भक्ति, भरोसा, प्यार, सबर, कने नम्रता दा पिच्छा कर। 12 जियां इक अच्छा सिपाई लडाईया दे बकत कदी भी हार नी मनदा; तियां ही तू भी परमेश्वरे पर भरोसा करणे कने उदे हुकम मनणे च कदी हार मत मन, कने हमेशा दी जिन्दगी जो पकडी रख, जिंदे तांई तिजो सदया कने मतयां गबाह दे सामणे तू प्रभु यीशु मसीह जो मनया है। (aiōnios g166) 13 पिता परमेश्वर जो गबाह मनी करी, जडा सारयां जो जिन्दगी दिन्दा है, कने यीशु मसीह जो गबाह मनी करी जिनी पुन्तियुस पिलातुस दे सामणे अपने बारे च सच्च बोलया, इना जो गबाह मन्नी करी तिजो ऐ हुकम दिन्दा है। 14 कि तू उना सारे कम्मा जो करी सके जिना जो करणे तांई परमेश्वरे हुकम दितया है। इस तांई की साडे प्रभु यीशु मसीह दे दुबारा मुडी ओणे दिकर कोई तिजो पर दोष ना लाई सके। 15 परमेश्वर, इकलोता राजा है जडा महिमा दे काबिल है, जडा राजयां दा राजा है कने प्रभुआं दा प्रभु है, उनी सही बकते पर प्रभु यीशु मसीह जो प्रगट करणा है, 16 कने इक सै ही है जिनी हमेशा जिदां रेणा है, कने सै ऐसी चमकदी लौई च रेदा है इस तांई कोई भी इदे बाल नी जाई सकदा है, कने उसयो ना कदी कुनी माणुऐ दिखया कने ना ही कदी दिखी सकदा है। उदी महिमा कने शक्ति युगां-युगां तक रेणी है। आमीन। (aiōnios g166) 17 इस संसारे दे सारे अमीरां जो हुकम दे की सै घमंड ना करन कने अपणी धन धोलता पर भरोसा मत रखा जडी थोडे दिना तांई है, पर परमेश्वरे पर भरोसा रखा जडा सांझो सब कुछ दिन्दा है, जिसदा असां सख लेई सकदे न। (aiōn g165) 18 कने उना जो बोला की भलाई करा, कने मते सारे भले कम्म करा, कने दयालु बणा कने सहायता करणे तांई हमेशा अगो रिया, 19 ऐ सब करणे ला तुसां अपने तांई स्वर्गे च धन गठेरदे न, कने ऐ चोरी नी होंदा कने परमेश्वरे उना जो सच्ची जिन्दगी देणी, जिसदा मतलब हमेशा दी जिन्दगी। 20 हे तीमुथियुस, तुसां सैई कर जडा परमेश्वरे करणे दा हुकम दितया है, कने बेकार गल्लां कने उना शिक्षा ला दूर रे, जडियां परमेश्वरे दी शिक्षा दे खिलाफ न, जिसयो सै गलती ने ज्ञान बोलदे न। 21 केई लोकां इसा गलत शिक्षा जो अपनाई लिया, कने इयां करणे ने सै मसीह दी शिक्षा ला भटकी जांदे न। मै ऐ प्राथना करदा है की परमेश्वरे दा अनुग्रह तुसां पर होंदा रे।

2 तीमथियुस

1 मैं पौलुस जडा साडे पिता परमेश्वरे दिया तरफा ला प्रभु यीशु मसीह दा प्रेरित होणे ताई चुणया है। ताकि मैं प्रचार करी सके, की यीशु मसीह पर भरोसा करणे पर हमेशा दी जिन्दगी देणे दा परमेश्वरे बायदा कितया है, 2 मैं ऐ चिट्ठी तीमथियुस जो लिखा दा है, जडा मेरे अपने प्यारे पुत्रे साई है। मैं प्राथना करता है की पिता परमेश्वर कने साडे प्रभु यीशु मसीह दिया तरफा ला तिजो अनुग्रह, दया कने शांति मिल्ले। 3 मैं परमेश्वरे दा धन्यवाद करता है, जिसदी सेवा मैं शूद्र अंतरात्मा ला किती जियां मेरे पूर्वज करते थे, जालू भी मैं प्राथना करता है, तां प्राथना च तिजो हमेशा याद करता है, 4 मिजो याद है की तू कितना रोया था, जालू मिजो तिजो छडी करी जाणा पिया था, कने तेरे आंसुआं जो याद करिरी दिन रात तिजो ने मिलणे दी इच्छा रखदा है, की मैं खुशिया ला भरई जां। 5 मैं यीशु मसीह च तरे भरोसे जो भी याद करता है, जडा सारायां ला पेहले तेरी नानी लोइस, कने तेरी माता यूनीक च था, कने मिजो यकीन है की सेई भरोसा तरे अंदर भी है। 6 इस ताई मैं तिजो याद दिलादा है कि तू उना बरदाना जो दोबारा ला जगा कर जडे परमेश्वरे तिजो उस बकत दितयो थे जालू मैं तेरे सिरे पर हथ रखे। 7 क्योंकि परमेश्वरे सांझो डरफोक न की बणाया है, पर परमेश्वरे दी आत्मा साडे मना जो मजबूत करदी है, कने दुज्यायां ने प्यार करणे च सहायता करदी है, कने सांझो सबर रखणा सिखांदी है। 8 इस ताई ना तां साडे प्रभु दे बारे च गबाई देणे च शर्म करा, कने ना मिजो ला शर्म करा, जडा यीशु मसीह दी सेवा करणे ताई जेला च है, पर उस परमेश्वरे दी शक्तिया ला शुभसमाचारे ताई दुख झेलणे ताई मेरे सोगी चुडी जा। 9 परमेश्वरे ही साडा उद्धार कितया है, कने पबित्र जिन्दगी ताई सांझो सदया है, कने उनी सांझो इस ताई नी चुणया की असां खरे कम्म किते न; पर संसार दे बणने ला पेहले परमेश्वरे यीशु मसीह जो इस संसार च भेजेणे दे जरिये अपना अनुग्रह दसणे दी योजना बणाई (aiōnios g166) 10 पर हुण साडा उद्धारकर्ता प्रभु यीशु मसीह आई गिया है, कने उनी मौत दी शक्ति जो हराई दिता है, कने शुभसमाचारे दे जरिये सांझो हमेशा दी जिंदगी दा रस्ता दसया है। 11 कने परमेश्वरे मिजो इस शुभसमाचार दा प्रचार करणे कने प्रेरित बणने ताई कने लोकां जो उपदेश देणे ताई चुणया है। 12 इसा ही बजा ने मैं दुखां जो भी झेलदा है, कने शरमांदा नी है, क्योंकि मैं यीशु मसीह जो जाणदा है जिस पर मैं भरोसा कित्या; कने मिजो पक्का पता है, की यीशु मसीह उस दिने दीकर जालू दीकर सै बापस नी ओगा, उदी रक्षा करणे च सक्षम है, जडा उनी मिजो दितया है। 13 जडी सच्ची शिक्षा तू मिजो ला सुणियो है, इसा जो उस भरोसे कने प्यारे ला जडा यीशु मसीह च बसया है, उना जो अपना आदर्श बणाई कर रख। 14 पबित्र आत्मा दिया सहायता ला जडा सांझो च रेंदा है, सच्चाई दी रखबाली करा जडी परमेश्वरे सांझो दिती थी। 15 तू जाणदा है की मते सारे आसिया प्रदेश दे भरोसा करणे बालयां मिजो छडी दितया है, जिना च फुगिलुस कने हिप्पुगिनेस न। 16 उनेसिफुरस दे घरे पर प्रभु दया करे, क्योंकि सै मिजो ने बडी बरी मिलणे जो आया कने मेरी सहायता कित्ती, कने सै जेला च भी मिजो ने मिलणे ताई शर्मिंदा नी होया। 17 पर जालू सै रोम शहरे च आया, तां उनी मिजो हर जगा च तोपया कने मिजो ने मिल्ला। 18 प्रभु करे, की न्याय दे दिने उस पर बडी दया करे। कने जडी सेवा उनी मेरी इफिसस शहरे च कित्ती है, उसा जो तू अच्छे ने जाणदा है।

2 इस ताई हे मेरे पुत्र तीमथियुस, ऐ जाणी करी तू अपने आपे जो मजबूत बणा की परमेश्वरे तिजो अनुग्रह दितया है जडा सिर्फ यीशु मसीह दिया तरफा ला मिलदा है। 2 तू मिजो मतयां लोकां दे सामणे मसीह दे बारे च शिक्षा दिन्दे सुणया है, इस ताई मैं चांदा की तू भी भरोसा करणे बालयां जो इस शिक्षा जो सिखा, जडे बाकियां जो भी सिखाणे दे काबिल न। 3 यीशु मसीह दे अच्छे सिपाई साई मेरे सोगी सबर ने दुखां दा सामणा कर। 4 अगर कोई सिपाई जडा सेना च है, तां सै होर कोई कम्म धंधा नी करदा क्योंकि सै अपने बड़े अधिकारियां जो खुश करणा चांदा है। 5 इयां ही अगर कोई पेहलवान कुश्ती दे अखाडे च हिस्सा लेंदा है, कने नियमा दे अनुसार नी लडदा है, तां सै जीत दा इनाम नी जीती सकदा है। 6 जडा किसान मेहनत करदा है, फसल दा पेला हिस्सा उसयो ही मिलणा चाईदा। 7 इना उदाहरणा दे बारे च सोच की ऐ क्या सिखाणा चांदा न, कने प्रभु तिजो इना गल्लां जो समझणे च सहायता करे। 8 हमेशा यीशु मसीह दे बारे च सोचदा रे, जडा राजा

दाऊदे दे वंशे ला था, कने परमेश्वरे उसयो मरयां चे जिन्दा कित्या; कने ऐ ही सै शुभसमाचार है, जिसदा मैं प्रचार करता है। 9 इसी शुभसमाचारे दिया बजा ने मैं जेला च इक अपराधी साई दुख झेला दा है, पर परमेश्वरे दे शुभसमाचार जो प्रचार करणे ला कोई नी रोकी सकदा है। 10 इस ताई मैं परमेश्वरे दे चुणयो लोकां दे फायदे ताई सारे दुखां जो सेहन करदा है, ताकि सै यीशु मसीह पर भरोसा करन कने बची सकन कने उना जो हमेशा दी महिमा मिल्ली सके। (aiōnios g166) 11 ऐ गल्ल सचच है कने भरोसा करणे दे काबिल है, की अगर असां यीशु मसीह सोगी मरी गियो न, तां उदे सोगी जिंदा भी होणे। 12 अगर असां यीशु मसीह दिया बजा ने दुख झेलणे, तां असां उदी बजा ने राज भी करणा है; अगर असां बोलणे की असां यीशु दे चले नी न, तां उनी बोलणा की मैं इना जो नी जाणदा। 13 अगर असां मसीह सोगी बफादार नी न, फिरी भी सै साडे सोगी बफादार है, क्योंकि सै खुद अपने सभाव दे खिलाफ नी जाई सकदा है। 14 बार-बार इना गल्लां दी शिक्षा भरोसा करणे बालयां जो दिया, जडियां मैं तहांजो सिखाईयां न, कने प्रभु जो गबाह बणाई करी उना जो चेताबनी दिया की अखरां दे मतलब पर बेहस मत करा, इयां करणे ने कोई फायदा नी होंदा; पर सुणेबाले लोकां ताई नुकसान है। 15 तहांजो जितना जादा होई सके मेहनत करणी चाईदी की परमेश्वर तहांजो ऐसा कम्म करणे बाला साबित करी दे, जडा कदी भी शर्मिंदा ना होन, कने जडा परमेश्वरे दे बचना जो ठीक तरीके ने सिखांदा हो। 16 पर संसारिक गल्लां कने बेकार गल्लां ला बची रिया, क्योंकि जडे लोक इशुदियां गल्लां च हिस्सा लेंदे न, सै होर भी जादा परमेश्वरे ला दूर होई जांदा न। 17 उना दी झूठी शिक्षा फैलीकरी लोकां दे भरोसे जो तोडी दिती है, जियां खूला सडया होया जखम माणुऐ जो खत्म करी दिन्दा है: हुमिनयस कने फिलेतुस भी उना चे ही न, 18 उना सच्चाई पर भरोसा करणा छडी दितया है, सै ऐ बोलेदे न की परमेश्वरे मरी गियो भरोसा करणे बालयां जो पेहेले ही हमेशा दी जिन्दगी ताई जिन्दा करी दितया है, जिसदी बजा ने सै कुछ विश्वासियां जो यीशु मसीह पर भरोसा करणे ला भटकई दिन्दे न। 19 पर परमेश्वरे दे लोक उसा पक्की नियां साई न जडी कदी हिलदी नी, उसा पक्की नियां पर खोदी करी लिखया है की, “प्रभु अपने लोकां जो जाणदा है” कने “जडा कोई प्रभु दी भक्ति करदा है, सै बुराई ला बची रेंदा है।” 20 बड़े घरे च सिर्फ सोने या चांदी दे ही नी, पर लकडी कने मिट्टी दे भांडे भी होंदे न, कुछ भांडयां दा इस्तेमाल खास मौकयां ताई होंदा है, कने कुछ भांडयां दा इस्तेमाल आम कम्मा ताई होंदा है। 21 इस ताई अगर कोई अपने आपे जो गंदगी ला साफ करगा, तां सै उस आदर दे भांडे साई होई जाणा जिसयो आदर ताई इस्तेमाल करदे न, उदी जिन्दगी पबित्र होणी कने मालिक उसयो इस्तेमाल करी सकदा है। 22 इस ताई उना पापी इच्छां ला बची रिया जडियां जवान लोकां जो अपने पाप्मे खिचदियां न; कने उना लोकां दी संगती करा, जडे धार्मिकता, भरोसा, प्यार कने शांत सभाव कने जडे साफ मने ला परमेश्वरे दी भक्ति करदे न। 23 कने मुखता कने फालतू गल्लां ला दूर रिया, क्योंकि तू जाणदा है की इना ला झगडे होंदे न। 24 कने प्रभु दे दासे जो लडाका नी होणा चाईदा, पर उसयो सबना ने प्यारभाव ने गल्ल बात करणे बाले, कने परमेश्वरे दी शिक्षा जो अच्छे ने सिखाणे बाला, कने सेहनशील होणा चाईदा। 25 कने जडे लोक इना दा बिरोध करदे न, उना जो प्यारभाव ने सच्ची शिक्षा जो समझांदा हो, क्या पता परमेश्वर उना दा मन बदली दे, जिसला उना जो यीशु मसीह दी सच्चाईयां जो जाणने दा मौका मिले। 26 कने ताकि सै जाग्राक होई जान कने शैताने दे बशे ला बाहर निकली सकन, जिनी उना जो धोखा दिता कने सेई करवाया जडा सै चांदा था।

3 तीमथियुस, मैं चांदा की तू ऐ जाणे, की यीशु मसीह दे दुबारा मुडी करी ओणे दे आखरी रोजां च ऐसा बुरा बकत ओणा है। 2 क्योंकि लोक मतलबी, लालची, डीगमार, घमंडी, निंदा करणे वाले, माता-पिता दी गल्लां जो नी मनणे वाले, मतलबी, अपबित्र, 3 दुज्यायां ने प्यार नी करणे वाले, माफ नी करणे वाले, दोष लाणे वाले, अपणियां इच्छां पर काबू नी रखणेवाले, झगडालू, अच्छाई ला नफरत करणे वाले, 4 भरोसा तोडने वाले, ढीठ, घमण्डी, परमेश्वरे जो नी पर अपने ऐशो अराम जो प्यार करणे वाले होंणे। 5 इयोदे लोक दिखणे च तां परमेश्वर दे भक्त लगदे न, पर ऐ उसा शक्ति जो नी मंदे, जडी उना जो परमेश्वर दा भक्त बणाई सकदी है, ऐसे माणुआं ला दूर ही रनयो। 6 इना च ही कुछ लोक ऐसे भी न, जडे धोखे ला लोकां दे घरां च बडी जांदा न, कने उना मुख जनानिया जो

वशे च करी लेंदे न, जिना दा मन पापां दे भोज ने दबईया कने हर तरा दी वासना दे वशे च फसियां न। 7 कने से हमेशा नोईयां शिक्षां जो सिखदियां रेंदियां न पर यीशु मसीह दी सच्चि शिक्षा जो कदी नी समझी सकदी। 8 कने ऐ झूठे गुरु न, जडे यीशु मसीह दियां सच्चियां शिक्षा दा बिरोध करदे न, जियां यन्नेस कने यम्बेसे मूसा दा बिरोध किता था, इना दी अकला जो कीडे पेई गियो न कने, प्रभु यीशु मसीह पर भरोसा नी करदे न। 9 से लम्बे बकते दीकर लोकां जो धोखा नी देई सकदे, क्योंकि जियां लोकां यन्नेस कने यम्बेसे दिया मूर्खता जो पछेणी लिया था, तियां ही सारयां जाणी लेणा की ऐ भी मूर्ख न। 10 पर हे तीमुथियुस, तू अच्छे ने जाणदा है की मैं क्या सिखादां, कने मैं कियां जिन्दगी जिन्दा है, कने मेरियां क्या योजना थियां कने मेरा क्या भरोसा है। तू जाणदा है की मैं कितणा सेहनशील कने दुज्जयां ने प्यार करदा है, कने दुख मुसीबतां जो सेहन कितया है, 11 कने तू उना भयानक दुखां दे बारे च जाणदा है, जडे अन्ताकिया कने इकुनियुम कने लूखा दे शेहरां दे लोकां मिजो दिते कने मैं उना दुखां जो कियां झेलया, पर प्रभुऐ मिजो इना ला छुड़ाई लिया। 12 जितणे भी लोक परमेस्वर जो खुश करणा चांदे न कने यीशु मसीह पर भरोसा करदे न, उना सारयां जो दुख कने पेशानियां झेलणियां पोणियां। 13 पर बुरे लोकां कने धोखा देणेबाले लोकां होर भी जादे बुरे कम्म करणे, उना लोकां जो धोखा देणा कने उना अपु भी होर लोकां ला धोखा खाणा। 14 पर हे तीमुथियुस, उना गल्लां पर जडियां तू मिजो ला सिखियां न, कने जिना पर तू भरोसा किता है, इना जो तू लगातार भरोसे ने मनदा रे। क्योंकि तू जाणदा है की तिजो ऐ सच्चियां कुनी सिखाईयां न। 15 तालू ला जालू तू इक छोटा बच्चा था, तू पबित्र शास्त्र जो सिखया है, जडा तिजो ऐ समझणे च सहायता करदा है कि जालू तू यीशु मसीह पर भरोसा करदा है तां परमेस्वर तिजो बचांदा है। 16 सारा पबित्र शास्त्र सै बचन है जिसयो परमेस्वरे अपने पबित्र लोकां दे मने च पाया कने उना इस बचने जो इस तांई लिखया है, ताकि असां इदा इस्तेमाल लोकां जो सच्चि शिक्षा सिखाणे, कने जडे लोक गलत करदे न उना जो समझाणे, कने लोकां जो दसणे तांई की कियां अच्छी जिन्दगी जि सकदे न, 17 ताकि परमेस्वरे दे लोक तैयार होइ जान कने हर इक भले कम्म करणे दे काबिल होइ जान।

4 जालू यीशु मसीहे राजे सांई राज करणा ओणा है, तालू उनी उना दोनों दा न्याय करणा है, जडे लोक जिन्दे न कने उना दा भी जडे मरी गियो न, इस तांई पिता परमेस्वरे कने प्रभु यीशु मसीहे जो गबाह मन्नी करी मैं तिजो आदेश दिन्दा है। 2 की हर तरा दे हालातां च तू परमेस्वर दे बचना दा प्रचार करणे तांई तैयार रे, चाहे हालत अच्छे होन या हालात बुरे होन, तिजो लोकां जो दसणा है की उना क्या गलत किता, कने उना दे पांया तांई उना जो समझा, पर तिजो उना लोकां जो उत्साहित भी करणा है, जालू तू उना जो सबर ने सिखांदा है। 3 क्योंकि ऐसा बकत भी ओणा, की जालू लोकां सच्चिया शिक्षा जो नी मनणा है, पर उना अपनी ही इच्छा दे अनुसार चलणा, कने उना ऐसे होर मते गुरूआं जो तोपणा है, जडे सेई सिखांदे न जडा सै सुणना चांदे न। 4 ऐसे लोक परमेस्वरे दिया सच्चियां जो सुणना नी चांदे पर उना झूठ कने माणुआं दी बणी बणाईयां कहाणियां ही सुणनियां न। 5 पर तू सारियां गल्लां च शांत कने साबधान रे चाहे तिजो दुख तकलिफां जो झेलणा पोऐ, कने शुभसमाचारे दे प्रचार तांई मेहनत कर, कने परमेस्वरे दा सेवक होणे दे नाते न तू सै सारे कम्म करणे न जडे तिजो दितयो न। 6 मैं ऐ हुकम इस तांई दिन्दा है, क्योंकि परमेस्वरे तांई मेरी जिन्दगी कने मेरे कम्म करणे दी ताकत घटा दी है, क्योंकि मैं जाणदा है मैं जल्दी मरणे बाला है। 7 जियां इक सच्चा सिपाई लडाईया बकते हार नी मनदा तियां ही मैं भी कदी मसीह तांई मेहनत करणे ला हार नी मन्नी, मैं उना सारे कम्मा जो पूरा किता जडे यीशु मसीहे मिजो करणे जो दिते, मैं आखरी दीकर बफादार रिया। 8 प्रभु यीशु मसीहे मिजो धार्मिकता दा ताज देणा, जडा सच्चा न्याय करदा है, कने ऐ इनाम मिजो उस रोज मिलणा जालू उनी दुबारा मुडी ओणा है, कने ऐ इनाम सिर्फ मिजो ही नी पर उना सारे लोकां जो मिलणा है जडे चांदे न की यीशु मसीह दुबारा मुडी ओऐ। 9 तीमुथियुस, तू मेरे बाल जल्दी ओणे दी कोशिश कर। 10 क्योंकि देमास उना चीजां ने प्यार करदा है जडियां इस संसारे दियां न, कने मिजो छडी करी थिस्सलूनीके शेहरे जो चली गिया है, भाई क्रेसकेस गलातिया प्रदेशे जो कने भाई तीतुस दलमतिया शेहरे जो चली गिया है। (aiōn g165) 11 सिर्फ लूका मेरे सोगी है, कने जालू तू ओंगा तालू मरकुस जो सोगी लेई ओयां; क्योंकि सै मेरी सेबकाई तांई बडे कम्मे दा बन्दा है। 12

तुखिकुस जो मैं इफिसुस शेहरे च भेजया है। 13 जालू तू ओगा, तां मेरा गर्म कोट लेई ओयां जडा मैं त्रोआस शेहरे च करपुस दे घरे छडी आया है, कने सोगी मेरी चिठिया जो लेई ओयां, खासकर उसा चिठिया जो जडी भेडा दी खली ने बणियो है। 14 सिकंदर जडा तांबे दे भांडे बणादा था, उनी मिजो बडे दुख दिते, प्रभुऐ उसयो उदे बुरे कम्मा दे अनुसार फल देणा। 15 तू भी अपने आपे जो उसला बचाई रख, क्योंकि उनी यीशु मसीह दिया शिक्षा दिया बजा ने साडा बडा बिरोध कितया है। 16 पैली बरी जालू मैं अपने बचाव तांई रोम शेहरे दी कचेरी च गिया, तां कोई भी मेरे सोगी नी था, कने सारे मिजो छडी गे, परमेस्वरे इना दे इस कम्मे जो इना दे खिलाफ ना गिणे, मैं प्राथना करदा है की परमेस्वर इना जो माफ करी दे। 17 पर प्रभुऐ मेरी सहायता कित्ती कने मिजो शक्ति दिती, ताकि मैं होर जाति दे लोकां जो, जडे उस बकत कचेरी च थे, उना जो प्रभु यीशु दा प्रचार साफ-साफ सुणाई सके; कने उनी मिजो मौत ला बचाई लिया। 18 कने प्रभुऐ मिजो हर इक बुरे कम्मा ला बचाणा, कने मिजो स्वर्ग दे राज्य च लेई जाणा है: कने उदी महिमा युगां-युगां दीकर होंदी रे। आमीनी। (aiōn g165) 19 प्रिस्का कने अक्विला जो, कने उनेसिफुस दे परिवार जो मेरा नमस्कार। 20 इरास्तुस कुरिन्थुस शेहरे च रेई गिया, कने मैं त्रुफिमस जो मिलेतुस शेहरे च छडी दिता क्योंकि सै बीमार था। 21 सर्दियां ला पेहेले ओणे दी कोशिश कर। युबलुस, कने पुर्देस, कने लीनुस कने क्लौदिया, कने सारे मसीह भाईयां दिया तरफा ला जडे ऐथू न तिजो नमस्कार। 22 मैं प्राथना करदा है की प्रभु तैरे सोगी कने उदा अनुग्रह भी तैरे सोगी रे।

तीतुस

1 मैं, पौलुस ए चिट्ठी तिजो लिखा दा है, मैं पिता परमेश्वरे दा सेवक कने यीशु मसीह दा प्रेरित है, मिजो परमेश्वरे दे चुणयो लोकां दे भरोसे जो मजबूत करणे कने उना जो सच्ची शिक्षा जो जाणने च सहायता करणे तांई चुणया है। ताकि सै ऐसी जिन्दगी जीन जडी परमेश्वरे जो खुश करदी हो। 2 जिदी बजा ने सै परमेश्वरे सोगी हमेशा दी जिन्दगीया दी आस रखन, क्योंकि परमेश्वर जडा कदी झूठ नी बोलदा है। उनी ही संसार बणने ला पेहले दे बायदा कितया की परमेश्वरे दे लोकां जो हमेशा दी जिन्दगी मिलणी है। (aiōnios g166) 3 पर हण बिलकुल सही बकते च, परमेश्वरे दे शुभसमाचार सांझो पर प्रगट किता, कने असां सबना जो इदा प्रचार करदे न, साडे उद्धारकर्ता परमेश्वरे मिजो ऐ जिम्मेदारी दिती की मैं उदे तांई ऐ कम्म करी सके। 4 मैं चिट्ठी तीतुस जो लिखा दा है, तू मेरे अपने पुत्रे सांई है क्योंकि तू मसीह पर भरोसा करदा है जियां मैं करदा है: मैं प्रार्थना करदा है की पिता परमेश्वर कने साडे उद्धारकर्ता मसीह यीशु तिजो हमेशा अनुग्रह, दया कने शांति दिन्दा रे। 5 मैं इस तांई तिजो क्रेते टापू च छडी आया था, ताकि तू ओथु पर साडे बचयो कम्मा जो पूरा करी सके, कने क्रेते टापू दे हर इक शेरहे च अणुओ जो नियुक्त करे, जियां करणे तांई तिजो मैं हुकम दितया है। 6 इक अगुवे जो निर्दोष, कने अपणी घरे बालिया ला बफादार, सेहनशील, जिना दे बच्चे भरोसा करणे बाले होन, कने शरीर दी इच्छा पर नी चलणे बाले हो, कने माता-पिता दी इज्जत करणे बाले होन। 7 क्योंकि अगुवे जो परमेश्वरे दा भंडारी होणे दिया बजा ला निर्दोष होणा चाईदा। ना हठी, ना गुस्से बाला, ना शराबी, ना मारकुटाई बाला, कने पैसे दा लालची हो। 8 पर परोण्यां दी इज्जत करणे बाला हो, भलाई ने प्यार करणे बाला हो, अपने उपर सयम रखणे बाला हो, धर्मी हो, पबित्र हो, समझदार हो; 9 कने उसयो यीशु मसीह दे बारे च भरोसे दे काबिल संदेश पर मजबूतिया ला भरोसा करणा चाईदा, जडा असां उसयो सिखाया है, ताकि सै दुज्जयां जो सही शिक्षा मणणे तांई उत्साहित करी सके कने उना दियां गलतियां जो सही करी सके। 10 मैं ऐसा इस तांई बोलदा है, क्योंकि मते लोक सही शिक्षा दा बिरोध करदे न, जडे बकवास करदे, कने दुज्जयां जो धोखा दिन्दे न। खासकर यहूदी लोक जडे विस्वासी बणी गियो न कने उद्धार तांई खतना करणे पर जोर दिन्दे न। 11 तिजो इना लोकां जो शिक्षा देणे ला रोकणा चाईदा क्योंकि जालू सै ऐसी शिक्षा दिन्दे न, तां मतायां परिबारां दा भरोसा खत्म होई जांदा है, सै ऐ कम्म सिर्फ पैसा कमाणे तांई करदे न। 12 उना चे ही इकी माणुंए जडा क्रेते टापू ला है, जिसयो सै अकलमंद माणु मंदे न, उनी ही बोलया है, “क्रेते टापू दे लोक हमेशा झूठ बोलदे न, सै डंगरा सांई बर्ताब करदे न, कने आलसी कने खान्दू लोक न” 13 ऐ गल्लां क्रेते टापू दे लोकां तांई अज भी सच्च न, इस तांई उना जो सकती ने चेतावनी दिया कर की सै यीशु मसीह दी शिक्षा पर भरोसा करन। 14 कने सै यहूदियां दी झूठी शिक्षा कने झूठी कहाणियां पर कने इना माणुआं दे हुकमा पर मन न लगान, जडियां सच्च दी शिक्षा ला भटकदियां न। 15 ऐसे लोक जिना दे मना च बुरे बिचार नी न, उना तांई सारियां चीजां शूद्र न, पर सै लोक जडे बुरे न कने यीशु मसीह पर भरोसा नी करदे, कने ना ही कोई अच्छा कम्म करदे न क्योंकि उना दे दिल कने दिमाग दोनो ही पुरे गंदे होई गियो न। 16 ऐ झूठे शिक्षक बोलदे न की असां परमेश्वरे जो जाणदे न, पर इना दे कम्मा कने चाल चलन ने पता लगदा है, की ऐ यीशु मसीह जो नी जाणदे न, क्योंकि सै नफरता ने भस्यो होया न कने आज्ञा नी मणने बाले न, कने कुसी भी खरे कम्म करणे दे काबिल नी न।

2 पर तीतुस तिजो भरोसा करणे बालयां जो सेई सिखाणा है, जडा यीशु मसीह दी शिक्षा ने सहमत है। 2 बजुर्ग मर्द अपने उपर काबू रखणेबाले होन, दुज्जयां ने ऐसा बर्ताब करणे बाले होन की लोक इना दी इज्जत करन, इना दा भरोसा प्रभु पर मजबूत हो, कने दुज्जयां ने प्यार करणे बाला कने सबर रखणे बाला होन। 3 कने इयां ही बजुर्ग जनानिया दे चाल चलन कने जडा सै करदियां न उसला प्रभु जो इज्जत मान मिलले, दोष नी लागे बालियां होन, कने शराबी नी होन, कने दुज्जयां जो खरियां गल्लां सिखाणे बालियां होन। 4 ताकि सै जवान जनानिया तांई इक अच्छी मिसाल बणन, कने उना जो अपने घरे बालयां कने अपने बचयां सोगी प्यार करणे दी सलाह देन, 5 कने अपने उपर काबू रखणे बाली हो, अपने घरे बाले ला बफादार हो, घर परिबार जो सम्भालने बाली होन, कने अपने-अपने घरे

बालयां दे अधीन रेणे बालियां होन, ताकि परमेश्वरे दे बचने दी बुराई नी होई सके। 6 इयां ही जवान मर्दो जो भी समझाया कर, की सै अच्छे ने बर्ताब करन। 7 सारियां गल्लां च तू अपने आपे जो दुज्जयां तांई आदर्श बणा, ताकि सै भी इयां ही करन; कने जालू तू भरोसा करणे बालयां जो यीशु मसीह दे बारे च शिक्षा दे, तां तेरा सिखाणे दा मकसद अच्छा हो, ताकि लोक तिजो होर इज्जत देन, 8 कने तेरिया शिक्षा च ऐसी सच्चाई होणी चाईदी, की कोई भी उसा जो बुरा नी बोली सके, ताकि साडे बिरोधी शर्मिंदा होन क्योंकि कुछ भी बुरा नी होणा, जडा की सै साडे खिलाफ कुछ बोली सकन। 9 जडे दास गुलाम न उना जो सिखा की अपने-अपने मालिकां दी गल्ल मन्ना, कने उना जो ऐसा करणे तांई बोला जडा मालिकां जो खुश करे, कने मालिक उना दी शिकायत ना करन; 10 चोरी चलाकी ना करन, पर अपने आप जो साबित करा की इमानदार न, की लोक उना दा अच्छा बर्ताब दिखीकरी कने सै जडा कुछ भी करदे न, उसला लोकां जो परमेश्वरे दे बारे च संदेश सुणने दी इच्छा होणी। 11 क्योंकि परमेश्वरे अपना अनुग्रह किता, कने साडे तांई इक रस्ता कडया, ताकि सारे लोक उद्धार पाई सकन। 12 कने इस अनुग्रह ला परमेश्वरे सांझो सिखाया की, उस तरीके ला बर्ताब करणा बंद करा जडा परमेश्वरे जो खुश नी करदा, कने उना चीजां दा लालच करणा बंद करी दिया जिना दी इच्छा भरोसा नी करणे बाले लोक करदे न, कने असां हले दीकर इसा धरती पर ही न तां बुद्धिमानी ला कने धार्मिकता सोगी इस तरीके ला कम्म करा जडे परमेश्वरे जो खुश करदे न। (aiōn g165) 13 असां ऐसा बर्ताब करदे न, जालू असां उम्मीद कने उस महान दिने दी निश्चल रखदे न, जिस दिन साडे महान परमेश्वरे कने उद्धारकर्ता यीशु मसीह दुबारा मुडी करी इसा धरती पर ओणा है। 14 यीशु मसीह साडे फायदे तांई मरी गिया, ताकि सांझो सारे पापां ला अजाद करे कने शूद्र करी सके ताकि असां उदे बडे खास लोक बणी जान। जडे भले कम्म करणे तांई पुरे तन मन ला समर्पित होन। 15 इस तांई तीतुस, मैं चांदा की तू ओथु दे भरोसा करणे बालयां जो इना गल्लां दे बारे च सिखा जडियां मैं तिजो दरियां न। कने लोकां जो इना गल्लां जो करणे तांई प्रोत्साहित कर, जिथु जरूरी हो ओथु उना जो सही कर, तिजो ऐसा करणे दा पूरा हक है, पक्का कर की तू जडा सिखांदा है, उसयो कोई भी तुच्छ नी समझे।

3 मसीह पर भरोसा करणे बालयां लोकां जो याद दिलांदा रे, की हाकिमां कने अधिकारियां दे अधीन रिया, कने उना दी गल्ल मन्ना कने इज्जत करा, कने हर इक खरे कम्मे तांई तैयार रिया, 2 सै कुसी जो भी बदनाम ना करन, लडाई झगडे करणे बाले ना होन, पर दयालू सभावे दे होन, कने सारे लोकां सोगी बडे प्यारे ने रेन। 3 क्योंकि असां यीशु मसीह पर भरोसा करणे ला पेहले मुर्ख कने परमेश्वरे दे हुकम नी मणणे बाले थे, कने लोकां ला धोखा खाणे बाले थे, असां बुरियां इच्छा कने संसारे दियां चीजां दे गुलाम थे, कने जलन करी के जिन्दगी कटदे थे, कने लोकां ला नफरत कने इक दुज्जे सोगी दुशमणी रखदे थे। 4 पर फिरी भी साडे उद्धारकर्ता परमेश्वरे अपणी दया कने प्यार सांझो लोकां पर दर्सी। 5 तां उनी सांझो साडे पापां दी सजा ला बचाया कने ऐ धर्म दे कम्मा दिया बजा ने नी, जडे असां अपु किते, पर उनी अपणी दया दे अनुसार, उनी साडे पापां जो धोई करी दूर किता, कने पबित्र आत्मा ला सांझो नोआ सभाव कने नोई जिन्दगी दिती है। 6 साडे उद्धारकर्ता प्रभु यीशु मसीह जडा किता उदे जरिये परमेश्वरे सांझो पबित्र आत्मा दितया है, ताकि सै सांझो च सामर्थ बाले कम्म करी सके। 7 जिसने असां उस हमेशा दी जिन्दगी दी आस रखी सकन जडी परमेश्वरे सांझो अपणी ओलाद दे स्पे च देणे दा बायदा कितया है। कने उदे बारे च असां जाणी सकदे न क्योंकि परमेश्वरे अपने अनुग्रह दे जरिये सांझो अपने सोगी सही बणया है। (aiōnios g166) 8 ऐ गल्ल सच्ची है, जडी मैं हणी दर्सी है कने मैं चांदा है, की तू भरोसा करणे बालयां जो इना गल्लां दे बारे च मजबूती ने सिखा। इस तांई की जिना परमेश्वरे पर भरोसा रखया है, सै खरे-खरे कम्मा जो करणे च अपना बकत देणे च ध्यान लगान, ऐ गल्लां सारयां तांई खरियां न, कने फायदेमंद न। 9 पर मुर्ख गल्लां दी बेहसा ला दूर रिया, पूर्वजां दी लम्बियां सूचियां पर अपना बकत बर्बाद मत करा, कने बैर बिरोध, कने उना झगडयां ला बची के रिया जडे मूसा दे नियमा दे बारे च न, क्योंकि इना गल्लां दा कोई फायदा नी है। 10 जडे लोक कलीसिया च फूट पादे न, तिजो उना लोकां जो कम्म से कम्म दो बरी चेतावनी देणी चाईदी, की सै ऐसा करणा बंद करी देन। उदे बाद उना पर होर बकत बर्बाद

मत करदे कने उना ला दूर रेणा चाईदा। 11 तुसां ऐ पक्का करी लिया की ऐसा माणु जड़ा जाणी बुझी करी बुरे रस्ते पर चलदा है, तां उदे खुद दे बुरे कम्म ही साबित करदे न की सै दोषी है। 12 जालू मैं तेरे बाल क्रेते टापू पर अरतिमास कने तुखिक्कस जो भेजगा, तालू तू मेरे बाल निकुपुलिस शहर औणे दी कोशिश करयां, क्योंकि मैं ओथु ही सर्दियां कटणे दी सोचियो है। 13 जालू जेनास व्यवस्था जो सिखाणे बाला कने अपुल्लोस अपणी यात्रा तांई निकलगे, तां इना दी सहायता करणे तांई जड़ा कुछ तू करी सकदा है, सै तू करयां। कने ऐ ध्यान रखयां की उना जो कुसी भी चीजा दी कमी ना हो। 14 सिर्फ इतणा ही नी, पर तिजो भरोसा करणे बालयां जो सिखांदे भी रेणा चाईदा की भले कम्म करणे तांई लगातार मेहनत करदे रिया, ताकि उना लोकां दियां जरतां पुरियां होई सकन जिना बाल कुछ नी है, ऐ भरोसा करणे बालयां दी सहायता करदा है की, सारे इक ही मकसद ने जिन्दगी जी सकन। 15 मेरे सोगी ऐथू दे सारे भरोसा करणे बाले तिजो नमस्कार करदे न। ओथु क्रेते टापू च साडे भरोसा करणे बाले साथियां जो जडे सांझो ने प्यार करदे न, उना जो भी मेरी तरफा ला नमस्ते बोलयां। मैं प्राथना करदा है की, प्रभु तुसां सारयां पर अनुग्रह करे।

फिलेमोन

1 मैं, पौलुस इसा चिठिया जो लिखा दा है। मैं यीशु मसीह दिया सेबा ताई जेला च बन्द है। मैं कने साडा मसीह भाई, तीमुथियुस तुहांजो नमस्कार करदे न। कने मैं ऐ साडे प्यारे मित्र कने सोगी कम्म करणे बाले फिलेमोन जो लिखा दा है। 2 कने मैं साडी मसीह बेहण अफफिया कने मसीह भाई अरखिप्पुस, जडा योधा साई परमेश्वरे दी सेबा करदा है कने उसा कलीसिया दे ना जडी तहाडे घरे गिठी होंदी है उसा जो भी लिखा दा है। 3 मैं प्राथना करदा है की साडे पिता परमेश्वर कने प्रभु मसीह यीशु दिया तरफा ला तुहांजो अनुग्रह कने शांति मिलदी रे। 4 क्योंकि मैं जालू भी तिजो ताई प्राथना करदा है, मैं हमेशा तरे ताई परमेश्वरे दा धन्यवाद करदा है कने अपनी प्राथना च भी तिजो याद करदा है। 5 मैं प्रभु यीशु मसीह च तरे भरोसे दी कने परमेश्वर दे सारे लोकां ताई तरे प्यार दी चर्चा सुणदा है। 6 मैं प्राथना करदा है की तू अपने भरोसे च मजबूत होई जाऐ कने उना सारी अच्छी चिजां जो समझी सके जिना जो परमेश्वरे सांझो दितया है, इसी बजा ने लोकां मसीह दी महिमा करणी है। 7 क्योंकि हे मसीह भाईयो, तुहाडी इक दुज्जे ताई प्यारे दी भावना ने मैं बडा खुश है कने उत्साहित है, इस ताई की तरे जरिये परमेश्वरे दे लोक उत्साहित न। 8 इसा बजा ला मैं तिजो मसीह च इक भरोसा करणे बाला होणे दे नाते खरे कम्म करणे ताई बडे हके सोगी हुकम देई सकदा है। मैं बजुरां पौलुस, जडा हण यीशु मसीह दी सेबा करणे दिया बजा ला इक केदी भी है, फिर भी तिजो बडे प्यार ला बिनती करदा है। 10 मैं उनेसिमस ताई बिनती करदा है, जडा मेरे ताई पुत्रे साई है। जालू सै जेला च था तालू सै मसीह च मेरा पुत्र बणी गया। 11 सै तां पेहले तरे कुसी कम्मे दा नी था, पर हण तरे कने मेरे दोनो ताई बडे कम्मं दा है। 12 चाहे मैं उनेसिमस सोगी बडा प्यार करदा है, पर मैं उसयो तुहाडे बाल भेजा दा है। 13 मैं उसयो अपनी मदद ताई अपने बाल ही रखणा चांदा था, जबकि मैं शभसमाचारे दा प्रचार करणे ताई जेला च था। सै ऐथू मेरी मदद करणे ताई है तेरी जगा लेई सकदा है, क्योंकि मिंजो पता है की तू मेरी मदद करणा चांदा है। 14 अगर तू सेहमत नी है तां मैं उसयो ऐथू नी रखगा, मैं चांदा है की तू अपणिया खुशिया ला मेरी मदद करे क्योंकि इस ताई नी की मैं तिजो ऐ करणे ताई मजबूर किता है। 15 शायद ऐई बजा है की परमेश्वरे उनेसिमस जो थोडे बकते ताई तिजो ला दूर जाणे दा हुकम दिता ताकि सै मसीह पर भरोसा करे, इसा बजा ला तू उसयो अपने बाल रखणा है। (aiōnios g166) 16 तू उसयो दास ना समझन पर सै दास ला भी बदीकरी है, सै हण विन्वासी साथी है कने प्यारा भी है कने तुहांजो उसयो होर भी जादा प्यार करणा है, कने मैं उसयो बडा प्यार करदा है, पर तिजो उसयो दासे दे स्मे च होर भी जादा प्यार करणा चाईदा क्योंकि सै मसीह च इक भाई है। 17 अगर तू मिंजो अपना साथी समझदा है, जालू उनेसिमस बापस तरे बाल ओगा तां उदा खुशिया ला स्वागत करयां जियां मेरा स्वागत करदे न। 18 अगर उनी तेरा कुछ नुक्सान कितया या उस पर तेरा कोई कर्ज है तां उसयो मेरे नां लिखी दे। 19 मैं पौलुस अपने हथे ने लिखदा है की मैं उदा कर्ज भरी दिगा; हालांकि तुसां पेहले ला ही जाणदे न की, अगर मैं तुहाडी मदद नी कितियो होंदी तां तुहांजो खुद नोई जिन्दगी नी मिलियो होंदी इस ताई तुसां अपनी जिन्दगी ताई मेरे कर्जदार न। 20 मेरे प्यारे मित्र, ऐ खुशी मिंजो प्रभु च तेरिया तरफा ला मिल्ले, कने इक साथी विन्वासी दे स्मे च मिंजो उत्साहित करे। 21 जियां की मैं तुहांजो लिखया है, मिंजो यकीन है की तुसां तियां ही करणा जियां मैं करणे जो बोलया। मिंजो पता है की उसला भी बदीकरी करणा जितणा मैं तुहांजो बोलया। 22 इक होर गल्ल कने मेरे ताई अपने घरे च इक कमरा तैयार करा क्योंकि मैं उम्मीद करदा है की परमेश्वरे तुहाडी प्राथना दा जबाब देणा की मैं दुबारा तुहाडे बाल ओऐ कने मिली सके। 23 इपफ्रास, जडा यीशु मसीह दा प्रचार करणे दिया बजा ला मेरे सोगी जेला च है कने मसीह च तुहांजो नमस्कार करदा है। 24 कने मरकुस, अरिस्तार्कुस, देमास, लुका जडे मेरे सोगी प्रभु दा कम्म करदे न, इना दी तरफा ला तुहांजो नमस्कार। 25 मैं प्राथना करदा है की साडा प्रभु यीशु मसीह तुहांजो पर अनुग्रह करे। आमीन।

इब्रानिया

1 परमेश्वरे पराणे जमाने च परमेश्वरे दे संदेश देणेबालयां दे जरिये बडी बरी बडे तरिक्यां ला साडे पूर्वजां सोगी गल्लां कितियां, 2 पर इना आखरी रोजां च परमेश्वरे साडे सोगी अपने पुत्रे जरिये गल्लां कितियां, परमेश्वरे अपने पुत्रे जरिये सारियां चीजां जो बणाया कने उसयो सारे संसारे दा बारिस बणाया। (aiōn q165) 3 पुत्र ही परमेश्वरे दी महिमा दी लौ, कने बिलकुल उडे सांई ही है, कने अपने शक्तिशाली बचना ला सारे संसारे जो चलतां है। उनी लोकां जो उना दे पापां ला शूद्र किता, कने इदे बाद स्वर्गे च महिमामय परमेश्वरे दे सजे पासे जाई बैठौ। 4 इस तांई परमेश्वरे अपने पुत्रे जो ऐसा ना दिता जडा स्वर्गदत्तां ला जादा महान है, इसला सांझो पता चलदा है की पुत्र उना ला कितणा जादा महान है। 5 क्योंकि पबित्र शास्त्र च ऐ कुश्रु भी नी लिखिया है की परमेश्वरे अपने कुसी स्वर्गदूते ला ऐसा कदी नी बोलया जडा उनी अपने पुत्रे ने बोलया, “तू मेरा पुत्र है; अज मैं घोषणा करता है की तू मेरा पुत्र है।” कने उनी फिरी कदी भी कुसी स्वर्गदूते ने ऐ नी बोलया की, “मैं तेरा पिता होणा, कने तू मेरा पुत्र होणा।” 6 परमेश्वरे अपने बडे महान पुत्रे जो संसारे च भेजणे ला पेहले बोलया की, “उदे सारे स्वर्गदूत उसयो अराधना करना।” 7 कने स्वर्गदत्तां दे बारे च ऐ बोलदा है, “परमेश्वर अपने स्वर्गदत्तां जो होआ सांई बणादां है, कने अपने सेवकां जो बलदी अग्गी सांई बणादा है।” 8 पर पुत्रे दे बारे च बोलदा है, “हे परमेश्वर तेरा राज युगां-युगां दीकर बणी रेणा तू लोकां पर न्याय ला राज करणा। (aiōn q165) 9 तू भले कम्मा ला प्यार कने पाप दे कम्मा ला दुश्मणी रखी; इसी तांई तुहाडे परमेश्वरे, तेरे साथियां बीचे ला तुहांजो चुणया, कने बडिया खुशिया ला उना ला लग करिरी नियुक्त कितया।” 10 पबित्र शास्त्र ऐ भी बोलदा है की, “शुरूआत च तू धरती जो बणाया, कने तू सै सब कुछ भी बणाया जडा अम्बरे च है। 11 इना तां सारयां खत्म होई जाणा; पर तू युगां-युगां दीकर बणी रेणा; कने उना सारयां कण्डयां सांई पुराणे होई जाणा। 12 कने तू उना जो चादरा सांई बटोलणा, कने उना जो कण्डयां सांई बदलणा: पर तू हमेशा इकोदिया रेणा कने तू हमेशा जिन्दा रेणा।” 13 कने परमेश्वरे कदी कुसी स्वर्गदूते जो ऐसा नी बोलया, “जालू दीकर मैं तेरे सारे दुश्मण जो हराई ना दे, तालू दीकर तू मेरे सजे पासे बैठी रे कने इज्जत ले।” 14 तां स्वर्गदत्तां दा क्या कम्म है? सै सिर्फ परमेश्वरे दे सेवक न, कने परमेश्वर उना जो उना लोकां दी देखभाल करणे तांई भेजदा है, जिना दा उद्धार होणा है।

2 इस तांई, जरूरी है की असां जडियां गल्लां सिखियां न, उना जो मनणे पर जादा ध्यान देन, तां असां सच्चाईया ला नी भटकणा। 2 क्योंकि जडी व्यवस्था स्वर्गदत्तां दे जरिये बोलियो थी, सै हमेशा सच्च साबित होई, कने जडे इसा व्यवस्था जो नी मंदे थे, उना जो परमेश्वरे ला सजा मिलदी थी। 3 तां सांझो भी सजा मिलणी, अगर असां इस महान उद्गारे जो नी मनणे। कने इस उद्धार दे बारे च सारयां ला पेहले प्रभुरे अपु बोलया था, कने जिना लोकां इस उद्गारे दे संदेश दे बारे च सणया उना सांझो साबित किता की ये सच्चा है। 4 कने जालू भी परमेश्वरे दी इच्छा होई तालू उनी चिन्न कने लग-लग चमत्कारां जरिये कने पबित्र आत्मा दे जरिये लोकां जो बरदान देईकरी इस उद्धार दे संदेश जो साबित किता है। 5 परमेश्वरे उस ओणे बाले संसार जो जिदे बारे च असां बोला दे न, अपने स्वर्गदत्तां दे अधीन नी कितया पर अपने पुत्र यीशु मसीह दे अधीन कितया है। 6 पर पबित्र शास्त्र च कुथी ऐ लिखिया है की, माणु क्या न, की परमेश्वर तू उदी चिंता करता है या देखभाल करता है? सै माणुऐ ला जादा होर कुछ नी है। 7 तू उसयो स्वर्गदत्तां ला घट शक्ति दितियो है; तू उसयो राजे सांई महिमा कने इज्जत दित्ती कने उसयो अपने हथां दे कम्मा पर हक दिता। 8 तू सारियां चीजां पर उसयो हक दिता ताकि सै सारयां पर राज करे, इस तांई ऐसा लगदा है की परमेश्वरे सारा कुछ माणुऐ दे बशे च करी दितया है। मतलब की ऐसा कुछ नी है, जडा उदे काबू च ना हो। पर असां दिखी सकंदे न, की हले दीकर भी सारा कुछ माणुऐ दे बशे च नी है। 9 पर असां यीशुऐ जो दिखदे न! उसयो थोडे बक्ते तांई स्वर्गदत्तां ला घट दर्जा दितया था, ताकि परमेश्वरे दे अनुग्रह ला सै सारे लोकां तांई मरी जाए। इस तांई उनी दूख झेले कने मरी गिया कने परमेश्वरे उसयो महिमा कने इज्जत दित्ती। 10 परमेश्वरे सारा कुछ बणाया कने सारियां चीजां जो अपने तांई सम्भाली रख्या है। इसा बजा ला, की लोकां जो अपनी महिमा च हिस्सेदार बणाए, परमेश्वरे ऐ फेसला लिया की, ऐ

सही होणा की प्रभु यीशु मसीह दुख झेली करी इक ऐसा माणु बणी जाए जडा चरित्र च सिद्ध है। क्योंकि यीशु ही है जडा उना दा उद्धार करी सकदा है। 11 क्योंकि सै जडा लोकां दे पापां जो माफ करता है, कने सै जिना दे पाप माफ होंदे न, उना दोना दा पिता इक ही है, इसा बजा ला यीशु उना जो भाई कने बेहण बोलणे ला नी शरमांदा। 12 कने इदे बारे च यीशु मसीह परमेश्वरे ला बोलदा है, “मैं अपने मसीही भाईयां जो दसणा की तू मेरे तांई कितणे खरे कम्म किते, कने जालू सै तेरी अराधना करणे तांई गिठे होंगे तालू मैं तेरी महिमा उना सारे लोकां बिच करणा।” 13 सै दुबारा बोलदा है की, “मैं परमेश्वरे पर भरोसा रखणा।” कने सै दुबारा बोलदा है की, “मैं उना लोकां सोगी है जिना जो परमेश्वरे मिंजो दितया है।” 14 क्योंकि परमेश्वरे दे बच्चे माणु न, मतलब की जडे मास कने खने दे बणयो न, कने पुत्र भी इक माणु बणी गिया, क्योंकि इक माणु बणी की ही सै मरी सकदा था, कने मरणे जरिये ही सै शैतान जो हराई सकदा था, जिदे बाल मौत दी शक्ति है, 15 कने इस तरीके ला प्रभु यीशुऐ उना सारयां जो अजाद करी दिता जडे अपनी पूरी जिन्दगी मौत दे डरे च होईकरी गुलामा सांई जी दे थे। 16 क्योंकि प्रभु यीशु तां स्वर्गदत्तां जो नी बल्कि अब्राहम दे वंशा दी सहायता करता है। 17 इस बजा ला उस तांई जरूरी था की, यीशु हर तरीके ला बिलकुल साडे सांई बणी जाए, कने इस तरीके ला सै परमेश्वरे दा सच्चा कने दयालु महायाजक बणाया। कने जडा बलिदान सै उना तांई करता है ताकि उदे जरिये लोकां जो उना दे पापां ला माफी मिल्ली सके। 18 क्योंकि यीशु मसीह मुशकिलां कने दुखां जो सेहन किता इस तांई सै उना लोकां दी सहायता करी सकदा है जडे मुशकिलां कने दुखां जो सेहन करा दे न।

3 इस तांई हे मसीह भाईयो जडे परमेश्वरे ला रिशता रखदे न, तुहांजो स्वर्ग दी जिन्दगिया च हिस्सेदार बणने तांई सदया है। यीशु मसीह पर ध्यान दिया जिसयो असां मंदे न, जडा साडे तांई परमेश्वरे दे शुभसमाचार दा दूत कने महायाजक है। 2 यीशु मसीह सै सारा कुछ किता जडा परमेश्वरे उसयो करणे तांई बोलया, बिलकुल तियां ही जियां मूसा परमेश्वरे दे परिबारे दे सारे लोकां दी सेवा करणे च भरोसे दे लायक था। 3 घर बणाणे बाले जो घरे ला जादा इज्जत मिलदी है। इयां ही यीशु मूसा ला जादा आदर दे काबिल है। 4 क्योंकि हर इक घरे जो बणाणे बाला कोई न कोई होंदा है, पर जिनी सब कुछ बणाया है सै परमेश्वर है। 5 मूसा परमेश्वरे दे परिबारे दे सारे लोकां दी सेवा करणे च भरोसे दे लायक रिया। जडा मूसे किता सै उना गल्लां पासे इशारा करा दा था, जडा परमेश्वर बादे च बोलणे बाला था। 6 पर मसीह इक पुत्रे सांई परमेश्वरे दे परिबारे दे लोकां च भरोसे दे लायक है, अगर असां अपनी हिम्मत कने उस आसा पर मजबूतिया ला आखरी दीकर टिकी रेंदे न, तां असां परमेश्वरे दे लोक न। 7 जियां पबित्र आत्मा पबित्र शास्त्र च बोलदी है, “अज जालू तुसां परमेश्वरे जो बोलदे सुणदे न, 8 तां तुसां उदे हुकम मनणे ला मना मत करदे, जियां तुसां दे पूर्वजां सुनसान जगा च परिक्षा बेले परमेश्वरे दे खिलाफ किता।” 9 ओशु तुहाडे पूर्वजां चालियां सालां दीकर मेरे महान कम्मा जो दिखणे बाद भी, चनूती देईकरी मिंजो परखया। 10 इसा बजा ला मैं उस बक्ते दे लोकां सोगी गुस्सा रिया, कने बोलया, हमेशा ही उना दा मन मिंजो ला दूर होई जांदा है, कने जडा करणे दा हुकम मैं दिता उसयो करणे ला मना करी दिता। 11 तालू मैं गुस्से च आई करी कसम खादी की, उना उस जगा च दाखल नी होणा जिथु मैं उना जो अराम देणा। 12 हे मसीह भाईयो, ध्यान रखा, की तुसां च कुसी दा पापी कने बेबसआसी मन ना हो, जिसने तुसां जिन्दगी देणेबाले परमेश्वरे जो मणगे ला मना करी देन। 13 तुसां इक दुज्जे जो हर रोज प्रोत्साहित करदे रिया, उणगे ना हो की पाप दे धोखे च आई करी तुहाडे मन ढीठ बणी जाए। इस तांई जालू दीकर असां “अज” बोली सकंदे न, तालू दीकर इक दुज्जे जो हर रोज प्रोत्साहित करदे रिया। 14 जडा भरोसा साडा मसीह जो अपनाणे दे बकत था, अगर असां अपने उस भरोसे च आखरी दिने दीकर हिम्मत सोगी टिकी रेंगे, तां असां मसीह सोगी हिस्सेदार बणी जाणा। 15 तियां ही जियां पबित्र शास्त्र च लिखया, “अगर अज तुसां परमेश्वरे दी अबाज सुणणे, तां तुसां मने च ढीठ मत बणदे, जियां तुहाडे पूर्वजां बणे च परमेश्वरे दा बिरोध किता था।” 16 भला सै कुण लोक न जिना परमेश्वरे दी अबाज सुणीकरी भी उसयो मनणे ला मना करी दिता? क्या सै ऐ लोक नी थे जिना जो मुसे मिस्र देशे ला बाहर कडया था? 17 कने परमेश्वर चालियां सालां दीकर कुना लोक न च गुस्सा रिया? ऐ इस्राएली ही थे जिना सुनसान जगा च पाप किता कने बणे च मरी सै। 18 कने परमेश्वरे कुना

लोकों सोगी कसम खादी थी, की तुसां उसा जगा च दाखल नी होणा जिथुं मै उना जो अराम देणा? सै पक्का उना लोकां दे बारे च बोला दा था जिना उदा हुकम नी मनया था। 19 सांझो पता चली गिया की, सै लोक भरोसा नी करणे दिया बजा ला उसा अराम दिया जगा च नी जाई सके।

4 परमेश्वरे बायदा कितया है की असां अरामे दिया जगा च जाणा, इस तांई अराम दिया जगा च जाणे दा बायदा अजे भी है, तां सांझो इसा गल्ला दा होर भी ध्यान रखणा चाईदा। तुसां च कुसी जो भी उस अराम बाली जगा पर जाणे दा मौका नी छडणा चाईदा। 2 क्योंकि जियां असां मसीह दे बारे च श्भसमाचार सुणया, इयां ही इस्राएल दे लोकां अराम दी जगा दा श्भसमाचार सुणया, पर उना भरोसा नी कित। इस तांई उना जो इस श्भसमाचार ला कोई फायदा नी होया। 3 असां परमेश्वरे दियां बोलियां गल्लां पर भरोसा कितया है, इस तांई असां अराम दिया जगा च दाखल होणा; जियां परमेश्वरे दुज्जयां तांई बोलया है, “मै गुसे च कसम खादी थी की उना मेरे अरामे बालिया जगा च दाखल नी होई सकणा।” पर परमेश्वरे ऐ इस तांई नी बोलया था की हले दीकर अराम दी जगा तयार नी थी, ऐ संसारे जो बग्ने ला पहले ही तैयार होई गियो थी। 4 क्योंकि सतमे रोजे दे बारे च पबित्र शास्त्र च इयां लिखया है, “परमेश्वरे सतमे रोजे अपने सारे कम्मा जो पूरे करिरी अराम कित।” 5 कने असां ऐ भी पढया की बादे च उनी बोलया, “उना मेरे अरामे दिया जगा च दाखल नी करी सकणा है।” 6 कने इस्राएल दे लोकां जिना सारयां ला पहले ऐ श्भसमाचार सुणयां, सै अराम दिया जगा च दाखल नी होई सके, क्योंकि उना परमेश्वरे दे हुकम नी मन्ने, पर बाकियां तांई अराम दिया जगा दा रस्ता हले दीकर खुलया है। 7 इस तांई परमेश्वरे अपने अराम दिया जगा च दुबारा दाखल होणे तांई इक होर बकत तय कित। कने सै बकत अज है। साडे पूर्वजां दे विद्रोह करणे दे केईयां सालां बाद, परमेश्वरे राजा दाऊद ला इना बचना जरियो बोलया, जडे पहले भी बोलयो थे की, “अगर अज तुसां परमेश्वरे दी अबाज सुणणे, तां तुसां अपने मने जो कठोर मत करदे।” 8 कने असां ऐ भी जाणदे न की परमेश्वरे जिस अराम दिया जगा दा बायदा कितया है, सै कनान नी है, जिथुं जाणे तांई यहोशुऐ उना दी अगुवाई किती थी। अगर ऐ कनान देश होंदा तां परमेश्वर बादे च ऐ नी बोलदा की इदे तांई इक होर बकत था। 9 परमेश्वरे दे लोकां तांई हुण भी इक जगा तैयार है, जिथुं सै पूरे तरीके ला अराम करी सकदे न। उना तियां ही अराम करणा है जियां परमेश्वरे सतमे रोजे अराम कित। 10 परमेश्वरे अपना कम्म पूरा करिरी अराम कित। कने सारे लोकां तांई ऐ इकोदिया है जडे परमेश्वरे बाल अराम करणा जांटे न। उना अपना कम्म पूरा करणे बाद अराम करणा। 11 इस तांई सांझो भी उस अराम बालिया जगा च दाखल होणे तांई जादा मेहनत करणी चाईदी। ऐसा न हो की कोई उना लोकां सांई परमेश्वरे दे हुकम नी मनणे दिया बजा ला उस अराम दिया जगा च दाखल नी होऐ। 12 क्योंकि परमेश्वरे दा बचन जिन्दा कने असरदार है, सै कुसी भी दोधारी तलवारा ला भी पेना है। जडा साडी आत्मा, प्राण, जोंडा जो कने गुरदयां जो बिनी दिन्दा है, कने सै मना दे बिचारां कने मने दी भावना जो जाणी लेंदा है। 13 परमेश्वरे दिया नजरा ला इस संसारे दा कोई भी माणु लुकया नी है, सांझो सारे कम्मा दा लेखा उसयो देणा पोणा है। उदे सामणे सारियां चीजां खुलियां कने प्राट न। 14 परमेश्वरे दा पुत्र यीशु जडा साडा सारयां दा महायाजक है, स्वर्ग च परमेश्वरे बाल चली गिया। इस तांई ओआ जिस भरोसे जो सारयां सामणे मनया था, उस भरोसे च असां मजबूतिया ला टिकी रें। 15 क्योंकि ऐ महायाजक जडा यीशु मसीह है, जडा साडियां हर इक कमजोरियां जो समझदा है। शैताने सै हर गल्ला च साडे सांई परखया, तमी उनी पाप नी कित। 16 इस तांई ओआ, असां बिना डरयो परमेश्वरे सामणे ओन, तालू परमेश्वरे सान्झो पर दया कने अनुग्रह करणा, कने जालू सांझो जरूरत होणी तालू उनी साडी सहायता करणी।

5 परमेश्वरे हर इक महायाजके जो इस्राएल दे लोकां च चुणया। सै लोकां दी भलाई तांई परमेश्वरे दिया तरफा ला कम्म करणे तांई चुणया जांदा है; सै इस तांई भेट कने बलि चढांदा है ताकि परमेश्वर लोकां दे पापां जो माफ करी दे। 2 इक माणु होणे दे नाते सै अपु भी केई सारियां चीजां च कमजोर है। इसा बजा ला सै मुख कने भटकणे बाले लोकां ला प्यारे ला निपटी सकदा है। 3 इक महायाजक होणे दे नाते उसयो अपने पापां जो कने लोकां दे पापां जो दूर करणे तांई बलियां चढाणियां चाईदियां। 4 कोई भी माणु अपु महायाजक होणे दी पदवी अपने उपर

नी लेई सकदा। जियां परमेश्वरे हास्ने जो पेहेले महायाजके दे स्पे च सदया कने चुणया था, तियां ही परमेश्वर दुज्जे महायाजकां जो सददा कने चुणदा है। 5 तियां ही मसीह भी अपु जो महायाजक बग्ने तांई चुणी करी अपु अपना आदर नी कित। पर परमेश्वरे यीशु मसीह जो ऐ बोली करी चुणया जडा उनी होर कुसी महायाजक जो कदी नी बोलया था, जडा की पबित्र शास्त्र च भजनकारे लिखया है, “तू मेरा पुत्र है, अज मै ऐ घोषणा करदा है की मै तेरा पिता है।” 6 इयां ही परमेश्वरे दुज्जिया जगा च दुबारा उसयो बोलया, “इयां ही जियां मलिकिसिदक इक याजक था, तियां ही तुमी हमेशा याजक बणी रेणा।” (aiōn g165) 7 जालू यीशु इस संसारे च जिन्दा था, तालू उनी जोंरे-जोंरे कने रोई-रोई के परमेश्वरे सामणे प्राथना कने बिनतियां कितियां जडा उसयो मौता ला बचाई सकदा था, कने इस बडे आदर कने अपने आपे जो परमेश्वरे जो सोपणे दिया बजा ला परमेश्वरे उदियां प्राथना कने बिनतियां सुणियां। 8 यीशु मसीह परमेश्वरे दा पुत्र होणे पर भी, उनी दुख सेहन करिरी सै करणा सीखी लिया जडा परमेश्वर उसला चांदा था। 9 परमेश्वरे मलिकिसिदक सांई उसयो इक महायाजक दी इज्जत दिती, कने उसयो सिद्ध बणाया कने सै उना सारयां लोकां तांई उद्धार दी बजा बणी गिया जडे उदे हुकमा जो मंटे थे। (aiōnios g166) 11 इदे बारे च बोलणे तांई बडियां सारियां गल्लां न, पर इना गल्लां जो समझणा बडा मुशकिल है, क्योंकि तुसां परमेश्वरे दा बचन सुणे च सुस्त होई गियो न। 12 तुसां इतणे लम्बे बकते ला भरोसा करदे न, तुहांजो तां हुण बाकियां जो सिखाणे बाला होणा चाईदा था। पर तुहांजो हले भी ऐसे माणुऐ दी जरूरत है जडा तुहांजो दुबारा नोपे रिरे ले ला परमेश्वरे दिया शिक्षा जो सिखाऐ। तुहांजो अनाज नी पर बचयां सांई दुधे दी जरूरत है। 13 क्योंकि जडे लोक दूध पिंदे न, सै उना बचयां सांई न जडे असल च परमेश्वरे दिया नजरा च सही जिन्दगी जिणे दे बारे च नी जाणदे न। 14 पर अनाजे दी रोटी उना तांई है जडे भरोसे च पक्के न, जिनी अपने अनुभव ला भले बुरे च फर्क करणा सीखी लिया है।

6 इस तांई जडा सारयां ला पहले असां मसीह दे बारे च सिखाया था, उना बुनियादी शिक्षां जो बार-बार दोहरादे मत रिया, कने हुण अगे बदीकरी उच्च शिक्षां दे बारे च सोच बिचार करा। बुनियादी शिक्षां सांई मत बणा, जियां की पाप करणा छडी देणे दे बारे च, परमेश्वरे पर भरोसा करणे दे बारे च, 2 कने बपतिस्मा देणे दे बारे च, कुसी पर हथ रखीकरी आशीष देणे दे बारे च, मरयां दा जिन्दा होणे दे बारे च, कने हमेशा दी सजा देणे दे बारे च कने आखरी न्याय दिया शिक्षा दी नीई दुबारा ला पाणे दी जरूरत नी है। (aiōnios g166) 3 कने अगर परमेश्वरे मौका दिता तां, मै तुहांजो उच्च शिक्षा दियां गल्लां सिखाणियां। 4 जिना अपना भरोसा गवाई दितया उना दा अपने पापां जो छडी करी दुबारा मुडी ओणा मुशकिल है। क्योंकि सै इक बरी परमेश्वरे दी लोइ च रेई बैठयो न, कने स्वर्ग दे वरदान लेई बैठयो न, कने उना जो होर लोकां सोगी पबित्र आत्मा मिली बैठया है, 5 उना अनुभव कितया था की परमेश्वरे दा बचन खरा है, कने ओणे बालिया शक्तिया जो अनुभव कित। जालू परमेश्वरे राज करणा। (aiōn g165) 6 ऐसे लोकां जो परमेश्वरे बाल बापस लोणे दा कोई रस्ता नी है; क्योंकि सै खुद परमेश्वरे दे पुत्रे जो दुबारा ला सूली पर चढादे न कने उसयो शरमिदा करदे न जिसा बजा ला होर लोक मसीह दा मजाक उडादे न। 7 सै लोक जीना जो खरी शिक्षा मिलियो है, सै उसा जमिना सांई न जिसा पर बार-बार बरखा होंदी है। अगर जमीन खरी है तां ऐ किसाने जो फायदे बाली फसल दिन्दी है, कने इस पर परमेश्वरे दी आशीष होंदी है। 8 कने होर लोक उसा जमिना सांई न जडी डिल्ल, जाड-बसुट आंदाई है, जडा की कुसी कम्मे दा नी। इसा पर परमेश्वरे दा श्राप होणे दा खतरा है कने इदे च पैदा होणे बालियां बेकार चीजां जो अग्गी च फुकी देणा। 9 पर हे प्यारे भाईयो, तुसां खरे कम्म करा दे न, क्योंकि परमेश्वरे तुहांजो पेहेले ही बचाई लिया है। ऐ चेताबनियां तुहाडे तांई नी न। 10 तुसां परमेश्वरे दे खातिर परमेश्वरे दे लोकां दी सेबा बडे प्यारे ला करदे थे कने करा दे भी न, परमेश्वरे तुहाडे इना कम्मा जो नी भूलणा। क्योंकि परमेश्वर अन्याय करणे बाला नी है। 11 तुसां सुस्त मत बणा। पर कडी मेहनत करणे बालयां सांई आखरी दीकर सबर कने भरोसे सोगी पक्की आस रखीकरी इना प्यार भरे कम्मा जो करदे रेणा चाईदा, ताकि सांझो परमेश्वरे दे वायदे मिली सकन। 13 कने परमेश्वरे अझाहोई ला वायदा करदे बेले अपने नापे दी कसम खादी क्योंकि उसला बडा ऐसा कोई नी, जिना दा लेईरी कसम खाई सकन, कने

उनी बोलया, 14 "मैं सचची तिजो बडी आशीष देणी, कने मैं तिजो मते बंश देणे।" 15 अब्राहमे बडे लम्बे बकते दीकम सबर रखया। तां जाई करी उसयो सै मिल्ला जिदा परमेश्वरे उसयो बायदा कितया था। 16 कसम खांदे बकत लोक हमेशा अपने ला बडे कुसी माणुए दी कसम खांदे न। कसम खाणे ला ऐ यकीन होंदा है की जडा सै बोला दे न सै सचच है, कने ऐ सारयां झगडयां जो खतम करी दिन्दी है। 17 जालू परमेश्वरे अपने लोकां जो ऐ गल्ल बिलकुल साफ दसणा चाई की सै अपने कितयो बादयां जो कदी नी भुलदा; तां उनी बायदे सोगी अपने ना दी कसम जोडी। इसला पता चलदा है उडे बायदे सचची पुरे होंणे न। 18 तां ऐथू फिरी दो गल्लां न परमेश्वरे दा बायदा कने उदी कसम, जडी कदी नी बदली सकदी जिना दे बारे च परमेश्वर कदी झूठ नी बोली सकदा। इस तांई असां परमेश्वरे बाल बचणे तांई आयो न, कने जडी आस उनी सांझो दितियो है, उसा जो पकडी रखा कने जादा उसाहित रिया। 19 जियां इक बडे किले ला बनियो रस्सी किस्तिया जो टिकाई रखदी है, तियां ही है आस साडिया जिन्दगिया जो टिकाई कने मजबूत बनाई रखदी है। जिदे च साडी आस है सै यीशु मसीह है, जडा स्वर्ग च बडिया पबित्र जगा च परमेश्वरे बाल गिया। 20 यीशु सांझो ला अगे कने सांडे तांई स्वर्ग च गिया है। सै याजक मलिकिसिदक सांई हमेशा तांई महायाजक बणी गिया है। (aiōn g165)

7 ऐ मलिकिसिदक शालेम शेहरे दा राजा था, कने परम प्रधान परमेश्वरे दा याजक था, सारयां ला पेहले उडे नाए दा मतलब है, "धार्मिकता दा राजा" कने उदा ना "शालेम शेहरे दा राजा" जिदा मतलब है की शांति दा राजा। जिदा ना पिता, ना मां, ना खानदान दा कोई पता था, कने ना उडे जमणे दी कने ना मरणे दी खबर थी, फिरी भी सै परमेश्वरे दे पुत्रे सांई हमेशा तांई याजक बणी रेंदा है; मलिकिसिदक अब्राहमे ने तालू मिल्ला जालू सै राजयां जो हराई करी मुडी करी ओआ दा था, कने उसयो आशीष दिती कने अब्राहमे उसयो हर चिजा दा दसमा हिस्सा दिता जडा उनी अपने दुशमणा लिया था। 4 हण इसा गल्ला पर ध्यान दिता की मलिकिसिदक कितना महान था, जिसयो सांडे पूर्वज अब्राहमे अपने दुशमणा ला लुटयो माले दा दसमां हिस्सा देई दिता था। 5 मूसा दी व्यवस्था दसदी है की लेवी दे बंशे च जडे याजक बणदे न, उना जो हुकम मिलया है, की सै इझाएले दे लोकां ला दसमा हिस्सा लेन। पर सै याजक कने होर लोक भाईयां सांई न क्योकि सै सारे अब्राहमे दे बंशे दे न। 6 पर फिरी भी मलिकिसिदक जडा लेवी दे बंशे दा नी था, उनी अब्राहमे ला दसमा हिस्सा लिया, कने उनी अब्राहमे जो आशीष दिती, हात्तांकि अब्राहमे तां सै माणु था जिसयो परमेश्वरे बायदा दितया था। 7 कने असां पक्का जाणदे न की जडा आशीष दिन्दा है, सै आशीष लेणेबाले ला बडा होंदा है। 8 कने लेवी बंशे दे याजक जडे दसमा हिस्सा ले दे थे, कने ऐसे लोक थे जिना इक ना इक रोज मरी जाया। पर मलिकिसिदक जिनी अब्राहमे ला दसमां हिस्सा लिया, सै हल्ले भी जिंदा है, जियां की पबित्र शास्त्र च लिखया है। 9 तां असां बोली सकदे न, की लेवी जडा लोकां ला दसमा हिस्सा लेंदा था सै अब्राहमे दा बंशज था। इस तांई अब्राहमे जालू मलिकिसिदक ला मिलया कने उसयो दसमां हिस्सा दिता, तां असां ऐ बोली भी सकदे न की लेविऐ भी अब्राहमे जरिये मलिकिसिदक जो दसमां हिस्सा दिता। 10 क्योकि जिस बेले मलिकिसिदक अब्राहमे ला मिल्ला, उस बकत तां लेवी जम्या भी नी था, पर सै तां अपने पिता दे शरि च था। 11 लोकां जो उना याजकां दे आधार पर व्यवस्था मिलियो थी, जडे लेवी गोत्र दे हास्न ला आयो थे। पर उना जो इसा व्यवस्था जरिये सिद्ध नी बणाई सके, इस तांई इक होर याजके दी ओणे दी जरूरत थी, इक ऐसा याजक जडा हास्न सांई नी पर मलिकिसिदक सांई हो। 12 क्योकि जालू इकोदे याजक नी रेंदे, तां व्यवस्था जो बदलणा भी जरूरी होई जांदा है। 13 क्योकि असां ऐ गल्लां मसीह दे बारे च बोला दे न, जडा इक लग गोत्रे ला था। कने उस गोत्रे च कदी भी कुनी भी याजके दे स्पे च वेदिया पर सेबा नी कितियो थी। 14 सारे जाणदे न की, साडा प्रभु यीशु यहदा दे बंशे ला था कने मूसे इस यहदा दे बंश दे लोकां दा याजक बणने दे बारे च कुछ नी बोलया, कने ना ही यहदा बंश दा कोई याजक बणया था। 15 हण तुसां समझी सकदे न की मैं कुस बारे च बोला दा है। इस तांई ऐ गल्ल होर भी साफ है की मूसा दी व्यवस्था कने याजक दोनो जो सांडे महायाजके तांई बदली दितया है, जडा मलिकिसिदके सांई याजक है। 16 यीशु कुसी खास माणु मतलब की लेवी दे बंशज दे नियमा

कने विधियां दिया बजा ला याजक नी बणया, पर यीशु अपनी कदी खतम नी होणे बाली जिन्दगिया दितया शक्तिया दितया बजा ला याजक बणया। 17 क्योकि परमेश्वर उडे बारे च पबित्र शास्त्र ऐ गबाई दिन्दा है की, "तू मलिकिसिदके सांई युगां-युगां दीकर याजक बणी रेणा है।" (aiōn g165) 18 इस तांई मूसा दी व्यवस्था सै नी करी सकी जडा उसा जो करणा चाईदा था कने कुसी कम्मे दी नी थी इसा बजा ला बदली दिती। 19 इस तांई की मूसा दी व्यवस्था कुसी भी गल्ला जो सिद्ध नी बणाई सकी, कने उदिया जगा पर सांडे बाल इक आस है, जडी यीशु मसीह च है, जिदे जरिये असां परमेश्वरे दे नेडे जाई सकदे न। 20 इदे बाद जालू परमेश्वरे यीशु मसीह जो याजक बणया तां उनी इक कसम खादी। 21 क्योकि लेवी दे बंश बगेर कसमा दे याजक बणाए, पर यीशु मसीह कसमा सोगी परमेश्वरे दितया तरफा ला याजक बणया। परमेश्वरे यीशु मसीह दे बारे च बोला, "मैं परमेश्वर, मैं ऐ कसम खांदा है, मैं अपना फेसला कदी नी बदलणा, की तू युगां-युगां दीकर मलिकिसिदका सांई इक याजक है।" (aiōn g165) 22 इस तांई यीशु मसीह ही सै है, जडा इक खरी बाचा दे पूरा होणे दी बजा बणदा है। 23 ऐथू यीशु मसीह दा याजक होणे दा इक होर फायदा है, सै तां बडे जादा याजक बणदे आए, क्योकि उना चे हर इक याजके दी मोत होई गेई कने इसा बजा ला सै अपना कम्म जारी नी रखी सकी। 24 पर यीशु युगां-युगां दीकर जिन्दा है, इस तांई उनी हमेशा याजक बणी रेणा, पर होर कोई उदा याजक होणे दा पद नी लेई सकदा। (aiōn g165) 25 इसी तांई जडे यीशु जरिये परमेश्वरे बाल ओदे न, सै उना दा पूरा-पूरा उद्धार करी सकदा है, क्योकि सै उना तांई हमेशा विनती करणे तांई जिन्दा है। 26 क्योकि ऐसा ही महायाजक साडियां जरूरतां जो पूरा करी सकदा है, जडा पबित्र, जिस पर कोई दोष ना हो, शुद्ध हो, पापियां ला लग रेंदा हो, कने जडा स्वर्ग ला भी उच्चा हो। 27 कने सै महायाजक जडे हास्न दे बंशे दे थे, उना सांई यीशुए तांई जरूरी नी है, की सै पेहले अपने पापां कने फिरी लोकां दे पापां तांई बलिदान चढाए; क्योकि यीशुए तां इक बरी सारे लोकां तांई अपने आपे जो बलि चढाई दितया। 28 क्योकि मूसा दी व्यवस्था तां कमजोर लोकां जो महायाजक बणांटी है; पर जडी कसम मूसा दी व्यवस्था दे बाद आई सै परमेश्वरे दे पुत्रे जो बडा याजक बणांटी है। कने सै हमेशा तांई सांडे तांई इक सिद्ध महायाजक बणी गिया है। (aiōn g165)

8 हण जडियां गल्लां असां करा दे न, उना चे सारयां ला बडी गल्ल ऐ है, की सांडे तांई इक ऐसा महायाजक है, जडा स्वर्ग च उस महामामय परमेश्वरे दे सिंहासन दे सजे पासे जाई बैठा है। 2 कने साडा महायाजक स्वर्ग च सच्चे मिलाप दे तम्बूए च बडिया पबित्र जगा च सेबा करदा है जडी स्वर्ग च है, जिसयो परमेश्वरे बणया ना की कुनी माणुए। 3 क्योकि हर इक महायाजक जिसयो इस तांई चुणदे न की सै लोकां दी माफी तांई भेट कने बलिदान चढाए। इस तांई सांडे महायाजक यीशु तांई भी ऐ जरूरी था की उस बाल भी कुछ चढाने तांई हो। 4 कने अगर मसीह धरतिया पर होंदा तां कदी भी याजक नी होंदा, क्योकि मूसा दी व्यवस्था दे अनुसार भेट चढाने तांई पेहले ला ही याजक हेन। 5 जडे ऐ याजक करदे न, सै सिर्फ उदी इक नकल कने परखाई है जडा स्वर्ग च है। क्योकि जालू मूसा मिलाप दा तम्बू बणाणा चलया था, तालू परमेश्वरे उसयो ऐ चेटावनी दिती की, "तू हर चीज तियां ही बणायां जदिया उदाहरण तिजो पहाडे पर दसया था।" 6 पर जडा याजकां दी सेबा दा कम्म सांडे महायाजक यीशुए जो मिलया, सै याजकां ला बदीकरी है। क्योकि सै जिस बाचा दा बिचोतिया है, सै पारणिया बाचा ला खरी है कने खरियां चीजां दे बायदे पर अधारित है। 7 क्योकि अगर पेहलिया बाचा च कमियां नी होंदिया तां दूजिया बाचा दी जरूरत ही नी होंदी। 8 पर परमेश्वरे लोकां पर दोष लाईकरी बोलया, "सै दिन ओआ दे न की, मैं इझाएल दे लोकां सोगी कने यहदा दे लोकां सोगी नोई बाचा करणी है। 9 ऐ बाचा उस बाचा सांई नी होणी है, जडी मैं उना दे पूर्वजां सोगी कितियो थी, जालू मैं उना जो मिश्र देशे ला कडी लेई आया था, क्योकि सै मेरी बाचा पर टिकी नी रे, कने मैं उना दी चिंता करणा बंद नी करी दिता, प्रभु ऐंई बोलदा है। 10 फिरी प्रभु बोलदा है की, जडी नौई बाचा मैं ओणे बाले दिना च इझाएल दे लोकां सोगी करणी, सै ऐ है की मैं उना जो मेरी व्यवस्था दे बारे च सोचना देण, कने उना उसा जो अपने मना च रखणा, कने मैं उना दा परमेश्वर बणना, कने उना मेरी आराधना करणी। 11 फिरी कुनी भी इझाएल दे लोकां अपने देशे बालयां जो, कने अपने रिशतेदारां जो ऐ शिक्षा देणे दी जरूरत नी पोंणी, की तुसां प्रभु जो मन्ना, क्योकि छोटे ला

लेईकरी बहु लोकां दीकर सारयां मन्नी लेणा की मै उना दा परमेश्वर है। 12 क्योंकि मै उना दे पाप माफ करी देणे, कने मै उना दे पापां जो दुबारा फिरी याद नी करणा।” 13 परमेश्वरे इसयो नोई बाचा बोलया, इस ताई उनी पहले बालिया बाचा जो पूराणा करी दिता। जडा कुछ भी पूराणा है कने घिस्या-पिटया है, सै खतम होई जणा।

9 उसा पैली बाचा जो जडी बडे पेहले, मूसा दे जरिये इस्राएल दे लोकां जो दीतियो थी। उदे च परमेश्वरे दी आराधना करणे दे सारे नियम कने कनून थे कने इसा धरती पर आराधना ताई लोकां दा बणया मिलाप दा इक पबित्र तम्बू भी था। 2 ऐ तम्बू जानवरां दिया खल्ली ला बणया था, उस तम्बूऐ बिच उना इक पर्दा लटकाई दिता कने दो कमरे बणाई दिते, पेहले कमरे च इक धूपदान, कने मेज थी जिसा पर परमेश्वरे जो चढाईयां रोटियां रखदे थे, कने इस कमरे जो पबित्र जगा बोलदे थे। 3 कने तम्बूऐ दे दुज्जे कमरे जो जडा परदे पिच्छे था, उसयो परम पबित्र जगा बोलदे न। 4 उस दुज्जे कमरे च सोने दी धूपदानी थी, कने चारो पासे ला सोने दा मढया सन्दुक था जिसयो बाचा दा सन्दुक बोलदे न। कने उदे च सोने दे भांडयां च मन्ना भरिरी रखया था, कने हासन दा डंडा भी था जिदे पर खिलयो पते लगयो थे, आखरी च इदे च दो पथरे दियां पटियां थियां, जिना पर परमेश्वर सै दस हुकम लिखयो थे, जडे मूसा जो दितयो थे। 5 इदे इलाबा सन्दुके प्राला दो फंगा बाले कम्बू बणयो थे, जडे इसा गल्ला दा संकेत था की परमेश्वर उस जगा पर था। उना अपने फंगा ला उसा जगा जो दक्या था, जिस पर महायाजक खून छिडकदा था, ताकि लोकां दे पाप माफ होई सकन। पर हुण असां इना चीजां दे बारे च इक-इक करिरी दस्सी नी सकदे। 6 इस तरीके ला उना इना सारियां चीजां जो तम्बूऐ दे दों कमरयां च तैयार किता। याजक हर रोज उस पेहले कमरे च जाई करी अपनी धार्मिक बिधियां जो पूरा करता था। 7 पर दुज्जे कमरे च मतलब की उस बडी पबित्र जगा च सिर्फ महायाजक साले च इक ही बरी जादा था। कने सै अपने सोगी जानवरां दे खूने जो लेई जांदा था, जिसयो सै अपने ताई कने लोकां दे अनजाणे च कितयो पापां दी माफी ताई चढादा था। 8 इना विधियां जरिये पबित्र आत्मा सांझो ऐ समझांदा है, की जालू दीकर इसा धरती पर मिलाप बाले तम्बू कने इना दियां विधियां जो मंदे न, तालू दीकर स्वर्गं च परमेश्वरे दे परम पबित्र जगा च जाणे दा रस्ता हल्ले दीकर नी खुलया है। 9 ऐ सारियां चीजां सिर्फ इना गल्लां दा उदाहरण थियां, जडियां हुण मसीह दे जरिये पुरियां होआ दियां न। क्योंकि सै चढावे कने बलिदान जडे लोक परमेश्वरे जो चढावें थे, जडे उनी आराधना करदे थे। सै लोकां दे मना कने दिलां जो शूद्र करणे दे काबिल नी थे। 10 क्योंकि ऐ लोकां दे खाणे पीणे दियां गल्लां दे बारे च, कने भौंती-भौंती दियां नोहणे दियां बिधिया दे बारे च दसदे न जिना ला लोक बाहरी तौर ला साफ होई जांदा न। इना विधियां जो तालू दीकर मणया था जालू दीकर की परमेश्वर नोई बाचा जो शुरू नी करी दिदा। 11 पर हुण मसीह महायाजक सांई आया है, जडा नोईया बाचा दियां सारियां खरियां-खरियां चीजां दिन्दा है। सै होर भी जादा महान कने सिद्ध तम्बूऐ च दाखल होया। ऐ तम्बू माणुआं नी बणया था मतलब की इस संसारे दा नी था। 12 यीशु मसीह परम पबित्र जगा च इक बकरी या बछडे दा खून लेईकरी नी गिया, पर सै अपने ही खूने सोगी गिया। उनी सै सिर्फ इक बरी ही किता, कने इसयो दुबारा करणे दी जरूरत नी होणी। उदे जरिये सांझो हमेशा दा उद्धार मिलया। (aiōnios g166) 13 मूसा दी व्यवस्था अनुसार जडे लोक अशुद्ध होदे न, सै परमेश्वरे दी आराधना करणे दे काबिल नी होदे। पर अगर उना पर बकरयां कने दांदा दा खून कने बछडयां दी राख छिडकी जाऐ तां सै शूद्र होई जांदा न। अगर इदे च माणुआं दे शरीर जो शूद्र करणे दी शक्ति है, 14 तां जरा सोची की दिखा की मसीह दे खूने ला साडे दिलां जो उना कम्मा ला कितणा शूद्र करणा जडे मौत दे पासे लेई जांदा न, ताकि असां जिन्दे परमेश्वरे दी आराधना करी सकन। क्योंकि अनन्त आत्मा दिया शक्तिया दे जरिये मसीह साडे पापां ताई अपने आपे जो निर्दोष बलिदान दे स्पे च परमेश्वरे जो भेंट चढाई दिता। (aiōnios g166) 15 इसा बजा ला यीशु मसीह लोकां सोगी इक नोई बाचा बन्नी, ताकि जिना लोकां जो परमेश्वरे सदया है, उना जो हमेशा दियां अशीषां मिली सकन जिदा परमेश्वरे बायदा कितया था। क्योंकि यीशु मसीह उना जो उना दे पापां दिया सजा ला अजाद करणे ताई मरी गिया, जडे उना पैली बाचा दे अधीन रेईकरी कितयो थे। (aiōnios g166) 16 असां जाणदे न की अगर कोई माणु अपनी मौत ला बाद अपनी जमीन जयादादा जो बंडणे ताई बसियत लिखदा है, तां उस बटबारे जो करणे

तां उदा मरणा जरूरी है। 17 कयोकि उसा बसियत दी कोई कीमत नी जालू दीकर जयादादा दा मालिक हल्ले जिन्दा है। उसा बसियत दी कीमत तालू ही है जालू उस मालिके दी मौत होई जांदा है। 18 इस ताई ऐथ दीकर परमेश्वरे दे जरिये दितियो पैली बाचा जो भी पक्की होणे ला पेहले इक बलि दिती थी। 19 सारयां ला पेहले मूसा सारयां लोकां जो व्यवस्था दे हुकम दे बारे च दसया। इदे बाद उनी बछडयां दा खून लेईकरी पाणिए च घोल्या कने इदे बाद उनी इसयो लोकां कने व्यवस्था दिया कताबा च छिडकणे ताई लाल ऊन, कने जफा नापे दे बूटे दियां डालियां दा इस्तेमाल किता। 20 कने जालू मूसा ऐ बोला दा था, उनी लोकां ने बोलया, “ऐ खून उस बाचा जो शुरू करता है, जिना जो मणणे दा हुकम परमेश्वरे तुहांजो दितया है।” 21 कने इयां ही मूसे तम्बूऐ च कने आराधना दियां सारियां चीजां पर खून छिडकया। 22 कने मूसा दी व्यवस्था बोलदी है की सारियां चीजां जो खून छिडकी करी शूद्र करणा चाईदा, कने बिना खूने बहाए, परमेश्वर लोकां जो उना दे पापां ताई माफ नी करी सकदा। 23 इस ताई मिलाप बाले तम्बूऐ कने उदियां सारियां चीजां जो विधिया अनुसार बलि देईकरी शूद्र करणा जरूरी था, ऐ स्वर्गं दियां चीजां दी नकल है। पर स्वर्गं दियां चीजां जो विधिया अनुसार शूद्र करणे ताई, जानवरां दे खूने ला भी खरे बलिदाने दी जरूरत थी। 24 इसा बजा ला मसीह उस पबित्र जगा च नी गिया जिसा जो माणुआं अपने हथां ला बणया है, जडी सच्ची पबित्र जगा दी इक प्रतीक है। पर सै साडे फायदे ताई परमेश्वरे सामणे ओणे ताई सीधा स्वर्गं जो गिया। 25 कने मसीह अपने आप जो बार-बार बलि चढाणे ताई स्वर्गं च नी गिया, जिनां महायाजक हर साल जानवरां दे खूने सोगी परम पबित्र जगा च जांदा है, कयोकि अगर इयां होदा तां फिरी उसयो संसारे दे शुरू होणे ला ही बडे सारे दुख झेलणा पोदे। पर मसीह इस संसारे दे आखरी बकत च अपने आप जो बलिदान करणे ताई सिर्फ इक बरी आया ताकि पाप दा अंत होई सके। (aiōn g165) 27 कयोकि ऐ पक्का है की असां सारे लोकां इक बरी मरणा, कने उदे बाद साडा न्याय होणा। 28 तियां ही मसीह भी सारे लोकां दे पापां जो माफ करणे ताई इक ही बरी बलिदान होया। पर उनी जालू दुबारा इसा धरती पर ओणा, तां उनी साडे पापां ताई बलिदान होणे ताई नी ओणा, पर उना लोकां जो बचाणे ताई ओणा जडे लोक उसयो नियाला दे न।

10 मूसा दी व्यवस्था तां सिर्फ अगे भविष्य च ओणे बालियां खरियां चीजां दी परछाई है, पर उना खरियां चीजां दा असली रूप नी है, जडियां मसीहे साडे ताई कितियां न। इस ताई व्यवस्था जो मणणे बाले लोक हर साल इकोदियां बलियां चढावें न, पर ऐ बलिदान उना लोकां जो कदी सिद्ध नी करी सकदे जडे परमेश्वरे दी आराधना करणे ताई उदे नेडे ओदे न। 2 अगर परमेश्वरे दी आराधना करणे बाले इना बलिदान दिया बजा ला सिद्ध होई जांदा, तां सै अपने आप जो दोषी नी मंदा। तां फिरी हुण बलिदान चढाणे दे बारे च गल्ल नी होदी। 3 पर जानवरां दियां बलियां दा खून उना दे पापां जो दूर नी करी सकदा, पर ऐ हर साल उना जो उना दे कितयो पापां जो याद करांदा है। 5 इसा बजा ला जालू मसीह इस संसारे च आया तां उनी परमेश्वरे ला बोलया था, “तू नी चांदा की लोक तिजो बलियां चढान, पर तू मिजो इक आदमी बणाई दिता।” 6 कने ना सै बलियां जिना च जानवरे जो पूरा फुकी करी चढावें न कने ना ही पापां दिया माफिया ताई चढाईयां बलियां ला तू खूश होंदा है। 7 तालू मसीहे परमेश्वरे ने बोलया, “ऐ परमेश्वर, मै तेरी इच्छा पूरी करणे ताई आई गिया है, पबित्र शाब्द च मेरे बारे च लेई लिखया है।” 8 मूसा दी व्यवस्था सिखांदा है बलियां कने भेटा पाप दिया चढाणियां चाईदियां। पर मसीहे इना गल्लां दे बारे च कजो बोलया की परमेश्वरे इना ला खूश नी होंदा? 9 फिरी मसीहे ऐ भी बोलदा है, “दिख, मै सेई करणा आया है, जडा तू चांदा है।” तालू परमेश्वर बलियां वाली पैली व्यवस्था जो खतम करी दिन्दा है, ताकि सै नोई व्यवस्था शुरू करी सके। इसी बजा ला असां उस बलिदान दे जरिये पबित्र होई गियो न जडा यीशु मसीहे अपने शरीर जो चढाई करी दिता। 11 हर इक यहूदी याजक रोज ही वेदिया सामणे खडा होंदा है कने लोकां दे पापां जो दूर करणे दियां विधियां जो पूरा करता है। कने हमेशा ही इकोदे बलिदाना चढावां रंदा है, जडे कदी भी उस माणुऐ दे पापां जो दूर नी करी सकदे न, जडे उनी कितयो न। 12 पर यीशु मसीहे साडे पापां दी माफी ताई अपने आप जो परमेश्वरे सामणे इक ही बरी कने हमेशा ताई बलिदान करी दिता कने। सै परमेश्वरे दे सजे पासे कने सिंहासने पर सारयां ला जडा बलिदान बालिया जगा च

हमेशा तांई जाई बैठा। 13 क्योंकि मसीहे अपने आप जो सिर्फ़ इक बरी ही बलिदान दे के च परमेश्वरे जो देई दिता कने इस बजा ला उदे लोकां जो पबित्र करी दितया है कने सै सच्ची हमेशा तांई धर्मी बणी गियो न। कने ओथु सै अपने सारे दुशमणा जो पुरे तरीके ला अपने अधीन करणे तांई परमेश्वरे दा इंतजार करा दा है। 15 कने पबित्र आत्मा भी सांझो ऐ दसदा है की, ऐ गल्ल सच्च है। कने प्रभु परमेश्वरे दे बायदे जो याद करा जिदे बारे च उनी पहिले ही बोलया था, 16 “प्रभु बोलदा है, की जडी बाचां मै ओणे बाले दिनां च उना सोगी करणी है, की मै उना जो अपणी व्यवस्था दे बारे च सोचना देणा कने उना उसा जो अपने मना च रखणा।” 17 फिरी परमेश्वर ऐ बोलदा है, “मै उना दे पाप माफ करी देणे, कने मै उना दे पापां जो दुबारा फिरी याद नी करणा।” 18 कने परमेश्वर साडे पापां जो माफ करादा है, तां हण कोई भी होर बलिदान देणे दी जरूरत नी है। 19 इस तांई हे मसीह भाईयो, जालू की यीशु मसीहे साडे तांई अपणी जिन्दगी बलिदान करी दिती, हण असां हिम्मता सोगी स्वर्ग दिया परम पबित्र जगा च बिना डरयो जाई सकदे न। 20 जालू मसीह मरया तां उनी साडे तांई इक नोआ रस्ता खोली दिता ताकि असां ऐसी जिन्दगी जी सकन जिदा कोई अंत ना हो। उनी ऐ रस्ता पर्दे ला निकली करी खोली दिता, मतलब की अपने शरीर जो बलिदान करिरी रस्ता खोली दिता। 21 क्योंकि साडा ऐसा महान याजक है जडा परमेश्वरे दे सारे लोकां पर राज करादा है, 22 तां ओआ असां, मसीह दे खने जो छिडकी करी अपने मना जो शुद्ध करिरी कने साफ पाणिए ला अपने शरीर जो धोई करी साफ करिरी कने सच्चे मने कने पक्के भरोसे सोगी परमेश्वर दे नेडे जान। 23 कने असां बिना कुसी शक दे अपणी उस आस पर टिकी रेन, जिसा जो असां अपनाया है क्योंकि असां परमेश्वर पर उदे बायदयां जो पूरा करणे तांई भरोसा करी सकदे न। 24 ओआ असां इक दुज्जे सोगी प्यारभाव कने भले कम्मा जो करणे तांई इक दुज्जे जो प्रोत्साहित करन। 25 कने असां परमेश्वरे दी अराधना करणे तांई मिठे होणा बंद ना करन, जियां केई लोक करा दे न, पर ओआ असां इक दुज्जे जो होर भी जादा प्रोत्साहित कने समझान क्योंकि असां जाणदे न की प्रभु जल्दी मुडी करी ओणे बाला है। 26 सांझो इना कम्मा जो करणा चाईदा क्योंकि यीशु मसीहे दे शुभसमाचार दी सच्चाई जो जाणने बाद अगर असां जाणी बुडी करी पाप करदे न, तां कोई होर बलिदान नी है जडे साडे पापां जो माफ करी सके। 27 बल्कि डरीकरी परमेश्वरे दा इंतजार करणा है की उना दा न्याय करे कने अग्नी च भस्म करी दे क्योंकि सै उदे दुशमण न। 28 जडा कोई मूसा दी व्यवस्था जो नी मंदा है, उस पर बगरे दया कितयो दो या तीन लोकां दी गबाई पर उसयो मारी दिन्दे न। 29 अगर मूसा दी व्यवस्था च ऐसी सजा थी, तां उस माणुऐ दी सजा बडी बड्डी होणी चाईदी जडा परमेश्वरे दे पुत्रे दी बेईजती करादा है कने परमेश्वरे दे पुत्रे जो अपने पैरां थले गेची दिन्दा है, कने मसीह दे खने जो पबित्र नी मंदा जिदे जरिये परमेश्वरे उसयो पबित्र करणे तांई नोई बाचा शुरु किति थी कने पबित्र आत्मा दी बेईजती किति जिदे जरिये उसयो अनुरह मिलया था। 30 क्योंकि असां जाणदे न की परमेश्वरे बोलया, “बदला लेणा मेरा कम्म है, मै ही बदला लेणा।” कने उनी फिरी ऐ भी बोलया की, “प्रभुऐ अपने लोकां दा न्याय करणा।” 31 जिन्दे परमेश्वरे दे हथां ला सजा मिलणा इक बडी भयानक गल्ल है। 32 पर उना दिनां दे बारे च याद करा, जालू तुसां पैली बरी मसीह पर भरोसा कितया था। तुसां बडे भरी दुख तकलिफां जो झेलया, पर तुसां भरोसे च पक्के बणी रे। 33 कदी-कदी तां इयां भी होया की तुसां लोकां ला बेईजती कने अत्याचार झेली करी सारयां सामणे तमाशा बणी गे, कने केई बरी तुसां मसीह भाईयां दा साथ दिता जडे तुहाडे सांई दुख मुसीबतां च थे। 34 तुसां कैदियां दे दुखां च भी दुखी होए, कने जालू होरनी लोकां तुहाडी धन-दौलत जो लुटया तां तुसां उना जो लुटणा दिता। क्योंकि तुसां जाणदे न की तुहाडे बाल हल्ले भी सारियां चीजां न, जिना दा परमेश्वरे बायदा कितया है, कने सै हमेशा तांई न। 35 इस तांई अपने भरोसे जो मत छडा चाहे कुछ भी होई जा। कने उस इनाम जो याद रखा जडा परमेश्वरे तुहांजो देणा। 36 हण तुहांजो सबर रखीकरी सेहन करणे दी जरूरत है, ताकि तुसां परमेश्वरे दी इच्छा जो पूरा करी सकन। तां तुहांजो सै सारा कुछ मिलणा जिदा उनी बायदा कितया है। 37 क्योंकि जियां पबित्र शास्त्र च मसीह दे बारे च लिखया है की, “हुण बडा ही घट बकत रेई गिया है, जालू की ओणे बाले ओणा है, कने देर नी करणी थोडे।” 38 कने मेरे धर्मी लोकां मिंजो पर भरोसा करणे ला ही जिदे रेणा, कने अगर सै मिंजो पर भरोसा करणे ला पिच्छे हटी जांजे तां मै उना ला खुश नी होणा। 39 पर

असां उना लोकां चे नी न जडे परमेश्वरे ला पिच्छे हटी जांजे न, कने खतम होई जांजे न। पर असां उना लोकां चे न जडे भरोसा रखदे न कने बची जांजे न।

11 हण जडे लोक परमेश्वरे पर भरोसा रखदे न, उना जो पक्का ही परमेश्वरे सारा कुछ देणा जिदी सै आस रखदे न; उना जो यकीन है की जिना चीजां जो उना दिखया नी है सै असली च हेन। 2 साडे पूर्वजां दा भी ऐसा भरोसा था कने इसी तांई परमेश्वर उना ला खुश था। 3 क्योंकि भरोसा करणे ला ही असां जाणी लेंदे न, की सारे संसार जो परमेश्वरे अपने बचना ला बणया है। इस तांई असां जडा भी दिखदे न, सै उना चीजां ला नी बणयो न जिना जो दिखी नी सकदे न। (aiōn g165) 4 भरोसा करणे दिया बजा ला ही आदमे दे पुत्र हाबिले अपने बड़े भाई कैन ला बदिया बलिदान परमेश्वरे तांई चढया, कने उदे बलिदाने दे जरिये ही परमेश्वरे गबाई दिती की हाबिल धर्मी है, कने परमेश्वर उदे बलिदान ला खुश था। हाबिल अपणी मौत ला बाद भी सांझो सिखा दा है की भरोसा कदिया होणा चाईदा। 5 भरोसे दिया बजा ला ही परमेश्वरे हनोक नाऐ दे माणुऐ जो स्वर्ग च जिन्दा चुकी लिया, कने सै इस तांई मरया नी कने कुसी जो भी उदी लाश नी मिल्ली, क्योंकि स्वर्ग च जाणे ला पहिले हनोक परमेश्वरे जो खुश कितया, जियां पबित्र शास्त्र च लिखया है। 6 परमेश्वरे पर भरोसा करिरी ही असां उसयो खुश करी सकदे न, क्योंकि परमेश्वरे बाल ओणे बाले लोकां जो पक्का भरोसा होणा चाईदा की, परमेश्वर है, कने सै उना जो इनाम दिन्दा है जडे उसयो जाणदे दी कोशिश करदे न। 7 भरोसा करणे दिया बजा ला ही नूह नाऐ दे माणुऐ जो बाढ दे बारे च चेतवनी मिल्ली जडी उनी कदी नी दिखियो थी। तां परमेश्वरे दा हुकम मन्नी करी अपने परिबार जो बचाणे तांई जाज बणया, कने जिना लोकां भरोसा नी कितया सै सारे दोषी होऐ कने सारे पाणिए च डूबी करी मरी गे। क्योंकि नूहे परमेश्वरे पर भरोसा कितया इसा बजा ला सै परमेश्वरे दिया नजरा च धर्मी बणया। 8 भरोसे दिया बजा ला ही अब्राहम नाऐ दे माणुऐ जो परमेश्वरे इक ऐसी जग च जाणे तांई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गया। 9 परमेश्वर जिस जगा दा बायदा कितया था, अब्राहम उस देशे च परदेसियां सांई तम्बूआं च रेंदा था, उदे सोगी उदा जागत इसहाक कने पोत्र याकूब भी तम्बूआं च रेंदे थे, जिना जो परमेश्वरे ला ऐई बायदा मिलया था। 10 क्योंकि सै स्वर्ग च इक ऐसे शेहे च रेणे दी उम्मीद रखदे थे, जिनी हमेशा बणी रेणा है, जिसयो बणाने बाला कने रचणे बाला परमेश्वर है। 11 भरोसे दिया बजा ला ही अब्राहम दी घरे बालिया सारा बड्डी होई के भी गर्भ धारण कितया, क्योंकि उसा जो भरोसा था की परमेश्वरे जडा बायदा कितया है सै उनी पूरा करणा। 12 कने इसा बजा ला जालू अब्राहम बडा हुकम होई गिया था की मरणे ही बाला था, फिरी भी अब्बरे दे तारयां सांई कने समुंद्रे कंडे दे रेते सांई उदे अणगिनत वंश पैदा होए। 13 ऐ सारे लोक जिना परमेश्वरे पर भरोसे कितया, सै उना चीजां जो मिलयो बिना ही मरी गे, जिदा बायदा परमेश्वरे कितया था। सै उना चीजां जो दुरे ला दिखीकरी खुश होए, कने उना ऐ गल्ल मन्नी लेई की असां इसा धरती पर परदेसी कने अजनबी न। 14 सै लोक जडे ऐसा बोलदे न की असां परदेसी कने अजनबी न, सै इक ऐसे देशे दी मिलणे दी उम्मीद रखदे न जडा उना दा अपना होणा। 15 अगर सै उस देशे दे बारे च सोचदे, जिथ ला सै आयो थे, तां सै मुडी करी जाई सकदे न। 16 पर उना जो इक खरे देश जाणे दी इच्छा थी मतलब की स्वर्ग, इस तांई परमेश्वर उना दा परमेश्वर बोलया जाणे ला खुश था, क्योंकि उनी उना तांई इक शेहर तैयार कितया है। 17 भरोसे दिया बजा ला ही अब्राहम अपने पुत्रे दी बलि चढाणे तांई तैयार होई गिया था, जालू परमेश्वरे उदी परिक्षा लेई। परमेश्वरे अब्राहमे ला इस पुत्रे दे बारे च बायदा कितया था की, “इसहाक ला ही तेरा बंश बढणा है।” फिरी भी सै अपने इकलोते पुत्रे जो बलि चढाणे तांई तैयार था। क्योंकि उसयो पूरा भरोसा था की अगर इसहाक मरी भी जांगा तां परमेश्वर उसयो जिन्दा करी सकदा है। इस तरीके ला अब्राहमे जो उदा अपना पुत्र इसहाक जिन्दा मिली गिया था। 20 भरोसे दिया बजा ला ही इसहाक अपने दो पुत्रां मतलब की याकूब कने एसाब जो औणे बाली जिन्दगी तांई जडा बायदा कितया था उदे बारे च आशीष दिती। 21 भरोसे करणे ला ही याकूब मरंदे बकत यूसुफे दे पुत्रां जो इक-इक करिरी आशीष दिती, कने अपणिया सोठिया दे सारे ला झुकी करी परमेश्वरे दी अराधना किति। 22 भरोसा करणे ला ही यूसुफ

नापे दे माणुपे जालू सै मरणे बाला था, तां उनी बडे भरोसे ला इसा गल्ला जो बोलया था की इम्राएल देशे दे लोकां मिश्र देशे जो छडी करी कनान देशे जो चली जाणा। कने उनी ऐ हुकम भी दितया की जालू सै कनान देशे जो जांगे तां उदियां हडियां जो भी कनान देशे लेई जान। 23 जालू मिश्र देशे दे राजे ऐ हुकम दितया की इम्राएलियां दे सारे जमदे जागतां जो मारी दिया, तालू भरोसा करणे ला ही मूसा दे माता-पिता उसयो पैदा होणे बाद तिन महीने दीकर लुकाई रख्या, क्योंकि उना दिखया की ऐ खास बच्चा है, कने सै राजे दे हुकम नी मनणे ला नी डरे। 24 मिश्र देशे दे राजे दिया कुडिया मूसे जो पालया था। कने जालू मूसा बडा होया तां उनी भरोसा करणे ला ही राजे दिया कुडिया दा पुत्र होणे ला मना करी दितया। 25 ऐ इस तांई होया की मूसे पाप दे थोडे बकते दे सुखां दा आनंद लेणे दे बजापे परमेश्वरे दे लोकां सोगी दुख झेलणा जादा खरा समझया। 26 कने उनी मसीह तांई बेईजत होंणा, मिश्र देशे दे धन दौलत ला भी जादा बदीकरी समझया, क्योंकि सै अपणा इनाम मिलणे दा इंतजार करा दा था, जडा परमेश्वरे उसयो देणा था। 27 भरोसा करणे दिया बजा ला ही सै मिश्र देशे दे राजे दे गुस्से ला नी डरया कने उनी मिश्र देशे जो छडी दितया, क्योंकि सै समझी गिया था कने मन्ना ऐ ऐसा था की जियां उनी परमेश्वरे जो दिखी लिया था, जिसयो कोई दिखी नी सकदा। 28 भरोसा करणे ला ही मूसे इम्राएल देशे दे लोकां दी पहली ओलादी जो हुकम दितया की दरबाजे पर बकरे दा खने छिडकी करी फसह दा त्योहारे मना, ताकि पैली ओलादा जो खतम करणे बाला दूत इम्राएलियां दिया पेलिया ओलादा जो छुई ना सके। 29 भरोसा करणे ला ही इम्राएल दे लोकां लाल समुन्द्र इयां ही पार करी लिया, जियां की सै सुकियां जमिना पर चलयो न, पर जालू मिश्र देशे दे लोकां इयां करणा चाया तां सै सारे डुबी करी मरी गे क्योंकि समुंद्र पलटी गिया। 30 भरोसा करणे ला ही इम्राएल देशे दे लोकां परमेश्वरे दा हुकम मन्नी करी यरीहो शेहरे दिया कन्दा दे चारो पासे सतां दिनां दीकर चक्कर लांदे रे, तां सै कन्दा डेई गेई। 31 भरोसा करणे ला ही रहब वैश्या परमेश्वरे दे हुकम नी मनणे बाले लोकां सोगी खतम नी होई, क्योंकि उना इम्राएली गुप्तचरां दा स्वागत कितया था जडे यरीहो शेहर दा भेद लेणा आयो थे। 32 हुण मिंजे कुछ होर बोलणे दी जरूरत नी है, क्योंकि हुण मेरे बाल बकते नी रिया की, मैं, गिदोन, बराक, शिमशोन, यिफतह, दाऊद, शमूएल, कने परमेश्वरे दे संदेश देणेबालयां दे भरोसे दे बारे च तुहांजो दर्से। 33 इना भरोसा करणे ला ही राज्य जिते; सही काम किते; कने इना जो बायदा कितियां चीजां मिलियां; कने शेरा इना जो खाई नी सके, 34 अगग उना जो फुकी नी सकी, तलबारा दी धार उना जो मारी नी सकी, जालू इक बरी कमजोर होए तां दुबारा सै मजबूत बणे, लडाईया च वीर निकले, कने उना अपने दुशमणा दी सेना जो मारी दितया। 35 कुछ जनानियां अपने मरयां लोकां जो फिरी ला जिन्दा दिखया, कितणे तां मार खांदे-खांदे मरी गे, कने अपणा भरोसा नी छडया ताकि उना जो जेला ला छुटकारा मिली जा; इस तांई की उना जो मरयां चे जिन्दे होई जाणे बाद इक खरी जिन्दगी मिले। 36 केईयां दा मजाक उडया, केईयां जो कोई खाणा पे, केईयां जो सुंगला ला बन्नी करी जेला च पाई दितया। 37 केईयां जो पथर मारी करी मारी दितया, कने आरे ला चिरी करी दो फाड करी दिते, तलबारा ने मारी दिते। सै गरीब थे, उना जो दुख दिते कने उना सोगी बुरा बर्ताब कितया। कने सै भेडां बकरियां दी खली जो ओडी करी रूआं-परां भटकदे रे। 38 कने बणा, पहाडा, गुफां च कने धरती दी दरारां च भटकदे फिरे। संसार इना भरोसा करणे बाले लोकां दे काबिल नी था। 39 कने भरोसे दे जरिये ही इना लोकां दी परमेश्वरे उना दी तारीफ कितियो, तमी उना जो सै चीजां नी मिलियां जिना दा परमेश्वरे उना ला बायदा कितया था। 40 क्योंकि परमेश्वरे बाल सांजो कुछ खरा देणे योजना है ताकि उना जो सिद्ध बणाई सके, पर सिर्फ साडे सोगी मिली करी ही।

12 साडे अखे-बखे इयोदे लोक बडे भरी न, जिना दिया जिन्दगीया ला सांजो पता लगदा है की भरोसे दा क्या मतलब होंदा है। तां ओआ, असां हर इक रोकणे बाले कने उलझणे बाले पापां जो दूर करिरी, असां उस रस्ते पर चलन जिस पर सांजो जरूर चलणा चाईदा। 2 सांजो यीशु मसीह पाससे दिखदे रेणा चाईदा, जडा सांजो अगगे बदांदा है कने साडे भरोसे जो पूरा करता है। जिनी उना खुशिया तांई जडी उसयो बादे च ओणे बाले बकते च मिलणी थी, बेईजती दी कोई परबाह नी करिरी सुली दे दुखे जो सेहन कितया कने मरी गिया; कने हुण सै परमेश्वरे दे सिंहासन दे सज्जे पासे जाई बैठया है। 3 इस तांई यीशु दे उदाहरण

दे बारे च सोचा, जिनी पापियां दे दितयो बडे बडे दर्द जो इस तांई सेहन करी लिया ताकि तुसां हारी करी हिम्मत ना छडी देन। 4 तुसां बुराईया दियां ताकता दे खिलाफ लडदे होए, तुसां हल्ले दीकर ऐसी लडाई नी लडी होणी जिसा च तुहाडी मौत होई गेई हो। 5 कने तुसां उस हिम्मत दियां गल्लां जो भूली गियो न जडियां परमेश्वरे तुहांजो अपने पुत्र समझीकरी बोलियां थियां: “हे मेरे पुत्र, जालू प्रभु तिजो ऐहसास कराए की तू गलत कितया है तां उस पर पूरा ध्यान दिया, कने जालू प्रभु तिजो झिडकां दे तां दिखयां हिम्मत छडदा।” 6 क्योंकि प्रभु जिसला प्यार करदा, उसयो सुधारदा भी है, कने जिसयो अपना पुत्र बणाई लेंदा है, उसयो कोडे भी मारदा है। 7 जडा दुख तुसां झेला दे न उसयो परमेश्वरे दी सजा समझीकरी सेहन करी लिया। परमेश्वर तुहांजो पुत्र समझीकरी तुहाडे सोगी बर्ताब करता है। सै कुण दिया पुत्र है जिसयो उदा पिता सुधारदा नी है? 8 अगर परमेश्वर तुहांजो नी सुधारे जियां सै अपने पुत्रे जो सुधारदा है, तां तुसां उदे असली बच्चे नी न। 9 फिरी जालू की साडे शरीरिक पिता भी सांजो सुधारणे तांई सजा दिन्दा है, असां फिरी भी उदी सुणदे कने इज्जत करदे न, इस तांई ऐ होर भी जादा जरूरी है की जालू साडा स्वर्ग दे पिता सांजो सुधारे तां तालू असां उदी सुणन ताकि सांजो हमेशा दी जिन्दगी मिले। 10 साडे शरीरिक पिता तां अपणी-अपणी समझा दे साबे ला जडा उना जो ठीक लगे, थोडे रोजां तां सांजो सुधारदे थे, पर परमेश्वर साडिया भलाईया तां सांजो सुधारदा है, ताकि असां भी उस सांई पबित्र होई जान। 11 जिस बकत सै सांजो सुधारदा है, उस बकत सै सुधार सांजो खरा नी लगदा है, बल्कि बडा बुरा लगदा है, पर जालू बादे च असां झुल्ला सिख लेते न, तालू सांजो शांति मिलदी है, क्योंकि असां सही तरीके ला जिणा शूफ करी दिन्दे न। 12 इना सारियां गल्लां दिया बजा ला मजबूत बणा कने प्रोत्साहित रिया। 13 रूआं-परां दिखणे दिया बजापे, तुसां यीशु मसीह बाल जाणे बाले रस्ते पर जा, ताकि जडे साडे बिच आत्मिक रूप च कमजोर न, सै भटकी ना जान पर उना दा भरोसा मजबूत होई जाऐ। 14 सारयां सोगी मिली-जुली करी रिया, कने पबित्र जिन्दगी जिणे दी कोशिश करदे रिया। इंदे बिना कोई भी प्रभु जो नी दिखी सकदा है। 15 कने ध्यान रखा की, ऐसा ना हो की कोई भी परमेश्वरे दे अनुग्रह ला छूटी जाऐ, कने तुहाडे बिच परेशानी खडी करी दे। ऐसा माणु तुहाडे के मतयां जो बर्बाद करी सकदा है। 16 ऐसा ना हो, की कोई भी जणा व्यभिचारी, या अब्राहमे दे पोत्र एसाब सांई अधर्मी हो। क्योंकि सै जेठा पुत्र था, पर उनी अपने पहेला पुत्र होणे दे सारे हकां जो अपने छोटे भाई याकूब जो इक बकते दिया रोटिया तांई बेची दितया। 17 तुसां जाणदे न की बादे च जालू सै अपने पिता ला आशीष पाणा चांदा था, पर उसयो ऐ नी मिली, कने रोई-रोई करी भी उनी आशीष मंगी पर उसयो अपणी गलती सुधारणे दा दुबारा मौका नी मिलया। 18 तुसां सीने पहाडे सांई असली पहाडे पर नी आयो न, जिसयो छुई कने दिखी सकदे न। ऐथु कोई भखदी अगग या काले बदल या तुफान नी है, कने लोक इक ऐसिया ही जणा च थे जालू परमेश्वरे उना जो अपणी व्यवस्था दिती। 19 कने ना ही तुरही दिया अबाजा कने बोलणे बाले दे बखे नी आयो न, जिसयो सुणने बालयां विनती किती की हुण साडे ला जादा गल्लां मत करा। 20 उना ऐसा इस तांई बोलया क्योंकि सै उस हुकमे जो सेहन नी करी सके जडा परमेश्वरे बोलया, “अगर कोई जानवर भी उस पहाडे जो छुंगा तां उसयो पत्थर मारा।” 21 कने सै दर्शन इतणा डरावणा था, की मूसे भी बोलया, “मैं बडा डरा दा कने कमा दा है।” 22 पर तुसां सियेयन पहाडे पर आई गियो न जडा जिन्दे परमेश्वरे दा स्वर्गीय यशस्वान शेर है, जिथु लखां स्वर्गदूत त्योहारे कने खुशिया मारदे न। 23 तुसां परमेश्वरे दे पहिलौटां दिया सभा च आयो न, जिना दे ना स्वर्ग च लिखयो न। तुसां अपु परमेश्वरे बाल आयो न जडा सारियां चीजां दा न्याय करणे बाला है, सै स्वर्ग च उना धर्मी लोकां दियां आत्मा न जिना जो हुण सिद्ध बणाया है। 24 तुसां यीशु मसीह बाल आयो न जडा लोकां कने परमेश्वरे बिच नोई बाचा दा बिचोलिया है। कने छिडकयो खने बाल आयो न, जडा हाबिले दे खने सांई न्याय तांई बिनती करणे दे बजाए पापां दी माफी दी गल्ल करदा है। 25 ध्यान रखा कने उस परमेश्वरे दी मन्ना जडा तुहाडे ने गल्ला करा दा है, क्योंकि इम्राएल दे लोक परमेश्वरे दिया सजा ला नी बची सके जालू उना मूसा दी गल्ल नी मन्नी, इस तांई साडे तांई होर भी जादा बुरा होणा अगर असां परमेश्वरे दिया गल्लां जो सुणने ला मना करी दिगे जडा स्वर्ग ला चेतावनी दिन्दा है। 26 जालू परमेश्वरे सीने पहाडे पर खडोई करी बोलया तां उदिया अबाजा ला धरती हिली पेई थी, पर हुण उनी ऐ बायदा कितया है की, “मैं इक बरी फिरी

सिर्फ धरती जो नी, पर अम्ब्रे जो भी हिलाई देणा है।” 27 कने ऐ गल्ल इक बरी भिरी इसा गल्लां जो दसदी है, की सारियां बणाईयां चीजां हिलाईयां कने हटाई जाणियां न, ताकि सै चीजां जडियां हिलाई नी जान्दियां न सै टिकी रेन। 28 इस ताई सांझो जडा राज्य मिलया सै हिलाया नी जाई सकदा, इसा गल्ला ताई सांझो परमेश्वरे दा धन्यवाद करणा चाईदा। कने इज्जत कने डरे सोगी, परमेश्वरे दी ऐसी अराधना करन, जिसला सै खुश होंदा। 29 क्योंकि जियां अंग भस्म करदी है, तियां ही साड़ा परमेश्वर अपने दुशमणा जो खत्म करदा है।

13 इक दुज्जे सोगी अपना भाई कने बेहन समझीकरी प्यार करा। 2 अजनबी लोकां दी भी इज्जत कने खातिरदारी करदे रिया, क्योंकि ऐसा करणे ला केईयां लोकां अनजाणे च स्वर्गदूतां दी इज्जत कने खातिरदारी कितियो है। 3 केदियां दा इयां हाल चाल पुछदे रिया, जियां मन्ना तुसां भी उना सोगी जेला च न, कने जडे दुख सेहन करा दे न, उना दा भी ऐ समझीकरी हाल चाल पुछदे रिया, जियां तुसां भी उना सोगी उना दे दुखे च शामिल न। 4 बियाये दा रिशता सारयां ताई आदरनीय हो, कने लाडा-लाडी इक दुज्जे सोगी बफादार रिया। क्योंकि परमेश्वरे व्यभिचारियां कने नाजायज रिशते रखणे बालयां दा न्याय करणा है। 5 अपणिया जिन्दगिया जो पैसयां दे लालचे ला दूर रखा, कने जडा तुहाडे बाल हो तुसां उसी च ही खुश रिया; क्योंकि परमेश्वरे अपु ही बोलया है, “मै तिजो कदी भी नी छडगा कने ना ही कदी त्यागणा है।” 6 इस ताई असां बिना डरयो बोलदे न, “प्रभु, मेरी सहायता करदा है, मै नी डरणा; माणु मेरा क्या बगाडी सकदा है।” 7 जडे तुहाडे अगुवे न, कने जिना तुहांजो परमेश्वरे दा बचन सुणाया है, उना जो याद रखा; कने ध्याने ने उना दिया जिन्दगिया जो दिखा की, कियां उना अपणी जिन्दगी जी कने मरणे दीकर भरोसे च बफादार रे, तियां ही तुसां भी परमेश्वरे पर भरोसा दस्सा जियां उना दसया था। 8 यीशु मसीह कल कने अज कने युगां-युगां दीकर इकोदिया है, क्योंकि यीशु मसीह कदी नी बदलदा। (aiōn g165) 9 इस ताई सांझो इना सारियां नोईयां कने लग-लग शिखां जो नी मनणा चाईदा, जडियां तुहांजो गलत रस्ते पर लेई जान्दियां न। तुहाडे मना ताई ऐ ही खरा है की सै अनुग्रह दे जरिये पक्के बणन, ना की उना खाणे बालियां चीजा दे रिबाजां जो मनणे ला, क्योंकि इना गल्लां जो मनणे ला उना दा कोई फायदा नी है जडे इना गल्लां जो मंदे थे। 10 साडे बाल इक ऐसी वेदी है, जिसा चे मिलाप दे तम्बूरे दे याजकां जो खाणे दा कोई हक नी है। 11 क्योंकि पैली बाचा अनुसार हर साल महायाजक जिना जानवरां दा खून पापां दी माफी ताई परम पबित्र जगा पर लेई जांदा था, उना दे शरीरां जो जिथु सै रेंदे ओथु ला बार लेईजाई करी फुकदे न। 12 इसी बजा ला, यीशुए भी लोकां जो अपने ही खूने ला पबित्र करणे ताई यस्शलेम शहर ला बाहर दुख झेले कने मरी गया। 13 इस ताई ओआ, असां यहदी रीतियां जो छडी करी, छावनी दे बार जान, कने यीशु मसीह पर भरोसा करदे होऐ जियां यीशुए बेईजती सेहन किती, तियां ही असां भी बेईजती सेहन करन। 14 क्योंकि इसा धरती पर साडे बाल हमेशा रेणे ताई कोई घर नी है, बल्कि असां तां उस स्वर्गे दे घरे दा इंतजार करा दे न जडा हमेशा ताई है। 15 इस ताई असां यीशुए जरिये लगातार अपने ओठां ला परमेश्वरे दा गुणगान करन। ऐई उदे ताई साड़ा बलिदान है। 16 पर भलाई करणा कने जरूरतमंद लोकां दी सहायता करणा कदी मत भुलदे; क्योंकि परमेश्वर ऐसे बलिदाना ला खुश होंदा है। 17 अपने अगुवां दा हकम मन्ना, कने उना दे अधीन रिया, क्योंकि तुहाडियां आत्मा दी रखबाली करणा उना दा कम्म है, उना जो तुहाडे बारे च परमेश्वरे जो लेखा देणा पौणां है। तुसां उना दी मन्ना ताकि सै इस कम्मे जो खुशिया ला करन, ना की दुखी होईकरी, क्योंकि दुखी होईकरी सेबा करणे दा कोई फायदा नी होणा। 18 साडे ताई प्रार्थना करदे रिया; क्योंकि सांझो इसा गल्ला दा पक्का पता है, की साडी अंतरात्मा शुद्ध है, कने असां हर बकत खरा ही करणा चांदे न जिदे जरिये परमेश्वरे जो इज्जत मिल्ले। 19 तुहाडे ला मेरी ऐ खास बिनती है की प्रार्थना करा की मै तुहांजो ला मिलणा तोली आई सके। 20 कने हुण परमेश्वर जडा तुहांजो शांति दिन्दा है, कने जिनी साडे प्रभु यीशु जो मरयां चे जिन्दा किता, सै तुहांजो सारियां चीजां दे जिना दी जरूरत तुहांजो उदी इच्छा जो पूरा करणे ताई है। कने यीशु मसीह दिया शक्तिया जरिये सै तुहांजो हर इक खरिया गल्ला जो सिद्ध करे जडियां उसयो खुश करदियां न। यीशु मसीह सनातन बाचा दे जरिये भेडां दा महान पुहाल बणया, जिस पर उदे खूने ला हस्ताक्षर कितया है। उदी महिमा हमेशा होंदी रे। आमीन।

(aiōn g165, aiōnios g166) 22 हे मसीह भाईयो, मै तुहाडे ला बिनती करदा है, इस चिठिया दियां गल्लां जो सब रखीकरी सुणी लिया, ऐ मै तुहांजो होंसला देणे ताई लिखियां न। मै इसा चिठिया च बडियां जादा गल्लां नी लिखियां न। 23 तुसां ऐ जाणी लिया की तीमुथियुस साडा मसीह भाई जेला ला छुटी गया है, कने अगर सै तौली मेरे बाल आई गया तां मै उदे सोगी तुहांजो ने मिलगा। 24 अपने सारे अगुवां जो कने परमेश्वरे दे सारयां लोकां जो नमस्कार बोला। इतालिया प्रदेशे दे भरोसा करणे बाले मसीह भाई कने बेहणा तुहांजो नमस्कार बोलंदे न। 25 मै प्रार्थना करदा है की, परमेश्वर दा अनुग्रह तुसां सारयां पर होंदा रे। आमीन।

याकूब

1 मैं, याकूब इसा चिठिया जो लिखा दा है, मैं परमेस्वर दा कने प्रभु यीशु मसीह दा सेवक है। मैं ऐ चिट्ठी इस्राएल दे लोकां जो लिखा दा है, जडे बहरां गोत्रों च न कने दुनिया भर रूआं परां बिखरयो न, कने उना जो नामस्कार बोलदा है। 2 हे मेरे मसीह भाईयो, जालू तहांजो पर लग-लगा तरा दियां पेशानिया ओन, तां इसयो पूरी खुशिया दी गल्ल समझनयो, 3 क्योकिं तुसां जाणदे ही न, की तुहाडे भरोसे जो परखे जाणे ला होर जादा सबर बददा है। 4 परमेस्वरे पर भरोसा करिरी सबर ला पेशानिया दा सामणा करदे रिया, ताकिं तुसां आत्मिक से ला पूरे समझदार कने सिद्ध होईं जान कने तुहाडे च कुसा भी गल्ला दी कमी ना रे। 5 पर अगर तुसां चे कुसयो भी अकला दी कमी है, तां परमेस्वरे ला मंगा, जडा बिना दोष दिलयो सबना जो प्यारे ला दिन्दा है, कने परमेस्वरे तहांजो भी देणा है। 6 जालू तुसां परमेस्वरे ला मंगे, तां पूरा भरोसा करिके मंगनयो कने परमेस्वरे पर कोई भी शक मत करदे, क्योकिं शक करणे बाले समुन्द्रे दियां लैहरां सांई बदलदे रेदे न, जडियां होआ ने चलदियां कने उठकदियां ना। 7 एसा माणु ऐ आस बिलकुल छडी दे, की उसयो प्रभु ला कुछ मिलणा, क्योकिं इदा मन घडी-घडी बदलुन्दा रेदा कने लोक इस पर भरोसा नी करी सकदे। 9 जडे विस्वासी भाई गरीब न, उना जो खुश होणा चाईदा की परमेस्वरे उसयो कदेई इज्जत दिती। 10 जडे विस्वासी भाई अमीर न, उसयो खुश होणा चाईदा, की परमेस्वरे उसयो दीन किता, क्योकिं उदी अमीरी नाश होणे बाले जंगली घांटे सांई हे दे फुलां सांई झडी करी खत्म होईं जांती है। 11 क्योकिं सूरज निकलदे ही जारे दी धूप पोंदी कने सारा घा सूकी जांदा है, कने उसा दे सारे फूल झडी जांते न, कने उना दी शोभा मुकी जांती है, तियां ही अमीर विस्वासियो भी मरी जाणा अगर सै अपने ही कम्मा च लागीं रेंगा। 12 धन्य है सै माणु, जडा परख च टिकी रेदा है, क्योकिं जालू सै परख च खरा निकली जांदा है, तां उसयो अनन्त जिंदगी दा सै मुकुट मिलणा जिसदा बायदा परमेस्वरे अपने प्यार करणे बालयां तांई कितया है। 13 जालू कुसी दी परख हो, तां सै ऐ ना समझे, की मेरी परख परमेस्वरे करा दा है, क्योकिं ना तां बुरियां गल्लां ने परमेस्वरे दी परख होईं सकदी है, कने ना ही परमेस्वर कुसी दी परख अपु लेंदा है। 14 पर हर माणु अपणियां ही बुरिया इच्छा च फसी करी परख च पौंदा है, जियां इक डंगर खाणे दे लालचे आई करी फाईया च फसी जांदा है। 15 फिरी सै बुरी इच्छा गर्भती होईं के पापे जो जन्म दिन्दी है, कने जालू पाप बदी जांदा है, तां सै हमेशा दी मौत दा रस्ता है। 16 मेरे प्यारे मसीह भाईयो, धोखा च मत रिया। 17 क्योकिं हर इक खरा वरदान कने हर इक खरा दान स्वर्ग ला ही है, कने ज्योतियां दे पिता ला ही मिलदा है, सै हमेशा इकोदिया रेदा कने ना ही छाया पौंदा है। 18 उनी अपणी ही इच्छा ने सांझे सच्चे बचना ने नोई जिन्दगी दितियो है, ताकिं असां उदी बणाईयो दुनिया दे सारयां ला जरूरी हिस्सा बणन। 19 हे प्यारे मसीह भाईयो, ऐ गल्ल तुसां जाणी लिया हर इक माणु सुणने तांई हमेशा तैयार कने बल्ले बोलणे बाला कने घट गुस्से बाला हो। 20 क्योकिं जालू माणु गुस्सा करदा है तां, सै धार्मिक जिन्दगी नी जी सकदा, जडा परमेस्वरे जो खुश करदा है। 21 इस तांई मने दी सारी मेला जो कने दुशमणिया जो मुकाई करी परमेस्वरे दे बचने जो प्यारे ने अपनाई लिया, जडा तुहाडे दिले च रखया है, कने जडा तुहाडे प्राणा दा उद्धार करी सकदा है। 22 पर परमेस्वरे दे बचना दी शिक्षा दा पालन करणे बाला बणा, ना की सिर्फ सुणणे बाले, जडे अपने आपे जो धोखा दिन्दे ना। 23 क्योकिं अगर कोई बचन दी शिक्षा जो सिर्फ सुणनेबाला है, पर मनदा नी है, तां सै उसा माणुए सांई है, जडा अपना मुं शीशे च दिखदा है। 24 इस तांई की सै अपने आपे जो दिखीकरी चली जांदा है, कने झट भूली जांदा है, की मैं कदिया था। 25 पर जडा माणु परमेस्वरे दी पूरी व्यवस्था दा ध्याने ने अध्ययन करदा है, जडी लोकां जो पापां ला अजाद करदी है, सै इसयो सुणी के भुलदा नी है, पर इसदी शिक्षा दा पालन करदा है, उसयो अपने कम्मा पर परमेस्वरे ला आशीष मिलणी। 26 अगर कोई अपने आपे जो भक्त समझे, कने बुरियां गल्लां बोलणे च काबू नी रखे, तां सै अपने आपे जो धोखा दिन्दा है कने उदी भक्ति बेकार है। 27 साडे पिता परमेस्वर दिया नजरा च शूद्र कने सच्ची भक्ति ऐ है, की अनाथां कने विधवां दे दुखां च उना दा हाल चाल पुच्छन, कने अपने आपे जो संसारे दे बुरे कम्मा ला बचाई रखा।

2 हे मेरे प्यारे मसीह भाईयो, तुसां साडे महिमामय प्रभु यीशु मसीह दे चले न, इस तांई तुसां च भेदभाव ना हो। 2 मन्नी लिया, अगर इक माणु सोने दे छल्ले कने छेल कपडे पाई करी तुहाडिया कलीसिया च ओए कने इक गरीब माणु मैले कपडे पाई करी ओए। 3 कने तुसां उस छेल कपडे बालयो बडिया इज्जता ला बोलन, की तू ओथु खरिया दिया जगा च बैठ, कने तू उस गरीबे जो बोले, तू ऐथु खडोई रे, “या मेरे पैरां बाल बैठ।” 4 तां क्या तुसां इना दोनों च भेदभाव नी किता कने तुसां बुरे बिचारे ला न्याय करणे बाले नी बणीं गे? 5 हे मेरे प्यारे मसीह भाईयो सुणा; इसा गल्ला पर ध्यान दिया, क्या परमेस्वरे इस संसारे दिया नजरा च गरीब लोकां जो भरोसे च अमीर होणे तांई नी चुणयां? परमेस्वरे उना जो स्वर्ग राज्य च वारिस बणने दा भी वायदा कितया है जडे उसयो प्यार करदे ना। 6 पर तुसां उस गरीबे दी बेसती किती। तुसां जाणदे न अमीर लोक तुसां पर जल्म करदे न कने सै तहांजो कचेरिया च घसीटी-घसीटी के लेई जांते ना। 7 सै सेई न जडे यीशु मसीह दे आदर योग्य नाऐ दे खिलाफ बुरियां गल्लां करदे न, जिना सोगी तुसां रिशता रखदे ना। 8 अगर तुसां पबित्र शाब्दे दे इस बचने दे अनुसार की “तू अपने पडोसियां सोगी अपने सांई प्यार कर,” सच्ची उस राज्य दी व्यवस्था जो पूरा करदे न तां खरा करदे ना। 9 पर अगर तुसां भेदभाव करदे न, तां पाप करदे न; कने व्यवस्था दे अनुसार तुसां दोषी ना। 10 क्योकिं जडा कोई सारी व्यवस्था दा पालन करदा है, पर उदे इक हुकम जो तोडदा है, तां सै भी उसी सांई दोषी है जिनी सारिया व्यवस्था दा पालन नी किता। 11 इस तांई परमेस्वरे ऐ बोलया, तू व्यभिचार मत करदा, उनी ही ऐ भी बोलया की, “तू हत्या मत करदा” इस तांई अगर तू व्यभिचार नी किता, पर हत्या कितियो है, तां तू व्यवस्था दे अनुसार दोषी है। 12 इस तांई तुहाडा बचन बोलणा कने उना जो मणणा, उना लोकां सांई होऐ, जिना दा न्याय उसा व्यवस्था दे अनुसार होणा है, जडी सांझे अजाद करदी है। 13 क्योकिं जडा कोई दुज्जयां पर दया नी करगा, तां परमेस्वरे भी उस पर दया नी करणी। पर जडा कोई दुज्जयां पर दया करगा, तां परमेस्वरे भी उस पर दया करणी, जालू उनी न्याय करणा। 14 हे मेरे प्यारे मसीह भाईयो, अगर कोई बोले की मिंजो यीशु मसीह पर भरोसा है, पर सै दुज्जयां तांई भले कम्म नी करदा हो, तां इसला क्या फायदा? क्या ऐसा भरोसा उदा उद्धार करी सकदा है? 15 अगर कुसी मसीह भाई या बेहणा बाल जरूरी कपडे ना होन, कने उना जो खाणे जो घट मिलदा हो, 16 कने तुसां चे कोई उना जो बोले कि, “प्रभु तहांजो आशीष दे कने तहांजो गर्म रखे कने खाणे जो रोटी दे,” पर जडियां चीजां साडे शरीर तांई जरूरी न, अगर सै उना जो ना देन, तां इसला उदा कोई फायदा नी होणा। 17 तियां ही भरोसा भी, अगर भले कम्मा सोगी नी हो तां उदा भरोसा बेकार है। 18 “कोई बोलदा है की मैं यीशु मसीह पर भरोसा करदा है, कने दुज्जा माणु बोलदा है की मैं भले कम्म करदा है।” पर मैं बोलदा है, “क्या तुसां बिना भले कम्म करिरी मिंजो ऐ साबित करी सकदे न की तुसां यीशु मसीह पर भरोसा करदे न? मैं अपने भले कम्मा करणे दे जरिये ऐ साबित करी सकदा है की मैं यीशु मसीह पर भरोसा करदा है।” 19 तिजो भरोसा है, की इक ही परमेस्वर है; ऐ अच्छी गल्ल है: बुरियां आत्मा भी भरोसा रखदियां न, कने उदियां ना। 20 पर मुर्ब माणु क्या तू ऐ भी नी जाणदा, की भले कम्म बिना भरोसा बेकार है? 21 जालू साडे पूर्वज अब्राहमे अपने पुत्र इसहाक दी बलि वेदिया पर चढाई, तां उनी जडा भला कम्म किता, उसला ही सै परमेस्वरे दे सामणे धर्मी बणया था। 22 तू दिखी लिया की भरोसे उदे कम्मा सोगी मिली के प्रभाव पाया है, कने उदे कम्मा दे जरिये उदा भरोसा पूरा होया। 23 कने पबित्र शाब्दे दा ऐ बचन सच्च होया, अब्राहमे परमेस्वरे पर भरोसा किता, कने उदे भरोसे दिया बजा ला उसयो धर्मी माणु मणया, कने उसयो परमेस्वरे दा मित्र बोलया गया। 24 तां तुसां दिखी लिया की माणु सिर्फ भरोसे ला ही नी पर भले कम्मा दिया बजा ला इक माणु धर्मी बणदा है। 25 तियां ही रहाब वैश्या भी, जालू उना संदेश देणेबाले दूतां जो अपने घरे रेणे दी जगा दिती कने दुज्जे रस्ते ला विदा किता, तां सै भी अपने इस भले कम्मे दिया बजा ला धर्मी मन्नी गई। 26 जियां साडा शरीर बिना सां दे मरया होया है, तियां ही भरोसा भी भले कम्मा दे बिना बेकार है।

3 हे मेरे मसीह भाईयो, तुहाडे चे कलीसिया दे मते गुहू मत बणदे, क्योकिं तुसां जाणदे न, की असां गुहूआं दा न्याय होर भी जादा सकतिया ला होणा है। 2 असां सारे बडी बरी गलतियां करी दिन्दे न; पर अगर कोई माणु जडा कुछ सै

बोलदा है, उस च कोई गलती ना करे, तां सेई सिद्ध माणु है, कने अपने आपे जो पूरी तरह बशे च रखी सकदा है। 3 अगर असां घोडयां जो अपने वशे च करणे तांई उना दे मुंए च लगाम लांदे न, तां असां उना दे सारे शरीर जो कुसी भी पासे घुमाई सकंदे न। 4 दिखा, जाज भी कितणे बड़े होंदे न, कने तेज होआ ने चलाए जांदे न, तमी इक छोटी दिया पतवारा ने मॉंझी अपणिया मरजिया ला मोडी दिदा है। 5 तियां ही जीभ भी सांडे शरीर दा इक छोटा दिया अंग है, कने बडियां-बडियां गल्लां करदी है: दिखा किया, इक छोटी देई चिंगारी कितणे बड़े बणे च अग्न लगाई सकदी है। 6 ऐ छोटी जीभ भी इक चिंगारी सांई है; ऐ शरीर दा सबते बुरा हिस्सा है, जडा इक माणुऐ दी सारी जिन्दगी जो नरके दी अग्नी च नाश करी दिन्दी है। (Geenna g1067) 7 हर तरा दे बणे दे जानवर, पंछी, कने रेंगणेबाले जानवर कने पाणिए ऐ च रेहणे बाले तां माणुऐ दे वशे च होई सकंदे न, कने होई भी गियो न। 8 पर जीभा जो कोई भी माणु वशे च नी करी सकदा; सै इक ऐसी बला है, जडी कदी भी स्कदी ही नी है; कने जहरिले सांई खतरनाक है। 9 इसा जीभा ला ही असां प्रभु यीशु कने पिता परमेश्वर दी स्तुति करंदे न, कने इसा जीभा ला ही माणुआं जो श्राप दिन्दे न, जिना जो परमेश्वरे अपने स्वरूप च बणया है। 10 इक ही मुंए ला श्राप कने धन्याबाद दोनो निकलंदे न। हे मेरे मसीह भाईयो, ऐसा नी होणा चाईदा। 11 पाणिए दे इकी ही खुऐ ला कोडा कने मिठा पाणी दोनो सोगी कदी नी निकली सकंदे। 12 हे मेरे मसीह भाईयो, इयां ही अंजीर दे सखे च जैतून, या दाखा दिया बेला च अंजीर कदी नी लगी सकंदे। इयां ही पाणिए दे इकी ही खुऐ ला कोडा कने मिठा पाणी दोनो सोगी कदी नी निकली सकंदे। 13 तुसां च ज्ञान बाला कने समझदार कुण है? अगर तुसां हेन, तां तुहांजो इसयो अच्छी जिन्दगी जी करी साबित करणा चाईदा कने शांत सभाब जडा तुहाडे ज्ञान ला ओंदा है, अपने भले कम्मा दे जरिये साबित करणा चाईदा। 14 अगर तुसां अपने मने च कडवाव, जलन कने मतलबीपन रखंदे न, तां इदा घमंड मत करंदे, कने ना ही सच्च दे खिलाफ कोई झूठ बोलनयो। 15 ऐ ज्ञान से नी है, जडा स्वर्ग ला मिलदा है, ऐ तां शारीरिक, संसारिक, कने शैतानी है। 16 क्योकि जिथु जलन कने मतलबी हुंदा है, ओथु बखेडा कने हर तरा दे बुरे कम्म भी होंदे न। 17 पर जडा ज्ञान स्वर्ग ला मिलदा है, सै पेहले तां पबित्र होंदा है, फिरी मिलनसार, कोमल, कने प्यारभाव, दया ला भस्या, खरे कम्मा ला लदुया कने बिना कुसी भेदभाव कने बिना कुसी कपट दे होंदा है। 18 कने जडे मेल मिलाप करणे बाले न, उना शान्ति दा बी राणा कने धार्मिकता दा फसल बडणी।

4 तुसां च ऐ लडाई कने झगडे कुथु ला ओंदे न; ऐ उना इच्छा ला ओंदे न जडियां तुहाडे अंदर लडदियां न। 2 तुसां कुछ चांदे न, पर जालू तुसां जो सै मिलदा नी है; इस चांई तुसां हत्या करणे चांई तैयार होई जांदे न, की तुहांजो सै मिली जाऐ, पर कुछ हासिल नी हुंदा तांई तां तुसां लडदे झगडदे न, तुहांजो इस चांई कुछ नी मिलदा क्योकि तुसां परमेश्वरे ला कुछ नी मंगंदे न। 3 तुसां मंगंदे न फिरी भी तुहांजो नी मिलदा, क्योकि तुसां बुरिया इच्छा ला मंगंदे न, ताकि अपने बुरे कम्मा च उडाई दे। 4 हे व्यभिचारियो सांई वेविश्वासी लोको, क्या तुसां नी जाणंदे, कि संसारे दिया चीजां ला मित्रता करणे दा मतलब परमेश्वरे ला बैर करणा है, जडा संसारे दा मित्र बणना चांदा है, सै अपने आपे जो परमेश्वरे दा बैरी बणाई लेंदा है। 5 क्या तुसां ऐ समझंदे न, की पबित्र शाश्रु च जडा लिखया है सै बेकार है, “जिसा पबित्र आत्मा जो नी सांडे अंदर बसाया है, सै ऐ चांदा है की असां परमेश्वरे दी ही अराधना करना।” 6 पर परमेश्वर सांझो होर भी जडा अनुग्रह दिन्दे है ताकि असां बुरियां इच्छां दे खिलाफ खडे होई सकन, इस बजा ला पबित्र शाश्रु च ऐ भी लिखया है कि, “परमेश्वर घमंडियां दा बिरोध करदा है, पर दीन लोकां पर अनुग्रह करदा है।” 7 इस चांई परमेश्वरे दे अधीन होई जा; कने उना कम्मा जो करणे ला मना करा जडा कि शैतान चांदा है की तुसां करा, तालू उनी तुहाडे सामणे ला नसी जाणा। 8 परमेश्वरे दे नेडे ओआ, तां उनी भी तुहाडे नेडे ओणा, ओ पापियो, अपने मना जो शूद्र करा। लगातार सोच बदलने बाले लोको, अपने दिले जो पबित्र करा। 9 अपने पापां दिया बजा ला दुखी होआ, शोक करा, कने रोआ: तुहाडी हंसी रोणे च कने खुशी उदासिया च बदली जा। 10 प्रभुऐ दे सामणे दीन बणा, तां उनी तुहांजो उच्चा उठाणा। 11 हे मसीह भाईयो, इक दुज्जे दी निंदा मत करा, जडा अपने भाईयां दी निंदा करदा है, या भाई पर दोष लांदा है, तां सै व्यवस्था दी निंदा करदा है, कने व्यवस्था पर दोष लांदा है, तां त्

व्यवस्था पर चलणे बाला नी, पर उस पर न्याय करणे बाला होया। 12 परमेश्वर ही है जडा व्यवस्था देणेबाला कने न्याय करणे बाला है सै नाश करणे बाला कने बचाणे बाला है; तुसां कुण होंदे न, जडे अपने पडोसिए पर दोष लांदे न? 13 तुसां जडा ऐ बोलंदे न, “अज या कल असां दुज्जे शेहरे च जाईके इक साल ओथु रेंगे, कने व्यापार करिरी फायदा करगे।” 14 पर ऐ नी जाणंदे न की कल क्या होणा है। तुसां सुणा! की तुहाडी जिन्दगी हे ही क्या? तुसां ता मन्ना की धुंधा सांई न, जडी थोडी देर मिलदी है, फिरी उडी जांदी है। 15 इस चांई तुहांजो ऐ बोलणा चाईदा, “अगर प्रभु दी मर्जी होगी, तां असां जींदे रेण है, कने ऐ या सै कम्म भी करगे।” 16 पर हण तुसां अपनी बडियां-बडियां योजना पर घमंड करंदे न; ऐसा सारा घमंड बुरा होंदा है। 17 इस चांई जडा कोई भलाई करणा जाणदा है कने नी करदा, उदे तांई ऐ पाप है।

5 हे अमीरो, सुणा; तुसां लोकां जो रोणा कने जोरे-जोरे ला चिलाणा चाईदा, क्योकि मुसीबता तुहाडे पर ओणे बालियां न। 2 तुहाडी धन दौलत नाश होई जाणी कने तुहाडे कण्डयां जो कीडे लगी गिया है। 3 तुहाडा सोना चांदी बेकार होई गिया है; जिस धन दौलत पर तुसां भरोसा करंदे न उनी तुहांजो अग्नी सांई फुकी देणा: तुहाडा गटेरया धन दौलत न्याय दे दिने तुहाडे खिलाफ सबूत दे स्पे च खडा होई जाणा। 4 दिखा, जिना मजदूर तुहाडे खेत बड़े, उना दी मजदूरी जडी तुसां उना जो नी दिती, उना दी नी दीतियो मजदूरी परमेश्वरे दे सामणे तुहाडे खिलाफ चिलाई-चिलाई करी गबाई दे दी है, कने मजदूरं दी दुहाई स्वर्गीय सेना दे प्रभुऐ सुणी लेई है। 5 तुसां धरतिया पर भोग-विलास करणा लगी रे, कने बडा भरी सुख भोगया; तुसां तां उस जानवरे सांई होई है, जिसयो मारणे ला पेहले खुआई पियाई करी मोटा करंदे न, इयां ही तुसां भी नी जाणंदे न, की तुसां नाश होआ दे न। 6 तुसां भोले लोकां जो दोषी बोली करी मारी दिता, कने सै तुहाडे खिलाफ लडी ही नी सके। 7 इस चांई हे मसीह भाईयो, प्रभुऐ दे ओणे दीकर सबर रखा, जियां किसान धरतिया दे किमती फसल दी आस रखीकर पैली कने आखरी बरखा होणे दीकर सबर रखदा है। 8 इयां ही तुसां भी सबर रखा, कने आस मत छडा, क्योकि प्रभु ओणे बाला है। 9 हे मसीह भाईयो, इक दुज्जे पर दोष मत ला, ताकि तुहाडे पर भी दोष ना लगणे, दिखा, न्याय करणे बाला ओणे तांई तैयार है। 10 हे मसीह भाईयो, जिना परमेश्वरे दे संदेश देणेबालयां प्रभु दे नां ला गल्लां कितियां न, उना जो दुख झेलणे कने सबर रखणे दा इक आदर्श समझा। 11 दिखा, असां धीरज रखणे बालयां जो धन्य बोलंदे न। तुसां प्रभु दे सेवक अत्यंत दे सबर दे बारे च रणया ही है, कने तुसां ऐ भी जाणंदे न की प्रभुऐ आखरी च उदी कियां सहायता किती, उसला प्रभु दी बडी कस्णा कने दया प्राप्त होंदी है। 12 पर हे मेरे मसीह भाईयो, सारायां ला बडी गल्ल ऐ है, कदी भी कसम मत खांदे, ना ही स्वर्ग दी, ना ही धरतिया दी, ना ही कुसी होर चीजा दी, पर तुहाडी गल्ल हां दी हां, कने ना दी ना हो, ताकि तुहांजो परमेश्वरे ला सजा ना मिलले। 13 अगर तुहाडे च कोई दुखी हो तां सै प्राथना करे, अगर कोई खूश हो तां सै स्तुति दे भजन गाऐ। 14 अगर तुसां चे कोई रोगी हो, तां सै कलीसिया दे अगुवां जो संदे, कने सै प्रभु दे नाऐ ला उस पर तेल मली करी उदे तांई प्राथना करा। 15 कने भरोसे दिया प्राथना ला मरीजे दे सारे रोग दूर होई जाणे, कने प्रभुऐ उसयो ठीक करी देणा; अगर उनी पाप भी कितयो होंगे, तमी परमेश्वरे उसयो माफ करी देणा। 16 इस चांई तुसां अपु च इक दुज्जे दे सामणे अपने-अपणे पापां जो मनी लिया; कने इक दुज्जे तांई प्राथना करा, जिसला तुसां ठीक होई जान; इक धर्मी जणे दी प्राथना बडी सामथी है कने अदभुत नतीजे निकलंदे न। 17 परमेश्वरे दा संदेश देणेबाला एलियाह भी तां सांडे सांई दुख-सुख भोगी माणु था; कने उनी पुरे दिले ला गिडगिडाई करी प्राथना किती, की बरखा ना हो, कने सांडे तिना सालां दीकर धरती पर बरखा नी होई। 18 फिरी उनी प्राथना किती, तां अम्बरे ला बरखा होई, कने धरती हरी बरी होई। 19 हे मेरे मसीह भाईयो, अगर तुसां चे कोई परमेश्वरे दे सच्च दे रस्ते ला भटकी जा, कने कोई तुसां चे उसयो बापस फेरी लेई ओऐ। 20 तां तुसां समझी लिया, जडा कोई परमेश्वरे दी सच्ची शिक्षा ला भटकयो पापियो जो बापस लेई ओगा, उनी इक आदिमिये दे प्राणा जो मौत ला बचाणा है, कने परमेश्वरे उदे केई पापां जो माफ करी जाणा।

1 पतरस

1 मैं, पतरस जडा यीशु मसीह दा प्रेरित है, ऐ चिट्ठी मेरिया तरफा ला है। मैं ऐ चिट्ठी परमेश्वरे दे चुणयो लोकां जो लिखा दा है जडे पुन्तस, गलातिया, कपपदकिया, आसिया, कने बिन्तिया प्रदेशां दे लग-लग शेहरां च परदेसियां सांई रेंदे न। **2** कने पिता परमेश्वरे बडे पेहेले ही तूहांजो अपने लोक होणे तांई कने पबित्र आत्मा दे कम्मे दे जरिये तूहांजो चुणी लिया है। उनी ऐसा इस तांई किता ताकि तूसां यीशु मसीह दे हुकमा जो मनन कने उदे खने ला शूद्र होई सकन। मैं प्राथना करदा है की परमेश्वर तूसां जो अनुग्रह कने शांति दिन्दा रे। **3** साडे प्रभु यीशु मसीह दे पिता कने परमेश्वरे दा धन्यवाद हो। परमेश्वरे सांझो अपनी दया ला इक नोई जिन्दगी दिती है, क्योंकि परमेश्वरे यीशु मसीह जो मरयां चे जिन्दा करिरी सांझो बडे आत्मविश्वास सोगी जिणे दे काबिल बनाया है; मतलब की असां उना चीजां जो मिलणे दी उम्मीद करी सकदे न जडियां उनी सांझो देणे दा बायदा कितया है। **4** असां उना खरियां चीजां दा मिलणे दा इंतजार करते न जडियां परमेश्वरे साडे तांई नैवार कितियां न। कोई भी कदी भी इना चीजां दा नाश नी करी सकदा। उना कदी भी पुराणिया कने उना दी सुन्दरता घट नी होणी। परमेश्वरे तूहाडे तांई स्वर्ग च उना चीजां जो रखया है। **5** परमेश्वर अपणिया शक्तिया ला तूहाडी रक्षा करदा है, क्योंकि तूसां यीशु मसीह पर भरोसा करते न। उनी तूहांजो आखरी दिने दीकर जालू यीशु मसीह मुडी करी ओणा है बचाई रखणा है। तालू तूहांजो पता लगी जाणा की परमेश्वरे तूहांजो पाप कने मोत ला पूरे तरीके ला बचाई लिया है। **6** तूहांजो इना सारियां चीजां दे बारे च खुश होणा चाईदा, चाहे हण थोडे बकते तांई लग-लग तरा दियां पेशानियां तूहांजो दुखी करदियां न। **7** कने ऐ पेशानिया इक तांई होदिया न की ताकि पता लगी सके की तूहाडा भरोसा परमेश्वर पर है की नी। यीशु मसीह पर तूहाडा भरोसा सोने ला भी जादा कीमती है। जियां नाश होई जाणे बाले सोने जो अग्नी च परखया जांदा है कने शूद्र होंदा है, इयां ही तूहाडा भरोसा भी अगर पेशानियां होणे बाद भी मजबूत रेंदा है, तां इसला तूहाडी बडी तारीफ कने महिमा कने इज्जत होणी जालू यीशु मसीह फिरी इस संसारे च मुडी ओणा है। **8** तूसां यीशु मसीह जो कदी नी दिखया है, फिरी भी तूसां उसयो प्यार करते न। तूसां हण उसयो नी दिखा दे न, पर फिर भी तूसां उस पर भरोसा करते न। इस तांई तूसां खुशी कने महिमा ला जादा खुश होआ जिसयो अखरां च ब्यान नी करी सकदे न, **9** क्योंकि परमेश्वर तूहांजो पाप दिया सजा ला बचांदा है। ऐ यीशु मसीह पर तूहाडे भरोसे दा फल है। **10** ऐ उद्गार कुछ ऐसा था जिदे बारे च परमेश्वरे दे संदेश देणेबाले होर जाणा चांटे थे। उना दसया की क्रियां परमेश्वरे तूहांजो बचाणे तांई अपनी दया तूहांजो पर किती जिदे तूसां काबिल नी न, उना उस जबाब जो तोपणे तांई बडी मेहनत किती। **11** मसीह दी आत्मा परमेश्वरे दे संदेश देणेबालयां च था, जडा मसीह दे दुखां कने उना दुखां बाद मिलणे वाली महिमा दे बारे च उना जो पेहेले ला दस्सा दा था। परमेश्वरे दा संदेश देणेबालयां ऐ जाणने दी कोशिश किती की आत्मा उना जो क्या दस्सा दा था, ऐ सारियां गल्लां कालू होणियां कने ऐ क्रियां पुरियां होणियां। **12** पर परमेश्वरे इना परमेश्वरे दे संदेश देणेबालयां जो दसया की उना दे संदेश अपु अपने तांई नी न बल्कि तूहाडे तांई थे। सै संदेश यीशु मसीह दे बारे च श्भसमाचार है जडा तूसां हण सुणया है। परमेश्वरे स्वर्ग ला पबित्र आत्मा भेजया ताकि तूहांजो श्भसमाचार प्रचार करणे तांई सहायता करे। ऐ सब इतना अनोखा है की ऐशु दीकर की स्वर्गदूत भी बडिया गौर ला इना गल्लां जो होंदे होए दिखदे न। **13** इस तांई अच्छे तरीके ला सोचा कने अपने आप पर काबू करणे दी कोशिश करा। कने उस उद्गार दी आस अनुग्रह पर लाई रखा जडा तूहांजो तालू मिलणा है जालू यीशु मसीह दुबारा इस संसारे च मुडी करी ओणा है। **14** परमेश्वरे दिया आज्ञा दा पालन करा जियां अच्छे बच्चे अपने पिता दिया आज्ञा दा पालन करते न। कने उना बुरे कम्मा जो मत करा जिना ती तूसां इच्छा रखदे थे, जालू तूसां परमेश्वरे दिया सच्चाईया जो नी जाणने थे। **15** पर हण तूहांजो हर कम्मा च जडे तूसां करते न पबित्र होणा चाईदा, जियां की परमेश्वर पबित्र है, जिनी तूहांजो अपने बच्चे होणे तांई चुणया। **16** क्योंकि पबित्र शास्त्र च लिखया है की, "तूहांजो पबित्र होणा चाईदा क्योंकि मैं पबित्र है।" **17** कने जालू तुसां प्रथाना करते न, तां तूसां परमेश्वरे जो अपना पिता बोलदे न। पर तूसां याद रखा की सै भेदभाव नी करदा है,

कने हर कुसी जो उदे कम्मा दे अनुसार न्याय करदा है। इस तांई जालू की तूसां इसा धरती पर इक परदेसी होईकरी रेंदे न तां तूहांजो परमेश्वरे दी बडी इज्जत करणी चाईदी। **18** क्योंकि तूहांजो पता है की तूसां पेहेले इक बेकार तरीके ला जिन्दगी जिया दे थे, इक ऐसा तरिका जडा तूहाडे पूर्वजां दे बकत ला चली ओआ दा था। पर तूहांजो उस बेकार जिन्दगी ला बचाई लिया। तूहांजो सोने या चांदिया सांई खत्म होणे बालियां चीजां ला नी खरीदया है, पर मसीह दे बडे कीमती खूने ला खरीदया, जडा इक शूद्र कने सिद्ध मेमने सांई था। **20** इस संसारे जो बणने ला पेहेले, परमेश्वरे पेहेले ला ऐ फेसला करी लिया था की यीशु मसीह छुड़ाणे बाला होणा। पर सै इना आखरी दिना च तूहाडी सहायता करणे तांई इस संसारे च प्रगत करे। **21** जडा कुछ भी मसीह किता है उदिया बजा ला तूसां परमेश्वर पर भरोसा करते न। परमेश्वर सेई है जीनी यीशु मसीह जो मरयां चे जिन्दा किता, कने उसयो बडी जादा महिमा दिती। इस तांई तूसां भरोसा करते न कने परमेश्वर पर तूहाडी उम्मीद पक्की है। **22** क्योंकि सच्चाईया जो मनणे ला ही तूहांजो तूहाडे पापां ला शूद्र कितया है, हण तूहांजो अपने साथी मसीह भाई बेहणा सोगी इमानदारी कने साफ मने ला प्यार करते रेंणा चाईदा। **23** तूहांजो इक दुखे ला प्यार करणा चाईदा क्योंकि तूहांजो परमेश्वरे दिया तरफा ला इक नोई जिन्दगी मिलियो है। तूहांजो ऐ जिन्दगी कुसी ऐसिया चिजा ला नी मिलियो है, जिना खत्म होई जाणा, पर हमेशा टिकी रेणेबाले बचन दे जरिये नोई जिन्दगी मिलया है। (aiōn g165) **24** क्योंकि पबित्र शास्त्र ऐ बोलदा है, "हर इक माणु घांटे सांई है, कने उदी सारी शोभा घांटे दे फुलां सांई है। घांटे सुकी जाणा है, कने फुलां झडी जाणा है।" **25** पर परमेश्वरे दा बचन हमेशा बणी रेंदा है। कने ऐ बचन मसीह दे बारे च श्भसमाचार है जडा तूहांजो च प्रचार कितया है। (aiōn g165)

2 इस तांई हर तरा दा बुरा व्यवहार छुडी दिया, दुज्जयां जो धोखा मत दिया, पाखंडी मत बना, दुज्जयां ला जलन मत रखा, कुसी जो बदनाम मत करा, **2** जियां नोए जम्यो बच्चे अपनी माता दे दुधे दी इच्छा रखदे न, तियां ही तूहांजो परमेश्वरे दे बचन सिखणे दी इच्छा रखणी चाईदी ताकि तूसां आत्मिक रूप च मजबूत बणी सकन। तां आखरी च, परमेश्वरे तूहांजो इस संसारे दियां बुरियां चीजां ला पूरे तरीके ला बचाई लेणा। **3** क्योंकि जियां पबित्र शास्त्र च लिखया है की, "तूसां अपने अनुभव ला जाणया है की प्रभु भला है।" **4** प्रभु यीशु दी तुलना इक जिन्दे पत्थरे ला कितियो है। उस पत्थरे जो माणुआ फेंकी दितया था क्योंकि उना बोलया की ऐ बेकार था। पर परमेश्वरे दिया नजरा च, सै अनमोल है, कने परमेश्वरे उसयो नियां दे मुख्य पत्थरे दे स्पे च चुणया। हे मेरे मसीह साथियों तूसां भी मसीह बाल ओआ, ताकि तूहांजो भी उदे जरिये जिन्दे पत्थरां सांई बनाया जाऐ जडे परमेश्वरे दी आरधना दा घर बणाणे तांई लगाऐ जादे न। उनी तूहांजो भी पबित्र याजक बनाया है। क्योंकि जियां याजक परमेश्वरे जो चढावा देछांदे न, तियां ही तूसां भी चढावे दे स्पे च अपना दिल परमेश्वरे जो चढाया है। कने सै चढावा परमेश्वरे जो खुश करदा है, क्योंकि तूसां यीशु मसीह दे न। **6** ऐ तियां ही है जियां परमेश्वरे पबित्र शास्त्र च बोलया है, "दिखा, मैं कुसी जो यरूशलेम शेहरे च कुणे दे पत्थरे सांई रखा दा है। सै इक बडे कीमती पत्थरे सांई है जडा नियां तांई चुणया। जडा उस पर भरोसा करदा है कने निराश नी होँदा।" **7** ऐ पत्थर तूहाडे तांई बडा कीमती है जडे यीशु मसीह पर भरोसा करते न। पर जडे लोक उस पर भरोसा नी करते उना दे बारे च पबित्र शास्त्र बोलदा है की, "जिस पथरे जो राजमिश्त्रियां बेकार बोली करी लागे तांई मना करी दितया था, सै घरे दिया नियां च सारयां ला जरूरी पत्थर बणी गिया।" **8** कने फिरी पबित्र शास्त्र च ऐ भी लिखया है, "इनी पत्थरे लोकां दी ठोकर खाने दी बजा होणा, ऐ इक चट्टान है जडी उना दे डेई पोणे दी बजा होणी।" क्योंकि सै परमेश्वरे दे संदेश जो नी मनणे दिया बजा ला ठोकर खांदे न। परमेश्वरे उना सोगी ऐसा ही होणे दी योजना बनाईयो है। **9** पर तूसां ऐसे नी न क्योंकि तूसां परमेश्वरे दे चुणयो लोक न, तूसां परमेश्वरे दे याजक न, राजे न, तूसां परमेश्वरे दी सेवा करणे तांई समर्पित न कने परमेश्वरे दी अपनी निज सम्पति न। उनी तूहांजो नेहेरे ला बार अपनी अनोखी लौई च सदया है, ताकि तूसां परमेश्वरे दे अनोखे कम्मा दे बारे च दस्सी सकन। **10** (परमेश्वरे दे संदेश देणेबाले होणे जडा लिखया है सै तूहाडे बारे च सच्च है।) इक बकत था जालू तूसां परमेश्वरे दे लोक नी थे, पर हण तूसां परमेश्वरे दे लोक न। पेहेले तूसां परमेश्वरे दिया दया जो नी जाणदे थे पर हण तूसां इसा जो जाणदे न क्योंकि उनी पेहेले ला ही तूहाडे पर

अपणी दया दस्सी है। 11 प्यारे मसीह भाईयो तूसां इस संसारे क परदेशियां कने यात्रियां साई रे दे न। मै तुहाजो ला विनती करदा है की उना सारियां बुरियां शरीरिक इच्छां ला बचा क्योकि सै हमेशा तुहाडिया अपणिया आत्मा दे खिलाफ लडदियां न। 12 केई बरी ऐसे लोक होंदे न जडे प्रभु जो नी जाणदे न कने सै तुहांजो पर ऐ बोली करी गलत इल्जाम लांदे न की तुहाडे कम्म बुरे न। इस तांई इक अच्छी जिन्दगी जिया ताकि सै उना भले कम्मा जो दीखन जडे तूसां करदे न कने उस दिन परमेश्वरे जो महिमा देन जिस दिन यीशु मसीह मुडी करी ओणा है। 13 प्रभु यीशु दी इज्जत मान करणे तांई तुहांजो उना सारे हुकमा जो मनणा चाईदा जडे इस संसारे दे अधिकारी न; मलब क की राजा दे अधीन जडा सारयां ला बड्डा कने जरूरी अधिकारी है, 14 कने राज्यपालां दे अधीन रिया क्योकि सेई ही है जिदा उपयोग राजा उना लोकां जो सजा देणे तांई करदा है, जिना दे कम्म बुरे न कने उना लोकां दी तारीफ करणे तांई जिना दे कम्म अच्छे न। 15 क्योकि परमेश्वरे दी ऐ इच्छा है, की साडे भले कम्मा करणे ला, जडे लोक परमेश्वरे जो नी जाणदे, सै अमेगे जो सांझो पर गलत तरीके ला इल्जाम लाणे दी हिम्मत ना करन, क्योकि ऐ गल्ल साफ-साफ पता है की उना दे झूठे इल्जाम सच्च नी न। 16 तुहाडे तांई ऐसा कोई भी नी है जडा तुहांजो सै करणे तांई रोकी सके जडा तूसां करणा चांदे न क्योकि तूसां साडे प्रभु यीशु मसीह दे जरिये पेहले ही अजाद होई गियो न। पर बुरे कम्म करणे तांई इसयो भाना मत बणा। तुहांजो अपणे कम्मा ला दसणा चाईदा की तूसां सच्ची परमेश्वरे दे सेवक न। 17 सारयां दी इज्जत करा, अपणे मसीह भाईयां सोगी प्यार करा, परमेश्वरे ला डरा, राजा दी इज्जत करा। 18 हे सेबकों, तूसां जडे घरां च कम्म करदे न कने भरोसा करणे बाले न, तुहांजो अपणे मालिके दे हुकम मनणा चाईदे कने हमेशा उना दी इज्जत करणी चाईदी। इयां हर तरा दे मालिकां सोगी करा चाहे सै दयालु होन या सही होन, या जालिम होन। 19 क्योकि अगर असां दुख सेहन करदे न चाहे साडी गलती ना हो, पर असां सिर्फ इस तांई सेहन करदे न क्योकि असां परमेश्वरे दे बारे च सोचदे न, तां परमेश्वर सांझो ला खुश होंदा है। 20 पर अगर तुहांजो गलत करणे तांई मार पोदी है, तां सजा मिलणे पर सबर रखणे च तुहाडी तारीफ करणे दी कोई बजा नी है। पर अगर भलाई करणे दिया बजा ला तूसां दुख सेहन करदे न कने सबर रखदे न, तां परमेश्वर खुश होंदा है। 21 कने परमेश्वरे दे जरिये तुहांजो सदणे दी बजा चे इक बजा ऐ भी है की तूसां उदे तांई भले करदे होए दुख सेहन करी लेणा। यीशु मसीह जिनी तुहाडे तांई दुख सेहन किते, सै तुहाडे तांई इक उदाहरण है। इस तांई तुहांजो सेई कम्म करणे चाईदे जडे मसीह किते। 22 पबित्र शास्त्र च लिखया है, “उनी कदी पाप नी कित। उनी कदी झूठ नी बोलया।” 23 जालू लोकां यीशुऐ दी बेइजती किती, उनी पलटी करी उना दी बेइजती नी किती। जालू लोकां उसयो दुख दिता, तां उनी उना ला बदला नी लिया। बल्कि उनी अपणी सहायता तांई परमेश्वरे पर भरोसा कित, क्योकि सै जाणदा था की परमेश्वर हमेशा लोकां दा सही न्याय करदा है। 24 जालू मसीह मरया, तां साडे पापां दिया बजा ला सूली पर उदे शरीर जो सजा दिती। उनी ऐसा इस तांई कित ताकि असां पाप करणा बंद करी देन। कने उना जखमा दिया बजा ला जडे उनी सेहन किते, असां ठीक होई गे। 25 इक बकत पेहले तूसां भेडां सांई थे, जडियां गलत रस्ते पर जा दियां थियां। पर हुण तूसां यीशु मसीह बाल बापस आई गियो न जडा तुहाडिया आत्मा दा पुआल कने रखवाला है।

3 हे घरे बालियां, तूसां भी अपणे घरे बालयां दे अधीन रिया। ताकि अगर उना चे कोई भी परमेश्वरे दे बचना पर भरोसा करणे ला मना करदा है, तां तुहांजो ऐ दसणे दी जरूरत नी होणी की उना जो भरोसा करणा चाईदा। जालू उना दिखणा की क्रियां तूसां पबित्र जिन्दगी जिया दे कने परमेश्वरे दी इज्जत करदे न, तां उना मसीह पर भरोसा करी लेणा। 3 तुहाडी सुन्दरता दिखवटी ना हो, जियां की बाल संवारना, कने सोने दे गेहणे पेहनणा, या भौंती-भौंती दे मेगे-मेगे कपडे पाणा। 4 जडा तुहाडे दिले च है, सेई है जडा तुहांजो सुंदर बणादां है। साडा व्यवहार प्यार भरा कने शांत हो, जडा की परमेश्वरे तांई बडा कीमती है। 5 कने बडे पहले जडियां जनानियां परमेश्वरे पर भरोसा रखदियां थियां, कने उस पर अपणी आस रखदियां थियां, सै अपणे घरे बाले दा हुकम मन्नी करी अहणे आंणे जो सुंदर बणादियां थियां। 6 जियां सारा अब्रामह दे हुकमा जो मंटी कने उसयो स्वामी बोलदी थी। अगर तूसां दुज्जयां सोगी भलाई करन कने तुहांजो कोई भी चिंता कने डर ना हो, तां तूसां सारा दे बचयां सांई बणाणा। 7 तियां ही हे पतियो, तुहांजो

अपणिया-अपणिया घरे बालिया सोगी समझदारिया ला रेंणा चाईदा, कने तुहांजो याद रखणा चाईदा सै तूसां ला कमजोर न, इस तांई तुहांजो उना दी इज्जत करणी चाईदी। क्योकि तूसां दोनो ही हमेशा दी जिन्दगिया दे बदने दे हिस्सेदार न जडा परमेश्वरे बडे अनुग्रह ला दितया है। इयां करा ताकि जालू तूसां परमेश्वरे ला प्राथना करन तां सै तुहाडी सुणे। 8 आखरी च, मै तूसां सारयां ला ऐ बोल्णा चांदा है की, तूसां सारयां दा इक ही मन होणा चाईदा कने इक दुज्जे सोगी प्यारभाव ला रिया कने धमड मत करा कने नम्र बणा। 9 बुराईया दे बदले बुराई मत करा कने ना गाली दे बदले गाली दिया; इदे बदले उना जो आशीष दिया क्योकि परमेश्वरे तुहांजो इसी तांई सदया है की तूसां दुज्जयां जो आशीष देई सकन। अगर तूसां ऐसा करदे न तां परमेश्वरे भी तुहांजो आशीष देणी। 10 क्योकि पबित्र शास्त्र च लिखया है, अगर कोई माणु अपणी जिन्दगी दी खुशी लेणा चांदा है, कने खरे दिन दिखणा चांदा है, तां उसयो ध्यान देणा चाईदा की सै बुरियां गल्लां ना बोले। कने उसयो एसियां गल्लां करणा बंद करी देणा चाईदा जडियां सच्च नी है। 11 उसयो पक्का ही बुरे कम्म करणा छडी देणा चाईदे। कने इदे बजाए उसयो सेई करणा चाईदा जडा भला है। दुज्जयां सोगी शान्ति ला रेणे दी कोशिश करा। 12 क्योकि प्रभु उना लोकां दी देखभाल करदा है जडे भले कम्म करदे न, कने सै हमेशा उना दी प्राथना सुणने तांई कने उना दा जबाब देणे तांई तैयार है। पर परमेश्वर बुराई करणे बाले लोकां दे खिलाफ कम्म करदा है। 13 अगर तूसां हमेशा भले कम्म करणे दी कोशिश करदे न, तां कोई भी असा दे तुहाडा नुक्सान नी करी सकदा। 14 पर अगर जडा सही है सै करणे दिया बजा ला असां दुख झेलदे न, तां असल च असां धन्य होणा। इस तांई अगर कोई लोक सांझो डरान, तां डरदे मत कने ना ही घबरानयो, 15 पर मसीह जो अपणे मना च प्रभु दे स्पे च इज्जत दिया। कने अगर कोई तुहांजो ला उस आसा दे बारे च पुच्छे जडी भरोसा करणे बाले होंणे दे नाते तूसां सारयां च है, तां हमेशा उसयो समझणे तांई तैयार रिया। 16 कने अपणी अंतरात्मा भी शुद्ध रखा, इस तांई की जिना गल्लां दे बारे च तुहाडी बदनामी होदी है उना दे बारे च सै, जडे मसीह च तुहाडे खरे चाल-चलण दी बेइजती करदे न, शर्मिंदा होन। 17 अगर सांझो अपणे भले कम्म दिया बजा ला दुख मिलदा है, तां ऐ साडे तांई खरा है, अगर परमेश्वरे दी ऐई इच्छा है। ऐ तां बुरे कम्म दिया बजा ला दुख झेलणे ला साडे तांई खरा है। 18 मै इस तांई बोला दा है क्योकि यीशु मसीह भी साडे पापां दिया बजा ला दुख सेहन कित ता कने मरी गिया। सै सिर्फ इक ही बरी मरया उसयो दुबारा मरणे दी जरूरत नी है। सै इक धर्मी माणु था जडा पापी माणुआं तांई मरी गिया ताकि सै सांझो परमेश्वरे दे नेडे आंणी सके। उना उदे शरीर जो तां मारी दिता पर परमेश्वरे उसयो पबित्र आत्मा दिया शक्तिया ला दुबारा जिन्दा करी दिता। 19 तालू उदिया आत्मा जाई करी उना आत्मा जो शुभसमाचार प्रचार कित जडियां उसा जगा पर केद कितियां न, जिथु मरयां लोकां दियां आत्मा न। 20 ऐ उना लोकां दियां आत्मा थियां जिना बडे बकत पेहले जालू नूह अपना जाज बणा दा था, तालू इना परमेश्वरे दे हुकम जो नी मनया था, तालू परमेश्वर बडे सबर ला इंतजार करा दा था की क्या सै लोक पश्चाताप करणे। पर जालू पाणिए संसारे दा नाश करी दिता, तालू सिर्फ अठ लोक बचे जिना जाजे च प्रवेश कित था। 21 पुराणे बकत च उना दा उद्धार हुण साडे उद्धार दा इक उदाहरण है जालू असां बपतिस्मा लेंदे न। जिस पाणिए च असां बपतिस्मा लेंदे न, सै साडे शरीर ला मेल नी साफ करदा, पर ऐ इक निशान है की असां परमेश्वरे ला माफी मंगी है ताकि अमेगे जो साडा मन पेशान ना रे। सांझो माफी मिली सकदी है क्योकि यीशु मसीह मौत दे बाद फिरी जिन्दा होया है। 22 कने सै स्वर्ग जो चली गिया। हुण सै ओथु पर परमेश्वरे दे सज्जे पासे कने सारयां ला बडिया जगा पर जाई करी बेई गिया, कने सै स्वर्गदूता कने सारे अधिकारियां कने सारियां शक्तियां पर राज करदा है।

4 इस तांई जियां मसीह शरीर च रेईकरी दुख सेहन कित, तुहांजो भी उस सांई ही दुख सेहन करणे तांई तैयार रेंणा चाईदा। क्योकि अगर तूसां मसीह तांई दुख सेहन करणे तांई तैयार न, तां तूसां पाप नी करणे दा फेसला करी लिया है। 2 कने इसा बजा ला सै माणु इस संसार च रेईकरी उना बुरे कम्मा जो नी करदा है, जिना जो लोक अक्सर तूसां चांदे न, पर उनी सेई करणा जडा परमेश्वर चांदा है, की सै करे। 3 क्योकि कसां अपणिया पुराणिया जिन्दगिया च बडा बकत बंद करी दिता जालू तूसां होर जातियां सांई, बुरे कम्मा च, बासना च, खाणे पीणे च,

दास-बाजी च कने असभ्य देवतयां कने उना दियां मुतियां दी पूजा करदे थे, जिना ला परमेश्वर नफरत करदा है। 4 इस ताई तहाडे पूरणे मित्र हेरान होई जदि न, जालू तसां उना सोगी बुरियां चीजां च शामिल नी होंदे जडे सै करदे न। इस ताई सै तहाडे बारे च बुरा बोलदे न। 5 पर इक दिन जस्र उना परमेश्वरे दे सामणे न्याय ताई खडे होणा, कने परमेश्वरे उना ला हर इक कम्मे दे बारे च पछणा जडा उना धरती पर कितया। परमेश्वरे जिन्दे कने मरयो दोनों लोकां दा न्याय करणा। 6 क्योकि ऐई बजा है की मरयो लोकां भी मसीह यीशु दे बारे च शुभसमाचार सुणया। उना दे शरीरां जो सारयां सांई मरणा पिया, पर सै हण आत्मा च हमेशा परमेश्वरे सोगी रेंदे न। 7 सारियां गल्लां दा अंत जल्दी होंणे बाला है; इस ताई ध्याने ला सोचा कने अपने आपे जो कानू च रखा कने प्राथना ताई तैयार रिया। 8 सारयां ला जस्री गल्ल ऐ की, इक दुज्जे ला इमानदारिया ला प्यार करा, क्योकि अगर तसां लोकां ला प्यार करणे तां तसां हमेशा कुसी भी बुरे कम्मे जो माफ करणे ताई तैयार रेंणा जडे उना कितयो न। 9 लोकां दा अपने घरे स्वागत करा कने बिना कोई शिकायत कितयो करा। 10 हर इक माणुऐ जो परमेश्वरे दिया तरफा ला बरदान मिलया है, उसयो उस बरदाने दा इस्तेमाल दुज्जयां दी सहायता करणे ताई करणा चाईदा। उना जो परमेश्वरे दे अच्छे सेबकां दे स्पे च अपने बरदाना दा इस्तेमाल करणा चाईदा जडे परमेश्वरे उना जो अनुग्रह ला दितयो न। 11 अगर तहाडे बाल प्रचार करणे दा बरदान है, तां तहांजो परमेश्वरे दे बचना दा प्रचार करणा चाईदा, अगर तहाडे बाल दुज्जे लोकां दी सहायता करणे दा बरदान है, तां सै इस कम्मे जो उस शक्तिया ला करन जड्डी परमेश्वर तहांजो दिन्दा है। तां फिरि जडा कुछ भी तसां करणा उसला यीशु मसीह दे जरिये परमेश्वरे जो महिमा मिलणी। सारी महिमा कने शक्ति युरां-युरां दीकर उदी है। आमीन। (aiōn g165) 12 हे प्यारे मसीह भाईयो, उना दुख देंणे बालियां चीजां दे बारे च हेरान मत होआ जिना दियां बजा ला तहांजो दुख झेलणा पोआ दा है क्योकि तसां मसीह दे चले न। पर ऐ चीजां दे दसणे ताई होआ दियां न की क्या तसां सच्ची परमेश्वरे पर भरोसा करदे न। इस ताई ऐ मत सोचा की तहाडे सोगी कुछ अजीब घटना होआ दियां न। 13 बस ऐ सोची करी खुश रिया, क्योकि तहांजो उना दुखां च इक हिस्सा मिलया है, जडे मसीह जो मिलयो थे। इसा बजा ला जालू मसीहे सारयां लोकां जो अपणी महिमा दसणे ताई दुबारा मुडी करी ओणा है तां तहांजो होर जादा खुशीं होंणी है। 14 फिरि अगर मसीह दे नाऐ दिया बजा ला तहाडी बुराई होंदी है, तां तसां धन्य न, क्योकि परमेश्वरे दी महिमा बाली आत्मा तहांजो च बास करदी है। 15 तहाडे चे कोई भी माणु चोरी, खन करणे ला या बुरे कम्म करणे ला, या दुज्जयां दे कम्मे च हथ पाणे दिया बजा ला दुख ना झेले। 16 पर अगर मसीही होणे दिया बजा दुख झेलणा पोऐ, तां तसां इसयो शर्मिंदगी दी गल्ल मत समझदे, पर इसा गल्लां ताई परमेश्वरे दी महिमा करा की तसां इस ताई दुख सेहन करा दे न क्योकि तसां यीशु मसीह दे चले न। 17 क्योकि न्याय करणे दा बकत आई गिया है, परमेश्वरे पेहले असां भरोसा करणे बालयां दा न्याय करणा है, इस ताई उना भयानक चीजां दे बारे च सोचा जडियां उना लोकां सोगी होंणियां न जडे परमेश्वरे दे दितयो शुभसमाचारे जो नी मंदे। 18 जियां की पबित्र शास्त्र च लिखया है, “अगर इक भले माणुऐ दा बचाया जाणा इतणा मुशकिल है, तां बुरे लोकां दा कने पापियां दा क्या होणा जडे परमेश्वरे दे शुभसमाचारे पर भरोसा नी करदे?” 19 इस ताई जडे लोक परमेश्वरे दिया इच्छा दे अनुसार दुख झेलदे न, उना जो परमेश्वरे पर भरोसा करदे रेंणा चाईदा, जिनी उना जो बणाया है। परमेश्वर हमेशा सै करदा है जडा उनी करणे दा बायदा कितया था कने इस ताई जडा खरा है सै करदे रेंणा चाईदा।

5 कुछ एसियां गल्लां न जडियां मै ओथु दे कलीसिया दे अगुवां ला बोलणा चांदा है क्योकि मै भी तहाडे सांई इक अगुवा है। मै खुद उना दुखां जो दिखया है जडे बडे पेहले यीशु मसीहे सेहन किते। जालू उनी दुबारा मुडी करी ओणा है, तां मै उदिया महिमा च हिस्सेदार बणना है। हण मै तहांजो ला बिनती करदा है, 2 जियां इक पुहाल अपणियां भेडा दी रखबाली करदा है, तियां ही तहांजो भी हर इकी जणे दी देखभाल करणी चाईदी जिसयो परमेश्वरे तहाडिया देखभाला च दितया है। इस कम्मे जो अपणिया इच्छा ला करा, ना की कुसी मजबूरिया दिया बजा ला क्योकि परमेश्वर ऐई चांदा है की तसां ऐसा करन। ऐ कम्म इस ताई मत करा की तसां पैसा कमाणा चांदे न, पर परमेश्वरे कने लोकां दी सेवा करणे दी इच्छा ला करा। 3 उना लोकां दे उपर इक शासक सांई हुकम मत

दिया जिना ताई तसां जिम्मेवार न, पर उना ताई इक अच्छा उदाहरण बणा। 4 जालू यीशु मसीहे, जडा साडा प्रधान पुहाल है, उनी मुडी करी ओणा है, तालू तहांजो इक सुंदर मुकुट मिलणा है जिदी चमक कदी नी घटणी। 5 इयां ही तसां जवान लोकां जो बुद्धे मदीं दे हुकम मनणा चाईदे। तसां सारयां जो प्यारभाव ला इक दुज्जे दी सेवा करणी चाईदी, क्योकि पबित्र शास्त्र च लिखया है की, “परमेश्वर घमण्डियां दा बिरोध करदा है, पर नम्र लोकां ताई भला है।” 6 इस ताई अपने आपे जो परमेश्वरे सामणे नम्र बणा जडा सारयां ला शक्तिशाली है, ताकि सै सही बकत ओणे पर तहांजो बडी जादा इज्जत दे। 7 परमेश्वरे जो अपणी सारी चिंता कने परेशानिया दस्सा क्योकि सै तहाडी परवाह करदा है। 8 ध्यान रखा, कने जागदे रिया, क्योकि शैतान तहाडा दुशमण तहांजो पर हमला करणा चांदा है, ताकि तसां परमेश्वरे दे हुकमा जो नी मनन। सै धहाडने बाले शेरे सांई फिरदा कने दिखदा रेंदा है की कुसयो खाई सके। 9 तहांजो अपने पक्के भरोसे सोगी शैताने दा बिरोध करणा चाईदा। याद रखा की तहाडे मसीह भाई-बेहण जडे पुरे संसार च रे दे न, ऐदे ही दुखां जो सेहन करा दे न जियां तसां सेहन करा दे न। 10 परमेश्वरे जडा अनुग्रह ला पूरा भस्या है, उनी साडे मसीह सोगी रिश्ते दिया बजा ला स्वर्ग च उदी हमेशा दी महिमा च हिस्सेदार होंणे ताई चुणया है। तहांजो थोडे बकते दीकर दुख झेलणे बाद परमेश्वरे तहांजो अच्छा बणाई देणा ताकि तहांजो च फिरि कोई दोष ना रे ताकि तहाडा भरोसा मजबूत हो कने डगमगाणे बाला ना हो। (aiōnios g166) 11 उनी हमेशा ताई शक्तिशाली स्पे ला शाशन करणा। आमीन। (aiōn g165) 12 मै ऐ छोटी देई चिठी सिलवानुस दिया सहायता ला लिखियो है कने तहांजो भेजी है। जिसयो मै मसीह च भरोसे दे कारील भाई मंदा है। मेरा इसा चिठिया जो लिखणे दा मकसद तहांजो उत्साहित करणा है कने तहांजो भरोसा दिलाणा है की जडा कुछ भी तसां सिखा दे न सै असल च तहाडे ताई परमेश्वरे दे अनुग्रह दा हिस्सा है। इस अनुग्रह च टिकी रिया। 13 जडे बाबेल शेहे दे यीशु पर भरोसा करणे बाले लोक तहांजो नमस्कार करदे न, जिना जो परमेश्वरे चुणया है, जियां उनी तहांजो चुणया था। मरकुस जडा मेरे ताई इक पुत्रे सांई है, सै भी तहांजो नमस्कार करदा है। 14 इक दुज्जे जो गले लाईकरी नमस्कार करा। मै प्राथना करदा है परमेश्वर तसां सारयां जो शांति दे जडे प्रभु यीशु मसीह सोगी रिश्ता रखदे न।

2 पतरस

1 मैं, शमौन पतरस, जडा यीशु मसीह दा सेबक कने प्रेरित है। मैं तुसां सारयां ताई ऐ चिठी लिखा दा है जडे सांझो साईं उसी कीमती भरोसे जो साझा करदे न, जडा भरोसा सांझो साडे परमेश्वर कने उद्धारकर्ता यीशु मसीह जरिये मिलया है, जडा सांझो परमेश्वरे दिया नजरा च सही बनापादा है। **2** मैं प्राथना करदा है की परमेश्वर तुहांजो जादा ला जादा अनुग्रह कने शांति दे जियां-जियां तुसां परमेश्वर कने साडे प्रभु यीशु मसीह दे ज्ञान च बढे जान। **3** परमेश्वरे अपनी शक्तिया ला सांझो सै सब दितया है, जडा सांझो इक ऐसी जिन्दगी जिणे ताई चाईदा जडी परमेश्वरे जो खुश करदी है। ऐ इस ताई होया क्योंकि असां परमेश्वरे जो जाणदे न कने सै सेई है जिनी अपनी अच्छाई कने महिमा दिया बजा ला सांझो अपने लोक होंगे ताई सदया है। **4** कने उदिया महिमा कने अच्छाईया दिया बजा ला, उनी सांझो बडे महान कने कीमती बायदे दितयो न। ताकि इना बरदाना दा इस्तेमाल कररिरी असां इस संसारे च जडियां बुरियां इच्छा न उना ला बची सकन कने परमेश्वरे दे सभाबे च साझी बणी सकन। **5** क्योंकि तुसां परमेश्वरे दे सभाबे च साझी होंगे ताई न इस ताई तुहांजो सिर्फ मसीह पर भरोसा ही नी करणा चाईदा, बल्कि तुहांजो हमेशा सेई करणे दी कोशिश करणी चाईदी जडा दुज्जयां ताई खरा है। तुहांजो ना सिर्फ सै करणा चाईदा जडा खरा है, बल्कि तुहांजो ऐसे लोक बगना चाईदा जडे समझदारिया ला व्यवहार करणा जाणदे न। **6** तुहांजो ना सिर्फ ऐ जाणना चाईदा की समझदारिया ला किया व्यवहार करणा है, बल्कि तुहांजो अपने आपे जो भी काबू करणा चाईदा। तुहांजो ना सिर्फ अपने पर काबू रखणा चाईदा, बल्कि तुहांजो मुसीबतां च सबर भी रखणा चाईदा। ना सिर्फ तुहांजो सबर रखणा चाईदा, बल्कि तुहांजो ऐसे तरीके ला जीणा चाईदा जडा परमेश्वरे जो खुश करदा है। **7** ना सिर्फ तुहांजो इस तरीके ला जिणा चाईदा जडा परमेश्वरे जो खुश करदा है, बल्कि तुहांजो इक दुज्जे सोगी कने अपने खुद दे परिबारे सांई प्यार करणा चाईदा। ना सिर्फ तुहांजो इक दुज्जे सोगी अपने परिबारे सांई प्यार करणा चाईदा, बल्कि तुहांजो सारे लोकां सोगी प्यार भी करणा चाईदा। **8** क्योंकि अगर ऐ सारियां गल्लां तुसां च हेन कने बदा दियां न, तां इना साडे प्रभु यीशु मसीह दा होर जादा ज्ञान लेणे च तुहांजो बेकार कने असफल नी होणा देणा। **9** पर जिदे च ऐ गुण नी है, सै उस माणुऐ सांई जिदी नजर इतणी कमजोर है की सै दिखी नी सकदा कने भूली गया है की परमेश्वरे उसयो उदे पुराणे पापां ला पबित्र करी दितया है। **10** इस बजा ला है मसीह भाईयो, अपने आपे जो कने होर लोकां जो ऐ दसणे ताई होर भी अच्छा व्यवहार करणे दी कोशिश करा की परमेश्वरे सच्ची चुणया है कने तुहांजो अपने लोक होंगे ताई सदया है। अगर तुसां ऐसा करणे तां पक्का ही तुसां कदी भी परमेश्वरे ला लग नी होणा। **11** कने परमेश्वरे तुहाडा उस राज्य च बडे आदर सोगी स्वागत करणा, जिथु साडा प्रभु कने उद्धारकर्ता यीशु मसीह हमेशा ताई राज करणा। (aiōnios g166) **12** मैं तुहांजो इना गल्लां दे बारे च बार-बार याद दिलाणा चांदा है, हालांकि तुसां पहले ला ही इना गल्लां जो जाणदे न कने पूरा भरोसा करदे न की सै सच्चियां न। **13** साडे प्रभु यीशु मसीह मिंजो साफ-साफ दर्सी दितया है की मैं जल्दी ही मरी जाणा है। इस ताई मिंजो लगदा है की मेरे ताई ऐई खरा है की जालू दीकर मैं जिन्दा है तालू दीकर मैं तुहांजो याद दिलांदा रे। **15** इस ताई तुहांजो ऐ गल्लां दसणे ताई इतणी मेहनत करा दा है, ताकि मेरिया मौता ला बाद तुसां हर बकत इन गल्लां जो याद रखन। **16** जालू असां प्रेरितां तुहांजो साडे प्रभु यीशु मसीह दी शक्ति कने मुडी ओणे दे बारे च संदेश दित, तां असां तुहांजो कोई चलाकिया ला मन घडन्त कहाणियां नी सुणाईयां न, बल्कि असां उदिया महिमा जो अपनी हखी ला दिखया है। **17** असां उदे सोगी उस पबित्र पाडे पर थे, जालू पिता परमेश्वरे उसयो महिमा कने इज्जत दिती थी। उस बकत परमेश्वरे दिया तरफा ला यानी की महिमा ला उस ताई अबाज आई, “ऐ मेरा अपना प्यारा पुत्र है, जिसला मैं खुश है!” असां खुद स्वर्ग ला ओदी अबाज जो सुणया। **19** कने असां जाणदे न की मसीह दे बारे च परमेश्वरे दे संदेश देणेबालयां जडे बचन लिखयो थे, सै सच्चे न, कने जडा असां तुहांजो यीशु मसीह दे दुबारा मुडी ओणे दे बारे च सिखाया ला, सै इसा गल्ला जो सच्च साबित करदे न। तुहांजो उना बचना जो ध्याने ला सुणा चाईदा, क्योंकि जियां नेहे च इक चमकदा दिव्या लोकां जो सही रस्ता दसणे च साहायता करदा है, तियां ही इन

बचना तुहांजो ऐ जाणने ताई सहायता करणी की सच्च क्या है। प्रभु यीशु मसीह दे दुबारा मुडी करी ओणे दीकर तुहांजो उना बचना जो ध्याने ला सुणना चाईदा, उदा मुडी करी ओणा नोऐ दिने दिया भयागा सांई रौशनी लोंगा है, कने सै भयागा दे तारे सांई होणा। उस बकत उदी लौ तुहाडे दिलां च चमकणी कने तुहाडे सामणे परमेश्वरे जो साफ-साफ प्रगट करणा। **20** पर ऐ बडा जरूरी है की तुसां इसा गल्ला जो समझन की परमेश्वरे दा संदेश देणेबालयां दे बचन जडे तुसां पबित्र शाब्द च पढे न, सै सिर्फ उना दे अपने बिचार नी न। **21** क्योंकि पबित्र शाब्द च दीतियो कोई भी भविष्यवाणी कदी भी माणुऐ दिया मरजिया ला नी होंदी है। पर पबित्र आत्मा उना दे मना च पांदा है, जालू उना परमेश्वरे दिया तरफा ला आयो संदेशो जो बोलया।

2 जियां बडे बकत पहले, ऐथु इस्राएली लोकां बिच झूठा संदेश देणेबाले गुरु थे, तियां ही तुहाडे बिच भी झूठी शिक्षां दे झूठे गुरु होणा। सै झूठी शिक्षां जो चुपके ला फेलाई दिन्दे न, कने जडियां लोकां जो मसीह पर भरोसा करणे ला रोकदियां न। इना झूठे गुरुअं मसीह जो अपना मालिक मनणे ला मना करी देणा जडा उना दा मालिक है कने जिनी उना जो पाप दिया शक्तिया ला अजाद कितया है। ऐसा कररिरी उना अचानक अपने आप दा नाश करवाई लेणा है। **2** परमेश्वरे दे मतयां लोकां इना गुरुअं दे बुरे कम्मा दी नकल करणी है, कने जडा कुछ भी सै करदे न उदिया बजा ला लोकां परमेश्वरे पासे जाणे बाले रस्ते दे बारे च बुरियां-बुरियां गल्लां करणियां। **3** ऐ गुरु लालची होंगे, कने उना बणियां-बणाईयां कहाणियां सुणाई करी तुहांजो धोखा देणा ताकि तुहांजो ला पैसा कमाई सकन। परमेश्वरे बडे पहले ही फेसला करी लिया था की सै उना जो सजा दे कने सै ऐसा करणे ताई तैयार है। उनी पक्का ही उना दा नाश करी देणा। **4** तुसां जाणदे न की बडे बकत पहले जालू कुछ शेतां दे दूतां परमेश्वरे दे हुकमा जो नी मनया था, तां परमेश्वरे उना स्वर्गदूतां जो सजा दिती। उनी उना जो नरक च फेकी दित, कने उना जो नेहे च केद कररिरी उस दिने दीकर रख्या है जालू उनी उना दा न्याय करणा कने सजा देणी है। (Tartarō g5020) **5** तुसां ऐ भी जाणदे न की जालू बडे बकत पहले रेणे बालयां लोकां परमेश्वरे दा डर नी मनया तां उनी उना दे बुरे कम्मा जो नजरअंदाज नी कित जाडे सै करा दे थे। बल्कि उनी पुरिया धरतिया पर पांणी भरी करी ऐसी सजा दिती की सै सारे डूबी करी मरी गे। पर परमेश्वरे नूह समेत अंदां लोकां जो बचाई लिया, जिना परमेश्वरे सोगी सही रेणे दे बारे च बिचार कित। **6** परमेश्वरे सदोम कने अमोरा शेहरां जो सजा दिती, कने उना जो ऐसा भस्म करी दित की सै फुकुई करी राख बणी गे। परमेश्वरे इना लोकां जो सजा देईकरी चेताबनी दिती की जडे लोक परमेश्वरे दे हुकमा जो नी मंदे न उना सोगी क्या होणा है। **7** पर इसला पहले की परमेश्वर सदोम कने अमोरा शेहेर दा नाश करदा, उनी लूत जो ओथु ला निकाली दित कने बचाई लिया, सै इक धर्मी माणु था। लूत बडा दुखी था क्योंकि सदोम शेहेर दे लोक कुसी भी नियम जो नी मंदे थे कने बडे ही शर्मशर कम करदे थे। **8** सै उना बुरे लोकां बिच रेंदा था, कने सै हर रोज उना बुरे कम्मा जो दिखदा था जडे सै करदे थे कने उना दियां बुरियां गल्लां जो सुणदा था, कने सै इना सारियां गल्लां ला बडा दुखी था, क्योंकि सै इक धर्मी माणु था। **9** ऐ सारे कम्म जडे परमेश्वरे अतीत च किते, सै सांझो ऐ दसणे ताई न की जडे लोक परमेश्वरे जो खुश करणे बाली जिन्दगी जिन्दे न, जालू सै मुसीबता च होंदे न तां परमेश्वर उना दी पक्का रखा करदा। कने असां ऐ भी यकीन करी सकदे न की परमेश्वरे उस दिने दीकर लगातर अधर्मियां जो सजा दिन्दे रेणा जालू दीकर सै सारे लोकां दा न्याय नी करदा। **10** परमेश्वरे उना झूठे गुरुअं जो पक्का ही सजा देणी है जडे अपनी बुरियां इच्छा दे मुताबिक कम्म करदे न, कने अपने उपर परमेश्वरे दे अधिकारे जो नी मंदे न। सै हीट कने घमण्डी न। सै महिमायम स्वर्ग दे प्राणियां दे बारे च बुरा भला बोलणे ला नी डरदे न। **11** पर स्वर्गदूत जडे इना झूठे गुरुअं ला जादा शक्तिशाली न, सै भी उना दी बेइज्जती नी करदे जालू सै परमेश्वरे सामणे उना पर दोष लांदे न। **12** पर ऐ झूठे गुरु जंगली जानवरां सांई कम्म करदे न, जडे सेई करदे न जदिया उना दा शरीर चांदा है कने जडे इस ताई पैदा होंदे न की लोक उना जो फसाई करी मारी सकन। ऐ झूठे गुरु उना चीजां दी बेईज्जती करदे न, जिना दे बारे च सै असल च कुछ भी जाणदे न। परमेश्वरे उना जो तियां ही नाश करी देणा जियां लोक जानवरां जो मारदे न। **13** उना दा विनाश उस नुक्सान दा फल है जडा उना कितया है। उना जो दिन दोपहरी अनैतिक खांणा-

पिणा पसंद है। सै तुहाडे बिच इक कलंक कने धब्बे न। सै धोखा देणे च खुशी मंदे न, कने सै तुहाडे ताई धामा च तुहाडे सोगी खांदे पिंदे न। 14 सै हर इक जनानिया सोगी व्यभिचार करणा चांदे न, जिसा जो भी दिखदे न। सै पाप करणे दे मौके तोपदे रेंदे न। सै उना लोकां जो धोखा दिन्दे न जिना दा मसीह पर भरोसा कमजोर होंदा है, कने सै उना जो पाप पासे लेई जांदे न। कने उना दे होर जादा-जादा चीजां पाणे दे हमेशा बददे लालचे दिया बजा ला ही परमेश्वरे उना जो सजा देंगी। 15 उना सही कम्म करणा बंद करी दितया है, कने उना सियुदा ही कम्म करणा शुरू करी दितया है, जदिया बओर दे पुत्र बिलामे बडे पेहले कितया था। उनी गलत कम्म करिरी पसा कमाणे बंद करिता। 16 पर परमेश्वरे बिलामे जो उदे बुरे कम्मा ताई उदिया गदिया दे जरिये फटकार लाई। भले ही गधे बोलेदे नी न, उना गदिया बिलामे ला इन्साना साईं गल्ल कित्ती, जालु बिलामा राजे जो मिलणे ताई गदिया जो लदी करी लेई चलया था कने परमेश्वरे उस बकत बिलामे जो बेवकूफिया बाला कम्म करणे ला रोकी दित। 17 ऐ झूठे गुरु उना पाणिणे दे झरनया साईं बेकार न, जडे सुकी गियो न। सै उना बदला साईं बेकार न, जिना जो बरखा होणे ला पेहले तेज होआ उडाई करी लेई जांदी है। परमेश्वरे उना ताई इक ऐसी जगा तैयार कितियो है जिथु सिर्फ काला नेहरा ही है। 18 जालु सै लोकां जो शिक्षा दिन्दे न, तां सै बेकार कने घमंडी गल्लां दा इस्तेमाल करदे न। सै लोकां जो दसदे न की सै उना शर्मनाक कम्मा जो करी सकदे जडा उना दा शरिर करणा चांदा है, कने सै उना लोकां जो दुबारा पाप करणे ताई भटकाई दिन्दे न, जिना थोडे बकत पेहले ही यीशु मसीह पर भरोसा कित था। 19 झूठे गुरु लोकां जो दसदे न की सै जडा कुछ भी करणा चांदे न, सै करणे ताई उना जो अजादी है, हालांकि सै खुद गुलाम न क्योंकि उना दा अपना पापी सभाव उना जो बुरे कम्म करणे ताई मजबूर करदा है। क्योंकि जडा कुछ भी तुहांजो काबू करदा है, तुसां उदे गुलाम बणी जांदे न। 20 लोक संसारे दिया बुराईया ला बची गे जालु उना प्रभु यीशु मसीह जो उद्धारकर्ता मन्नी लिया, पर हुण फिरी दुबारा उना बुरे कम्मा च फसी गियो न, कने सै बुरे कम्म सान्झो काबू करदे न, इस ताई हुण यीशु मसीह जो छडणे बाद उना दी हालत पेहले ला भी बुरी होई गियो है, जालु उना भरोसा नी कितया था। 21 मेरा ऐ मतलब है, क्योंकि परमेश्वरे उना लोकां जो होर भी जादा सकत सजा देंगी जडे प्रभु यीशु मसीह जो छडी दिन्दे न, बजाए उना दे जिना कदी प्रभु यीशु मसीह जो अपनाया ही नी। उना ताई ऐई खरा होणा था की सै कदी ऐ जाणदे नी की जिन्दगी जो धर्मी तरीके ला जिणे दा क्या मतलब होंदा है। हुण सै जाणदे न की सही क्या है पर उना परमेश्वरे दे हुकमा मनणा बंद करी दितया है जडे असां प्रेरितां सिखायो थे। 22 उना सोगी जडा होंदा है सै दसदा है की ऐ कहाबतां सच्चियां न; सै कृतयां साईं न जडा अपणिया उलटिया जो चटणे ताई बापस ओदा है, कने सै सुअरां साईं न जिसयो धोया जांदा है कने सै दुबारा चिकडे च लोटणे ताई चली जांदा है।

3 हे प्यारे मसीह भाईयो, हुण मै तुहांजो ऐ दुज्जी चिट्ठी लिखदा है, मै तुहांजो ऐ दोनो चिटियां इस ताई लिखियां न, ताकि जडिया गल्लां तुसां पेहले ला ही जाणदे न, उना दे बारे च तुहांजो याद दिलाई करी तुहाडे मना च साफ बिचार पैदा करी सकें। 2 मै ऐसा इस ताई करदा है क्योंकि मै चांदा है की तुसां उना बचना जो याद रखा, जडे परमेश्वरे दे संदेश देणेबालयां बडे पेहले बोलयो थे, कने साडे उद्धारकर्ता, साडे प्रभु यीशु मसीह दियां शिक्षां जो याद रखा जडियां तुहांजो उना प्रेरितां सिखायां थियां जडे तुहाडे बाल आये थे। 3 सारयां ला जरूरी गल्ल ऐ है जडीं तुहांजो पता होणा चाईं की मसीह दे दुबारा मुडी ओणे ला पेहले आखरी दिना च ऐसे लोक होंगे न जिना तुहाडिया इसा गल्ला दा मजाक उडाणा की मसीह दुबारा मुडी करी ओणा है। उना अपणिया बुरियां आदतां ला मजबूर होईकरी बुरे कम्म करणे जिना ला उना जो खुशी मिलदी है। 4 कने उना बोलणा, “उदे ओणे दा बायदा सचच नी है। उनी कदी नी ओणा है, क्योंकि सारयां ला पेहले साडे अगुवे थे, सै सारे मरी गियो न, पर फिरी भी कुछ नी बदलया है। सारियां चीजां तियां ही होंदिया आईयां न जालु ला परमेश्वरे इस संसारे जो बणाया है।” 5 सै जाणी बूझी करी इसा गल्ला जो नजरअंदाज करदे न की संसारे दिया शुस्आत च, परमेश्वरे बोलया कने अन्वर बणी गया। अपणे बचने ला उनी धरतिया जो पाणिया ला लग कित, कने पाणिणे ला सुकी जमिना जो बाहर लेई आया। 6 इस पाणिणे ला ही उनी उस संसारे जो खत्म करी दित जाडा उस बकत

था। उनी इक भारी बरखा कित्ती कने सारिया धरतिया पर बाढ आई गई कने सारे जिन्दे प्राणी डुबी करी मरी गे। 7 जियां परमेश्वरे धरती कने अम्बरे जो बणाणे दा हुकम दित था, तियां ही उनी इस हुणे दे युगे जो तालु दीकर बणी रेणे दा हुकम दित जालु दीकर उसयो अग्गी च ना फुकी दे। परमेश्वर उना जो उस रोजे दीकर रखा दा है जालु उनी सारे लोकां दा न्याय करणा कने उना लोकां दा नाश करणा जडे उदी इज्जत नी करदे। 8 हे मेरे प्यारे मसीह भाईयो, तुसां इसा इकी गल्ला जो कदी मत भुला की परमेश्वरे ताई इक दिन हजार सालां साईं है कने हजार साल इक दिन साईं है। उदे ताई इक दिन कने इक हजार साल सब इक बराबर है। 9 कुछ लोक सोचा दे न की प्रभु बापस मुडी ओणे दे बायदे जो पूरा करणे च देरी करा दा है पर प्रभु देरी नी करा दा है बल्कि सै तुहाडे सोगी सबर रखा दा है। क्योंकि सै कुसी जो भी नाश नी करणा चांदा है। परमेश्वर चांदा है की हर कोई अपणे मने जो फिराए कने गलत कम्मा जो करणा बंद करी दे कने उदे बाल आई जा। 10 पर प्रभुऐ पक्का ही बापस ओणा है। कने उनी अचानक ही मुडी करी ओणा है जियां कोई चोर अचानक आई जांदा है। उस दिने अम्बरे च बडे गडाकयां दा शोर होणा है। कने अम्बरे लोप होई जाणा। अम्बरे च सारा कुछ मतलब की सूरज, चाँद, तारे सब कुछ अग्गी च खत्म होई जाणा। उस दिन परमेश्वरे उना सारे कम्मा जो प्रगट करी देणा है जडे लोकां कितयो न, ताकि उना दा न्याय होई सके। 11 परमेश्वरे पक्का ही इना सारियां चीजां दा नाश करी देणा है, जियां मै हुण बोलया है, इस ताई तुहांजो पबित्र चाल चलन कने भक्ति च जिन्दगी जिणा चाईं जडी परमेश्वरे जो खुश करे। 12 जियां की तुसां उस दिने दा इंतजार करा दे न जालु परमेश्वरे संसारे दे लोकां दा न्याय करणे ताई ओणा है, तां उस दिने दे जल्दी ओणे ताई अपनी तरफा ला पूरी कोशिश करा। उस दिन अग्गी भडकी पोणा है कने अम्बरे जो भस्म करी देणा है, उसा गर्मियां ला अम्बरे दा सब कुछ पिघली जाणा। 13 पर असां उम्मीद करा दे न की परमेश्वरे इक नोआ अम्बर कने नोई धरती बणाणी जिदा उनी बायदा कितया था। ओथु सिर्फ धर्मी लोक ही रेंदे न। 14 इस ताई हे प्यारे मसीह भाईयो, जालु तुसां इना गल्लां दा होणे दा इंतजार करा दे न, इस ताई तुहांजो ऐसी जिन्दगी जिणे दी हर इक कोशिश करणा चाईं जडी पबित्र कने परमेश्वरे जो खुश करदी हो कने इक दुज्जे सोगी शांतिया सोगी रिया। 15 साडे प्रभु दे सबर जो इक ऐसा मौका समझा, जडा सै तुहांजो ओणे बाले न्याय ला बचणे ताई दे दा है। ऐ सब कुछ साडे प्यारे मसीह भाई पौलसे भी परमेश्वरे दे दितयो ज्ञाने ला इक चिटिया च लिखया है, जडा मै तुहांजो दसया है। 16 उनी अपणियां सारियां चिटियां च, जडियां उनी यीशु मसीह पर भरोसा करणे बालयां जो लिखियां न, उना च एसियां ही गल्लां करदा है जदियां तुहांजो लिखियां न। पर कुछ गल्लां जडियां सै लिखदा है, उना जो समझणा मुशकिल है। जिना लोकां खरी शिक्षा नी लियो है कने जिना दा मसीह पर भरोसा कमजोर होंदा है, सै इना मुशकिल गल्लां दा मतलब गलत समझांदे न, तियां ही जियां सै पबित्र शास्त्र दे कुछ हिस्सयां जो गलत तरीके ला दसदे न। इयां करिरी ला खुद ही अपना नाश करी लेंदे न। 17 इस ताई हे मसीह भाईयो, तुसां पेहले ला ही जाणदे न की ऐ गल्लां होणियां न। इस ताई इसा गल्ला दा ध्यान रखा की जडे लोक नियमा जो नी मंदे सै तुहांजो झूठ बोली करी भटकाई ना दें। अगर तुसां सचचाई पर भरोसा करणा बंद करी दिगे जिस पर तुसां इक बकत पर बडा जादा भरोसा था। 18 पर तुसां साडे प्रभु, कने उद्धारकर्ता यीशु मसीह दे अनुग्रह जो होर जादा ला जादा अनुभव करणा चाईं, कने ऐ की तुसां होर अच्छे तरीके ला जाणी सकन। उदी महिमा हुण कने हमेशा होंदी रे। अर्मीन। (aiōn g165)

1 यूहन्ना

1 असां तूहांजो इक माणुए दे बारे च लिखा दे न जडा जीवन दा बचन है, कने सै शुरूआत ला ही था, जिसयो असां सुणया, जिसयो असां ध्याने न अपणी हखी ने दिखया कने हथां ने छुता। 2 ऐ माणु जडा जिन्दगी दिदा है सै धरती पर आया है, कने असां उसयो दिखया, कने उदी गबाई दिन्दे न, कने तूहांजो पर हमया दी जिन्दगी दे बारे च दसदे न, जिसयो पिता परमेश्वरे सांझो दसया। (aiōnios g166) 3 जडा कुछ असां यीशुए मसीह दे बारे च दिखया कने सुणया है, उदी गबाई तूहांजो भी दिन्दे न, इस ताई की तूहाड़ी संगती साडे सोगी हो: कने साडी ऐ संगती पिता परमेश्वर सोगी, कने उदे पुत्र यीशु मसीह सोगी है। 4 कने ऐ गल्लां असां इस ताई लिखदे न, की तूहाड़ी खुशी पूरी होई जा। 5 जडा शुभसमाचार असां यीशुए ला सुणया है, सै ऐ है, की परमेश्वर अच्छा है कने ज्योति सांई पबित्र है कने उदे च कोई भी बुराई नी है। 6 अगर असां बोलन, की परमेश्वरे सोगी साडी हिस्सेदारी है, कने असां फिरी भी बुराई करदे रेंदे न, तां असां झूठ बोलदे न कने सच्चाई ने नी जिन्दे न। 7 तूसां सै ही करा जडा सही है जियां परमेश्वर सिद्ध सभे च सही है, तियां ही असां भी लौई च जी न, तां परमेश्वरे कने इक दुज्जे ने हिस्सेदारी रखदे न, कने उदे पुत्र यीशु मसीह दा खून सांझो साडे सारयां पापां ला शुद्ध करदा है। 8 अगर असां बोलन की असां कोई पाप नी किता, तां असां अपने आपे जो धोखा दिन्दे न, कने जडी सच्चाई परमेश्वर बोलदा है इस पर भरोसा नी करदे। 9 अगर असां परमेश्वरे सामणे अपने पापां जो मन्नी लेन, तां सै साडे पापां जो माफ करणे कने सांझो सारे अधर्म ला शुद्ध करणे च भरोसे दे काबील कने धर्मी है। 10 अगर असां बोलन की असां पाप नी किता, तां असां परमेश्वरे जो झूठा बणादे न, कने असां परमेश्वर दे बचन जो नी समझदे न कने सै जडा बोलदा है उदा पालन नी करदे।

2 हे मेरे बच्चो, मै ऐ गल्लां तूहांजो इस ताई लिखा दा है, की तूसां पाप ना करन; कने अगर कोई पाप करे तां पिता परमेश्वर बाल साडा इक सहायक है सै यीशु मसीह है कने सांझो माफ करणे तांई पिता परमेश्वरे ला प्रार्थना करदा है कने सै धर्मी है। 2 कने उनी ही साडे पापां दी माफी ताई अपना बलिदान दिता: कने सिर्फ साडे ही नी पर संसारे दे सारे लोकां दे पापां तांई भी। 3 अगर असां परमेश्वरे दे हकमा जो मन्नी लेगे, उसला ही सांझो पता चलणा की असां उसयो जाणदे न। 4 जडा कोई ऐ बोलदा है, मै परमेश्वरे जो जाणी गिया है, पर उदे हकमा जो नी मनदा, सै झूठा है; कने परमेश्वरे दे सच्च दे अनुसार जिन्दगी नी जिन्दा है। 5 पर जडा कोई परमेश्वरे दे बचना जो मनदा है, उदे च सची परमेश्वरे दा प्यार सिद्ध होया है, सांझो इसी ने ही पता चलदा है, की असां उदे सोगी बणी रेंदे न। 6 जडा कोई ऐ बोलदा है की असां यीशु मसीह च टिकयो न, तां सै यीशु मसीह सांई ही चाल चलन रखन। 7 हे प्यारो, मै तूहांजो कोई नोआ हकम नी लिखदा, पर सेई पुराणा हकम जडा शुरू ला तूहांजो मिलया है; ऐ पुराणा हकम सै बचन है, जिसयो तूसां तालू सुणया जालू यीशु मसीह पर भरोसा किता। 8 फिर भी जडा हकम मै तूहांजो लिखदा है, सै नोआ हकम है, कने इदी सच्चाई यीशु मसीह च कने तूसां च भी मिलदी है; क्योंकि हुण बुराई खत्म होई जा दी है कने सच्चाई कने पबित्रता बदा दी है। 9 जडा कोई ऐ बोलदा है, की मै अच्छाई कने भलाई ने जी दा है; पर अपने मसीह भाईयां ने बेर रखदा है, सै हल्ले दीकर भी बुराई च ही है। 10 जडा कोई अपने मसीह भाईऐ ने प्यार रखदा है, सै भलाई ने जिन्दगी जिंदा है, कने उदे अंदर ऐसा कुछ नी है जडा कुसी दे पाप करणे दी बजा बणे। 11 पर जडा कोई अपने मसीह भाइये ने बेर रखदा है, सै बुराई च जी दा है कने बुराई च चलया है, कने नी जाणदा है की कुथु चलया है क्योंकि बुराईया उदियां हखी अनिया करी दितियां न। 12 हे बच्चो, मै तूहांजो इस ताई लिखा दा है, की यीशु मसीह दे नाए ने तूहाडे पाप माफ होए न। 13 हे पिताओं, मै तूहांजो इस ताई लिखा दा है, क्योंकि तूसां मसीह जो जाणदे न, जडा शुरू ला है। हे जवानो, मै तूहांजो इस ताई लिखा दा है, की तूसां उस शैताने पर जित हासिल किती है: हे बचयां, मै तूहांजो इस ताई लिखया है, की तूसां पिता परमेश्वरे जो जाणी गियो न। 14 हे पिताओं, मै तूहांजो इस ताई लिखया है, क्योंकि तूसां मसीह जो जाणदे न, जडा शुरू ला है। हे जवानो, मै तूहांजो इस ताई लिखया है, की जोरे बाले होआ, कने परमेश्वर दा बचन तूसां च बणी रेंदा है, कने तूसां उस शैताने पर जित हासिल किती

है। 15 तूसां ना तां संसारे ला कने ना तां संसारे दिया चीजां ने प्यार रखा अगर कोई संसारे ने प्यार रखदा है, तां उदे च पिता परमेश्वरे दा प्यार नी है। 16 क्योंकि जडा कुछ संसारे च है, मतलब की शरिरी दी पापी इच्छा जो पूरा करणा, कने चीजां जो दिखणा कने उना जो पाणे दी इच्छा रखणा कने जडा उदे बाल है कने जडा सै करदा है उदा घमंड करणा, सै पितर परमेश्वरे दिया तरफा ला नी, पर संसारे दिया तरफा ला है। 17 संसार कने उदी बुरी इच्छा दोनो खत्म हुंदे जांदे न, पर जडा परमेश्वरे दिया इच्छा दे अनुसार चलदा है, सै हमेशा बणी रेंदा है। (aiōn g165) 18 हे बच्चो, ऐ मसीह दा मुडी करी ओणे दा बकत है, जियां तूसां सुणया है, की मसीह दा बिरोधी ओणे बाला है, उदे अनुसार हुण भी बडे भरी मसीह दे बिरोधी आई गियो न; इसला असां जाणदे न, की मसीह दे मुडी करी ओणे दा बकत है। 19 सारे जडे मसीह दा बिरोध करदे न सै निकलियो तां सांझो ला ही न, पर सांझो चे नी थे; क्योंकि अगर सांझो चे होंदे, तां साडे सोगी रेंदे, पर उना सांझो छडी दिता क्योंकि उना चे कोई भी साडा नी था। 20 पर तूहांजो तां यीशु मसीह दे जरिये पबित्र आत्मा मिलया है, कने तूसां सब सच्च जाणदे न। 21 मै तूहांजो इस ताई नी लिखया, की तूसां सच्च जो नी जाणदे न, पर इस ताई लिखया है, की तूसां उसयो जाणदे न, कने इस ताई की कुसी भी झूठ दा जन्म सच्च ला नी होंदा है। 22 झूठा कुण है? सिर्फ सै जडा यीशु जो मसीहा होणे जो मना करदा है; कने मसीह दा बिरोधी सेई है, जडा पिता परमेश्वर दा कने पुत्र यीशु जो नी मनदा है। 23 जडा कोई पुत्रे जो नी मनदा है उदे बाल पिता परमेश्वर भी नी: जडा पुत्र यीशु जो मन्नी लेतां है, उदे बाल पिता परमेश्वर भी है। 24 जालू तूसां मसीह पर भरोसा किता कने जडा सच्चाई दा बचन तूसां सुणया, सै ही तूसां च बणी रे। अगर सै तूसां च बणी रे, तां तूसां भी पुत्रे च, कने पिता परमेश्वर च बणी रेणा। 25 हमेशा दी जिन्दगी सै बायदा है जडा पिता परमेश्वरे सांझो ने कितया है। (aiōnios g166) 26 मै तूहांजो उना लोकां दे बारे च चिताबनी दे दा है जडे तूहांजो गलत शिक्षा ने धोखा देणे दी कोशिश करा दे न। 27 पर तूहांजो तां पबित्र आत्मा यीशु मसीह दे जरिये मिलया है, सै तूहाडे च हमेशा बणया रे; इस ताई तूहांजो सच्चाई दे बारे च कुसी माणुए जो सिखाणे दी जरूरत नी है, बल्कि पबित्र आत्मा तूहांजो उना सरियां चीजां दे बारे च जाणने च मदद करणी है जिना दी तूहांजो जरूरत है, जडा पबित्र आत्मा तूहांजो सिखाणा सै सच्च है, उस च कुछ झूठ नी है: इस ताई यीशु मसीह सोगी बणी रिया जियां की पबित्र आत्मा करणे तांई बोलया है। 28 हे बच्चो मसीह सोगी बणी रिया; की जालू उनी दोबारा प्रगट होणा, तां सांझो हिम्मत हो, कने असां उदे ओणे पर उदे सामणे शरमिंदा ना होन। 29 क्योंकि तूसां ऐ जाणदे न, की यीशु मसीह धर्मी है, तां ऐ भी जाणदे न, की जडे कोई धर्म दे कम्म करदे न, सै परमेश्वर दे बच्चे न।

3 बिचार करा की पिता परमेश्वरे साडे ने कितणा प्यार किता है, की सांझो परमेश्वर दे बच्चे बोलन, कने सच्ची असां परमेश्वर दे बच्चे न। इस संसारे दे लोक ऐ नी जाणदे न की असां परमेश्वर दे बच्चे न क्योंकि सै पिता परमेश्वर जो नी जाणदे। 2 हे प्यारो, हुण असां परमेश्वरे दी ओलाद न, कने हल्ले दीकर ऐ प्रगट नी होया, की असां भविष्य च क्या बणी जाण। इणा पता है की जालू उनी प्रगट होणा है, तां असां भी उदे सांई होणा, क्योंकि उसयो तदिया ही दिखणा जियां सै है। 3 कने जडा कोई यीशु मसीह पर आस रखदा है, सै अपने आपे जो तदेया ही पबित्र करदा है, जदेया सै पबित्र है। 4 जडे कोई लगातर पाप करदे न, सै परमेश्वरे दी व्यवस्था जो नी मंदे कने पाप करणा व्यवस्था जो तोड़णा है। 5 कने तूसां जाणदे न, की सै इस ताई आया है की साडे पापां दिया सजा जो दूर करी दे; कने उदे च कोई पाप नी है। 6 जडा कोई उदे च बणी रेंदा है, सै लगातर पाप नी करदा; जडा कोई पाप करदा है, सै नी जाणदा की यीशु मसीह कुण है, कने ना ही उसयो जाणया है। 7 हे बच्चो, कुसी दे बेहकाबे च मत ओदे। जडा धार्मिकता दे कम्म करदा है, सेई यीशु मसीह सांई धर्मी है। 8 जडा कोई लगातर पाप करदा है, सै शैताने दिया तरफा ला है, क्योंकि शैतान शुरू ला ही पाप करदा आया है, परमेश्वरे दा पुत्र इस ताई आया, की शैताने दे कम्मा जो खत्म करे। 9 जडा कोई परमेश्वरे दे बच्चे न सै लगातर पाप नी करदा; क्योंकि परमेश्वर दा सभाब उदे च है: कने सै पाप नी करी सकदा, क्योंकि सै परमेश्वरे दा बच्चा है। 10 इसी ने परमेश्वरे दे बच्चे कने शैताने दे बच्चे जाणे जांदे न; जडा कोई धर्म दे कम्म करदा, सै परमेश्वरे दिया तरफा ला है, कने जडा कोई अपने मसीह भाईऐ ने प्यार करदा है सै भी परमेश्वरे दिया तरफा ला है। 11 जडा समाचार तूसां शुरू ला सुणया है, सै

ऐ है, की असां इकां दुज्जे ने प्यार रखिऐ। 12 कने आदम दे पुत्र कैन साईं मत बगुदे, जडा उस शैताने दा बच्चा था, जिनी अपने भाईऐ दी हत्या कित्ती, कने उनी उदी कुसा बजा ने हत्या कित्ती? उनी इस ताईं हत्या कित्ती क्योकि उदे अपने कम्म बुरे थे, कने उदे भाईऐ दे कम्म धर्म्य दे थे। 13 हे मसीह भाईयो, अगर संसारे दे लोक तुहांजो ने बैर रखदे न तां हेरान मत होंदे। 14 सांझो पता है, की असां मौत दी शक्ति ला अजाद होई गियो न कने हुण साडे बाल परमेश्वरे दिया तरफा ला हमेशा दी जिन्दगी है; क्योकि असां मसीह भाईयां ने प्यार रखदे न, कने जडा प्यार नी रखदा है सै हले भी मौत दिया शक्तिया दे अधीन है। 15 जडा कोई अपने भाईयां ने बैर रखदा है, सै हत्यारा है; कने तुसां जाणदे न, की कुसी भी हत्यारे च हमेशा दी जिन्दगी नी रेंदी। (aiōnios g166) 16 असां प्यार जो यीशु मसीह ला ही जाणया, की उनी साडे ताईं अपने प्राण दिते; इस ताईं सांझो भी मसीह भाईयां ताईं प्राण देणा चाईदे। 17 पर जिसदे बाल संसारे दी धन सम्पत्ति हो कने सै अपने मसीह भाईये जो कंगाल दिखीकरी उस पर तरस ना खा, तां उदे च परमेश्वरे दा प्यार नी होई सकदा। 18 हे मेरे प्यारे बच्चे, सांझो बचना कने गल्लां ला ही नी, पर उना दी सहायता कनी के सच्चा प्यार करणा चाईदा। 19 जालू असां दुज्जयां ने प्यार करगे इसला ही सांझो पता चलणा है, की असां सच्च दी ओलाद न। कने जालू कदी साडा मन सांझो पर दोष ला, तां असां परमेश्वरे दे सामणे अपने मने जो दिलासा देई सकदे न। 20 क्योकि परमेश्वर साडे मने ला बढा है; कने सब कुछ जाणदा है। 21 हे प्यारो, अगर साडा मन सांझो दोष नी ला, तां असां परमेश्वरे सामणे हिम्मत होंदी है। 22 कने जडा कुछ असां परमेश्वरे ला मंगदे न, सै सांझो उसला मिलदा है, क्योकि असां उदे हुकमा जो मंदे न; कने जडा परमेश्वरे जो खुशी दिन्दा है असां सेई करदे न। 23 कने उदा हुकम ऐ है की असां उदे पुत्र यीशु मसीह पर भरोसा करन कने जियां उनी सांझो हुकम दितया है तियां ही अपु चे प्यार रखन। 24 जडा उदे हुकमा जो मनदा है, सै परमेश्वर च रेंदा है कने परमेश्वर उना च रेंदा है। कने इसी ला ही उसा पबित्र आत्मा ला जडी उनी सांझो दिती है, असां जाणदे, की सै सांझो च रेंदा है।

4 हे प्यारो, हर इक कुसी पर भरोसा मत करा जडा बोले उस बाल पबित्र आत्मा है, पर उना जो परखा, की सै परमेश्वरे दिया तरफा ला हेन की नी; क्योकि बडे भरी झूठे संदेश देणेबाले इस संसारे च आयो न, जडे बोलेदे न की असां पिता परमेश्वरे दिया तरफा ला बोलदे न। 2 परमेश्वरे दी आत्मा जो तुसां इस रीतिया ने पछेणी सकदे न, की जडा कोई माणु ऐ मनी लेंदा है, की यीशु मसीह माणु बणी करी आया है, सै परमेश्वरे दिया तरफा ला है। 3 कने जडा कोई माणु यीशुऐ जो नी मंदा है, सै परमेश्वरे दिया तरफा ला नी है; कने सेई मसीह दे बिरोधी दी आत्मा है; जिसदी चचां तुसां सुणी बैठयो न, की सै ओणे बाला है, कने हल्ले भी संसारे च है। 4 हे बच्चों, तुसां परमेश्वरे दिया तरफा ला झूठे संदेश देणेबालयां जो हराया; क्योकि जडा पबित्र आत्मा तुहाडे च है, सै शैताने ला बडा है जडा संसार च है। 5 सै परमेश्वर दिया तरफा ला झूठे संदेश देणेबाले संसारे दे न, इस ताईं सै संसारे दियां गल्लां करदे न, कने संसार दे लोक उना दी सुणदे न। 6 असां परमेश्वरे दिया तरफा ला न, जडे परमेश्वरे जो जाणदे न, सै साडी सुणदा है; जडा परमेश्वरे जो नी जाणदा है सै साडी नी सुणदा है इस तरीके ने असां सच्च दी आत्मा कने झूठ दी आत्मा जो पछेणी लेंदे न। 7 हे प्यारो, असां अपु चे प्यार रखन; क्योकि प्यार परमेश्वर ला है कने जडा कोई दुज्जयां सोगी प्यार करदा है, सै परमेश्वरे दा बच्चा है कने परमेश्वरे जो जाणदा है। 8 जडा दुज्जयां जो प्यार नी करदा सै परमेश्वरे जो नी जाणदा है, क्योकि परमेश्वर प्यार है। 9 जडा प्यार परमेश्वर साडे ला रखदा है, सै इसा गल्ला ने प्रगट होया है की पिता परमेश्वरे अपने इकलते पुत्रे जो संसार च भेजया है ताकि सांझो उसला हमेशा दी जिन्दगी मिल्ले। 10 सच्चा प्यार ऐ नी है की असां परमेश्वरे ने प्यार कित्ता, पर उनी सांझो ने प्यार कित्ता है, पर परमेश्वरे साडे पापां जो माफ करणे ताईं अपने पुत्रे जो बलिदान होणे ताईं भेजया है। 11 हे प्यारो, जालू परमेश्वरे सांझो ने ऐसा प्यार कित्ता, तां सांझो भी अपु चे ऐदिया ही प्यार रखणा चाईदा। 12 परमेश्वरे जो कदी भी कुनी नी दिखया है; अगर असां अपु चे प्यार रखिऐ, तां परमेश्वर सांझो च बणी रेंदा है; कने उदा प्यार सांझो च सिद्ध होई गिया है। 13 इसी ने सांझो पता चलदा है, की असां परमेश्वर च रेंदे न, कने परमेश्वर सांझो च रेंदा है; क्योकि उनी अपनी पबित्र आत्मा सांझो दितया है। 14 असां पुत्रे जो दिखया है कने गबाई भी दिन्दे न की पिता परमेश्वरे अपने पुत्रे जो संसारे दे लोकां दा उद्धारकर्ता बणाई के भेजया है। 15 जडा कोई ऐ अपनाई लेंदा है

की यीशु परमेश्वरे दा पुत्र है, परमेश्वर उदे च रेंदा है, कने सै परमेश्वरे च रेंदा है। 16 असां जाणदे न कने भरोसा करदे न की परमेश्वर सांझो ने प्यार करदा है, उसयो असां जाणी गे न, कने सांझो उदा भरोसा है; परमेश्वर प्यार है जडा प्यार च बणया रेंदा है परमेश्वर उदे च रेंदा है, कने सै परमेश्वरे च रेंदा है। 17 इसी ला ही प्रेम सांझो च पूरा होया कि, न्याय दे दिने सांझो हिम्मत मिल्ले की सै सांझो नी दिगा, क्योकि मसीह साईं इक दुज्जे सोगी प्यार करदे न कने इसा दुनिया च मसीह साईं रेंदे न। 18 प्यार च डर नी होंदा, सिद्ध प्यार डरे जो भी दूर करी दिन्दा है, क्योकि जडा डरदा है सै सजा ला डरदा है। जडा डरदा है सै प्यारे च सिद्ध नी होया है। 19 परमेश्वरे सांझो ला पेहले प्यार कित्ता इस ताईं असां परमेश्वर कने दुज्जयां सोगी प्यार करदे न। 20 अगर कोई बोले, मैं परमेश्वरे ने प्यार करदा, पर अपने मसीह भाईऐ ने दुशमणी रखे; तां सै झूठा है; क्योकि जडा अपने मसीह भाईऐ ने जिससयो उनी दिखया है उसला प्यार नी रखदा है, तां सै परमेश्वरे ने भी प्यार नी रखी सकदा है, जिससयो उनी दिखया भी नी है। 21 कने उसला सांझो ऐ हुकम मिलया है, की जडा कोई परमेश्वरे ने प्यार रखदा हे, सै अपने मसीह भाई ने भी प्यार रखे।

5 जिदा ऐ भरोसा है की यीशु ही मसीह है, सै जन परमेश्वरे दी संतान है कने जडा कोई पिता परमेश्वरे ला प्यार करदा है, तां सै उदी संतान ला भी प्यार करदा है। 2 जालू असां परमेश्वरे ने प्यार करदे न, कने उदे हुकमा जो मंदे न, तां इसी ने सांझो पता चलदा है, की परमेश्वरे दी ओलाद ने प्यार रखदे न। 3 परमेश्वरे ने प्यार करणे दा मतलब है की असां उदे हुकमा जो मनन; कने उदे हुकमा जो मनणा बडा कठिन नी न। 4 क्योकि जडे कोई परमेश्वरे दे बच्चे न, सै संसारे पर जित हासिल करदे न, कने सै जीत, जिसने संसारे जो रांदा है, सै साडा भरोसा ही है। 5 संसारे पर जीत पाणे बाला कुण न? सिर्फ सेई जिसदा भरोसा है, की यीशु ही परमेश्वरे दा पुत्र है। 6 ऐ यीशु मसीह है, जिससयो परमेश्वरे इस संसार च भेजया है, कने उससयो पाणिऐ ने बपतिस्मा दितया था, कने बाद च जालू सै मरी गिया तां उदा खून बेह गिया। सै सिर्फ बपतिस्मा लेणे ताईं नी आया था पर सूली पर अपना खून बहाई करी मरया भी। पबित्र आत्मा दसदा है की यीशु मसीह परमेश्वरे ला आया, कने पबित्र आत्मा हमेशा सेई दसदा है जडा सच्च है। 7 गबाई ऐ है की यीशु मसीह साडे पापां ताईं बलिदान होया, ऐ तिन्न गल्लां इसदी गबाई दिन्दियां न। 8 पबित्र आत्मा, पाणी, कने खून; तिने इक ही गल्ल बोलदियां न। 9 जालू असां माणुऐ दी गबाई मन्नी लेंदे न, तां परमेश्वरे दी गबाई तां उसला भी बदीकरी है कने परमेश्वरे दी गबाई ऐ है, की उनी अपने पुत्रे दे बारे च गबाई दितियो है। 10 जडा परमेश्वरे दे पुत्रे पर भरोसा करदा है, सै अपने मने च ही गबाई रखदा है; जिनी परमेश्वरे पर भरोसा नी रखया, उनी परमेश्वरे जो झूठा बणया; क्योकि उनी उसा गबाइया पर भरोसा नी कित्ता, जडी परमेश्वरे अपने पुत्रे दे बारे च दिती है। 11 कने सै गबाई ऐ है, की परमेश्वरे सांझो हमेशा दी जिन्दगी दितियो है कने सांझो ऐ हमेशा दी जिन्दगी परमेश्वरे दे पुत्रे ला मिल्लि है। (aiōnios g166) 12 जडा पिता परमेश्वरे दे पुत्र यीशु मसीह जो अपनांदा है, उदे बाल हमेशा दी जिन्दगी है; कने जडा परमेश्वरे दे पुत्रे जो नी अपनांदा है, उदे बाल हमेशा दी जिन्दगी भी नी है। 13 मैं तुहांजो ऐ सब इस ताईं लिखया है की तुसां, जडे परमेश्वरे दे पुत्रे पर भरोसा करदे न, की तुहांजो पता लगे की हमेशा दी जिन्दगी तुहाडी है। (aiōnios g166) 14 कने सांझो परमेश्वरे सामणे जडी हिम्मत होंदी है, सै ऐ है; की अगर असां उदी इच्छा ने कुछ मंगदे न, तां सै साडी सुणदा है। 15 कने जालू असां जाणदे न, की जडा कुछ असां परमेश्वरे ला मंगदे न, सै साडी सुणदा है, तां ऐ भी जाणदे न, की जडा कुछ असां मंगया है सांझो मिल्ला भी है। 16 अगर कोई अपने मसीह भाईऐ जो ऐसा पाप करदे दिखे, जिदा परिणाम मौत न हो, तां सै उदे ताईं परमेश्वरे ला प्राथना करा तां परमेश्वरे उदिया जिन्दगिया दी रक्षा करणी। क्योकि इक पाप ऐसा भी होंदा है जिदा नतीसा मौत है; मैं इदे बारे च परमेश्वरे ला प्राथना करणे ताईं नी बोलदा। 17 हर तरा दा अधर्म तां पाप है, पर ऐसा पाप भी है, जिदा नतीसा मौत है। 18 सांझो पता हे, की जडा कोई परमेश्वर दा बच्चा है, सै लगातार पाप नी करदा; क्योकि परमेश्वरे दा पुत्र यीशु मसीह उदी रक्षा करदा है कने शैताने उसयो छुई नी सकदा। 19 असां जाणदे न, की असां परमेश्वरे ला न, कने सारे संसारे दे लोक उने शैताने दे वशे च पियो न। 20 कने ऐ भी जाणदे न, की परमेश्वरे दा पुत्र यीशु मसीह इस संसार च आया कने उनी सांझो समझ दिती, की असां उने सच्चे

परमेश्वरे जो पछेणन। असां सच्चे परमेश्वरे सोगी करीबी रिश्ते च न क्योकि साडा उदे पुत्र यीशु मसीह सोगी करीबी रिश्ता है। सच्चा परमेश्वर कने हमेशा दी जिन्दगी ऐई है। (aiōnios g166) 21 हे बच्चों, अपने आपे जो हर इक ऐसी चिजा ला दुर रखा जडी तुहाडे दिले च परमेश्वरे दी जगा ले।

2 यूहन्ना

1 मैं यूहन्ना कलीसिया दा अगुवा, मैं ऐ चिठी उसा आदरणीय जनानिया जो कने उसा दे बचचयों जो लिखा दा है, जिना जो परमेश्वरे चुणया है। मैं सच्चि तुहांजो ने प्यार करदा है, कने सिर्फ मैं ही नी पर सै सारे भी प्यार करदे न, जडे परमेश्वरे दी सच्चाईया पर भरोसा रखदे न। **2** असां तिजो ला इस ताई प्यार करदे क्योंकि सच्चि शिक्षा साडे मना च बणियो है सै हमेशा साडे सोगी बणी रेपी है। (aiōn g165) **3** परमेश्वर पिता कने उदे पुत्र यीशु मसीह दिया तरफा ला अनुग्रह, दया कने शांति असां सारयां सोगी बणी रे। जडे सच्च जो मंदे कने इक दुज्जे ने प्यार करदे न। **4** मैं बडा खुश होया जालू मैं तैरे कुछ बचयां दे बारे च सुणया की सै सचाई ने जिन्दगी जी दे न, सै बिलकुल सै ही करा दे न जडा साडे पिता परमेश्वरे करणे जो बोलया। **5** हुण हे आदरनीय जनानी, मैं तिजो ला विनती करदा है, की सांझो इक दुज्जे ने हमेशा प्यार करणा चाईदा। ऐ कोई नोआ हुकम नी है पर सेई हुकम है जिसयो असां उस बकते ला जाणदे न जालू असां मसीह दे पिच्छे चलणा शुरू कितया था। **6** सच्चा प्यार सै है जडा असां तालू करदे न जालू असां परमेश्वर दे हुकमा जो मंदे न, जालू ला असां मसीह दे पिच्छे चलणा शुरू कितया है, तालू ला असां सुणया है की परमेश्वरे तुहांजो हुकम दितया है की तुहांजो हमेशा इक दुज्जे ने प्यार करदे रेणा चाईदा। **7** मैं ऐ इस ताई बोला दा है क्योंकि केई लोक न जडे झूठे उपदेश दिन्दे न सै मतियां जगां च गियो न, सै बोलदे न की यीशु मसीह माणुए दे स्मे च इसा दुनिया च नी आया है। जडा कोई ऐ नी मंदा की यीशु माणुए दे स्मे इसा धरती च नी आया है तां सै माणु मसीह दा बिरोधी है कने लोकां जो हमेशा धोखा दिदा है। **8** इस ताई तुसां ऐ ध्यान रखा की ऐ लोक तुहांजो धोखा ना देन, ताकि परमेश्वरे दी सेबा ताई कितियो मेहनत बेकार ना होई जा कने परमेश्वरे तुहाडी सेबकाई ताई तुहांजो पूरा इनाम देणा। **9** जडे लोक सच्चि शिक्षा ला भटकी जादे न कने मसीह दी शिक्षा जो नी मंदे न, सै परमेश्वरे सोगी संगती च नी न। जडे लोक यीशु मसीह दी शिक्षा जो मंदे न सै परमेश्वरे सोगी कने उदे पुत्र यीशु सोगी संगती च न। **10** अगर कोई तुहाडे बाल आए कने कुछ सिखा दा है, जडा मसीह यीशु दी शिक्षा ला लग है। ना तां उदी मेहमान नबाजी करा, कने ना ही उसयो नमस्ते करा। **11** क्योंकि जडा कोई ऐसे माणुआं दा स्वागत करदा है, सै उदे बुरे कम्मा च हिस्सेदार होंदा है जडा सै करदा है। **12** मैं होर भी मतियां गल्लां तुहांजो दसणा चांदा है, पर मैं उना जो इयां चिठिया च नी लिखणा चांदा है, पर मिजो आस है, की मैं तुहाडे बाल ओए, कने आमणे सामणे होईकरी गल्लां करे तालू असां पूरी तरा ला खुश होणा। **13** ऐथू तुहाडियां बेंहणा दे बच्चे, जिना जो परमेश्वरे चुणयां है सै तुहांजो नमस्कार करा दे न।

3 यूहन्ना

1 मैं यूहन्ना कलीसिया दा अगुवा इसा चिठिया जो अपने प्यारे भाई गयूस जो लिखदा है, मैं तिजो ला सच्चा प्यार करदा है। **2** हे प्यारे, मेरी ऐ प्रार्थना है; जियां तुसां भरोसे च मजबूत होदे जांदे न, ठीक तियां ही बाकी होर कम्मा च भी तरकी करा कने स्वस्थ रिया। **3** क्योकि कुछ विश्वासी भाईया आई करी, मिजो दसया की तुसां अपणी जिन्दगी इमानदारिया ने सच्चाई च जी दे न, तां मिजो बडी खुशी होई। **4** जालू भी मैं ऐ सुणदा है की सै लोक जडे मेरे बचयां साईं न, सै उसी तरीके ने जी दे न, जडा सच्ची परमेश्वरे सांझो दसया है, इसला मिजो होर भी जादा खुशी होदी है। **5** हे प्यारे, तू बडिया इमानदारिया ने साडे मसीह भाईयां दी मदद किती जडे शुभसमाचार प्रचार ताई यात्रा करा दे थे, चाहे सै तुहाडे ताई अनजाण ही थे। **6** उना चे केई लोकां ऐथु दे विश्वासियां जो कलीसिया च दसया है की तू अपने मसीह साथियां ने कितना प्यार करदा है। हण मैं तिजो ने बोलदा है तिजो ऐसे मसीह साथियां दी मदद करदे रेणा चाईदा जडे मसीह दा शुभसमाचार प्रचार करणे ताई यात्रा करदे न क्योकि ऐ परमेश्वरे जो खुश करदा है। **7** क्योकि सै मसीह दा शुभसमाचार सुणणे ताई निकलयो न, कने भरोसा नी करणे बालयां ला कोई मदद नी लेदे। **8** इस ताई ऐसयां दा अपने घरे ओणे पर स्वागत करा कने जडी उना दी जरूरत है सै दिया, जिसने असां भी सच्ची सेवा दे हिस्सेदार बणन। **9** मैं कलीसिया दे ना इक चिट्ठी लिखी; पर दियुत्रिफेस उनी मेरियां गल्ला जो मनणे ला मना करी दिता क्योकि सै खुद हमेशा ला ही कलीसिया दा अगुवा बणना चांदा है। **10** इस ताई जालू मैं ओणा, तां तुहाडे सामणे उदे कम्मा जो जडा सै करा दा कने जडा साडे बारे च बुरियाँ-बुरियाँ गल्लां बोलदा है सारा कुछ दसगा; कने इतना ही नी, सै अपु तां शुभसमाचार प्रचार करणे बाले मसीह भाईयां जो स्वीकार नी करदा है कने ना ही कलीसिया दे लोकां जो ऐसा करणा दिन्दा है कने जडे करणा चांदे न, उना जो मना करदा है, कने कलीसिया ला निकाली दिन्दा है। **11** हे प्यारे, उना माणुआं दी नकल मत करदे जडे बुरे कम्म करदे न, पर उना माणुआं दे पिच्छे चलनयो जडे अच्छे कम्म करदे न। जालू कोई अच्छा कम्म करदा है, तालू सै ऐ साबित करदा है, की मैं परमेश्वरे दा पुत्र है कने जडा बुराई करदा है उनी परमेश्वरे जो नी दिखया। **12** दिमेनियुस दे बारे च कलीसिया दे सारे लोक बोलदे न की बडा अच्छा बन्दा है क्योकि सै सच्चाई ने जिन्दगी जिन्दा है, सच्च भी अपु उदी गबाई दिदा है: कने असां भी बोलदे न, की सै बडा अच्छा बन्दा है कने तू जाणदा है, असां सच्च बोलदे न। **13** मैं होर भी मतियां गल्लां तुहांजो दसणा चांदा है, पर मैं उना जो इयां चिठिया च नी लिखणा चांदा है। **14** पर मिजो आस है, की मैं तुहाडे बाल ओऐ, कने आमणे सामणे होईकरी गल्लां करे तालू असां पूरी तरा ला खुश होणा। मैं प्रार्थना करदा है की परमेश्वर तिजो शांति दे। ऐथु दे मसीह मित्र तिजो नमस्कार करदे न ओथु दे दोस्तां दे ना लेई-लेई के नमस्कार बोली दियां।

यहदा

1 मैं, यहदा तुहांजो ऐ चिड़ी लिखा दा है। मैं यीशु मसीह दा सेबक कने याकबे दा छोटा भाई है। मैं तुसां लोकां जो लिखा दा है, जिना जो परमेश्वर अपने उपर भरोसा करणे ताई सदया है। साडा पिता परमेश्वर तुहांजो ने प्यार करादा है कने तुहाडी रक्षा करादा है। **2** मैं प्राथना करादा है की परमेश्वर तुहांजो दया, शांति कने प्यार बडा जादा दे। **3** हे प्यारे मसीह भाईयो, मैं तुहांजो उसा नोई जिन्दगी दे बारे च लिखणे दी हर इक कोशिश करा दा है कने जडी यीशु मसीह दे जरिये परमेश्वर दिया तरफा ला होंदी है कने जिसा च असां सारे हिस्सेदार न। पर हण मिंजो इसा चिठिया जरिये तुहांजो प्रोत्साहित करणे दी जरूरत महसूस होआ दी है ताकि तुसां मसीह पर भरोसे च टिकी रेणे ताई कोशिश करा। परमेश्वर अपने लोकां ताई ऐ भरोसा इक ही बरी हमेशा ताई दितया है, कने इसयो बदली नी सकदे। **4** मैं तुहांजो इस ताई लिखा दा है क्योकि कुछ ऐसे लोक न जडे भरोसा करणे दा दिखावा करदे न, कने परमेश्वर दी इज्जत नी करदे न कने तुहाडिया कर्त्तिसिया च शामिल होई गियो न, कने गलत शिक्षा दिन्दे न क्योकि परमेश्वर अपनी अनग्रह ला साडे पापां जो माफ करी दिन्दा है, इस ताई असां बुरे कम्म कने पाप करी सकदे न, जडा साडा इकलोता मालिक कने साडा प्रभु है। बडे बकत पेहेले ला, पबित्र शास्त्र च लिख्या है की परमेश्वर ऐसे लोकां जो सजा देंगी है। **5** हालांकि तुसां इना सारियां गल्लां दे बारे च जाणदे न, फिरी भी मैं तुहांजो इना गल्लां दी याद दिलाणा चांदा है, की परमेश्वर इस्त्राएलियां जो गुलामी ला अजाद कराया कने मिश्र देशे ला कडी लेई आया, पर बादे च उनी सारयां जो मारी दिता, जिना रेगिस्तान च उस पर भरोसा नी किता। **6** याद करा की परमेश्वर उना शैताने दे दूतां जो कियां सजा दिती, जिना अपणिया जिम्मेदारियां जो नी निभाया, कने उना अपने पदां जो छडी दिता। परमेश्वर इना स्वर्गदूतां जो नेहरे च रखया है, कने ऐसे सुगला ला बनया है जिना जो कोई नी तोडी सकदा ताकि उस महान न्याये बाले दिने उना दा न्याय होई सके। (aidios g126) **7** इस ताई इना इस्त्राएली कने स्वर्गदूतां सांई, उना लोकां जो भी याद रखा जडे सदोम कने अमोरा शेहरां च कने उना दे अखे-बखे दे गां च रेंदे थे, की उना सोगी क्या होया था। सै लोक व्यभिचारी होई गियो थे, कने हर तरा दे नाजायज यौन रिशतयां च पेई गियो थे, इस ताई परमेश्वर उना जो अग्गी ने मारी दिता। उना सोगी जडा होया सै झूठे गुरूआं ताई इक चेताबनी है की उना जो भी कदी नी बुझणे बालिया अग्गी दी सजा मिलणी है। (aiōnios g166) **8** इना उदाहरणा दे बारे च जाणने बाद भी, ऐ भरोसा होणे दा दिखावा करणे बाले माणु इयां ही पाप करदे न कने बोलंदे न की उना दर्शण दिखया है। सै अपने शरीर जो पाप करणे ताई इस्तेमाल करदे न, कने परमेश्वर दे अधिकारां जो नी मंदे न, कने महिमामय स्वर्गदूतां जो बदनाम करदे न। **9** पर ऐथू दीकर की प्रधान स्वर्गदूत मीकाइले भी ऐसियां बुरियां गल्लां नी कीतियां जदियां गल्लां ऐ झूठे गुरू करदे न। पर जालू उनी शैताने सोगी बेहस किती कने मूसा परमेश्वर दा संदेश देणेबाले दिया लाशा जो लेई जाणे ताई अपने अधिकारे जो चुनौती दिती, तां मीकाइले ऐ नी सोचया की उदे बाल बुरियां गल्लां बोली करी शैताने पर बुरा दोष लागे दा हक है। बल्कि उनी बोलया, “प्रभु तिजो ला सकताईया ला गल्ल करे।” **10** पर सै लोक जडे परमेश्वर दी आराधना नी करदे, सै ऐसिया गल्लां दा बिरोध करणे ताई उना दे बारे च बुरा भला बोलंदे न, जडियां उना जो समझ नी ओदियां; कने सै जंगली जानवरां सांई व्यवहार करदे न, कने जिना कम्मा दे बारे च सै जाणदे नी न, उना जो बिना सोचयो समझे करदे न, परमेश्वर उना जो सजा देंगी है। **11** उना दा बडा बुरा होंणा है! की सै कैन सांई बुराई दे रस्ते पर चलंदे न, जिनी अपने भाई दी हत्या करी दिती थी, क्योकि सै भाईऐ ला जलदा था, क्योकि परमेश्वर उदे भाईऐ दे बलिदान जो अपनाई लिया था पर उदे बलिदाने जो नी। उना जल्दबाजी च सेई गलती किती जडी बिलामे होर लोकां जो पाप पासे लेई जाणे दी किती ताकि पैसे कमाई सके। जियां मूसा दे खिलाफ जाणे ला कोरह दा नाश होई गया, तियां ही उना लोकां दा भी नाश होई जाणा जडे परमेश्वर दे खिलाफ जांदा न। **12** जियां पाणिऐ अंदर लुकियां चट्टाना खंद्दी जाजां ताई खतरनाख न, तियां ही ऐ लोक तुहाडे सोगी धामा च तुहाडे ताई खतरनाख न। चाहे सै प्रभु भोज च शर्मनाक कम्म करदे न पर सै इना कम्मा दिया बजा ला कोई भी शर्म महसूस नी करदे। सै उना पुहाला सांई न जडे अपणी ही

देखभाल करदे न; सै दुज्जयां लोकां दी सहायता नी करदे। सै उना बदला सांई न जिना जो सुकी होआ बिना बरखा कितयो उडाई लेई जांदी है। सै बायदे तां बडे करदे न, पर कुछ दिन्दे न। फसल दे बकते दे स्त्रां सांई न जिना पर कोई फल नी होंदा है जिना जो उखाडी दिन्दे न, मतलब की सै मरी गियो न। **13** समुन्द्रे दियां भारी लेहरां सांई जडियां गंदा झाग बणादियां न, ऐ लोक भी शर्मनाक कम्म करदे न। सै कुछ तारयां सांई न जडे इक सीधे रस्ते पर नी चलंदे, कने सही रस्ता नी दसदे। प्रभु उना ताई इक जगा रखा दा है जडा जिथू पूरा नेहरा ही है जिथू उना जो हमेशा ताई रेणा पोंणा है। (aiōn g165) **14** कने हनोक जडा पेहेले माणु आदम ला बाद सतमी पीढियां च जमया था, उनी इना अधर्मी लोकां दे बारे च भविष्यवाणी किती, “सुणा! परमेश्वर पक्का ही अपने अणगिनत स्वर्गदूतां सोगी ओणा। **15** सारे लोकां दा न्याय करणे ताई, उना सारे बुरे कम्मा ताई उना पर दोष लागे ताई जडे उना परमेश्वर दे खिलाफ कितयो न कने उना सारियां भड़ी गल्लां ताई जडे उना उदे खिलाफ बोलियां न।” **16** ऐ लोक हमेशा परमेश्वर दे खिलाफ बोलंदे न कने दुज्जयां लोकां च गलती तोपदे न। सै लगातार उना बुरे कम्मा जो करदे न जडे उना दे दिल करणा चांदा न। सै अपने बारे च धमंड ला दाबा करदे न कने खद दे फायदे ताई दुज्जयां लोकां दी चापलूसी करदे न, उना जो पिता परमेश्वर दिया तरफा ला सजा मिलणी। **17** पर हे प्यारे मसीह भाई, तुसां उना गल्लां जो याद रखा; जडे साडे प्रभु यीशु मसीह दे प्रेरित बडे पेहेले बोली बैठयो न। **18** सै तुहांजो ला बोलंदे थे, “साडे प्रभु यीशु मसीह दे मुडी करी बापस ओणे ला पेहेले, ऐसे लोकां होंणा है जिना प्रभु कने उदे लोकां दा मजाक उडाणा। ऐ सेई लोक न जिना दिया जान्दियां च बुरी इच्छां दा काबू है।” **19** ऐ सै लोक न, जडे तुहांजो च फुट पांदा न, उना दिया बुरियां इच्छा उना जो काबू करदियां न, कने उना च पबित्र आत्मा नी है। **20** पर हे प्यारे भाईयो तुहांजो इक दुज्जे दी सहायता करदे रेणा चाईदा ताकि उना पबित्र सच्चाईयां च जिना पर तुसां भरोसा करदे न, इक दुज्जे जो बधाई सकन। तुहांजो पबित्र आत्मा दिया अगुवाई च प्राथना करणी चाईदी। **21** तुहांजो इस भरोसे सोगी जीणा चाईदा की परमेश्वर सांझो ला प्यार करादा है। हालांकि तुसां उस दिने दा इंतजार करदे न जालू साडे प्रभु यीशु मसीह बापस मुडी करी ओणा ताकि तुहांजो हमेशा दी जिन्दगी मिल्ले क्योकि उनी सांझो पर दया किती है। (aiōnios g166) **22** उना लोकां ताई दयालु बणा जडे ऐ नी जाणदे कुस पर भरोसा करन। **23** कुछ होर लोक जिना जो तुसां जाणदे न, अगर सै नरख पासे जा दा दे न, तां उना जो उस हमेशा दिया अग्गी ला झट खिची करी बचाई लिया। कने दुज्जयां पर दया दस्सा। पर सियुदा ही पाप करणे ला बचणे ताई साबधान रिया। ऐथू दीकर की उना कपडयां ला भी नफरत करा जिना पर पाप दे कम्मा दे दाग न। **24** इकलोता परमेश्वर ही है जडा तुहाडी रक्षा करी सकदा है, जालू सै तुहांजो अपणिया महिमा च अपने सामणे खरेडदा है। उनी सांझो साडे प्रभु यीशु मसीह दे जरिये बचाया है। महिमा, गौरव, शक्ति, अधिकार बकत दी शुरूआत ला ही उदे थे, हण भी उदे न, कने हमेशा ताई उदे ही रेणे। आमीन। (aiōn g165)

प्रकाशितवाक्य

1 इसा कताबा च उना गल्लां जो लिख्या है जडिया परमेश्वरे यीशु मसीह जो दसियां न। परमेश्वरे इस तांई उसयो दसियां ताकि सै अपने सेबकां जो उना घटना दे बारे च दस्ती सके जडियां जल्दी ही होणियां न। यीशु मसीहे ऐ संदेश मिजो, अपने सेबक यूहन्ना बाल स्वर्गदत्तां जो भेजीं करी दसया, 2 इस तांई, मै सै सब कुछ लिख्या जडा मै दिख्या। मै इसा कताबा च परमेश्वरे दा बचन कने सै सच्चियां शिक्षां लिखियां न जिना दे बारे च यीशु मसीहे मिजो दसया। 3 परमेश्वरे हर उस माणुऐ जो आशीश देणीं जडे इसा भविष्यवाणियां जो दुज्यां जो पढी करी सुणादां है, कने उनी हर उस माणुऐ जो आशीश देणीं जडे उसयो सुणदे न कने इसयो मदे न। क्योंकि ऐ चीजां जल्दी ही होणियां। 4 ऐ चिडी यूहन्ना दिया तरफा ला आसिया प्रदेशे दिया सत्तां कलीसियां तांई है: मै प्राथना करता है की परमेश्वर तहांजो पर अनुग्रह कने शांति दे। सै सेई परमेश्वर है, जडा बकत दिया शुरुआत ला लेईकरी हुणे दीकर कने हमेशा तांई नी बदलदा। कने उना सत्तां आत्मा दिया तरफा ला, जडियां परमेश्वरे दे सिंहांसने दे सामणे न, 5 कने यीशु मसीह दिया तरफा ला जिदे बचन पर भरोसा करी सकदे न, सै सेई ही है जडा मरी करी दुबारा ला जिदा होणे बालयां च पेहला है कने सै इस संसारे दे सारे राजयां दा शासक है। कने यीशु मसीह सांझो ला प्यार करता है। सै साडे तांई मरी गया कने उनी साडे पापां दिया सजा जो खत्म करी दितया है। इसा बजा ला असां याजकां दा इक परिवार बणी गियो न, जडे उदे पिता परमेश्वरे दी सेवा करते न। इस तांई यीशु मसीह जो महिमा कने शक्ति हमेशा मिलदी रे। आमीन। (aiōn q165) 7 रुपण, सै बदलां सोगी औणे बाला है; कने हर इक जणे उसयो दिखणा, जडे लोक उदिया मौता तांई जिम्मेवार है, उना भी उसयो ओदे दिखणा। कने धरतिया दे सारे लोकं जौरे-जौरे ला रोगा जालू उना उसयो दिखणा। हाँ पेसा ही होणा! आमीन। 8 प्रभु परमेश्वर बोलदा है, “मै अलफा कने ओमेगा है, मतलब की मै ही है जिनी सारियां चीजां दी शुरुआत किती, कने मै ही है जिनी सारियां चीजां जो खत्म करणा, कने मै ही है जडा हमेशा ला था, कने जडा औणे बाला है, मै सारयां ला शक्तिशाली है।” 9 मै यूहन्ना, तुहाडा साथी मसीह भाई, मै भी तुहाडे सांई दुख सेहन किता। मै परमेश्वरे दे राज्य दा इक नागरिक है जियां की तुसां न, कने मिजो भी अपणियां पेशानिया जो तियां ही सबर सोगी सेहन करणा चाईदा जियां तुसां करदे न। मै परमेश्वरे दे बचन दा प्रचार करणे कने यीशु दे बारे च दसणे दिया बजा ला पतमुस दे टापुऐ पर केदी बनाई करी भेजी दितया था। 10 तुं अपने जो जडा परमेश्वरे दा दिन है, परमेश्वरे दी आत्मा मिजो पर आई। कने मै अपने पिच्छे ला कुसी जो बोलदे रुपणया जडा तुही सांई उच्छा कने साफ अबाजा च बोला दा था। 11 उनी मिजो बोल्या जडा कुछ तू दिखदा है, उसयो कताबा च लिखी करी उना सत्तां कलीसियां जो भेजी दे जडियां इफिसस, स्मरना, पिरगमून, थुआतीरा, सरदीस, फिलदिलफिया, कने लौदीकिया शहरां च न। 12 तालू मै ऐ दिखणे तांई पिच्छे मुडया की कुण मिजो ला गल्लां करा दा है, कने मै सोने दे सत दिव्ये दिखे; 13 कने उना दिव्यां बिच इक प्राणी दिख्या जडा माणुऐ सांई लगा दा था। उनी इक लम्बा चौला पाया था जडा उदे पैरां दीकर पुजदा था। उनी अपणिया छतिया दे चारो पासे इक सोने दा पटका पाया था। उदे सिरे दे बाल चीटिया उना सांई चिट्टे या बर्फा सांई थे। कने उदियां हखी आमी दिख्या लौई सांई चमका दियां थियां। 15 उने पर पीतलू सांई चमका दे है, जियां पीतलू जो भटिया च तपा दे होन, कने जालू उनी बोल्या तां उदी अबाज बडी जोर दी थी, जियां केई झरनया ला पाणी पोणे दी अबाज होंदी है। 16 उनी अपने सजे हथे च सत तारे लियो थे, कने उदे मुंरे ला तेज दोधारी तलवार निकलदी थी; उदा मुं उतणा ही चमका दा था जियां सूज दोपेरा बडिया धूपा च चमकदा है। 17 जालू मै उसयो दिख्या, तां झट उदे पैरां च मरयो माणुऐ सांई पेई गिया। पर उनी मिजो पर सजा हथ रखीकरी बोल्या, “डर मत; मै ही है जिनी सारियां चीजां दी शुरुआत किती, कने मै ही है जिनी सारियां चीजां जो खत्म करणा कने मै सै है जडा हमेशा जिन्दा है, 18 चाहे मै मरी गया था। पर हुण मै जिन्दा है कने हमेशा जिन्दा रेणा; मै युगां-युगां दीकर जिन्दा है, कने मेरे बाल मौत कने अधोलोक पर अधिकार है जडा मरयो लोकं दी जगा है।” (aiōn q165, Hadēs g86) 19 इस तांई तू इना सारियां गल्लां जो लिखी ले, जिना जो तू दिखदा है, कने ऐ चीजां पक्का ही बादे च होणियां न।” 20 हुण मै

तिजो दसणा की मेरे सजे हथे दे सत्तां तारयां दा क्या मतलब है जडा पेहले पता नी था। इदा मतलब ऐ है की सत तारे उना स्वर्गदत्तां जो दसदे न जडे सत कलीसियां दी रखबाली करदे न कने सत दिव्ये सत कलिसियां जो दृशां दे न।

2 उनी मिजो ऐ भी बोल्या, इफिसस शेहरे दिया कलीसिया दे अगुवे जो ऐ संदेश लिख: मै सेई है जडा अपने सज्जे हथे च सत तारे लेई रखदा है, कने सोने दे सत दिव्यां दे बिच चलदा है, मै तिजो ला ऐ बोलदा है: 2 मै जाणदा है की तू क्या करता है, कने कितणी मेहनत करता है कने कदी हार नी मंदा। मै ऐ भी जाणदा है की तू बुरे लोकं दियां झुठियां शिक्षा जो सेहन नी करता। तू उना लोकं जो जांचया परख्या जडे बोलदे न की सै प्रेरित न पर असल च सै प्रेरित नी न कने सै सारे झूठे निकले। 3 तू सबर रखीकरी दुखां जो सेहन कितया है क्योंकि तू मिजो पर भरोसा करता है, कने फिरी भी तू मेरी सेवा करणा बंद नी किती। 4 पर हुण मिजो तिजो ला ऐ शिकायत है की: हुण तू मिजो ला सियुदा प्यार नी करता जदिया प्यार तू मिजो ला तालू करता था जालू तू पैली बरी मिजो पर भरोसा किता था। 5 इस तांई याद कर की तू शुरुआत च मिजो ला कदिया प्यार करता था कने हुण तू मिजो ला सियुदा प्यार नी करता। इसा गल्ला जो मन्नी ले कने मिजो ला सियुदा ही प्यार करणा शुरु करी दे जदिया तू शुरुआत च किता था। अगर तू मन बदलगा नी, तां मै तेरे बाल ओणा कने जिथू तेरा दियाख रख्या है उसयो ओथु ला हटाई करी तिजो सजा देणी। 6 पर मै तिजो ला ला खूश भी है क्योंकि तू उना लोकं ला नफरत करता है जडे नीकोलस दियां गल्लां मंदे न, तियां ही जियां मै उना दे कम्मा ला नफरत करता है। 7 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है। सै लोक जडे बुरियां शक्तियां जो हरादे न, उना जो मै जिन्दगी देणेबाले स्खे ला फल खाणे दी इजाजत देणी जडा परमेश्वरे दे स्वर्ग दे बर्फीचे च है। 8 स्मरना शेहरे दिया कलीसिया दे अगुवे जो ऐ लिख: मै ही है जिनी सारियां चीजां जो शुरु कितया है, कने मै ही सै है जिनी सारियां चीजां दा अंत करणा; चाहे मै मरी गया था कने हुण जिन्दा है कने हमेशा जिन्दा रेणा मै तिजो ला ऐ बोलदा है; 9 मै जाणदा है की तिजो दुख तकलीफ होए कने तू गरीब है। पर तू दिले ला अमीर है। मै उना लोकं दे बारे च जाणदा है, जडे ऐ यकीन कने बोलदे न की सै परमेश्वरे दे चुणयो लोक न, मतलब यहदी लोक, पर हे नी न। सै तेरे बारे च बुरियां गल्लां बोलदे न, पर असलियत च सै शैताने दिया मंडलिया दे बंदे न। 10 उना दुखां ला मत डरा जडे तिजो मिलणे न। शैताने लोकं ला तुसां चे कुछ लोकं जो गिरफ्तार करणा कने तहांजो जेल कराई देणी ताकि सै तुहाडी परीक्षा करी सके। तुसां दस दिना दीकर बडियां मुसीबतां जो झेलणा। पर मिजो पर भरोसा करणा कदी मत छडदे चाहे तहांजो मरणा पोए, क्योंकि मै तुहाडिया जिता तांई इनाम च हमेशा दी जिन्दगी देणी। 11 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है: जडे लोक बुराई जो हराई करी जित हासिल करदे न, उना जो उसा दुज्जी मौत ला कोई नुक्सान नी होणा, जालू परमेश्वरे आखरी न्याय करणा। 12 पिरगमूने शेहरे दिया कलीसिया दे अगुवे जो ऐ लिख: मै ही है जिदे बाल तेज दोधारी तलवार है, मै तहांजो ला ऐ बोलदा है: 13 मै जाणदा है, की तेरा शेहर शैताने दे काबू च है, पर इदे बावजूद भी मिजो पर भरोसा करणा नी छडया कने मेरियां शिक्षां जो मणना नी छडया। तू उस बकत भी भरोसा करणा नी छडया जालू उना अन्तिपास जो ओथु मारी दिता। सै मेरे बचना दा प्रचार करणे च भरोसे दे काबील था, इस तांई उसयो तेरे शेहरे च मारी दिता जडा शैताने दे काबू च है। 14 पर मिजो तेरे बारे च कुछ शिकायतां न, क्योंकि तू उना गल्लां दा बिरोधे नी करता जडे झूठी शिक्षा दिन्दे न, जियां परमेश्वरे दा संदेश देणेबाले बिलामे बडे पहले दीतियां थियां। बिलामे राजा बालाक जो सिखाया की इसाएल दे लोकं जो पाप करणे तांई उकसाणे तांई क्या करणा चाईदा। उनी उना जो मूर्तियां अगे चढाईयां चीजां जो खाणे कने व्यभिचार करणे तांई सिखाया। 15 तियां ही तुहाडे बिच कुछ लोक न जडे नीकलियां दे दलां दियां शिक्षां जो मंदे न। 16 इस तांई पाप करणा छडी दिया, अगर तू ऐसे कम्म करणा बंद नी करणा तां मै जल्दी ही ओणा, कने उना लोकं दे खिलाफ उसा तलबारा ला लडना, जडी मेरे मुंरे ला निकलदी है जडा मेरा बचन है। 17 हर कुसी जो जडा मेरे संदेश जो समझणा चांदा है, उसयो उसा गल्ला जो ध्याने ला सुणना चाईदा जडा पबित्र आत्मा कलीसिया ला बोलदा है; सै लोक जडे बुराई जो

हरादे न, मैं उना जो उस मन्ने चे देणा जिसयो कुनी लुकाया है। मैं उना चे हर इक जो इक चिट्ठा पथर देणा, जिस पर इक नोआ ना लिख्या होणा। जिस माणुणे जो सै मिलगा उसयो छडी करी कोई भी उस नाए जो नी जाणी सकदा। 18 थुआतीरा शेहरे दिया कलीसिया दे अगुवे जो ऐ लिखः परमेश्वरे दे पुत्रे दिया तरफा ला ऐ संदेश है जिदियां हखी अगगी दिया लौई साईं चमका दियां थियां, कने जिदे पैर पीतलू साईं चमका दे थे, जियां पीतलू जो भटिया च तपा दे होन, सै ऐ बोला दा है: 19 मैं तुहाडे कम्मा जो जाणदा है की तुसां इक दुज्जे ला प्यार करदे न कने तुसां पक्का भरोसा करदे न। मैं जाणदा है की तुसां इक दुज्जे दी सहायता किती, कने तुहाडी सेहनशक्ति जो भी जाणदा है। मैं जाणदा है की तुसां हण पेहेले ला जदा भले कम्म करदे न जालू तुसां पेहेले मिजो पर भरोसा किता था। 20 पर मिजो तेरे बारे च कुछ शिकायतां न, राणी इजेबेल जडी बडी पेहेले रेदी थी, उसा साईं इक जनानी तुहाडे बिच है। सै अपने आप जो परमेश्वरे दा संदेश देणेवाली बोलदी है पर मेरे चेलयां जो गलत शिक्षा दिन्दी है। सै मेरे दासां जो व्यभिचार करणे कने मूर्तियाँ अगगे चढाईयां चीजा जो खाणे दी शिक्षा दिन्दी है। 21 मैं उसा जो अपने पापां ला पश्चाताप करणे दा मौका दिता है, पर सै उना बुरे कम्मा जो बंद करणे ला मना करदी है। 22 मैं उसा जो रोगी बनाई देणा। कने जडे उसा सोगी व्यभिचार करदे न, अगर सै भी उसा साईं पाप करणा नी छडणे तां मैं उना जो भी बडे दुखां च पाई देणा। 23 मैं उना लोकां जो मारी देणा है जडे उदिया शिक्षां जो मंदे न; तालू सारियां कलीसियां जो पता चली जाणा की मैं हर इक जणे दे बिचारां कने मकसदां जो परखदा। मैं तुहांजो सबना जो तुहाडे अपने कम्मा दे अनुसार इनमा देणा है। 24 पर थुआतीरा शेहरे च तुसां बाकी लोकां उसा झूठी शिक्षा जो नी मन्नया। तुसां उना गल्लां च हिस्सा नी लिया जिसयो उदे चेले शैताने दियां बडी जरूरी गल्लां बोलदे न। मैं तुहांजो बोलदा है, की मैं तुहाडे पर होर कोई जरूरी हुकम नी थोपणा, सिवाए इदे की जालू दीकर मैं नी आई जांदा तालू दीकर मिजो पर पक्का भरोसा करदे रेनयो। 26 सै लोक जडे बुराईया जो हराई दिन्दे न, कने संसारे दे अंत दिकर मेरे हुकम मंदे रेंदे न, मैं उना जो देशां पर राज्य करणे दा हक देणा। 27 मैं उना जो राज्य करणे दा सेई हक देणा जियां मेरे पिता मिजो दिता है। उना दा राज्य लोए साईं मजबूत होणा जडा टूटदा नी है, उना दे दुशमणा टुटयो भांडया साईं होणा। 28 कने मैं उसयो अपणी जीत दरणे ताईं ब्यागा दा तारा देणा। 29 हर कुसी जो जडा मेरे संदेशो जो समझणा चांदा है, उसयो इसा गल्ला जो ध्याने ला सुणना चाईंदा जडा पबित्र आत्मा कलीसिया ला बोलदा है।

3 सरदीसे शेहरे दिया कलीसिया दे अगुवे जो लिखः ऐ संदेश उदिया तरफा ला है जिनी सत तारायां जो अपने हाथां च रखया है कने जडा परमेश्वरे दियां सत आत्मा जो भेजदा है। सै ऐ बोलदा है, की मैं तेरे कम्मा जो जाणदा है: तू मिजो च भरोसे दे लायक लगदा है, पर असल च तू मेरे हुकमा जो नी मंदा। 2 इस ताईं साबधान होई जा, कने मिजो पता लग्गा है की विश्वासी होणे दे नाते जदेई जिन्दगी जिणे ताईं परमेश्वरे बोलया है सियुदी जिन्दगी तुसां नी जिया दे न। इस ताईं आत्मिक मिद्रा ला जागी जा, कने जडे मसीह गण तुहांजो च हण भी बचयो न उना जो नोए करा इसला पेहला की सै गायब होई जान। 3 इस ताईं उसा शिक्षा जो याद कर, जडी तू बडे पेहेले सुणियो थी कने भरोसा किता था, कने जडा तिजो सिखाया था उसयो मन, कने गलत कम्मा जो छडी करी पापां जो मनी ले। अगर तू ऐसे गलत कम्म करणा नी छडदा है, तां मैं चोरी छुपे ओणा, जियां राती चोर ओंदा है, कने तू उस बकत जो नी जाणी सकदा जालू मैं तिजो सजा देणे ताईं ओणा। 4 पर सरदीस च तुहाडे बिच कुछ ऐसे लोक न जिना पाप नी कितया है, जिना विश्वासी होणे दे नाते इक पबित्र जिन्दगी जि है। उना चिट्ठे कपडे पाई करी मेरे सोगी रेंगा है, क्योंकि सै भरोसे दे लायक न। 5 सै जडे जीत हासिल करदे न, उना जो भी उना साईं ही चिट्ठे कपडे पेहनाणे न। मैं उना दे ना उसा कताबा ला कदी नी हटाणे न जिसा च परमेश्वरे उना लोकां दे ना लिखयो न जिना जो हमेशा दी जिन्दगी मिलणी। मैं अपने पिता दे सामणे कने उदे स्वर्गदूतां दे सामणे ऐ घोषित करणा की सै मेरे न। 6 हर कुसी जो जडा मेरे संदेशो जो समझणा चांदा है, उसयो उसा गल्ला जो ध्याने ला सुणना चाईंदा जडा पबित्र आत्मा कलीसिया ला बोलदा है। 7 फिलदिलफिया शेहरे दिया कलीसिया दे अगुवां जो ऐ लिखः ऐ संदेश उदिया तरफा ला है जडा पबित्र कने सच्च है, सै जिदे बाल दाऊद दे राज्य दा अधिकार है। अगर सै दरबाजा खोलदा है, तां कोई भी उसयो बंद नी करी सकदा।

अगर सै उसयो बंद करी दे, तां कोई भी उसयो खोली नी सकदा। मैं तुसां जो ऐ बोलदा है की, 8 मैं तेरे कम्मा जो अच्छे ला जानदा है। मैं जाणदा है की तिजो च थोडी ही ताकत है, पर फिर भी तू मेरियां बोलियां गल्लां पर भरोसा किता कने तू इसा गल्ला ला मना नी किता की तू मिजो पर भरोसा करदा है। इस ताईं मैं तिजो ताईं इक दरबाजा खोलया है, जिसयो कोई बंद नी करी सकदा। 9 सै लोक जडे इक ऐसे झुंडे दे सदस्य न जडे शैताने ला रिशता रखदे न, कने बोलदे न की सै यहूदी न पर सै सच्चे यहूदी नी न कने सै झूठ बोलदे न। दिख मैं ऐसा करणा है, की जिसला उना आई करी तेरे पैरां च पेई जाणा, कने उना जो पता लगी जाणा है की मैं तिजो ला प्यार रखदा है। 10 तू मेरे संदेशो दा पालन किता ताकि जालू तू दुख झेले तां उसयो सबर रखीकरी सेहन करी सकन। इस बजा ला, मैं तेरी परिक्षा दे बकत तेरी रक्षा करणी। जडी इस संसारे दे सारे लोकां पर ओणी है। 11 मैं जल्दी ही ओणे वाला है; इस ताईं तिजो मिजो पर भरोसा करदे रेंणा चाईंदा ताकि कोई भी तिजो तेरी जित दा इनम लेंणा ला ना रोकी सके जडा मुकुटे साईं है। 12 सै जडे जीत हासिल करदे न, जियां इक खम्बा घरे जो मजबूत बाणादा है, तियां ही उना भी हमेशा ताईं परमेश्वरे दे मंदरे च रेंणा। मैं उदे पर मेरे परमेश्वरे दा नां लिखणा कने परमेश्वरे दे शेहर यश्शामे दा ना लिखणा। कने ऐ सेई शेहर है जडा स्वर्ग च है, मतलब की मेरे परमेश्वरे दिया तरफा ला थले ओणा। मैं उदे पर मेरा नोआ ना लिखणा। 13 हर कुसी जो जडा मेरे संदेशो जो समझणा चांदा है, उसयो उसा गल्ला जो ध्याने ला सुणना चाईंदा जडा पबित्र आत्मा कलीसिया ला बोलदा है। 14 लौदीकिया शेहरे दिया कलीसिया दे अगुवे जो ऐ लिखः ऐ संदेश उदिया तरफा ला है जडा अर्मीन है। कने भरोसा दिया काबलियता ला परमेश्वरे दे बारे च सच्च जो प्रगट करदा है, कने मैं सेई है जिदे जरिये परमेश्वरे सारियां चीजां जो बणया है। 15 मैं जाणदा है की तू क्या करदा है, तू कितणी मेहनत करदा है कने कदी हार नी मंदा। कने ना तां तू मिजो पर भरोसा करणे ला मना करा दा है कने ना ही मिजो पुरे मने ला प्यार करदा है। मैं चांदा है की या तां तू मिजो मन्ने ला मना करी दे या मिजो ला पुरे मने ला प्यार कर। 16 इस ताईं की तू मिजो पर भरोसा करणे ला मना करा दा है कने ना ही मिजो पुरे मने ला प्यार करदा है, क्योंकि तिजो मिजो पर अघा-अधुरा भरोसा है, इस ताईं मैं तिजो पूरी तरहा ला हटाणे ताईं तैयार है। 17 तू सोचदा है की तू अमीर है, कने तेरे बिल से सब है जिदी तिजो जरूरत है, पर तू नी जाणदा की इदा सच्च ऐ है की, तिजो पर तरस ओणा चाईंदा। क्योंकि सच्च ऐ है की तू गरीब है, तेरे बाल कपडे नी न, कने तू अन्ना है। 18 इस ताईं मैं तिजो सलाह दिन्दा है की तिजो मिजो ला शुद्ध सोना खरीदणा चाईंदा ताकि तू सच्चवीं दा अमीर बणी सके। तिजो मिजो ला अपने पाणे ताईं चिट्ठे कपडे भी खरीदणे चाईंदे ताकि तेरा शरीर डककरी रे कने तू शर्मिंदा ना हो। कने तिजो अपणी हखी दा लाज करणे ताईं दवा भी मिजो ला खरीदणी चाईंदी ताकि तू दिखी सके। 19 मैं जिना-जिना ला भी प्यार करदा है, उना जो मैं सिखांदा है कने सजा दिन्दा है ताकि सै खरे बणन। इस ताईं अच्छाईं करणे च लगगी रिया, कने पापी कम्म करणा बंद करी दिया। 20 मैं तुहाडे दिले च बसणे ताईं, मैं उस बंदे साईं है जडा घरे बाहर खडोतया है कने दरबाजे जो खटखटा दा है। अगर तुसां मेरिया अबाजा जो सुणदे न कने मेरे ताईं अपना दिल खोलदे न तां मैं अंदर ओणा कने असां इक दुज्जे सोगी संगती करणी। 21 सै जडे जीत हासिल करदे न, उसयो मैं अपने सोगी उदे सिंहासने पर बोणे दा हक देणा। ऐ बिलकुल मेरे साईं ही होणा, जियां मैं जित हासिल कितियो हो कने अपने पिता दे बडे आसन मिलया हो। 22 हर कुसी जो जडा मेरे संदेशो जो समझणा चांदा है, उसयो उसा गल्ला जो ध्याने ला सुणना चाईंदा जडा पबित्र आत्मा कलीसिया ला बोलदा है।

4 मैं इना सारियां गल्लां जो दिखणे बाद स्वर्गं च खुलया दरबाजा दिखया। कने कोई मिजो सोगी गल्लां करा दा था कने गल्लां करणे बाला सेईं था जिसयो मैं पेहेले भी सुणया था, जिदी अबाज तुर्ही जो बजाणे दिया अबाजा साईं थी। कने उनी मिजो बोलया, "मेरे बाल ऐथू उपर आई जा; कने मैं सै गल्लां तिजो दसणियां न, जिना दा इना गल्लां बाद पूरा होणा जरूरी है।" 2 तालू ही झट परमेश्वरे दी आत्मा मिजो पर आई; "कने मैं स्वर्गं च इक सिंहासन दिखया कने उस सिंहासने पर कुसी जो बैठया दिखया।" 3 जडा उस पर बैठया था, उदा चेहरा बेशकीमती अनमोल पथरे साईं चमकदा था जिसयो यशब कने लाल कीमती पथर बोलदे न। कने उदे सिंहासने दे चारो पासे इक इन्धनुष था, जडे सेले कीमती पथरे साईं मिल्ला दा था। 4 उस सिंहासने दे चारो पासे होर चोबी सिंहासन थे; कने इना

सिंहासना पर चौबी अगुवे चिट्ठे कपड़े पायी करी बैठयो थे, कने उना दे सिरां पर सोने दे मुकुट थे। 5 उस सिंहासने ला बिजली कने गड्ढाक्यां दी अबाज निकला दी थी कने सिंहासने दे सामणे अग्गी दे सत दिव्ये बलयो थे, कने जडियां परमेश्वरे दियां सत आत्मा थियां, 6 कने उस सिंहासने सामणे इक फर्रा था जडा समुद्रे सांई चौडा था कने शीशे सांई साफ था। कने सै सिंहासन उना सबना दे बिच था कने उदे चारो पासे चार जिन्दे प्राणी दिखे, जिना दे पुरे शरीर हखी ला डकुयो थे। 7 उना चारां जिन्दे प्राणिया चे प्राणी शेर सांई मिल्ला दा था, कने दुज्जा प्राणी बछडे सांई था, तिजे प्राणिये दा मुं माणुए सांई था, कने चौथे दा उडदे बाजे सांई था। 8 कने उना चारां जिन्दे प्राणियां दे छे-छे फंग थे, कने उना दे शरीर पर हखी थियां, ऐथु दीकर की उना दे फंगा हेठ भी; कने सै रात-दिन बिना अराम कितयो ऐ बोल्दे रेंदे थे, “पबित्र, पबित्र, पबित्र प्रभु परमेश्वर, सारायां ला शक्तिशाली, जडा बकत दिया श्रुआला ला लेईकरी हुणे दीकर कने हमेशा तांई नी बदलदा कने जडा औणे बाला है।” 9 जडा सिंहासने पर बैठया है, कने सै सेई है जडा हमेशा-हमेशा दीकर जिन्दा रेंदा है, जालू भी सै जिन्दा प्राणी उसयो आदर कने धन्यावाद दिन्दे न। तां सै चौबी अगुवे जडे सिंहासने पर बैठयो न, उदे सामणे झुकी जांदे न कने उदी अराधना करदे न। सै ऐ बोली करी सिंहासने दे सामणे अपने-अपणे मुकुटां जो रखी दिन्दे थे। (aiōn g165) 11 ऐ साडे प्रभु परमेश्वर, तू सारियां चीजां जो बणया है, तेरिया इच्छा अनुसार सै बणाईयां न। इसा बजा ला तुसां महिमा कने आदर कने शक्ति देणे दे काबिल है।

5 जडा सिंहासने पर बैठया था, मै उदे सजे हथे च इक कताब दिखी, कने सै कताब दोनो पासयां ला लिखियो थी, कने सै सत मुहरां लाई के बंद कितियो थी। 2 फिरी मै इक शक्तिशाली स्वर्गदूते जो दिखया कने सै जोरे-जोरे ला ऐ प्रचार करा दा था की, “इसा कताबा जो खोलने दे कने इसा दियां मोहरां जो तोडने दे काबील कुण है?” 3 पर ना तां स्वर्ग च, ना ही धरती पर, ना ही धरतिया दे थले चे कोई इसा कताबा जो खोलने कने उसा जो पढने दे काबिल निकलया। 4 तालू मै बडे जोरे-जोरे ला रोया, कयोकि उसा कताबा जो खोलणे बाला कने नां ही कोई पढने दे काबिल है। 5 इसा गल्ला पर उना अगुवां चे इकी मिजो ला बोलया, “मत रो; दिख, सै जिसयो यहदा दे गोत्रे दा शेर बोल्दे न, कने जडा राजा दाऊदे दा बंशज है, उनी उसा कताबा जो खोलना कने सै उसा दियां मोहरां जो तोडी सकदा है, उनी शैताने जो हराई दिता।” 6 तालू मै उस सिंहासने कने चारों जिन्दे प्राणियां कने उना चौबी अगुवां दे बिच इक छेलुये जो खडोतयो दिखया था। कने उस छेलुये दे शरीर पर ऐसे निशाण थे की उसयो मारी दितया था। उदे सत सिंग कने सत हखी थियां; ऐ परमेश्वर दियां सत आत्मा न, जडियां सारिया धरतिया पर भेजियां न। 7 उनी छेलुए आईके उदे सजे हथे ला कताब लेई ली, जडा सिंहासने पर बैठया था। 8 जालू उनी कताब लेई ली, तां सै चारों जिन्दे प्राणी कने चौबी अगुवे उसा छेलुये अगो पेई गे; कने हर इकी अगुवे हथे च वीणा कने धूपे ने भरुया सोने दा कटोरा लिया था, उस धुपे दी खुशबू उना लोकां दी प्राथना दा निशाण है जडे परमेश्वरे दे सेवक न। 9 कने सै ऐ नोआ गीत गाणा लगे, तू इसा कताबा जो खोलणे कने इदिया मोहरां जो खोलणे दे काबील है; कयोकि उना तेरी बलि दिती कने तू अपने खुने ला हर इक कुले, भाषा, लोकां, कने जातियां चे परमेश्वरे तांई लोकां जो खरीदी लिया। 10 कने तू उना जो ऐसे लोक बणाई दितया है जिना पर साडा परमेश्वर राज करदा है कने याजक बणया जडे उदी सेवा करदे न, कने उना धरतिया पर राज करणा। 11 जालू मै फिरी दिखया, तां मै अचानक उस सिंहासने कने उना जिन्दे प्राणियां कने चौबी अगुवां दे चारो पासे ला स्वर्गदूतां दियां अबाजा सुणियां, जिना दी गिणती नी करी सकदे थे। 12 कने सै जोरे ला गांटे दे थे, “धन्य है, सै छेलू जिसयो मारी दितया था, सै महिमा दे काबिल है। उदा अधिकार महान है। उदा ज्ञान गेहरा है। सै बडा शक्तिशाली है कने बडा अमीर है। ओआ असां उदा आदर करन। ओआ असां उदी स्तुति करन।” 13 फिरी मै स्वर्ग च, कने धरतिया पर, कने धरतिया दे थले, कने समुन्द्रे दियां बणाईयां सारियां चीजा जो, कने सै सब केसी जो जडा उना चे है, उना जो ऐ बोल्दे सुणया, “की ओआ असां उदी स्तुति करन जडा सिंहासने पर बैठया है। ओआ असां हमेशा तांई छेलुये दी महिमा करन कने उसयो आदर देन कयोकि सै सारायां ला जडा शक्तिशाली है।” (aiōn g165) 14 कने चारों जिन्दे प्राणियां, च अमीन” बोलया, कने सै अगुवे झुकी करी करी उदी अराधना करणा लगे।

6 फिरी मै दिखया की छेलुये उना सतां मुहरां चे इकी जो खोलया; कने मै चारों जिन्दे प्राणियां चे इकी जो पुकारदे सुणया। उदी अबाज गड्ढाक्यां सांई तेज थी। उनी बोलया, “हुण जा, अगो बदा।” 2 तालू ही मिजो इक चिट्ठा घोडा मिल्ला, कने उदे पर सवार होयो माणुए धनुष लिया था; कने उसयो इक मुकुट भी दितया था, कने सै इक विजेता सांई जित हासिल करणा निकलया कने दुबारा ला उनी ही जितणा। 3 जालू छेलुये दुज्जी मोहर खोली, तां मै दुज्जे जिन्दे प्राणिए जो ऐ बोल्दे होए सुणया, “हुण जा, अगो बदा।” 4 फिरी इक चमकदार लाल घोडा उसा जगा ला बार आया जिथू सिंहासन रख्या है। परमेश्वरे उस पर बैठयो जो धरती दे लोकां जो अपु चे लडाणे दी शक्ति दिती, ताकि सै लडाईया दे बकत इक दुज्जे जो मारी देन। इस कम्मे तांई परमेश्वरे इस सारे जो इक बही तलवार भी दितियो थी। 5 जालू छेलुये तिज्जी मोहर खोली, तां तिजे जिन्दे प्राणिए जो ऐ बोल्दे होए सुणया, “हुण जा, अगो बदा।” कने तालू मै दिखया की इक काला घोडा बाहर आया है कने उस पर सवार बदे दे हथे च इक तरकडी थी। 6 कने मै सुणया की उना चारों जिन्दे प्राणिया चे कोई बोला दा था, ऐ माणुए सांई अबाज थी की, “ओणे बाले दिना च धरतिया पर अकाल पोणा। इस तांई इक किलो कणक कने तिन किलो जौ दी कीमत पुरे इक दिने दिया ध्याडिया बराबर होणी। पर तेले कने अंगरा दे रसां दी कीमत नी बदलणी।” 7 जालू छेलुये चौथी मोहर खोली तां मै चौथे जिन्दे प्राणिए जो ऐ बोल्दे सुणया, “हुण जा, अगो बदा।” 8 तालू मै फीका पिया हरे रंगे दा घोडा दिखया, कने उस पर सवार बदे दा नां मौत था; कने अलोकोक उदे पिच्छे-पिच्छे ओआ दा था। कने उसयो धरतिया पर रेणेबाले इक चौथाई लोकां जो मारणे दा हक है। उनी उना जो भूखा ला, उना जो बुरियां-बुरियां बिमारियां जो, कने उना जंगली जानवरां ला मारी दिता। (Hadēs g86) 9 जालू छेलुये पंजमी मोहर खोली, तां मै वेदिया दे थल्ले उना लोकां दिया आत्मा थियां जिना जो मारी दितया था कयोकि उना परमेश्वरे दे बचना दा प्रचार कितया था कने प्रभु यीशु पर भरसा करणे ला पिच्छे नी हटे की यीशु उना दा प्रभु है। 10 कने उना जोरे ला पुकारी करी परमेश्वरे ला बोलया, “हे पबित्र कने सच्चे परमेश्वर; तू धरतिया पर रेणेबाले उना बुरे लोकां जो सजा देणे च इतणा लम्बा इतजार कजो करदा है?” असां बिनती करदे न की तू उना लोकां दे व्यवहारे जो बदला ले जिना सांझो मारी दितया था। 11 कने उना चे हर इकी जो चिट्ठे कपडे दितयो। कने परमेश्वरे उना जो बोलया, “हुणे तांई अराम करा, कयोकि हल्ले भी कुछ सोगी कम्म करणे बाले कने तुहाडे साथी मसीह भाई न, जिना जो तुहाडे सांई मारी देणा है। जालू दीकर तुहाडे मसीह साथियां दे मरणे दी संख्या पूरी होई जांगी, तालू ही मै बदला लेणा।” 12 जालू मै उसयो छेमी मोहर खोलदे दिखया, तां मै दिखया की इक बडा बडा हिरण होया, कने सूरज दा रंग काले कम्बले सांई काला होई गिया कने पुरे चन्द्रमे दा रंग खुने सांई लाल होई गिया। 13 कने अम्बरे दे तारे धरतिया पर इयां पेई गे जियां तुफाने ला रखे ला कच्चे फल पेई जांते न। 14 अम्बर उस कागजे सांई गायब होई गिया जिसयो लोपटी दितया हो कने सारे पाड कने समुद्रे चे सारे टापूआं अपनी जगा बदली दिती। 15 इदा नतीजा ऐ होया की, तालू धरतिया दे राजे, कने प्रधान, कने सरदार, कने अमीर कने सामर्थी लोक, कने हर इक सेवक, कने जडे गुलाम नी न, सारे पाडां दियां गुफां च कने पथरां थल्ले जाई लुकयो न; 16 कने पाडां कने पथरां ला बोलणा लगे, “साडे पर पेई जा; कने सांझो उसला बचाई लिया जडा सिंहासने पर बैठया है कने छेलुए दिया सजा ला बचाई लिया।” 17 कयोकि सै भयानक दिन आई गिया है जालू परमेश्वरे कने छेलुये सारायां जो सजा देणी कने कोई भी इसा सजा ला नी बची सकदा।

7 इदे बाद मै धरतिया दे चारों कुणा च चार स्वर्गदूतां जो खडोतया दिखया। कने उना स्वर्गदूतां जो परमेश्वरे हक दितया है की सै संसारे दे लोकां जो दुख परेशानिया च पाई करी उना दा नुक्सान करन, चाहे सै धरती च होन या समुंदर च। उना संसारे दे चारो कुणयां ला होआ जो रोकी दिता, ताकि समुद्रे च धरती च या बणे च होआ ना चले। मै इक होर स्वर्गदूते जो पूर्व दिशा पास्से ला प्राट होदे दिखया, उदे बाल जिंदे परमेश्वरे दी मोहर थी। उनी स्वर्गदूते उच्चिया अबाजा ला उना चार स्वर्गदूतां जो पुकारी करी बोलया; 3 “जालू दीकर असां अपने परमेश्वरे दे सेबकां दे मथयां च मोहर नी लांगे, तालू दीकर धरती कने समुन्द्रे कने रखां दा नाश मत करदे, ताकि सै उना दुख परेशानिया च नी पोना।” 4 जालू स्वर्गदूतां मोहर लांणे दा कम्म पूरा करी लिया। तां कुनी मिजो दसया की सै लोक

जिना दे मथे पर स्वर्गदूतां परमेश्वरे दी मोहरा दा निशाण लाया है, उना दी गिणती 1,44000 थी। ऐ लोक इस्पाएल दे बारां गोत्रां चे थे: 5 स्वर्गदूतां यहदा दे गोत्रां चे बारह हजार पर परमेश्वरे दी मोहर लाई, स्वने दे गोत्रे चे बारा हजार पर, गाद दे गोत्रे च भी बारा हजार, 6 आशेर दे गोत्रे चे भी बारा हजार, नमाली दे गोत्रे चे भी बारा हजार; मनशे दे गोत्रे चे भी बारा हजार, 7 शमौने दे गोत्रे चे बारा हजार पर, लेवी दे गोत्रे चे बारा हजार पर, इस्साकार दे गोत्रे च बारा हजार, 8 जबूलने दे गोत्रे च बारा हजार, युसुफे दे गोत्रे चे बारा हजार, कने बिन्ध्यामीन दे गोत्रे चे बारा हजार पर मोहर दिती है। 9 इदे बाद मैं दिखया की लोकां दी इक इतणी बडी भीड थी की कोई भी उना सारायां जो गिणी नी सकदा था। सै संसारे दिया हर इक जाति, कने कुल, भाषा चे थी। सै सारे सिंहासने कने छेल्ये सामणे खडोतयो थे। उना चिद्रे कपडे पायो थे कने उना सारायां हथे च खजूरी दियां डालियौं पकडियां थियां कने जडा इक त्योहारे दा प्रतीक है; 10 कने जौरे ला पुकारी करी बोला दे थे, “साडे परमेश्वरे दी स्तुति हो, जडा सिंहासने पर बैठया है, कने छेल्ये दी जै-जै कार करा! सिर्फ तू ही है जडा उद्धार करता है।” 11 कने सारे स्वर्गदूत, उस सिंहासने दे चारो पासे कने अगुवां दे कने चारों जिन्दे प्राणियां दे चारों पासे खडोतयो थे। फिरी सै सिंहासने दे अगणे दण्डवत होई गे कने उना परमेश्वरे दी अरुधना किती। 12 “आमीन, असां हमेशा तेरी महिमा करते न, तिजो धन्यवाद कने इज्जत दिन्दे न! असां मंदे न कने तू ज्ञानवान, कने शक्तिशाली है, जडा हमेशा तां सारे कम्मा जो करणे दे काबिल है! परमेश्वरे दा धन्यावाद कने महिमा करते न।” (aiōn g165)

13 उना चे इकी अगुवे मिंजो ला पुच्छया, “ऐ जिना चिद्रे कपडे पायो थे सै कुण है? कने कुथु ला आयो न?” 14 मैं उसयो बोल्या, “हे मातिके, मैं नी जाणदा पर तू जाणदा है।” उनी मिंजो बोल्या, “ऐ सै लोक न जिना बडा दुख झेलया है। उना अपने कपडयां जो छेल्ये दे खने ला धोई लिया है कने हण सै चिद्रे होई गियो न, इदा मतलब ऐ है की उना दे पाप मिटाई दितयो न।” 15 इसा ही बजा ला सै परमेश्वरे दे सामणे खडोतयो न, कने हर बकत दिन रात परमेश्वरे दे धरे च उडी सेवा करते न। कने सै जडा सिंहासने पर बैठया है, उनी उना बिच रेंगा कने उना दी रक्षा करणी। 16 “उना फिरी भूखे कने प्यासे नी होणा; कने ना ही सूरजे उना जो धुप ला जलणा कने ना ही गर्मियां ला उना जो जलन होणी। 17 क्यौंकि छेलू जडा सिंहासने बिच है, उनी उना दी देखभाल करणी, तियां ही जियां इक पुआल अपणियां भेडां दी देखभाल करता है कने उनी उना जो ताजा पाणिए बाल लेई जाणा जडा लोकां जो जिन्दगी दिन्दा है कने परमेश्वरे उना दिया हखी ला सारे आंसू पूंजी देणे।”

8 जालू छेल्ये सतमी मोहर खोली, तां सै सारे जडे स्वर्ग च थे अथे घटे तां शान्त होई गे। 2 तालू मैं उना सतां स्वर्गदूतां जो दिखया जडे परमेश्वरे दे सामणे खडोतयो रेंदे न, कने उना जो सत तुरहियां दितियां। 3 फिरी ओथु ला, इक होर स्वर्गदूत सोने दा इक धूपदान लेई करी आया कने वेदिया बखे खडोई गया। कने उसयो सारायां लोकां दियां प्राथना समेत बालने तांई बडा भरी धूप दिता। उनी धूप कने प्राथना जो उस सोने दिया वेदिया उपर बाली दिता, जडी परमेश्वरे दे सिंहासने दे सामणे है। 4 जालू उनी ऐसा किता, तां धूपे दा धुंआं पबित्र लोकां दियां प्राथना समेत स्वर्गदूते दे हथे ला उठी करी परमेश्वरे दे सामणे गया। 5 तालू स्वर्गदूते धूपदाने जो वेदिया दिया अग्गी चे अंगार भरी दिते, कने धरतिया पर फेंकी दिते, कने फिरी गडाके, बिजली, कने अबाजां, कने हिरण होणा लग्यो। 6 कने सै सतां स्वर्गदूत जिना बाल सत तुरहियां थियां उना जो बजाणे तांई तैयार होऐ। 7 पहले स्वर्गदूते तुरही बजाई कने खने ला मिलयो ओले कने अगग पैदा होई, कने धरतिया पर पेई गे। इसा बजा ला धरतिया दा इक तिहाई हिस्सा फकोई गया, कने स्वां दी इक तिहाई भी फकोई गे, कने सारा सेला घा भी फकोई गया। 8 दुजजे स्वर्गदूते तुरही बजाई, तां इक अगग लगयो बडे बडे पाडे सांई कोई चीज समुंदरे च पेई गई, कने इसा बजा ला समुंदर भी इक तिहाई हिस्सा खने सांई होई गया, 9 कने समुंदरे च रेणेबाले इक तिहाई प्राणी मरी गे। इसला समुंद्रे दे इक तिहाई जाज खत्म होई गे। 10 तीजे स्वर्गदूते तुरही बजाई, कने इक बडा बडा तारा मशाला सांई बलया होया स्वर्ग ला टूटया, कने नदियां दे इक तिहाई हिस्से पर, कने ताजा पाणिए दे तलाबां पर जाई पिया। 11 उस तारे दा नां कौडा है। इदिया बजा ला सै सारा इक तिहाई पाणी कोडा कने जरिला होई गया, कने उस पाणिए जो पीणे बालयां दी मौत होई गई। 12 चौथे स्वर्गदूते तुरही बजाई, तां सूरजे दा इक तिहाई, चन्द्रमे दा इक तिहाई कने तारयां दे इक तिहाई पर कोई चीज टकराई, इसा बजा ला दिने दे

इक तिहाई बकते दीकर सूरज नी चमकया कने चन्द्रमा कने तारे राती दे इक तिहाई बकते दीकर नी चमके। 13 जालू मैं फिरी दिखया, तां अम्बरे च इक बाजे जो बडे उच्चा उडदे दिखया कने जौरे ला ऐ बोलेदे सुण्या की, “जालू आखरी तिन्ना स्वर्गदूतां उना तुरही जो बजाणा जडियां उना जो दितियां न, तालू संसारे पर ओणे बालियां मुसीबतां बडियां भयानक न। धरतिया पर रेणे बालयां पर, हाय, हाय, हाय!”

9 जालू पंजमे स्वर्गदूते तुरही बजाई, तां मैं स्वर्ग ला धरतिया पर इक तारा पोदा दिखया, कने उसयो अथाह कुंडे दी चाबी दितियो थी। (Abyssos g12)

2 उनी अथाह कुंडे जो खोलया, कने कुंडे ला बडी बडिया भटिया सांई धुंआ निकलया, कने कुंडे दे धुऐ ला सूरज कने बाताबरन काला होई गया। (Abyssos g12)

3 उस धुऐ चे धरतिया पर टिडियां निकलियां, कने उना जो बिछुआं सांई लोकां जो डंआं मारणे दी शक्तियां दितियां थियां। 4 जियां कुसी जो बिछुऐ दे डंग मारणे ला पीड होई है, तियां ही इना टिडियां जो पंज मिने दीकर उना दा नुकसान करणे दा हुकम दितया है जिना दे मथे पर परमेश्वर दिया मोहरा दा निशाण नी था। पर उना जो ना तां धरती दे घा जो, ना कुसी बटे जो कने ना कुसी खे दा नुकसान करणा था। 6 उना पंज मिनयां च लोकां मरणे दे तरीके तोपणे न, पर उना मरी नी सकणा है। उना जो मरणे दी इच्छा होण, पर उना मरी नी होणा। 7 ऐ टिडियां दिखणे च लडाईयां तांई तैयार घोडयां सांई लगदियां थियां, कने उना अपने सिरां पर सोने दे मुकुट सांई कुछ पाया था। कने उना दे मुह माणुआं सांई थे। 8 कने उना दे बाल जनानिया दे बालां सांई लम्बे थे। कने उना दे दंद शेर दे दंदा सांई पक्के थे। 9 उना अपणिया छातिया पर लोहे दा कवच पाया था। जालू सै उडदे थे, तां सै सियुदी अबाज करते थे, जियां मते घोडे लडाईयां च जाणे बाले रथां जो खिचदे बेले करते न। 10 उना दियां बिछुआं सांई पंछा कने डंग थे। कने उना दिया पंछा च डंक थे, कने उना जो पंज मिने दीकर माणुऐ जो दुख देणे दी शक्ति मिलियो थी। 11 इक राजा है जडा उना जो काबू करता है। सै सेई शैताने दा दूत है जिनी अथाह कुंडे जो खोलया था, उदा ना इज्जनी भाषा च अबदेन है, कने यूनानी भाषा च अपुल्लयोन है, जिदा मतलब है की सै जडा नाश करता है। (Abyssos g12)

12 पंज मिने बाद सै मुसीबत खत्म होई जाणी। पर इदे बाद भी होर दो मुसीबतां ओणे बालियां न। 13 इदे बाद जालू छेमे स्वर्गदूते अपनी तुरही बजाई। जालू उनी उसयो बजाया तां मैं परमेश्वरे दे सामणे धूप बोलने बालिया वेदिया दे चोरो कुणा ला इक अबाज सुणई, 14 उना अबाजां छेमे स्वर्गदूते ला बोलया, “उना चार शैताने दे दूतां जो खोली दे जडे फराता नाऐ दिया खडा दे बखे बनयो न।” 15 इस तांई तालू सै चारों शैताने दे दूत खोली दिते। सै पहले ला ही तैयार थे कने उना जो बोलया था की इस मिने, इस दिन, इस साल तांई इंतजार करा कने हण ऐ बकत आई गया था। उना जो संसारे दे इक हिस्सा लोकां जो मारणा था। 16 ओथु घोडे पर सवार सेनिका दी फौज गिठी होई, जिना दी गिणती मैं 20 करोड सुणी। 17 सै घोडे कने उना दे सवार जिना जो मैं दर्शन च दिखया, सै उना दे रक्षा करणे बाले कवच अग्गी सांई लाल, गाडी नीली कने गंधक सांई पिली थी। घोडयां दे सिर शेर दे सिरा सांई लागदे थे, उदे मूऐ ला अगग, धुंआ कने गंधक निकला दे थे। 18 इना उना मुसीबतां ला, जडियां घोडयां दे मुआं ला निकलने बाली अगग, धुंआ, कने गन्धक थी, इना ला इक तिहाई लोक मारी दिते। 19 पर उना घोडयां बाल लोकां जो मारणे तांई दो लग चीजां थियां, पेली तां सै उना दे मूऐ ला निकलदी थी, दुज्जी उना दिया पछां च थी। क्यौंकि उना दियां पंछा सप्यां सांई थियां, कने उना चे लोकां जो कटणे तांई सिर थे। 20 पर बाकी लोक जडे उना मुसीबतां ला पहले नी मरयो थे, उना हल्ले भी अपने बुरे किस्म करणा नी छडे। उना हत्या करणा, दूणा-टोटाका, नाजायज रिशते, चोरी करणा नी छडया। उना बुरियां आत्मा कने अपने हथां ला बणियां चीजां दियां पूजा करणा भी नी छडया, जियां की सोने या चांदी या पितल या पत्थर या लकडिया ला बणियां मृतियां, जडियां ना तां दिखी सकदियां, कने ना सुणदियां, कने ना ही चलदियां न।

10 फिरी मैं इक होर शक्तिशाली स्वर्गदूते जो स्वर्ग ला उतरदे दिखया कने इक बदल उदे चारो पासे था। कने इक इन्द्रधनुष उदे सिर चारो पासे था, कने उदा मुं सूरजे सांई चमकदा था कने उदियां जंगा अग्गी दे बलदे रम्बयां सांई थियां। 2 उदा सज्जा पैर समुंद्रे पर रख्या, कने उदा खबा पैर जमिना पर रख्या। उदे हथे च इक छोटा दिया कागज था। 3 उनी स्वर्गदूते जौरे ला पुकारया कने

उदी अबाज शेर दे गर्जणे साईं थी। जालू सै चीखया, तां सत तेज अबाजां उसयो जबाब दिता, जडी गडाकया दिया अबाजा साईं थिया। 4 जालू सतों गर्जणे दियां अबाजां बंद होई गियां, तां मै जडा सणया उसयो लिखणा लग्गा, पर मै स्वर्गें ला ऐ अबाज सुणी, “जडियां सत गल्लां तू गर्जणे ने सुणियां न, उना जो छुपाई रख कने लिख मत।” 5 जिस स्वर्गदूते जो मै दिखया था, सै समुंदरे कने धरतिया पर खडोतयो था, उनी अपना सज्जा हथ कसम खणे तांई स्वर्गें पासे चुकया। 6 कने जडा हमेशा-हमेशा दीकर जिन्दा रेंदा है, जिनी स्वर्गें, धरती कने समुंद्रे कने उना च रेणे बालियां सारियां चीजां जो बणया है, उदे नाए दी कसम खाई करी उनी बोलया की, “हुण कुसी भी गल्ला तांई होर जादा इंतजार नी करणा पोणा। हुण सै सारियां पुरियां होई जाणियां।” (aiōn g165) 7 सतमें स्वर्गदूते जो तुरही बजाणे दे दिनां च, जालू उनी तुरही बजाणी है, तालू उनी जल्दी कम्म करणा है, उनी अपणिया गुप्त योजना जो पूरा करणा, जियां की उनी अपने सेबक परमेस्वर दे संदेश देणेबालयां जो इदा शुभसमाचार दितया था। 8 तालू मै फिरी सै अबाज सुणी जिनी स्वर्गें च मिंजो ला गल्ल किती थी। अबाजा मिंजो ला बोलया, “जा, उसा छोटिया दिया कताबा जो लेई ले जडी स्वर्गदूते दे हथे खुलियो है जडा स्वर्गदूत समुंदर कने धरतिया पर खडोतया है।” 9 मै स्वर्गदूते बाल जाई करी बोलया, “ऐ छोटी देई कताब देई दे।” कने उनी मिंजो ला बोलया, “ले इसयो खाई ले; इसा दा स्वाद तां मखिरे साईं मीठा है,” पर बादे च इदिया बजा ला तरे पेटे च तकलीफ होणी। इस तांई मै सै कताब लेई लि जडी स्वर्गदूते पकडियो थी कने खाई लेई कने सच्ची इदा स्वाद शेतेदा साईं मीठा था, पर जालू मै इसयो निगली लिया, तां मेरा पेट दुखणा लग्गा। 11 तालू मिंजो ला ऐ बोलया, “लग-लग झुंडा कने देशां कने लग-लग भाषा बोलणे बालयां लोकां जो कने राजयां जो इक बरी फिरी ला दस्स, जडा परमेस्वर तिजो बोलणे तांई बोलदा है।”

11 फिरी मिंजो नापणे तांई इक सोटी दिती कने परमेस्वर मिंजो बोलया, “उठ, जा कने मेरे मंदरे कने वेदिया दा नाप ले, कने उना लोकां दी गिणती कर जडे ओथु मेरी अराधना करा दे न।” 2 पर मंदरे दे बाहरे दे अंगणे जो मत नाप; उसयो रेंपी दे क्योकि सै लोक जडे परमेस्वर जो नी जाणदे उना जो दितया है, कने उना पबित्र शहर यरूशलेम जो बयाली मिनयां दीकर बरबाद करदे रेंणा है। 3 “कने मै अपने दो गबाहां जो ऐ हक देणा की सै टाट ओडी करी इक हजार दो सो सठ दिनां दीकर भविष्यवाणी करणा।” 4 ऐ सेई दो जैतून सख कने दो दिव्ये न जडे धरतिया दे प्रभुऐ दे सामणे खडोतया न। 5 कने अगर कोई उना दा कोई नुकसान करणा चांदा है, तां उदे मुंऐ ला अग्न निकलदी है कने उना दे दुश्मणा जो भस्म करणा दीदी है, कने अगर कोई उना जो नुकसान करणा चांगा, तां सै पक्का इसी तरीके ला मारी देणा। 6 उना जो हक है की अम्बरे जो बंद करन, ताकि उना दी भविष्यवाणियां दे दिनां च कोई बरखा ना हो; कने उना जो सारे पाणिऐ पर हक है, की उसयो खून बणान, कने जालू-जालू सै चांगे तालू-तालू सै धरतिया पर मुसीबतां जो लेई ओन। 7 जालू उना दो गबां परमेस्वर दे संदेशे दा प्रचार करी बौणा है, तालू सै जंगली जानवर जडा अथाह कुंडे ला निकलना है, उनी दो लोकां सोगी लडणा, कने उना जो हराई देणा कने मारी देणा। (Abyssos g12) 8 कने उना दियां लाशां बडे शेर यरूशलेमे दियां सडकां पर रेंणियां न, जिथु उना दा प्रभु भी सुलीं पर चढाया था। इस शेरहे जो निशाण दे स्पे च सदोम कने मिस्र देश बोलदे न। क्योकि इस शेरहे दे लोके सदोम कने मिस्र देशे दे रेणे बालयां लोकां साईं बडे बुरे थे। 9 कने सारे लोक, कने कुल, कने भाषा, कने जातियां सारे लोकां उना जो साडे तिन दिनां दीकर दिखदे रेंणा है, पर उना कुसी दियां भी लाशां जो दफनणा नी देणा है। 10 कने इस संसारे दे लोकां दा दे मरणे पर खुश होणा कने मगन होणा कने इक दुच्चे जो तोफे भेजणे न, क्योकि इना दोनो परमेस्वर दे संदेशे देणेबालयां संसारे दे लोकां जो दुखी कितया था। 11 पर साडे तिन दिनां दे बाद परमेस्वर उना च अपना सा पाया कने सै जिन्दे होई गे, कने सै खडोई गे, कने जिना लोकां उना जो दुबारा ला जिन्दे दिखया, सै डरी गे। 12 इदे बाद उना दो लोकां स्वर्गें ला इक बंदे जो बोलदे सणया, जिनी उना जो जौरे ला पुकारया कने बोलया, “ऐथु उपर ओआ।” जालू दुश्मण दिखा दे थे, तालू सै इक बदले ला डकुई करी स्वर्गें जो चली गे। 13 फिरी तालू ही यरूशलेम शेरहे च इक बडा बडा हिलण होया, कने शेरहे दियां इमारतां दा दसमां हिस्सा पेई गिया, कने उस हिलणे ला सत जाण लोक मरी गे कने जडे लोक बची गियो थे, सै डरे ला रौणा लग्गे कने उस परमेस्वर दी महिमा करणा

लग्गे जडा स्वर्गें च है। 14 ऐ दुज्जिया मुसीबता दा खाल्मा था; पर हल्ले इक होर है जडी तोल्ली ओणे बाली है। 15 जालू सतमे स्वर्गदूते तुरही बजाई, तां मै स्वर्गें ला तेज अबाजां जो पुकारदे सणया: “संसारे च हुण होर कोई नी है जडा राज करे, सिर्फ साडा परमेस्वर कने उदा चुणया मसीहे राज करणा कने उनी हमेशा तांई राज करणा।” (aiōn g165) 16 कने चौबियां अगुवां जडे परमेस्वर सामणे अपने-अपणे सिंहासने पर बैठयो थे, उना परमेस्वर अगे टपडवत करिरी, 17 ऐ बोलणा लग्गे, “हे सारयां ला शक्तिशाली प्रभु परमेस्वर, कने तू सेई परमेस्वर है, जडा बकत दी शुरुआत ला लेईकरी हुणे दीकर कने हमेशा तांई नी बदलदा, असां सच्ची तेरा धन्यावाद करदे न, क्योकि तू हुण अपणी महान सामर्थ्य दस्सी कने हुण तू धरती पर अपना राज्य शुरु करी दिता है। 18 कने जीना देशां दे लोक तिजो पर भरोसा नी करदे सै बडे गुस्सा न, कने बकत आई गिया है की तू अपना गुस्सा दस्से कने उना सारयां दा न्याय करणे दा बकत आई गिया है जडे मरी गियो न। कने हुण सै बकत भी है जालू तू उना परमेस्वर दा संदेशे देणेबालयां जो इनाम देणा जडे तेरी सेवा करदे न कने उना सारे लोकां जो जडे तेरी इज्जत करदे न, हालांकि तू उना दा नाश करी देणा है जिना धरती दा नाश कितया है।” 19 कने परमेस्वर दा जडा मंदर स्वर्गें च है, सै खोली दिता, कने उदे मंदरे च उदी बाचा दा सूदूक मिल्ला, कने बिजली लग्गी, गडाके होए, हिलण होए, कने बड़े-बड़े ओले पे।

12 जालू सै मुकी गिया, तां ओथु इक अनोखा निशाण था, जिसयो अम्बरे च दिखी सकदे थे। क्योकि चन्द्रमे पर इक खडोतियो जनानी प्रगत होई जिना ऐसे कपडे पायो थे जडे सूरजे साईं चमकदे थे। कने उसा दे सिरे पर मुकुट लाया था, जिदे उपर बारा तारे थे। 2 सै जनानी गर्भवती थी, उसा दा बच्चा पैदा करणे दा बकत आई गिया। कने सै बच्चा जमणे दिया पीडा ला रोआ दी थी। 3 इक होर निशाण अम्बरे च मिल्ला, इक बडा बडा लाल अजगर था, जडा शैतान है। उदे सत सिर थे कने दस सिंग थे, कने उदे सतों सिरा पर सत मुकुट थे। 4 कने उदिया पृंछा अम्बरे दे इक तिहाई तारयां जो खिची करी धरतिया पर सुटी दिता, सै अजगर उसा जाननिया दे सामणे जाई खडोता, ताकि जालू सै बच्चा जम्मे तां उसा दे बच्चे जो खाई जा। 5 तालू उना जाननिया जागते जो पैदा कित, पर उसयो अजगर नी खाई सकया क्योकि उसयो झट खोई लिया कने परमेस्वर दे सिंहांसने सामणे लेई ओदा। उनी जागते इक लोहे दे डंडे सोगी सारे देशां दे लोकां पर राज करणा। 6 कने सै जनानी उसा सुनसान जगा जो नटी गेई, जडा परमेस्वर उस तांई तैयार कितया था ताकि सै ओथु इक हजार दो सो सठ दिनां दीकर पलीं सके। 7 फिरी स्वर्गें च लडाई होई, तां परमेस्वर दे मुख्य स्वर्गदूतां चे इकी जिदा न मीकाईल है, उनी अपने अधीन स्वर्गदूतां सोगी अजगरे पर हमला कित। कने अजगर कने शैताने दे दूतां मीकाईल दे खिलाफ लडाई लडी। 8 अजगर लडाई हरी गिया, कने उसयो कने उदे दूतां जो स्वर्गें ला कडी दिता। 9 इस तांई उसयो कने उदे दूतां जो धरतिया पर फेंकी दिता। ऐ बड्ठा अजगर सेई है जडा बडे पेहले सपे दे स्पे च मिल्ला था, जिसयो शैतान या दोष लाणे बाला बोलदे न। ऐ सेई है जडा इस संसारे दे लोकां जो धोखा दिन्दा आया है। 10 फिरी मै स्वर्गें ला ऐ जौरे ला अबाज सुणी, हुण साडे परमेस्वर अपने लोकां जो बचाणा! हुण उनी अपणिया शक्तिया दा इस्तेमाल करणा कने राजे दे स्पे च राज करणा! हुण उदे मसीहे संसार पर अपने अधिकारे दा दाबा करणा! हुण शैताने साडे परमेस्वर दिया हजुरी च खडोई करी साडे साथी सेबकां पर दिन रात दोष नी लाणा, क्योकि उसयो स्वर्गें ला बार फेंकी दिता है! 11 कने साडे भरोसा करणे बालयां शैताने जो राई दिता। उना उसया छेलुये दे खूने दिया शक्तिया ला हराया है, जडा उना जो पापां ला छुडाणे तांई मरी गिया था। क्योकि उना भरोसा करणा नी छडया की छेलु पां उना दा प्रभु है। हालांकि उना जो दुख तकलीफ होई, ऐथु दीकर की उना जो मारी भी दिता पर सै अपने उस भरोसे ला पिच्छे नी हटे। 12 इस तांई तुसां सारयां जो खुश होणा चाईदा जडे ऐथु स्वर्गें च रेंदे न। पर तुसां जडे धरती पर न कने जडे समुंद्रे च न तुहांजो पर तरस खाणा चाईदा, क्योकि बुरियां आत्मा दा अगुवा थले तुहांडे बाल आई गिया है। असल च सै बडा जादा गुस्सा है क्योकि सै जाणदा है की जल्दी ही उदा अंत होई जाणा। 13 जालू अजगरे समझी लिया, की उसयो धरतिया पर सुटी दितया है, तां उनी उसा जाननिया दा पिच्छा कित जा जग जमया था। 14 पर परमेस्वर उसा जाननिया जो बाजे दे दो फन दितयो थे, ताकि सै उडी करी सुनसान जगा च जा जडी उसा तांई तैयार कितियो था। कने ओथु उसा

दी साडे तिन्ना सालां दीकर देखभाल किती ताकि अजगर उसा दीकर ना पुज्जी सके। 15 तालू अजगरे उसा जनानिया पर अपने मूरे ला खड्डा साई पाणी फेक्या ताकि बाड उसा जो रडाई लेई जा। 16 पर धरतिया उसा जनानिया दी सहायता करणे ताई पाणिए जो निगली लिया जडा अजगरे अपने मूरे ला निकला था। 17 इस बजा ला, अजगर उसा जनानिया पर बडा गुस्सा होया, इस ताई उनी जनानिया दे बंशजा दे खिलाफ लडाईया दी घोषणा करी दिती। मतलब की उना लोकां दे खिलाफ जडे परमेश्वरे दे हुकमा जो मंदे न कने यीशु मसीह दिया सिखाईयां शिक्षा जो मंदे रेंदे न।

13 तालू सै अजगर चली गिया कने समुंद्रे दे कंडे पर खडोई गिया। तां मै इक जानवरे जो समुंद्रे ला निकलदे दिखया, जिसदे दस सिंग कने सत सर थे। उदे सिगां पर दस राममुकुट थे, कने उदे हर इक सिरे पर परमेश्वरे दे खिलाफ इक ना लिख्या था। 2 जडा जानवर मै दिखया, सै चिते साई था; उदे परे भालुए साई थे, कने मुं शेर साई था। अजगरे अपनी शक्ति इस जानवरे जो देई दिती कने उसयो धरती पर राज करणे दा हक देई दिता। 3 मै जानवरे दे सिरां चे इकी सिरे च इक डुंगे जखमे दा निशाण था, जडा उदिया मौता दी बजा बणी सकदा था, पर उदा जखम खरा होई गिया था, इस ताई धरतिया दे लोक हेरान थे कने सै उदे चेले बणी गे। 4 सारयां लोकां अजगरे दी पूजा किती क्योंकि उनी जानवरे जो अपना हक देई दिता था। उना उस जानवरे दी भी पूजा किती। उना बोलया, “कोई भी इस जानवरे ला जादा शक्तिशाली नी है कोई भी उसला लडी नी सकदा है।” 5 परमेश्वरे उस जानवरे जो अपने बारे च बडाई कने परमेश्वरे दी बुराई करणे दा हक दिता। कने परमेश्वरे उसयो बयाली मिनयां दीकर ऐ हक रखणे दा हुकम दिता। 6 कने जानवरे परमेश्वरे दी बुराई करणा शुरू किती, उनी उदे नां दे खिलाफ कने उसा जगा दे खिलाफ बोलया मतलब की स्वर्गे दे खिलाफ जिथू परमेश्वर रेंदा है, कने ओथू रेणेबाले लोकां दे खिलाफ बुराई करणा शुरू किती। 7 उस जानवरे जो ऐ हक दिताया है की सै परमेश्वरे दे लोकां ला लडे, कने उना जो राई दे, कने उसयो हर इक कुल दे लोकां, जातियां, भाषा पर हक दिताया है। 8 धरतिया पर रेणेबाले सारे लोक जानवरे दी पूजा करणा लग्गे, मतलब की सै सारे लोक जिना दे नां संभारे दिया श्रुआता ला छेलुए दिया जिन्दगिया दिया कताबा च नी लिखयो न। छेलू सेई है जडा मारी दिता था। 9 हर कुसी जो जडा मेरे संदेश जो समझणा चांदा है, उसयो उसा गल्ला जो ध्यान ला सुणना चाईदा जडा पबित्र आत्मा कलीसिया ला बोलदा है। 10 जिना दा जेला च जाणा तय है, उना जो पक्का जेल होंगी, जिना लोकां दा तलवारा ला मरणा तय है, उना पक्का ही तलवारा ला मरणा है। इस ताई परमेश्वरे दे लोकां जो दुख सेहन करणे च सबर रखणा चाईदा कने उस पर भरोसा करदे रेंणा चाईदा। 11 फिरी मै इक होर जानवरे जो धरतिया ला निकलदे होए दिखया, उदे छेलुये साई दो सिंग थे। पर जालू सै बोलणा लग्गा तां उदी अबाज अजगरे साई थी। 12 ऐ दुज्जा जानवर उस पेहले बाले जानवरे दे सारे हकां दा इस्तेमाल करदा था। कने धरतिया दे लोकां जो उस पेहले जानवरे दी जबरदस्ती पूजा करांदा था, जिदा सै जखम ठीक होई गिया था। 13 सै दुज्जा जानवर बड़े-बड़े चमत्कार दसदा था, ऐथू दीकर की सै लोकां दे दिखदे-दिखदे अम्बरे ला अग्गी दी बरखा कराई दिन्दा था। 14 दुज्जे जानवरे जो पेहले जानवरे दिया हजुरिया च चमत्कार दसणे दी इजाजत है। इन चमत्कारां दिया बजा ला सै धरती दे लोकां जो भटकाई सकदा था। उनी उना जो पेहले जानवरे दी मूर्ति बनाणे दा हुकम दिता, जडा तलवारा ला घायल होणे बाद भी जिन्दा रिया था। 15 कने दुज्जे जानवरे जो उस पेहले जानवरे दी मूर्ति बनाई करी उसा जो जिन्दा करणे दी हक मिलिया था, ताकि मूर्ति बोली सके कने उना लोकां जो मराई दे जडे उस जानवरे दिया मूर्तिया दी पूजा नी करगे। 16 दुज्जे जानवरे छोटे-बड़े, अमीर-गरीब, मालिक या जडे गुराम न मतलब की सारयां लोकां जो मजबूर किता की सै पेहले जानवरे दे नांए दी छाप अपने सजे हथे पर या मथे पर लाई लेन। 17 उनी ऐसा इस ताई किता ताकि कोई भी माणू जिदे पर पेहले जानवरे दी छाप ना हो तां सै कोई भी समान खरीदी बेची नी सकदा था। 18 इसा छाप्रा दे बारे च समझणे ताई तुहांजो ज्ञान दी जरूरत है। पर जिस बाल ज्ञान है, सै ऐ पता लाई सकदा है की इस जानवरे दिया संख्या दा क्या मतलब है। क्योंकि ऐ इक माणुए दा ना है। ऐ संख्या छेसो छयासठ है।

14 मै फिरी दिखया की, सै छेलू सिय्योन पहाडे पर खडोतया है, कने उदे सोगी इक लख चौवाली जार लोक न, जिना दे मथे पर उदा कने उदे पिता दा नां लिख्या होया है। 2 कने मै स्वर्गे च कुसी दी अबाज सुणी जडी इक झरने दिया तेज अबाजा साई थी। जडी अबाज मै सुणी, सै अबाज उसा अबाजा साई थी, जियां लोक तार बाले यंत्रा जो बजांदे निकलदे न। 3 कने इक लख चूर्ताली हजार लोक सिहांसमे, चार जिन्दे प्रणियां कने अगुवां सामणे खडोतयो थे; सै इक नोआ गीत गा दे थे, जिसयो सेई सींखी सकदे थे, जिना जो परमेश्वरे धरतिया पर रेणेबाले लोकां बिच ला छुडायया था। 4 ऐ सै न, जडे पबित्र जिन्दगी जिन्दे न। ऐ उना लोकां साई न जिना इक बरी भी नाजायज रिशती नी बनाया है कने ना ही इना कुसी चिजा दी पूजा कितियो है, ऐ सिर्फ छेलुये दी ही पूजा करदे न, जिस पासे छेलू जांदा है, ऐ भी उदे पिच्छे चली पोंदे न। ऐ सै न जिना जो धरतिया दे सारे माणुआं ला लग कितया है, जियां लोक खेतरां दियां फसला दा सारयां ला खरा हिस्सा परमेश्वरे जो दिन्दे न, तियां ही ऐ लोक अपणिया जिन्दगिया जो पुरिया पबित्रता सोगी परमेश्वर कने छेलुये जो दिन्दे न। 5 कने उना कदी भी झूठ नी बोलया है, उना च कुछ भी गलत नी है। 6 फिरी मै इक होर स्वर्गदूते जो अम्बरे च उच्चा उडदे दिखया। उनी स्वर्गदूते उस शुभसमाचार जो लिया था जडा कदी नी बदलदा, उनी संसारे च रेणेबाले लोकां, हर इक देश, हर इक गोत्र, कने सारियां भाषां च इदी घोषणा किती। (aiōnios g166) 7 कने उनी बडे जौरे ला बोलया, “परमेश्वरे ला डरा, कने उदी महिमा करा, क्योंकि उदा हण लोकां दा न्याय करणे दा बकत है। कने उदी आराधना करा क्योंकि सेई है जिनी स्वर्ग, धरती, समुंदर कने पाणिए दे तलाबां जो बनाया है।” 8 ओथू इक होर स्वर्गदूत था जडा पेहले दे पिच्छे आया कने बोलया, “बाबेल देश दा सर्वनाश होई गिया! बडे बाबेल देश दा सर्वनाश होई गिया! बाबेल देशे सारिया माणुआं दिया जातिया जो अपणिया शराबा दे नशे च दूत करी दिता, उदा बडा ही बुरा व्यवहार ऐ है जडा उनी सारिया धरतिया कने माणुआं दिया जातिया जो सिखाया क्योंकि उनी उना जो मूर्तिपूजा करणा सिखाया।” 9 फिरी बडे बाद इक होर स्वर्गदूत बडे जौरे ला बोलदा होया आया, “जडा कोई उस जानवरे कने उदिया मूर्तिया दी भक्ति करणा, कने अपने मथे कने अपने हथे पर उदी छाप लांगा, 10 तां उनी परमेश्वरे दे प्रकोपे दिया शराबा जो जडी बिना मिलावटा दी है, उदे गुस्से बाले कटोरे च पाईयो है, पिणा कने पबित्र स्वर्गदूतां दे सामणे कने छेलुये दे सामणे अग्गी कने गन्धका दिया पीडा च पोंणा। 11 अग्गी ला निकलदा धुंआ जडा उना जो सांतांदा है सै हमेशा उपर उठदा रेंदा है। दिन रात उना दा सताया जाणा स्कदा नी है क्योंकि उना उस जानवरे दी कने उदिया मूर्तिया दी पूजा किती, कने उना उस जानवरे दी छाप लाई।” (aiōn g165) 12 इस तां ऐ जरूरी है की परमेश्वरे दे लोक उना सारे दुखां जो सेहन करन जिना चे होईकरी सै गुजरदे न। उना सेई करणा जडा परमेश्वर हुकम दिन्दा है कने उना जो यीशु मसीह पर भरोसा करणा बंद नी करणा चाईदा। 13 कने फिरी मै स्वर्गे ला कुसी जो बोलदे सुणया, “इना गल्लां जो ऐथू लिख।” हणे ला सै लोक सोभाग्यशाली न जडे परमेश्वरे पर भरोसा करदे मरी जांदे न। तालू पबित्र आत्मा इसा गल्ला ला राजी होया, उनी बोलया, “सै सच है। सै सोभाग्यशाली न क्योंकि उना जो अपणिया कडिया मेहनता ला अराम मिलणा कने जडे कम्म उना कितयो न उदे तांई उना जो इनाम मिलणा।” 14 मै फिरी इक चिद्रे बदले जो दिखया, कने मै उस बदले पर कुसी जो बैठया दिखया जडा माणुए सांई लग्गा दा था, कने उस पर माणुए दे पुत्रे सांई कोई बैठया है, जिसदे सिरे पर सोने दा मुकुट कने हथे च पेनी दराटी थी। 15 तालू ही फिरी इक होर स्वर्गदूत परमेश्वरे दा संदेश लेईकरी स्वर्गे दे मंदरे ला बार आया, ऐ चौथा स्वर्गदूत था। उनी बदले पर बैठयो माणुए जो जोर देईकरी बोलया, “धरतिया दी फसल तैयार है, फसला जो बडणे दा बकत आई गिया है। इस तांई अपनी दराटी चला कने फसला दी बडाई कर।” 16 इसा बजा ला सै माणू जडा बदले पर बैठया था, सै अपणिया धराटिया ला धरतिया पर बडणा लग्गा उनी पुरिया धरतिया दिया फसला दी कटाई किती। 17 फिरी पजमा स्वर्गदूत उस मंदरे ला निकलया, जडा स्वर्गे च है, कने उदे बाल भी पेनी दराटी थी। 18 तालू इक होर स्वर्गदूत वेदिया ला बार आया, जडा अग्गी ला धुप बालने दी जिम्मेदारी निभान्दा है। उनी जौरे ला उस स्वर्गदूते ला जिनी पेनी दराटी लियो थी उसयो बोलया, “धरतिया पर अंगरा दे गुच्छे पक्की गियो न! उना जो अपणिया दराटिया ला बडी ले।” 19 तालू उनी स्वर्गदूते अपणिया दराटिया ला उना अंगरा जो बढी दिता जडे धरती पर थे कने उना जो गटेरया। ताकि उना

जो निचोड़ी सकन, इदा मतलब ऐ है की परमेश्वरे बड़ी खतरनाख सजा देणी। अंगूरा जो शेहेर ला बार निचोड़या। ओथु जिथु अंगूरा जो निचोड़या था ओथु ला जडा खन निकलया सै इतणा डुगा था, जितणा की इक घोडे दा सिर होंदा है जालू उसयो लगामा ला पकड़दे न कने तिन सौ किलो मीटर दीकर चली गया।

15 इदे बाद मै अम्बरे च जडा नोआ नोखा चमत्कार दिखया कने सै बडा डराणे बाला था। ओथु सत स्वर्गदूत थे जिना सत लग-लग मुसीबतां पकड़ियां थियां। ऐ मुसीबतां आखरी न क्योंकि जालू उना मुकी जाणा तालू परमेश्वरे दा गुस्सा भी पूरा होई जाणा। 2 तालू मै कुछ दिखया जडा समुन्द्रे सांई लगदा था कने शीशे सांई चमकदा था कने उदे च अग्ग भी मिलियो थी। मै उना लोकां जो भी दिखया जिना उस जानवरे जो हरया था क्योंकि उना उदिया मूर्तिया दी अराधना नी कितियो थी कने उना पर जानवरे दी छाप नी लगियो थी। 3 कने सै परमेश्वरे दे दास मूसा दा गीत गांदे थे, जडा छेलुये दे बारे च गीत है। सै गांदे थे की, “हे सारयां ला शक्तिशाली प्रभु परमेश्वर, जडा कुछ तू कितया है सै कीमती कने अनोखा है।” तू सारयां देशां दा राजा है, तू जडा भी करदा है सैई सच्च कने धर्मी है। 4 “हे प्रभु, सारे लोक तेरी इज्जत करदे न, सै सारे तेरे नाए दी इज्जत करदे न, क्योंकि सिर्फ तू ही पबित्र परमेश्वर है। हर इक जातिया दे लोक तेरे बाल ओदे न, कने सै तेरी अराधना करदे न क्योंकि तेरे धर्म दे कम्म सारे लोक अच्छे ला जाणंदे न।” 5 इदे बाद जालू सै गीत गाई बैठे, तालू मै दिखया की स्वर्ग दा मंदर खुलया था। जडा मिलाप बाले तम्बूरे सांई है। 6 कने सै सतां स्वर्गदूत जिना बाल सतां मुसीबतां थियां, उस मंदरे ला बार निकले। उना चमकदार कपडे पायो थे कने उना दिशा छतिया दे चारो पासे सोने दिया पट्टियां भी थियां। तालू उना चार जिन्दे प्राणियां चे इकी उना सत स्वर्गदूतां जो परमेश्वरे दिया तरफा ला जडा हमेशा जिन्दा है, गुस्से दा भस्या इक-इक सोने दा कटोरा दिता। (aion g165) 8 कने मन्दिर परमेश्वरे दिया महिमा कने सामर्थ्य ला ओणे बाले धूरे ला भरई गया। कने तालू दीकर कोई भी मंदरे च नी जाई सके जालू दीकर उना सत स्वर्गदूतां दे जरियो नियोरियां सतां मुसीबतां मुकी नी जान।

16 फिरी मै उदे बाद मंदरे ला इक उचिया अबाजा जो सतां स्वर्गदूतां जो ऐ बोलंदे सुणया, “जा, कने परमेश्वरे दिया तरफा ला सजा जो जडी उना सतां कटोरयां च है, धरतिया दे लोकां पर नियोरी दिया।” 2 इस तांई पहेले बाले स्वर्गदूते जडा उदे कटोरे च था सै धरती पर नियोरी दिता। फिरी उना लोकां जो जिना पर उस जानवरे दी छाप थी, या जिना उदिया मूर्तिया दी पूजा कितियो थी, उना जो बडे बड़े जखम होई गे जिना च बडी जादा पीडा होदी थी। 3 दुज्जे स्वर्गदूते जडा उदे कटोरे च था उसयो उनी समुन्द्रे च नियोरी दिता। कने तालू ही समुन्द्रे दा रंग मरयो माणुए दे खने सांई होई गया, कने समुन्द्रे च रेणे बाली हर इक प्राणी दी मौत होई गे। 4 तिजे स्वर्गदूते जडा उदे कटोरे च था उसयो उनी खड्डां कने पाणिए दे झरनया पर नियोरी दिता, कने सै खून सांई बर्षी गे। 5 तालू मै उस स्वर्गदूते जो जिसया पाणिए पर हक है, परमेश्वरे ला ऐ बोलंदे होए सुणया, “हे पबित्र परमेश्वर, जडा बकत दी शुरूआत ला लेईकरी हुणे दीकर कने हमेशा तांई नी बदलदा, तू जडी सजा दितियो है, सै सही है।” 6 क्योंकि उना तेरे लोकां कने परमेश्वरे दे संदेश देणेबालयां जो मारी दिता, इस तांई तू हुण उना जो खून पिणे तांई दिन्दा है। ऐई उना तांई खरा है। 7 मै फिरी वेदिया ला कुसी जो बोलंदे सुणया, “हॉ, हे सारयां ला शक्तिशाली प्रभु परमेश्वर, ऐ सच्च है की जियां तू लोकां दा न्याय करदा है सै सही है।” 8 चौथे स्वर्गदूते जडा उदे कटोरे च था उनी सूरजे पर नियोरी दिता, कने सूरजे जो अपणी गमीं बदाणे दी इजाजत दिती, इसा बजा ला लोक जादा गर्मियां दिया बजा ला फकुई गे, 9 इस तांई उना परमेश्वरे जो श्राप दिता था, क्योंकि सेई था जिदे बाल सजा देणे दा हक था। उना हल्ले भी अपणे पापां ला पन्हाताप नी किता कने परमेश्वरे दी निंदा किती, उना हल्ले दीकर परमेश्वरे दिया महानता जो नी मनया। 10 पंजमे स्वर्गदूते जडा उदे कटोरे च था उनी उस जानवरे दे सिंहासने पर नियोरी दिता, कने जिस राज्य पर जानवर राज करदा था उस पर नेरा छाई गया, कने लोक अपणिया जीबा जो चबाणा लगगी पे क्योंकि सै उना दुखां कने जखमा जो सेहन नी करी सका दे थे जडे उना जो होआ दे थे। 11 कने अपणियां पिंडा कने फोड़यां दिया बजा ला स्वर्ग दे परमेश्वरे दी बुराई किती; भले ही उना दे हालात इयोदे थे पर अपणे बुरे कम्मा ला पन्हाताप नी किता कने ना ही उना बुरे कम्मा जो करणा छडया जडे सै करा दे थे। 12 छेमे

स्वर्गदूते जडा उदे कटोरे च था उनी सै बडी बड़ी नदी फरात च नियोरी दिता, इसा बजा ला उसा दा पाणी सुकरी गया कने पुर्व दिशा दे राजे अपणिया सेना लेईकरी उसा नदिया जो पार करी सके। 13 कने मै इदे बाद तिन बुरी आत्मा जो दिखया जडियां दिखणे च मेंढके सांई थियां। इक उस अजगरे दे मुए ला बार आई, कने दुज्जी पहेले जानवरे दे मुए ला बार आई कने तीजी उस दुज्जे जानवरे दे मुए ला बार आई जिनी झूठा संदेश दितया था। 14 इना बुरियां आत्मा बाल चमत्कार करणे दी शक्ति थी कने उना जाई करी उना लोकां जो गटेरया जडे इस संसारे दे सारे देशां पर राज करदे न ताकि सै सारयां ला शक्तिशाली परमेश्वरे दे उस महान दिने पर उदे खिलाफ लडाई लडने तांई जान। 15 “उना बुरियां आत्मा राज कने उना दियां सेना जो उसा जगा पर गिटा किता जिसया इज्जानी भाषा च हर-मगिदोन बोलंदे न।” इस तांई प्रभु यीशु मसीह बोलया है, “ऐ गल्ल सुणा। मै चोरे सांई अचानक ओणा है। सोभाग्यशाली है सै माणु जडा मेरे ओणे पर जागदा है कने अपणे कपडे तैयार रखदा है। तालू उना नंगे नी होणा कने शरमिंदा नी होणा जालू उना लोकां बिच जाणा।” 17 कने सतमे स्वर्गदूते जडा उदे कटोरे च था उनी होआ च नियोरी दिता, कने मै सुणया, ओथु सै था जडा स्वर्ग दे मंदरे दे अंदरे ला परमेश्वरे दे सिंहासने ला बोला दा था, “सब कुछ होई गया।” 18 कने उनी बकत बिजलियां कने गडगडात बदलां दे गडाके होणा लगे कने इक ऐसा भयानक हिलण होया, इसला पहेले लोकां कदी भी इतणे जौरे ला हिलण महसूस नी कितया था। 19 इसला बाबेल दा सै बड़ा शेहर तिन हिस्सयां च बंडूई गया। क्योंकि परमेश्वरे अपना वायदा पूरा किता जडा उनी बाबेल शेहेर दे लोकां जो सजा देणे दे बारे च कितया था। इसयो परमेश्वरे बडी कटोर सजा देणी। ऐ इयां ही होणा जियां उना बिना पाणी पायो शराब पि लियो है, जिसया परमेश्वरे अपु गलासे च पाया है, जडा उदे गुस्से जो दसदा है। 20 कने उस बकत समुन्द्रे दे सारे टापू गायब होई गे, कने पाड भी गायब होई गे। 21 अम्बरे ला लोकां पर बड़े-बड़े ओले पे, हर इकी ओले दा बजन लगभग 50 किलो था। ऐ मुसीबत बडी भरी बड़ी थी, इसा बजा ला लोकां परमेश्वरे दी बुराई किती।

17 जिना सत स्वर्गदूतां बाल सै सत कटोरे थे, उना चे इक जणे आई करी मिंजो ला ऐ बोलया, “मै तिजो दसणा की परमेश्वरे कियां उसा बडिया बेश्या जो सजा देणी, जडी ऐसिया जगा पर बोदी है जिथु ला मतियां खड्डां न।” 2 जिसा सोगी धरती दे राजयां व्यभिचार किता, बाबेल दे बुरे कम्मा धरतिया दे सारे देशां जो भ्रष्ट करी दिता। ऐ ऐसा था जियां उनी उना जो शराब पिणे तांई दिती, कने इसा बजा ला परमेश्वरे उना जो सजा देणी। 3 तालू स्वर्गदूत मिंजो पबित्र आत्मा दिया सहायता ला सुनसान जगा च लेई गया, आत्मा मिंजो अपणे काबू च लेई लिया, कने मै ओथु इक जनानिया जो दिखया जडी इक लाल रंगे दे जानवरे पर बेठियो थी, जिसादे सत सिर कने दस सिंग थे। उदा शरीर परमेश्वर दे खिलाफ लिखयो ना ला भस्या था। 4 इना जनानिया बैगणी, कने लाल रंगे दे कपडे पायो थे। उना अपणे शरीर जो सोने दे मंगे मणियां कने मोतियां ला सजाया था। कने उसा दे सज्जे हथे च शराबा ला भस्या सोने दा गलास पकड़या था, जडा उसा दे बुरे कम्मा कने गदे यौन कम्मा जो दसदा है। 5 कने उसा दे मथे पर इक ना लिखया था जिदा इक गुप्त मतलब है, “मै महान शेहर बाबेल है। मै सारियां बेशयां दी मां है कने संसारे दे सारे बुरे कम्मा दा जरिया है।” 6 कने मै दिखया की जनानी परमेश्वरे दे लोकां दे खने दे नशे च थी, जिना जो लोकां मारी दितया था क्योंकि सै यीशुए पर भरोसा करदे थे। कने उसयो दिखीकरी मिंजो बडी हेरानी होई। 7 उनी स्वर्गदूते मिंजो ला बोलया, “तू हेरान मत हो। मै तिजो इसा जनानी, कने उस जानवरे दा, कने जिस पर सै बेठियो है, जिदे सत सिंग न कने दस सर न, गुप्त भेद समझांगा।” 8 जडा जानवर जिसया तू हुण दिखया, इक बकत पहेले जिन्दा था, पर हुण नी है, कने सै हुण अथाह कुंडे ला बार ओणे बाला है कने परमेश्वरे पुरे तरीके ला नाश करी देणा। धरती पर रेणेबाले लोक जिना दे ना परमेश्वरे संसार शुरू होणे ला पहेले जिन्दया दिया कताबा च नी लिखयो, उना सारयां हेरान होई जाणा जालू उना इस जानवरे जो दिखणा। इक बकत पहेले सै जिन्दा था; हुण सै जिन्दा नी है, पर उनी फिरी बापस मुडी ओणा। (Abyssos g12) 9 ऐ समझणे तांई तुहांजो ज्ञान दी जस्तत है: जानवरे दे सतां सर उस शेहेर जो दूशांते न जिस पर ऐ जनानी राज करदी है। कने सै सत राजयां जो भी दूशांते न। 10 कने सै जडे सत राजा न, उना चे पंज तां पहेले ही मरी गियो न; उना चे इक हुण राजा है कने आखरी बाला हल्ले दीकर आया नी है, पर जालू उनी ओणा तां उनी थोडे बकते तांई राज

करणा। 11 सै जानवर जडा बडे पहले रेंदा था कने हण नी है, सै अठमा राजा है। पर सै अठमा राजा पहले सत राजयां चे इक है। आखरी च उस राजे जो पक्का ही हमेशा ताई सजा मिलणी। 12 जडे दस सिंग तू पहले दिखे थे, सै उना दस राजयां जो दूशान्दे न जिना हल्ले दीकर राज करणा शुरू नी कितया है। उना दस राजयां जो उस जानवरे सोगी मिलिकरी थोडे दे बकते ताई राज करणे दा अधिकार मिलणा। 13 इना सारयां राजयां दा इक ही मकसद है, कने उना अपणी-अपणी शक्ति कने अधिकार जानवरे जो देई देणा। 14 “जानवर कने इना दसा राजयां छेल्ये दे खिलाफ युद्ध करणा, पर छेल्ये उना जो हराई देणा, क्योकि सै प्रभुआं दा प्रभु, कने राजयां दा राजा है। उनी उना जो अपने सदयो, चुणयो कने भरसे दे काबील चेलयां सोगी हराई देणा।” 15 स्वर्गदूते भी मिजो ऐ भी बोलया, “जडा पाणी तू पहले दिखया था, जिस पर सै बेश्या बेठियो थी, सै सारे संसारे दे लोक न, जडे सारियां जातियां, धर्म, देश दे कने लग-लग भाषा बोलणे बाले न।” 16 सै बकत ओणा जालू जानवर उना दस राजयां सोगी जडे उदे सोगी न, उस बेश्या ला नफरत करणी जडी उस पर बेठियो है। उना उस पर हमला करणा, उसयो नंगा करणा, उना उदे मिटे दा हिस्सा खाई जाणा, कने बाकियां जो उना फुकी देणा। 17 सै जनानी जिसया तू दिखया था, सै बड़ा शेर है जडा धरती पर सारे राजयां पर शासन करदा है। ऐ चीजां उदे सोगी होई न, क्योकि परमेश्वरे अपने मकसदे जो पूरा करणे ताई उना दे मना दा मार्गदर्शन किता है। ऐई बजा है की उना अपना अधिकार जानवरे जो देई दिता ताकि सै राज करे, जालू दीकर सै पूरा नी होई जा जडा परमेश्वरे बोलया था।

18 इदे बाद मै इक होर स्वर्गदूते जो स्वर्ग ला उतरदे दिखया। उदे बाल बड़ा अधिकार था कने उदिया चमका दिया बजा ला सारिया धरतिया पर लौ होई गेई। 2 उनी जोरे ला पुकारी करी बोलया, “बाबेल देश दा सर्वनाश होई गया! बड़े बाबेल देश दा सर्वनाश होई गया।” कने सै बुरियां आत्मा दा पर, कने हर इक अशुद्ध आत्मा दा अडा, कने हर इक अशुद्ध कने बुरे पंडियां दा अडा होई गया। 3 ऐ इसा बजा ला होणा क्योकि उना जनानिया जडी बाबेल शेर है, उना हर इक देशे दे सारे लोकां जो सै शराब पियाइयो है जडी उसा दी मूर्तियां दी पूजा है। सारिया धरतिया दे राजा उदे गंदे कम्मा च शामिल होयो न। धरतिया दे व्यपारी उसा जनानिया दिया मेगियां-मेगिया चीजां दिया इच्छा दिया बजा ला अमीर बणी गे। 4 फिरी मै स्वर्ग ला इक हर अबाज सुणी, “हे मेरे लोको, उस शेहरे ला निकली जा। उना लोकां सोगी मिली करी पाप मत करा, ताकि तुहांजो उना सोगी सजा ना मिल्ले।” 5 क्योकि उना दे पाप बडे बड़े न, जिना दा ढेर अम्बरे दीकर लगगी गया है, कने परमेश्वर उसा बुराई जो कदी नी भुलदा है जडी उना कितियो है। 6 इस ताई मै बोलदा है, उस शेहरे सोगी भी सियुदा ही कर जियां उनी दुज्जयां सोगी कितया है, उदे सारे बुरे कम्मा ताई उसयो दो गुणा बदला दे। उस शेहरे ताई दौगुनी शक्तिशाली यातना दी तैयारी कर जदियां यातना सोगी उनी दुज्जयां लोकां सोगी जुलम कितया था। 7 तू उसयो पक्का ही बडी जादा पीड कने दुख देणी जडा उदे जिन्दगी जिणे दे तरीके कने उदे अपने आपे दे घमंडे दे बराबर है। उनी अपने आपे ला बोलया, “मै इक राणिया साई लोकां साई राज करणा।” इक बिधवा नी है कने मिजो कदी दुख नी होणा। 8 उदे अपणी बडाई करणे दिया बजा ला उस अचानक मुसीबतां आई पोंणियां। सिर्फ इकी ही दिने च बिमारी कने शोक कने अकाल उस पर इक सोगी आई जाणा। कने उसयो अग्गी च भस्म करी देणा, क्योकि प्रभु परमेश्वर शक्तिशाली है, कने उनी उसयो सजा देणी। 9 कने राजे शेहरे जो फुकुदा दिखणा तां उना उदे ताई रोग कने दुख मनाणा। 10 कने सै उसा सजा ला डरदे न जडा उसा जो पीड दिन्दा है, बड़े शेर, बाबेल। हे मजबूत शेर, हाया। हाया थोडे दे बकत च, परमेश्वरे तेरा न्याय करी दिता कने सजा दिती। 11 धरती दे व्यपारियां उदे ताई रोग कने दुख मनाणा है, क्योकि हण कुनी भी उना दा माल नी खरीदणा है। 12 उना दा माल केईयां तरा दा था। उदे च सोना, चांदी, रतन, मोती थे। उदे च बडे छेल कने मेगे धागे चमकीले लाल बैजणी, रेशमी, कपडे दे बणायो थे। उदे च खुशबूदार लकडिया ला बणियां चीजां, हाथिये दे दंदा ला बणियां चीजां थियां, होर भी बाकी चीजां थियां जडियां मेगी लकडिया या पीतल, लोहा, या संगमरमर दियां बणियां थियां, 13 कने लोक दालचीनी, मसाले, धूप, इत्र, लोबान, शराब, तेल, मैदा, गाय-बैल, भेड-बकरियां, घोडे, रथ, कने दास कने माणुए दे प्राण नी खरिददे थे। 14 व्यपारियां उसला बोलणा, सै सारियां

चीजां जिना दी तू इच्छा रखदी थी हण नी न। हण सारियां छेल खुशबुआ बालियां चीजां जडियां तिजो पसंद थियां, सै सारियां चीजां जिना जो तू अपने शरीर जो सुंदर बणांदी है, सै सारियां गबाची गियां न, हण नी मिलदियां। 15 इना चीजां दे व्यपारी जडे उदे जरिये अमीर होई गियो थे, उसा दी पीडा दे डरे ला उना दूर खडोणा कने रोदे-रोदे बोलणा, 16 हाय! हाय! ऐ बडा शेर जिनी मलमल कने लाल रंग दे कपडे पायो थे, कने सोने कने मोतियां ला सजया था; 17 घडिया च ही उदा सारा धन खत्म होई गया। जाजे दे सारे कमान कने सै सारे जडे जाजे पर यात्रा करदे न, कने सै सारे जडे समुंदरे ला अपना गुजारा करदे न, बाबेल शेहरे ला बडे दूर खडोई करी दिखदे रे। 18 कने जालू उना शेहरे जो फुकुदे कने अग्गी ला निकलदे धुंए जो दिखणा कने चिल्लाणा, इस सांई महान शेर होर कोई नी होया! 19 कने उना अपना दुख दसणे ताई अपने-अपने सिरां पर धुड पाणी है, कने रोदे-रोदे कने चीलाई करी बोलणा, हाया। हाया। ऐ बडा शेर जिदिया संपतिया ला समुंद्रे दे सारे जाजां बाले अमीर होई गियो थे, सै घडिया च ही सारा उजडी गया। 20 तू जडा स्वर्ग च रेंदा है, कने हे परमेश्वरे दे लोको, कने प्रेरितां, कने परमेश्वरे दे संदेश देणेबालयां, जडा उस सोगी होया उस पर खुश होआ, क्योकि परमेश्वरे बाबेल शेहरे जो उना गल्लां च दोषी बणाया है जडियां उनी तुहाडे सोगी कितियां न। 21 फिरी इक जोरे बाले स्वर्गदूते बडिया चक्किया दे चक्के दे बराबर इक पथर चुकया, कने ऐ बोली करी समुंदरे च सूटी दिता, “जियां इस पथरे जो समुंदरे च फेंकदे न,” कने सै दोबारा नी मिलदा है, तियां ही सै महान शेर बाबेल भी इक ही बरी च खत्म होई जाणा, कने दुबारा नी बणाणा। 22 बाबेल शेर तेरियां गलियां च फिरी कदी भी गाणा बजाणा नी सुणेणा, कोई भी गायकां, बंगरी बजाणे बालयां, कने तुरही बजाणे बालयां दा संगीत नी होणा। तुहाडे सारे माहिर कर्मचारी गायब होई जाणे, कने तुहाडियां मिलां बाल पिणे ताई कोई अनाज नी होणा। 23 कने उदियां राती नेरियां होणियां, ऐथू दीकर की इक भी दिरया नी बलना। ओथु कुसी भी लाडा लाडिये दिया खुशिया दी गल्ल नी होणी। ऐसा इस ताई होणा क्योकि उदे व्यपारियां जडे दुनिया भर च सारयां ला बड़े थे उना अपने जादू टोणे ला देशां जो धोखा दिता है। 24 परमेश्वरे बाबेल जो इस ताई सजा दिती क्योकि सै परमेश्वरे दे संदेश देणेबालयां जो, कने होर सारे लोकां जो जडे परमेश्वरे दे न, कने धरती दे लोकां जो मारणे दा दोषी था।

19 जालू सै जोरे बाला स्वर्गदूत बोली बैठा तां इदे बाद मै जडा सुणया सै इयां था जियां मते लोक गा दे होन, “परमेश्वरे दी महिमा हो! तू ही है जडा उद्धार करदा है, कने सामर्थ्य साडे परमेश्वरे दी ही है।” 2 उदी स्तुति करा क्योकि उदे सारे फैसेले सही कने सच्चे न। उनी बदनाम बेरिया दा न्याय करिरी बदला लिया क्योकि उना संसारे दे लोकां जो पाप करणे ताई भरमाया। परमेश्वरे उसा वेश्या दा न्याय करिरी बदला लिया क्योकि उना अपने दास मारयो थे। 3 फिरी दूजी बरी उना बोलया, “हालेलुय्याह! बाबेल जो नाश करणे बालिया अग्गी ला निकलणे बाला धुंआ उठदा रेणा कने कदी बंद नी होणा।” (aiōn g165) 4 कने चोबियां अगुवां कने चारों जिन्दे प्राणियां गोडे भार बेईकरी परमेश्वरे जो दण्डवत किता, जडा सिंहासने पर बैठया था, कने बोलया, “आमीन! परमेश्वरे दी स्तुति हो।” 5 कने फिरी मै कुसी जो बोलदे सुणया, कने ऐसा लगया की जियां ऐ अबाज परमेश्वरे दे सिंहासने ला आई हो। उनी बोलया, “साडे परमेश्वरे दे सेबकों कने तुसां जडे उदा डर मदे न, चाहे बड़े दूजे दे होन या छोटे दूजे दे होन तुसां सारे परमेश्वरे दी स्तुति करा।” 6 इदे बाद, फिरी मै ऐ भी सुणया जडा बडे जादा लोकां दे चिल्लाणे सांई था। उना दा चिल्लाणा मते पाणिए दिया अबाजा सांई था, कने बदलां दे गडाकयां दिया अबाजा सांई था। मै उना जो ऐ बोलदे सुणया; परमेश्वर साडा प्रभु, ओआ असां उदी स्तुति करन। क्योकि उदे बाल हर जगा राज करणे दी शक्ति है। 7 ओआ, असां खुश कने मगन होई जान, कने उदी स्तुति करन, क्योकि छेल्ये दा बियाह होणेबाला है, उदी लाडी श्रृंगा करिरी कने अपने आपे सजाई करी उदे ताई तैयार है। 8 छेल्ये उसयो साफ चमकदार मलमल ला बणयो कपडे पाणे ताई दिते न, जडे शुद्ध न, जडा भरोसा करणे बालयां दे भले कम्मा दा प्रतीक है। 9 तालू स्वर्गदूते मिजो ला बोलया, “ऐ लिख, धन्य सै न, जिना जो छेल्ये दे बियाये दा जशन मनाणे तांई धामा च सदया है।” फिरी उनी मिजो बोलया, “ऐ बचन परमेश्वरे दे सच्चे बचन न।” 10 जालू मै सुणया तां जडा मिजो ला गल्लां करा दा था, मै उस माणुए सामणे झुकी गया, क्योकि मै उदी अराधना करा दा था। उनी मिजो बोलया, मेरी अराधना मत कर, मै भी तेरे सांई परमेश्वरे दा

सेबक है कने तेरे भाईयां सांई जडे यीशु मसीह दियां सच्चची शिक्षां पर भरोसा करदे कने मंदे न। तिजो परमेश्वरे दी ही अराधना करणी चाईदी। क्योंकि परमेश्वर आत्मा है जडी परमेश्वरे दे लोकां जो यीशु मसीह दी दसियो सच्चाईयां दी घोषणा करणे दे काबिल बणादां है। 11 फिरी मैं स्वर्ग की खुलया होया दिखया, कने ओथु मेरे सामणे इक चिट्टा घोडा था; कने उस पर इक सवार था, सै परमेश्वरे दा सच्चा कने भरोसेमंद सेबक था; सै धार्मिक तरीके ला उदे दुशमणा दा न्याय करदा है कने उना दे खिलाफ लडाई करदा है। 12 उदियां हखी अग्गी दियां लपटा सांई चमकदियां थियां, कने उदे सिरे पर मते भरी राजमुकूट थे। उदा इक ना उस पर लिखया था, पर सिर्फ सेई उस नाए दा मतलब जाणदा था। 13 उनी खुने च डोबया कलखे धाये थे, कने उदा ना परमेश्वरे दा बचन था। 14 कने स्वर्ग दी सेना उदे पिच्छे-पिच्छे थी। सै भी चिट्टे घोडयां पर सवार थे कने उना चिट्टे मलमेले दे कपडे पायो थे जिना च कोई भी दाग नी था। 15 उदे मूए ला इक पैनी तलवार निकली जिसला उनी देशां जो हराई देणा। जडा उदे अधिकारां जो नी अपनांदा उनी उना जो पुरे तरीके ला सजा देंगी। उनी सारायां ला शक्तिशाली परमेश्वरे दे भयंकर गुस्से जो इयां ही छडी देणा जियां इक रस्सकंडु ला अंगूरा दा रस्स निकलदा है। 16 कने उदिया पोशाका कने उदिया सजिया जंघा पर ऐ ना लिखया है: “राजयां दा राजा कने प्रभुआं दा प्रभु है।” 17 फिरी मैं इक स्वर्गदूते जो सूरजे पर खडोतयो दिखया, कने उनी अम्बरे च उच्चे उडदे मांस खाणे बाले सारे पछियां जो जौरे ला पुकारया, “ओआ, उसा बडिया धामा तांई गिटे होई जा जडी परमेश्वरे तुहाडे तांई तैयार कितियो है।” 18 ओआ कने राजयां, सेना दे अगुवां, ताकतवर सेनिका, घोडयां कने उना से सवारां दा मास खाओ। तुसां हर तरा दे मरयो लोकां दा मास खाई सकदे न, मतलब की गुलाम कने अजाद, बडे कने छोटे, सारायां दा मास खा। 19 फिरी मैं उस जानवरे जो दिखया जडा समुंद्रे ला बार आया था, कने धरती दे राजयां कने उना दियां सेना जो दिखया। सै घोडे पर बोणे बाले कने उदिया सेना दे खिलाफ लडाई लडने तांई इक सोगी आपे। 20 कने सै पैला जानवर, कने उदे सोगी सै झूठा परमेश्वरे दे संदेश देणे बाला पकडोई गिया, झूठे संदेश देणेबाले जानवरे दिया तरफा ला चमत्कारी चिन्न दस्से कने उना सारे लोकां जो भटकाया, जिना अपने मथे पर छाप लाईयो थी कने जडे उदिया मुर्तिया दी पूजा करदे थे। ऐ देनो जीदे जी उसा अग्गी दिया झिला च पाई दिते, जडी गन्धक ला बलदी है। (Limnē Pyr g3041 g4442) 21 तालू चिट्टे घोडे दे सवारे उस जानवरे दे सारे सेनिका जो मारी दिता, उनी उना जो उसा तलबारा ला बडी दिता जडी उदे मूए ला निकली थी। तालू अम्बरे दे सारे पंछी मरयो लोकां दा मास खाणे तांई आई गे जालू दीकर की उना दा पेट भरई नी जा।

20 फिरी मैं इक स्वर्गदूते जो स्वर्ग ला उतरदे दिखया, जिदे हथे च दुगो कुंडे दी चाबी थी, कने इक बडी जर्जर थी। (Abyssos g12) 2 कने उनी उस पूराणे अजगरे जो झपटी करी पकडी लिया। जिसयो शैतान भी बोल्दे न, उनी उसयो बन्नी करी दुगो कुंडे च फेंकी दिता कने दरबाजा बंद करी दिता कने उस पर मोहर लाई दिती ताकि उसयो इक जार सालां दीकर कोई खोले ना। इना जार सालां च शैताने संसारे लोकां जो धोखा नी देई सकणा। उदे बाद उसयो थोडे बकते तांई छडी देणा। (Abyssos g12) 4 फिरी मैं कुछ सिंहासन दिक्खे, कने जडे लोक उना सिंहासना पर बैठयो थे उना जो राज करणे दा हक दिता था। मैं उना लोकां दियां आत्मा जो भी दिखया जिना दे सिरां जो बड्डी दिता था क्योंकि उना ऐ मन्नी लिया था की यीशु उना दा प्रभु है, कने सै परमेश्वरे दे बचने पर भरोसा करदे थे। उना जानवर या उदिया मुर्तिया दी पूजा नी कितियो थी कने इना अपने मथे कने हथां पर जानवरे दी छाप नी लाईयो थी। ऐ लोक दुबारा ला जिन्दे होई गे कने इना इक हजार सालां दीकर मसीह सोगी राज किता। 5 मरयां चे जिन्दे होणे बालयां चे ऐ सारायां ला पहले थे कने ऐ बडे जादा सोभाग्यशाली कने पबित्र न। दूजी मौत दा उना पर कोई अधिकार नी है। सै परमेश्वरे दे कने मसीह दे याजक होणे कने उना सोगी इक हजार साल दीकर राज करणा। इना इक हजार सालां ला पहले कुसी भी भरोसा करणे बालयां जो जडे मरी गियो थे जिन्दा नी कितया। 7 जालू हजार साल पुरे होई जाणे तां स्वर्गदूते शैताने जो ओथु ला जिथू सै बन्नया था अजाद करी देणा कने उनी उना देशां जो धोखा देणे तांई बार आई जाणा जडे पुरे संसारे च छिडयो न। इना देशां जो गोग कने मागोग बोल्दे न। शैताने उना सारायां जो इकी जणा पर गठेरी देणा जिथू उना लडाई करणी। उना समुंदरे दे बखे दिया


रेता बराबर होणा की कुनी उना जो गिणी नी सकणा। 9 कने सै सारिया धरतिया पर हर जणा गे। उना उस शेहरे जो घेरी लिया, जिसयो परमेश्वर प्यार करदा है, जिथू उदे लोक रेदे थे। परमेश्वरे दिया तरफा ला कने स्वर्ग ला अग आई उना पुरिया सेना जो भस्म करी दिता। 10 इदे बाद शैतान पकडोई जाणा, जिनी हर देशे दे लोकां जो भटकाया कने उसयो गन्धक दिया अग्गी च फेंकी देणा, मतलब की उसा अग्गी च जडी झीला सांई बड्डी है। जिदे अंदर उस जानवरे जो कने परमेश्वरे झूठे संदेश देणेबालयां जो पहले ही फेंकी दिता था। उसा अग्गी च उना जो हमेशा तांई दिन रात सताया जाणा है। (aiōn g165, Limnē Pyr g3041 g4442) 11 फिरी मैं इक चिट्टा सिंहासन दिखया जिस पर परमेश्वर बिराजमान था। पर ओथु जिथू परमेश्वर बिराजमान था, ओथु ला धरती कने स्वर्ग सारा गायब होई गिया कने फिरी कुनी भी उना जो नी दिखया। 12 फिरी मैं मरयो लोकां जो उस सिंहासने सामणे खडोतयो दिखया मतलब की उना जो जडे खस न कने आम लोक न। सै लोक जडे समुंद्रे च डुबी करी मरी गियो थे कने कवरां दे सारे मरयो लोक, कने सै सारे लोक जडे मरयां दिया जगा पर थे, सै सारे उस सिंहासने सामणे खडोते। कने कताबां च लिखियां गल्लां दे अनुसार, जडा-जडा उना कितया उदे अनुसार उना दा न्याय होणा। (Hadēs g86) 14 सै सारे लोक जिना दे ना जिन्दगिया दिया कताबा च नी लिखयो थे, उना जो अग्गी दिया झिला च फेंकी दिता। इदे बाद मौत नी है, हुण मरयां दी कोई जगा नी है क्योंकि सै सारे लोक जिना दे ना जिन्दगिया दिया कताबा च नी लिखयो थे उना जो अग्गी दिया झिला च फेंकी दिता, इसा जो ही दुज्जी मौत बोल्दे न, जडा की अग्गी दिया झिला च सजा है। (Hadēs g86, Limnē Pyr g3041 g4442)

21 फिरी मैं नोआ स्वर्ग कने नोई धरती दिखी, क्योंकि पूराणी धरती कने स्वर्ग हुण नी थे। कने हुण कोई समुन्द्र भी नी था। 2 फिरी मैं पबित्र नोए शेहर यस्शलेमे जो भी दिखया, जडा स्वर्ग ला परमेश्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिना जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। 3 फिरी मैं इक अबाज सुणी जडी परमेश्वरे दे सिंहासने ला जौरे ला बोली, “दिख, हुण परमेश्वरे लोकां बिच अपना घर बाणाण।” उनी उना सोर्गी रेणा, कने सै उदे लोक होणे, उनी अपु उना जो अपने लोकां दे स्पे च अपनाणा कने उनी उना सोर्गी रेणा कने उना भी उसयो परमेश्वरे दे स्पे च अपनाई लेंणा। 4 परमेश्वरे उना दियां हखी ला सारे आंस पुंज्जी देंगे; कने इदे बाद कुसी भी माणुए जो दुख नी सेहणा पोंणा, रोणा नी पोंणा, दर्द महसूस नी होणा, ना ही कूदी मौत होंणी क्योंकि पूराणे संसारे दियां सारियां चीजां गायब होई गियां न। 5 कने जडा सिंहासने पर बैठया था, उनी बोलाया, “दिख, मैं सब कुछ नोआ करी दिन्दा है।” फिरी उनी बोलाया, “लिखि ले, क्योंकि जडा मैं बोलदा है उदे पर भरोसा करी सकदा है। ऐ गल्लां पक्का ही होणियां।” 6 फिरी उनी मिंजो बोलाया, सब कुछ मुकी गिया है। मैं अलफा कने ओमेगा, कने शुरूआत कने अंत है। जडा कोई प्यासा है, मैं उसयो उस पाणिऐ ला मुफ्त पाणी पिणे तांई देणा जडा हमेशा दी जिन्दगी दिन्दा है। 7 जडा शैताने जो हराई दिन्दा है, उसयो मिंजो ला सै ऐ सारियां आशीषां मिलणियां; कने मैं उदा परमेश्वर होणा कने सै मेरा पुत्र होणा। 8 पर जडे मिंजो पर भरोसा नी रखदे, उना जो जोर लाईकरी गंधक बालिया उसा झिला च पाई देणा, जडी दुज्जी मौत है। कने सेई अंजाम उना दा भी होणा, जडे लोकां दे सामणे मिंजो अपनाणे ला उददे न, बुरे काम करदे न, जडे हत्यारे न, गंदे काम करदे न, जादू टोणा करदे न, मुर्तियां दी पूजा करदे न, या झूठ बोल्दे न। (Limnē Pyr g3041 g4442) 9 फिरी उना सत्तां स्वर्गदूतां चे इकी जिना माणुऐ दिया जाति पर सत्त आखरी मुसीबतां ला भरयो कटोरे न्यारे थे, मिंजो सोगी गल्ल किती कने उनी बोलाया, “ऐथू ओआ, मैं तिजो लाडी दसणी जिदा जल्दी ही छेलुये सोगी बियाह होई जाणा है।” 10 तालू परमेश्वरे दिया आत्मा इक दर्शण दसया। उस दर्शने च स्वर्गदूत मिंजो इक बडे बड्डे पाडे पर लेई गिया। कने पबित्र शेहर यस्शलेमे दसया, जडा परमेश्वरे दिया तरफा ला स्वर्ग ला थले उतरया था। 11 शेहर परमेश्वरे ला मिलणे बालिया लौई ला चमका दा था, कने उदी ज्योति बडे कीमती पथर मतलब की यशब नाए दे बेशकीमती पथरे सांई चमका दी थी, कने शीशे सांई साफ थी। 12 शेहरे दियां चारो पासे दियां दिबारां बडिया उच्चिया थियां, कने शेहरे च बारा दरबाजे थे कने उना सारे दरबाजायां च इक स्वर्गदूत पेहरा दे दा था कने उना दरबाजायां पर इस्त्राएलियां दे बारा गोत्रां दे ना लिखयो थे। 13 शेहरे दिया चारों दिशां च तिन

दरबाजे थे: पूर्व, पश्चिम, उत्तर कने दक्षिण च। 14 उना शेहरे दियां दिबारां बारा बड़े-बड़े पथरां उपर बणाईयां थियां, कने उना हर इक पथरे पर छेल्ये दे बारह प्रेरितां दे नां लिखयो थे। 15 सै स्वर्गदूत जडा मिंजो सोगी गल्लां करा दा था, उदे बाल दरबाजयां कने उदियां दिबारां जो नापणे ताई इक सोने दा गज था। 16 उस शेहरे दे चार सिरे थे कने चारो सिरे इकोदे थे। स्वर्गदूते उस सोने दे फति ला शेहरे जो नापया; इदी लम्बाई दो हजार चार सौ किलो मीटर थी। इदी चौड़ाई कने उच्चाई लम्बाईया बराबर ही थी। 17 इदे बाद स्वर्गदूते दिबारां दी उच्चाई नापी। उनी इसयो भी इयां ही नापया जियां लोक चीजां जो नापदे ना। दिबार छियासठ मीटर उच्चि थी। 18 शेहर खरे सोने ला बणया था जडा शीशे साईं चमकदा था कने उदियां दिबारां यशब नापे दे कीमती पथरे ला बणियां थियां। 19 उस शेहरे दियां नियां कीमती बारा बड़े-बड़े पत्थरां पर बणियां थियां; पैली नी यशबे दी, दुज्जी नीलगणी दी, तीजी लालडीए दी, चोथी मरकते दी, 20 पंजमी गोमेदके दी, छेमी माणिक्ये दी, सतमी पीतमणिए दी, अठमी पेरोजे दी, नौमी पुराजे दी, दसमी लहसनिये दी, गयामी धूम्रकांते दी, कने बारमी याक्बे दी थी। 21 बारा दरबाजे भी इक-इक कीमती मोतियां ला बणयो थे, कने शेहरे दियां सडकां खरे सोने दियां बणियां थियां जडियां शीशे साईं चमकदियां थियां। 22 मै इस शेहरे च कोई मंदिर नी दिखया क्योंकि सारयां ला शक्तिशाली प्रभु परमेश्वर कने छेलु उस शेहरे च है। इस ताई ओथु मंदरे दी कोई जरूरत नी है। 23 उस शेहरे च ना सूरजे दी कने ना चन्द्रमे दी जरूरत है, क्योंकि सै शेहर परमेश्वरे कने छेल्ये दिया रोशनिया ला रोशन है। 24 उस शेहरे च चमक संसारे च रेणे बालयां सारे लोकां जो रोशनी दिन्दी है कने संसारे दे सारे राजयां अपणिया-अपणिया दौलता जो उस शेहरे च लेई ओणा है। 25 उस शेहरे दे दरबाजे दिन भर खले रेंदे न। सै कडी कदी भी बंद नी होंदी क्योंकि ओथु कदी भी रात नी होंदी। 26 संसारे दे लोकां संसारे दियां सारियां खबसुरत चीजां जो कने लोकां दिया धन दौलता जो उस शेहरे च लेई ओणा है। 27 पर जडे कुछ भी गंदा था या सै लोक जडे बुराई करदे न या झूठ बोलदे न, उना जो पक्का ही उस शेहरे च अंदर ओणे दी इजाजत नी है। ओथु सिर्फ सेई लोक अंदर जाई सकदे न जिना दे ना छेल्ये दिया जिन्दगिया दिया कताबा च लिखयो थे।

22 तालू स्वर्गदूते मिंजो इक नदी दस्सी जिदे च जिन्दगी दा पाणी था। पाणी शीशे साईं चमका दा था। ऐ नदी परमेश्वर कने छेल्ये दे सिहांसने दे थले ला बेह दी थी। 2 नदी शेहरे दिया सडका दे बिचो बिच ला गुजरदी थी। नदिया दे हर इक किनारे पर जिन्दगी देणेबाले सख लगयो थे जडे हर साल बारा बरी फल दिन्दे थे मतलब की हर मिने च इक बरी। संसारे दे लोक उना दे पतयां दा उपयोग अपणियां बिमारियां जो ठीक करणे ताई करदे न। 3 उस शेहरे च कुछ भी ऐसा नी है जडा परमेश्वरे दे श्राप दे अर्थीन है। परमेश्वर कने छेलुए दा सिंहासन उस शेहरे च होणा, कने परमेश्वरे दे सेवकां उदी अराधना करणी। 4 उना परमेश्वरे जो आमणे सामणे दिखणा, कने परमेश्वरे दा नां उना दे मथे पर लिखया होणा। 5 कने ओथु फिरी कदी रात नी होणी, कने शेहरे दे लोकां जो रस्ते च चलणे ताई दिव्ये दी जरूरत नी होणी कने ना ही सूरजे दिया लौई दी जरूरत थी, क्योंकि परमेश्वरे ही है जडा लोकां जो लौ दिन्दा है। जडे लोक ओथु रेंदे न उना हमेशा ताई राजयां साईं राज करणा। (aiōn g165) 6 तालू स्वर्गदूते मिंजो ला बोलया, “ऐ सारियां गल्लां जडियां तिजो दसियां न, सै सचच न कने पुरे तरीके ला भरोसा करणे दे काबिल न। क्योंकि प्रभु परमेश्वरे जिनी संदेश देणेबालयां दे मना दा मार्गदर्शन करणे ताई अपना आत्मा दितया था, सेई है जिनी मिंजो, जडा की उदा स्वर्गदूत है, तिजो ऐ दसणे ताई भेजया है जडा जल्दी ही होणा।” 7 “कने दिख, मै तौली ओणे बाला है; सै धन्य न जडे इसा कताबा च लिखियां भविष्यवाणियां जो मदे न।” 8 मै सेई यहून्ना है जिनी इना सारियां गल्लां जो दिखया कने सुणया है। कने जालू मै इना गल्लां जो सुणया कने दिखया, तां मै स्वर्गदूते दी अराधना करणे ताई उदे पैरां च पेई गया। 9 पर उनी मिंजो ला बोलया, “इयां मत कर; क्योंकि मै तेरा कने तेरे भाई जडे परमेश्वरे दे संदेश देणेबाले न कने इसा कताबां दियां गल्लां जो मनणे बालयां साईं साथी सेबक है, सिर्फ परमेश्वरे दी ही अराधना कर।” 10 फिरी उनी मिंजो बोलया, इसा कताबां दिया भविष्यवाणियां दिया गल्लां जो लोकां ला मत लुका; क्योंकि इना चीजां दा पूरा होणे दा बकत नेडे आई गया है। 11 “जडा कोई भी बुरे कने गंदे कम्म करदा है, उना जो सै बुरे कने गंदे कम्म करदे रेणा

चाईदा। कने तियां ही जडे कोई अच्छे कने पबित्र कम्म करदे न, उना जो अच्छे कने पबित्र कम्म करदे रेणा चाईदा।” 12 तालू प्रभु योशये बोलया, मै तौली ही औणे बाला है; कने लोकां जडे-जडे कम्म कितया न, मै उना जो उना दे कम्मा जो दिखीकरी इनाम कने सजा देंगी। 13 “मै अलफा कने ओमेगा, पेहला कने आखरी, शुरूआत कने अंत है।” 14 धन्य न सै, जडे अपने कपडयां जो छेल्ये दे खूने ला धोई लेंदे न मतलब की अपने पापां जो खत्म करी दिन्दे न, इस ताई उना जो शेहरे दे दरबाजयां अंदर कने जिन्दगी दे स्खे दे फल खाणे दा हक है। 15 पर जडे बुरे कम्म करदे न, जादू टोणा, व्यभिचारी, खूनी, मूर्तिपूजक, कने हर इक झूठ जो पसंद करणे बाले कदी भी अंदर नी जाई सकदे न। 16 मै, यीशुए अपने स्वर्गदूते जो तुहाडे बाल इना गल्लां दी घोषणा करणे ताई भेजया है जडियां परमेश्वरे दिया कर्त्तिसिया च होना। मै राजा दाऊद दा बंशज है, कने मै ही ब्यागा दे तारे साईं है। 17 कने परमेश्वरे दी आत्मा कने छेल्ये दी लाडी योशये ला बोलदे न, “तिजो पक्का ओणा चाईदा।” हर इक जडा ऐ सुणदा है, उसयो भी ऐ बोलणा चाईदा, “आ!” कने जडा कोई भी प्यासा है, सै ओए कने उस पाणिणे जो पिया जडा जिन्दगी दिन्दा है, जडा की उना सारयां जो मुफ्त मिलदा है जडे उसयो पिणा चांदे न। 18 मै यहून्ना है कने मै तुसां सारयां जो ऐ चेताबनी दे दा है, जडे इसा कताबा दिया भविष्यवाणियां जो सुणदे न, जडियां हूण होआ दियां न कने अग्गे होणे बालियां न, जडियां मै इसा कताबा च लिखियां न; अगर कोई माणु इना गल्लां च कुछ भी बदांदा है, तां परमेश्वरे उदिया सजा जो भी बधाई देणा। उनी तुहांजो उना मुसीबतां ला मारणा, जडियां मै इसा कताबा च लिखियां न। 19 अगर कोई ऐसा माणु है जडा इसा कताबा च भविष्यवाणियां दियां गल्लां च कुछ हटाई दिन्दा है, तां परमेश्वरे तुहांजो ला उना आशीषां जो लेई लेणा जडियां मै इसा कताबा च लिखियां न कने परमेश्वरे उस जिन्दगी दे स्ख ला फल खाणे कने पबित्र शेहरे च रेणे दा हक भी बापस लेई लेणा। 20 ऐ यीशु मसीह दे शब्द न जडा उना सारियां गल्लां दी गसाई दिन्दा है जडियां इसा कताबा च लिखियां न, सै बोलदा है “हां, मै तोल्ली ओणे बाला है।” मै यहून्ना जबाब दित, “आमीन, हे प्रभु यीशु मसीह आ।” 21 मै प्राथना करदा है की साडे प्रभु यीशु मसीह दा अनुग्रह हमेशा तुसां सारयां पर होंदे रहे। आमीन।



फिरी में पबित्र नोए शेहर यस्जालेमे जो भी दिखया, जडा स्वर्गे ला परमेख्वरे दिया तरफा ला थले ओआ दा है। उस शेहरे जो नोईया लाडिया सांई तैयार कितया था, जिसा जो कपडे पहनाई करी कने श्रृंगार कितया है जडी लाडे सोगी बियाह करणे तांई तैयार है। फिरी में इक अबाज सुणी जडी परमेख्वरे दे सिंहासने ला जारे ला बोली, “दिख, हण परमेख्वरे लोकां बिच अपना घर बणाणा।” उनी उना सोगी रैणा, कने सै उदे लोक होणे, उनी अपु उना जो अपने लोकां दे स्मे च अपनाणा कने उनी उना सोगी रैणा कने उना भी उसयो परमेख्वरे दे स्मे च अपनाई लेणा।

प्रकाशितवाक्य 21:2-3

Reader's Guide

भटियाली at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

भटियाली at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bhattiyali---Bhattiyali-Bible/Noted

Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words and may wrongly imply *eternal* or *Hell*. * The note placement is skipped or adjusted for verses with non-standard numbering.

Abyssos

लूका 8:31
रोमियो 10:7
प्रकाशितवाक्य 9:1
प्रकाशितवाक्य 9:2
प्रकाशितवाक्य 9:11
प्रकाशितवाक्य 11:7
प्रकाशितवाक्य 17:8
प्रकाशितवाक्य 20:1
प्रकाशितवाक्य 20:3

aidios

रोमियो 1:20
यहूदा 1:6

aiōn

मती 12:32
मती 13:22
मती 13:39
मती 13:40
मती 13:49
मती 21:19
मती 24:3
मती 28:20
मरकुस 3:29
मरकुस 4:19
मरकुस 10:30
मरकुस 11:14
लूका 1:33
लूका 1:55
लूका 1:70
लूका 16:8
लूका 18:30
लूका 20:34
लूका 20:35
यहून्ना 4:14
यहून्ना 6:51
यहून्ना 6:58
यहून्ना 8:35
यहून्ना 8:51
यहून्ना 8:52
यहून्ना 9:32
यहून्ना 10:28
यहून्ना 11:26
यहून्ना 12:34
यहून्ना 13:8
यहून्ना 14:16

प्रेरितां दे कम्म 3:21
प्रेरितां दे कम्म 15:18
रोमियो 1:25
रोमियो 9:5
रोमियो 11:36
रोमियो 12:2
रोमियो 16:27
1 कुरिन्थियों 1:20
1 कुरिन्थियों 2:6
1 कुरिन्थियों 2:7
1 कुरिन्थियों 2:8
1 कुरिन्थियों 3:18
1 कुरिन्थियों 8:13
1 कुरिन्थियों 10:11
2 कुरिन्थियों 4:4
2 कुरिन्थियों 9:9
2 कुरिन्थियों 11:31
गलातियों 1:4
गलातियों 1:5
इफिसियों 1:21
इफिसियों 2:2
इफिसियों 2:7
इफिसियों 3:9
इफिसियों 3:11
इफिसियों 3:21
इफिसियों 6:12
फिलिप्पियों 4:20
कुलुसियों 1:26
1 तीमुथियुस 1:17
1 तीमुथियुस 6:17
2 तीमुथियुस 4:10
2 तीमुथियुस 4:18
तीतुस 2:12
इब्रानिया 1:2
इब्रानिया 1:8
इब्रानिया 5:6
इब्रानिया 6:5
इब्रानिया 6:20
इब्रानिया 7:17
इब्रानिया 7:21
इब्रानिया 7:24
इब्रानिया 7:28
इब्रानिया 9:26
इब्रानिया 11:3
इब्रानिया 13:8
इब्रानिया 13:21
1 पतरस 1:23

1 पतरस 1:25
1 पतरस 4:11
1 पतरस 5:11
2 पतरस 3:18
1 यहून्ना 2:17
2 यहून्ना 1:2
यहूदा 1:13
यहूदा 1:25
प्रकाशितवाक्य 1:6
प्रकाशितवाक्य 1:18
प्रकाशितवाक्य 4:9
प्रकाशितवाक्य 4:10
प्रकाशितवाक्य 5:13
प्रकाशितवाक्य 7:12
प्रकाशितवाक्य 10:6
प्रकाशितवाक्य 11:15
प्रकाशितवाक्य 14:11
प्रकाशितवाक्य 15:7
प्रकाशितवाक्य 19:3
प्रकाशितवाक्य 20:10
प्रकाशितवाक्य 22:5

aiōnios

मती 18:8
मती 19:16
मती 19:29
मती 25:41
मती 25:46
मरकुस 3:29
मरकुस 10:17
मरकुस 10:30
लूका 10:25
लूका 16:9
लूका 18:18
लूका 18:30
यहून्ना 3:15
यहून्ना 3:16
यहून्ना 3:36
यहून्ना 4:14
यहून्ना 4:36
यहून्ना 5:24
यहून्ना 5:39
यहून्ना 6:27
यहून्ना 6:40
यहून्ना 6:47
यहून्ना 6:54
यहून्ना 6:68

यहन्ना 10:28
यहन्ना 12:25
यहन्ना 12:50
यहन्ना 17:2
यहन्ना 17:3
प्रेरितां दे कम्म 13:46
प्रेरितां दे कम्म 13:48
रोमियो 2:7
रोमियो 5:21
रोमियो 6:22
रोमियो 6:23
रोमियो 16:25
रोमियो 16:26
2 कुरिन्थियों 4:17
2 कुरिन्थियों 4:18
2 कुरिन्थियों 5:1
गलातियों 6:8
2 थिस्सलुनीकियों 1:9
2 थिस्सलुनीकियों 2:16
1 तीमुथियुस 1:16
1 तीमुथियुस 6:12
1 तीमुथियुस 6:16
2 तीमुथियुस 1:9
2 तीमुथियुस 2:10
तीतुस 1:2
तीतुस 3:7
फिलेमोन 1:15
इब्रानिया 5:9
इब्रानिया 6:2
इब्रानिया 9:12
इब्रानिया 9:14
इब्रानिया 9:15
इब्रानिया 13:20
1 पतरस 5:10
2 पतरस 1:11
1 यहन्ना 1:2
1 यहन्ना 2:25
1 यहन्ना 3:15
1 यहन्ना 5:11
1 यहन्ना 5:13
1 यहन्ना 5:20
यहदा 1:7
यहदा 1:21
प्रकाशितवाक्य 14:6

eleēsē

रोमियो 11:32

Geenna

मत्ती 5:22
मत्ती 5:29
मत्ती 5:30
मत्ती 10:28
मत्ती 18:9
मत्ती 23:15
मत्ती 23:33
मरकुस 9:43

मरकुस 9:45
मरकुस 9:47
लका 12:5
याकूब 3:6

Hadēs

मत्ती 11:23
मत्ती 16:18
लका 10:15
लका 16:23
प्रेरितां दे कम्म 2:27
प्रेरितां दे कम्म 2:31
1 कुरिन्थियों 15:55
प्रकाशितवाक्य 1:18
प्रकाशितवाक्य 6:8
प्रकाशितवाक्य 20:13
प्रकाशितवाक्य 20:14

Limnē Pyr

प्रकाशितवाक्य 19:20
प्रकाशितवाक्य 20:10
प्रकाशितवाक्य 20:14
प्रकाशितवाक्य 20:15
प्रकाशितवाक्य 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 पतरस 2:4


Questioned

None yet noted




भरोसे दिया बजा ला ही अब्राहम नाए दे माणुए जो परमेश्वरे इक ऐसी जगा च जाणे ताई सदया जिसा जगा जो परमेश्वर बादे च उसयो विरासत च देणेबाला था। कने सै ऐ नी जाणदा था की कुथयो चलया है, पर फिर भी परमेश्वरे दा हुकम मन्नी करी सै उस देशे जो चली गया। - इब्रानिया 11:8

Israel's Exodus



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt!'" Exodus 13:17



Jesus' Journeys

मैं ये इस ताई बोलदा है क्योंकि मैं, माणुए दा पुत्र, इस संसारे च सारायां दी सेवा करणे ताई आया है, मैं इस ताई नी आया कि लोकां ला अघणी सेवा करां। मैं तां लोकां जो पापां ला छुटकारा कराणे ताई अपणे प्राण कीमत च देया आया है।” - मत्कुस 10/45



ऐ चिट्ठी पौलस दिया तरफा ला है, जडा प्रभु यीशु मसीह दा सेवक है, कने परमेस्वरे उसयो प्रेरित होणे ताई चुणया है, कने परमेस्वरे दा शुभसमाचार दा प्रचार करणे ताई नियुक्त कितया है। - रोमियो 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we? ▶			Genesis 1:26 - 2:3		Mankind is created in God's image, male and female He created us				
How are we sinful? ▶			Romans 5:12-19		Sin entered the world through Adam and then death through sin				
Where are we? ▶			When are we? ▼						
			Innocence		Fallen			Glory	
▶			Eternity Past	Creation 4004 B.C.	Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
			God	Father	John 10:30	Genesis 1:31 God's perfect fellowship with Adam in The Garden of Eden	1 Timothy 6:16 Living in unapproachable light		
Son	God's perfect fellowship	John 8:58 Pre-incarnate		John 1:14 Incarnate	Luke 23:43 Paradise				
Holy Spirit		Psalm 139:7 Everywhere		John 14:17 Living in believers					
Mankind	Living	Genesis 1:1 No Creation No people	Genesis 1:31 No Fall No unholy Angels	Ephesians 2:1-5 Serving the Savior or Satan on Earth			Matthew 25:41 Revelation 20:10 Lake of Fire prepared for the Devil and his Angels		
	Deceased believing			Luke 16:22 Blessed in Paradise					
	Deceased unbelieving			Luke 16:23, Revelation 20:5,13 Punished in Hades until the final judgment					
Angels	Holy	Genesis 1:1 No Creation No people	Genesis 1:31 No Fall No unholy Angels	Hebrews 1:14 Serving mankind at God's command			Revelation 20:13 Thalaasa Revelation 19:20 Lake of Fire Revelation 20:2 Abys		
	Imprisoned			2 Peter 2:4, Jude 6 Imprisoned in Tartarus					
	Fugitive			1 Peter 5:8, Revelation 12:10					
	First Beast			Rebelling against Christ Accusing mankind					
	False Prophet								
Satan									
Why are we? ▶			Romans 11:25-36, Ephesian 2:7		For God has bound all over to disobedience in order to show mercy to all				

Destiny

भटियाली at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. Jesus said, "*You did not choose me, but I chose you*," John 15:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philipians 2:9-11.



इस ताईं तुसां जाईं करी सारियां जातियां दे लोकां जो चले बणा; कने उना जो पिता, पुत्र, कने पबित्र आत्मा दे नाएे ने बपतिस्मा दीया। - मत्ती 28:19